

Namo tassa bhagavato arahato sammāsambuddhassa

Majjhimanikāye

Mūlapaññāsa-aṭṭhakathā

(Paṭhamo bhāgo)

Ganthārambhakathā

Karuṇāsītalahaḍayaṃ, paññāpajjotavihatamohatamaṃ;
Sanarāmaralokagaruṃ, vande **sugataṃ** gativimuttaṃ.

Buddhopi buddhabhāvaṃ, bhāvetvā ceva sacchikatvā ca;
Yaṃ upagato gatamalaṃ, vande tamanuttaraṃ **dhammaṃ**.

Sugatassa orasānaṃ, puttānaṃ mārasenamathanānaṃ;
Aṭṭhannampi samūhaṃ, siraśā vande **ariyasaṅghaṃ**.

Iti me pasannamatino, ratanattayavandanāmayāṃ puññaṃ;
Yaṃ suvihatantarāyo, hutvā tassānubhāvena.

Majjhimapamāṇasuttaṅkitassa idha **majjhimāgamavarassa**;
Buddhānubuddhasaṃvaṇṇitassa paravādamathanassa.

Atthappakāsanatthaṃ, **aṭṭhakathā** ādito vasisatehi;
Pañcahi yā saṅgītā, anusāṅgītā ca pacchāpi.

Sīhaḷadīpaṃ pana ābhatātha vasinā mahāmahindena;
Ṭhapitā sīhaḷabhāsāya, dīpavāsīnamatthāya.

Apanetvāna tatohaṃ, sīhaḷabhāsaṃ manoramaṃ bhāsaṃ;
Tantinayānucchavikaṃ, āropento viḡatadosaṃ.

Samayaṃ avilomento, therānaṃ theravaṃsadīpānaṃ;
Sunipuṇaviniḡchayānaṃ, mahāvihāre nivāsīnaṃ.

Hitvā punappunāgatamatthaṃ, atthaṃ pakāsayissāmi;
Sujanassa ca tuṭṭhatthaṃ, ciraṭṭhitatthañca dhammassa.

Sīlakathā dhutadhammā, kammaṭṭhānāni ceva sabbāni;
Cariyāvīdhānasahito, jhānasamāpattivīthāro.

Sabbā ca abhiññāyo, paññāsaṅkalananicchayo ceva;
Khandhādhatāyatanindriyāni ariyāni ceva cattāri.

Saccāni paccayākāradesanā suparisuddhanipuṇanayā;
Avimuttatantimaggā, vipassanābhāvanā ceva.

Iti pana sabbāṃ yasmā, **visuddhimagge** mayā suparisuddhaṃ;
Vuttaṃ tasmā bhīyyo, na taṃ idha vicārayissāmi.

‘‘Majjhe **visuddhimaggo**, esa catunnampi āgamānañhi;
Thatvā pakāsayissati, tattha yathābhāsitamattam’’.

Iceva kato tasmā, tampi gahetvāna saddhimetāya;
Aṭṭhakathāya vijānatha, majjhimsaṅgītiyā atthanti.

Nidānakathā

1. Tattha **majjhimsaṅgīti** nāma paṇṇāsato mūlapaṇṇāsā majjhimapañṇāsā uparipaṇṇāsāti paṇṇāsattayasaṅgahā. Vaggato ekekāya paṇṇāsāya pañca pañca vagge katvā pannarasavaggasamāyogā. Suttato diyaḍḍhasuttasatam dve ca suttantā. Padato tevīsuttarapañcasatādhikāni asītipadasahassāni. Tenāhu porāṇā –

‘‘Asītipadasahassāni, bhiiyo pañcasatāni ca;
Puna tevīsati vuttā, padamevaṃ vavatthita’’nti.

Akkharato satta akkharasatasahassāni cattālīsañca sahasāni tepaññāsañca akkharāni. Bhāṇavārato asīti bhāṇavārā tevīsapadādhiko ca upaḍḍhabhāṇavāro. Anusandhito pucchānusandhi-ajjhāsāyānusandhi-yathānusandhivasena saṅkhepato tividho anusandhi. Vitthārato panetha tīṇi anusandhisahassāni nava ca satāni honti. Tenāhu porāṇā –

‘‘Tīṇi sandhisahassāni, tathā navasatāni ca;
Anusandhinayā ete, majjhimassa pakāsītā’’ti.

Tattha paṇṇāsāsu **mūlapañṇāsā** ādi, vaggesu **mūlapariyāyavaggo**, suttasu **mūlapariyāyasuttam**. Tassāpi ‘‘evaṃ me suta’’ntiādikaṃ āyasmatā ānandena paṭhamamahāsaṅgītikāle vuttam nidānamādi. Sā panesā paṭhamamahāsaṅgīti sumaṅgalavilāsiniyā dīghanikāyāṭṭhakathāya ādimhi vitthārītā. Tasmā sā tattha vitthāritanayeneva vedītabbā.

1. Mūlapariyāyavaggo

1. Mūlapariyāyasuttavaṇṇanā

1. Yaṃ panetaṃ ‘‘evaṃ me suta’’ntiādikaṃ nidānam. Tattha **evanti** nipātapadam. **Meti**ādīni nāmapadāni. **Ukkaṭṭhāyaṃ viharatīti** ettha **vīti** upasaggapadam, **haratīti** ākhyātapadanti iminā tāva nayena padavibhāgo vedītabbo.

Atthato pana **evaṃ**-saddo tāva upamūpadesasampahaṃsanagaraḥaṇavacanasampañiggahākāranidassanāvadhāraṇādiānekattappabhedo. Tathāhesa – ‘‘evaṃ jātena maccena kattabbaṃ kusalaṃ bahu’’nti evamādīsu (dha. pa. 53) upamāyaṃ āgato. ‘‘Evaṃ te abhikkamītabbaṃ, evaṃ te paṭikkamītabba’’ntiādīsu (a. ni. 4.122) upadese. ‘‘Evametaṃ bhagavā, evametaṃ sugatā’’tiādīsu (a. ni. 3.66) sampahaṃsane. ‘‘Evamevaṃ paṇāyaṃ vasalī yasmim vā tasmim vā tassa muṇḍakassa samaṇakassa vaṇṇaṃ bhāsati’’tiādīsu (saṃ. ni. 1.187) garaḥaṇe. ‘‘Evaṃ bhanteti kho te bhikkhū bhagavato paccassosu’’ntiādīsu (ma. ni. 1.1) vacanasampañiggāhe. ‘‘Evaṃ byākho ahaṃ, bhante, bhagavatā dhammaṃ desitaṃ ājānāmī’’tiādīsu (ma. ni. 1.398) ākāre. ‘‘Ehi tvaṃ, māṇavaka, yena samaṇo ānando tenupasaṅkama, upasaṅkamitvā mama vacanena samaṇaṃ, ānandaṃ, appābādhaṃ appātaṅkaṃ lahuṭṭhānaṃ balaṃ phāsuvihāraṃ puccha – ‘subho māṇavo todeyyaputto, bhavantaṃ ānandaṃ, appābādhaṃ appātaṅkaṃ lahuṭṭhānaṃ balaṃ phāsuvihāraṃ pucchati’’ti, evañca vadehi sādhu kira bhavaṃ ānando yena subhassa māṇavassa todeyyaputtassa nivesanaṃ, tenupasaṅkamatū anukampaṃ upādāyā’’tiādīsu (dī. ni. 1.445) nidassane. ‘‘Taṃ kiṃ maññatha, kālāmā, ime dhammā kusalā vā akusalā vāti? Akusalā, bhante. Sāvajjā vā anavajjā vāti? Sāvajjā, bhante. Viññugarahitā vā viññuppasatthā vāti? Viññugarahitā, bhante. Samattā samādinā ahitāya dukkhāya saṃvattanti no vā, kathaṃ vo ettha hotīti? Samattā, bhante, samādinā ahitāya dukkhāya saṃvattanti, evaṃ no ettha hotī’’tiādīsu (a. ni. 3.66) avadhāraṇe. Svāyamidha ākāranidassanāvadhāraṇesu daṭṭhabbo.

Tattha ākāraṭṭhena **evaṃ**saddena etamatthaṃ dīpeti – nānāyanipuṇaṃ anekajjhāsayasamuṭṭhānaṃ atthabyañjanasampannaṃ vividhapāṭihāriyaṃ dhammatthadesanāpaṭivedhagambhīraṃ sabbasattānaṃ sakasakabhāsānurūpato sotapathamāgacchantaṃ tassa bhagavato vacanaṃ sabbappakārena ko samattho viññātuṃ, sabbathāmena pana sotukāmatāṃ janetvāpi evaṃ me sutāṃ, mayāpi ekenākārena sutanti.

Nidassanaṭṭhena “nāhaṃ sayambhū, na mayā idaṃ sacchikata”nti attānaṃ parimocento evaṃ me sutāṃ, mayāpi evaṃ sutanti idāni vattabbaṃ sakalaṃ suttaṃ nidasseti.

Avadhāraṇaṭṭhena “etadaggaṃ, bhikkhave, mama sāvakānaṃ bhikkhūnaṃ bahussutānaṃ yadidaṃ ānando, gatimantānaṃ, satimantānaṃ, dhitimantānaṃ, upaṭṭhākānaṃ yadidaṃ ānando”ti (a. ni. 1.219-223) evaṃ bhagavatā, “āyasmā ānando atthakusalo dhammakusalo byañjanakusalo niruttikusalo pubbāparakusalo”ti (a. ni. 5.169) evaṃ dhammasenāpatinā ca pasatthabhāvānurūpaṃ attano dhāraṇabalaṃ dassento sattānaṃ sotukamyataṃ janeti “evaṃ me sutāṃ, tañca kho atthato vā byañjanato vā anūnāmanadhikaṃ, evameva na aññāthā daṭṭhabba”nti.

Me-saddo tīsu atthesu dissati. Tathā hissa “gāthābhigītaṃ me abhojaneyya”ntiādīsu (su. ni. 81) mayāti attho. “Sādhu me, bhante bhagavā, saṃkhittena dhammaṃ desetū”tiādīsu (saṃ. ni. 4.88) mayhanti attho. “Dhammāyādā me, bhikkhave, bhavathā”tiādīsu (ma. ni. 1.29) mamāti attho. Idha pana “mayā suta”nti ca “mama suta”nti ca atthadvaye yujjati.

Sutanti ayaṃ suta-saddo saupasaggo ca anupasaggo ca gamana-vissuta-kilinna-upacitānuyoga-sotaviññeyya-sotadvārānusāraviññātādiānekatthappabhedo. Tathā hissa “senāya pasuto”tiādīsu gacchantoti attho. “Sutadhammassa passato”tiādīsu (udā. 11) vissutadhammassāti attho, “avassutā avassutassāti”ādīsu (pāci. 657) kilinnā kilinnassāti attho. “Tumhehi puññaṃ pasutaṃ anappaka”ntiādīsu (khu. pā. 7.12) upacitanti attho. “Ye jhānapasutā dhīrā”tiādīsu (dha. pa. 181) jhānānuyuttāti attho. “Diṭṭhaṃ sutāṃ muta”ntiādīsu (ma. ni. 1.241) sotaviññeyyanti attho. “Sutadharo sutasannicayo”tiādīsu (ma. ni. 1.339) sotadvārānusāraviññātadharoti attho. Idha panassa sotadvārānusārena “upadhārita”nti vā “upadhāraṇa”nti vāti attho. Me-saddassa hi mayāti atthe sati “evaṃ mayā sutāṃ sotadvārānusārena upadhārita”nti yujjati. Mamāti atthe sati “evaṃ mama sutāṃ sotadvārānusārena upadhāraṇa”nti yujjati.

Evametesu tīsu padesu **evanti** sotaviññāṇādiviññāṇakiccanidassanaṃ. **Meti** vuttaviññāṇasamaṅgipuggalanidassanaṃ. **Sutanti** assavanabhāvappaṭikkhepato anūnānadhikāvīparītaggahaṇanidassanaṃ. Tathā **evanti** tassā sotadvārānusārena pavattāya viññānavīthiyā nānappakārena ārammaṇe pavattibhāvappakāsaṇaṃ. **Meti** attappakāsaṇaṃ. **Sutanti** dhammappakāsaṇaṃ. Ayañhettha saṅkhepo “nānappakārena ārammaṇe pavattāya viññānavīthiyā mayā na aññaṃ kataṃ, idaṃ pana kataṃ, ayaṃ dhammo suto”ti.

Tathā **evanti** niddisitabbappakāsaṇaṃ. **Meti** puggalappakāsaṇaṃ. **Sutanti** puggalakiccappakāsaṇaṃ. Idaṃ vuttaṃ hoti – yaṃ suttaṃ niddisissāmi, taṃ mayā evaṃ sutanti.

Tathā **evanti** yassa cittasantānassa nānākārapavattiyā nānatthabyañjanaggahaṇaṃ hoti, tassa nānākāraniddeso. **Evanti** hi ayaṃ ākārapaññatti, **meti** kattuniddeso, **sutanti** visayaniddeso. Ettāvata nānākārapavattena cittasantānena taṃsamaṅgino kattuvīsaye gahaṇasanniṭṭhānaṃ kataṃ hoti.

Atha vā **evanti** puggalakiccaniddeso. **Sutanti** viññāṇakiccaniddeso. **Meti** ubhayakiccayuttapuggalaniddeso. Ayaṃ panettha saṅkhepo – mayā savanakiccaviññāṇasamaṅginā puggalena viññāṇavasena laddhasavanakiccavohārena sutanti.

Tattha **evanti** ca **meti** ca saccikaṭṭhaparamatthavasena avijjamānapaññatti. Kiñhettha taṃ paramatthato atthi, yaṃ evanti vā meti vā niddesaṃ labhettha? **Sutanti** vijjamānapaññatti. Yañhi tamettha sotena upaladdhaṃ, taṃ paramatthato vijjamānanti.

Tathā **evanti** ca **meti** ca taṃ taṃ upādāya vattabbato upādāpanñatti. **Sutanti** diṭṭhādīni upanidhāya vattabbato upanidhāpanñatti. Ettha ca **evanti** vacanena asammohaṃ dīpeti. Na hi sammūlho

nānappakārapaṭivedhasamattho hoti. **Sutanti** vacanena sutassa asammosaṃ dīpeti. Yassa hi sutam sammutṭham hoti, na so kālantarena mayā sutanti paṭijānāti. Iccassa asammosena paññāsiddhi, asammosena pana satisiddhi. Tatha paññā pubbaṅgamāya satiyā byañjanāvadhāraṇasamatthatā, satipubbaṅgamāya paññāya atthapaṭivedhasamatthatā, tadubhayasamatthatāyogena atthabyañjanasampannassa dhammakosassa anupālanasamatthato dhammabhaṇḍāgārikattasiddhi.

Aparo nayo – **evanti** vacanena yoniso manasikāraṃ dīpeti, ayoniso manasikaroto hi nānappakārapaṭivedhābhāvato. **Sutanti** vacanena avikkhepaṃ dīpeti, vikkhittacittassa savanābhāvato. Tathā hi vikkhittacitto puggalo sabbasampattiyā vuccamānopi “na mayā sutam, puna bhaṇathā”ti bhaṇati. Yoniso manasikārena cettha attasammāpaṇidhiṃ pubbe ca katapuññataṃ sādheti, sammā apaṇihittatassa pubbe akatapuññassa vā tadabhāvato. Avikkhepena pana saddhammassavanaṃ sappurisūpanissayañca sādheti. Na hi vikkhittacitto sotum sakkoti, na ca sappurise anupassayamānassa savanaṃ atthīti.

Aparo nayo – yasmā **evanti** yassa cittasantānassa nānākārappavattiyā nānatthabyañjanaggahaṇaṃ hoti, tassa nānākāraniddesoti vuttaṃ. So ca evaṃ bhaddako ākāro na sammā appaṇihittatano pubbe akatapuññassa vā hoti, tasmā **evanti** iminā bhaddakena ākārena pacchimacakkadvayasampattiṃ attano dīpeti, **sutanti** savanayogena purimacakkadvayasampattiṃ. Na hi appatirūpadese vasato sappurisūpanissayavirahitassa vā savanaṃ atthi. Iccassa pacchimacakkadvayasiddhiyā āsayasuddhi siddhā hoti. Purimacakkadvayasiddhiyā payogasuddhi. Tāya ca āsayasuddhiyā adhigamabyattisiddhi, payogasuddhiyā āgamabyattisiddhi. Iti payogāsayasuddhassa āgamādhigamasampannassa vacanaṃ aruṇuggaṃ viya sūriyassa udayato yonisomanasikāro viya ca kusalakamma arahati bhagavato vacanassa pubbaṅgamaṃ bhavitunti ṭhāne nidānaṃ ṭhapento **evaṃ me sutanti**ādīmāha.

Aparo nayo – **evanti** iminā nānappakārapaṭivedhadīpakena vacanena attano atthapaṭibhānapaṭisambhīdāsampattisabbhāvaṃ dīpeti. **Sutanti** iminā sotabbabhedapaṭivedhadīpakena dhammaniruttipaṭisambhīdāsampattisabbhāvaṃ. **Evanti** ca idaṃ yonisomanasikāradīpakaṃ vacanaṃ bhāsamāno – “ete mayā dhammā manasānupekkhitā diṭṭhiyā suppaṭividdhā”ti dīpeti. **Sutanti** idaṃ savanayogadīpakaṃ vacanaṃ bhāsamāno – “bahū mayā dhammā sutā dhātā vacasā paricitā”ti dīpeti. Tadubhayenapi atthabyañjanapāripūriṃ dīpento savane ādaraṃ janeti. Atthabyañjanaparipuññañhi dhammaṃ ādarena assuṇanto mahatā hitā paribāhiro hotīti ādaraṃ janetvā sakkaccaṃ dhammo sotabboti.

“Evaṃ me suta”nti iminā pana sakalena vacanena āyasmā ānando tathāgatappaveditaṃ dhammaṃ attano adahanto asappurisabhūmiṃ atikkamati, sāvakkataṃ paṭijānanto sappurisabhūmiṃ okkamati. Tathā asaddhammā cittaṃ vuṭṭhāpeti, saddhamme cittaṃ paṭiṭṭhāpeti. “Kevalaṃ sutamevetaṃ mayā tasseva pana bhagavato vacana”nti dīpento attānaṃ parimoceti, sathhāraṃ apadisati, jinavacanaṃ appeti, dhammanettiṃ paṭiṭṭhāpeti.

Apica “evaṃ me suta”nti attanā uppāditabhāvaṃ appaṭijānanto purimavacanaṃ vivaranto “sammukhā paṭiggahitamidaṃ mayā tassa bhagavato catuvesārājjavīsārādassa dasabaladharassa āsabatṭhānaṭṭhāyino sīhanādanādino sabbasattuttamassa dhammissarassa dhammarājassa dhammādhipatino dhammadīpassa dhammasaraṇassa saddhammavaracakkavattino sammāsambuddhassa vacanaṃ, na ettha atthe vā dhamme vā pade vā byañjane vā kañkhā vā vimati vā kattabbā”ti sabbadevamanussānaṃ imasmiṃ dhamme assaddhiyaṃ vināseti, saddhāsampadaṃ uppādetīti. Tenetaṃ vuccati –

“Vināsayati assaddham, saddham vaḍḍheti sāsane;
Evaṃ me sutamiccevaṃ, vadaṃ gotamasāvako”ti.

Ekanti gaṇanaparicchedaniddeso. **Samayanti** paricchinnaniddeso. **Ekam samayanti** aniyamitaparidīpanaṃ. Tatha **samayasaddo** –

Samavāye khaṇe kāle, samūhe hetudiṭṭhisu;
Paṭilābhe pahāne ca, paṭivedhe ca dissati.

Tathā hissa “appeva nāma svepi upasaṅkameyyāma kālañca samayañca upādāyā”ti evamādīsu (dī. ni.

1.447) samavāyo attho. “Ekova kho, bhikkhave, khaṇo ca samayo ca brahmacariyavāsāyā”tiādīsu (a. ni. 8.29) khaṇo. “Uṇhasamayo pariḷāhasamayo”tiādīsu (pāci. 358) kālo. “Mahāsamayo pavanasmī”ntiādīsu samūho. “Samayopi kho te, bhaddāli, appaṭividdho ahosi, bhagavā kho sāvatthiyaṃ viharati, bhagavāpi maṃ jānissati, ‘bhaddāli, nāma bhikkhu satthusāsane sikkhāya na paripūrakārī’ti, ayampi kho te, bhaddāli, samayo appaṭividdho ahosi”tiādīsu (ma. ni. 2.135) hetu. “Tena kho pana samayena uggāhamāno paribbājako samaṇamuṇḍikāputto samayappavādake tindukācīre ekasālake mallikāya ārāme paṭivasatī”tiādīsu (ma. ni. 2.260) diṭṭhi.

“Diṭṭhe dhamme ca yo attho, yo cattho samparāyiko;
Atthābhisamayā dhīro, paṇḍitoti pavuccatī”ti. –

Ādīsu (saṃ. ni. 1.129) paṭilābho. “Sammā mānābhisamayā antamakāsi dukkhassā”tiādīsu (ma. ni. 1.24) pahānaṃ. “Dukkhassa pīḷanaṭṭho saṅkhataṭṭho santāpaṭṭho vipariṇāmaṭṭho abhisamayaṭṭho”tiādīsu (paṭi. ma. 3.1) paṭivedho. Idha panassa kālo attho. Tena saṃvacchara-utu-māsaḍḍhamāsa-ratti-diva-pubbaṇha-majjhānika-sāyāna- paṭhamamajjhimapacchimayāma-muhuttādīsu kālappabhedabhūtesu samayesu ekaṃ samayanti dīpeti.

Tattha kiñcāpi etesu saṃvaccharādīsu samayesu yaṃ yaṃ suttaṃ yaṃhi yaṃhi saṃvacchare utumhi māse pakkhe rattibhāge divasabhāge vā vuttaṃ, sabbaṃ taṃ therassa suviditaṃ suvavatthāpitaṃ paññāya. Yasmā pana “evaṃ me suttaṃ asukasamvacchare asukautumhi asukamāse asukapakkhe asukarattibhāge asukadivasabhāge vā”ti evaṃ vutte na sakkā sukheṇa dhāretuṃ vā uddisituṃ vā uddisāpetuṃ vā, bahu ca vattabbaṃ hoti, tasmā ekeneva padena tamatthaṃ samodhānetvā “ekaṃ samaya”nti āha.

Ye vā ime gabbhokkantisamayo jātisamayo saṃvegasamayo abhinikkhamanasamayo dukkarakārikasamayo māravijayasamayo abhisambodhisamayo diṭṭhadhammasukhavihārasamayo desanāsamayo parinibbānasamayoti evamādayo bhagavato devamanussesu ativiya suppakāsā anekakālappabhedā eva samayā, tesu samayesu desanāsamayasaṅkhātāṃ ekaṃ samayanti dīpeti. Yo cāyaṃ ñāṇakaruṇākiccasamayesu aruṇākiccasamayo, attahitaparahitapaṭipattisamayesu parahitapaṭipattisamayo, sannipatitānaṃ karaṇīyadvayasamayesu dhammikathāsamayo, desanāpaṭipattisamayesu desanāsamayo, tesupi samayesu aññataraṃ sandhāya “ekaṃ samaya”nti āha.

Kasmā panettha yathā abhidhamme “yasmim̄ samaye kāmāvacara”nti ca ito aññesu suttapadesu “yasmim̄ samaye, bhikkhave, bhikkhu vivicceva kāmehī”ti ca bhummavacanena niddeso kato, vinaye ca “tena samayena buddho bhagavā”ti karaṇavacanena, tathā akatvā “ekaṃ samaya”nti upayogavacananiddeso katoti. Tattha tathā idha ca aññathā atthasambhavato. Tattha hi abhidhamme ito aññesu suttapadesu ca adhikaraṇattho bhāvenabhāvalakkhaṇattho ca sambhavati. Adhikaraṇaṅhi kālattho ca samūhattho ca samayo, tattha vuttānaṃ phassādīdhammānaṃ khaṇasamavāyahetusaṅkhātassa ca samayassa bhāvena tesam̄ bhāvo lakkhīyati, tasmā tadatthajotanatthaṃ tattha bhummavacananiddeso kato.

Vinaye ca hetuattho karaṇattho ca sambhavati. Yo hi so sikkhāpadapaññattisamayo sārīputtādīhipi dubbīññeyyo, tena samayena hetubhūtena karaṇabhūtena ca sikkhāpadāni paññāpayanto sikkhāpadapaññattihetuṅca apekkhamāno bhagavā tattha tattha vihāsi, tasmā tadatthajotanatthaṃ tattha karaṇavacanena niddeso kato.

Idha pana aññasmiṅca evaṃjātike accantasam̄yogattho sambhavati. Yaṅhi samayaṃ bhagavā imaṃ aññaṃ vā suttantaṃ desesi, accantameva taṃ samayaṃ karuṇāvihārena vihāsi, tasmā tadatthajotanatthaṃ idha upayogavacananiddeso katoti.

Tenetam̄ vuccatī –

“Taṃ taṃ atthamapekkhitvā, bhummēna karaṇena ca;
Aññatra samayo vutto, upayogena so idhā”ti.

Porāṇā pana vaṇṇayanti – “tasmim̄ samaye”ti vā – “tena samayenā”ti vā – “ekaṃ samaya”nti vā

abhilāpamattabhedo esa, sabbattha bhummameva atthoti. Tasmā “ekaṃ samaya”nti vuttepi “ekasmiṃ samaye”ti attho vedītabbo.

Bhagavāti garu. Garuṇhi loka “bhagavā”ti vadanti. Ayañca sabbaguṇavisitṭhatāya sabbasattānaṃ garu, tasmā “bhagavā”ti vedītabbo. Porāṇehipi vuttaṃ –

“Bhagavāti vacanaṃ seṭṭhaṃ, bhagavāti vacanamuttamaṃ;
Garugāravayutto so, bhagavā tena vuccatī”ti.

Apica –

“Bhāgyavā bhaggavā yutto, bhagehi ca vibhattavā;
Bhattavā vantaḡamano, bhavesu bhagavā tato”ti. –

Imissā gāthāya vasenassa padassa vitthārato attho vedītabbo. So ca **visuddhimagge** buddhānussatiniddese vuttoyeva.

Ettāvatā cettha **evaṃ me sutanti** vacanena yathāsutaṃ dhammaṃ dassento bhagavato dhammasarīraṃ paccakkhaṃ karoti. Tena – “nayaīdaṃ atikkantasatthukaṃ pāvacaṇaṃ, ayaṃ vo satthā”ti satthu adassanena ukkaṇṭhitaṃ janaṃ samassāseti.

Ekaṃ samayaṃ bhagavāti vacanena tasmīṃ samaye bhagavato avijjamānabhāvaṃ dassento rūpakāyapariniḡbānaṃ sādheti. Tena “evaṃvidhassa nāma ariyadhammassa desako dasabaladharo vajīrasaṅghātasamānakāyo, sopi bhagavā pariniḡbuto, kena aññena jīvite āsā janetabbā”ti jīvītamadamattaṃ janaṃ saṃvejeti, saddhamme cassa ussāhaṃ janeti.

Evanti ca bhaṇanto desanāsampattiṃ niddisati. **Me sutanti** sāvakasampattiṃ. **Ekaṃ samayanti** kālasampattiṃ. **Bhagavāti** desakasampattiṃ.

Ukkaṭṭhāyaṃ viharatīti ettha ukkāti dīpikā, tañca nagaraṃ “maṅgaladivaso sukhaṇo sunakkhattaṃ mā atikkamī”ti rattimpi ukkāsu ṭhitāsu māpitattā ukkaṭṭhāti vuccati. Daṇḡadāpīkāsu jāletvā dhārīyamānāsu māpitattāti vuttaṃ hoti, tassaṃ **ukkaṭṭhāyaṃ**. Samīpatthe cettaṃ bhummavacaṇaṃ. **Viharatīti** avisesena iriyāpathadibbrahmaariyaviḡhāresu aññataraviḡhārasamaṅgiparidīpanametaṃ. Idha pana ṭhānagamananisinnasayanappabhedesu iriyāpathesu aññatarairiyāpathasamāyogaparidīpanaṃ. Tena ṭhitopi gacchantopi nisinnopi sayānopi bhagavā viharaticceva vedītabbo. So hi bhagavā ekaṃ iriyāpathabādhanāṃ aññena iriyāpathena vicchīndītvā aparīpatantaṃ attabhāvaṃ haratī pavatteti, tasmā viharatīti vuccati.

Subhagavaneti ettha subhagattā **subhagaṃ**, sundarasirikattā sundarakāmatā cāti vuttaṃ hoti. Tassa hi vanassa sīrisampattiyā manussā annapānādīni ādāya divasaṃ tattheva chaṇasamaḡjaussave karontā bhogasukhaṃ anubhontī, sundarasundare cettha kāme patthenti “puttaṃ labhāma, dhītaraṃ labhāma”ti, tesaṃ taṃ tattheva hoti, evaṃ taṃ sundarasirikattā sundarakāmatā ca **subhagaṃ**. Apica bahujanakantatāyapi subhagaṃ. Vanayatīti **vanam**, attasampadāya sattānaṃ bhattiṃ kāreti, attani sinehaṃ uppādetīti attho. Vanute itī vā **vanam**, nānāvīdhakusuma-gandhasammodamattakolādivihaṅgamābhīrutehi mandamālūtacalitarukkhasākhāvīṭapapallavapalāsehi ca “etha maṃ paribhuṅjathā”ti sabbapāṇīno yāceti viyāti attho. Subhagañca taṃ vanañcāti **subhagavanam**. Tasmīṃ **subhagavane**. Vanañca nāma ropīmaṃ, sayamaḡjātanti duvidhaṃ. Tattha veḡuvanajetavanādīni ropīmāni. Andhavanamahāvanaañjanavanādīni sayamaḡjātāni. Idampi sayamaḡjātanti vedītabbaṃ.

Sālarājamūleti ettha sālarukkhopi sāloti vuccati. Yathāha “seyyathāpi, bhikkhave, gāmassa vā nigamassa vā avidūre mahantaṃ sālavanaṃ, tañcassa eḡaṇḡhehi sañchanna”nti (ma. nī. 1.225) “antarena yamakasālāna”nti ca (dī. nī. 2.195) vanappatījetṭhakarukkhopi. Yathāha –

“Taveva deva vijīte, tavevuyyānabhūmīyā;
Ujvamaṃsā mahāsālā, nīlobhāsā manoramā”ti. (jā. 2.19.4);

Yo koci rukkhopi. Yathāha “atha kho taṃ, bhikkhave, māluvabījaṃ aññatarasmiṃ sālāmūle nipateyyā”ti (ma. ni. 1.469). Idha pana vanappatiyeṭṭhakaruṅkko adhippeto. Rājasaddo panassa tameva jeṭṭhakabhāvaṃ sādheti. Yathāha “suppatiṭṭhitassa kho brāhmaṇa dhammika nigrodharājassā”ti (a. ni. 6.54). Tattha dvedhā samāso, sālānaṃ rājātipi **sālarājā**, sālo ca so jeṭṭhakatṭhena rājā ca itipi **sālarājā**. **Mūlanti** samīpaṃ. Ayañhi mūlasaddo, “mūlāni uddhareyya, antamaso usiranālimattānipī”tiādīsu (a. ni. 4.195) mūlamūle dissati. “Lobho akusalāmūla”ntiādīsu (dī. ni. 3.305) asādhāraṇahetumhi. “Yāva majjhanhike kāle chāyā pharati, nivāte paṇṇāni patanti, ettāvātā rukkhāmūla”ntiādīsu samīpe. Idha pana samīpe adhippeto, tasmā sālarājassa samīpeti evamettha attho daṭṭhabbo.

Tattha siyā – yadi tāva bhagavā ukkaṭṭhāyaṃ viharati, “subhagavane sālarājamūle”ti na vattabbaṃ, atha tattha viharati, “ukkaṭṭhāya”nti na vattabbaṃ, na hi sakkā ubhayattha ekaṃ samayaṃ viharitunti. Na kho panetaṃ evaṃ daṭṭhabbaṃ.

Nanu avocumha “samīpatthe cetāṃ bhumavacana”nti. Tasmā yathā gaṅgāyamunādīnaṃ samīpe goyūthāni carantāni “gaṅgāya caranti, yamunāya caranti”ti vuccanti, evamidhāpi yadidaṃ ukkaṭṭhāya samīpe subhagavanāṃ sālarājamūlaṃ, tattha viharanto vuccati “ukkaṭṭhāyaṃ viharati subhagavane sālarājamūle”ti. Gocaraḡāmanidassanattañhissa ukkaṭṭhāvacaṇaṃ, pabbajitānurūpanivāsaṭṭhānanidassanattaṃ sesavacaṇaṃ.

Tattha ukkaṭṭhākittanena āyasmā ānando bhagavato gahaṭṭhānuggahakaraṇaṃ dasseti, subhagavanādikittanena pabbajitānuggahakaraṇaṃ. Tathā purimena paccayaggahaṇato attakilamathānuyogavivajjanaṃ, pacchimena vatthukāmappahānato kāmasukhallikānuyogavivajjanupāyadassanaṃ. Purimena ca dhammadesanābhiyogaṃ, pacchimena vivekādhimuttīṃ. Purimena karuṇāya upagamaṇaṃ, pacchimena paññāya apagamaṇaṃ. Purimena sattānaṃ hitasukhanipphādanādhimuttataṃ, pacchimena parahitasukhakarāṇe nirupalepanaṃ. Purimena dhammasukhāpariccāganimittaṃ phāsuvihāraṃ, pacchimena uttarimanussadhammānuyoganimittaṃ. Purimena manussānaṃ upakārahulataṃ, pacchimena devānaṃ. Purimena loke jātassa loke saṃvaḍḍhabhāvaṃ, pacchimena lokena anupalittataṃ. Purimena “ekapuggalo, bhikkhave, loke uppajjamāno uppajjati bahujaṇahitāya bahujaṇasukhāya lokānukampāya atthāya hitāya sukhāya devamanussānaṃ. Katamo ekapuggalo, tathāgato ahaṃ sammāsambuddho”ti (a. ni. 1.170) vacanato yadattaṃ bhagavā uppanno, tadatthapariniṭṭhānaṃ, pacchimena yattha uppanno, tadanurūpavihāraṃ. Bhagavā hi paṭṭhamāṃ lumbinivane, dutiyaṃ bodhimaṇḍeti lokiyalokuttarāya uppattiyā vaneyeva uppanno, tenassa vaneyeva vihāraṃ dasseti evamādinā nāyenettha atthayojanā veditabbā.

Tatrāti desakālaparidīpanaṃ. Tañhi yaṃ samayaṃ viharati, tatra samaye. Yasmiṇca sālarājamūle viharati, tatra sālarājamūleti dīpeti. Bhāsittabbayutte vā desakāle dīpeti. Na hi bhagavā ayutte dese kāle vā dhammaṃ bhāsati. “Akālo kho tāva bhāhiyā”ti (udā. 10) ādicettha sādhaṃ. **Khoti** padapūraṇamatte avadhāraṇe ādikālathe vā nipāto. **Bhagavāti** lokagarudīpanaṃ. **Bhikkhūti** kathāsavanayuttapuggalavacaṇaṃ. Apicettha, “bhikkhakoti bhikkhu, bhikkhācariyaṃ ajjhupagatoti bhikkhū”tiādinā (pārā. 45) nāyena vacanatto veditabbo. **Āmantesīti** ālapi abhāsi sambodhesīti ayamettha attho. Aññatra pana ñāpanepi hoti. Yathāha “āmantayāmi vo, bhikkhave, paṭivedayāmi vo, bhikkhave”ti. Pakkosanepi. Yathāha “ehi tvaṃ bhikkhu mama vacanena sārīputtaṃ āmantehī”ti (a. ni. 9.11).

Bhikkhavoti āmantanākāradīpanaṃ. Tañca bhikkhanasīlatādiguṇayogasiddhattā vuttaṃ. Bhikkhanasīlatāguṇayuttopi hi **bhikkhu** bhikkhanadhammatāguṇayuttopi. Bhikkhane sādhuḡarītāguṇayuttopi saddavidū maññanti. Tena ca nesāṃ bhikkhanasīlatādiguṇayogasiddhena vacanena hīnādhikājanasevitaṃ vuttīṃ pakāsento uddhatādīnabhāvaniggaṃ karoti. Bhikkhavoti iminā ca karuṇāvīpphārasommahadayanayanānīpātapubbaṅgamaṇa vacanena te attano mukhābhīmukhe karoti. Teneva ca kathetukamyatādīpakena vacanena nesāṃ sotukamyataṃ janeti. Teneva ca sambodhanaṭṭhena sādhuḡaṃ savanamanasikārepi ne niyojati. Sādhuḡasavanamanasikārayattā hi sāsanasampatti.

Aparesupi devamanussesu vijjamānesu kasmā bhikkhūyeva āmantesīti ce. Jeṭṭhasēṭṭhāsannasādāsannihitabhāvato. Sabbaparisisādhāraṇā hi bhagavato dhammadesanā. Parisāya ca jeṭṭhā bhikkhū, paṭṭhamuppannattā. Seṭṭhā, anagāriyabhāvaṃ ādiṃ katvā satthucariyānuvidhāyakattā sakalāsānapaṭiggāhakattā ca. Āsannā, tattha nisīnesu satthusantikattā. Sādāsannihitā,

satthusantikāvacarattāti. Apica te dhammadesanāya bhājanam, yathānusiṭṭham paṭipattisabbhāvato. Visesato ca ekacce bhikkhūyeva sandhāya ayam desanātipi te eva āmantesi.

Tattha siyā – kimattham pana bhagavā dhammam desento paṭhamam bhikkhū āmantesi, na dhammeva desetī. Satijananattham. Bhikkhū hi aññam cintentāpi vikkhittacittāpi dhammam paccavekkhantāpi kammaṭṭhānam manasikarontāpi nisinnā honti, te anāmantetvā dhamme desiyamāne – ‘‘ayam desanā kinnidānā kimpacayā katamāya aṭṭhuppattiyā desitā’’ti sallakkhetum asakkontā duggahitam vā gaṇheyym, na vā gaṇheyym. Tena nesam satijananattham bhagavā paṭhamam āmantetvā pacchā dhammam desetī.

Bhadanteti gāravavacanametam, satthuno paṭivacanadānam vā, apicettha bhikkhavoti vadamāno bhagavā te bhikkhū ālapati. Bhadanteti vadamānā te bhagavantam paccālapanti. Tathā bhikkhavoti bhagavā ābhāsati. Bhadanteti te paccābhāsanti. Bhikkhavoti paṭivacanam dāpeti, bhadanteti paṭivacanam denti. **Te bhikkhūti** ye bhagavā āmantesi. **Bhagavato paccassosunti** bhagavato āmantanam paṭiassosum, abhimukhā hutvā suṇimṣu sampaṭicchimṣu paṭiggahesunti attho. **Bhagavā etadavocāti** bhagavā etam idāni vattabbam sakalam suttam avoca.

Ettāvatā ca yam āyasmatā ānandena kamalakuvalayujjalavimalasādurasasalilāya pokkharāṇiyā sukhāvataranattam nimmalasilātalaracanavilāsasobhitaratanasopānam vippaṇṇamuttātalasadisavālikāṇṇapaṇḍarabhūmibhāgam tittam viya suvibhattabhittivicitravedikāparikkhittassa nakkhattapatham phusitukāmatāya viya, vijambhitasamussayassa pāsādarassa sukhārohanattam dantamaya-saṅhamuduphalaka-kañcanalatāvinaddha-maṇiṅaṇappabhāsamudayujjalasobham sopānam viya, suvaṇṇavalayānūpurādisaṅghaṭṭanasaddasammissitakathitahasitamadhurassaragehajanavicaritassa ulāraissariyavibhasobhitassa mahāgharassa sukhappavesanattam suvaṇṇarajatamanimuttāpavāḷādijutivissaravijjotita-suppatiṭṭhitavisāladvārābham mahādvāram viya ca atthabyañjanasampannassa buddhānam desanāññāgambhīrabhāvasamsūcakassa imassa suttassa sukhāvagāhanattam kāladesadesakavattuparisāpadesapaṭimaṇḍitam nidānam bhāsitam, tassa atthavaṇṇanā samattā.

Suttanikkhepavaṇṇanā

Idāni ‘‘sabbadhammālapariyāyam vo’’tiādīnā nayena bhagavatā nikkhittassa suttassa vaṇṇanāya okāso anupatto. Sā panesā suttavaṇṇanā yasmā suttanikkhepam vicāretvā vuccamānā pākaṭā hoti, tasmā suttanikkhepam tāva vicārayissāma. Cattāro hi suttanikkhepā attajjhāsayo parajjhāsayo pucchāvasiko aṭṭhuppattikoti.

Tattha yāni suttāni bhagavā parehi anajjhittā kevalam attano ajjhāsayeneva kathesi. Seyyathidaṃ, ākaṅkheyyasuttam, vatthasuttam, mahāsatiṭṭhānasuttam, mahāsaḷāyatanavibhaṅgasuttam, ariyavaṃsasuttam, sammappadhānasuttantahārako, iddhipādāndriyabalabojjhaṅgamaggaṅgasuttantahārakoti evamādīni. Tesam attajjhāsayo nikkhepo.

Yāni pana ‘‘paripakkā kho rāhulassa vimuttiṭṭhānāyā dhammā, yaṃnūnāham rāhulam uttari āsavānam khaye vineyya’’nti (saṃ. ni. 4.121) evam paresam ajjhāsayam khantiṃ manam abhinīhāram bujjanabhāvañca avekkhitvā parajjhāsayavasena kathitāni. Seyyathidaṃ, cūḷarāhulovādasuttam, mahārāhulovādasuttam, dhammacakkappavattanam, dhātuvibhaṅgasuttanti evamādīni. Tesam parajjhāsayo nikkhepo.

Bhagavantam pana upasaṅkamtivā catasso parisā cattāro vaṇṇā nāgā supaṇṇā gandhabbā asurā yakkhā mahārājāno tāvatimsādayo devā mahābrahmāti evamādayo ‘‘bojjaṅgā bojjaṅgā’’ti, bhante, vuccanti. ‘‘Nīvaraṇā nīvaraṇā’’ti, bhante, vuccanti. Ime nu kho, bhante, pañcupādānakkhandhā. ‘‘Kim sūda vittam purisassa seṭṭha’’ntiādīnā (su. ni. 183) nayena pañham pucchanti. Evam puṭṭhena bhagavatā yāni kathitāni bojjaṅgasamuyuttādīni. Yāni vā panaññānīpi devatāsamuyutta-mārasamuyutta-brahmasamuyutta-sakkapañha-cūḷavedalla-mahāvedalla-sāmaññaphala-āḷavaka-sūciloma-kharalomasuttādīni, tesam pucchāvasiko nikkhepo.

Yāni panetāni uppannam kāraṇam paṭicca kathitāni. Seyyathidaṃ, dhammadāyādam cūḷasīhanādam

candūpamaṃ puttamaṃsūpamaṃ dārukhandhūpamaṃ aggikkhandhūpamaṃ pheṇapiṇḍūpamaṃ pāricchattakūpamanti evamādīni. Tesamaṃ aṭṭhuppattiko nikkhepo.

Evamimesu catūsu nikkhepesu imassa suttassa aṭṭhuppattiko nikkhepo. Aṭṭhuppattiyañhi idaṃ bhagavatā nikkhittaṃ. Katarāya aṭṭhuppattiyā? Pariyattiṃ nissāya uppanne māne. Pañcasatā kira brāhmaṇā tiṇṇaṃ vedānaṃ pāragū aparabhāge bhagavato dhammadesanaṃ sutvā kāmesu ādīnavaṃ nekkhamme ca ānisaṃsaṃ sampassamānā bhagavato santike pabbajitvā nacirasseva sabbaṃ buddhavacanaṃ uggaṇhitvā pariyattiṃ nissāya mānaṃ uppādesuṃ “yaṃ yaṃ bhagavā katheti, taṃ taṃ mayamaṃ khippameva jānāma, bhagavā hi tīṇi līṅgāni cattāri padāni satta vibhattiyo muñcivā na kiñci katheti, evamaṃ kathite ca amhākaṃ gaṇṭhipadaṃ nāma natthi”ti. Te bhagavati agāravā hutvā tato paṭṭhāya bhagavato upaṭṭhānampi dhammassavanampi abhiṇṇamaṃ na gacchanti. Bhagavā tesamaṃ taṃ cittacāraṃ ñatvā “abhabbā ime imamaṃ mānakhilaṃ anupahacca maggaṃ vā phalaṃ vā sacchikātu”nti tesamaṃ sutapariyattiṃ nissāya uppannaṃ mānaṃ aṭṭhuppattiṃ katvā desanākusalo bhagavā mānabhañjanatthaṃ **sabbadhammāmūlapariyāyanti** desanaṃ ārabhi.

Tattha **sabbadhammāmūlapariyāyanti** sabbesamaṃ dhammānaṃ mūlapariyāyaṃ. Sabbesanti anavasesānaṃ. Anavasesavācako hi ayaṃ **sabba**-saddo. So yena yena sambandhaṃ gacchati, tassa tassa anavasesataṃ dīpeti. Yathā, “sabbaṃ rūpaṃ aniccaṃ sabbā vedanā aniccā sabbasakkāyapariyāpannesu dhammesū”ti. **Dhamma**-saddo panāyaṃ pariyatti-sacca-samādhī-paññā-pakati-sabhāvasuññatā-puññāpatti-ñeyyādīsu dissati. “Idha bhikkhu dhammaṃ pariyāpuṇāti suttamaṃ geyya”ntiādīsu (a. ni. 5.73) hi dhammasaddo pariyattiyamaṃ vattati. “Diṭṭhadhammo viditadhammo”tiādīsu (dī. ni. 1.299) saccesu. “Evamaṃ dhammā te bhagavanto”tiādīsu samādhimhi.

“Yassete caturo dhammā, vānarinda yathā tava;
Saccamaṃ dhammo dhiti cāgo, diṭṭhamaṃ so ativattati”ti. –

Ādīsu (jā. 1.1.57) paññāya.

“Jātidhammā jarādhammā, atho maraṇadhammino”tiādīsu pakatiyaṃ. “Kusalā dhammā”tiādīsu (dha. sa. 1.tikamātikā) sabhāve. “Tasmiṃ kho pana samaye dhammā honti”tiādīsu (dha. sa. 121) suññatāyaṃ. “Dhammo suciṇṇo sukhamāvahātī”tiādīsu (jā. 1.10.102) puññe. “Dve aniyatā dhammā”tiādīsu (pārā. 443) āpattiyamaṃ. “Sabbe dhammā sabbākārena buddhassa bhagavato ñāṇamukhe āpāthaṃ āgacchantī”tiādīsu ñeyye. Idha panāyaṃ sabhāve vattati. Tatrāyaṃ vacanatto – attano lakkhaṇamaṃ dhārentīti **dhammā**. **Mūla**-saddo vitthārito eva. Idha panāyaṃ asādhāraṇahetumhi daṭṭhabbo.

Pariyāyasaddo “madhupiṇḍikapariyāyoti nama dhārehī”tiādīsu (ma. ni. 1.205) desanāyaṃ vattati. “Atthi khvesa brāhmaṇa, pariyāyo, yena maṃ pariyāyena sammā vadamāno vadeyya akiriyaṃvādo samaṇo gotamo”tiādīsu (pārā. 3) kāraṇe. “Kassa nu kho, ānanda, ajja pariyāyo bhikkhuniyo ovaditu”ntiādīsu (ma. ni. 3.398) vāre. Idha pana kāraṇepi desanāyampi vattati. Tasmā “sabbadhammāmūlapariyāya”nti ettha sabbesamaṃ dhammānaṃ asādhāraṇahetusaññitaṃ kāraṇanti vā sabbesamaṃ dhammānaṃ kāraṇadesananti vā evamaṃ attho daṭṭhabbo. Neyyatthattā cassa suttassa, na catubhūmakāpi sabhāvadhammā sabbadhammāti veditabbā. Sakkāyapariyāpannā pana tebhūmakā dhammāva anavasesato veditabbā, ayamettha adhippāyoti.

Voti ayaṃ vo-saddo paccattaupayogakaraṇasampadānasāmivacanapadapūraṇesu dissati. “Kacci pana vo, anuruddhā, samaggā sammodamānā”tiādīsu (ma. ni. 1.326) hi paccatte dissati. “Gacchatha, bhikkhave, paṇāmemi vo”tiādīsu (ma. ni. 2.157) upayoge. “Na vo mama santike vatthabba”ntiādīsu (ma. ni. 2.157) karaṇe. “Vanapatthapariyāyaṃ vo, bhikkhave, desessāmī”tiādīsu (ma. ni. 1.190) sampadāne. “Sabbesamaṃ vo, sāriputta, subhāsita”ntiādīsu (ma. ni. 1.345) sāmivacane. “Ye hi vo ariyā parisuddhakāyakammantā”tiādīsu (ma. ni. 1.35) padapūraṇamatte. Idha panāyaṃ sampadāne daṭṭhabbo.

Bhikkhaveli patissavena abhimukhībhūtānaṃ punālapanaṃ. **Desessāmī**ti desanāpaṭijānaṃ. Idaṃ vuttaṃ hoti, bhikkhave, sabbadhammānaṃ mūlakāraṇamaṃ tumhākaṃ desessāmi, dutiyena nayena kāraṇadesanaṃ tumhākaṃ desessāmīti. **Tamaṃ suñāthāti** tamatthaṃ taṃ kāraṇamaṃ taṃ desanaṃ mayā vuccamānaṃ suñātha. **Sādhukamaṃ manasi karothāti** ettha pana sādhukamaṃ sādhiṭi ekatthametamaṃ. Ayañca sādhu saddo āyācanasampaṭicchanasampahaṃsanasundaradaḷhikammādīsu dissati. “Sādhu me bhante

bhagavā, saṃkhittena dhammaṃ desetū”tiādīsu (saṃ. ni. 4.95) hi āyācane dissatī. “Sādhu, bhanteti kho so bhikkhu bhagavato bhāsitaṃ abhinanditvā anumoditvā”tiādīsu (ma. ni. 3.86) sampañicchane. “Sādhu, sādhu sārīputtā”tiādīsu (dī. ni. 3.349) sampahaṃsane.

“Sādhu dhammarucī rājā, sādhu paññānavā naro;
Sādhu mittānamaddubbho, pāpassākaraṇaṃ sukha”nti.

Ādīsu (jā. 2.18.101) sundare. “Tena hi, brāhmaṇa, sādhukaṃ suṇāhī”tiādīsu (a. ni. 5.192) sādhuкасaddoyeva daḥhīkamme, āṇattiyantipi vuccatī. Idhāpi ayaṃ ettheva daḥhīkamme ca āṇattiyañca attho vedītabbo. Sundaratthehi vattatī. Daḥhīkaraṇatthena hi daḥhamimaṃ dhammaṃ suṇātha suggahitaṃ gaṇhantā. Āṇattiatthena mama āṇattiyā suṇātha. Sundaratthena sundaramimaṃ bhaddakaṃ dhammaṃ suṇāthāti evaṃ dīpitaṃ hoti.

Manasi karoṭhāti āvajjetha, samannāharathāti attho, avikkhittacittā hutvā nisāmetha citte karoṭhāti adhippāyo. Idānettha **taṃ suṇāthāti** sotindriyavikkhepavāraṇametam. Sādhukaṃ manasi karoṭhāti manasikāre daḥhīkammaniyojanena manindriyavikkhepavāraṇaṃ. Purimañcetha byañjanavipallāsaggāhavāraṇaṃ, pacchimaṃ atthavipallāsaggāhavāraṇaṃ. Purimena ca dhammassavane niyojeti, pacchimena sutānaṃ dhammānaṃ dhāraṇūparikkhādīsu. Purimena ca sabyañjano ayaṃ dhammo, tasmā savanīyoti dīpeti. Pacchimena sāttho, tasmā manasi kātabboti. SādhuKapadaṃ vā ubhayapadehi yojetvā yasmā ayaṃ dhammo dhammagambhīro desanāgambhīro ca, tasmā suṇātha sādhukaṃ, yasmā atthagambhīro paṭivedhagambhīro ca, tasmā sādhukaṃ manasi karoṭhāti evaṃ yojanā vedītabbā.

Bhāsissāmīti desessāmi. “Taṃ suṇāthā”ti ettha paṭiññātaṃ desanaṃ na saṃkhittatova desessāmi, apica kho vitthāratopi naṃ bhāsissāmīti vuttaṃ hoti, saṅkhepavitthāravācakaṇi hi etāni padāni. Yathāha vaṅgīsatthero –

“Saṃkhittenaṃ deseti, vitthārenaṃ bhāsati;
Sālikāyiva nigghoso, paṭibhānaṃ udīrayī”ti. (saṃ. ni. 1.214);

Evaṃ vutte ussāhajātā hutvā **evaṃ bhanteti kho te bhikkhū bhagavato paccassosum** satthu vacanaṃ sampañicchiṃsu, paṭiggahesunti vuttaṃ hoti. Atha nesam **bhagavā etadavoca** etaṃ idāni vattabbaṃ **idha bhikkhavoti**ādīkaṃ sakalaṃ suttaṃ avoca. Tattha **idhāti** desāpadese nipāto. Svāyaṃ katthaci lokaṃ upādāya vuccatī. Yathāha – “idha tathāgato loka uppaṃjati”ti (dī. ni. 1.190). Katthaci sāsanaṃ. Yathāha – “idheva, bhikkhave, samaṇo, idha dutiyo samaṇo”ti (a. ni. 4.241). Katthaci okāsaṃ. Yathāha –

“Idheva tiṭṭhamānassa, devabhūtassa me sato;
Punarāyu ca me laddho, evaṃ jānāhi mārisā”ti. (dī. ni. 2.369);

Katthaci padapūraṇamattameva. Yathāha “idhāhaṃ – bhikkhave, bhuttāvī assaṃ pavārito”ti (ma. ni. 1.30). Idha pana lokaṃ upādāya vuttoti vedītabbo.

2. Bhikkhaveti yathāpaṭiññātaṃ desanaṃ desetum puna bhikkhū ālapati. Ubhayenāpi, bhikkhave, imasmiṃ loketi vuttaṃ hoti. **Assutavā puthujjanoti** ettha pana āgamādhigamābhāvā nīyyo assutavā itī. Yassa hi khandhadhātuāyatanasaccapaccayākārasatipatṭhānādīsu uggahaparipucchāvinicchayarahitattā maññānāpaṭisedhako neva āgamo, paṭipattiyā adhigantabbassa anadhigatattā neva adhigamo atthī. So āgamādhigamābhāvā nīyyo assutavā itī. Svāyaṃ –

Puthūnaṃ janānādīhi, kāraṇehi puthujjano;
Puthujjanantogadhattā, puthuvāyaṃ jano itī.

So hi puthūnaṃ nānappakārānaṃ kilesādīnaṃ janānādīhi kāraṇehi **puthujjano**. Yathāha – puthu kilese janentīti puthujjanā, puthu avihatasakkāyadīṭṭhikāti puthujjanā, puthu sathārānaṃ mukhamullokikāti puthujjanā, puthu sabbagatīhi avuṭṭhitāti puthujjanā, puthu nānābhisaṅkhāre abhisaṅkharontīti puthujjanā, puthu nānāoghehi vuyhantīti puthujjanā, puthu nānāsantāpehi santappantīti puthujjanā, puthu nānāparīlāhehi

paridayhantīti puthujjanā, puthu pañcasu kāmagaṇesu rattā giddhā gadhitā mucchitā ajjhosannā laggā lagitā palibuddhāti puthujjanā, puthu pañcahi nīvaraṇehi āvuṭṭā nivuṭṭā ovuṭṭā pihitā paṭicchannā paṭikujjitāti puthujjanāti (mahāni. 51). Puthūnaṃ vā gaṇanapathamatītānaṃ ariyadhammaparammukhānaṃ nīcadhammasamācārānaṃ janānaṃ antogadhattāpi puthujjanā. Puthu vā ayaṃ, visumyeva saṅkhaṃ gato, viśamsaṭṭho sīlasuṭṭadigaṇayuttehi ariyehi janotipi puthujjano. Evametehi “assutavā puthujjano”ti dvīhipi padehi yete –

Duve puthujjanā vuttā, buddhenādiccabandhunā;
Andho puthujjano eko, kalyāṇeko puthujjanoti. –

Dve puthujjanā vuttā. Tesu andhaputhujjano vutto hotīti veditabbo. **Ariyānaṃ adassāvīti**ādīsu **ariyāti** ārakattā kilēsehi, anaye nairiyānato, aye iriyānato, sadevakena ca lokena araṇīyato buddhā ca paccekabuddhā ca buddhasāvaka ca vuccanti, buddhā eva vā idha ariyā. Yathāha “sadevake, bhikkhave, loke...pe... tathāgato ariyoti vuccatī”ti (saṃ. ni. 5.1098). **Sappurisāti** ettha pana paccekabuddhā tathāgatasāvaka ca “sappurisā”ti veditabbā. Te hi lokuttaragaṇayogena sobhanā purisāti **sappurisā**. Sabbeva vā ete dvedhāpi vuttā. Buddhāpi hi ariyā ca sappurisā ca, paccekabuddhā buddhasāvakāpi. Yathāha –

“Yo ve kataññū katavedi dhīro,
Kalyāṇamitto daḷhabhatti ca hoti;
Dukhītaṃ sakkacca karoti kiccaṃ,
Tathāvidhaṃ sappurisaṃ vadantī”ti. (jā. 2.17.78);

Kalyāṇamitto daḷhabhatti ca hotīti ettāvata hi buddhasāvako vutto, kataññūtādīhi paccekabuddhā buddhāti. Idāni yo tesam ariyānaṃ adassanasīlo, na ca dassane sādhuṅkāri, so **ariyānaṃ adassāvīti** veditabbo. So ca cakkhunā adassāvī nīṇena adassāvīti duvidho, tesu nīṇena adassāvī idha adhippeto. Maṃsacakkhunā hi dibbacakkhunā vā ariyā diṭṭhāpi adīṭṭhāva honti. Tesam cakkhunā vaṇṇamattaggaṇato, na ariyabhāvagocarato. Soṇasingālādayopi ca cakkhunā ariye passanti. Na ca te ariyānaṃ dassāvino.

Tatridaṃ vatthu – cittalapabbatavāsino kira khīṇāsavatherassa upaṭṭhāko vuḍḍhapabbajito ekadivasaṃ therena saddhiṃ piṇḍāya carivā therassa pattacīvaraṃ gahetvā piṭṭhito āgacchanto theram pucchi “ariyā nāma, bhante, kīdisā”ti. Thero āha “idhekacco mahallako ariyānaṃ pattacīvaraṃ gahetvā vattapaṭipattim katvā saharantopi neva ariye jānāti, evaṃ dujjānā, āvuso, ariyā”ti. Evaṃ vuttepi so neva aññāsī. Tasmā na cakkhunā dassanaṃ dassanaṃ, nīṇena dassanameva dassanaṃ. Yathāha “kiṃ te, vakkali, iminā pūtikāyena diṭṭhena, yo kho, vakkali, dhammaṃ passatī, so maṃ passatī”ti (saṃ. ni. 3.87). Tasmā cakkhunā passantopi nīṇena ariyehi diṭṭhaṃ aniccādīlakkhaṇaṃ apassanto ariyādhigatañca dhammaṃ anadhigacchanto ariyakaradhammānaṃ ariyabhāvassa ca adīṭṭhattā “ariyānaṃ adassāvī”ti veditabbo.

Ariyadhammassa akovidoti satipaṭṭhānādibhede ariyadhamme akusalo. **Ariyadhamme avinītoti** ettha pana –

Duvidho vinayo nāma, ekamekettha pañcadhā;
Abhāvato tassa ayaṃ, “avinīto”ti vuccatī.

Ayañhi saṃvaravinayo pahānavinayoti duvidho vinayo. Ettha ca duvidhepi vinaye ekameko vinayo pañcadhā bhijjati. **Saṃvaravinayopi** hi sīlasaṃvaro satsaṃvaro nīṇasaṃvaro khantisāṃvaro vīriyasaṃvaroti pañcavidho. **Pahānavinayopi** tadanāpāhānaṃ vikkhambhanapāhānaṃ samucchadapāhānaṃ paṭippassaddhipāhānaṃ nissaraṇapāhānanti pañcavidho.

Tattha “iminā pātīmokkhasaṃvarena upeto hoti samupeto”ti (vibha. 511) ayaṃ **sīlasaṃvaro**. “Rakkhati cakkhundriyaṃ cakkhundriye saṃvaram āpajjati”ti (dī. ni. 1.213; ma. ni. 1.295; saṃ. ni. 4.239; a. ni. 3.16) ayaṃ **satsaṃvaro**.

“Yāni sotāni lokasmiṃ, (ajitāti bhagavā)
Sati tesam nivāraṇaṃ;

Sotānaṃ saṃvaraṃ brūmi,
Paññāyete pidhīyare’’ti. (su. ni. 1041);

Ayaṃ **nāṇasaṃvaro**. ‘‘Khamo hoti sītassa uṇhassā’’ti (ma. ni. 1.23; a. ni. 4.114; 6.58) ayaṃ **khantisāṃvaro**. ‘‘Uppannaṃ kāmavitakkaṃ nādhivāseti’’ti (ma. ni. 1.26; a. ni. 4.114; 6.58) ayaṃ **vīriyasāṃvaro**. Sabbopi cāyaṃ saṃvaro yathāsakaṃ saṃvaritabbānaṃ vinetabbānaṃ kāyaduccarītādīnaṃ saṃvaraṇato ‘‘saṃvaro’’, vinayanato ‘‘vinayo’’ti vuccati. Evaṃ tava saṃvaravinayo pañcadhā bhijjatiṭi veditabbo.

Tathā yaṃ nāmarūpaparicchedādīsu vipassanāñāṇesu paṭipakkhabhāvato dīpālokeneva tamassa, tena tena vipassanāñāṇena tassa tassa anattassa pahānaṃ. Seyyathidaṃ, nāmarūpavavattānena sakkāyaditṭhiyā, paccayapariggahena ahetuvisamahetuditṭhīnaṃ, tasseva aparabhāgena kaṅkhāvitarāṇena kathaṃkathībhāvassa, kalāpasammasanena ‘‘ahaṃ mamā’’ti gāhassa, maggāmaggavavattānena amagge maggasaññāya, udayadassanena ucchedaditṭhiyā, vayadassanena sassataditṭhiyā, bhayadassanena sabhaye abhayasaññāya, ādīnavadassanena assādasaññāya, nibbidānupassanāya abhiratisaññāya, muccitukamyatāñāṇena amuccitukamyatāya, upekkhāñāṇena anupekkhāya, anulomena dhammatṭhitiyaṃ nibbāne ca paṭilomabhāvassa, gotrabhunā saṅkhāranimittaggāhassa pahānaṃ, etaṃ **tadaṅgapahānaṃ**nāma.

Yaṃ pana upacārappanābhedenā samādhinā pavattibhāvanivāraṇato ghaṭappahāreṇeva udakapiṭṭhe sevālassa tesāṃ tesāṃ nīvaraṇādīdhammānaṃ pahānaṃ, etaṃ **vikkhambhanapahānaṃ** nāma.

Yaṃ catunnaṃ ariyamaggānaṃ bhāvitattā taṃtaṃmaggavato attano attano santāne ‘‘ditṭhigatānaṃ pahānāyā’’tiādīna (dha. sa. 277) nayena vuttassa samudayapakkhikassa kilesagaṇassa accantaṃ appavattibhāvena pahānaṃ, idaṃ **samucchedapahānaṃ** nāma. Yaṃ pana phalakkhaṇe paṭippassaddhattaṃ kilesānaṃ, etaṃ **paṭippassaddhipahānaṃ** nāma. Yaṃ sabbasaṅkhatanissaṭṭattā pahīnasabbasaṅkhatānaṃ nibbānaṃ etaṃ **nissaraṇapahānaṃ** nāma. Sabbampi cetānaṃ pahānaṃ yasmā cāgaṭṭhena pahānaṃ, vinayanatṭhena vinayo, tasmā ‘‘pahānavinayo’’ti vuccati. Taṃtaṃpahānavato vā tassa tassa vinayassa sambhavatopetaṃ ‘‘pahānavinayo’’ti vuccati. Evaṃ pahānavinayopi pañcadhā bhijjatiṭi veditabbo.

Evaṃayaṃ saṅkhepato duvidho, bhedato ca dasavidho vinayo bhinnasaṃvarattā pahātābassa ca appahīnattā yasmā etassa assutavato puthujjanassa natthi, tasmā abhāvato tassa ayaṃ avinītoti vuccatiṭi. Esa nayo **sappurisānaṃ adassāvī sappurisadhammassa akovido sappurisadhamme avinītoti** etthapi. Ninnānākaraṇāñhi etaṃ atthato. Yathāha ‘‘yeva te ariyā, teva te sappurisā. Yeva te sappurisā, teva te ariyā. Yo eva so ariyānaṃ dhammo, so eva so sappurisānaṃ dhammo. Yo eva so sappurisānaṃ dhammo, so eva so ariyānaṃ dhammo. Yeva te ariyavinayā, teva te sappurisavinayā. Yeva te sappurisavinayā, teva te ariyavinayā. Ariyeti vā sappuriseti vā, ariyadhammeti vā sappurisadhammeti vā, ariyavinayeti vā sappurisavinayeti vā esese eke ekatthe same samabhāge tajjāte taññevā’’ti.

‘‘Kasmā pana bhagavā sabbadhammāpariyāyaṃ vo, bhikkhave, desessāmi’’ti vatvā taṃ adesetvāva ‘‘idha, bhikkhave, assutavā puthujjano ariyānaṃ adassāvī’’ti evaṃ puthujjanaṃ niddisīti? Puggalādhiṭṭhānāya dhammadesanāya tamatthaṃ āvikātuṃ. Bhagavato hi dhammādhiṭṭhānā dhammadesanā, dhammādhiṭṭhānā puggaladesanā, puggalādhiṭṭhānā puggaladesanā, puggalādhiṭṭhānā dhammadesanāti dhammapuggalavaseneva tava catubbidhā desanā.

Tattha, ‘‘tisso imā, bhikkhave, vedanā. Katamā tisso? Sukhā vedanā dukkhā vedanā adukkhamasukhā vedanā. Imā kho, bhikkhave, tisso vedanā’’ti (saṃ. ni. 4.250) evarūpī dhammādhiṭṭhānā dhammadesanā veditabbā. ‘‘Cha dhātuyo ayaṃ putiso cha phassāyatano aṭṭhārasa manopavicāro caturādhiṭṭhāno’’ti (ma. ni. 3.343) evarūpī dhammādhiṭṭhānā puggaladesanā. ‘‘Tayome, bhikkhave, puggalā santo saṃvijjānaṃ lokasmiṃ. Katame tayo? Andho ekacakkhu dvicakkhu. Katamo ca, bhikkhave, puggalo andho’’ti? (A. ni. 3.29) evarūpī puggalādhiṭṭhānā puggaladesanā. ‘‘Katamañca, bhikkhave, duggatibhayaṃ? Idha, bhikkhave, ekacco iti paṭisañcikkhati, kāyaduccaritassa kho pāpako vipāko abhisamparāyaṃ...pe... suddhamattānaṃ pariharati. Idaṃ vuccati, bhikkhave, duggatibhaya’’nti (a. ni. 4.121) evarūpī puggalādhiṭṭhānā dhammadesanā.

Svāyaṃ idha yasmā puthujjano aparīñātavattuko, aparīñāmūlikā ca idhādhippetānaṃ

sabbadhammānaṃ mūlabhūtā maññanā hoti, tasmā puthujjanaṃ dassetvā puggalādhiṭṭhānāya desanāya tamatthaṃ āvikātuṃ, “idha, bhikkhave, assutavā puthujjano ariyānaṃ adassāvī”ti evaṃ puthujjanaṃ niddisīti veditabbo.

Suttanikkhepavaṇṇanā niṭṭhitā.

Pathavīvāraṇṇanā

Evaṃ puthujjanaṃ niddisītvā idāni tassa pathavīdāsu vatthūsu sabbasakkāyadhammajanitaṃ maññanaṃ dassento, **pathaviṃ pathavitoti**ādīmāha. Tattha lakkhaṇapathavī sasambhārapathavī ārammaṇapathavī sammutipathavīti catubbidhā pathavī. Tāsu “katamā ca, āvuso, ajjhattikā pathavīdhātu? Yaṃ ajjhattaṃ paccattaṃ kakkhaḷaṃ kharigata”ntiādāsu (vibha. 173) vuttā **lakkhaṇapathavī**. “Pathaviṃ khaṇeyya vā khaṇāpeyya vā”tiādāsu (pāci. 85) vuttā **sasambhārapathavī**. Ye ca kesādayo vīsati koṭṭhāsā, ayolohādayo ca bāhirā. Sā hi vaṇṇādīhi sambhārehi saddhiṃ pathavīti sasambhārapathavī. “Pathavīkasiṇameko sañjānāti”tiādāsu (dī. ni. 3.360) āgatā pana **ārammaṇapathavī**, nimittapathavīti vuccati. Pathavīkasiṇajjhānalābhī devaloke nibbato āgamanavasena pathavīdevatāti nāmaṃ labhati. Ayaṃ **sammutipathavīti** veditabbā. Sā sabbāpi idha labbhati. Tāsu yaṃkañci pathaviṃ ayaṃ puthujjano pathavito sañjānāti, pathavīti sañjānāti, pathavībhāgena sañjānāti, lokavohāraṃ gaḥetvā saññāvīpallāsena sañjānāti pathavīti. Evaṃ pathavībhāgaṃ amuñcantoyeva vā etaṃ “sattoti vā sattassā”ti vā ādinā nayena sañjānāti. Kasmā evaṃ sañjānāti na vattabbaṃ. Ummattako viya hi puthujjano. So yaṃkiñci yena kenaci ākārena gaṇhāti. Ariyānaṃ adassāvītibhedameva vā ettha kāraṇaṃ. Yaṃ vā parato “apariññātaṃ tassā”ti vadantena bhagavatāva vuttaṃ.

Pathaviṃ pathavito saññatvāti so taṃ pathaviṃ evaṃ viparītasaññāya sañjānitvā, “saññānidānā hi papañcasānkha”ti (su. ni. 880) vacanato aparabhāge thāmapattehi taṇhāmānadiṭṭhipapañcehi idha maññanānāmena vuttehi maññati kappeti vikappeti, nānappakāro aññathā gaṇhāti. Tena vuttaṃ “pathaviṃ maññati”ti. Evaṃ maññato cassa tā maññanā oḷārikanayena dassetuṃ “yā ayaṃ kesā lomā”tiādīnā nayena vīsātibhedā ajjhattikā pathavī vuttā. Yā cāyaṃ vibhaṅge “tattha katamā bāhirā pathavīdhātu? Yaṃ bāhiraṃ kakkhaḷaṃ kharigataṃ kakkhaḷattaṃ kakkhaḷabhāvo bahiddhā anupādinnaṃ. Seyyathidaṃ, ayo lohaṃ tipu sīsaṃ sajjhaṃ muttā maṇi veḷuriyaṃ saṅkho silā pavāḷaṃ rajataṃ jātarūpaṃ lohitaṅko masāragallaṃ tiṇaṃ kaṭṭhaṃ sakkharā kaṭhalaṃ bhūmi pāsāṇo pabbato”ti (vibha. 173) evaṃ bāhirā pathavī vuttā. Yā ca ajjhattārammaṇattike nimittapathavī, taṃ gaḥetvā ayamatthayojanā vuccati.

Pathaviṃ maññatiti tīhi maññanāhi ahaṃ pathavīti maññati, mama pathavīti maññati, paro pathavīti maññati, parassa pathavīti maññati, atha vā ajjhattikaṃ pathaviṃ taṇhāmaññanāya maññati, mānamaññanāya maññati, diṭṭhimaññanāya maññati. Kathaṃ? Ayañhi kesādāsu chandarāgaṃ janeti kese assādeti abhinandati abhivadati ajjhosāya tiṭṭhati. Lome, nakhe, dante, tacaṃ, aññataraṃ vā pana rajjanīyavatthūṃ. Evaṃ ajjhattikaṃ pathaviṃ taṇhāmaññanāya maññati. Iti me kesā siyuṃ anāgatamaddhānaṃ. Iti lomātiādīnā vā pana nayena tattha nandiṃ samannāneti. “Imināhaṃ sīlena vā...pe... brahmacariyena vā evaṃ siniddhamudusukhumanīlakeso bhavissāmi”tiādīnā vā pana nayena appaṭiladdhānaṃ paṭilābhāya cittaṃ paṇidhati. Evampi ajjhattikaṃ pathaviṃ taṇhāmaññanāya maññati.

Tathā attano kesādānaṃ sampattiṃ vā vipattiṃ vā nissāya mānaṃ janeti, “seyyohamasmiṃti vā sadiso hamasmīti vā hīno hamasmīti vā”ti. Evaṃ ajjhattikaṃ pathaviṃ mānamaññanāya maññati. “Taṃ jīvaṃ taṃ sarīra”nti (ma. ni. 2.187) āgatanayena pana kesaṃ “jīvo”ti abhinivāsati. Esa nayo lomādāsu. Evaṃ ajjhattikaṃ pathaviṃ diṭṭhimaññanāya maññati.

Atha vā “yā ceva kho panāvuso, ajjhattikā pathavīdhātu, yā ca bāhirā pathavīdhātu, pathavīdhātūvesā, taṃ netamā mamā”ti (ma. ni. 1.302) imissā pavattiyā paccanīkanayena kesādibhedam pathaviṃ etaṃ mama esohamasmi eso me attāti abhinivāsati. Evampi ajjhattikaṃ pathaviṃ diṭṭhimaññanāya maññati. Evaṃ tāva ajjhattikaṃ pathaviṃ tīhi maññanāhi maññati.

Yathā ca ajjhattikaṃ evaṃ bāhirampi. Kathaṃ? “Ayañhi ayalohādāsu chandarāgaṃ janeti. Ayalohādāni assādeti abhinandati abhivadati ajjhosāya tiṭṭhati. Mama ayo mama lohantiādīnā nayena ayādāni mamāyati

rakkhati gopayati, evaṃ bāhiraṃ pathaviṃ taṇhāmaññānāya maññati. Iti me ayalohādayo siyūṃ anāgatamaddhānanti vā panettha nandiṃ samannāneti, imināhaṃ sīlena vā vatena vā tapena vā brahmacariyena vā evaṃ sampannaayalohādiupakaraṇo bhavissāmī”ti appaṭiladdhassa paṭilābhāya cittaṃ paṇidahati. Evampi bāhiraṃ pathaviṃ taṇhāmaññānāya maññati.

Tathā attano ayalohādīnaṃ sampattiṃ vā vipattiṃ vā nissāya mānaṃ janeti “imināhaṃ seyyosmīti vā, sadisosmīti vā hīnosmīti vā”ti (vibha. 832) evaṃ bāhiraṃ pathaviṃ mānamaññānāya maññati. Aye jīvasaññī hutvā pana ayaṃ “jīvo”ti abhinivisati. Esa nayo lohādīsu. Evaṃ bāhiraṃ pathaviṃ diṭṭhimaññānāya maññati.

Atha vā “idhekacco pathavīkasiṇaṃ attato samanupassati. Yaṃ pathavīkasiṇaṃ, so ahaṃ. Yo ahaṃ, taṃ pathavīkasiṇanti pathavīkasiṇaṃca attānaṃ advayaṃ samanupassati”ti (paṭi. ma. 1.131) paṭisambhidāyaṃ vuttanayeneva nimittapathaviṃ “attā”ti abhinivisati. Evaṃ bāhiraṃ pathaviṃ diṭṭhimaññānāya maññati. Evampi bāhiraṃ pathaviṃ tīhi maññānāhi maññati. Evaṃ tāva “pathaviṃ maññati”ti ettha tissopi maññānā veditabbā. Ito paraṃ saṅkhepeneva kathayissāma.

Pathaviyā maññatīti ettha **pathaviyāti** bhumavacanametam. Tasmā ahaṃ pathaviyāti maññati, mayhaṃ kiñcanaṃ palibodho pathaviyāti maññati, paro pathaviyāti maññati, parassa kiñcanaṃ palibodho pathaviyāti maññatīti ayamettha attho.

Atha vā yvāyaṃ “kathaṃ rūpasmiṃ attānaṃ samanupassati? Idhekacco vedanaṃ... saññaṃ... saṅkhāre... viññānaṃ attato samanupassati, tassa evaṃ hoti, ayaṃ kho me attā, so kho pana me attā imasmim rūpeti evaṃ rūpasmiṃ vā attānaṃ samanupassati”ti (paṭi. ma. 1.131) etassa atthanayo vutto, eteneva nayena vedanādīdhamme attato gahetvā tato ajjhattikabāhirāsu pathavīsu yaṃkiñci pathaviṃ tassokāsabhāvena parikkappetvā so kho pana me ayaṃ attā imissā pathaviyāti maññanto pathaviyā maññati, ayamassa diṭṭhimaññānā. Tasmimyeva panassa attani sinehaṃ tabbatthukaṃca mānaṃ uppādayato taṇhāmānāmaññānāpi veditabbā. Yādā pana teneva nayena so kho panassa attā pathaviyāti maññati, tadā diṭṭhimaññānā eva yujjati. Itarāyopi pana icchanti.

Pathavito maññatīti ettha pana **pathavitoti** nissakkavacanaṃ. Tasmā saupakaraṇassa attano vā parassa vā yathāvuttappabhedato pathavito uppattiṃ vā niggamanaṃ vā pathavito vā añño attāti maññamāno pathavito maññatīti veditabbo, ayamassa diṭṭhimaññānā. Tasmimyeva panassa diṭṭhimaññānāya maññite vatthusmiṃ sinehaṃ mānaṃca uppādayato taṇhāmānāmaññānāpi veditabbā. Apare āhu pathavīkasiṇaṃ parittaṃ bhāvetvā tato aññaṃ appamānaṃ attānaṃ gahetvā pathavito bahiddhāpi me attāti maññamāno pathavito maññatīti.

Pathaviṃ meti maññatīti ettha pana kevalaṃhi mahāpathaviṃ taṇhāvasena mamāyatīti iminā nayena pavattā ekā taṇhāmaññānā eva labbhatīti veditabbā. Sā cāyaṃ mama kesā, mama lomā, mama ayo, mama lohanti evaṃ yathāvuttappabhedāya sabbāyapi ajjhattikabāhirāya pathaviyā yojetabbāti.

Pathaviṃ abhinandatīti vuttappakārameva pathaviṃ taṇhādīhi abhinandati, assādeti, parāmasati cāti vuttaṃ hoti. “Pathaviṃ maññati”ti eteneva etasmim atthe siddhe kasmā etaṃ vuttanti ce. Avicāritametam porāṇehi. Ayaṃ pana attano mati, desanāvīlāsato vā ādīnavadassanato vā. Yassā hi dhammadhātuyā suppaṭividdhattā nānāyavicitradesanāvīlāsasampanno, ayaṃ sā bhagavatā suppaṭividdhā. Tasmā pubbe maññānāvasena kilesuppattiṃ dassetvā idāni abhinandanāvasena dassento desanāvīlāsato vā idamāha. Yo vā pathaviṃ maññati, pathaviyā maññati, pathavito maññati, pathaviṃ meti maññati, so yasmā na sakkoti pathavīnissitaṃ taṇhaṃ vā diṭṭhiṃ vā pahātuṃ, tasmā pathaviṃ abhinandatiyeva. Yo ca pathaviṃ abhinandati, dukkhaṃ so abhinandati, dukkhaṃca ādīnavoti ādīnavadassanatopi idamāha. Vuttañcetaṃ bhagavatā “yo, bhikkhave, pathavīdhātuṃ abhinandati, dukkhaṃ so abhinandati, yo dukkhaṃ abhinandati, aparimutto so dukkhasmāti vadāmī”ti.

Evaṃ pathavīvatthukaṃ maññānaṃ abhinandanaṃca vatvā idāni yena kāraṇena so maññati, abhinandati ca, taṃ kāraṇaṃ āvikaronto āha **taṃ kissa hetu, aparīññātaṃ tassāti vadāmīti**. Tassattho, so puthujjano taṃ pathaviṃ kissa hetu maññati, kena kāraṇena maññati, abhinandatīti ce. Aparīññātaṃ tassāti vadāmīti, yasmā taṃ vatthu tassa aparīññātaṃ, tasmāti vuttaṃ hoti. Yo hi pathaviṃ parijānāti, so tīhi parīññāhi parijānāti nītaparīññāya tīraṇaparīññāya pahānaparīññāyāti.

Tattha katamā ñātapariññā. Pathavīdhātuṃ pariñānāti, ayaṃ pathavīdhātu ajjhattikā, ayaṃ bāhirā, idamassā lakkhaṇaṃ, imāni rasapaccupaṭṭhānapadaṭṭhānānāti, ayaṃ **ñātapariññā**. Katamā tīraṇapariññā? Evaṃ ñātaṃ katvā pathavīdhātuṃ tīreti aniccato dukkhato rogototi dvācattālīsāya ākārehi, ayaṃ **tīraṇapariññā**. Katamā pahānapariññā? Evaṃ tīrayitvā aggamaggena pathavīdhātuyā chandarāgaṃ pajahati, ayaṃ **pahānapariññā**.

Nāmarūpavavatthānaṃ vā ñātapariññā. Kalāpasammasanādi anulomapariyosānā tīraṇapariññā. Ariyamagge ñānaṃ pahānapariññāti. Yo pathaviṃ pariñānāti, so imāhi tīhi pariññāhi pariñānāti, assa ca puthujjanassa tā pariññāyo natthi, tasmā aparīññātattā pathaviṃ maññati ca abhinandati cāti. Tenāha bhagavā – idha, bhikkhave, assutavā puthujjano...pe... pathaviṃ maññati, pathaviyā maññati, pathavito maññati, pathaviṃ meti maññati, pathaviṃ abhinandati. Taṃ kissa hetu? Aparīññātaṃ tassāti vadāmī”ti.

Pathavīvāraṇṇanā niṭṭhitā.

Āpovārādivaṇṇanā

Āpaṃ āpatoti etthāpi lakkhaṇasasambhārārammaṇasammutivasena catubbidho āpo. Tesu “tattha, katamā ajjhattikā āpodhātu. Yaṃ ajjhattaṃ paccattaṃ āpo āpogataṃ, sineho sinehagataṃ bandhanattaṃ rūpassa ajjhattaṃ upādinna”ntiādīsu (vibha. 174) vutto **lakkhaṇāpo**. “Āpokasiṇaṃ uggaṇhanto āpasmim̐ nimittaṃ gaṇhāti”tiādīsu vutto **sasambhārāpo**. Sesam̐ sabbaṃ pathaviyaṃ vuttasadisameva. Kevalaṃ yojanānaye pana “pittaṃ semha”ntiādīnā nayena vuttā dvādasabhedā ajjhattikā āpodhātu, “tattha, katamā bāhirā āpodhātu? Yaṃ bāhiraṃ āpo āpogataṃ, sineho sinehagataṃ bandhanattaṃ rūpassa bahiddhā anupādinnaṃ. Seyyathidaṃ, mūlaraso khandharaso tacaraso pattaraso puppharaso phalaraso khīraṃ dadhi sappi navanītaṃ telaṃ madhu phāṇitaṃ bhummaṇi vā udakāni antalikkhāni vā”ti (vibha. 174) evaṃ vuttā ca bāhirā āpodhātu veditabbā, yo ca ajjhattārammaṇattike nimittaāpo.

Tejaṃ tejatoti imasmim̐ tejavārepi vuttanayeneva vitthāro veditabbo. Yojanānaye panettha “yena ca santappati, yena ca jīryati, yena ca pariḍayhāti, yena ca asitapītakkhāyitasāyitaṃ sammā pariñāmaṃ gacchati”ti (vibha. 175) evaṃ vuttā catuppabhedā ajjhattikā tejodhātu. “Tattha katamā bāhirā tejodhātu? Yaṃ bāhiraṃ tejo tejogataṃ usmā usmāgataṃ usumaṃ usumagataṃ bahiddhā anupādinnaṃ. Seyyathidaṃ, kaṭṭhaggi palālaggi tiṇaggi gomayaggi thusaggi saṅkāraggi indaggi aggisantāpo sūriyasantāpo kaṭṭhasannicayasantāpo tiṇasannicayasantāpo dhaññasannicayasantāpo bhaṇḍasannicayasantāpo”ti (vibha. 175) evaṃ vuttā ca bāhirā tejodhātu veditabbā.

Vāyaṃ vāyatoti imassa vāyavārassāpi yojanānaye pana “uddhaṅgamā vātā adhogamā vātā kucchisayā vātā koṭṭhāsayā vātā aṅgamaṅgānusārino vātā satthakavātā khurakavātā uppalakavātā assāso passāso”ti evaṃ vuttā ajjhattikā vāyodhātu. “Tattha katamā bāhirā vāyodhātu? Yaṃ bāhiraṃ vāyo vāyogataṃ thambhitattaṃ rūpassa bahiddhā anupādinnaṃ. Seyyathidaṃ, puratthimā vātā pacchimā vātā uttarā vātā dakkhiṇā vātā sarajā vātā arajā vātā sītā vātā uṇhā vātā parittā vātā adhimattā vātā kālāvātā verambhavātā pakkhavātā supaṇṇavātā tālavaṇṭavātā vidhūpanavātā”ti (vibha. 176) evaṃ vuttā ca bāhirā vāyodhātu veditabbā. Sesam̐ vuttanayamevāti. Ettāvātā ca yvāyaṃ –

“Vuttamhi ekadhamme, ye dhammā ekalakkhaṇā tena;
Vuttā bhavanti sabbe, iti vutto lakkhaṇo hāro”ti. –

Evaṃ nettiyaṃ **lakkhaṇo** nāma hāro vutto, tassa vasena yasmā catūsu bhūtesu gahitesu upādārūpampi gahitameva bhavati, rūpalakkhaṇaṃ anatītattā. Yañca bhūtopādārūpaṃ so rūpakkhandho. Tasmā “assutavā puthujjano pathaviṃ āpaṃ tejaṃ vāyaṃ maññati”ti vadantena atthato rūpaṃ attato samanupassatītipi vuttaṃ hoti. “Pathaviyā āpasmim̐ tejasim̐ vāyasim̐ maññati”ti vadantena rūpasmim̐ vā attānaṃ samanupassatītipi vuttampi hoti. “Pathavito āpato tejato vāyato maññati”ti vadantena rūpato añño attāti siddhattā rūpavantaṃ vā attānaṃ attani vā rūpaṃ samanupassatītipi vuttaṃ hoti. Evametā catasso rūpavatthukā sakkāyadīṭṭhimaññanā veditabbā. Tattha ekā ucchedadīṭṭhi, tisso sassatadīṭṭhiyoti dveva dīṭṭhiyo hontīti ayampi atthaviseso veditabbo.

Āpovārādivaṇṇanā niṭṭhitā.

Bhūtavārādivaṇṇanā

3. Evaṃ rūpamukhena saṅkhāravatthukaṃ maññaṇaṃ vatvā idāni ye saṅkhāre upādāya sattā paññapīyanti, tesu saṅkhāresu sattesupi yasmā puthujjano maññaṇaṃ karoti, tasmā te satte niddisanto **bhūte bhūtato sañjānātī**tiādīmāha. Tatthāyaṃ **bhūtasaddo** pañcakkhandhaamanussadhātuvijjamānakhīṇāsavasattarukkadhāsu dissati. “Bhūtamidanti, bhikkhave, samanupassathā”tiādīsu (ma. ni. 1.401) hi ayaṃ pañcakkhandhesu dissati. “Yānidha bhūtāni samāgatāni”ti (su. ni. 224) ettha amanussesu. “Cattāro kho, bhikkhu, mahābhūtā hetū”ti (ma. ni. 3.86) ettha dhātūsu. “Bhūtasmiṃ pācittiya”ntiādīsu (pāci. 69) vijjamāne. “Yo ca kālaghaso bhūto”ti (jā. 1.10.190) ettha khīṇāsave. “Sabbeva nikkhipissanti bhūtā loke samussaya”nti (dī. ni. 2.220) ettha sattesu. “Bhūtagāmapātabyatāyā”ti (pāci. 90) ettha rukkadhāsu. Idha pañāyaṃ sattesu vattati, no ca kho avisesena. Cātumahārājikānaṃ hi heṭṭhā sattā idha bhūtāti adhippetā.

Tattha **bhūte bhūtato sañjānātī**tiādi vuttanayameva. **Bhūte maññatī**tiādīsu pana tissopi maññaṇā yojetabbā. Kathaṃ? Ayañhi “so passati gahapatiṃ vā gahapatiputtaṃ vā pañcahi kāmagaṇehi samappitaṃ samaṅgibhūta”nti (a. ni. 7.50) vuttanayena bhūte subhā sukhītāti gahetvā rajjati, disvāpi ne rajjati, sutvāpi, ghāyitvāpi, sāyitvāpi, phusitvāpi, ñatvāpi. Evaṃ bhūte taṇhāmaññaṇāya maññati. “Aho vatāhaṃ khattiyamahāsālānaṃ vā sahabyataṃ upapajjeyya”ntiādīnā (dī. ni. 3.337) vā pana nayena appaṭiladdhassa paṭilābhāya cittaṃ paṇidhati, evampi bhūte taṇhāmaññaṇāya maññati. Attano pana bhūtānañca sampattivipattiṃ nissāya attānaṃ vā seyyaṃ dahati. Bhūtesu ca yaṃkiñci bhūtaṃ hīnaṃ attānaṃ vā hīnaṃ, yaṃkiñci bhūtaṃ seyyaṃ. Attānaṃ vā bhūtena, bhūtaṃ vā attanā sadisaṃ dahati. Yathāha “idhekacco jātiyā vā...pe... aññataraññatarena vatthunā pubbakālaṃ parehi sadisaṃ attānaṃ dahati. Aparakālaṃ attānaṃ seyyaṃ dahati. Pare hīne dahati, yo evarūpo māno ...pe... ayaṃ vuccati mānātimāno”ti (vibha. 876-880). Evaṃ bhūte mānāmaññaṇāya maññati.

Bhūte pana “niccā dhuvā sassatā avipariṇāmadhammā”ti vā “sabbe sattā sabbe paṇā sabbe bhūtā sabbe jīvā avasā abalā avīriyā niyatisaṅgatibhāvaparīṇatā chasvevābhijātīsu sukhadukkhaṃ paṭisaṃvedenti”ti (dī. ni. 1.168) vā maññaṇāni diṭṭhimaññaṇāya maññati. Evaṃ bhūte tīhi maññaṇāni maññati.

Kathaṃ **bhūtesu maññati**? Tesu tesu bhūtesu attano upapattiṃ vā sukhupattiṃ vā ākaṅkhati. Evaṃ tāva taṇhāmaññaṇāya bhūtesu maññati. Bhūtesu vā upapattiṃ ākaṅkhamāno dānaṃ deti, sīlaṃ samādiyati, uposathakammaṃ karoti. Evampi bhūtesu taṇhāmaññaṇāya maññati. Bhūte pana samūhaggāhena gahetvā tattha ekacce bhūte seyyato dahati, ekacce sadisato vā hīnato vāti. Evaṃ bhūtesu mānāmaññaṇāya maññati. Tathā ekacce bhūte niccā dhuvāti maññati. Ekacce aniccā adhuvāti, ahampi bhūtesu aññatarosmīti vā maññati. Evaṃ bhūtesu diṭṭhimaññaṇāya maññati.

Bhūtato maññatīti ettha pana saupakaraṇassa attano vā parassa vā yato kutoci bhūtato uppattiṃ maññaṇāni bhūtato maññatīti veditabbo, ayamassa diṭṭhimaññaṇā. Tasmimyeva panassa diṭṭhimaññaṇāya maññite vatthusmiṃ sinehaṃ mānañca uppādayato taṇhāmānāmaññaṇāpi veditabbā. **Bhūte meti maññatī**ti ettha pana ekā taṇhāmaññaṇāya labbhati. Sā cāyaṃ “mama puttā, mama dhītā, mama ajeḷakā, kukkuṭasūkarā, hatthigavassavaḷavā”ti evamādinā nayena mamāyato pavattatīti veditabbā. **Bhūte abhinandatī**ti etaṃ vuttanayameva. **Apariññātaṃ tassāti** ettha pana ye saṅkhāre upādāya bhūtānaṃ paññatti, tesam apariññātattā bhūtā apariññātā hontīti veditabbā. Yojanā pana vuttanayeneva kātabbā.

Evaṃ saṅkhepato saṅkhāravasena ca sattavasena ca maññaṇāvattumuṃ dassetvā idāni bhūmivisesādinā bhedenā vitthāratopi taṃ dassento **deve devatoti**tiādīmāha. Tattha dibbantī pañcahi kāmagaṇehi attano vā iddhiyāti **devā**, kiḷanti jotenti cāti attho. Te tividhā sammutidevā upapattidevā visuddhidevāti. **Sammutidevā** nāma rājāno deviyo rājakumārā. **Upapattidevā** nāma cātumahārājike deve upādāya tatuttaridevā. **Visuddhidevā** nāma arahanto khīṇāsavā. Idha pana upapattidevā daṭṭhabbā, no ca kho avisesena. Paranimmitavasavattidevaloke mārāṃ saparisaṃ ṭhapetvā sesā cha kāmāvacarā idha devāti adhippetā. Tattha sabbā atthavaṇṇanā bhūtavāre vuttanayeneva veditabbā.

Pajāpatinti ettha pana māro pajāpatīti veditabbo. Keci pana “tesaṃ tesaṃ devānaṃ adhipatīnaṃ mahārājādīnametaṃ adhivacana”nti vadanti. Taṃ devaggahaṇeneva tesaṃ gahitattā ayuttanti **mahāaṭṭhakathāyaṃ** paṭikkhittaṃ, māroeva pana sattaṣaṅkhātāya pajāya adhipatibhāvena idha pajāpatīti

adhippeto. So kuhiṃ vasati? Paranimmitavasavattidevaloke. Tatra hi **vasavattirājā** rajjaṃ kāreti. **Māro** ekasmiṃ padese attano parisāya issariyaṃ pavattento rajjapaccante dāmarikarājaputto viya vasatīti vadanti. Māraggaṇeneva cettha māraparisāyapi gahaṇaṃ veditabbaṃ. Yojanānayo cettha pajāpatiṃ vaṇṇavantaṃ dīghāyukaṃ sukhabahulaṃ disvā vā sutvā vā rajjanto taṇhāmaññānāya maññati. “Aho vatāhaṃ pajāpatino saḥabyataṃ upapajjeyya”ntiadinā vā pana nayena appaṭiladdhassa paṭilābhāya cittaṃ paṇidahantopi pajāpatiṃ taṇhāmaññānāya maññati. Pajāpatibhāvaṃ pana patto samāno ahamasmi pajānamissaro adhipatīti mānaṃ janento pajāpatiṃ mānamaññānāya maññati. “Pajāpati nicco dhuvo”ti vā “ucchijjissati vinassissati”ti vā “avaso abalo avīriyo niyatisaṅgatibhāvaparīṇato chasvevābhijātīsu sukhadukkhaṃ paṭisaṃvedetī”ti vā maññamāno pana pajāpatiṃ dīṭṭhimaññānāya maññatīti veditabbo.

Pajāpatisminti ettha pana ekā dīṭṭhimaññānāva yujjati. Tassā evaṃ pavatti veditabbā. Idhekacco “pajāpatismiṃ ye ca dhammā saṃvijjanti, sabbe te niccā dhuvā sassatā aviparīṇāmadhammā”ti maññati. Atha vā “pajāpatismiṃ natthi pāpaṃ, na tasmīṃ pāpakāni kammāni upalabbhanti”ti maññati.

Pajāpatitoti ettha tissopi maññānā labbhanti. Kathaṃ? Idhekacco saupakaraṇassa attano vā parassa vā pajāpatito uppattiṃ vā niggamaṇaṃ vā maññati, ayamassa dīṭṭhimaññānā. Tasmīṃyeva panassa dīṭṭhimaññānāya maññite vatthusmiṃ sinehaṃ mānaṇca uppādayato taṇhāmānāmaññānāpi veditabbā. **Pajāpatiṃ meti** ettha pana ekā taṇhāmaññānāva labbhati. Sā cāyaṃ “pajāpati mama satthā mama sāmī”tiadinā nayena mamāyato pavattatīti veditabbā. Sesāṃ vuttanayameva.

Brahmaṃ brahmatoti ettha brūhito tehi tehi guṇavisesehīti **brahmā**. Apica brahmāti mahābrahmāpi vuccati, tathāgatopi brāhmaṇopi mātāpitaropi seṭṭhampi. “Sahasso brahmā dvisahasso brahmā”tiadīsu (ma. ni. 3.165-166) hi mahābrahmā brahmāti vuccati. “Brahmāti kho, bhikkhave, tathāgatassetāṃ adhivacana”nti ettha tathāgato.

“Tamonudo buddho samantacakkhu,
Lokantagū sabbabhavātivatto;
Anāsavo sabbadukkappahīno,
Saccavhayo brahme upāsito me”ti. (cūḷani. 104) –

Ettha brāhmaṇo.

“Brahmāti mātāpitaro, pubbācariyāti vuccare”ti. (itivu. 106; jā. 2.20.181) –

Ettha mātāpitaro. “Brahmacakkaṃ pavattetī”ti (ma. ni. 1.148; a. ni. 5.11) ettha seṭṭhaṃ. Idha pana paṭhamābhiniḥbatta kappāyuko brahmā adhippeto. Taggaṇeneva ca brahmapurohitabrahmapārisajjāpi gahitāti veditabbā. Attha vaṇṇanā panettha pajāpativāre vuttanayeneva veditabbā.

Ābhassaravāre daṇḍadīpikāya acci viya etesaṃ sarīrato ābhā chijjivā chijjivā patantī viya sarati visaratīti **ābhassarā**. Tesāṃ gahaṇena sabbāpi dutiyajjhānabhūmi gahitā, ekatalavāsino eva cete sabbepi parittābhā appamāṇābhā ābhassarāti veditabbā.

Subhakiṇhavāre subhena okiṇṇā vikiṇṇā subhena sarīrappabhāvaṇṇena ekagghanā suvaṇṇamañjūsāya ṭhāpitasampajjalitakaṇanāpiṇḍasassirikāti **subhakiṇhā**. Tesāṃ gahaṇena sabbāpi tatiyajjhānabhūmi gahitā. Ekatalavāsino eva cete sabbepi parittasubhā appamāṇasubhā subhakiṇhāti veditabbā.

Vehapphalavāre, vipulā phalāti **vehapphalā**. Catutthajjhānabhūmi brahmāno vuccanti. Atthanayayojanā pana imesu tīsupi vāresu bhūtavāre vuttanayeneva veditabbā.

Abhibhūvāre abhibhavīti **abhibhū**. Kiṃ abhibhavi? Cattāro khandhe arūpino. Asaññabhavassetāṃ adhivacanaṃ. Asaññasattā devā vehapphalehi saddhiṃ ekatalāyeva ekasmiṃ okāse yena iriyāpathena nibbattā, teneva yāvatāyukaṃ tiṭṭhanti cittakammārūpasadisā hutvā. Te idha sabbepi abhibhūvacanena gahitā. Keci **abhibhū** nāma sahasso brahmāti evamādinā nayena tattha tattha adhipatibrahmānaṃ vaṇṇayanti. Brahmaggahaṇeneva pana tassa gahitattā ayuttametanti veditabbaṃ. Yojanānayo cettha abhibhū vaṇṇavā

dīghāyukoti sutvā tattha chandarāgaṃ uppādentō abhibhuṃ taṅhāmaññānāya maññati. “Aho vatāhaṃ abhibhuno saḥabyataṃ upapajjeyya”ntiādinā pana nayena appaṭiladdhassa paṭilābhāya cittaṃ paṇidahantopi abhibhuṃ taṅhāmaññānāya maññati. Attānaṃ hīnato abhibhuṃ seyyato dahanto pana abhibhuṃ mānāmaññānāya maññati. “Abhibhū nicco dhuvo”tiādinā nayena parāmasanto abhibhuṃ diṭṭhimaññānāya maññatīti veditabbo. Sesāṃ pajāpativāre vuttanayameva.

Bhūtavārādivaṇṇanā niṭṭhitā.

Ākāsānañcāyatanavārādivaṇṇanā

4. Evaṃ bhagavā paṭipāṭiyā devaloke dassentopi abhibhūvacanena asaññabhavaṃ dassetvā idāni yasmā ayaṃ vaṭṭakathā, suddhāvāsā ca vivatṭapakkhe ṭhitā, anāgāmikhīṇāsavā eva hi te devā. Yasmā vā katipayakappasahassāyukā te devā, buddhuppādakāleyeva honti. Buddhā pana asaṅkheyepi kappe na uppajjanti, tadā suññāpi sā bhūmi hoti. Rañño khandhāvāraṭṭhānaṃ viya hi buddhānaṃ suddhāvāsabhavo. Te teneva ca kāraṇena viññāṇaṭṭhitisattāvāsavenapi na gahitā, sabbakālikā pana imā maññānā. Tasmā tāsāṃ sadāvijjāmānabhūmiṃ dassento suddhāvāse atikkamivā, **ākāsānañcāyatanantiādimāha**. Tattha **ākāsānañcāyatananti** tabbhūmikā cattāro kusalavipākakiriyaṃ khandhā. Te ca tatrūpapannāyeva daṭṭhabbā bhavaparichedakathā ayanti katvā. Esa nayo **viññāṇañcāyatanādīsu**. Atthayojanā pana catūsūpi etesu vāresu abhibhūvāre vuttanayeneva veditabbā. Mānāmaññānā cettha pajāpativāre vuttanayenāpi yujjati.

Ākāsānañcāyatanavārādivaṇṇanā niṭṭhitā.

Diṭṭhasutavārādivaṇṇanā

5. Evaṃ bhūmivisesādinā bhedenā vitthāratopi maññānāvattumuṃ dassetvā idāni sabbamaññānāvattubhūtaṃ sakkāyapariyāpannaṃ tebhūmakadhammabhedaṃ diṭṭhādīhi catūhi saṅgaṇhitvā dassento, **diṭṭhaṃ diṭṭhatotiādimāha**.

Tattha **diṭṭhanti** maṃsacakkhunāpi diṭṭhaṃ, dibbacakkhunāpi diṭṭhaṃ. Rūpāyatanassetāṃ adhivacanaṃ. Tattha **diṭṭhaṃ maññatīti** diṭṭhaṃ tīhi maññānāhi maññati. Kathaṃ? Rūpāyatanāṃ subhasaññāya sukhasaññāya ca passanto tattha chandarāgaṃ janeti, taṃ assādeti abhinandati. Vuttampi hetāṃ bhagavatā “itthirūpe, bhikkhave, sattā rattā gidhā gadhitā mucchitā ajjhosannā, te dīgharattaṃ socanti itthirūpavasānugā”ti (a. ni. 5.55). Evaṃ diṭṭhaṃ taṅhāmaññānāya maññati. “Iti me rūpaṃ siyā anāgatamaddhānanti vā panettha nandiṃ samannāneti, rūpasampadaṃ vā pana ākaṅkhamāno dānaṃ detī”ti vitthāro. Evampi diṭṭhaṃ taṅhāmaññānāya maññati. Attano pana parassa ca rūpasampattiṃ vipattiṃ nissāya mānaṃ janeti. “Imināhaṃ seyyosmi”ti vā “sadisosmi”ti vā “hīnosmi”ti vāti evaṃ diṭṭhaṃ mānāmaññānāya maññati. Rūpāyatanāṃ pana niccaṃ dhavaṃ sassatanti maññati, attānaṃ attaniyanti maññati, maṅgalaṃ amaṅgalanti maññati, evaṃ diṭṭhaṃ diṭṭhimaññānāya maññati. Evaṃ diṭṭhaṃ tīhi maññānāhi maññati. Kathaṃ diṭṭhasmiṃ maññati? Rūpasmiṃ attānaṃ samanupassanāyena maññanto diṭṭhasmiṃ maññati. Yathā vā dhane dhaññe. Evaṃ rūpasmiṃ rāgādayoti maññantopi diṭṭhasmiṃ maññati. Ayamassa diṭṭhimaññānā. Tasmīññeva panassa diṭṭhimaññānāya maññite vatthusmiṃ sinehaṃ mānañca uppādayato taṅhāmānāmaññānāpi veditabbā. Evaṃ diṭṭhasmiṃ maññati. Sesāṃ pathavīvāre vuttanayeneva veditabbaṃ.

Sutanti maṃsasotenapi sutāṃ, dibbasotenapi sutāṃ, saddāyatanassetāṃ adhivacanaṃ.

Mutanti mutvā munitvā ca gahitaṃ, āhacca upagantvāti attho, indriyānaṃ ārammaṇānañca aññamaññāsaṃsilese viññātanti vuttaṃ hoti, gandharasaphoṭṭhabbāyatanānametaṃ adhivacanaṃ.

Viññātanti manasā viññātaṃ, sesānaṃ sattannaṃ āyatanānametaṃ adhivacanaṃ dhammārammaṇassa vā. Idha pana sakkāyapariyāpannameva labbhati. Vitthāro panettha diṭṭhavāre vuttanayeneva veditabbo.

Diṭṭhasuttavārādivaṇṇanā niṭṭhitā.

Ekattavārādivaṇṇanā

6. Evaṃ sabbam sakkāyabhedam diṭṭhādīhi catūhi dassetvā idāni tameva samāpannakavārena ca asamāpannakavārena ca dvidhā dassento **ekattam nānattanti**tiādīmāha.

Ekattanti iminā hi samāpannakavāram dasseti. **Nānattanti** iminā asamāpannakavāram. Tesam ayam vacanattho ekabhāvo **ekattam**. Nānābhāvo **nānattanti**. Yojanā panettha samāpannakavāram catūhi khandhehi, asamāpannakavāraṇca pañcahi khandhehi bhinditvā “rūpaṃ attato samanupassati”tiādīnā sāsanayena pathavīvārādisu vuttena ca aṭṭhakathāyena yathānurūpaṃ vīmaṃsitvā veditabbā. Keci pana ekattanti ekattanayam vadanti nānattanti nānattanayam. Apare “ekattasaññī attā hoti arogo paraṃ maraṇā, nānattasaññī attā hoti”ti evam diṭṭhābhinivesam. Tam sabbam idha nādhīppetattā ayuttameva hoti.

Evaṃ sabbam sakkāyam dvidhā dassetvā idāni tameva ekadhā sampiṇḍetvā dassento **sabbam sabbatoti**tiādīmāha. Yojanāyō panettha sabbam assādentō sabbam taṇhāmaññānāya maññati. “Mayā ete sattā nimmitā”tiādīnā nayena attanā nimmitam maññanto sabbam mānamaññānāya maññati. “Sabbam pubbekatakammahetu, sabbam issaranimmānahetu, sabbam ahētuapaccayā, sabbam atthi, sabbam natthi”tiādīnā nayena maññanto sabbam diṭṭhimaññānāya maññatīti veditabbo. Katham sabbasmim maññati? Idhekacco evamdiṭṭhiko hoti “mahā me attā”ti. So sabbalokasannivāsam tassokāsabhāvena parikappetvā so kho pana me ayam attā sabbasminti maññati, ayamassa diṭṭhimaññānā. Tasmimyeva panassa attani sineham tabbatthukaṇca mānam uppādayato taṇhāmānamaññānāpi veditabbā. Sesam pathavīvāre vuttanayeneva veditabbam.

Evaṃ sabbam sakkāyam ekadhā dassetvā idāni aparenapi nayena tam ekadhā dassento **nibbānam nibbānatoti** āha. Tattha **nibbānanti** “yato kho, bho, ayam attā pañcahi kāmagaṇehi samappito samaṅgibhūto paricāreti. Ettāvātā kho, bho, ayam attā paramadiṭṭhadhammanibbānam patto hoti”tiādīnā nayena pañcadhā āgataṃ paramadiṭṭhadhammanibbānam veditabbam. Tattha nibbānam assādentō taṇhāmaññānāya maññati. Tena nibbānena “ahamasmi nibbānam patto”ti mānam janento mānamaññānāya maññati. Anibbānamyeva samānam tam nibbānato niccādito ca gaṇhanto diṭṭhimaññānāya maññatīti veditabbo.

Nibbānato pana añnam attānam gahetvā so kho pana me ayam attā imasmim nibbāneti maññanto nibbānasmim maññati, ayamassa diṭṭhimaññānā. Tasmimyeva panassa attani sineham tabbatthukaṇca mānam uppādayato taṇhāmānamaññānāpi veditabbā. Esa nayo nibbānato maññānāyapi. Tatrapi hi nibbānato añnam attānam gahetvā “idaṃ nibbānam, ayam attā, so kho pana me ayam attā ito nibbānato añño”ti maññanto nibbānato maññati, ayamassa diṭṭhimaññānā. Tasmimyeva panassa attani sineham tabbatthukaṇca mānam uppādayato taṇhāmānamaññānāpi veditabbā. “Aho sukham mama nibbāna”nti maññanto pana nibbānam meti maññatīti veditabbo. Sesam vuttanayameva. Ayam panettha anugīti –

Yādiso esa sakkāyo, tathā nam avijānato;
Puthujjanassa sakkāye, jāyanti sabbamaññānā.

Jeguccho bhiduro cāyam, dukkho aparīṇāyako;
Tam paccanīkato bālo, gaṇham gaṇhāti maññanam.

Subhato sukhato ceva, sakkāyam anupassato;
Salabhasseva aggimhi, hoti taṇhāya maññānā.

Niccasaññam adhiṭṭhāya, sampattim tassa passato;
Gūthādī viya gūthasmim, hoti mānena maññānā.

Attā attaniyo meti, passato nam abuddhino;
Ādāse viya bondhissa, diṭṭhiyā hoti maññānā.

Maññānāti ca nāmetam, sukhamaṃ mārabandhanam;
Sīthilam duppamuñcaṇca, yena baddho puthujjano.

Bahum vipphandamānopi, sakkāyam nātivattati;

Samussitaṃ dalhatthambhaṃ, sāva gaddulabandhano.

Sa'so sakkāyamaḷino, jātiyā ca jarāya ca;
Rogādīhi ca dukkhehi, niccaṃ haññati bālhaso.

Taṃ vo vadāmi bhaddante, sakkāyaṃ anupassatha;
Asātato asubhato, bhedato ca anattato.

Eso sabhāvo hetassa, passaṃ evamimaṃ budho;
Pahāya maññanā sabbā, sabbadukkhā pamuccatīti.

Ekattavārādivaṇṇanā niṭṭhitā.

Puthujjanavasena catuvīsatiṭṭhā paṭṭhamanayakathā niṭṭhitā.

Sekkhavāradutiyanayaṇṇanā

7. Evaṃ bhagavā pathavādīsū vatthūsu sabbasakkāyadhammamūlabhūtaṃ puthujjanassa pavattiṃ dassetvā idāni tesveva vatthūsu sekkhassa pavattiṃ dassento **yopi so, bhikkhave, bhikkhu sekkhoti**tiādimāha. Tattha **yoti** uddesavacanaṃ. **Soti** niddesavacanaṃ. **Pikāro** sampiṇḍanatto ayampi dhammo aniyatotiādisū viya. Tena ca ārammaṇasabhāgena puggalaṃ sampiṇḍeti, no puggalasabhāgena, heṭṭhato hi puggalā diṭṭhivipannā, idha diṭṭhisampannā, na tesam sabhāgatā atthi. Ārammaṇaṃ pana heṭṭhā puggalānampi tadeva, imesampi tadevāti. Tena vuttaṃ “ārammaṇasabhāgena puggalaṃ sampiṇḍeti no puggalasabhāgenā”ti. **Yopi** **soti** iminā pana sakalena vacanena idāni vattabbaṃ sekkhaṃ dassetīti veditabbo. **Bhikkhave, bhikkhūti** idam vuttanayameva.

Sekkhoti kenatṭhena sekkho? Sekkhadhammappaṭilābhato **sekkho**. Vuttañhetam “kittāvata nu kho, bhante, sekkho hotīti? Idha, bhikkhave, bhikkhu sekkhāya sammādiṭṭhiyā samannāgato hoti...pe... sekkhena sammāsamādhinā samannāgato hoti. Ettāvata kho bhikkhu, sekkho hotī”ti (saṃ. ni. 5.13). Apica sikkhatītipi sekkho. Vuttañhetam “sikkhatīti kho bhikkhu tasmā sekkhoti vuccati. Kiñca sikkhati? Adhisīlampi sikkhati, adhiccitampi sikkhati, adhipaññampi sikkhati, sikkhatīti kho bhikkhu tasmā sekkhoti vuccatī”ti (a. ni. 3.86).

Yopi kalyāṇaputhujjano anulomapaṭipadāya paripūrakārī sīlasampanno indriyesu guttadvāro bhojane mattaññū jāgariyānuyogamanuyutto pubbarattāpararattaṃ bodhipakkhiyānaṃ dhammānaṃ bhāvanānuyogamanuyutto viharati – “ajja vā sve vā aññatarāṃ sāmāññaphalaṃ adhigamissāmī”ti, sopi vuccati sikkhatīti sekkhoti. Imasmiṃ panatthe paṭivedhappattova sekkho adhippeto, no puthujjano.

Appattaṃ mānasaṃ etenāti **appattamānaso**. **Mānasanti** rāgopi cittampi arahattampi. “Antalikkhacaro pāso, yvāyaṃ carati mānaso”ti (mahāva. 33; saṃ. ni. 1.151) ettha hi rāgo mānasaṃ. “Cittaṃ mano mānasa”nti (dha. sa. 65) ettha cittaṃ. “Appattamānaso sekkho, kālaṃ kayirā janesutā”ti (saṃ. ni. 1.159) ettha arahattaṃ. Idhāpi arahattameva adhippetam. Tena appattārahattoti vuttaṃ hoti.

Anuttaranti seṭṭhaṃ, asadisanti attho. Catūhi yogehi khemaṃ ananuyuttanti **yogakkhemaṃ**, arahattameva adhippetam. **Patthayamānoti** dve patthanā taṇhāpatthanā ca, chandapatthanā ca. “Patthayamānassa hi pajappitāni, pavedhitam vāpi pakappitesū”ti (su. ni. 908) ettha taṇhāpatthanā.

“Chinnaṃ pāpimato sotaṃ, viddhastam vinalīkatam;
Pāmojjabahulā hoṭṭha, khemaṃ patattha bhikkhavo”ti. (ma. ni. 1.352) –

Ettha kattukamyatā kusalacchandapatthanā. Ayameva idhādhippetā. Tena **patthayamānoti** taṃ yogakkhemaṃ pattukāmo adhigantukāmo tanninno tappono tappabbhāroti veditabbo. **Viharatīti** aññaṃ iriyāpathadukkhānaṃ aññena iriyāpathena vicchinditvā aparipatantaṃ kāyaṃ harati. Atha vā “sabbe saṅkhārā aniccāti adhimuccanto saddhāya viharatī”tiādināpi niddesanaenettha attho datṭhabbo. **Pathaviṃ pathavito abhijānātīti** pathaviṃ pathavībhāvena abhijānāti, na puthujjano viya sabbākāraviparītāya saññāya sañjānāti. Apica kho abhivisiṭṭhena

ñāṇena jānāti, evaṃ pathavīti etaṃ pathavībhāvaṃ adhimuccanto eva naṃ aniccātipi dukkhātipi anattātipi evaṃ abhijānātīti vuttaṃ hoti. Evañca naṃ abhiññatvā pathaviṃ mā maññīti vuttaṃ hoti. Maññātīti **maññī**. Ayaṃ pana maññī ca na maññī ca na vattabboti. Etasmiñhi atthe idaṃ padaṃ nipātevā vuttanti vedītabbaṃ. Ko panettha adhippāyoti. Vuccate, puthujjano tāva sabbamaññānaṃ appahīnattā maññātīti vutto. Khīṇāsavo pahīnattā na maññātīti. Sekkhassa pana dīṭṭhimaññānaṃ pahīnā, itarā pana tanubhāvaṃ gatā, tena so maññātītipi na vattabbo puthujjano viya, na maññātītipi na vattabbo khīṇāsavo viyāti.

Pariññeyyaṃ tassāti tassa sekkhassa taṃ maññānavatthu okkantaniyāmatā sambodhiparāyaṇattā ca tīhi pariññāhi pariññeyyaṃ, aperiññeyyañca aperiññātañca na hoti puthujjanassa viya, nopi pariññātaṃ khīṇāsavassa viya. Sesam sabbattha vuttanayameva.

Sekkhavasena dutiyanayakathā niṭṭhitā.

Khīṇāsavavāratatīyādinayavaṇṇanā

8. Evaṃ pathavīdīsū vatthūsū sekkhassa pavattim dassetvā idāni khīṇāsavassa pavattim dassento **yopi so, bhikkhave, bhikkhu arahanti**ādīmāha. Tattha **yopīti** pi-saddo sampiṇḍanatto. Tena idha ubhayasabhāgatāpi labbhatīti dasseti. Sekkho hi khīṇāsavena ariyapuggalattā sabhāgo, tena puggalasabhāgatā labbhati, ārammaṇasabhāgatā pana vuttanayā eva. **Arahanti** ārakakilesa, dūrakilesa pahīnakilesoti attho. Vuttañcetam bhagavatā “kathañca, bhikkhave, bhikkhu araham hoti? Ārakassa honti pāpakā akusalā dhammā saṃkilesikā ponobbhavikā sadarā dukkhavipākā āyatim jātijarāmarañiyā. Evaṃ kho, bhikkhave, bhikkhu araham hoti”ti. (Ma. ni. 1.434) **khīṇāsavoti** cattāro āsavā kāmāsavo...pe... avijjāsavo, ime cattāro āsavā arahato khīṇā pahīnā samucchinnā paṭippassaddhā, abhabbuppattikā ñāṇagginā daḍḍhā, tena vuccati khīṇāsavoti.

Vusitavāti garusaṃvāsepi ariyamaggasaṃvāsepi dasasu ariyavāsesupi vasi parivasi vuttho parivuttho, so vutthavāso ciññacaraṇoti **vusitavā katakaraṇiyoti** puthujjanakalyāṇakaṃ upādāya satta sekkhā catūhi maggehi karaṇīyaṃ karonti nāma, khīṇāsavassa sabbakaraṇīyāni katāni pariyositāni, natthi tassa uttari karaṇīyaṃ dukkhakkhayādhigamāyāti katakaraṇīyo. Vuttampi hetam –

“Tassa sammā vimuttassa, santacittassa bhikkhuno;
Katassa paṭicayo natthi, karaṇīyaṃ na vijjatī”ti. (theragā. 642);

Ohitabhāroti tayo bhārā khandhabhāro kilesabhāro abhisankhārahāroti, tassime tayo bhārā ohitā oropitā nikkhittā pātītā, tena vuccati **ohitabhāroti**. **Anuppattasadatthoti** anuppatto sadattham, sakatthanti vuttaṃ hoti. Kakārassāyaṃ dakāro kato, sadatthoti ca arahattaṃ vedītabbaṃ. Tañhi attupanibandhanaṭṭhena attānaṃ avijhanaṭṭhena attano paramatthaṭṭhena ca attano attho sakatthoti vuccati.

Parikkhīṇabhavasamaṃyojanoti bhavasamaṃyojanānīti dasa samaṃyojanāni kāmarāgasamaṃyojanaṃ paṭighamānadiṭṭhivicikicchāsīlabbataparāmāsabhavarāgaissāmacchariyasamaṃyojanaṃ avijjāsamaṃyojanaṃ. Imāni hi satte bhavesu samaṃyojenti upanibandhanti, bhavaṃ vā bhavena samaṃyojenti, tasmā “bhavasamaṃyojanānī”ti vuccanti. Imāni bhavasamaṃyojanāni arahato parikkhīṇāni pahīnāni ñāṇagginā daḍḍhāni, tena vuccati “parikkhīṇabhavasamaṃyojano”ti. **Sammadaññā vimuttoti** ettha **sammadaññāti** sammā aññāya. Kiṃ vuttaṃ hoti – khandhānaṃ khandhaṭṭhaṃ, āyatanānaṃ āyanaṭṭhaṃ, dhātūnaṃ dhātuṭṭhaṃ, dukkhassa pīlanaṭṭhaṃ, samudayassa pabhavaṭṭhaṃ, nirodhassa santaṭṭhaṃ, maggassa dassanaṭṭhaṃ, sabbe saṅkhārā aniccāti evamādiṃ vā bhedaṃ sammā yathābhūtaṃ aññāya jānitvā tīrayitvā tulayitvā vibhāvetvā vibhūtaṃ katvāti.

Vimuttoti dve vimuttiyo cittassa ca vimutti nibbānañca. Arahā sabbakilesehi vimuttacittattā cittavimuttiyāpi vimutto. Nibbānaṃ adhimuttattā nibbānēpi vimutto. Tena vuccati “sammadaññā vimutto”ti. **Pariññātaṃ tassāti** tassa arahato taṃ maññānavatthu tīhi pariññāhi pariññātaṃ. Tasmā so taṃ vatthum na maññāti, taṃ vā maññānaṃ na maññātīti vuttaṃ hoti, sesam vuttanayameva.

Nibbānavāre pana **khayā rāgassāti**ādāyo tayo vārā vuttā. Te pathavīvārādīsūpi vitthāretabbā. Ayañca pariññātavāro nibbānavārepi vitthāretabbo. Vitthārentena ca pariññātaṃ tassāti sabbapadehi yojetvā puna khayā rāgassa vītarāgattāti yojetabbaṃ. Esa nayo itaresu. Desanā pana ekattha vuttaṃ sabbattha vuttameva

hotīti saṃkhittā.

Khayā rāgassa vītarāgattāti ettha ca yasmā bāhirako kāmesu vītarāgo, na khayā rāgassa vītarāgo. Arahā pana khayā yeva, tasmā vuttaṃ “khayā rāgassa vītarāgattā”ti. Esa nayo dosamoheṣupi. Yathā ca “pariññātaṃ tassāti vadāmi”ti vuttepi pariññātattā so taṃ vatthum taṃ vā maññaṇaṃ na maññaṭṭi attho hoti, evamidhāpi vītarāgattā so taṃ vatthum taṃ vā maññaṇaṃ na maññaṭṭi daṭṭhabbo.

Ettha ca pariññātaṃ tassāti ayaṃ vāro maggabhāvanāpāripūridassanattaṃ vutto. Itare pana phalasaṃchikiriyaṃpāripūridassanattantaṃ veditabbā. Dvīhi vā kāraṇehi arahā na maññati vatthussa ca pariññātattā akusalamūlānaṃca samucchinnattā. Tenassa pariññātavārena vatthuno vatthupariññaṃ dīpeti, itarehi akusalamūlasamucchedanti. Tattha pacchimesu tīsu vāresu ayaṃ viṣeso veditabbo, tīsu hi vāresu rāge ādīnaṃ disvā dukkhānupassī viharanto appaṇihitavimokkhena vimutto khayā rāgassa vītarāgo hoti. Dose ādīnaṃ disvā aniccānupassī viharanto animittavimokkhena vimutto khayā dosassa vītadoso hoti. Mohe ādīnaṃ disvā anattānupassī viharanto suññatavimokkhena vimutto khayā mohassa vītamoho hotīti.

Evam sante na eko tīhi vimokkhehi vimuccatīti dve vārā na vattabbā siyunti ce, taṃ na. Kasmā? Aniyamitattā. Aniyamena hi vuttaṃ “yopi so, bhikkhave, bhikkhu araha”nti. Na pana vuttaṃ appaṇihitavimokkhena vā vimutto, itarena vāti, tasmā yaṃ arahato yujjati, taṃ sabbaṃ vattabbamevāti.

Avisesena vā yo koci arahā samānepi rāgādikkhaye vipariñāmadukkhassa pariññātattā khayā rāgassa vītarāgoti vuccati, dukkhadukkhassa pariññātattā khayā dosassa vītadosoti. Saṅkhāradukkhassa pariññātattā khayā mohassa vītamohoti. Itthārammaṇassa vā pariññātattā khayā rāgassa vītarāgo. Anitthārammaṇassa pariññātattā khayā dosassa vītadoso. Majjhātārammaṇassa pariññātattā khayā mohassa vītamoho. Sukhāya vā vedanāya rāgānusayassa samucchinnattā khayā rāgassa vītarāgo, itarāsu paṭiḡhamohānusayānaṃ samucchinnattā vītadoso vītamoho cāti. Tasmā taṃ viṣesaṃ dassento āha “khayā rāgassa vītarāgattā...pe... vītamohattā”ti.

Khīṇāsavavasena tatiyacatutthapañcamachattānayaṃkathā niṭṭhitā.

Tathāgatavārasattamanayaṃvaṇṇanā

12. Evam pathavīdīsū vatthūsū khīṇāsavassa pavattim dassetvā idāni attano pavattim dassento **tathāgatopi, bhikkhavi**tiādimāha. Tattha **tathāgatoti** aṭṭhahi kāraṇehi bhagavā tathāgatoti vuccati – tathā āgatoti tathāgato, tathā gatoti tathāgato, tathalakkhaṇaṃ āgatoti tathāgato, tathadhamme yāthāvato abhisambuddhoti tathāgato, tathadassitāya tathāgato, tathāvāditāya tathāgato, tathākāritāya tathāgato, abhibhavanaṭṭhena tathāgatoti.

Kathaṃ bhagavā tathā āgatoti tathāgato? Yathā sabbalokahitāya ussukkamāpannā purimakā sammāsambuddhā āgatā, yathā vipassī bhagavā āgato, yathā sikhī bhagavā, yathā vessabhū bhagavā, yathā kākusandho bhagavā, yathā koṇāgamano bhagavā, yathā kassapo bhagavā āgatoti. Kim vuttaṃ hoti? Yena abhinīhārena ete bhagavanto āgatā, teneva amhākampi bhagavā āgato.

Atha vā yathā vipassī bhagavā...pe... yathā kassapo bhagavā dānapāramim pūretvā, sīlanekhammapaññāvīriyakhantisaccaadhiṭṭhānamettāupekkhāpāramim pūretvā, imā dasa pāramiyo, dasa upapāramiyo, dasa paramatthapāramiyoti, samatiṃsa pāramiyo pūretvā, aṅgapariccāgamaṃ nayanadhanarajjaputtadārapariccāganti ime pañca mahāpariccāge pariccajivā pubbayogapubbacariyadhammakkhānañātathacariyādayo pūretvā, buddhicariyāya koṭim patvā āgato, tathā amhākampi bhagavā āgato.

Yathā ca vipassī bhagavā...pe... yathā kassapo bhagavā cattāro satipaṭṭhāne sammappadhāne iddhipāde pañcindriyāni pañca balāni satta bojjhaṅge ariyaṃ aṭṭhaṅgikaṃ maggaṃ bhāvetvā brūhetvā āgato, tathā amhākampi bhagavāpi āgatoti tathāgato.

Yatheva lokamhi vipassīādayo,

Sabbaññubhāvaṃ munayo idhāgatā;
Tathā ayaṃ sakyamunīpi āgato,
Tathāgato vuccati tena cakkhumāti.

Evam tathā āgatoti tathāgato.

Kathaṃ tathā gatoti tathāgato. Yathā sampatijāto vipassī bhagavā gato...pe... kassapo bhagavā gato. Kathaṃ so gatoti, so hi sampatijātova samehi pādehi pathaviyaṃ patiṭṭhāya uttarābhimukho sattapadavītiḥārena gato. Yathāha – sampatijāto, ānanda, bodhisatto samehi pādehi pathaviyaṃ patiṭṭhahitvā uttarābhimukho sattapadavītiḥārena gacchati setamhi chatte anudhāriyamāne, sabbā ca disā anuviloketi, āsabiṃca vācaṃ bhāsati “aggohamasmi lokassa, jeṭṭhohamasmi lokassa, seṭṭhohamasmi lokassa, ayamantimā jāti, natthi dāni punabbhavo”ti (ma. ni. 3.207).

Tañcassa gamaṇaṃ tathaṃ ahosi avitathaṃ anekesaṃ visesādhigamānaṃ pubbanimittabhāvena. Yañhi so sampatijātova samehi pādehi patiṭṭhahi, idamassa caturiddhipādapaṭilābhassa pubbanimittaṃ. Uttarābhimukhabhāvo pana sabbalokuttarabhāvassa pubbanimittaṃ. Sattapadavītiḥāro sattabojjhaṅgaratanapaṭilābhassa. “Suvaṇṇadaṇḍā vītipatanti cāmarā”ti (su. ni. 693) ettha vutto cāmarukkhepo sabbatitthiyanimmathanassa. Setacchattadhāraṇaṃ arahattavimuttivaravimalasetacchattapaṭilābhassa. Sabbadisānuvilokanaṃ sabbaññūtānāvarenañāṇapaṭilābhassa. Āsabhīvācābhāsaṃ appaṭivattiyavaradhammacakkappavattanassa pubbanimittaṃ. Tathā ayaṃ bhagavāpi gato. Tañcassa gamaṇaṃ tathaṃ ahosi avitathaṃ tesaññeva visesādhigamānaṃ pubbanimittabhāvena. Tenāhu porāṇā –

“Muhuttajātova gavampatī yathā,
Samehi pādehi phusī vasundharaṃ;
So vikkamī satta padāni gotamo,
Setaṃca chattaṃ anudhārayuṃ marū.

Gantvāna so satta padāni gotamo,
Disā vilokesi samā samantato;
Aṭṭhaṅgupetaṃ giramabbhudīrayī,
Sīho yathā pabbatamuddhaniṭṭhito”ti. –

Evam tathā gatoti tathāgato.

Atha vā yathā vipassī bhagavā...pe... yathā kassapo bhagavā, ayampi bhagavā tatheva nekkhammena kāmacchandaṃ pahāya gato. Abyāpādena byāpādaṃ, ālokasaññāya thinamiddhaṃ, avikkhepena uddhaccakukkuccaṃ, dhammavavatthānena vicikicchaṃ pahāya, nīṇena avijjaṃ padāletvā, pāmojjena aratiṃ vinodetvā, paṭhamajjhānena nīvaraṇakavāṭaṃ ugghāṭetvā, dutiyajjhānena vitakkavicāradhūmaṃ vūpasametvā, tatiyajjhānena pītiṃ virājetvā, catutthajjhānena sukhadukkaṃ pahāya, ākāsaññācāyatanasamāpattiyā rūpasaññāpaṭighasaññānānattasaññāyo samatikkamitvā, viññāññācāyatanasamāpattiyā ākāsaññācāyatanasaññaṃ, ākiñcaññāyatanasamāpattiyā viññāññācāyatanasaññaṃ, nevasaññānāsaññāyatanasamāpattiyā ākiñcaññāyatanasaññaṃ samatikkamitvā gato.

Aniccānupassanāya nīcāsāññaṃ pahāya, dukkhānupassanāya sukhasāññaṃ, anattānupassanāya attasaññaṃ, nibbidānupassanāya nandiṃ, virāgānupassanāya rāgaṃ, nirodhānupassanāya samudayaṃ, paṭinissaggānupassanāya ādānaṃ, khayānupassanāya ghanasaññaṃ, vayānupassanāya āyūhanaṃ, vipariṇāmanupassanāya dhuvasāññaṃ, animittānupassanāya nimittaṃ, appaṇihitānupassanāya paṇidhiṃ, suññatānupassanāya abhinivesaṃ, adhipaññādhammavipassanāya sārādānābhinivesaṃ, yathābhūtañānadassanena sammohābhinivesaṃ, ādīnavānupassanāya ālayābhinivesaṃ, paṭisañkhānupassanāya appaṭisañkhaṃ, vivaṭṭānupassanāya saṃyogābhinivesaṃ, sotāpattimaggena diṭṭhekaṭṭhe kilese bhaññitvā, sakadāgāmaggena oḷārike kilese pahāya, anāgāmaggena aṇusahagate kilese samugghāṭetvā, arahattamaggena sabbakilese samucchinditvā gato. Evampi tathā gatoti tathāgato.

Kathaṃ tathalakkaṇaṃ āgatoti tathāgato. Pathavīdhātuyā kakkhaḷattalakkaṇaṃ tathaṃ avitathaṃ.

Āpodhātuyā paggharaṇalakkhaṇaṃ. Tejodhātuyā uṇhattalakkhaṇaṃ. Vāyodhātuyā vitthambhanalakkhaṇaṃ. Ākāsadhātuyā asamphuṭṭhalakkhaṇaṃ. Viññāṇadhātuyā vijānanalakkhaṇaṃ.

Rūpassa ruppanalakkhaṇaṃ. Vedanāya vedayitalakkhaṇaṃ. Saññāya sañjānanalakkhaṇaṃ. Saṅkhārānaṃ abhisāṅkharāṇalakkhaṇaṃ. Viññāṇassa vijānanalakkhaṇaṃ.

Vitakkassa abhiniropanalakkhaṇaṃ. Vicārassa anumajjanalakkhaṇaṃ. Pītiyā pharaṇalakkhaṇaṃ. Sukhassa sātālakkhaṇaṃ. Cittekaggaṭāya avikkhepalakkhaṇaṃ. Phassassa phusanalakkhaṇaṃ.

Saddhindriyassa adhimokkhalakkhaṇaṃ. Vīriyindriyassa paggahaṇalakkhaṇaṃ. Satindriyassa upaṭṭhānalakkhaṇaṃ. Samādhindriyassa avikkhepalakkhaṇaṃ. Paññindriyassa pajānanalakkhaṇaṃ.

Saddhābalassa assaddhiye akampiyalakkhaṇaṃ. Vīriyabalassa kosajje. Satibalassa muṭṭhasacce. Samādhibalassa uddhacce. Paññābalassa avijjāya akampiyalakkhaṇaṃ.

Satisambojjhaṅgassa upaṭṭhānalakkhaṇaṃ. Dhammavicayasambojjhaṅgassa pavicayalakkhaṇaṃ. Vīriyasambojjhaṅgassa paggahaṇalakkhaṇaṃ. Pītisambojjhaṅgassa pharaṇalakkhaṇaṃ. Passaddhisambojjhaṅgassa upasamalakkhaṇaṃ. Samādhisambojjhaṅgassa avikkhepalakkhaṇaṃ. Upekkhāsambojjhaṅgassa paṭisaṅkhānalakkhaṇaṃ.

Sammādiṭṭhiyā dassanalakkhaṇaṃ. Sammāsāṅkappassa abhiniropanalakkhaṇaṃ. Sammāvācāya pariggāhalakkhaṇaṃ. Sammākammantassa samuṭṭhānalakkhaṇaṃ. Sammāājīvassa vodānalakkhaṇaṃ. Sammāvāyāmassa paggahaṇalakkhaṇaṃ. Sammāsatiyā upaṭṭhānalakkhaṇaṃ. Sammāsamādhissa avikkhepalakkhaṇaṃ.

Avijjāya aññānalakkhaṇaṃ. Saṅkhārānaṃ cetanālakkhaṇaṃ. Viññāṇassa vijānanalakkhaṇaṃ. Nāmassa namanalakkhaṇaṃ. Rūpassa ruppanalakkhaṇaṃ. Saḷāyatanassa āyatanalakkhaṇaṃ. Phassassa phusanalakkhaṇaṃ. Vedanāya vedayitalakkhaṇaṃ. Taṇhāya hetulakkhaṇaṃ. Upādānassa gahaṇalakkhaṇaṃ. Bhavassa āyūhanalakkhaṇaṃ. Jātiyā nibbatilakkhaṇaṃ. Jarāya jiraṇalakkhaṇaṃ. Maraṇassa cutilakkhaṇaṃ.

Dhātūnaṃ suññatālakkhaṇaṃ. Āyatanānaṃ āyatanalakkhaṇaṃ. Satipaṭṭhānānaṃ upaṭṭhānalakkhaṇaṃ. Sammappadhānānaṃ padahanalakkhaṇaṃ. Iddhipādānaṃ ijghanalakkhaṇaṃ. Indriyānaṃ adhipatilakkhaṇaṃ. Balānaṃ akampiyalakkhaṇaṃ. Bojjhaṅgānaṃ niyyānalakkhaṇaṃ. Maggassa hetulakkhaṇaṃ.

Saccānaṃ tathalakkhaṇaṃ. Samathassa avikkhepalakkhaṇaṃ. Vipassanāya anupassanālakkhaṇaṃ. Samathavipassanānaṃ ekarasalakkhaṇaṃ. Yuganandhānaṃ anativattanalakkhaṇaṃ.

Sīlavisuddhiyā saṃvaralakkhaṇaṃ. Cittavisuddhiyā avikkhepalakkhaṇaṃ. Diṭṭhivisuddhiyā dassanalakkhaṇaṃ.

Khayeññāssa samucchedalakkhaṇaṃ. Anuppāde ñāṇassa passaddhilakkhaṇaṃ. Chandassa mūlalakkhaṇaṃ. Manasikārassa samuṭṭhānalakkhaṇaṃ. Phassassa samodhānalakkhaṇaṃ. Vedanāya samosaraṇalakkhaṇaṃ. Samādhissa pamukhalakkhaṇaṃ. Satiyā ādhipateyyalakkhaṇaṃ. Paññāya tatuttarilakkhaṇaṃ. Vimuttiyā sārālakkhaṇaṃ. Amatogadhassa nibbānassa pariyosānalakkhaṇaṃ tathaṃ avitathaṃ. Evaṃ tathalakkhaṇaṃ ñāṇagatiyā āgato avirajjhivā patto anuppattoti tathāgato, evaṃ tathalakkhaṇaṃ āgatoti tathāgato.

Kathaṃ tathadhamme yāthāvato abhisambuddhoti tathāgato? Tathadhammā nāma cattāri ariyasaccāni. Yathāha “cattārimāni, bhikkhave, tathāni avitathāni anaññathāni. Katamāni cattāri, idaṃ dukkhanti, bhikkhave, tathametaṃ avitathametaṃ anaññathameta”nti (saṃ. nī. 5.1050) vitthāro. Tāni ca bhagavā abhisambuddho, tasmā tathānaṃ abhisambuddhattā tathāgatoti vuccati. Abhisambuddhattho hi ettha gatasaddo. Apica jarāmarāṇassa jātipaccayasambhūtasamudāgataṭṭho tatho avitatho anaññatho...pe... saṅkhārānaṃ avijjāpaccayasambhūtasamudāgataṭṭho tatho avitatho anaññatho. Tathā avijjāya saṅkhārānaṃ paccayaṭṭho. Saṅkhārānaṃ viññāṇassa paccayaṭṭho...pe... jātiyā jarāmarāṇassa paccayaṭṭho tatho avitatho anaññatho. Taṃ

sabbaṃ bhagavā abhisambuddho, tasmāpi tathānaṃ dhammānaṃ abhisambuddhattā tathāgatoti vuccati. Evaṃ tathadhamme yāthāvato abhisambuddhoti tathāgato.

Kathaṃ tathadassitāya tathāgato? Bhagavā yaṃ sadevake loke...pe... sadevamanussāya aparimāṇāsu lokadhātūsu aparimāṇānaṃ sattānaṃ cakkhuvāre āpāthaṃ āgacchantaṃ rūpārammaṇaṃ nāma atthi. Taṃ sabbākārato jānāti, passati. Evaṃ jānatā passatā ca tena taṃ iṭṭhāniṭṭhādivasena vā diṭṭhasutamutaviññātesu labbhamānakapadavasena vā “katamaṃ taṃ rūpaṃ rūpāyatanaṃ, yaṃ rūpaṃ catunnaṃ mahābhūtaṃ upādāya vaṇṇanibhā sanidassanaṃ sappaṭiṅghaṃ nīlaṃ pītaka”nti (dha. sa. 616) ādinā nayena anekehi nāmehi terasahi vārehi dvepaññāsāya nayehi vibhajjamaṇaṃ tathameva hoti, vitathaṃ natthi. Esa nayo sotadvārādīsūpi āpāthamāgacchantesu saddādīsū. Vuttañcetaṃ bhagavatā “yaṃ, bhikkhave, sadevakassa lokassa...pe... sadevamanussāya diṭṭhaṃ suttaṃ mutaṃ viññātaṃ pattaṃ pariyesitaṃ anuvicariṃ manasā, tamahaṃ jānāmi, ...tamahaṃ abhiññāsim, taṃ tathāgatassa viditaṃ, taṃ tathāgato na upaṭṭhāsī”ti (a. ni. 4.24). Evaṃ tathadassitāya tathāgato. Tattha tathadassitāthe tathāgatoti padasambhavo veditabbo.

Kathaṃ tathāvādītāya tathāgato? Yaṃ rattiṃ bhagavā bodhimaṇḍe aparājitaṃ pallaṅke nisinna tiṇṇaṃ mārānaṃ matthakaṃ madditvā anuttaraṃ sammāsambodhiṃ abhisambuddho, yañca rattiṃ yamakasālānamantare anupādisesāya nibbānadhātuyā parinibbāyi, etthantare pañcaccattālīsavassaparimāṇe kāle paṭhamabodhiyāpi majjhimabodhiyāpi pacchimabodhiyāpi yaṃ bhagavatā bhāsitaṃ suttaṃ geyyaṃ...pe... vedallaṃ, taṃ sabbaṃ atthato ca byañjanato ca anupavajjaṃ anūnāmanadhikaṃ sabbākārāparipuṇṇaṃ rāgamadanimmadanaṃ dosamohamadanimmadanaṃ, natthi tattha vālaggamattampi pakkhalitaṃ, sabbaṃ taṃ ekamuddikāya lañchitaṃ viya, ekanāḷiyā mitaṃ viya, ekatulāya tulitaṃ viya ca tathameva hoti avitathaṃ. Tenāha – “yañca, cunda, rattiṃ tathāgato anuttaraṃ sammāsambodhiṃ abhisambujjhati, yañca rattiṃ anupādisesāya nibbānadhātuyā parinibbāyati, yaṃ etasmiṃ antare bhāsati lapati niddisati, sabbaṃ taṃ tatheva hoti no aññathā. Tasmā tathāgatoti vuccatī”ti (a. ni. 4.23). Gadaattho hi ettha gatasaddo. Evaṃ tathāvādītāya tathāgato. Apica āgadanaṃ āgado, vacananti attho. Tatho aviparīto āgado assāti dakārassa takāraṃ katvā tathāgatoti evametasmim atthe padasiddhi veditabbā.

Kathaṃ tathākāritāya tathāgato? Bhagavato hi vācāya kāyo anulometi, kāyassapi vācā. Tasmā yathāvādī tathākārī, yathākārī tathāvādī ca hoti. Evaṃbhūtassa cassa yathā vācā, kāyopi tathāgato pavattoti attho. Yathā ca kāyo, vācāpi tathā gatā pavattāti tathāgato. Tenāha “yathāvādī, bhikkhave, tathāgato tathākārī, yathākārī tathāvādī. Iti yathāvādī tathākārī, yathākārī tathāvādī, tasmā tathāgatoti vuccatī”ti (a. ni. 4.23). Evaṃ tathākāritāya tathāgato.

Kathaṃ abhibhavanaṭṭhena tathāgato? Upari bhavaggaṃ heṭṭhā aviciṃ pariyantaṃ katvā tiriyaṃ aparimāṇāsu lokadhātūsu sabbasatte abhibhavati, sīlenapi samādhināpi paññāyapi vimuttiyāpi vimuttiñāḍassanānāpi, na tassa tulā vā pamāṇaṃ vā atthi, atulo appameyyo anuttaro rājarājo devadevo sakkānaṃ atisakko brahmānaṃ atībrahmā. Tenāha “sadevake, bhikkhave, loke...pe... sadevamanussāya tathāgato abhibhū anabhibhūto aññadatthu daso vasavatī. Tasmā tathāgatoti vuccatī”ti.

Tatrevaṃ padasiddhi veditabbā, āgado viya āgado. Ko panesa? Desanāvīlāsamayo ceva puññussayo ca. Tena hesa mahānubhāvo bhisakko dibbāgadana sappe viya sabbaparappavādino sadevakañca lokaṃ abhibhavati, iti sabbalokābhibhavane tatho aviparīto desanāvīlāsamayo ceva puññassayo ca āgado assāti dakārassa takāraṃ katvā tathāgatoti veditabbo. Evaṃ abhibhavanaṭṭhena tathāgato.

Apica tathāya gatotipi tathāgato, tathaṃ gatotipi tathāgato. **Gatoti** avagato, atīto, patto, paṭipannoti attho. Tattha sakalaṃ lokaṃ tīraṇapariññāya tathāya gato avagatoti tathāgato. Lokasamudayaṃ pahānapariññāya tathāya gato atītoti tathāgato. Lokanīrodhaṃ sacchikiriyāya tathāya gato pattoti tathāgato. Lokanīrodhagāminīṃ paṭipadaṃ tathaṃ gato paṭipannoti tathāgato. Tena yaṃ vuttaṃ bhagavatā “loko, bhikkhave, tathāgatena abhisambuddho, lokasmā tathāgato viśamuyutto. Lokasamudayo, bhikkhave, tathāgatena abhisambuddho, lokasamudayo tathāgatassa pahīno. Lokanīrodho, bhikkhave, tathāgatena abhisambuddho, lokanīrodho tathāgatassa sacchikato. Lokanīrodhagāminī paṭipadā, bhikkhave, tathāgatena abhisambuddhā, lokanīrodhagāminī paṭipadā tathāgatassa bhāvitā. Yaṃ, bhikkhave, sadevakassa lokassa...pe... sabbaṃ taṃ tathāgatena abhisambuddhaṃ, tasmā tathāgatoti vuccatī”ti (a. ni. 4.23). Tassa evampi attho veditabbo. Idampi ca tathāgatassa tathāgatabhāvadīpane mukhamattameva. Sabbākārena pana tathāgatova tathāgatassa

tathāgatabhāvaṃ vaṇṇeyya.

Arahaṃ sammāsambuddhoti padadvaye pana ārakattā arīnaṃ, arānañca hatattā, paccayādīnaṃ arahattā, pāpakaraṇe rahābhāvāti imehi tāva kāraṇehi **arahanti** veditabbo.

Sammā sāmañca sabbadhammānaṃ buddhattā pana **sammāsambuddho**ti. Ayamettha saṅkhepo. Vitthārato panetaṃ padadvayaṃ **visuddhimagge** buddhānussativaṇṇanāyaṃ pakāsitaṃ.

Pariññātantaṃ tathāgatassāti ettha pana taṃ maññānāvattu pariññātaṃ tathāgatassāti pi attho veditabbo. Pariññātantaṃ nāma pariññātapāraṃ pariññātāvāsānaṃ anavasesato pariññātanti vuttaṃ hoti. Buddhānañhi sāvakehi saddhiṃ kiñcāpi tena tena maggena kilesappahāne viseso natthi, pariññāya pana atthi. Sāvakā hi catunnaṃ dhātūnaṃ ekadesameva sammasitvā nibbānaṃ pāpuṇanti. Buddhānaṃ pana aṇuppannānaṃ saṅkhāragataṃ ñāṇena aditthamatulitamatīritamasacchikataṃ natthi.

Tathāgatavārasattamanayavaṇṇanā niṭṭhitā.

Tathāgatavāraatthamanayavaṇṇanā

13. Nandī dukkhassa mūlantiādīsu ca **nandīti** purimataṇhā. **Dukkanti** pañcakkhandhā. **Mūlantiādi. Iti viditvāti** taṃ purimabhavanandiṃ “imassa dukkhassa mūla”nti evaṃ jānitvā. **Bhavāti** kammabhavato. **Jātīti** vipākakkhandhā. Te hi yasmā jāyanti, tasmā “jāti”ti vuttā. Jātisīsenā vā ayaṃ desanā. Etampi “iti viditvā”ti iminā yojetabbaṃ. Ayañhi ettha attho “kammabhavato upapattibhavo hotīti evañca jānitvā”ti. **Bhūtassāti** sattassa. **Jarāmarāṇanti** jarā ca maraṇañca. Idaṃ vuttaṃ hoti – tena upapattibhavena bhūtassa sattassa khandhānaṃ jarāmarāṇaṃ hotīti evañca jānitvāti.

Ettāvataṃ yaṃ bodhirukkhamūle aparājītapallaṅke nisīno sammasitvā sabbaññutaṃ patto, tassa paṭiccasamuppādassa paṭivedhā maññānānaṃ abhāvakāraṇaṃ dassento catusaṅkhepaṃ tisandhiṃ tiyaddhaṃ vīsataṅkāraṃ tameva paṭiccasamuppādaṃ dasseti.

Kathaṃ pana ettāvataṃ esa sabbo dassito hotīti. Ettha hi nandīti ayaṃ eko saṅkhepo. Dukkhasāti vacanato dukkhaṃ dutiyo, bhavā jātīti vacanato bhavo tatiyo, jātijarāmarāṇaṃ catuttho. Evaṃ tāva cattāro saṅkhepā veditabbā, koṭṭhāsāti attho. Taṇhādukkhaṇaṃ pana antaraṃ eko sandhi, dukkhassa ca bhavassa ca antaraṃ dutiyo, bhavassa ca jātiyā ca antaraṃ tatiyo. Evaṃ catunnaṃ aṅgulīnaṃ antarasadisā catusaṅkhepantarā tayo sandhī veditabbā.

Tattha nandīti atīto addhā, jātijarāmarāṇaṃ anāgato, dukkhañca bhavo ca paccuppannoti evaṃ tayo addhā veditabbā. Atīte pana pañcasu ākāresu nandīvacanena taṇhā ekā āgatā, tāya anāgatāpi avijjāsāṅkhāraupādānabhavā paccayalakkhaṇena gahitāva honti. Jātijarāmarāṇavacanena pana yesaṃ khandhānaṃ tajjātijarāmarāṇaṃ, te vuttā yevāti katvā āyatīṃ viññāṇanāmarūpasalāyatanaphassavedanā gahitāva honti.

Evamete “purimakammabhavasmīṃ moho avijjā, āyūhanā saṅkhārā, nikanti taṇhā, upagamaṇaṃ upādānaṃ, cetanā bhavo iti ime pañca dhammā purimakammabhavasmīṃ idha paṭisandhiyā paccayā. Idha paṭisandhi viññāṇaṃ, okkanti nāmarūpaṃ, pasādo āyatanaṃ, phuṭṭho phasso, vedayitaṃ vedanā iti ime pañca dhammā idhūpapattibhavasmīṃ purekatassa kammassa paccayā. Idha paripakkattā āyatanānaṃ moho avijjā, āyūhanā saṅkhārā, nikanti taṇhā, upagamaṇamupādānaṃ, cetanā bhavo iti ime pañca dhammā idha kammabhavasmīṃ āyatīṃ paṭisandhiyā paccayā. Āyatīṃ paṭisandhi viññāṇaṃ, okkanti nāmarūpaṃ, pasādo āyatanaṃ, phuṭṭho phasso, vedayitaṃ vedanā iti ime pañca dhammā āyatīṃ upapattibhavasmīṃ idha katassa kammassa paccayā”ti evaṃ nidditthālakkaṇā vīsati ākāra idha veditabbā. Evaṃ “nandī dukkhassa mūlanti itī viditvā bhavā jāti, bhūtassa jarāmarāṇa”nti ettāvataṃ esa sabbopi catusaṅkhepo tisandhi tiyaddho vīsataṅkāro paṭiccasamuppādo dassito hotīti veditabbo.

Idāni **tasmā tiha, bhikkhave...pe... abhisambuddhoti vadāmīti** ettha apubbapadaṇṇanaṃ katvā padayojanāya atthanigamaṇaṃ karissāma. **Tasmā tihāti** tasmā icceva vuttaṃ hoti. Tikārahakārā hi nipātā.

Sabbasoti anavasesavacanametam. **Tañhānanti** nandīti evam vuttānam sabbatañhānam. **Khayāti** lokuttaramaggena accantakkhayā. **Virāgādīni** khayavevacanāneva. Yā hi tañhā khīṇā, virattāpi tā bhavanti niruddhāpi cattāpi paṭinissatthāpi. **Khayāti** vā catumaggakiccasādhāraṇametam. Tato paṭhamamaggena **virāgā**, dutiyena **nirodhā**, tatiyena **cāgā**, catutthena **paṭinissaggāti** yojetabbaṃ. Yāhi vā tañhāhi pathaviṃ pathavito sañjāneyya, tāsam khayā. Yāhi pathaviṃ maññeyya, tāsam virāgā. Yāhi pathaviyā maññeyya, tāsam nirodhā. Yāhi pathavito maññeyya, tāsam cāgā. Yāhi pathaviṃ meti maññeyya, tāsam paṭinissaggā. Yāhi vā pathaviṃ maññeyya, tāsam khayā...pe... yāhi pathaviṃ abhinandeyya, tāsam paṭinissaggāti evamettha yojanā kātabbā, na kiñci virujjhati.

Anuttaranti uttaravirahitam sabbasettham. **Sammāsambodhinti** sammā sāmañca bodhiṃ. Atha vā pasattham sundarañca bodhiṃ. **Bodhīti** rukkhopi maggopi sabbaññutaññāmpī nibbānampī. “Bodhirukkhamūle paṭhamābhisambuddho”ti (mahāva. 1; udā. 1) ca “antarā ca bodhiṃ antarā ca gaya”nti (mahāva. 11; ma. ni. 1.285) ca āgataṭṭhānehi rukkho bodhīti vuccati. “Catūsu maggesu ñāṇa”nti (cūḷani. 121) āgataṭṭhāne maggo. “Pappoti bodhiṃ varabhūrimedhaso”ti (dī. ni. 3.217) āgataṭṭhāne sabbaññutaññānam. “Patvāna bodhiṃ amataṃ asaṅkhata”nti āgataṭṭhāne nibbānam. Idha pana bhagavato arahattamaggaññānam adhippetam. Apare sabbaññutaññānantipi vadanti.

Sāvakanam arahattamaggo anuttarā bodhi hoti na hotīti. Na hoti. Kasmā? Asabbaguṇadāyakattā. Tesañhi kassaci arahattamaggo arahattaphalameva deti, kassaci tisso vijjā, kassaci cha abhiññā, kassaci catasso paṭisambhidā, kassaci sāvakaṇāpāramiññānam. **Paccekabuddhānampi** paccekabodhiññānameva deti. **Buddhānam** pana sabbaguṇasampattim deti abhiseko viya rañño sabbalokissariyabhāvaṃ. Tasmā aññassa kassacipi anuttarā bodhi na hotīti.

Abhisambuddhoti abhiññāsi paṭivijjhi, patto adhigatoti vuttam hoti. **Iti vadāmīti** iti vadāmi ācikkhāmi desemi paññapemi, paṭṭhapemi vivarāmi vibhajāmi uttānikaromīti. Tatrāyaṃ yojanā – tathāgatopi, bhikkhave...pe... pathaviṃ na maññati...pe... pathaviṃ nābhinandati. Tam kissa hetu, nandī dukkhassa mūlam, bhavā jāti, bhūtassa jarāmarañanti iti viditvāti. Tattha **iti viditvāti itikāro** kāraṇattho. Tena imassa paṭiccasamuppādassa viditattā paṭividdhattāti vuttam hoti. Kiñca bhiyyo – yasmā ca evamimam paṭiccasamuppādam viditvā tathāgatassa yā nandīti vuttatañhā sabbappakārā, sā pahīnā, tesañca tathāgato sabbaso tañhānam khayā...pe... anuttaram sammāsambodhiṃ abhisambuddho. Tasmā pathaviṃ na maññati...pe... pathaviṃ nābhinandatīti vadāmīti evam abhisambuddhattā na maññati nābhinandatīti vadāmīti vuttam hoti.

Atha vā yasmā “nandī dukkhassa mūla”ntiādīnā nayena paṭiccasamuppādam viditvā sabbaso tañhā khayam gatā, tasmā tiha, bhikkhave, tathāgato sabbaso tañhānam khayā...pe... abhisambuddhoti vadāmi. So evam abhisambuddhattā pathaviṃ na maññati...pe... nābhinandatīti. Yattha yattha hi yasmāti avatvā tasmāti vuccati, tattha tattha yasmāti ānetvā yojetabbaṃ, ayam sāsana yutti. Esa nayo sabbattha.

Idamavoca bhagavāti idam nidānāvasānato pabhuti yāva abhisambuddhoti vadāmīti sakalasuttantaṃ bhagavā paresam paññāya alabbhaṇeyyapaṭiṭṭham paramagambhīram sabbaññutaññānam dassento ekena puthujjanavārena ekena sekkhāvārena catūhi khīṇāsavavārehi dvīhi tathāgatavārehīti aṭṭhahi mahāvārehi ekamekasmīñca vāre pathavīdīhi catuvīsatiyā antaravārehi paṭimaṇḍetvā dvebhāṇavāraparimāṇāya tantiyā avoca.

Evam vicitrāyadesanāvīlāsayuttam panetaṃ suttaṃ karavīkarudamañjunā kaṇṇasukhena paṇḍitajanahadayānam amatābhisekasadisena brahmāsarena bhāsamānassāpi. **Na te bhikkhū bhagavato bhāsitaṃ abhinanduntī** te pañcasatā bhikkhū idam bhagavato vacanam nānumodiṃsu. Kasmā? Aññāṇakena. Te kira imassa suttassa attham na jāniṃsu, tasmā nābhinandimṃsu. Tesañhi tasmim samaye evam vicitrāyadesanāvīlāsayuttampi etaṃ suttaṃ ghanaputhulena dussapaṭṭena mukhe bandham katvā purato ṭhapitamanuññabhojanam viya ahosi. Nanu ca bhagavā attanā desitam dhammam pare ñāpetum kappasatasahassādhikāni cattāri asaṅkhyeyyāni pāramiyo pūretvā sabbaññutam patto. So kasmā yathā te na jānanti, tathā desesīti. Vuttamidaṃ imassa suttassa nikkhepavicāraṇāyam eva “mānabhañjanattham sabbadhammamūlapariyāyanti desanam ārabhī”ti, tasmā na yidha puna vattabamatthi, evam mānabhañjanattham desitañca panetaṃ suttaṃ sutvā te bhikkhū tamyeva kira pathaviṃ diṭṭhigatikopi sañjānāti,

sekkhopi arahāpi tathāgatopi sañjānāti. Kinnāmidam katham nāmidanti cintentā pubbe mayam bhagavatā kathitam yamkiñci khippameva jānāma, idāni panimassa mūlapariyāyassa antam vā koṭim vā na jānāma na passāma, aho buddhā nāma appameyyā atulāti uddhaṭadāṭhā viya sappā nimmadā hutvā buddhupaṭṭhānañca dhammassavanañca sakkaccam āgamaṃsu.

Tena kho pana samayena bhikkhū dhammasabhāyaṃ sannisinnā imam katham samuṭṭhāpesum “aho buddhānam ānubhāvo, te nāma brāhmaṇapabbajitā tathā mānamadamattā bhagavatā mūlapariyāyadesanāya nihata mānā katā”ti, ayañcarahi tesam bhikkhūnam antarākathā vippakatā. Atha bhagavā gandhakuṭiyā nikkhamitvā tañkhañnurūpena paṭihāriyena dhammasabhāyaṃ paññattavarabuddhāsane nisīditvā te bhikkhū āha – “kāya nuttha, bhikkhave, etarahi kathāya sannisinnā”ti. Te tamattham bhagavato ārocesum. Bhagavā etadavoca – “na, bhikkhave, idāneva, pubbepi aham ime evam mānapaggahitasire vicarante nihata mānā akāsi”nti. Tato imissā aṭṭhuppattiyā idam atītam ānesi –

Bhūtapubbam, bhikkhave, aññataro disāpāmokkho brāhmaṇo bārānasiyam paṭivasati tiṇṇam vedānam pārāgū sanighaṇṭukeṭubhānam sākkharappabhedānam itihāsapañcamānam padako veyyākaraṇo lokāyatamahāpurisalakkhaṇesu anavayo, so pañcamattāni māṇavakasatāni mante vāceti. Pañḍitā māṇavakā bahuñca gaṇhanti lahuñca, suṭṭhu ca upadhārenti, gahitañca tesam na vinassati. Sopi brāhmaṇo ācariyamutṭhim akatvā ghaṭe udakam āsīñcanto viya sabbampi sippam uggañhāpetvā te māṇavake etadavoca “ettakamidam sippam diṭṭhadhammasamparāyahita”nti. Te māṇavakā – “yam amhākam ācariyo jānāti, mayampi tam jānāma, mayampi dāni ācariyā evā”ti mānam uppādetvā tato pabhuti ācariye agāravā nikkhattavattā viharimṃsu. Ācariyo ñatvā “karissāmi nesam mānaniggaha”nti cintesi. So ekadivasam upaṭṭhānam āgantvā vanditvā nisinne te māṇavake āha “tātā pañham pucchissāmi, kaccittha samatthā kathetu”nti. Te “pucchatha ācariya, pucchatha ācariyā”ti sahasāva āhamṃsu, yathā tam sutamadamattā. Ācariyo āha –

“Kālo ghasati bhūtāni, sabbāneva sahattanā;
Yo ca kālaghaso bhūto, sa bhūtapacaniṃ pacī”ti. (jā. 1.10.190) –

Vissajjetha tātā imam pañhanti.

Te cintevā ajānamānā tuñhī ahesum. Ācariyo āha “alam tātā gacchathajja, sve katheyāthā”ti uyyojesi. Te dasapi vīsatiṃ sampiṇḍitā hutvā na tassa pañhassa ādiṃ, na antamaddasaṃsu. Āgantvā ācariyassa ārocesum “na imassa pañhassa attham ajānāmā”ti. Ācariyo tesam niggahatthāya imam gāthamabhāsi –

“Bahūni naraśīsāni, lomasāni brahāni ca;
Gīvāsu paṭimukkāni, kocidevettha kaṇṇavā”ti. (jā. 1.10.191) –

Gāthāyattho – bahūni narānam sīsāni dissanti, sabbāni ca tāni lomasāni sabbāni ca mahantāni gīvāyameva ca ṭhapitāni, na tālaphalam viya hatthena gahitāni, natthi tesam imehi dhammehi nānakaraṇam. Ettha pana kocideva kaṇṇavāti attānam sandhāyāha. **Kaṇṇavāti** paññavā. Kaṇṇacchiddam pana na kassaci natthi, tam sutvā te māṇavakā mañkubhūtā pattakkhandhā adhomukhā aṅguliya bhūmiṃ vilikhantā tuñhī ahesum.

Atha nesam ahirikabhāvaṃ passitvā ācariyo “uggañhatha tātā pañha”nti pañham vissajjesi. **Kāloti** purebhakkālopi pacchābhakkālopi evamādi. **Bhūtānīti** sattādhivacanametam. Kālo hi bhūtānam na cammamāṃsādīni khādāti, apica kho nesam āyuvanābalāni khepento yobbaññam maddanto ārogyam vināsento **ghasati** khādātīti vuccati. **Sabbāneva sahattanāti** evam ghasanto ca na kiñci vajjeti, sabbāneva ghasati. Na kevalañca bhūtāniyeva, apica kho sahattanā attānampi ghasati. Purebhakkālo hi pacchābhakkālam na pāpuṇāti. Esa nayo pacchābhakkāladīsu. **Yo ca kālaghaso bhūtoti** khīṇāsavassetam adhivacanam. So hi āyatim paṭisandhikālam khepetvā khādītva ṭhitattā “kālaghaso”ti vuccati. **Sa bhūtapacaniṃ pacīti** so yāyam tañhā apāyesu bhūte pacati, tam ñāṇagginā paci dayhi bhasmamakāsi, tena “bhūtapacaniṃ pacī”ti vuccati. “Pajani”ntipi pāṭho. Janikam nibbattikanti attho.

Atha te māṇavakā dīpasahassalokena viya rattim samavisamaṃ ācariyassa vissajjanena pañhassa attham pākātam disvā “idāni mayam yāvajīvam guruvāsam vasissāma, mahantā ete ācariyā nāma, mayañhi bahussutamānam uppādetvā catuppādikagāthāyapi attham na jānāmā”ti nihata mānā pubbasadisameva

ācariyassa vattappaṭipattiṃ katvā saggaparāyaṇā ahesuṃ.

Ahaṃ kho, bhikkhave, tena samayena tesu ācariyo ahoṣiṃ, ime bhikkhū māṇavakā. Evaṃ pubbepāhaṃ ime evaṃ mānapaggahitasire vicarante nihataṃāne akāsinti.

Imaṃca jātakam sutvā te bhikkhū pubbepe mayamaṃ māneneva upahatāti bhiiyosomattāya nihataṃānā hutvā attano upakāraḥakammaṭṭhānaparāyaṇā ahesuṃ.

Tato bhagavā ekaṃ samayaṃ janapadacārikaṃ caranto vesāliṃ patvā gotamake cetiye viharanto imesaṃ pañcasatānaṃ bhikkhūnaṃ nānaparipākaṃ viditvā imaṃ gotamakasuttaṃ kathesi –

“Abhiññāyāhaṃ, bhikkhave, dhammaṃ desemi no anabhiññāya, sanidānāhaṃ...pe... sappāṭihāriyāhaṃ, bhikkhave, dhammaṃ desemi no appāṭihāriyaṃ. Tassa mayhaṃ, bhikkhave, abhiññāya dhammaṃ desayato... pe... no appāṭihāriyaṃ. Karaṇīyo ovādo, karaṇīyā anusāsani. Alaṃca pana vo, bhikkhave, tuṭṭhiyā alaṃ attamanatāya alaṃ somanassāya. Sammāsambuddho bhagavā, svākkhāto dhammo, suppaṭipanno saṅghoti. Idamavoca bhagavā, imasmiṃca pana veyyākaraṇasmim bhaññamāne dasasahassilokadhātu akampitthā”ti (a. ni. 3.126).

Idaṃca suttaṃ sutvā te pañcasatā bhikkhū tasmimyevasane saha paṭisambhidāhi arahattaṃ pāpuṇṇiṃsu, evāyaṃ desanā etasmim thāne niṭṭhamagamāsīti.

Tathāgatavāraṭṭhamaṇavaṇṇanā niṭṭhitā.

Papañcasūdaniyā majjhimanikāyaṭṭhakathāya

Mūlapariyāyasuttavaṇṇanā niṭṭhitā.

2. Sabbāsavasuttavaṇṇanā

14. Evaṃ me suttaṃ...pe... sāvattiyanti sabbāsavasuttaṃ. Tatrāyaṃ apubbapadavaṇṇanā – **sāvattitī** savatthassa isino nivāsaṭṭhānabhūtā nagarī, yathā kākandī mākandī kosambitī evaṃ tāva akkharacintakā. Aṭṭhakathācariyā pana bhaṇanti “yaṃkiñci manussānaṃ upabhogaparibhogaṃ sabbamettha atthitī sāvattitī. Sattasamāyoge ca kiṃ bhaṇḍamatthitī pucchite sabbamatthī”ti vacanamupādāya sāvattitī.

“Sabbadā sabbūpakaraṇaṃ, sāvattiyamaṃ samohitaṃ;
Tasmā sabbamupādāya, sāvattitī pavuccati.

Kosalānaṃ puraṃ rammaṃ, dassaneyyaṃ manoramaṃ;
Dasahi saddehi avivittaṃ, annapānasamāyutaṃ.

Vuddhiṃ vepullataṃ pattaṃ, iddhaṃ phītaṃ manoramaṃ;
Aḷakamandāva devānaṃ, sāvattipuramuttama”nti.

Tassaṃ **sāvattiyamaṃ. Jetavaneti** ettha attano paccatthikajanaṃ jinātīti jeto, raññā vā attano paccatthikajane jite jātoti jeto, maṅgalakamyatāya vā tassa evaṃnāmameva katanti jeto, jetassa vanamaṃ jetavanaṃ. Tañhi jetena rājakumārena ropitaṃ samvaddhitaṃ paripālitaṃ, so ca tassa sāmī ahoṣi. Tasmā jetavananti vuccati, tasmim **jetavane. Anāthapiṇḍikassa ārameti** ettha sudatto nāma so gahapati mātāpitūhi katanāmasasena. Sabbakāmasamiddhitāya pana vigatamalamaccheratāya karuṇādiguṇasamaṅgitāya ca niccakālaṃ anāthānaṃ piṇḍamadāsi, tena anāthapiṇḍikoti saṅkhaṃ gato. Āramanti ettha pāṇino visesena vā pabbajitāti āramo, tassa pupphaphalādisobhāya nātīdūranaccāsannatādīpañcavidhasenāsanāṅgasampattiyā ca tato tato āgamma ramanti abhiramanti anukkaṇṭhitā hutvā nivasantīti attho. Vuttappakāryā vā sampattiyā tattha tattha gatepi attano abbhantaramyeva ānetvā rametīti āramo. So hi anāthapiṇḍikena gahapatinā jetassa rājakumārassa hatthato aṭṭhārasahi hiraññakoṭṭhi koṭṭisantharena kīṇitvā aṭṭhārasahi hiraññakoṭṭhi senāsanāni kārapetvā aṭṭhārasahi hiraññakoṭṭhi vihāramahaṃ niṭṭhāpetvā evaṃ catupaññāsahiraññakoṭṭipariccāgena

buddhappamukhassa saṅghassa niyyādito. Tasmā “anāthapiṇḍikassa ārāmo”ti vuccati. Tasmim **anāthapiṇḍikassa ārāme.**

Ettha ca “jetavane”ti vacanaṃ purimasāniparikittanaṃ. “Anāthapiṇḍikassa ārāme”ti pacchimasāniparikittanaṃ. Kimetesam parikittane payojananti. Puññakāmānaṃ diṭṭhānugatiāpajjanaṃ. Tatra hi dvārakoṭṭhakapāsādamāpane bhūmivikkayaladdhā aṭṭhārasa hiraññaḷaṇḍiyo anekakoṭṭhiyagghanakā rukkḥā ca jetassa pariccāgo, catupaññaḷaṇḍiyo anāthapiṇḍikassa. Iti tesam parikittanena evaṃ puññakāmā puññaṇi karontīti dassento āyasmā ānando aññepi puññakāme tesam diṭṭhānugatiāpajjane niyojeti.

Sabbāsavaṃsaṃvarapariyāyaṃ vo, bhikkhaveti kasmā idaṃ suttamabhāsi? Tesam bhikkhūnaṃ upakkilesavisodhanaṃ ādim katvā āsavakkhayāya paṭipattidassanattamaṃ. Tattha **sabbāsavaṃsaṃvarapariyāyanti** sabbesaṃ āsavānaṃ saṃvarakāraṇaṃ saṃvarabhūtaṃ kāraṇaṃ, yena kāraṇena te saṃvaritā pidahitā hutvā anuppādanirodhasaṅkhātamaṃ khayaṃ gacchanti pahīyanti nappavattanti, taṃ kāraṇanti attho. Tattha āsavantīti **āsavā**, cakkhutopi...pe... manatopi sandanti pavattantīti vuttaṃ hoti. Dhammato yāva gotrabhuṃ okāsato yāva bhavaggaṃ savantīti vā āsavā, ete dhamme etaṅca okāsaṃ anto karitvā pavattantīti attho. Antokaraṇattho hi ayaṃ ākāro. Cirapārivāsiyatṭhena madirādayo āsavā, āsavā viyātipi āsavā. Lokasmiñhi cirapārivāsikā madirādayo āsavāti vuccanti. Yadi ca cirapārivāsiyatṭhena āsavā, eteyeva bhavitumarahanti. Vuttañhetamaṃ “purimā, bhikkhave, koṭi na paññāyati avijjāya, ito pubbe avijjā nāhosī”tiādi (a. ni. 10.61). Āyamaṃ vā saṃsāradukkhaṃ savanti pasavantītipi āsavā. Purimāni cettha nibbānaṇi yattha kilesā āsavāti āgacchanti, tattha yujjanti, pacchimaṃ kammepi. Na kevalaṅca kammakilesāyeva āsavā, apica kho nānappakāraḷaṇḍiyo uppaddavāpi. Suttasu hi “nāhamaṃ, cunda, diṭṭhadhammikānaṃyeva āsavānaṃ saṃvarāya dhammaṃ desentī”ti (dī. ni. 3.182) ettha vivādamūlabhūtā kilesā āsavāti āgatā.

“Yena devūpapatyassa, gandhabbo vā vihaṅgamo;
Yakkhattamaṃ yena gaccheyyamaṃ, manussattaṅca abbaje;
Te mayhamaṃ āsavā khīṇā, viddhastā vinaṅkatā”ti. (a. ni. 4.36); –

Ettha tebhūmaṅca kammaṃ avasesā ca akusalā dhammā. “Diṭṭhadhammikānaṃ āsavānaṃ saṃvarāya samparāyikānaṃ āsavānaṃ paṭighātāyā”ti (pārā. 39) ettha parūpavādavipparisāravadhādayo ceva apāyadukkhabhūtā ca nānappakāraḷaṇḍiyo uppaddavā. Te panete āsavā yattha yathā āgatā, tattha tathā veditabbā.

Ete hi vinaye tāva “diṭṭhadhammikānaṃ āsavānaṃ saṃvarāya, samparāyikānaṃ āsavānaṃ paṭighātāyā”ti dvedhā āgatā. Saṅgāyatane “tayome āvuso āsavā, kāmāsavo bhavāsavo avijjāsavo”ti (a. ni. 6.63) tidhā āgatā. Aññesu ca suttantesu abhidhamme ca teyeva diṭṭhāsavena saha catudhā āgatā. Nibbedhikapariyāye – “atthi, bhikkhave, āsavā nirayagāminiyā, atthi āsavā tiracchānāyonigāminiyā, atthi āsavā pettivisayagāminiyā, atthi āsavā manussalokagāminiyā, atthi āsavā devalokagāminiyā”ti (a. ni. 6.63) pañcadhā āgatā. Chakkanipāte – “atthi, bhikkhave, āsavā saṃvarā pahātābbā”tiādinā nayena chadhā āgatā. Imasmim pana sutte teyeva dassanāpahātābbhehi saddhim sattadhā āgatāti. Ayaṃ tāva āsavapade vacanattho ceva pabhedo ca.

Saṃvarapade pana saṃvarayatīti **saṃvaro**, pidahati nivāreti pavattitumaṃ na detīti attho. Tathā hi “anujānāmi, bhikkhave, divā paṭisallīyantena dvāraṃ saṃvaritvā paṭisallīyitu”nti (pārā. 77), “sotānaṃ saṃvarambraūmi, paññāyete pidhīyare”ti (su. ni. 1041) ca ādisu pidhānaṭṭhena saṃvaramāha. Svāyamaṃ saṃvaro pañcavidho hoti sīlasaṃvaro satiññaṅca khanti vīriyasaṃvaroti. Tattha “iminā pātimokkhasaṃvarena upeto”ti (vibha. 511) ayaṃ sīlasaṃvaro. Pātimokkhasīlañhi ettha saṃvaroti vuttaṃ. “Cakkhundriye saṃvaramāpajjati”tiādisu (dī. ni. 1.213) satisaṃvaro. Sati hettha saṃvaroti vuttā. “Sotānaṃ saṃvaram brūmi, paññāyete pidhīyare”ti ayaṃ ñāṇasaṃvaro. Ñāṇañhettha pidhīyareti iminā pidhānaṭṭhena saṃvaroti vuttaṃ. “Khamo hoti sītassa...pe..., uppanamaṃ kāmavitakkaṃ nādhivāsetī”tiādinā (ma. ni. 1.24-26) pana nayena idheva khantivīriyasaṃvarā āgatā. Tesaṅca “sabbāsavaṃsaṃvarapariyāya”nti iminā uddesena saṅgahitāṭṭā saṃvarabhāvo veditabbo.

Apica pañcavidhopi ayaṃ saṃvaro idha āgatoyeva, tattha khantivīriyasaṃvarā tāva vuttāyeva. “So taṅca anāsanaṃ taṅca agocara”nti (ma. ni. 1.25) ayaṃ panettha sīlasaṃvaro. “Paṭisaṅkhā yoniso cakkhundriyasaṃvarasaṃvuto”ti (ma. ni. 1.22) ayaṃ satisaṃvaro. Sabbattha paṭisaṅkhā ñāṇasaṃvaro. Aggahitaggahaṅgānaṃ pana dassanaṃ paṭisevanā bhāvanā ca ñāṇasaṃvaro. Pariyāyanti etena dhammāti pariyaṃyo,

uppattiṃ nirodhaṃ vā gacchantīti vuttaṃ hoti. Ettāvata “sabbāsavaṣaṃvarapariyāya”nti ettha yaṃ vattabbaṃ, taṃ vuttaṃ hoti.

15. Idāni jānato ahantiādīsu jānatoti jānantassa. Passatoti passantassa. Dvepi padāni ekatthāni, byañjanaṃ nānaṃ. Evaṃ santepe jānatoti ñāṇalakkhaṇaṃ upādāya puggalaṃ niddisati, jānalakkhaṇaṃ ñāṇaṃ. Passatoti ñāṇappabhāvaṃ upādāya, passanappabhāvaṃ ñāṇaṃ. Nāṇasamaṅgī puggalo cakkhumā viya cakkhunā rūpāni ñāṇena vivaṇṇe dhamme passati. Apica yonisomanasikāraṃ uppādetuṃ jānato, ayonisomanasikāro yathā na uppajjati, evaṃ passatoti ayamettha sāro. Keci panācariyā bahū papañce bhaṇanti, te imasmiṃ atthe na yujjanti.

Āsavānaṃ khayanti āsavappahānaṃ āsavānaṃ accantakkhayasamuppādaṃ khīṇākāraṃ natthibhāvanti ayameva hi imasmiṃca sutte, “āsavānaṃ khayā anāsavaṃ cetovimutti”ntiādīsu (ma. ni. 1.438) ca āsavakkhayattho. Aññattha pana maggaphalanibbānāni āsavakkhayoti vuccanti. Tathā hi –

“Sekhassa sikkhamānassa, ujumaggānusārino;
Khayasmim paṭhamaṃ ñāṇaṃ, tato aññā anantarā”ti. (itivu. 62) –

Ādīsu maggo āsavakkhayoti vutto,

“Āsavānaṃ khayā samaṇo hoti”tiādīsu (ma. ni. 1.438) phalaṃ.

“Paravajjānupassissa, niccaṃ ujjhānasaññino;
Āsavā tassa vaḍḍhanti, ārā so āsavakkhayā”ti. (dha. pa. 253) –

Ādīsu nibbānaṃ “āsavakkhayo”ti vuttaṃ.

No ajānato no apassatoti yo pana na jānāti na passati, tassa no vadāmīti attho. Etena ye ajānato apassatopi saṃvarādīhiyeva suddhiṃ vadanti, te paṭikkhittā hontī. Purimena vā padadvayena upāyo vutto, iminā anupāyapaṭisedho. Saṅkhepena cettha ñāṇaṃ āsavaṣaṃvarapariyāyoti dassitaṃ hoti.

Idāni yaṃ jānato āsavānaṃ khayoti, taṃ dassetukāmo **kiñca, bhikkhave, jānatoti** puccham ārabhi, tattha jānānaṃ bahuvidhā. Dabbajātiko eva hi koci bhikkhu chattaṃ kātuṃ jānāti, koci cīvarādīnaṃ aññataram, tassa idīsāni kammāni vattasīse ṭhatvā karontassa sā jānānaṃ maggaphalānaṃ padaṭṭhānaṃ na hotīti na vattabbā. Yo pana sāsane pabbajitvā vejjakammādīni kātuṃ jānāti, tasevaṃ jānato āsavā vaḍḍhantiyeva, tasmā yaṃ jānato passato ca āsavānaṃ khayoti, tadeva dassento āha **yoniso ca manasikāraṃ ayoniso ca manasikāraṃ**.

Tattha **yoniso manasikāro** nāma upāyamanasikāro pathamanasikāro, aniccādīsu aniccanti ādinā eva nayena saccānulomikena vā cittassa āvaṭṭanā anvāvaṭṭanā ābhogo samannāhāro manasikāro, ayaṃ vuccati yoniso manasikāroti.

Ayoniso manasikāroti anupāyamanasikāro uppathamanasikāro. Anicce niccanti dukkhe sukhaṃ anattani attāti asubhe subhanti ayoniso manasikāro uppathamanasikāro. Saccapaṭikulena vā cittassa āvaṭṭanā anvāvaṭṭanā ābhogo samannāhāro manasikāro, ayaṃ vuccati ayoniso manasikāroti. Evaṃ yoniso manasikāraṃ uppādetuṃ jānato, ayoniso manasikāro ca yathā na uppajjati, evaṃ passato āsavānaṃ khayoti.

Idāni imassevatthassa yuttim dassento āha **ayoniso, bhikkhave...pe... pahīyantīti**. Tena kiṃ vuttaṃ hoti, yasmā ayoniso manasikaroto āsavā uppajjanti, yoniso manasikaroto pahīyanti, tasmā jānitabbaṃ yoniso manasikāraṃ uppādetuṃ jānato, ayoniso manasikāro ca yathā na uppajjati, evaṃ passato āsavānaṃ khayoti, ayaṃ tāvettha saṅkhepavaṇṇanā.

Ayaṃ pana vitthāro – tattha “yoniso ayoniso”ti imehi tāva dvīhi padehi ābaddhaṃ hoti upari sakalasuttaṃ. Vaṭṭavivaṭṭavasena hi upari sakalasuttaṃ vuttaṃ. Ayoniso manasikāramūlakaṇca vaṭṭam, yoniso manasikāramūlakaṇca vivaṭṭam. Kathaṃ? Ayoniso manasikāro hi vaḍḍhamāno dve dhamme paripūreti

avijjañca bhavatañhañca. Avijjāya ca sati “avijjāpaccayā sañkhārā...pe... dukkhakkhandhassa samudayo hoti. Tañhāya sati tañhāpaccayā upādānaṃ...pe... samudayo hoti”ti. Evaṃ ayaṃ ayoniso manasikārabahulo puggalo vātavegābhigghātena vippanaṭṭhanāvā viya gaṅgāvaṭṭe patitagokulaṃ viya cakkayante yuttabalibaddo viya ca punappunaṃ bhavayonigativinñāṇaṭṭhitisattāvāsesu āvaṭṭaparivaṭṭaṃ karoti, evaṃ tāva ayoniso manasikāramūlakam vaṭṭaṃ.

Yoniso manasikāro pana vaḍḍhamāno – “yoniso manasikārasampannassetam, bhikkhave, bhikkhuno pāṭikañkham, ariyaṃ aṭṭhaṅgikaṃ maggaṃ bhāvessati, ariyaṃ aṭṭhaṅgikaṃ maggaṃ bahulīkarissati”ti (saṃ. ni. 5.55) vacanato sammādiṭṭhipamukham aṭṭhaṅgikaṃ maggaṃ paripūreti. Yā ca sammādiṭṭhi, sā vijjāti tassa vijjuppādā avijjānirodho, “avijjānirodhā sañkhāranirodho...pe... evaṃ etassa kevalassa dukkhakkhandhassa nirodho hoti”ti (mahāva. 1) evaṃ yoniso manasikāramūlakam vivaṭṭaṃ veditabbaṃ. Evaṃ imehi dvīhi padehi ābaddham hoti upari sakalasuttaṃ.

Evaṃ ābaddhe cettha yasmā pubbe āsavappahānaṃ dassetvā pacchā uppatti vuccamānā na yujjati. Na hi pahīnā puna uppajjanti. Uppannānaṃ pana pahānaṃ yujjati, tasmā uddesapaṭilomatopi “ayoniso, bhikkhave, manasikaroto”tiādīmāha.

Tattha **ayoniso manasikarototi** vuttappakāraṃ ayoniso manasikāraṃ uppādayato. **Anuppannā ceva āsavā uppajjantīti** ettha ye pubbe appaṭiladdhapubbaṃ cīvarādiṃ vā paccayaṃ upaṭṭhākasaddhivihārikaantevāsikānaṃ vā aññataram manūññaṃ vatthum paṭilabhivā, taṃ subham sukhamti ayoniso manasikaroto, aññataraññataram vā pana ananubhūtapubbaṃ ārammaṇaṃ yathā vā tathā vā ayoniso manasikaroto āsavā uppajjanti, te anuppannā uppajjantīti veditabbā, aññathā hi anamatagge saṃsāre anuppannā nāma āsavā na santi. Anubhūtapubbepi ca vatthumhi ārammaṇe vā yassa pakatisuddhiyā vā uddesaparipucchāpariyattinavakammayonisomanasikārānaṃ vā aññataravasena pubbe anuppajjitvā pacchā tādīsena paccayena sahasā uppajjanti, imepi anuppannā uppajjantīti veditabbā. Tesuyeva pana vatthārammaṇesu punappunaṃ uppajjamānā uppannā pavaḍḍhantīti vuccanti. Ito aññathā hi paṭhamuppannānaṃ vaḍḍhi nāma natthi.

Yoniso ca kho, bhikkhaveti ettha pana yassa pakatisuddhiyā vā seyyathāpi āyasmato mahākassapassa bhaddāya ca kāpilāniyā, uddesaparipucchādīhi vā kāraṇehi āsavā nuppajjanti, so ca jānāti “na kho me āsavā maggena samugghātaṃ gatā, handa nesam samugghātāya paṭipajjāmi”ti. Tato maggabhāvanāya sabbe samugghātetī. Tassa te āsavā anuppannā na uppajjantīti vuccanti. Yassa pana kārakasseva sato satisammosena sahasā āsavā uppajjanti, tato saṃvegamaṃpajjitvā yoniso padahanto te āsave samucchindati, tassa uppannā pahīyantīti vuccanti maṅḍalārāmavāsīmahātissabhūtattherassa viya. So kira tasmimyeva vihāre uddesaṃ gaṇhāti, athassa gāme piṇḍāya carato visabhāgārammaṇe kilesa uppajji, so taṃ vipassanāya vikkhambhetvā vihāraṃ agamāsi. Tassa supinantepi taṃ ārammaṇaṃ na upaṭṭhāsi. So “ayaṃ kilesa vaḍḍhitvā apāyasaṃvattaniko hoti”ti saṃvegaṃ janetvā ācariyaṃ āpucchitvā vihārā nikkhamma mahāsaṅgharakkhitattherassa santike rāgaṭipakkham asubhakammaṭṭhānaṃ gahetvā gumbantaraṃ pavisitvā paṃsukūlacīvaraṃ santharivā nisajja anāgāmi maggena pañcakāmaguṇīkarāgaṃ chinditvā utṭhāya ācariyaṃ vanditvā punadivase uddesamaggaṃ pāpuṇi. Ye pana vattamānuppannā, tesam paṭipattiyā pahānaṃ nāma natthi.

16. Idāni “uppannā ca āsavā pahīyantī”ti idameva padaṃ gahetvā ye te āsavā pahīyanti, tesam nānappakārato aññampi pahānakāraṇaṃ āvikātuṃ desanaṃ vitthārento **atthi, bhikkhave, āsavā dassanā pahātabbā**tiādīmāha yathā taṃ desanāpabhedakusalo dhammarājā. Tattha **dassanā pahātabbā**ti dassanena pahātabbā. Esa nayo sabbattha.

Dassanāpahātabbāāsavavaṇṇanā

17. Idāni tāni padāni anupubbato byākātukāmo “katame ca, bhikkhave, āsavā dassanā pahātabbā”ti puccham katvā mūlapariyāyavaṇṇanāyaṃ vuttanayeneva “idha, bhikkhave, assutavā puthujjano”ti puggalādiṭṭhānaṃ desanaṃ ārabhi. Tattha **manasikaraṇīye dhamme nappajjantīti** āvajjitabbe samannāharitabbe dhamme na pajjantīti. **Amanasikaraṇīyeti** tabbiparīte. Esa nayo sesapadesupi. Yasmā pana ime dhammā manasikaraṇīyā, ime amanasikaraṇīyāti dhammato niyamo natthi, ākārato pana atthi. Yenā

ākārena manasikariyamānā akusaluppattipadaṭṭhānā hontī, tenākārena na manasikātabbā. Yena kusalluppattipadaṭṭhānā hontī, tenākārena manasikātabbā. Tasmā “ya’ssa, bhikkhave, dhamme manasikaroto anuppanno vā kāmāsavo”tiādimāha.

Tattha ya’ssāti ye assa assutavato puthujjanassa. **Manasikarototi** āvajjayato samannāharantassa. **Anuppanno vā kāmāsavoti** ettha samuccayattho vāsaddo, na vikappattho. Tasmā yathā “yāvata, bhikkhave, sattā apadā vā dvipadā vā...pe... tathāgato tesam aggamakkhāyatī”ti (itivu. 90) vutte apadā ca dvipadā cāti attho, yathā ca “bhūtānaṃ vā sattānaṃ ṭhitiyā sambhavesīnaṃ vā anuggahāyā”ti (ma. ni. 1.402) vutte bhūtānaṃ sambhavesīnaṃ cāti attho, yathā ca “aggito vā udakato vā mithubhedato vā”ti (udā. 76) vutte aggito ca udakato ca mithubhedato cāti attho, evamidhāpi anuppanno ca kāmāsavo uppajjati, uppanno ca kāmāsavo pavaḍḍhatīti attho daṭṭhabbo. Evaṃ sesesu.

Ettha ca **kāmāsavoti** pañcakāmaguṇiko rāgo. **Bhavāsavoti** rupārūpabhava chandarāgo, jhānanikanti ca sassatucchadadiṭṭhisahagatā. Evaṃ diṭṭhāsavopi bhavāsave eva samodhānaṃ gacchati. **Avijjāsavoti** catūsū saccesu aññānaṃ. Tattha kāmaguṇe assādato manasikaroto anuppanno ca kāmāsavo uppajjati, uppanno ca pavaḍḍhati. Mahaggatadhamme assādato manasikaroto anuppanno ca bhavāsavo uppajjati, uppanno ca pavaḍḍhati. Tīsu bhūmīsū dhamme catuvipallāsapadaṭṭhānabhāvena manasikaroto anuppanno ca avijjāsavo uppajjati, uppanno ca pavaḍḍhatīti veditabbo. Vuttanayapaccanīkato sukkaṃpakko vitthāretabbo.

Kasmā pana tayo eva āsavā idha vuttāti. Vimokkhapaṭipakkhato. Appaṇihitavimokkhapaṭipakkho hi kāmāsavo,. Animittasuññatavimokkhapaṭipakkhā itare. Tasmā ime tayo āsave uppādentā tiṇṇaṃ vimokkhānaṃ abhāgino hontī, anuppādentā bhāginoṭi etamatthaṃ dassentena tayo eva vuttāti veditabbā. Diṭṭhāsavopi vā ettha vutto yevāti vaṇṇitametaṃ.

Tassa amanasikaraṇīyānaṃ dhammānaṃ manasikārāti manasikārahetu, yasmā te dhamme manasi karoti, tasmāti vuttaṃ hoti. Esa nayo dutiyapadepi. “Anuppannā ceva āsavā uppajjanti, uppannā ca āsavā pavaḍḍhanti”ti hetthā vuttaāsavānaṃyeva abhedato nigamanametaṃ.

18. Ettāvata yo ayaṃ puggalādhīṭṭhānāya desanāya dassanā pahātabbe āsave niddisituṃ assutavā puthujjano vutto, so yasmā “ayoniso, bhikkhave, manasikaroto anuppannā ceva āsavā uppajjanti”ti evaṃ sāmāññato vuttānaṃ ayoniso manasikārapaccayānaṃ kāmāsavādīnampi adhiṭṭhānaṃ, tasmā tepi āsave teneva puggalena dassetvā idāni dassanā pahātabbe āsave dassento **so evaṃ ayoniso manasi karoti, ahosiṃ nu kho ahanti**tiādimāha. Vicikicchāsīna cettha diṭṭhāsavampi dassetuṃ imaṃ desanaṃ ārabhi.

Tassattho, yassa te iminā vuttanayena āsavā uppajjanti, so puthujjano, yo cāyaṃ “assutavā”tiādinā nayena vutto, so puthujjano evaṃ ayoniso anupāyena uppathena manasi karoti. Kathaṃ? Ahosiṃ nu kho... pe...so kuhiṃ gāmi bhavissatīti. Kiṃ vuttaṃ hoti, so evaṃ ayoniso manasi karoti, yathāssa “ahaṃ ahosiṃ nu kho”tiādinā nayena vuttā soḷasavidhāpi vicikicchā uppajjati.

Tattha **ahosiṃ nu kho nanu khoti** sassatākāraṇa adhiccasamuppattiākāraṇa nissāya atīte attano vijjamānataṃ avijjamānataṃ kaṅkhati. Kiṃ kāraṇanti na vattabbaṃ. Ummattako viya hi bālaputhujjano yathā vā tathā vā pavattati. Apica ayoniso manasikāroyevettha kāraṇaṃ. Evaṃ ayoniso manasikārassa pana kiṃ kāraṇanti. Sveva puthujjanabhāvo ariyānaṃ adassanādīni vā. Nanu ca puthujjanopi yoniso manasi karotīti. Ko vā evamāha na manasi karotīti. Na pana tattha puthujjanabhāvo kāraṇaṃ, saddhammassavanakalyāṇamittādīni tattha kāraṇāni. Na hi macchamaṃsādīni attano attano pakatiyā sugandhāni, abhisāṅkhārapaccayā pana sugandhānipi hontī.

Kiṃ nu kho ahosinti jātiliṅgūpapattiyo nissāya khattiyo nu kho ahosiṃ, brāhmaṇavessasuddagahaṭṭhapabbajitadevamanussānaṃ aññataroti kaṅkhati.

Kathaṃ nu khoti saṅghānākāraṇa nissāya dīgho nu kho ahosiṃ, rassaodātakaṇhappamāṇikaappamāṇikādīnaṃ aññataroti kaṅkhati. Keci pana issaranimmānādīnaṃ nissāya kena nu kho kāraṇena ahosinti hetuto kaṅkhatīti vadanti.

Kiṃ hutvā kiṃ ahoṣinti jātiādāni nissāya khattiyo hutvā nu kho brāhmaṇo ahoṣiṃ...pe... devo hutvā manussoti attano paramparaṃ kaṅkhati. Sabbattheva pana **addhānanti** kālādhivacanamaṃ.

Bhaviṣṣāmi nu kho nanu khoti sassatākāraṇca ucchedākāraṇca nissāya anāgate attano vijjamaṇataṃ avijjamaṇataṃ kaṅkhati. Sesamettha vuttanayameva.

Etarahi vā paccuppannamaddhānanti idāni vā paṭisandhiṃ ādiṃ katvā cutipariyantaṃ sabbampi vattamaṇakālaṃ gahetvā. **Ajjhattaṃ kathaṃkathī hotīti** attano khandhesu vicikiccho hoti. **Ahaṃ nu khosmīti** attano atthibhāvaṃ kaṅkhati. Yuttaṃ panetanti? Yuttaṃ ayuttanti kā ettha cintā. Apicettha idaṃ vatthumpi udāharanti. Cūḷamātāya kira putto muṇḍo, mahāmātāya putto amuṇḍo, taṃ puttaṃ muṇḍesuṃ. So uṭṭhāya ahaṃ nu kho cūḷamātāya puttoti cintesi. Evaṃ ahaṃ nu khosmīti kaṅkhā hoti.

No nu khosmīti attano natthibhāvaṃ kaṅkhati. Tatrāpi idaṃ vatthu – eko kira macche gaṇhanto udake ciratṭhānena sītibhūtaṃ attano ūruṃ macchoti cintetvā pahari. Aparo susānapasse khettaṃ rakkhanto bhīto saṅkuṭito sayi. So paṭibujjhivā attano jaṇṇukāni dve yakkhāti cintetvā pahari. Evaṃ no nu khosmīti kaṅkhati.

Kiṃ nu khosmīti khattiyova samāno attano khattiyabhāvaṃ kaṅkhati. Esa nayo sesesu. Devo pana samāno devabhāvaṃ ajānanto nāma natthi. Sopi pana ‘‘ahaṃ rūpī nu kho arūpī nu kho’’tiādinaṃ nayena kaṅkhati. Khattiyādayo kasmā na jānantīti ce. Apaccakkhā tesam tatha tatha kule uppatti. Gahaṭṭhāpi ca potthalikādayo pabbajitasaññino. Pabbajitāpi ‘‘kuppaṃ nu kho me kamma’’ntiādinaṃ nayena gahaṭṭhasaññino. Manussāpi ca rājāno viya attani devasaññino honti.

Kathaṃ nu khosmīti vuttanayameva. Kevalañcettha abbhantare jīvo nāma atthīti gahetvā tassa saṅghānākāraṃ nissāya dīgho nu khosmi, rassacaturaṃsachalaṃsaatṭhaṃsasolaṃsāsādīnaṃ aññatarappakāroti kaṅkhanto kathaṃ nu khosmīti kaṅkhatīti veditabbo. Sarīrasaṅghānaṃ pana paccuppannaṃ ajānanto nāma natthi.

Kuto āgato, so kuhiṃ gāmi bhaviṣṣatīti attabhāvassa āgatigatiṭṭhānaṃ kaṅkhati.

19. Evaṃ soḷasappabhedam vicikicchaṃ dassetvā idāni yaṃ iminā vicikicchāsīsenā diṭṭhāsavaṃ dassetuṃ ayaṃ desanā āradhā. Taṃ dassento **tassa evaṃ ayoniso manasikaroto channaṃ diṭṭhīnanti**ādīmāha. Tattha tassa puggalassa yathā ayaṃ vicikicchā uppajjati, evaṃ ayoniso manasikaroto tasseva savicikicchassa ayoniso manasikārassa thāmagatattā channaṃ diṭṭhīnaṃ aññatarā diṭṭhi uppajjati vuttaṃ hoti. Tattha sabbapadesu vāsaddo vikappattho, evaṃ vā evaṃ vā diṭṭhi uppajjati vuttaṃ hoti. **Atthi me attāti** cettha sassatadiṭṭhi sabbakālesu attano atthitaṃ gaṇhāti. **Saccato thetatoti** bhūtato ca thirato ca, ‘‘idaṃ sacca’’nti bhūtato suṭṭhu dalhabhāvenāti vuttaṃ hoti. **Natthi me attāti** ayaṃ pana ucchedadiṭṭhi, sato sattassa tatha tatha vibhavaggahaṇato. Atha vā purimāpi tīsu kālesu atthīti gahaṇato sassatadiṭṭhi, paccuppanameva atthīti gaṇhanto ucchedadiṭṭhi. Pacchimāpi atītānāgatesu natthīti gahaṇato bhasmantāhutiyoti gahitadiṭṭhikānaṃ viya, ucchedadiṭṭhi. Atīte eva natthīti gaṇhanto adhiccasaṃuppattikasaveva sassatadiṭṭhi.

Attanāva attānaṃ sañjānamīti saññākkhandhasīsenā khandhe attāti gahetvā saññāya avasesakkhandhe sañjānato iminā attanā imaṃ attānaṃ sañjānamīti hoti. **Attanāva anattānanti** saññākkhandhamyeva attāti gahetvā, itare cattāropi anattāti gahetvā saññāya tesam jānato evaṃ hoti. **Anattanāva attānanti** saññākkhandham anattāti. Itare cattāro attāti gahetvā saññāya tesam jānato evaṃ hoti, sabbāpi sassatucchedadiṭṭhiyova.

Vado vedeyyotiādayo pana sassatadiṭṭhiyā eva abhinivesākārā. Tattha vadatīti **vado**, vacīkammaṃsā kārakoti vuttaṃ hoti. Vedayatīti **vedeyyo**, jānāti anubhavati cāti vuttaṃ hoti. Kiṃ vedetīti, tatra tatra kalyāṇapāpakānaṃ kammānaṃ vipākaṃ paṭisaṃvedeti. **Tatra tatrāti** tesu tesu yonigatiṭṭhitinivāsānikāyesu ārammaṇesu vā. **Niccoti** uppādavayarahito. **Dhuvoti** thiro sārabhūto. **Sassatoti** sabbakāliko. **Avipariṇāmadhammoti** attano pakatibhāvaṃ avijahanadhammo, kakaṇṭako viya nānappakārataṃ nāpajjati. **Sassatisamanti** candasūriyasamuddamahāpathavīpabbatā lokavohārena sassatiyoti vuccanti. Sassatīhi samaṃ **sassatisamaṃ**. Yāva sassatiyo tiṭṭhanti, tāva tatheva ṭhassatīti gaṇhato evaṃdiṭṭhi hoti.

Idaṃ vuccati, bhikkhave, diṭṭhigatantiādīsu. Idanti idāni vattabbassa paccakkhanidassanaṃ. Diṭṭhigatasambandhena ca idanti vuttaṃ, na diṭṭhisambandhena. Ettha ca diṭṭhiyeva **diṭṭhigataṃ**, gūthagataṃ viya. Diṭṭhīsu vā gatamidaṃ dassanaṃ dvāsaṭṭhidiṭṭhiantogadhattātipi diṭṭhigataṃ. Diṭṭhiyā vā gataṃ diṭṭhigataṃ. Idañhi atthi me attātiādi diṭṭhiyā gamanamattameva, natthettha attā vā nicco vā kocīti vuttaṃ hoti. Sā cāyaṃ diṭṭhi dunniggamaṇaṭṭhena **gahanaṃ**. Duratikkamaṭṭhena sappatibhayaṭṭhena ca **kantāro**, dubbhikkhakantāravāḷakantārādayo viya. Sammādiṭṭhiyā vinivijjhanaṭṭhena vilomanatṭhena vā **visūkaṃ**. Kadāci sassatassa, kadāci ucchedassa gahaṇato virūpaṃ phanditanti **vipphanditaṃ**. Bandhanaṭṭhena **saṃyojanaṃ**. Tenāha “diṭṭhigahanaṃ...pe... diṭṭhisamyojana”nti. Idānissa tameva bandhanatṭhaṃ dassento **diṭṭhisamyojanasamuyuttotiādīmāha**. Tassāyaṃ saṅkhepattho. Iminā diṭṭhisamyojanena samuyutto puthujjano etehi jātiādīhi na parimuccatīti. Kiṃ vā bahunā, sakalavaṭṭadukkhato na muccatīti.

20. Evaṃ chappabhedam diṭṭhāsavaṃ dassetvā yasmā sīlabbataparāmāso kāmāsavādivacaneneva dassito hoti. Kāmasukhatthañhi bhavasukhabhavavisuddhiatthañca avijjāya abhibhūtā ito bahiddhā samaṇabrāhmaṇā sīlabbatāni parāmasanti, tasmā taṃ adassetvā diṭṭhigahaṇena vā tassa gahitattāpi taṃ adassetvāva idāni yo puggalo dassanā pahātabbe āsave pajahati, taṃ dassetvā tesam āsavānaṃ pahānaṃ dassetuṃ pubbe vā ayoniso manasikaroto puthujjanassa tesam uppattiṃ dassetvā idāni tabbiparītassa pahānaṃ dassetuṃ **sutavā ca kho, bhikkhavietiādīmāha**.

Tassattho, yāva “so idaṃ dukkha”nti āgacchati, tāva heṭṭhā vuttanayena ca vuttapaccanīkato ca vedītabbo. Paccanīkato ca sabbākārena ariyadhammassa akovidāvinītapaccanīkato ayaṃ “sutavā ariyasāvako ariyadhammassa kovido ariyadhamme suvinīto”ti vedītabbo. Apica kho sikhāpattavipassanato pabhuti yāva gotrabhu, tāva tadanurūpena atthena ayaṃ ariyasāvako vedītabbo.

21. “So idaṃ dukkhanti yoniso manasi karotī”tiādīsu pana ayaṃ atthavibhāvanā, so catusaccakammaṭṭhāniko ariyasāvako taṇhāvajjā tebhūmakā khandhā **dukkhaṃ**, taṇhā **dukkhasamudayo**, ubhinnaṃ appavatti **nirodho**, nirodhasampāpako **maggoti** evaṃ pubbeva ācariyasantike uggahitacatusaccakammaṭṭhāno aparena samayena vipassanāmaggaṃ samāruḷho samāno te tebhūmake khandhe **idaṃ dukkhanti yoniso manasi karoti**, upāyena pathena samannāharati ceva vipassati ca. Ettha hi yāva sotāpattimaggo, tāva manasikārasīseneva vipassanā vuttā. Yā panāyaṃ tasseva dukkhassa samuṭṭhāpikā pabhāvīkā taṇhā, **ayaṃ samudayoti yoniso manasi karoti**. Yasmā pana dukkhañca samudayo ca idaṃ ṭhānaṃ patvā nirujjhanti nappavattanti, tasmā yadidaṃ **nibbānaṃ** nāma, **ayaṃ dukkhanirodhoti yoniso manasi karoti**. Nirodhasampāpakaṃ aṭṭhaṅgikaṃ maggaṃ **ayaṃ dukkhanirodhagāminī paṭipadāti yoniso manasi karoti**, upāyena pathena samannāharati ceva vipassati ca.

Tatrāyaṃ upāyo, abhiniveso nāma vaṭṭe hoti, vivaṭṭe natthi. Tasmā “ayaṃ atthi imasmiṃ kāye pathavīdhātu, āpodhātu”tiādīnā nayena sakasantatiyaṃ cattāri bhūtāni tadanusārena upādārūpani ca pariggahetvā ayaṃ rūpakkhandhoti vavatthapeti. Taṃ vavatthāpayato uppanne tadārammaṇe cittacetāsike dhamme ime cattāro arūpakkhandhāti vavatthapeti. Tato ime pañcakkhandhā dukkhanti vavatthapeti. Te pana saṅkhepato nāmañca rūpañcāti dve bhāgāyeva honti. Idañca nāmarūpaṃ sahetu sappaccayaṃ uppajjati. Tassa ayaṃ hetu ayaṃ paccayoti avijjābhavataṇhākammāhārādike hetupaccaye vavatthapeti. Tato tesam paccayānañca paccayuppannadhammānañca yāthāvasarasalakkhaṇaṃ vavatthapetvā ime dhammā ahutvā hontīti aniccalakkhaṇaṃ āropeti, udayabbayaṇīlittatā dukkhāti dukkhalakkhaṇaṃ āropeti. Avasavattanato anattāti anattalakkhaṇaṃ āropeti. Evaṃ tīṇi lakkhaṇāni āropetvā paṭipāṭiyā vipassanaṃ pavattento sotāpattimaggaṃ pāpuṇāti.

Tasmiṃ khaṇe cattāri saccāni ekapaṭivedheneva paṭivijjhanti, ekābhisamayena abhisameti. Dukkhaṃ pariññāpaṭivedhena paṭivijjhanti, samudayaṃ pahānapaṭivedhena, nirodhaṃ sacchikiriyāpaṭivedhena, maggaṃ bhāvanāpaṭivedhena. Dukkhañca pariññābhisamayena abhisameti...pe... maggaṃ bhāvanābhisamayena abhisameti, no ca kho aññamaññena ñāṇena. Ekaññāneva hi esa nirodhaṃ ārammaṇato, sesāni kiccato paṭivijjhanti ceva abhisameti ca. Na hissa tasmiṃ samaye evaṃ hoti – “ahaṃ dukkhaṃ parijānāmi”ti vā...pe... “maggam bhāvemī”ti vā. Apica khvassa ārammaṇaṃ katvā paṭivedhavasena nirodhaṃ sacchikaroto evaṃ taṃ ñāṇaṃ dukkhaṃ pariññākiccampi samudayaṃ pahānakiccampi maggabhāvanākiccampi karotiyeva. Tassevaṃ upāyena yoniso manasikaroto tīṇi samyojanāni pahīyanti, vīsativatthukā sakkāyadīṭṭhi, aṭṭhavatthukā vicikicchā, “sīlena suddhi vatena suddhi”ti sīlabbatānaṃ parāmasanato sīlabbataparāmāsoti. Tattha catūsu

āsavesu sakkāyadit̥ṭhisīlabbataparāmāsā dit̥ṭhāsavena saṅgahitattā āsavā ceva saṃyojanā ca. Vicikicchā saṃyojanameva, na āsavo. “Dassanā pahātabbā āsavā”ti ettha pariyāpannattā pana āsavāti.

“Ime vuccanti...pe... pahātabbā”ti ime sakkāyadit̥ṭhiādayo dassanā pahātabbā nāma āsavāti dassento āha. Atha vā yā ayaṃ channaṃ dit̥ṭhīnaṃ aññatarā dit̥ṭhi uppañjati evaṃ sarūpeneva sakkāyadit̥ṭhi vibhattā. Taṃ sandhāyāha “ime vuccanti, bhikkhave”ti. Sā ca yasmā saha jātapahānekaṭṭhehi saddhiṃ pahīyati. Dit̥ṭhāsave hi pahīyamāne taṃsahajāto catūsu dit̥ṭhisampayuttacittesu kāmāsavopi avijjāsavopi pahīyati. Pahānekaṭṭho pana catūsu dit̥ṭhivippayuttetu nāgasupaṇṇādīsamiddhipatthanāvasena uppañjamāno bhavāsavo. Teneva sampayutto avijjāsavopi, dvīsu domanassacittesu pāṇātipātādinibhattako avijjāsavopi, tathā vicikicchācittasampayutto avijjāsavopīti evaṃ sabbathāpi avasesā tayopi āsavā pahīyanti. Tasmā bahuvacananiddeso katoti evamettha attho vedītabbo. Esa porāṇānaṃ adhippāyo.

Dassanā pahātabbāti dassanaṃ nāma sotāpattimaggo, tena pahātabbāti attho. Kasmā sotāpattimaggo dassanaṃ? Paṭhamaṃ nibbānadassanaṃ. Nanu gotrabhu paṭhamataraṃ passatīti? No na passati. Disvā kattabbakiccaṃ pana na karoti saṃyojanānaṃ appahānato. Tasmā passatīti na vattabbo. Yattha katthaci rājānaṃ disvāpi paṇṇākāraṃ datvā kiccanipphattiyā adit̥ṭhattā “ajjāpi rājānaṃ na passāmī”ti vadanto gāmvāsī puriso cettha nidassanaṃ.

Dassanāpahātabbāāsavavaṇṇanā niṭṭhitā.

Saṃvarāpahātabbāāsavavaṇṇanā

22. Evaṃ dassanena pahātabbe āsave dassetvā idāni tadanantaruddit̥ṭhe saṃvarā pahātabbe dassetuṃ, **katame ca, bhikkhave, āsavā saṃvarā pahātabbāti** āha. Evaṃ sabbattha sambandho vedītabbo. Ito parañhi atthamattameva vaṇṇayissāma.

Nanu ca dassanena bhāvanāyāti imehi dvīhi appahātabbo āsavo nāma natthi, atha kasmā viṣuṃ saṃvarādīhi pahātabbe dassetīti. Saṃvarādīhi pubbhāge vikkhambhitā āsavā catūhi maggehi samugghātaṃ gacchanti, tasmā tesam maggānaṃ pubbhāge imehi pañcahākārehi vikkhambhanappahānaṃ dassento evamāha. Tasmā yo cāyaṃ vutto paṭhamo dassanaṃaggoyeva, idāni bhāvanānāmena vuccissanti tayo maggā, tesam sabbesampi ayaṃ pubbhāgapaṭipadāti vedītabbā.

Tattha **idhāti** imasmim sāsane. **Paṭisaṅkhāti** paṭisaṅkhāya. Tatthāyaṃ saṅkhāsaddo ñāṇakoṭṭhāsapaññattigaṇaṇāsu dissati. “Saṅkhāyekaṃ paṭisevati”tiādīsu (ma. ni. 2.168) hi ñāṇe dissati. “Papañcasaññāsāṅkhā samudācarantī”tiādīsu (ma. ni. 1.201) koṭṭhāse. “Tesaṃ tesaṃ dhammānaṃ saṅkhā samaññā”tiādīsu (dha. sa. 1313) paññattiyam. “Na sukaraṃ saṅkhātu”tiādīsu (saṃ. ni. 2.128) gaṇanāyam. Idha pana ñāṇe datṭhabbo.

Paṭisaṅkhā yonisoti hi upāyena pathena paṭisaṅkhāya ñatvā paccavekkhitvāti attho. Ettha ca asaṃvare ādīnavapaṭisaṅkhā yoniso paṭisaṅkhāti vedītabbā. Sā cāyaṃ “varam, bhikkhave, tattāya ayosalākāya ādittāya sampajjalitāya sajotibhūtāya cakkhundriyaṃ sampalimaṭṭhaṃ, na tveva cakkhuvīññeyyesu rūpesu anubyañjanaso nimittaggāho”tiādīnā (saṃ. ni. 4.235) ādittapariyāyanayena vedītabbā.

Cakkhundriyasamvarasamvuto viharatīti ettha cakkhumeva indriyaṃ cakkhundriyaṃ, saṃvaraṇato saṃvaro, pidahanato thakanatoti vuttaṃ hoti. Satiyā etaṃ adhivacanaṃ. Cakkhundriye saṃvaro cakkhundriyasamvaro. Titthakāko āvāṭakacchapo vanamahimsotiādayo viya.

Tattha kiñcāpi cakkhundriye saṃvaro vā asaṃvaro vā natthi. Na hi cakkhupasādaṃ nissāya sati vā muṭṭhasaccaṃ vā uppañjati. Apica yadā rūpārammaṇaṃ cakkhussa āpāthaṃ āgacchati, tadā bhavaṅge dvikkhattuṃ uppañjivā niruddhe kiriyamanodhātu āvajjanakiccaṃ sādhamānā uppañjivā nirujjhati, tato cakkhuvīññānaṃ dassanakiccaṃ, tato vipākamanodhātu sampaṭicchana-kiccaṃ, tato vipākāhetukamanovīññādhātu santīraṇakiccaṃ, tato kiriyāhetukamanovīññādhātu voṭṭhabbanakiccaṃ sādhamānā uppañjivā nirujjhati. Tadanantaraṃ javanaṃ javati.

Tatthapi neva bhavaṅgasamaye, na āvajjanādīnaṃ aññatarasamaye saṃvaro vā asaṃvaro vā atthi.

Javanakkhaṇe pana sace dussīlyaṃ vā muṭṭhasaccaṃ vā aññāṇaṃ vā akkhanti vā kosajjaṃ vā uppajjati, ayaṃ asaṃvaro hoti. Evaṃ hontopi so cakkhundriye asaṃvaroti vuccati. Kasmā? Tasmīñhi sati dvārampi aguttaṃ hoti, bhavaṅgampi āvajjanādīni vīthiccittānīpi. Yathā kiṃ, yathā nagare catūsu dvāresu asaṃvutesu kiñcāpi anto gharakoṭṭhakagabbhādayo susaṃvutā, tathāpi antonagare sabbaṃ bhaṇḍaṃ arakkhitaṃ agopitameva hoti. Nagaradvārena hi pavisitvā corā yadicchanti, taṃ kareyyuṃ, evameva javane dussīyādīsu uppannesu, tasmīṃ asaṃvare sati dvārampi aguttaṃ hoti, bhavaṅgampi āvajjanādīni vīthiccittānīpi.

Tasmīṃ pana sīlādīsu uppannesu dvārampi guttaṃ hoti, bhavaṅgampi āvajjanādīni vīthiccittānīpi. Yathā kiṃ? Yathā nagaradvāresu susaṃvutesu kiñcāpi anto gharādayo asaṃvutā, tathāpi antonagare sabbaṃ bhaṇḍaṃ surakkhitaṃ sugopitameva hoti. Nagaradvāresu hi pihitesu corānaṃ paveso natthi, evameva javane sīlādīsu uppannesu dvārampi suguttaṃ hoti, bhavaṅgampi āvajjanādīni vīthiccittānīpi. Tasmā javanakkhaṇe uppajjamānopi cakkhundriye saṃvaroti vutto. Idha cāyaṃ satisaṃvaro adhippetoti veditabbo. Cakkhundriyasamvarena saṃvuto **cakkhundriyasamvarasamvuto**, upetoti vuttaṃ hoti. Tathā hi, pātimokkhasamvarasamvutoti imassa vibhaṅge “iminā pātimokkhasamvarena upeto hoti...pe... samannāgato”ti (vibha. 511) vuttaṃ. Taṃ ekajjhaṃ katvā cakkhundriyasamvarena saṃvutoti evamattho veditabbo.

Atha vā saṃvarīti saṃvuto, thakesi pidahīti vuttaṃ hoti. Cakkhundriye saṃvarasamvuto cakkhundriyasamvarasamvuto, cakkhundriyasamvarasāññitaṃ satikavātaṃ cakkhudvāre, gharadvāre kavāṭaṃ viya saṃvari thakesi pidahīti vuttaṃ hoti. Ayameva cettha attho sundarataro. Tathā hi “cakkhundriyasamvaram saṃvutassa viharato saṃvutassa viharato”ti etesu padesu ayameva attho dissati.

Viharatīti evaṃ cakkhundriyasamvarasamvuto yena kenaci iriyāpathavīhārena viharati. **Yañhissāti**ādīmihi yaṃ cakkhundriyasamvaram assa bhikkhuno asaṃvutassa athaketvā apidahitvā viharantassāti evamattho veditabbo. Atha vā, ye-kārassa **yanti** ādeso. **Hikāro** ca padapūraṇo, ye assāti attho.

Uppajjeyyunti nibbatteyyuṃ. **Āsavā vighātapariḷāhāti** cattāro āsavā ca aññe ca vighātakarā kilesapariḷāhā vipākapariḷāhā ca. Cakkhudvāre hi iṭṭhārammaṇaṃ āpāthagataṃ kāmāsādavasena assādayato abhinandato kāmāsavo uppajjati, īdisaṃ aññasmīpi sugatibhave labhissāmīti bhavapatthanāya assādayato bhavāsavo uppajjati, sattoti vā sattassāti vā gaṇhantassa diṭṭhāsavo uppajjati, sabbeheva sahaḷātaṃ aññāṇaṃ avijjāsavoti cattāro āsavā uppajjanti. Tehi sampayuttā apare kilesā vighātapariḷāhā, āyatīṃ vā tesam vipākā. Tepi hi asaṃvutasseva viharato uppajjeyyunti vuccanti.

Evaṃsa teti evaṃ assa te. Evaṃ etena upāyena na hontī, no aññathāti vuttaṃ hoti. Esa nayo **paṭisaṅkhā yoniso sotindriyasamvarasamvutoti**ādīsu.

Ime vuccanti, bhikkhave, āsavā saṃvarā pahātabbāti ime chasu dvāresu cattāro cattāro katvā catuvīsati āsavā saṃvarena pahātabbāti vuccanti. Sabbattheva cettha satisaṃvaro eva saṃvaroti veditabbo.

Saṃvarāpahātabbāāsavavaṇṇanā niṭṭhitā.

Paṭisevanāpahātabbāāsavavaṇṇanā

23. Paṭisaṅkhā yoniso cīvarantiādīsu yaṃ vattabbaṃ, taṃ sabbaṃ visuddhimagge sīlakathāyaṃ vuttameva. **Yañhissāti** yaṃ cīvarapiṇḍapātādīsu vā aññataraṃ assa. **Appaṭisevatoti** evaṃ yoniso appaṭisevantassa. Sesam vuttanayameva. Kevalam panidha aladdham cīvarādīṃ patthayato laddham vā assādayato kāmāsavassa uppatti veditabbā. Īdisaṃ aññasmīpi sampattibhave sugatibhave labhissāmīti bhavapatthanāya assādayato bhavāsavassa, aham labhāmi na labhāmīti vā mayham vā idanti attasāññaṃ adhiṭṭhahato diṭṭhāsavassa uppatti veditabbā. Sabbeheva pana sahaḷāto avijjāsavoti evaṃ catunnaṃ āsavānaṃ uppatti vipākapariḷāhā ca navavedanuppādanatopi veditabbā.

Ime vuccanti, bhikkhave, āsavā paṭisevanā pahātabbāti ime ekamekasmīṃ paccaye cattāro cattāro katvā soḷasa āsavā iminā nīṇasamvarasāññhātena paccavekkhaṇapaṭisevanena pahātabbāti vuccanti.

Paṭisevanāpahātabbaāsavavaṇṇanā niṭṭhitā.

Adhivāsanāpahātabbaāsavavaṇṇanā

24. Paṭisaṅkhā yoniso khamo hoti sītassāti upāyena pathena paccavekkhitvā khamo hoti sītassa sītaṃ khamati sahati, na avīrapuriso viya appamattakenapī sītena calatī kampatī kammaṭṭhānaṃ vijahatī. Apica kho lomasaṅgatthero viya anappakenapī sītena phuṭṭho na calatī na kampatī, kammaṭṭhānameva manasi karotī. Thero kira cetiyapabbate piyaṅguguhāyaṃ padhānaghare viharanto antaraṭṭhake himapātasamaye lokantarikaniraye paccavekkhitvā kammaṭṭhānaṃ avijahantova abbhokāse vītināmesi. Evaṃ **uṇhādīsupi** atthayojanā veditabbā.

Kevalaṅhi yo bhikkhu adhimattampi uṇhaṃ sahati sveva thero viya, ayaṃ “khamo uṇhassā”ti veditabbo. Thero kira gimhasamaye pacchābhataṃ bahicaṅkame nisīdi. Kammaṭṭhānaṃ manasikaronto sedāpissa kacchehi muccanti. Atha naṃ antevāsiko āha “idha, bhante, nisīdatha, sītalo okāso”ti. Thero “uṇhabhayenevami āvuso idha nisinno”ti avīcimahānirayaṃ paccavekkhitvā nisīdiyeva. **Uṇhanti** cettha aggisantāpova veditabbo. Sūriyasantāpavasena panetaṃ vatthu vuttaṃ.

Yo ca dve tayo vāre bhataṃ vā pānīyaṃ vā alabhamānopī anamatagge saṃsāre attano pettivisayūpapattiṃ paccavekkhitvā avedhento kammaṭṭhānaṃ na vijahatiyeva. Adhimattehi ḍaṃsamakasavātātapasamphassehi phuṭṭho cāpi tiracchānūpapattiṃ paccavekkhitvā avedhento kammaṭṭhānaṃ na vijahatiyeva. Sarīsapasamphassena phuṭṭho cāpi anamatagge saṃsāre sīhabyagghādīmukhesu anekavāraṃ parivattitapubbabhāvaṃ paccavekkhitvā avedhento kammaṭṭhānaṃ na vijahatiyeva padhāniyatthero viya. Ayaṃ “khamo jighacchāya...pe... sarīsapasamphassāna”nti veditabbo.

Theraṃ kira khaṇḍacelavihāre kaṇikārapadhāniyaghare ariyavaṃsaṃ suṇantaṃ ghoraviso sappo ḍaṃsi. Thero jānitvāpi pasannacitto nisinno dhammaṃyeva suṇāti. Visavego thaddho ahoṣi. Thero upasampadamaṇḍalaṃ ādiṃ katvā sīlaṃ paccavekkhitvā parisuddhasīlohamasmīti pītiṃ uppādesi. Saha pītuppādā viṣaṃ nivattitvā pathaviṃ pāvīsi. Thero tattheva cittekaggataṃ labhitvā vipassanaṃ vaḍḍhetvā arahattaṃ pāpuṇi.

Yo pana akkosavasena durutte duruttattāyeva ca durāgate apī antimavatthusaññite vacanapathe sutvā khandigūṇaṃyeva paccavekkhitvā na vedhati dīghabhāṇakaabhayatthero viya. Ayaṃ “khamo duruttānaṃ durāgatānaṃ vacanapathāna”nti veditabbo.

Thero kira paccayasantosabhāvanārāmatāya mahāariyavaṃsappaṭipadaṃ kathesi, sabbo mahāgāmo āgacchati. Therassa mahāsakkāro uppajjati. Taṃ aññataro mahāthero adhivāsetuṃ asakkonto dīghabhāṇako ariyavaṃsaṃ kathemīti sabbarattiṃ kolāhalaṃ karosītīādīhi akkosi. Ubhopi ca attano attano vihāraṃ gacchantā gāvutamattaṃ ekapathena agamaṃsu. Sakalagāvutampi so taṃ akkosiyeva. Tato yattha dvinnaṃ vihāraṃ maggo bhijjati, tattha ṭhatvā dīghabhāṇakatthero taṃ vanditvā “esa, bhante, tumhākaṃ maggo”ti āha. So asuṇanto viya agamāsi. Theropi vihāraṃ gantvā pāde pakkhāletvā nisīdi. Tameṃ antevāsiko “kiṃ, bhante, sakalagāvutaṃ paribhāsantaṃ na kiñci avocutthā”ti āha. Thero “khandiyeva, āvuso, mayhaṃ bhāro, na akkhanti. Ekapaduddhārepi kammaṭṭhānaviyogaṃ na passāmī”ti āha. Ettha ca vacanameva **vacanapathoti** veditabbo.

Yo pana uppannā sārīrikā vedanā dukkhamanaṭṭhena **dukkhā**, bahalaṭṭhena **tibbā**, pharusatṭhena **kharā**, tikhiṇaṭṭhena **kaṭukā**, assādavirahato **asātā**, manāṃ avaḍḍhanato **amanāpā**, pāṇaharaṇasamatthatāya **pāṇaharā** adhivāsetiyeva, na vedhati. Evaṃ sabhāvo hoti cittalapabbate padhāniyatthero viya. Ayaṃ “uppannānaṃ...pe... adhivāsanajātiko”ti veditabbo.

Therassa kira rattiṃ padhānena vītināmetvā ṭhitassa udaravāto uppajji. So taṃ adhivāsetuṃ asakkonto āvattati parivattati. Tameṃ caṅkamaṃpasse ṭhito piṇḍapātiyatthero āha “āvuso, pabbajito nāma adhivāsanasīlo hotī”ti. So “sādhu, bhante”ti adhivāsetvā niccalo sayī. Vāto nābhito yāva hadayaṃ phāleti. Thero vedanaṃ vikkhambhetvā vipassanto muhuttana anāgāmī hutvā parinibbāyīti.

Yañhissāti sītādīsu yaṃkiñci ekadhammampi assa. **Anadhivāsayatoti** anadhivāsentassa akkhamantassa. Sesam vuttanayameva. Āsavuppatti panettha evam veditabbā. Sītena phuṭṭhassa uṇham patthayantassa kāmāsavo uppajjati, evam sabbattha. Natthi no sampattibhave sugatibhave sītam vā uṇham vāti bhavam patthayantassa bhavāsavo. Mayham sītam uṇhanti gāho diṭṭhāsavo. Sabbeheva sampayutto avijjāsavoti.

“**Ime vuccanti...pe... adhvāsanā pahātabbā**”ti ime sītādīsu ekamekassa vasena cattāro cattāro katvā aneke āsavā imāya khantisamvarasañkhātāya adhvāsanāya pahātabbāti vuccantīti attho. Ettha ca yasmā ayam khanti sītādīdhamme adhvāseti, attano upari āropetvā vāsetiyeva. Na asahamānā hutvā nirassati, tasmā “adhvāsanā”ti vuccatīti veditabbā.

Adhvāsanāpahātabbāāsavavaṇṇanā niṭṭhitā.

Parivajjanāpahātabbāāsavavaṇṇanā

25. Paṭisañkhā yoniso caṇḍam hatthim parivajjetīti aham samaṇoti caṇḍassa hatthissa āsanne na ṭhātabbam. Tatonidānāhi maraṇampi siyā maraṇamattampi dukkhanti evam upāyena pathena paccayena paccavekkhitvā caṇḍam hatthim parivajjeti paṭikkamati. Esa nayo sabbattha. **Caṇḍanti** ca duṭṭham, vāḷanti vuttaṃ hoti. **Khāṇunti** khadirakhāṇuādīm. **Kaṇṭakaṭṭhānanti** kaṇṭakānaṃ ṭhānaṃ, yattha kaṇṭakā vijjanti, taṃ okāsanti vuttaṃ hoti. **Sobbhanti** sabbato paricchinnataṃ. **Papātanti** ekato chinnataṃ. **Candanikanti** ucchiṭṭhodakagabbhamalādīnaṃ chaḍḍanaṭṭhānaṃ. **Oḷigallanti** tesamyeva sakaddamādīnaṃ sandanokāsam. Taṃ jaṇṇumattampi asucibharitaṃ hoti, dvepi cetāni ṭhānāni amanussaduṭṭhāni honti. Tasmā tāni vajjetabbāni. **Anāsaneti** ettha pana ayuttaṃ āsanaṃ **anāsanam**, taṃ atthato aniyatavattukam rahopaticchannāsananti veditabbam. **Agocareti** etthapi ca ayutto gocaro **agocaro**, so vesiyādibhedato pañcavidho. **Pāpake mitteti** lāmake dussīle mittapatirūpake, amitte vā. **Bhājantanti** sevamānaṃ. **Viññū sabrahmacārīti** paṇḍitā buddhisampannā sabrahmacārayo, bhikkhūnametaṃ adhvācanaṃ. Te hi ekakammaṃ ekuddeso samasikkhatāti imaṃ brahmaṃ samānaṃ caranti, tasmā **sabrahmacārīti** vuccanti. **Pāpakesu ṭhānesūti** lāmakesu ṭhānesu. **Okappeyyunti** saddaheyyuṃ, adhimuceyyuṃ “addhā ayamāyasmā akāsi vā karissati vā”ti.

Yañhissāti hatthiādīsu yaṃkiñci ekampi assa. Sesam vuttanayameva. Āsavuppatti panettha evam veditabbā. Hatthiādīnīdānena dukkhena phuṭṭhassa sukham patthayato kāmāsavo uppajjati. Natthi no sampattibhave sugatibhave īdisam dukkhanti bhavam patthentassa bhavāsavo. Maṃ hatthī maddati, maṃ assoti gāho diṭṭhāsavo. Sabbeheva sampayutto avijjāsavoti.

Ime vuccanti...pe... parivajjanā pahātabbāti ime hatthiādīsu ekekassa vasena cattāro cattāro katvā aneke āsavā iminā sīlasamvarasañkhātēna parivajjanena pahātabbāti vuccantīti veditabbā.

Parivajjanāpahātabbāāsavavaṇṇanā niṭṭhitā.

Vinodanāpahātabbāāsavavaṇṇanā

26. Paṭisañkhā yoniso uppannam kāmavitakkaṃ nādhivāsetīti “iti pāyaṃ vitakko akusalo, itipi sāvajjo, itipi dukkhavipāko, so ca kho attabyābādāhāya samvattatī”tiādīnā nayena yoniso kāmavitakke ādīnavaṃ paccavekkhitvā tasmiṃ tasmiṃ ārammaṇe uppannam jātamabhinibbattaṃ kāmavitakkaṃ nādhivāseti, cittaṃ āropetvā na vāseti, abbhantare vā na vāsetītipi attho.

Anadhivāseno kiṃ karotīti? **Pajahati** chaḍḍeti.

Kiṃ kacavaraṃ viya piṭakenāti? Na hi, apica kho naṃ **vinodeti** tudati vijjhati nīharati.

Kiṃ balibaddam viya patodenāti? Na hi, atha kho naṃ **byantikaroti** vigatantaṃ karoti. Yathāssa antopi nāvasissati antamaso bhāṅgamattampi, tathā naṃ karoti.

Katham pana naṃ tathā karotīti? **Anabhāvaṃ gametīti** anu anu abhāvaṃ gameti, vikkhambhanappahānena yathā suvikkhambhito hoti, tathā karotīti vuttaṃ hoti. Esa nayo

byāpādavihimsāvītakkesu.

Ettha ca **kāmavitakkoti** “yo kāmapaṭisaṃyutto takko vitakko micchāsankappo”ti vibhaṅge (vibha. 910) vutto. Esa nayo itaresu. **Uppannuppanneti** uppanne uppanne, uppannamatteyevāti vuttaṃ hoti. Sakim vā uppanne vinodetvā dutiyavāre ajjupekkhitā na hoti, satakkhattumpi uppanne uppanne vinodetiyeva. **Pāpake akusaleti** lāmakatṭhena pāpake, akosallatāya akusale. **Dhammeti** teyeva kāmavitakkādayo sabbepi vā nava mahāvītakke. Tattha tayo vuttā eva. Avasesā “ñātivitakko janapadavitakko amaravitakko parānuddayatāpaṭisaṃyutto vitakko lābhasakkārasilokapaṭisaṃyutto vitakko anavaññattipaṭisaṃyutto vitakko”ti (mahāni. 207) ime cha.

Yañhissāti etesu vitakkesu yaṃkiñci assa, sesaṃ vuttanayameva. Kāmavitakko panettha kāmāsavo eva. Tabbiseso bhavāsavo. Taṃsampayutto diṭṭhāsavo. Sabbavitakkesu avijjāsavoti evaṃ āsavuppattipi veditabbā.

Ime vuccanti...pe... vinodanā pahātabbāti ime kāmavitakkādivasena vuttappakārā āsavā iminā tasmim tasmim vitakke ādīnavapaccavekkhaṇasahitena vīriyasamvarasaṅkhātena vinodanena pahātabbāti vuccantīti veditabbā.

Vinodanāpahātabbaāsavavaṇṇanā niṭṭhitā.

Bhāvanāpahātabbaāsavavaṇṇanā

27. Paṭisaṅkhā yoniso satisambojjhaṅgaṃ bhāvetīti abhāvanāya ādīnavam, bhāvanāya ca ānisaṃsaṃ upāyena pathena paccavekkhitvā satisambojjhaṅgaṃ bhāveti, esa nayo sabbattha. Ettha ca kiñcāpi ime uparimaggattayasamayasaṃbhūtā lokuttarabojjhaṅgā eva adhippetā, tathāpi ādikammikānaṃ bojjhaṅgesu asammohatthaṃ lokiya lokuttaramissakena nesaṃ nayena atthavaṇṇanaṃ karissāmi. Idha pana lokiyanayaṃ pahāya lokuttaranayo eva gahetabbo. Tattha satisambojjhaṅgantīdinā nayena vuttānaṃ sattanaṃ ādīpadānaṃyeva tāva –

Atthato lakkhaṇādīhi, kamato ca vinicchayo;
Anūnādhikato ceva, viññātabbo vibhāvinā.

Tattha satisambojjhaṅge tāva saraṇatṭhena **sati**. Sā panesā upaṭṭhānalakkhaṇā, apilāpanalakkhaṇā vā. Vuttampi hetam “yathā, mahārāja, rañño bhaṇḍagāriko rañño sāpateyyaṃ apilāpeti, ettakaṃ, mahārāja, hiraññaṃ, ettakaṃ suvaṇṇaṃ, ettakaṃ sāpateyyanti, evameva kho, mahārāja, sati uppajjamānā kusalākusalasāvajjānavajjāhīnapaṇītakāṇhasukkasappaṭibhāge dhamme apilāpeti. Ime cattāro satipaṭṭhānā”ti (mi. pa. 2.1.13) vitthāro. Apilāpanarasā. Kiccavaseneva hissa etaṃ lakkhaṇaṃ therena vuttaṃ. Asammosarasā vā. Gocarābhīmukhabhāvapaccupaṭṭhānā. Sati eva sambojjhaṅgo **satisambojjhaṅgo**. Tattha bodhiyā bodhissa vā āngoti bojjhaṅgo.

Kim vuttaṃ hoti? Yā hi ayaṃ dhammasāmaggī, yāya lokiya lokuttaramaggakkhaṇe uppajjamānāya līnuddhacapatīṭṭhānāyūhana-kāmasukhattakilamathānuyoga-ucchedasassatābhīnivesādīnaṃ anekesaṃ upaddavānaṃ paṭipakkhabhūtāya satidhammavicayavīriyapītipassaddhisamādhīupekkhāsāṅkhātāya dhammasāmaggiyā ariyasāvako bujjhatīti katvā “bodhī”ti vuccati. **Bujjhatīti** kilesasantānaniddāya utṭhahati, cattāri vā ariyasaccāni paṭivijjhati, nibbānameva vā sacchikarotīti vuttaṃ hoti. Yathāha “satta bojjhaṅge bhāvetvā anuttaraṃ sammāsambodhiṃ abhisambuddho”ti. Tassā dhammasāmaggisāṅkhātāya bodhiyā āngotipi bojjhaṅgo, jhānaṅgamaggaṅgādayo viya.

Yopesa yathāvuttappakārāya etāya dhammasāmaggiyā bujjhatīti katvā ariyasāvako “bodhī”ti vuccati, tassa bodhissa āngotipi bojjhaṅgo, senaṅgarathāṅgādayo viya. Tenāhu aṭṭhakathācariyā “bujjhanakassa puggalassa āngāti vā bojjhaṅgā”ti. Apica “bojjhaṅgāti kenatṭhena bojjhaṅgā? Bodhāya saṃvattantīti bojjhaṅgā, bujjhantīti bojjhaṅgā, anubujjhantīti bojjhaṅgā, paṭibujjhantīti bojjhaṅgā, sambujjhantīti bojjhaṅgā”tiadinā (paṭi. ma. 3.17) paṭisambhidānāyenaṃpi attho veditabbo. Pasattho sundaro vā bojjhaṅgoti sambojjhaṅgo. Evaṃ sati eva sambojjhaṅgo satisambojjhaṅgo. Taṃ **satisambojjhaṅgaṃ**. Evaṃ tāva ekassa ādīpadassa atthato lakkhaṇādīhi ca vinicchayo viññātabbo.

Dutiyādīsu pana catusaccadhamme vicinātīti **dhammavicayo**. So pana vicayalakkhaṇo, obhāsanaraso, asammohapaccupaṭṭhāno. Vīrabhāvato vidhinā īrayitabbato ca **vīriyaṃ**. Taṃ paggalalakkhaṇaṃ, upatthambhanarasam, anosīdanapaccupaṭṭhānaṃ. Pīṇayatīti **pīti**. Sā pharaṇalakkhaṇā, tuṭṭhilakkhaṇā vā, kāyacittānaṃ pīṇanarasā, tesamyeva odagypaccupaṭṭhānā. Kāyacittadarathapassambhanato **passaddhi**. Sā upasamalakkhaṇā, kāyacittadarathanimmaddanarasā, āyacittānaṃ aparipphandanabhūtasītibhāvapaccupaṭṭhānā. Samādhānato **samādhī**. So avikkhepalakkhaṇo, avisāralakkhaṇo vā, cittacetāsikānaṃ sampiṇḍanaraso, cittaṭṭhitipaccupaṭṭhāno. Ajjupekkhanato **upekkhā**. Sā paṭisaṅkhānalakkhaṇā, samavāhitalakkhaṇā vā, ūnādhikatānivāraṇarasā, pakkhapātupacchedarasā vā, majjhatabhāvapaccupaṭṭhānā. Sesam vuttanayameva. Evaṃ sesapadānampi atthato lakkhaṇādīhi ca vinicchayo viññātabbo.

Kamatoti ettha ca “satiṅca khvāhaṃ, bhikkhave, sabbatthikaṃ vadāmī”ti (saṃ. ni. 5.234) vacanato sabbesaṃ sesabojjhaṅgānaṃ upakārakattā satisambojjhaṅgova paṭhamaṃ vutto. Tato paraṃ “so tathā sato viharanto taṃ dhammaṃ paññāya pavicinatī”tiādīnā (vibha. 469) nayena sesabojjhaṅgānaṃ pubbāpariyavacane payojanaṃ sutteyeva vuttaṃ. Evamettha kamatopi vinicchayo viññātabbo.

Anūnādhikatoti kasmā pana bhagavatā satteva bojjhaṅgā vuttā anūnā anadhikāti. Līnuddhaccaṭṭipakkhato sabbatthikato ca. Ettha hi tayo bojjhaṅgā līnassa paṭipakkhā. Yathāha – “yasmiṅca kho, bhikkhave, samaye līnaṃ cittaṃ hoti, kālo tasmim samaye dhammavicayasambojjhaṅgassa bhāvanāya, kālo vīriyasambojjhaṅgassa bhāvanāya, kālo pītisambojjhaṅgassa bhāvanāya”ti (saṃ. ni. 5.234). Tayo uddhaccassa paṭipakkhā. Yathāha – “yasmiṅca kho, bhikkhave, samaye uddhataṃ cittaṃ hoti, kālo tasmim samaye passaddhisambojjhaṅgassa bhāvanāya, kālo samādhisambojjhaṅgassa bhāvanāya, kālo upekkhāsambojjhaṅgassa bhāvanāya”ti (saṃ. ni. 5.234). Eko panettha sabbatthiko. Yathāha – “satiṅca khvāhaṃ, bhikkhave, sabbatthikaṃ vadāmī”ti. “Sabbatthaka”ntipi pāṭho, dvinnampi sabbattha icchitabbanti attho. Evaṃ līnuddhaccaṭṭipakkhato sabbatthikato ca satteva bojjhaṅgā vuttā anūnā anadhikāti, evamettha anūnādhikatopi vinicchayo viññātabbo.

Evaṃ tāva “satisambojjhaṅga”ntiādīnā nayena vuttānaṃ sattannaṃ ādīpadānaṃyeva atthavaṇṇanaṃ ṇātvā idāni **bhāveti vivekanissitanti**ādīsu evaṃ ṇātabbā. **Bhāvetīti** vadḍheti, attano cittasantāne punappunaṃ janeti abhinibbattetīti attho. **Vivekanissitanti** viveke nissitaṃ. **Vivekoti** vivittatā. Svāyaṃ tadaṅgaviveko vikkhambhanasamucchedapaṭippassaddhi nissaraṇavivekoti pañcavidho. Tassa nānattaṃ “ariyadhamme avinīto”ti ettha vuttanayeneva veditabbaṃ. Ayameva hi tattha vinayoti vutto. Evaṃ etasmim pañcavidhe viveke.

Vivekanissitanti tadaṅgavivekanissitaṃ samucchedavivekanissitaṃ nissaraṇavivekanissitaṅca satisambojjhaṅgaṃ bhāvetīti ayamatto veditabbo. Tathā hi ayaṃ bojjhaṅgabhāvanānuyutto yogī vipassanākkhaṇe kiccato tadaṅgavivekanissitaṃ, ajjhāsayato nissaraṇavivekanissitaṃ, maggakkāle pana kiccato samucchedavivekanissitaṃ, ārammaṇato nissaraṇavivekanissitaṃ satisambojjhaṅgaṃ bhāveti. Pañcavidhavivekanissitanti eke, te hi na kevalaṃ balavavipassanāmaggaphalakkhaṇesu eva bojjhaṅge uddharanti, vipassanāpādakakasiṇajjhānānāpānāsūbhābrahmavīhārajjhānesupi uddharanti. Na ca paṭisiddhā aṭṭhakathācariyehi. Tasmā tesam matena etesaṃ jhānānaṃ pavattikkhaṇe kiccato eva vikkhambhanavivekanissitaṃ. Yathā ca “vipassanākkhaṇe ajjhāsayato nissaraṇavivekanissita”nti vuttaṃ, evaṃ paṭippassaddhivivekanissitampi bhāvetīti vattum vaṭṭati. Esa nayo **virāganissitā**dīsu. Vivekaṭṭhā eva hi virāgādayo.

Kevalāñhettha **vossaggo** duvidho pariccāgavossaggo ca pakkhandanavossaggo cāti. Tattha **pariccāgavossaggoti** vipassanākkhaṇe ca tadaṅgavasena, maggakkhaṇe ca samucchedavasena kilesappahānaṃ. **Pakkhandanavossaggoti** vipassanākkhaṇe tanninnabhāvena, maggakkhaṇe pana ārammaṇakaraṇena nibbānapakkhandanaṃ. Tadubhayampi imasmim lokiyalokuttaramissake atthavaṇṇanāyeva vaṭṭati. Tathā hi ayaṃ satisambojjhaṅgo yathāvuttena pakārena kilese pariccajati, nibbānaṅca pakkhandati. **Vossaggapariṇāmi**nti iminā pana sakalena vacanena vossaggattaṃ pariṇamantaṃ pariṇataṅca paripaccantaṃ paripakkañcāti. Idaṃ vuttaṃ hoti “ayañhi bojjhaṅgabhāvanānuyutto bhikkhu yathā satisambojjhaṅgo kilesapariccāgavossaggattaṃ nibbānapakkhandanavossaggattaṅca paripaccati, yathā ca paripakko hoti, tathā naṃ bhāvetī”ti. Esa nayo sesabojjhaṅgesu.

Idha pana nibbānaṃyeva sabbasaṅkhatehi vivittattā **viveko**, sabbesaṃ virāgabhāvato **virāgo**, nirodhabhāvato **nirodhoti** vuttaṃ. Maggo eva ca vossaggapariṇāṃī, tasmā satisambojjhaṅgaṃ bhāveti vivekaṃ ārammaṇaṃ katvā pavattiyā vivekanissitaṃ. Tathā **virāganissitaṃ nirodhanissitaṃ**. Tañca kho ariyamaggakkhaṇupattiyā kilesānaṃ samucchadato pariccāgabhāvena ca nibbānapakkhandanabhāvena ca pariṇataṃ paripakkanti ayameva attho daṭṭhabbo. Esa nayo sesabojjhaṅgesu.

Yañhissāti etesu bojjhaṅgesu yaṃkiñci assa. Sesam vuttanayameva. Āsavupattiyam panettha imesaṃ uparimaggattayasampayuttānaṃ bojjhaṅgānaṃ abhāvitattā ye uppajjeyyūṃ kāmāsavo bhavāsavo avijjāsavoti tayo āsavā, bhāvayato evaṃsa te āsavā na hontīti ayaṃ nayo vedītabbo.

Ime vuccanti...pe... bhāvanā pahātabbāti ime tayo āsavā imāya maggattayasampayuttāya bojjhaṅgabhāvanāya pahātabbāti vuccantīti vedītabbā.

28. Idāni imehi sattahākārehi pahīnāsavaṃ bhikkhuṃ thomento āsavappahāne cassa ānisaṃsaṃ dassento eteheva ca kāraṇehi āsavappahāne sattānaṃ ussukkaṃ janento **yato kho, bhikkhave...pe... antamakāsi dukkhassāti** āha. Tattha **yato khoti** sāmivacane tokāro, yassa khoti vuttaṃ hoti. Porāṇā pana yasmiṃ kāleti vaṇṇayanti. **Ye āsavā dassanā pahātabbāti** ye āsavā dassanena pahātabbā, te dassaneneva pahīnā honti, na appahīnesuyeva pahīnasaññī hoti. Evaṃ sabbattha vitthāro.

Sabbāsavasamvarasamvutoti sabbehi āsavapīdhānehi pihito, sabbesaṃ vā āsavānaṃ pīdhānehi pihito. **Acchecchi taṇhanti** sabbampi taṇhaṃ chindī, saṃchindī samucchindī. Vivattayi **saṃyojananti** dasavidhampi saṃyojanaṃ parivattayi nimmalamakāsi. **Sammāti** hetunā kāraṇena. **Mānābhisamayāti** mānassa dassanābhisamayā pahānābhisamayā ca. Arahattamaggo hi kiccavasena mānaṃ passati, ayamassa dassanābhisamayo. Tena diṭṭho pana so tāvadeva pahīyati diṭṭhavisena diṭṭhasattānaṃ jīvitam viya. Ayamassa pahānābhisamayo.

Antamakāsi dukkhassāti evaṃ arahattamaggena sammā mānassa diṭṭhattā pahīnattā ca ye ime “kāyabandhanassa anto jīrati (cūḷava. 278). Haritantaṃ vā”ti (ma. nī. 1.304) evaṃ vuttaantimamariyādanto ca, “antamidam, bhikkhave, jīvikāna”nti (itivu. 91; saṃ. nī. 3.80) evaṃ vuttalāmakanto ca, “sakkāyo eko anto”ti (a. nī. 6.61) evaṃ vuttakoṭṭhāsanto ca, “esevanto dukkhassa sabbapaccayasaṅkhayā”ti (saṃ. nī. 2.51) evaṃ vuttakoṭṭanto cāti evaṃ cattāro antā, tesu sabbasseva vaṭṭadukkhassa antaṃ catutthakoṭṭisaṅkhātāṃ antimakoṭṭisaṅkhātāṃ antamakāsi paricchedaṃ parivaṭṭumaṃ akāsi. Antimasamussayamattāvasesam dukkhaṃ akāsīti vuttaṃ hoti.

Attamanā te bhikkhūti sakamanā tuṭṭhamanā, pītisomanassehi vā sampayuttamanā hutvā. **Bhagavato bhāsitaṃ abhinanduntī** idaṃ dukkhassa antakiriyāpariyosānaṃ bhagavato bhāsitaṃ sukathitaṃ sulapitaṃ, evametam bhagavā evametam sugatāti matthakena sampaṭicchantaṃ abbhanumodiṃsūti.

Sesamettha yaṃ na vuttaṃ, taṃ pubbe vuttattā ca suviññeyyattā ca na vuttaṃ. Tasmā sabbam vuttānusārena anupadaso paccavekkhitabbaṃ.

Bhāvanāpahātabbaāsavavaṇṇanā niṭṭhitā.

Papañcasūdaniyā majjhimanikāyaṭṭhakathāya

Sabbāsavasuttavaṇṇanā niṭṭhitā.

3. Dhammadāyādasuttavaṇṇanā

29. **Evaṃ me sutanti** dhammadāyādasuttaṃ. Yasmā panassa aṭṭhuppattiko nikkhepo, tasmā taṃ dassetvā vassa apubbapadaṇṇanaṃ karissāma. Katarāya ca panidaṃ aṭṭhuppattiyā nikkhittanti. Lābhasakkāre. Bhagavato kira mahālābhasakkāro uppajji. Yathā taṃ cattāro asaṅkhyeyye pūritadānapāramisañcayassa. Sabbadisāsu yamakamahamegho vuṭṭahitvā mahoghaṃ viya sabbapāramiyo ekasmiṃ attabhāve vipākaṃ dassāmāti sampiṇḍitā viya lābhasakkāramahoghaṃ nibbattayiṃsu. Tato tato

annapānayanavattamālāgandhavilepanādihatthā khattiyabrāhmaṇādayo āgantvā – “kaḥaṃ buddho, kaḥaṃ bhagavā, kaḥaṃ devadevo, narāsabho, purisaśīho”ti bhagavantam pariyesanti. Sakaṭasatehipi paccaye āharitvā okāsam alabhamānā samantā gāvutappamāṇampi sakaṭadhurena sakaṭadhuramāhacattitṭhanti ceva anubandhanti ca. Andhakavindabrāhmaṇādayo viya. Sabbam khandhake tesu tesu suttesu ca āgatanayeneva veditabbam. Yathā ca bhagavato, evam bhikkhusaṅghassāpi.

Vuttampi cetam – “tena kho pana samayena bhagavā sakkato hoti garukato mānito pūjito apacito lābhī cīvarapiṇḍapātasenāsanagilānapaccayabhesajjaparikkhāraṇam, bhikkhusaṅghopi kho sakkato hoti...pe... parikkhāraṇa”nti (udā. 14). Tathā – “yāvata kho, cunda, etarahi saṅgho vā gaṇo vā loke uppanno, nāham, cunda, aññaṃ ekasaṅghampi samanupassāmi, evam lābhaggayasaggaṭṭam, yathariva, cunda, bhikkhusaṅgho”ti (dī. ni. 3.176).

Svāyam bhagavato ca bhikkhusaṅghassa ca uppanno lābhasakkāro ekato hutvā dvinnam mahānadīnam udakamiva appameyyo ahoṣi. Kamena bhikkhū paccayagarukā paccayabāhulikā ahesum. Pacchābhattampi telamadhuphāṇitādīsu āhaṭesu gaṇḍiṃyeva paharivā “amhākaṃ ācariyassa detha, upajjhāyassa dethā”ti uccāsaddamahāsaddam karonti. Sā ca nesam pavatti bhagavatopi pākaṭā ahoṣi. Tato bhagavā ananucchavikanti dhammasamvegam uppādetvā cintesi –

“Paccayā akappiyāti na sakkā sikkhāpadam paññāpetum. Paccayapaṭibaddhā hi kulaputtānam samaṇadhammavutti. Handāham dhammadāyādapāṭipadam desemi. Sā sikkhākāmānam kulaputtānam sikkhāpapaññānti viya bhavissati nagaradvāre ṭhapitasabbakāyikaādāso viya ca, yathā hi nagaradvāre ṭhapite sabbakāyike ādāse cattāro vaṇṇā attano chāyam disvā vajjam pahāya niddosā honti, evameva sikkhākāmā kulaputtā payogamaṇḍanena attānam maṇḍetukāmā imam sabbakāyikādāsūpamaṃ desanaṃ āvajjitvā āmisadāyādapāṭipadam vajjetvā dhammadāyādapāṭipadam pūrentā khippameva jātijarāmarāṇassa antam karissanti”ti. Imissā aṭṭhuppattiyā idam suttaṃ abhāsi.

Tattha **dhammadāyādā me, bhikkhave, bhavatha, mā āmisadāyādāti** dhammassa me dāyādā, bhikkhave, bhavatha, mā āmisassa. Yo mayham dhammo, tassa paṭiggāhakā bhavatha, yañca kho mayham āmisam, tassa mā paṭiggāhakā bhavathāti vuttaṃ hoti. Tattha dhammopi duvidho – nippariyāyadhammo, pariyāyadhammoti. Āmisampi duvidham – nippariyāyāmisam, pariyāyāmisanti. Katham? Maggaphalanibbānabhedo hi navavidhopi lokuttaradhammo **nippariyāyadhammo** nibbattitadhammo, na yena kenaci pariyāyena kāraṇena vā lesena vā dhammo. Yam panidam vivaṭṭūpanissitam kusalam, seyyathidam, idhekacco vivaṭṭam patthento dānam deti, sīlam samādiyati, uposathakammaṃ karoti, gandhamālādīhi vatthupūjam karoti, dhammam suṇāti deseti jhānasamāpattiyo nibbatteti, evam karonto anupubbena nippariyāyadhammam amataṃ nibbānam paṭilabhati, ayam **pariyāyadhammo**. Tathā cīvarādayo cattāro paccayā **nippariyāyāmisameva**, na aññaṃ pariyāyena kāraṇena vā lesena vā āmisam. Yam panidam vaṭṭagāmikusalam, seyyathidam, idhekacco vaṭṭam patthento sampattibhavam icchamāno dānam deti...pe... samāpattiyo nibbatteti, evam karonto anupubbena devamanussasampattiṃ paṭilabhati, idam **pariyāyāmisam** nāma.

Tattha nippariyāyadhammopi bhagavatoyeva santako. Bhagavatā hi kathitattā bhikkhū maggaphalanibbānāni adhigacchanti. Vuttampi cetam “so hi brāhmaṇa bhagavā anuppannassa maggassa uppādetā, asaṅjātassa maggassa saṅjanetā, anakkhātassa maggassa akkhātā, maggaññū maggavidū maggakovidō. Maggānugā ca pana etarahi sāvakā viharanti pacchā samannāgatā”ti (ma. ni. 3.79) ca – “so hāvuso, bhagavā jānam jānāti, passam passati cakkhubhūto nāṇabhūto dhammabhūto brahmabhūto vattā pavattā atthassa ninnetā amatassa dātā dhammassāmī tathāgato”ti (ma. ni. 1.203) ca. Pariyāyadhammopi bhagavatoyeva santako. Bhagavatā hi kathitattā evam jānanti “vivaṭṭam patthetvā dānam dento...pe... samāpattiyo nibbattento anukkamena amataṃ nibbānam paṭilabhati”ti. Nippariyāyāmisampi ca bhagavatoyeva santakam. Bhagavatā hi anuññātattāyeva bhikkhūhi jīvakavattum ādiṃ katvā paṇṭacīvaram laddham. Yathāha “anujānāmi, bhikkhave, gahapaticīvaram. Yo icchati, paṃsukūliko hotu, yo icchati, gahapaticīvaram sādīyatu. Itarītarenapāham, bhikkhave, santuṭṭhiṃyeva vaṇṇemī”ti (mahāva. 337).

Pubbe ca bhikkhū paṇṭitapiṇḍapātam nālatthum. Sapadānapīṇḍiyālopabhojanā evāhesum. Tehi rājagahe viharantena bhagavatā – “anujānāmi, bhikkhave, saṅghabhattam uddesabhattam nimantanam salākabhattam

pakkhikaṃ uposathikaṃ pāṭipadika’’nti (cūḷava. 325) evaṃ anuññātattāyeva paṇītabhojanaṃ laddhaṃ. Tathā senāsaṃ. Pubbe hi akatapabbhārarukkhamūlādisenāsanāyeva bhikkhū ahesuṃ. Te ‘‘anujānāmi, bhikkhave, pañca leṇānī’’ti (cūḷava. 294) evaṃ bhagavatā anuññātattāyeva vihāro aḍḍhayogo pāsādo hammiyaṃ guhāti imāni senāsanāni labhiṃsu. Pubbe ca muttahaṛītakeneva bhesajjaṃ akaṃsu. Te bhagavatāyeva – ‘‘anujānāmi, bhikkhave, pañca bhesajjāni, seyyathidaṃ, sappi, navanītaṃ, telaṃ, madhu, phāṇita’’nti (mahāva. 260) evamādinā nayena anuññātattā nānābhesajjāni labhiṃsu.

Pariyāyāmisampi bhagavatoyeva santakaṃ. Bhagavatā hi kathitattā yeva jānanti – ‘‘sampattibhavaṃ patthento dānaṃ datvā sīlaṃ...pe... samāpattiyo nibbattetvā anukkamena pariyāyāmisam dibbasampattiṃ manussasampattiṃ paṭilabhatī’’ti. Tadeva, yasmā nippariyāyadhammopī pariyāyadhammopī nippariyāyāmisampi pariyāyāmisampi bhagavatoyeva santakaṃ, tasmā tattha attano sāmibhāvaṃ dassento āha – ‘‘dhammadāyādā me, bhikkhave, bhavatha mā āmisadāyādā’’ti.

Yo mayhaṃ santako duvidhopi dhammo, tassa dāyādā bhavatha. Yañca kho etaṃ mayhameva santakaṃ āmisam, tassa dāyādā mā bhavatha. Dhammakotṭhāsasseva sāmīno bhavatha, mā āmisakotṭhāsassa. Yo hi jinasāsane pabbajitvā paccayaparamo viharati catūsu taṇhuppādesu sandissamāno nikkhattadhuro dhammānudhammappaṭipattiyaṃ, ayaṃ **āmisadāyādo** nāma. Tādisā mā bhavatha. Yo pana anuññātapaccayesu appicchatādīni nissāya paṭisaṅkhā sevamāno paṭipattiparamo viharati catūsu ariyavaṃsesu sandissamāno, ayaṃ **dhammadāyādo** nāma. Tādisā bhavathāti vuttaṃ hoti.

Idāni yesaṃ tattha etadahosi, bhavissati vā anāgatamaddhānaṃ ‘‘kiṃ nu kho bhagavā sāvakaṇaṃ alābhatthiko evamāhā’’ti, tesam atipaṇītalābhatthiko ahaṃ evaṃ vadāmīti dassetumāha **atthi me tumhesu... pe... no āmisadāyādāti**.

Tassāyamattho – atthi me tumhesu anukampā anuddayā hitesitā, kena nu kho kāraṇena kena upāyena sāvakā dhammadāyādā assu dhammakotṭhāsasāmīno, no āmisadāyādāti. Ayaṃ pana adhippāyo, passati kira bhagavā āmisagarukānaṃ āmise upakkhalitānaṃ atītakāle tāva kapilassa bhikkhuno, ‘‘saṅghāṭīpi ādittā hotī’’tiādīnā (pārā. 230; saṃ. ni. 2.218) nayena āgatapābhabhikkhubhikkhunīsikkhamānādīnañca anekasatānaṃ apāyaparipūraṇattaṃ attano sāsane pabbajitānañca devadattādīnaṃ. Dhammagarukānaṃ pana sārīputtamoggallānamahākassapādīnaṃ abhiññāpaṭisambhidādiguṇappaṭilābhaṃ. Tasmā tesam apāyā parimuttiṃ sabbaṅgasampattiñca icchanto āha – ‘‘atthi me tumhesu anukampā kinti me sāvakā dhammadāyādā bhaveyyuṃ, no āmisadāyādā’’ti. Paccayagaruko ca catuparisantare kūṭakahāpaṇo viya nibbutaṅgāro viya ca nittejo nippabho hoti. Tato vivattitacitto dhammagaruko tejavā sīhova abhibhuyyacārī, tasmāpi evamāha – ‘‘atthi me...pe... no āmisadāyādā’’ti.

Evaṃ ‘‘dhammadāyādā me, bhikkhave, bhavatha, mā āmisadāyādā’’ti idaṃ anukampāya paṇītataraṃ lābhaṃ icchantena vuttaṃ, no alābhatthikenāti sāvetvā idāni imassa ovādassa akaraṇe ādīnavaṃ dassento āha ‘‘tumhe ca me, bhikkhave...pe... no dhammadāyādā’’ti. Tattha **tumhepi tena ādiyā bhaveyyāthāti** tumhepi tena āmisadāyādabhāvena no dhammadāyādabhāvena ādiyā bhaveyyātha. Apadisitabbā visuṃ kātābbā vavattapetabbā, viññūhi gārayhā bhaveyyāthāti vuttaṃ hoti. Kinti? Āmisadāyādā satthusāvakā viharanti, no dhammadāyādāti.

Ahampi tena ādiyo bhaveyyanti ahampi tena tumhākaṃ āmisadāyādabhāvena no dhammadāyādabhāvena gārayho bhaveyyaṃ. Kinti? Āmisa...pe... dāyādāti. Idaṃ bhagavā tesam atīva mudukaraṇatthamāha. Ayañhi ettha adhippāyo – sace, bhikkhave, tumhe āmisalolā carissatha, tattha viññū maṃ garahissanti ‘‘kathañhi nāma sabbaññū samāno attano sāvake dhammadāyāde no āmisadāyāde kātuṃ na sakkotī’’ti. Seyyathāpi nāma anākappasampanne bhikkhū disvā ācariyupajjhāye garahanti ‘‘kassime saddhivihārikā, kassantevāsikā’’ti; seyyathā vā pana kulakumārake vā kulakumārikāyo vā dussīle pāpadhamme disvā mātāpitaro garahanti ‘‘kassime puttā, kassa dhītarō’’ti; evameva maṃ viññū garahissanti ‘‘kathañhi nāma sabbaññū samāno attano sāvake dhammadāyāde no āmisadāyāde kātuṃ na sakkotī’’ti.

Evaṃ imassa ovādassa akaraṇe ādīnavaṃ dassetvā karaṇe ānisaṃsaṃ dassento **tumhe ca metiādīmāha**. Tattha **ahampi tena na ādiyo bhaveyyanti** seyyathāpi nāma vattaparipūraṇe daharabhikkhū uddesaparipucchāsampanne vassasatikatthere viya ākappasampanne disvā, kassa saddhivihārikā,

kassantevāsikāti, asukassāti, “patirūpaṃ therassa, paṭibalo vata ovadituṃ anusāsitu”nti ācariyupajjhāyā na ādiyā na gārayhā bhavanti, evameva ahampi tena tumhākaṃ dhammadāyādabhāvena no āmisadāyādabhāvena kassa sāvakaṃ nālakaṃ paṭipadaṃ tuvaṭṭakapaṭipadaṃ candūpamaṃ paṭipadaṃ rathavinītaṃ paṭipadaṃ mahāgosiṅgasālapaṭipadaṃ mahāsuññatapaṭipadaṃ paṭipannaṃ catupaccayasantosabhāvanārāmaariyavaṃsesu sakkhibhūtā paccayagedhato vivattamānasā abbhā muttacandasamā viharantīti; “samaṇassa gotamassā”ti vutte “sabbaññū vata bhagavā, asakkhi vata sāvake āmisadāyādapaṭipadaṃ chaḍḍāpetvā dhammadāyādapaṭipattipūrake kātu”nti viññūnaṃ na ādiyo na gārayho bhaveyyanti. Evamimasmimṃ pade adhippāyaṃ ñatvā sesaṃ kaṇhapakkhe vuttanayapaccanīkena veditabbaṃ. Evaṃ imassa ovādassa karaṇe ānisaṃsaṃ dassetvā idāni taṃ ovādaṃ niyyātentō āha – “tasmā tiha me, bhikkhave...pe... no āmisadāyādā”ti.

30. Evamimaṃ ovādaṃ niyyātetvā idāni tassā dhammadāyādapaṭipattiyā paripūrakāriṃ thometuṃ **idhāhaṃ, bhikkhveti**ādīmāha. Bhagavato hi thomaṇaṃ sutvāpi hontiyeva tadatthāya paṭipajjitāro.

Tattha **idhāti** nipātapadametaṃ. **Bhuttāvīti** bhuttavā, katabhattakiccoti vuttaṃ hoti. **Pavāritoti** yāvadatthapavāraṇāya pavārito, yāvadattham bhuñjitvā paṭikkhittabhojano tittovāti vuttaṃ hoti. Catubbidhā hi pavāraṇā vassaṃvuṭṭhapavāraṇā paccayapavāraṇā anarittapavāraṇā yāvadatthapavāraṇāti. Tattha, “anujānāmi bhikkhave, vassaṃvuṭṭhānaṃ bhikkhūnaṃ tīhi ṭhānehi pavāretu”nti (mahāva. 209) ayaṃ **vassaṃvuṭṭhapavāraṇā**. “Icchāmaṃ, bhante, saṅghaṃ catumāsāṃ bhesajjena pavāretu”nti (pāci. 303) ca “aññatra punapavāraṇāya aññatra nīcapavāraṇāyā”ti (pāci. 307) ca ayaṃ **paccayapavāraṇā**. “Pavārito nāma asanaṃ paññāyati, bhojanaṃ paññāyati, hatthapāse ṭhito abhiharati, paṭikkhepo paññāyati, eso pavārito nāmā”ti (pāci. 239) ayaṃ **anarittapavāraṇā**. “Paññitena khādanīyena bhojanīyena sahatthā santappesi sampavāresi”ti (dī. ni. 1.297, 358) ayaṃ **yāvadatthapavāraṇā**. Ayamidha adhippetā. Tena vuttaṃ “pavāritoti yāvadatthapavāraṇāya pavārito”ti.

Paripuṇṇoti bhojanena paripuṇṇo. **Pariyosītōti** pariyosītābhojano, uttarapadalopo daṭṭhabbo. Yāvatakaṃ bhuñjitabbaṃ, tāvatakaṃ bhuttaṃ hoti, avasitā me bhojanakiriyāti attho. **Suhītōti** dhāto, jighacchādūkkhābhāvena vā sukhītōti vuttaṃ hoti. **Yāvadatthoti** yāvatako me bhojanena attho, so sabbo pattoti. Ettha ca purimānaṃ tiṇṇaṃ pacchimāni sādhakāni. Yo hi pariyosito, so bhuttāvī hoti. Yo ca suhito, so yāvadatthapavāraṇāya pavārito. Yo yāvadattho, so paripuṇṇoti. Purimāni vā pacchimānaṃ. Yasmā hi bhuttāvī, tasmā pariyosito. Yasmā pavārito, tasmā suhito. Yasmā paripuṇṇo, tasmā yāvadatthoti. Sabbañcetam parikkappetvā vuttanti veditabbaṃ.

Siyāti ekaṃse ca vikappane ca. “Pathavīdhātu siyā ajjhattikā, siyā bāhirā”ti (ma. ni. 3.349) ekaṃse. “Siyā aññatarassa bhikkhuno āpatti vītikkamo”ti (ma. ni. 3.39) vikappane. Idha ubhayampi vaṭṭati. Atirekova **atirekadhammo**. Tathā **chaḍḍanīya dhammo**. Adhiko ca chaḍḍetabbo ca, na aññaṃ kiñci kātābhoti attho. **Athāti** tamhi kāle. **Jighacchādubbalyaparetāti** jighacchāya ca dubbalyena ca paretā phuṭṭhā anugatā ca aṭṭhapi dasapi divasāni. Tattha keci jighacchitāpi na dubbalā honti, sakkonti jighacchaṃ sahituṃ. Ime pana na tādisāti dassetuṃ ubhayamāha. **Tyāhanti** te ahaṃ. **Sace ākañkhathāti** yadi icchatha.

Appahariteti apparūhaharite, yasmimṃ ṭhāne piṇḍapātājhottharaṇena vinassanadhammāni tiṇṇāni natthi, tasminti attho. Tena nittiṇaṇca mahātiṇagahanaṃ ca, yattha sakaṭenapi chaḍḍite piṇḍapāte tiṇṇāni na vinassanti, taṇca ṭhānaṃ pariggahitaṃ hoti. Bhūtagāmasikkhāpadassa hi avikopanatthametaṃ vuttaṃ.

Appānaketī nippānake piṇḍapātājhottharaṇena maritabbapānākarahite vā mahāudakakkhandhe. Parittodake eva hi bhattapakkehena ālūlite sukhumapānākā maranti, na mahātaḷākādīsūti. Pānākānurakkhaṇatthañhi etaṃ vuttaṃ. **Opilāpessāmīti** nimujjāpessāmi.

Tatrekassāti tesu dvīsu ekassa. Yo imaṃ dhammadesanaṃ suṭṭhu sutavā punappunaṃ āvajjeti ca, taṃ sandhāyāha **vuttaṃ kho panetanti**. Ayaṃ **vutta**-saddo kesohāraṇepi dissati “kāpaṭiko māṇavo daharo vuttasiro”tiādīsu (ma. ni. 2.426). Ropitepi “yathā sārādikaṃ bījaṃ, khetto vuttaṃ virūhāt”tiādīsu (jā. 1.3.31). Kathitepi “vuttamidam bhagavatā, vuttamidam arahatā”tiādīsu. Idha pana kathite daṭṭhabbo. Kathitam kho panetanti ayañhissa attho. **Āmisaññataranti** catunnaṃ paccayāmisānaṃ aññataraṃ, ekanti attho. **Yadidanti** nipāto, sabbalingavibhattivacanesu tādisova tattha tattha atthato pariṇāmetabbo. Idha panāssa yo esoti attho. Yo

eso piṇḍapāto nāma. Idaṃ āmisaññataranti vuttaṃ hoti. **Yaṃnūnāhanti** sādhu vatāhaṃ. **Evanti** yathā idāni imaṃ khaṇaṃ vītināmemi, evameva rattindivaṃ. **Vītināmeyyanti** khepeyyaṃ ativattāpeyyaṃ.

So taṃ piṇḍapātanti so taṃ sadevakena lokena sirasā sampaṭicchitabarūpaṃ sugatātirittampi piṇḍapātaṃ abhuñjitvā dhammadāyādabhāvaṃ ākaṅkhamāno ādittasīsūpamaṃ paccavekkhitvā teneva jighacchādubbalyena evaṃ taṃ rattindivaṃ vītināmeyya.

Atha dutiyassāti imasmiṃ pana vāre esa saṅkhepo, sace so bhikkhu, yaṃnūnāhaṃ...pe... vītināmeyyanti cinto evampi cinteyya, pabbajitena kho vālamigākule araññe bhesajjaṃ viya pañcakāmaguṇavāḷākule gāme piṇḍapātopi dukkhaṃ pariyesitūṃ. Ayaṃ pana piṇḍapāto iti pariyesanādinavavimutto ca sugatātiritto cāti ubhato sujātakhattiyakumāro viya hoti, yehi ca pañcahi kāraṇehi piṇḍapāto na paribhuñjitabbo hoti. Seyyathidaṃ, puggalaṃ garahitvā na paribhuñjitabbo hoti “alajjipuggalassa santako”ti. Aparisuddhauppattitāya na paribhuñjitabbo hoti “bhikkhuniparipācanaasantasambhāvanuppanno”ti. Sāmikānukampāya na paribhuñjitabbo hoti “piṇḍapātasāmiko bhikkhu jighacchito”ti. So dhāto tasseva antevāsikādīsu anukampāya na paribhuñjitabbo hoti “antevāsikā aññe vā tappaṭibaddhā jighacchitā”ti, tepi dhātā suhitā, apica kho assaddhatāya na paribhuñjitabbo hoti “piṇḍapātasāmiko bhikkhu assaddho”ti. Tehi ca kāraṇehi ayaṃ vimutto. Bhagavā hi lajjīnaṃ aggo, parisuddhuppattiko piṇḍapāto, bhagavā ca dhāto suhito, paccāsīsakopi añño puggalo natthi, ye loke saddhā, bhagavā tesam aggoti evaṃ cintevā ca so taṃ piṇḍapātaṃ bhuñjitvā...pe... vītināmeyya. Ettāvātā yopi abhuñjitvā samaṇadhammaṃ karoti, sopi bhuñjitabbakameva piṇḍapātaṃ na bhutto hoti. Yopi bhuñjitvā samaṇadhammaṃ karoti, sopi bhuñjitabbakameva bhutto hoti. Natthi piṇḍapāte viseso. Puggale pana atthi viseso. Tasmā taṃ dassento **kiñcāpi** sotiādīmāha.

Tattha **kiñcāpī** anujānanappasaṃsanatthe nipāto. Kiṃ anujānāti? Tassa bhikkhuno taṃ anavajjaparibhogaṃ. Kiṃ pasaṃsati? Bhutvā samaṇadhammakaraṇaṃ. Idaṃ vuttaṃ hoti yadipi so bhikkhu evaṃ bhuñjitabbameva bhuñjitvā kātabbameva kareyya. **Atha kho asuyeva me purimo bhikkhūti** yo purimo bhikkhu tampi piṇḍapātaṃ paṭikkhipitvā samaṇadhammaṃ karoti, soyeva mama dvīsu sūresu sūrataro viya dvīsu paṇḍitesu paṇḍitataro viya ca pujjataro ca pāsāmsataro ca, dutiyabhikkhuto atirekena pūjanīyo ca pasaṃsanīyo cāti vuttaṃ hoti.

Idāni tamatthaṃ kāraṇena sādento **taṃ kissa hetūtiādīmāha**. Tassattho, tattha siyā tumhākaṃ, kasmā so bhikkhu bhagavato pujjataro ca pāsāmsataro cāti? **Tañhi tassāti** yasmā taṃ piṇḍapātaṃ paṭikkhipanaṃ tassa bhikkhuno dīgharattaṃ appicchatāya...pe... vīriyārambhāya saṃvattissati. Kathaṃ? Tassa hi sace aparena samayena paccayesu atricchatā vā pāpicchatā vā mahicchatā vā uppajjissati. Tato naṃ iminā piṇḍapātaṃ paṭikkhepaṅkusena nivāressati “are tvaṃ sugatātirittampi piṇḍapātaṃ paṭikkhipitvā īdisaṃ icchaṃ uppādesī”ti evaṃ paccavekkhamāno. Esa nayo asantuṭṭhiyā asaṃlekhasa cuppanassa nivāraṇe. Evaṃ tāvassa appicchatāya santuṭṭhiyā saṃlekhhāya saṃvattissati.

Subharatāyāti ettha ayaṃ saṃvaṇṇanā – idhekacco attanopi upaṭṭhākānampi dubbharo hoti dupposo. Ekacco attanopi upaṭṭhākānampi subharo hoti suposo. Kathaṃ? Yo hi ambilādīni laddhā anambilādīni pariyesati, aññassa ghare laddhaṃ aññassa ghare chaḍḍento sabbaṃ gāmaṃ vicarivā rittapattova vihāraṃ pavisitvā nipajjati, ayaṃ attano dubbharo. Yo pana sālīmaṃsodanādīnaṃ patte pūretvā dinnepi dummukhabhāvaṃ anattamanabhāvameva ca dasseti, tesam vā sammukkhāya taṃ piṇḍapātaṃ “kiṃ tumhehi dinna”nti apasādento sāmaṇeragahaṭṭhādīnampi deti, ayaṃ upaṭṭhākānaṃ dubbharo. Etaṃ disvā manussā dūrato parivajjanti dubbharo bhikkhu na sakkā posituntī. Yo pana yaṃkiñci lūkhaṃ vā paṇītaṃ vā laddhā tuṭṭhacittova bhuñjitvā vihāraṃ gantvā attano kammaṃ karoti, ayaṃ attano subharo. Yo ca paresampi appaṃ vā bahuṃ vā lūkhaṃ vā paṇītaṃ vā dānaṃ ahīletvā attamano vipasannamukho hutvā tesam sammukkhāya paribhuñjitvā yāti, ayaṃ upaṭṭhākānaṃ subharo. Etaṃ disvā manussā ativiya vissatthā honti – “amhākaṃ bhadanto subharo thokenapi tussati, mayameva naṃ possisāmā”ti paṭiññaṃ katvā posenti.

Tattha sace aparena samayena assa attano vā upaṭṭhākānaṃ vā dubbharatānayaena cittaṃ uppajjissati. Tato naṃ iminā piṇḍapātaṃ paṭikkhepaṅkusena nivāressati – “are tvaṃ sugatātirittampi piṇḍapātaṃ paṭikkhipitvā īdisaṃ cittaṃ uppādesī”ti evaṃ paccavekkhamāno, evamassa subharatāya saṃvattissati. Sace panassa kosajjaṃ uppajjissati, tampi etenevaṅkusena nivāressati – “are tvaṃ nāma tadā sugatātirittampi piṇḍapātaṃ paṭikkhipitvā tathā jighacchādubbalyaparetopi samaṇadhammaṃ katvā ajja kosajjamanuyūñjasī”ti evaṃ

paccavekkhamāno, evamassa vīriyārambhāya saṃvattissati. Evamassa idaṃ piṇḍapātapaṭikkhipanam dīgharattaṃ appicchatāya...pe... vīriyārambhāya saṃvattissati. Evamassime pañca guṇā paripūrā dasa kathāvattūni paripūressanti.

Katham? Atra hi pāliyaṃyeva appicchatāsantuṭṭhitāvīriyārambhavasena tīṇi āgatāni, sesāni sallekhena saṅgahitāni. Idañhi sabbakathāvattūnaṃ nāmameva, yadidaṃ sallekho. Yathāha – “yā ca kho ayaṃ, ānanda, kathā abhisallekhikā cetovinīvaraṇasappāyā ekantanibbidāya virāgāya nirodhāya upasamāya abhiññāya sambodhāya nibbānāya saṃvattati. Seyyathidaṃ, appicchakathā”’ti (ma. ni. 3.189, 192) vitthāro. Evaṃ ime pañca guṇā paripūrā dasa kathāvattūni paripūressanti. Dasa kathāvattūni paripūrāni tisso sikkhā paripūressanti.

Katham? Etesu hi appicchakathā santosakathā asaṃsaggakathā sīlakathāti imā catasso kathā adhisīlasikkhāsaṅgahitāyeva. Pavivekakathā vīriyārambhakathā samādhikathāti imā tisso adhicittasikkhāsaṅgahitā. Paññākathā vimuttikathā vimuttiñāṇadassanakathāti imā tisso adhipaññāsikkhāsaṅgahitāti. Evaṃ dasa kathāvattūni paripūrāni tisso sikkhā paripūressanti. Tisso sikkhā paripūrā pañca asekkhadhammakhandhe paripūressanti.

Katham? Paripūrā hi adhisīlasikkhā asekkho sīlakkhandhoyeva hoti, adhicittasikkhā asekkho samādhikkhandho, adhipaññāsikkhā asekkhā paññā-vimutti-vimuttiñāṇadassanakhandhā evāti evaṃ tisso sikkhā paripūrā pañca asekkhadhammakhandhe paripūressanti. Pañca dhammakhandhā paripūrā amatam nibbānaṃ paripūressanti. Seyyathāpi uparipabbate pāvussako mahāmegho abhivutṭho pabbatakandarasarasākhā paripūreti. Tā paripūrā kusobbhe, kusobbhā mahāsobbhe, mahāsobbhā kunnadiyo, kunnadiyo mahānadiyo, mahānadiyo mahāsamuddasāgaram paripūrenti; evameva tassa bhikkhuno ime pañca guṇā paripūrā dasa kathāvattūni ādiṃ katvā yāva amatam nibbānaṃ paripūressanti. Evamayaṃ bhikkhu dhammadāyādapaṭipadaṃ paṭipanno paramadhammadāyādaṃ labhatīti etamatthaṃ sampassamāno bhagavā “taṃ kissa hetu tañhi tassa, bhikkhave, bhikkhuno”’tiādimāha.

Evaṃ tassa bhikkhuno pujjatarapāsaṃsatarabhāvaṃ kāraṇena sādhetvā idāni te bhikkhū tathattāya sanniyojento **tasmā tiha me bhikkhave**tiādimāha. Kiṃ vuttaṃ hoti, yasmā yo taṃ piṇḍapātaṃ bhuñjitvā samaṇadhammaṃ kareyya, so imehi pañcahi mūlaguṇehi paribāhiro. Yo pana abhuñjitvā kareyya, so imesaṃ bhāgī hoti – “tasmā tiha me, bhikkhave...pe... no āmisadāyādā”’ti.

Idamavoca bhagavāti idaṃ nidānapariyosānato pabhuti yāva no āmisadāyādāti sutappadesaṃ bhagavā avoca. **Idaṃ vatvāna sugatoti** idañca sutappadesaṃ vatvāva sobhanāya paṭipadāya gatattā **sugatoti** sankhaṃ pattoyeva bhagavā. **Uṭṭhāyāsanaṃ vihāraṃ pāvisi** paññattavarabuddhāsanato uṭṭhahitvā vihāraṃ attano mahāgandhakuṭiṃ pāvisi asambhinnāya eva parisāya. Kasmā dhammathomanatthaṃ.

Buddhā kira apariniṭṭhitāya desanāya vihāraṃ pavisantā dvīhi kāraṇehi pavisanti puggalathomanatthaṃ vā dhammathomanatthaṃ vā. Puggalathomanatthaṃ pavisanto evaṃ cintesi – “imaṃ mayā saṃkhittena uddesaṃ uddiṭṭhaṃ, vitthārena avibhattaṃ, dhammapaṭiggāhakā bhikkhū uggahetvā ānandaṃ vā kaccānaṃ vā upasaṅkamitvā pucchissanti, te mayhaṃ ñāṇena saṃsandetvā kathessanti, tato dhammapaṭiggāhakā puna maṃ pucchissanti, tesam ahaṃ sukathitaṃ, bhikkhave, ānandena sukathitaṃ kaccānena, maṃ cepi tumhe etamatthaṃ puccheyyātha, ahampi naṃ evameva byākareyyanti evaṃ te puggale thomessāmi, tato tesu gāraṃ janetvā bhikkhū upasaṅkamissanti, tepi bhikkhū atthe ca dhamme ca niyojessanti, te tehi niyojitā tisso sikkhā paripūrentā dukkhassantaṃ karissanti”’ti.

Dhammathomanatthaṃ pavisanto evaṃ cintesi, yathā idheva cintesi – “mayi vihāraṃ pavitṭhe tameva āmisadāyādaṃ garahanto dhammadāyādāñca thomento imissaṃyeva parisati nisinna sārīputto dhammaṃ desessati, evaṃ dvinnampi amhākaṃ ekajjhāsāyāya matiyā desitā ayaṃ desanā aggā ca garukā ca bhavissati pāsānacchattasadisā. Caturōghanittharaṇaṭṭhena titthe ṭhapitā nāvā viya maggagamanatṭhena catuyuttaājāññaratho viya ca bhavissati. Yathā ca ‘evaṃ karontassa ayaṃ daṇḍo’’ti parisati āṇaṃ ṭhapetvā uṭṭhāyāsanaṃ pāsādaṃ āruḷhe rājini tattheva nisinna senāpati taṃ raññā ṭhapitaṃ āṇaṃ pavatteti; evampi mayā ṭhapitaṃ desanaṃ imissaṃyeva parisati nisinna sārīputto thometvā desessati, evaṃ dvinnampi amhākaṃ matiyā desitā ayaṃ desanā balavataṛā majjhanhikasūriyo viya pajjalissati”’ti. Evamidha dhammathomanatthaṃ

uṭṭhāyāsanā vihāraṃ pāvīsi.

Īdisesu ca ṭhānesu bhagavā nisinnāsaneveva antarahito cittagatiyā vihāraṃ pavisaṭṭi veditabbo. Yadi hi kāyagatiyā gaccheyya, sabbā parisā bhagavantam parivāretvā gaccheyya, sā ekavāraṃ bhinnā puna dussannipātā bhavyeyyāti bhagavā cittagatiyā eva pāvīsi.

31. Evaṃ pavīṭṭhe pana bhagavati bhagavato adhippāyānurūpaṃ taṃ dhammaṃ thometukāmo **tatra kho āyasmā sārīputto...pe...etadavoca.** Tattha **āyasmāti** piyavacanametam. **Sārīputtoti** tassa therassa nāmaṃ, tañca kho mātito, na pitito. Rūpasāriyā hi brāhmaṇiyā so putto, tasmā sārīputtoti vuccati. **Acirapakkantassāti** pakkantassa sato nacirena. **Āvuso, bhikkhaveli** ettha pana buddhā bhagavanto sāvake ālapantā bhikkhaveli ālapanti. Sāvakā pana buddhehi sadisā mā homāti āvusoti paṭhamam vatvā pacchā bhikkhaveli bhaṇanti. Buddhehi ca ālapito bhikkhusaṅgho bhadanteti paṭivacanam deti, sāvakehi āvusoti.

Kittāvatā nu kho, āvusoti ettha **kittāvatāti** paricchadavacanam, kittakenāti vuttam hoti. **Nukāro** pucchāyam. **Khokāro** nipātamattam. **Satthu pavivittassa viharatoti,** tīhi vivekehi kāyacittaupadhivivekehi satthuno viharantassa. **Vivekam nānusikkhantī** tiṇṇam vivekānam aññatarampi nānusikkhanti, āmisadāyādāva hontīti imamatham āyasmā sārīputto bhikkhū pucchi. Esa nayo sukkapakkhepi.

Evaṃ vutte tamatham sotukāmā bhikkhū **dūratopi khoti** ādimāḥsu. Tattha **dūratopī** tiroraṭṭhatopi tirojanapadatopi anekayojanagaṇanatotīti vuttam hoti. **Santiketi** samīpe. **Aññātunti** jānitum bujjhitum. **Āyasmantaṃveva sārīputtam paṭibhātūti** āyasmatoveva sārīputtassa bhāgo hotu, āyasmā pana sārīputto attano bhāgam katvā vibhajātūti vuttam hoti. Āyasmato hi bhāgo yadidaṃ atthakkhānam, amhākam pana savanam bhāgoti ayamettha adhippāyo, evam saddalakkhaṇena sameti. Keci pana bhaṇanti “paṭibhātūti dissatū”ti. Apare “upaṭṭhātūti”ti. **Dhāressantīti** uggahessanti pariyaṇissanti. Tato nesam kathetukāmo thero **tena hīti** ādimāha. Tattha **tenāti** kāraṇavacanam. **Hikāro** nipāto. Yasmā sotukāmāttha, yasmā ca mayham bhāram āropayittha, tasmā suṇāthāti vuttam hoti. Tepi bhikkhū therassa vacanam sampaṭicchimsu, tenāha “evamāvusoti...pe...paccassosu”nti.

Atha nesam, āmisadāyādam garahantena bhagavatā “tumhepi tena ādiyā bhavyeyāthā”ti ekenevākārena vuttamattham tīhi ākārehi dassento āyasmā sārīputto etadavoca – “idhāvuso, satthu pavivittassa viharato... pe... ettāvatā kho, āvuso, satthu pavivittassa viharato sāvakā vivekam nānusikkhantī”ti.

Ettāvatā yañca bhagavā āmisadāyādapaṭipadam garahanto “tumhepi tena ādiyā bhavyeyāthā”ti āha, yañca attanā puccham pucchi “kittāvatā nu kho...pe... nānusikkhantī”ti, tassa vitthārato attho suvibhatto hoti. So ca kho bhagavato ādiyabhāvaṃ anāmasitvāva. Bhagavatoveva hi yuttam sāvake anuggaṇhantassa “ahampi tena ādiyō bhavissāmī”ti vattum, na sāvakānam. Esa nayo sukkapakkhepi, ayam tāvettha anusandhikkamayojanā.

Ayam panatthavaṇṇanā **idhāti** imasmim sāsane, **satthu pavivittassāti** satthuno tīhi vivekehi accantapavivittassa. **Vivekam nānusikkhantīti** kāyavivekam nānusikkhanti, na paripūrentīti vuttam hoti. Yadi pana tividham vivekam sandhāya vadeyya, pucchāya aviseso siyā. Byākaraṇapakkho hi ayam. Tasmā iminā padena kāyavivekam, “yesañca dhammāna”nti ādinā cittavivekam, “bāhulikā”ti ādinā upadhivivekañca dassetīti evamettha saṅkhepato attho veditabbo.

Yesañca dhammānanti lobhādayo sandhāyāha, ye parato “tatrāvuso lobho ca pāpako”ti ādinā nayena vakkhati. **Nappajahantīti** na pariccajanti, cittavivekam na paripūrentīti vuttam hoti. **Bāhulikāti** cīvarādibāhullāya paṭipannā. Sāsanam sithilam gaṇhantīti **sāthalikā. Okkamane pubbaṅgamāti** ettha **okkamanam** vuccanti avagamanatṭhena pañca nīvaraṇāni, tena pañcanīvaraṇapubbaṅgamāti vuttam hoti. **Paviveketi** upadhiviveke nibbāne. **Nikkhattadhurāti** oropitadhurā, tadadhigamāya ārambhampi akurumānāti, ettāvatā upadhivivekam na paripūrentīti vuttam hoti.

Ettāvatā aniyameneva vatvā idāni desanam niyamento “tatrāvuso”ti ādimāha. Kasmā? Sāvakā “tīhi ṭhānehī”ti evañhi aniyamtvāva vuccamāne “kampī maññe bhaṇati, na amhe”ti udāsīnāpi honti. “Therā navā majjhīmā”ti evam pana niyamtvā vuccamāne amhe bhaṇatīti ādaram karonti. Yathā raññā “amaccehi

nagaravīthiyo sodhetabbā”ti vuttepi “kena nu kho sodhetabbā”ti maññamānā na sodhenti, attano attano gharadvāraṃ sodhetabbanti pana bheriyā nikkhantāya sabbe muhuttana sodhenti ca alaṅkaronti ca, evaṃsampaḍamidaṃ veditabbam.

Tattha **tatrāti** tesu sāvakesu. **Therāti** dasavasse upādāya vuccanti. **Tīhi ṭhānehīti** tīhi kāraṇehi. Ayañhi ṭhānasaddo issariyaṭṭhitikhaṇakāraṇesu dissati. “Kiṃ paṇāyasmā devānamindo kammaṃ katvā imaṃ ṭhānaṃ patto”tiādīsu hi issariye dissati. “Ṭhānakusalo hoti akkhaṇavedhī”tiādīsu ṭhitiyaṃ. “Ṭhānasovetaṃ tathāgataṃ paṭibhātī”tiādīsu (ma. ni. 2.87) khaṇe. “Ṭhānañca ṭhānato aṭṭhānañca aṭṭhānato”tiādīsu (vibha. 809; ma. ni. 1.148) kāraṇe. Idha pana kāraṇeyeva. Kāraṇañhi yasmā tattha phalaṃ tiṭṭhati tadāyattavuttibhāvena, tasmā ṭhānanti vuccati.

Iminā paṭhamena ṭhānena therā bhikkhū gārayhāti ettha **gārayhāti** garahitabbā. **Therā** nāma samānā araññavanapatthāni pantāni senāsanāni na upenti, gāmantasenāsanam na muñcanti, saṅgaṇikārāmatam vaḍḍhentā viharanti, kāyavivekampi na paripūrenti, navamajjhimakāle kīdisā ahesunti evaṃ ninditabbā honti, imaṃ nindaṃ āvuso labhantīti dasseti. **Dutiyena ṭhānenāti** etthāpi ime nāma āvuso therāpi samānā yesaṃ dhammānaṃ sathā pahānamāha, te lobhādiddhamme na jahanti, accharāsaṅghātamattampi ekamantaṃ nisīditvā cittaḥaggataṃ na labhanti, navamajjhimakāle kīdisā ahesunti evaṃ ninditabbā honti, imaṃ nindaṃ āvuso labhantīti dasseti evaṃ yojanā kātabbā. **Tatiyena ṭhānenāti** etthāpi ime nāmāvuso, therāpi samānā itarītarena na yāpenti, cīvarapattasenāsanapūtikāyamaṇḍanānuyogamanuyuttā viharanti upadhivivekam apūrayamānā, navamajjhimakāle kīdisā ahesunti evaṃ ninditabbā honti, imaṃ nindaṃ, āvuso, labhantīti dasseti evaṃ yojanā veditabbā. Esa nayo majjhimanavavāresu.

Ayaṃ pana viseso. **Majjhimāti** pañcavasse upādāya yāva nava vassā vuccanti. **Navāti** unapañcavassā vuccanti. Yathā ca tattha navamajjhimakāle kīdisā ahesunti vuttaṃ, evamidha navakāle kīdisā ahesuṃ, therakāle kīdisā bhavissanti, majjhimatherakāle kīdisā bhavissantīti vatvā yojetabbam.

32. Imasmiñca kaṇhapakkhe vuttapaccanīkanayena sukkapakkhe attho veditabbo. Ayaṃ panettha saṅkhepo. Ime vata therāpi samānā yojanaparamparāya araññavanapatthāni pantāni senāsanāni sevanti, gāmantasenāsanam upagantaṃ yuttakālepi na upagacchanti, evaṃ jīṇṇasarīrāpi āradhaviyā paccayadāyakanam pasādam janenti, navamajjhimakāle kīdisā ahesunti iminā paṭhamena ṭhānena therā pāsamsā bhavanti, pasamsaṃ labhanti. Lobhādayo pahāya cittavivekam pūrenti, ayampi mahāthero saddhivihārikaantevāsikaparivārito hutvā nisīdituṃ yuttakālepi ṭīsepi vaye vattamāne bhattakiccaṃ katvā pavīṭṭho sāyaṃ nikkhamati, sāyaṃ pavīṭṭho pāto nikkhamati, kaṣiṇaparikkammaṃ karoti, samāpattiyo nibbatteti, maggaphalāni adhigacchati, sabbathāpi cittavivekam pūretīti iminā dutiyena ṭhānena therā bhikkhū pāsamsā bhavanti, pasamsaṃ labhanti. Yasmim kāle therassa paṭṭadukūlakoseyyādīni sukhasamphassāni lahucīvarādīni yuttāni, tasmimpi nāma kāle ayaṃ mahāthero paṃsukūlāni dhāreti, asīthilaṃ sāsanaṃ gahetvā vigatanīvaraṇo phalasaṃpattiṃ appetvā upadhivivekam paripūrayamāno viharati, navamajjhimakāle kīdiso ahoṣīti iminā tatiyena ṭhānena therā pāsamsā bhavanti, pasamsaṃ labhantīti. Esa nayo majjhimanavavāresu.

33. Tatrāvusoti ko anusandhi, evaṃ navahākārehi āmisadāyādapaṭipadaṃ garahanto, navahi dhammadāyādapaṭipadaṃ thomento, aṭṭhārasahākārehi desanaṃ niṭṭhāpetvā, ye te “yesaṃca dhammānaṃ sathā pahānamāha, te ca dhamme na pajahantī”ti evaṃ pahātābbadhammā vuttā. Te sarūpato “ime te”ti dassetumidaṃ “tatrāvuso, lobho cā”tiādīmāha, ayaṃ anusandhi.

Apica heṭṭhā pariyāyeneva dhammo kathito. Āmisaṃ pana pariyāyenapi nipariyāyenapi kathitaṃ. Idāni nipariyāyadhammaṃ lokuttaramaggaṃ kathetumidaṃāha. Ayaṃ pettha anusandhi.

Tattha **tatrāti** atītadesanānidassanaṃ, “sattu pavivittassa viharato sāvakā vivekam nānusikkhantī”tiādīnā nayena vuttadesanāyanti vuttaṃ hoti. **Lobho ca pāpako, doso ca pāpakoti** ime dve dhammā pāpakā lāmakā, ime pahātābbāti dasseti. Tattha lubbhanalakkhaṇo **lobho**. Dussanalakkhaṇo **doso**. Tesu lobho āmisadāyādassa paccayānaṃ lābhe hoti, doso alābhe. Lobhena aladdham pattheti, dosena alabhanto vighātavā hoti. Lobho ca deyyadhamme hoti, doso adāyake vā amanuññādāyake vā. Lobhena navataṇhāmūlake dhamme paripūreti, dosena pañca macchariyāni.

Idāni tesam pahānūpāyaṃ dassento **lobhassa ca pahānāyāti**ādīmāha. Tassattho, tassa pana pāpakassa lobhassa ca dosassa ca pahānāya. **Atthi majjhimā paṭipadāti** maggaṃ sandhāya idaṃ vuttaṃ. Maggo hi lobho eko anto, doso eko antoti ete dve ante na upeti, na upagacchati, vimutto etehi antehi, tasmā “majjhimā paṭipadā”ti vuccati. Etesam majjhe bhavattā “**majjhimā, paṭipajjitabbato ca paṭipadāti**. Tathā kāmasukhallikānuyogo eko anto, attakilamathānuyogo eko anto, sassataṃ eko anto, ucchedo eko antoti purimanayeneva vitthāretabbaṃ.

Cakkhukaraṇītiādīhi pana tameva paṭipadaṃ thometi. Sā hi saccānaṃ dassanāya saṃvattati dassanapariṇāyakaṭṭhenāti **cakkhukaraṇī**. Saccānaṃ nāṇāya saṃvattati viditakaraṇaṭṭhenāti **nāṇakaraṇī**. Rāgādīnaṇca vūpasamanato **upasaṃyāya saṃvattati**. Catunnampi saccānaṃ abhiññeyyabhāvadassanato **abhiññāya saṃvattati**. **Sambodhoti** maggo, tassathāya saṃvattanato **sambodhāya saṃvattati**. Maggoyeva hi maggatthāya saṃvattati maggena kātabbakiccakaraṇato. **Nibbānaṃ** nāma appaccayaṃ tassa pana sacchikiriyāya paccakkhakkammāya saṃvattanato **nibbānāya saṃvattatīti** vuccati. Ayamettha sāro. Ito aññathā vaṇṇanā papañcā.

Idāni taṃ majjhimaṃ paṭipadaṃ sarūpato dassetukāmo “katamā ca sā”ti pucchitvā “ayamevā”tiādīnā nayena vissajjeti.

Tattha **ayamevāti** avadhāraṇavacanaṃ, aññamaggappaṭisedhanatthaṃ, buddhapacceka buddhabuddhasāvakaṇaṃ sādharmaṇabhāvadassanatthaṇca. Vuttañcetaṃ “eseva maggo natthañño dassanassa visuddhiyā”ti (dha. pa. 274). Svāyaṃ kilesānaṃ ārakattāpi **ariyo**. Aripahānāya saṃvattatītipi ariyena desitotipi ariyabhāvappaṭilābhāya saṃvattatītipi ariyo. Aṭṭhahi aṅgehi upetattā **aṭṭhaṅgiko**, na ca aṅgavinimutto pañcaṅgikatūriyādīni viya. Kilese mārento gacchati, maggati vā nibbānaṃ, maggīyati vā nibbānatthikehi, gammati vā tehi paṭipajjīyatīti **maggo**. **Seyyathidanti** nipāto, tassa katamo so iti ceti attho, katamāni vā tāni aṭṭhaṅgānīti. Ekamekañhi aṅgaṃ maggoyeva. Yathāha “sammādiṭṭhi maggo ceva hetu cā”ti (dha. sa. 1039). Porāṇāpi bhaṇanti – “dassanamaggo sammādiṭṭhi, abhiniropanamaggo sammāsaṅkappo...pe... avikkhepamaggo sammāsamādhi”ti.

Sammādiṭṭhādīsu cetesu sammā dassanalakkhaṇā **sammādiṭṭhi**. Sammā abhiniropanalakkhaṇo **sammāsaṅkappo**. Sammā pariggahalakkhaṇā **sammāvācā**. Sammā samuṭṭhānalakkhaṇo **sammākammanto**. Sammā vodānalakkhaṇo **sammāājīvo**. Sammā paggahalakkhaṇo **sammāvāyāmo**. Sammā upaṭṭhānalakkhaṇā **sammāsati**. Sammā samādhānalakkhaṇo **sammāsamādhi**. Nibbānampi nesaṃ sammā passatīti **sammādiṭṭhīti** eteneva nayena vedītabbaṃ.

Tattha sammādiṭṭhi uppajjamānā micchādiṭṭhiṃ tappaccanīyakilese ca avijjaṇca pajahati, nibbānaṇca ārammaṇaṃ karoti, sampayuttadhamme ca passati, te ca kho asammohato, no ārammaṇato, tasmā “sammādiṭṭhi”ti vuccati.

Sammāsaṅkappo micchāsaṅkappaṃ tappaccanīyakilese ca pajahati, nibbānaṇca ārammaṇaṃ karoti, sampayuttadhamme ca sammā abhiniropeti, tasmā “sammāsaṅkappo”ti vuccati.

Sammāvācā micchāvācaṃ tappaccanīyakilese ca pajahati, nibbānaṇca ārammaṇaṃ karoti, sampayuttadhamme ca sammā pariggaṇhāti, tasmā “sammāvācā”ti vuccati.

Sammākammanto micchākammantaṃ tappaccanīyakilese ca pajahati, nibbānaṇca ārammaṇaṃ karoti, sampayuttadhamme ca sammā samuṭṭhāpeti, tasmā “sammākammanto”ti vuccati.

Sammāājīvo micchāājīvaṃ tappaccanīyakilese ca pajahati, nibbānaṇca ārammaṇaṃ karoti, sampayuttadhamme ca sammā vodāpeti, tasmā “sammāājīvo”ti vuccati.

Sammāvāyāmo micchāvāyāmaṃ tappaccanīyakilese ca kosajjaṇca pajahati, nibbānaṇca ārammaṇaṃ karoti, sampayuttadhamme ca sammā paggaṇhāti, tasmā “sammāvāyāmo”ti vuccati.

Sammāsati micchāsatiṃ tappaccanīyakilese ca pajahati, nibbānaṇca ārammaṇaṃ karoti,

sampayuttadhamme ca sammā upaṭṭhāpeti, tasmā ‘‘sammāsati’’ti vuccati.

Sammāsamādhi micchāsamādhiṃ tappaccanīyakilese ca uddhaccañca pajahati, nibbānañca ārammaṇaṃ karoti, sampayuttadhamme ca sammā samādhiyati, tasmā ‘‘sammāsamādhi’’ti vuccati.

Idāni **ayaṃ kho sā, āvusoti** tameva paṭipadaṃ nigamento āha. Tassattho, yvāyaṃ cattāropi lokuttaramagge ekato katvā kathito ‘‘aṭṭhaṅgiko maggo’’, ayaṃ kho sā, āvuso...pe... nibbānāya saṃvattatīti.

Evaṃ pahātabbadhammesu lobhadose tappahānupāyañca dassetvā idāni aññepi pahātabbadhamme tesam pahānupāyañca dassento **tatrāvuso, kodho cāti**ādīmāha. Tattha kujjhanalakkhaṇo **kodho**, caṇḍikkalakkhaṇo vā, āghātakaraṇaraso, dussanapaccupaṭṭhāno. Upanandhanalakkhaṇo **upanāho**, vera appaṭinissajjanaraso, kodhānupabandhabhāvapaccupaṭṭhāno. Vuttañcetam – ‘‘pubbakāle kodho, aparakāle upanāho’’tiādi (vibha. 891).

Paraguṇamakhanalakkhaṇo **makkho**, tesam vināsanaraso, tadavacchādanapaccupaṭṭhāno. Yugaggāhalakkhaṇo **paḷāso**, paraguṇehi attano guṇānaṃ samīkaraṇaraso, paresam guṇappamāṇena upaṭṭhānapaccupaṭṭhāno.

Parasampattikhīyanalakkhaṇā **issā**, tassā akkhamanalakkhaṇā vā, tattha anabhiratirasā, tato vimukhabhāvapaccupaṭṭhānā. Attano sampattinigūhanalakkhaṇaṃ **maccheram**, attano sampattiyā parehi sādharmaṇabhāvaasukhāyanarasam, saṅkocanapaccupaṭṭhānam.

Katapāpapaṭicchādanalakkhaṇā **māyā**, tassa nigūhanarasā, tadāvaraṇapaccupaṭṭhānā. Attano avijjamānaguṇapakāsanalakkhaṇaṃ **sātheyyam**, tesam samudāharaṇarasam, sarīrākārehipi tesam vibhūtakaraṇapaccupaṭṭhānam.

Cittassa uddhumātabhāvalakkhaṇo **thambho**, appatissayavuttiraso, amaddavatāpaccupaṭṭhāno. Karaṇuttariyalakkhaṇo **sārambho**, vipaccanīkatāraso, agāravapaccupaṭṭhāno.

Uṇṇatilakkhaṇo **māno**, ahaṅkāraraso, uddhumātabhāvapaccupaṭṭhāno. Abbhūṇṇatilakkhaṇo **atimāno**, ativiya ahaṅkāraraso. Accuddhumātabhāvapaccupaṭṭhāno.

Mattabhāvalakkhaṇo **mado**, madaggāhaṇaraso, ummādapaccupaṭṭhāno. Pañcasu kāmaguṇesu cittavossaggalakkhaṇo **pamādo**, vossaggānuppadānaraso, sativippavāsapaccupaṭṭhānoti evaṃ imesaṃ dhammānaṃ lakkhaṇādīni veditabbāni. Ayamettha saṅkhepo, vitthāro pana ‘‘tattha katamo kodho’’tiādinā **vibhaṅge** (vibha. 891) vuttanayeneva veditabbo.

Visesato cettha āmisadāyādo attanā alabhanto aññassa lābhino kujjhāti, tassa sakiṃ uppanno kodho **kodhoyeva**, tatuttari **upanāho**. So evaṃ kuddho upanayhanto ca santepi aññassa lābhino guṇe makkheti, ahampi tādīsoti ca yugaggāhaṃ gaṇhāti, ayamassa makkho ca paḷāso ca, evaṃ makkhī paḷāsī tassa lābhasakkārādīsū kiṃ imassa imināti issati padussati, ayamassa **issā**. Sace panassa kāci sampatti hoti, tassā tena sādharmaṇabhāvaṃ na sahati, idamassa **maccheram**. Lābhahetu kho pana attano santepi dose paṭicchādeti, ayamassa **māyā**. Asantepi guṇe pakāseti. Idamassa **sātheyyam**. So evaṃ paṭipanno sace yathādhippāyaṃ lābham labhati, tena thaddho hoti amuducitto, nayidaṃ evaṃ kātabbanti ovadituṃ asakkuṇeyyo, ayamassa **thambho**. Sace pana naṃ koci kiñci vadati ‘‘nayidaṃ evaṃ kātabba’’nti, tena sāraddhacitto hoti bhākuṭīkamukho ‘‘ko me tva’’nti pasayha bhāṇī, ayamassa **sārambho**. Tato thambhena ‘‘ahameva seyyo’’ti attānaṃ maññanto mānī hoti. Sārambhena ‘‘ke ime’’ti pare atimaññanto atimānī, ayamassa **māno** ca **atimāno** ca. So tehi mānātimānehi jātimadādiānekarūpaṃ madaṃ janeti. Matto samāno kāmaguṇādibhedesu vatthūsu pamajjati, ayamassa **mado** ca **pamādo** cāti.

Evaṃ āmisadāyādo aparimutto hoti imehi pāpakehi dhammehi aññehi ca evarūpehi. Evaṃ tāvettha pahātabbadhammā veditabbā. Pahānupāyo pāṭhato ca atthato ca sabbattha nibbisesoyeva.

Ñāṇaparicayaṇāvattham panettha ayaṃ bhedo ca kamo ca bhāvanānayo ca veditabbo. Tattha **bhedo**

tāva, ayañhi majjhimā paṭipadā kadāci ariyo aṭṭhaṅgiko maggo hoti, kadāci sattaṅgiko. Ayañhi lokuttarapaṭhamajjhānavasena uppajjamāno aṭṭhaṅgiko maggo hoti, avasesajjhānavasena sattaṅgiko. Ukkatṭhaniddesato panidha aṭṭhaṅgikoti vutto. Ito parañhi maggaṅgaṃ natthi. Evaṃ tāvettha bhedo veditabbo.

Yasmā pana sabbakusalānaṃ sammādiṭṭhi seṭṭhā, yathāha “paññā hi seṭṭhā kusalā vadantī”ti (jā. 2.17.81). Kusalavāre ca pubbaṅgamā, yathāha “kathañca, bhikkhave, sammādiṭṭhi pubbaṅgamā hoti, sammādiṭṭhiṃ sammādiṭṭhīti pajānāti, micchādiṭṭhiṃ micchādiṭṭhīti pajānātī”ti (ma. ni. 3.136) vitthāro. Yathā cāha “vijjā ca kho, bhikkhave, pubbaṅgamā kusalānaṃ dhammānaṃ samāpattiyā”ti. Tappabhavābhiniḥḍattāni sesaṅgāni, yathāha “sammādiṭṭhissa sammāsaṅkappo pahoti...pe... sammāsatissa sammāsamādhi pahoti”ti (ma. ni. 3.141). Tasmā iminā kamena etāni aṅgāni vuttānti evamettha **kamo** veditabbo.

Bhāvanāyoti koci samathapubbaṅgamaṃ vipassanaṃ bhāveti, koci vipassanāpubbaṅgamaṃ samathaṃ. Kathaṃ? Idhekacco paṭhamaṃ upacārasamādhiṃ vā appanāsamādhiṃ vā uppādeti, ayaṃ samatho; so tañca taṃsampayutte ca dhamme aniccādīhi vipassati, ayaṃ vipassanā. Iti paṭhamaṃ samatho, pacchā vipassanā. Tena vuccati “samathapubbaṅgamaṃ vipassanaṃ bhāveti”ti. Tassa samathapubbaṅgamaṃ vipassanaṃ bhāvayato maggo sañjāyati, so taṃ maggaṃ āsevati bhāveti bahulīkaroti, tassa taṃ maggaṃ āsevato bhāvayato bahulīkaroto saṃyojanāni pahīyanti, anusayā byantīhonti, evaṃ samathapubbaṅgamaṃ vipassanaṃ bhāveti.

Idha panekacco vuttappakāraṃ samathaṃ anuppādetvāva pañcupādānakkhandhe aniccādīhi vipassati, ayaṃ vipassanā. Tassa vipassanāpāripūriyā tattha jātānaṃ dhammānaṃ vossaggārammaṇato uppajjati cittassa ekaggatā, ayaṃ samatho. Iti paṭhamaṃ vipassanā pacchā samatho. Tena vuccati “vipassanāpubbaṅgamaṃ samathaṃ bhāveti”ti. Tassa vipassanāpubbaṅgamaṃ samathaṃ bhāvayato maggo sañjāyati, so taṃ maggaṃ āsevati...pe... bahulīkaroti, tassa taṃ maggaṃ āsevato...pe... anusayā byantīhonti (a. ni. 4.170; paṭi. ma. 2.1), evaṃ vipassanāpubbaṅgamaṃ samathaṃ bhāveti.

Samathapubbaṅgamaṃ pana vipassanaṃ bhāvayatopi vipassanāpubbaṅgamaṃ samathaṃ bhāvayatopi lokuttaramaggakkhaṇe samathavipassanā yuganaddhāva honti. Evamettha bhāvanāyoti veditabboti.

Papañcasūdaniyā majjhimanikāyaṭṭhakathāya

Dhammadāyādasuttavaṇṇanā niṭṭhitā.

4. Bhayabheravasuttavaṇṇanā

34. Evaṃ me sutanti bhayabheravasuttaṃ. Tatrāyaṃ apubbapadavaṇṇanā – **athāti** avicchedanatthe nipāto. **Khoti** avadhāraṇatthe, bhagavato sāvatthiyaṃ vihāre avicchinneyevāti vuttaṃ hoti. **Jāṇussoṇīti** netam tassa mātipitūhi katanāmaṃ, apica kho ṭhānantarapaṭilābhaddham. Jāṇussoṇīṭṭhānaṃ kira nāmetam purohitatṭhānaṃ, taṃ tassa raññā dinnam, tasmā “jāṇussoṇī”ti vuccati. Brahmaṃ aṇatīti **brāhmaṇo**, mante sajjhāyati attho. Idameva hi jātibrahmaṇānaṃ niruttivacanaṃ. Ariyā pana bāhitapāpattā **brāhmaṇāti** vuccanti.

Yena bhagavā tenupasaṅkamīti yenāti bhummatthe karaṇavacanaṃ, tasmā yattha bhagavā, tattha upasaṅkamīti evamettha attho daṭṭhabbo. Yena vā karaṇena bhagavā devamanussehi upasaṅkamitabbo, tena karaṇena upasaṅkamīti evamettha attho daṭṭhabbo. Kena ca karaṇena bhagavā upasaṅkamitabbo? Nānappakāraguṇavisesādhigamādhippāyena, sādupalūpabhogādhippāyena dijagaṇehi niccaphalitamahārukkho viya.

Upasaṅkamīti ca gatoti vuttaṃ hoti. **Upasaṅkamitvāti** upasaṅkamanapariyosānadīpanam. Atha vā evaṃ gato tato āsannataraṃ ṭhānaṃ bhagavato samīpasaṅkhātaṃ gantvātipi vuttaṃ hoti. **Bhagavatā saddhiṃ sammodīti** yathā khamanīyādīni pucchanto bhagavā tena, evaṃ sopi bhagavatā saddhiṃ samappavattamodo ahoṣi, sītodakaṃ viya uṇhodakena sammoditaṃ ekībhāvaṃ agamāsi. Yāya ca “kacci te, bho gotama, khamanīyaṃ, kacci yāpanīyaṃ, kacci bhoto gotamassa gotamasāvakaṇaṇa appābādham appātaṅkaṃ lahuṭṭhānaṃ balaṃ phāsuvihāro”tiādīkāya kathāya sammodi, taṃ pītipāmojjasaṅkhātasammodajananato sammoditum yuttabhāvato ca **sammodanīyaṃ**, atthabyañjanamadhuratāya sucirampi kālaṃ sāretum nirantaram pavattetum araharūpato saritabbabhāvato ca **sārānīyaṃ**. Suyyamānasukhato ca sammodanīyaṃ,

anussariyamānasukhato ca sāraṇīyaṃ. Tathā byañjanaparisuddhatāya sammodanīyaṃ, atthaparisuddhatāya sāraṇīyanti evaṃ anekehi pariyāyehi sammodanīyaṃ kathaṃ sāraṇīyaṃ vītisāretvā pariyosāpetvā niṭṭhāpetvā yenatthena āgato, taṃ pucchitukāmo ekamantaṃ nisīdi.

Ekamantanti bhāvanapuṃsakaniddeso, “visamaṃ candimasūriyā parivattanti” tiādīsu (a. ni. 4.70) viya. Tasmā yathā nisinno ekamantaṃ nisinno hoti, tathā nisīdīti evamettha attho daṭṭhabbo. Bhummatthe vā etaṃ upayogavacanaṃ. **Nisīdīti** upāvisi. Paṇḍitā hi purisā garuṭṭhāniyaṃ upasaṅkamitvā āsanakusalatāya ekamantaṃ nisīdanti, ayañca nesaṃ aññataro, tasmā ekamantaṃ nisīdi.

Kathaṃ nisinno pana ekamantaṃ nisinno hotīti. Cha nisajjadose vajjetvā. Seyyathidaṃ, atidūraṃ accāsannaṃ uparivātaṃ unnatapadesaṃ atisammukhaṃ atipacchāti. Atidūre nisinno hi sace kathetukāmo hoti, uccāsaddena kathetabbaṃ hoti. Accāsanne nisinno saṅghaṭṭanaṃ karoti. Uparivāte nisinno sarīragandhena bādhati. Unnatappadese nisinno agāraṃ pakāseti. Atisammukhā nisinno sace daṭṭhukāmo hoti, cakkhunā cakkhuṃ āhacca daṭṭhabbaṃ hoti. Atipacchā nisinno sace daṭṭhukāmo hoti, gīvaṃ pasāretvā daṭṭhabbaṃ hoti. Tasmā ayampi ete cha nisajjadose vajjetvā nisīdi, tena vuttaṃ “ekamantaṃ nisīdi” ti.

Yemeti ye ime. **Kulaputtāti** duvidhā kulaputtā jātikulaputtā ācārakulaputtā. Tattha “tena kho pana samayena raṭṭhapālo nāma kulaputto tasmimīyeva thullakoṭṭhike aggakulassa putto” ti (ma. ni. 2.294) evaṃ āgatā uccākulappasutā **jātikulaputtā** nāma. “Ye te kulaputtā saddhā agārasmā anagāriyaṃ pabbajitā” ti (ma. ni. 3.78) evaṃ āgatā pana yattha katthaci kule pasutāpi ācārasampannā **ācārakulaputtā** nāma. Idha pana dvīhipi kāraṇehi kulaputtāyeva.

Saddhāti saddhāya. **Agārasmāti** agārato. **Anagāriyanti** pabbajjaṃ bhikkhubhāvañca. Pabbajjāpi hi natthettha agāriyanti **anagāriyā**, agārassa hitaṃ kasigorakkhādikammamettha natthīti attho. Bhikkhupi natthetassa agāranti anagāro, anagārassa bhāvo anagāriyaṃ. **Pabbajitāti** upagatā, evaṃ sabbathāpi anagāriyasankhātāṃ pabbajjaṃ bhikkhubhāvaṃ vā upagatāti vuttaṃ hoti. **Pubbaṅgamoti** purato gāmī nāyako. **Bahukāro**ti hitakiriyaṃ bahupakāro. **Bhavaṃ tesam gotamo samādapetāti** te kulaputte bhavaṃ gotamo adhisīlādīni gāhetā sikkhāpetā. **Sā janatāti** so janasamūho. **Diṭṭhānugatiṃ āpajjati** dassanānugatiṃ paṭipajjati, yandiṭṭhiko bhavaṃ gotamo yaṃkhanṭiko yaṃruciko, tepi tandiṭṭhikā honti taṃkhanṭikā taṃrucikāti attho.

Kasmā panāyaṃ evamāhāti? Esa kira pubbe aneke kulaputte agāramajjhe vasante devaputte viya pañcahi kāmagaṇehi paricāriyamāne anto ca bahi ca susaṃvihitārakkhe disvā, te aparena samayena bhagavato madhurarasaṃ dhammadesanaṃ sutvā saddhāya gharā nikkhamma pabbajitvā ghāsacchādanaparamatāya santuṭṭhe āraññakesu senāsanesu kenaci arakkhiyamānepi anussākitāparisaṅkate haṭṭhapahaṭṭhe udaggudagge addasa, disvā ca imesaṃ kulaputtānaṃ “ayaṃ phāsuvihāro kaṃ nissāya uppanno” ti cintento “samaṇaṃ gotama” nti bhagavati pasādaṃ alattha. So taṃ pasādaṃ nivedetuṃ bhagavato santikaṃ āgato, tasmā evamāha.

Athassa bhagavā taṃ vacanaṃ sampaṭicchanto abbhānumodanto ca **evametaṃ brāhmaṇāti**ādīmāha. Vacanasampaṭicchānanānumodanattohoyeva hi ettha ayaṃ **evanti** nipāto. **Mamaṃ uddissāti** maṃ uddissa. **Saddhāti** saddhāyeva. Na iṇaṭṭhā na bhayaṭṭātiādīni sandhāyāha. Īdisānaṃyeva hi bhagavā pubbaṅgamo, na itaresaṃ. **Durabhisambhavāni hīti** sambhavituṃ dukkhāni dussahāni, na sakkā appesakkhehi ajjhogāhitunti vuttaṃ hoti. **Araññavanapatthānīti** araññāni ca vanapatthāni ca. Tattha kiñcāpi abhidhamme nipariyāyena, “nikkhamitvā bahi indakhilā sabbametaṃ arañña” nti vuttaṃ, tathāpi yantaṃ “pañcadhanusatikaṃ pacchima” nti araññikaṅganipphādakaṃ senāsaṇaṃ vuttaṃ, tadeva adhippetanti veditabbaṃ.

Vanapatthanti gāmantaṃ atikkamitvā manussānaṃ anupacāraṭṭhānaṃ, yattha na kasīyati na vapīyati. Vuttaṃ cetāṃ “vanapatthanti dūrānametaṃ senāsanānaṃ adhivacanaṃ, vanapatthanti vanasaṅḍānametaṃ senāsanānaṃ, vanapatthanti bhīṃsanakānametaṃ, vanapatthanti salomahaṃsānametaṃ, vanapatthanti pariyaṇānametaṃ, vanapatthanti na manussūpacārānametaṃ senāsanānaṃ adhivacana” nti. Ettha ca **pariyaṇānanti** imamekaṃ pariyāyaṃ ṭhapetvā sesapariyāyehi vanapatthāni veditabbāni. **Pantānīti** pariyaṇāni atidūrāni. **Dukkaraṃ pavivekanti** kāyavivekaṃ dukkaraṃ. **Durabhiramanti** abhiramituṃ na sukhaṃ. **Ekatteti** ekībhave. Kiṃ dasseti? Kāyaviveke katēpi tattha cittaṃ abhiramāpetuṃ dukkaraṃ. Dvayaṃdvayārāmo hi ayaṃ lokoti. Haranti **maññeti** haranti viya ghasanti viya. **Manoti** manāṃ. **Samādhim**

alabhamānassāti upacārasamādhiṃ vā appanāsamādhiṃ vā alabhantassa. Kiṃ dasseti? Īdisassa bhikkhuno tiṇapaṇṇamigādisaddehi vividhehi ca bhīṃsanakehi vanāni cittaṃ vikkhipanti maññeti, sabbaṃ brāhmaṇo saddhāpabbajitānaṃ kulaputtānaṃ araññavāse (vibha. 529) vimhito āha.

Kāyakammantavāraḥkathā

35. Athassa bhagavā purimanayeneva “evametaṃ brāhmaṇā” tiādīhi taṃ taṃ vacanaṃ sampaṭicchitvā abbhanumoditvā ca yasmā soḷasasu ṭhānesu ārammaṇapariggaharahitānaṃyeva tādisāni senāsanāni durabhisambhavāni, na tesu ārammaṇapariggāhayuttānaṃ, attanā ca bodhisatto samāno tādiso ahosi, tasmā attano tādisānaṃ senāsanānaṃ durabhisambhavataṃ dassetuṃ, **mayhampi khoti**ādīmāha.

Tattha **pubbeva sambodhāti** sambodhato pubbeva, ariyamaggappattito aparabhāgeyevāti vuttaṃ hoti. **Anabhisambuddhassāti** appaṭividdhacatusaccassa. **Bodhisattasseva satoti** bujjanakasattasseva sammāsambodhiṃ adhigantuṃ arahasattasseva sato, bodhiyā vā sattasseva laggasseva sato. Dīpankarassa hi bhagavato pādāmūle aṭṭhadhammasamodhānena abhinīhārasamiddhito pabhuṭi tathāgato bodhiyā satto laggo “pattabbā mayā esā” ti tadadhigamāya parakkamaṃ amuñcantoyeva āgato, tasmā **bodhisattoti** vuccati. **Tassa mayhanti** tassa evaṃ bodhisattasseva sato mayhaṃ. **Ye kho keci samaṇā vā brāhmaṇā vāti** ye keci pabbajjūpagatā vā bhovādīno vā.

Aparisuddhakāyakammantāti aparisuddhena pāṇātipātādīnā kāyakammantena samannāgatā. **Aparisuddhakāyakammantasandosahetūti** aparisuddhassa kāyakammantasañkhātassa attano dosassa hetu, aparisuddhakāyakammantakāraṇāti vuttaṃ hoti. **Haveti** ekaṃsavacane nipāto. **Akusalanti** sāvajjamaṃ akkhemaṇca. **Bhayabheravanti** bhayaṇca bheravaṇca. Cīttutrāsassa ca bhayānakārammaṇassa cetamaṃ adhivacanaṃ. Tatra **bhayaṃ** sāvajjaṭṭhena akusalaṃ, **bheravaṃ** akkhematṭhenaṇāti vedītabbaṃ. **Avhāyantīti** pakkosanti. Kathaṃ? Te hi pāṇātipātādīni katvā “mayamaṃ ayuttamakamaṃhā, sace no te jāneyyumaṃ, yesamaṃ aparajjhimaṃhā, idāni anubandhitvā anayabyasanaṃ āpādeyyu” nti araṇṇaṃ pavisitvā gacchantare vā gumbantare vā nisīdanti. Te “appamattakampi tiṇasaddamaṃ vā paṇṇasaddamaṃ vā sutvā, idānimhā naṭṭhā” ti tasanti vittasanti, āgantvā parehi parivāritā viya baddhā vadhitā viya ca honti. Evaṃ taṃ bhayabheravaṃ attani samāropanaṭṭhena avhāyanti pakkosanti.

Na kho panāhaṃ...pe... paṭisevāmīti ahaṃ kho pana aparisuddhakāyakammanto hutvā araṇṇavanapatthāni pantāni senāsanāni na paṭisevāmi. **Ye hi voti** ettha **voti** nipātamattaṃ. **Ariyā** vuccanti buddhā ca buddhasāvakaṃ ca. **Parisuddhakāyakammantāti** īdisā hutvā. **Tesamahaṃ aṇṇataroti** tesamaṃ ahampi eko aṇṇataro. Bodhisatto hi gahaṭṭhopi pabbajitopi parisuddhakāyakammantova hoti. **Bhiyyoti** atirekatthe nipāto. **Pallomanti** pannalomataṃ, khemaṃ sotthibhāvanti attho. **Āpādinti** āpajjimaṃ, atirekaṃ sotthibhāvamaṃ atirekena vā sotthibhāvamaṃpajjinti vuttaṃ hoti. **Araññe vihārayāti** araṇṇe vihāratthāya.

Kāyakammantavāraḥkathā niṭṭhitā.

Vacīkammantavārādivaṇṇanā

36. Esa nayo sabbattha. Ayaṃ pana viseso, vacīkammantavāre tāva **aparisuddhavacīkammantāti** aparisuddhena musāvādādīnā vacīkammantena samannāgatā. Te kathaṃ bhayabheravaṃ avhāyanti? Te musāvādena parassa atthaṃ bhañjivā, piṣuṇavācāya mittabhedamaṃ katvā pharusavācāya paresamaṃ parisamajjhe mammāni tuditvā niratthakavācāya parasattānaṃ kammante nāsetvā “mayamaṃ ayuttamakamaṃhā, sace no te jāneyyumaṃ, yesamaṃ aparajjhimaṃhā, idāni anubandhitvā anayabyasanaṃ pāpeyyu” nti araṇṇaṃ pavisitvā gacchantare vā gumbantare vā nisīdanti. Te “appamattakampi tiṇasaddamaṃ vā paṇṇasaddamaṃ vā sutvā idānimhā naṭṭhā” ti tasanti vittasanti āgantvā parehi parivāritā viya baddhā vadhitā viya ca honti. Evaṃ taṃ bhayabheravaṃ attani samāropanaṭṭhena avhāyanti, pakkosanti.

Manokammantavāre **aparisuddhamanokammantāti** aparisuddhena abhijjhādinā manokammantena samannāgatā. Te kathaṃ bhayabheravaṃ avhāyanti? Te paresamaṃ rakkhitaḡopitesu bhaṇḡesu abhijjhāvisamalobhaṃ uppādetvā parassa kujjhivā parasatte micchādassanaṃ gāhāpetvā mayamaṃ ayuttamakamaṃhā...pe... attani samāropanaṭṭhena avhāyanti pakkosanti.

Ājīvavāre **aparissuddhājīvāti** aparissuddhena vejjakammadūtakammavaḍḍhipayogādinā ekavīsatiānesanabhedena ājīvena samannāgatā. Te kathaṃ bhayabheravaṃ avhāyanti? Te evaṃ jīvikam kappetvā suṇanti – “sāsanasodhakā kira tepīṭakā bhikkhū sāsanam sodhetum nikkhantā, ajja vā sve vā idhāgamissanti”’ti araṇṇam pavisitvā gacchantare vā...pe...tasanti vittasanti. Te hi āgantvā parivāretvā gahitā viya odātavatthanivāsītā viya ca hontīti. Sesam tādīsameva.

37. Ito paraṃ **abhijjhālūti**ādīsu kiñcāpi abhijjhāyāpādā manokammantena saṅgahitā tathāpi nīvaraṇavasena puna vuttāti vedītabbā. Tattha **abhijjhālūti** parabhaṇḍādiabhijjhāyanasīlā. **Kāmesu tibbasārāgātī** vatthukāmesu bahalakīlesarāgā, te kathaṃ bhayabheravaṃ avhāyanti? Te avavatthitārammaṇā hontī, tesam avavatthitārammaṇānaṃ araṇṇe viharantānaṃ divā diṭṭhaṃ rattim bhayabheravaṃ hutvā upaṭṭhātī – “te ākulacittā appamattakenapi tasanti vittasanti, rajjum vā lataṃ vā disvā sappasaññino hontī, khānum disvā yakkhasaññino, thalaṃ vā pabbataṃ vā disvā hatthisaññino sappādīhi anayabyasanaṃ āpādītā viya hontī”’ti. Sesam tādīsameva.

38. **Byāpannacittāti** pakatibhāvavijahanena vipannacittā. Kilesānugatañhi cittaṃ pakatibhāvaṃ vijahati, purāṇabhattabyañjanaṃ viya pūtikaṃ hotī. **Paduṭṭhamanasānkappāti** paduṭṭhacittasānkappā, abhadrakena paresam anattahajanakena cittasānkappena samannāgatātī vuttaṃ hotī. Te kathaṃ bhayabheravaṃ avhāyanti? Bhayabheravāvhāyanaṃ ito pabhutī abhijjhālūvare vuttanayeneva vedītabbā. Yattha pana viseso bhavissati, tattha vakkhāma. **Na kho panāhaṃ byāpannacittoti** ettha pana mettacitto ahaṃ hitacittoti dasseti, īdisā hi bodhisattā hontī. Evaṃ sabbattha vuttadosapaṭipakkhavasena bodhisattassa guṇā vaṇṇetabbā.

39. **Thinamidhāpariyuṭṭhitāti** cittagelaññabhūtena thinena sesanāmakāyagelaññabhūtena middhena ca pariyuṭṭhitā, abhibhūtā gahitātī vuttaṃ hotī. Te niddābahulā hontī.

40. **Uddhatātī** uddhaccapakatikā vipphandamānacittā, uddhaccena hi ekārammaṇe cittaṃ vipphandati dhajayaṭṭhiyaṃ vātena paṭākā viya. **Avūpasantacittāti** anibbutacittā, idha kukkucam gahetum vaṭṭati.

41. **Kaṅkhī vicikicchīti** ettha ekamevidam pañcamaṃ nīvaraṇam. Kiṃ nu kho idanti ārammaṇam kaṅkhanato kaṅkhā, idamevidanti nicchetum asamatthabhāvato vicikicchātī vuccatī, tena samannāgatā samaṇabrāhmaṇā “kaṅkhī vicikicchī”’ti vuttā.

42. **Attukkamaṣanakā paravambhīti** ye attānaṃ ukkaṃsenti ukkhipanti, ucce thāne ṭhapenti, parañca vambhenti garahanti nindanti, nīce thāne ṭhapenti, tesametam adhivacanaṃ. Te kathaṃ bhayabheravaṃ avhāyanti? Te parehi “asuko ca kira asuko ca attānaṃ ukkaṃsenti, amhe garahanti, dāse viya karontī, gaṇhatha ne”’ti anubaddhā palāyitvā araṇṇam pavisitvā gacchantare vā gumbantare vātī kāyakammantasadisam vitthāretabbā.

43. **Chambhīti** kāyathambhanalomahaṃsanakarena thambhena samannāgatā. **Bhīrukajātīkātī** bhīrukapakatikā, gāmadārakā viya bhayabahulā asūrā kātarātī vuttaṃ hotī.

44. **Lābhasakkārasilokanti** ettha labbhatīti **lābho**, catunnam paccayānametaṃ adhivacanaṃ. **Sakkāroti** sundarakāro, paccayā eva hi paṇītapañītā sundarasundarā ca abhisānkharitvā katā sakkārātī vuccanti. Yā ca parehi attano gāravakiriyaṃ pupphādīhi vā pūjā. **Silokoti** vaṇṇabhaṇanaṃ etaṃ, lābhañca sakkārañca silokañca **lābhasakkārasilokam**. **Nikāmayamānātī** patthayamānā. Bhayabheravāvhāyanaṃ abhijjhālūvārasadisameva. Tadatthadīpakaṃ panettha piyagāmikavatthum kathenti –

Eko kira piyagāmiko nāma bhikkhu samādinnaḍḍhutaṅgānaṃ bhikkhūnaṃ lābham disvā “ahampi dhutaṅgaṃ samādiyitvā lābham uppādemī”’ti cintetvā sosānikaṅgaṃ samādāya susāne vasati. Athekadivasam eko kammamutto jaraggavo divā gocare caritvā rattim tasmim susāne pupphagumbe sīsam katvā romanthayamāno aṭṭhāsī. Piyagāmiko rattim caṅkamaṇā nikkhanto tassa hanusaddam sutvā cintesi “addhā maṃ lābhagiddho esa susāne vasatīti ṇatvā devarājā vihetthetum āgato”’ti, so jaraggavassa purato añjalim paggahetvā “sappurisa devarāja ajja me ekarattim khama, sve paṭṭhāya na evam karissāmī”’ti namassamāno sabbarattim yācanto aṭṭhāsī. Tato sūriye uṭṭhite tam disvā kattarayattihīya paharitvā palāpesi “sabbarattim maṃ bhimsāpesi”’ti.

45. Kusītāti kosajjānugatā. **Hīnavīriyāti** hīnā vīriyena virahitā viyuttā, nibbīriyāti vuttam hoti. Tattha kusītā kāyikavīriyārambhavirahitā honti, hīnavīriyā cetasikavīriyārambhavirahitā. Te ārammaṇavavattānamattampi kātuṃ na sakkonti. Tesam avavattāthārammaṇānanti sabbam pubbasadisameva.

46. Muṭṭhassatīti naṭṭhassatī. **Asampajānāti** paññārahitā, imassa ca paṭipakkhe “upaṭṭhitassatīhamasmī”ti vacanato satibhājanīyamevetam. Paññā panettha satidubbalyadīpanattham vuttā. Duvidhā hi sati paññāsampayuttā paññāvippayuttā ca. Tattha paññāsampayuttā balavatī, vippayuttā dubbalā, tasmā yadāpi tesam sati hoti, tadāpi asampajānantā muṭṭhassatīyeva te, dubbalāya satiyā satikiccābhavatoti etamattham dīpetuṃ “asampajānā”ti vuttam. Te evam muṭṭhassatī asampajānā ārammaṇavavattānamattampi kātuṃ na sakkontīti sabbam pubbasadisameva.

47. Asamāhitāti upacārappanāsamādhivirahitā. **Vibbhantacittāti** ubbhantacittā. Samādhivirahena laddhokāsenā uddhaccena tesam samādhivirahānam cittaṃ nānārammaṇesu paribbhamati, vanamakkaṭo viya vanasākhāsu uddhaccena ekārammaṇe vipphandati. Pubbe vuttanayenena te evam asamāhitā vibbhantacittā ārammaṇavavattānamattampi kātuṃ na sakkontīti sabbam pubbasadisameva.

48. Duppaññāti nippaññānametaṃ adhivacanam. Paññā pana duṭṭhā nāma natthi. **Eḷamūgāti** elamukhā, kha-kārassa ga-kāro kato. Lālamukhāti vuttam hoti. Duppaññānañhi kathentānam lālā mukhato galati, lālā ca elāti vuccati. Yathāha “passelamūgaṃ uragaṃ dujjivha”nti. Tasmā te “eḷamūgā”ti vuccanti. “Elamukhā”tipi pāṭho. “Elamugā”ti keci paṭhanti, apare “elamukā”tipi, sabbattha “elamukhā”ti attho. Te katham bhayabheravaṃ avhāyanti? Te duppaññā eḷamūgā ārammaṇavavattānamattampi kātuṃ na sakkonti. Tesam avavattāthārammaṇānam araññe viharantānam divā diṭṭham rattim bhayabheravaṃ hutvā upaṭṭhāti “te ākulacittā appamattakenapi tasanti vittasanti, rajjuṃ vā lataṃ vā disvā sappasaññino honti, khāṇuṃ disvā yakkhasaññino, thalaṃ vā pabbataṃ vā disvā hatthisaññino sappādīhi anayavyasanaṃ āpādītā viya hontī”ti. Evam taṃ bhayabheravaṃ attani samāropanaṭṭhena avhāyanti pakkosanti. **Paññāsampannohamasmīti** ettha **paññāsampannoti** paññāya sampanno samannāgato, no ca kho vipassanāpaññāya, na maggapaññāya, apica kho pana imesu soḷasasu ṭhānesu ārammaṇavavattānapaññāyāti attho. Sesam sabbattha vuttanayamevāti.

Vacīkammantavārādivaṇṇanā niṭṭhitā.

Soḷasatṭhānārammaṇapariggaho niṭṭhito.

Bhayabheravasenaśānādivaṇṇanā

49. Tassa mayhanti ko anusandhi? Bodhisatto kira imāni soḷasārammaṇāni pariggaṇhanto ca bhayabheravaṃ adisvā bhayabheravaṃ nāma evarūpāsu rattīsu evarūpe senāsane ca paññāyati, handa naṃ tathāpi gavesissāmīti bhayabheravagavesanamakāsi, etamattham bhagavā idāni brāhmaṇassa dassento **tassa mayhanti**ādīmāha.

Tattha **yā tāti** ubhayametaṃ rattīnamyeva uddesaniddesavacanam. **Abhiññātāti** ettha **abhīti** lakkhaṇatthe upasaggo. Tasmā abhiññātāti candapāripūriyā candaparikkhayenāti evamādīhi lakkhaṇehi ñātāti veditabbā. **Abhilakkhitāti** ettha upasaggamattameva, tasmā abhilakkhitāti lakkhaṇīyā icceva attho, uposathasamādānadhammassavanapūjāsakkārādikaraṇattham lakkhetabbā sallakkhetabbā upalakkhetabbāti vuttam hoti.

Cātuddasīti pakkhassa paṭhamadivasato pabhuti catuddasannaṃ pūraṇī ekā ratti. Evam **pañcadasi aṭṭhamī** ca. **Pakkhassāti** sukkapakkhassa kaṇhapakkhassa ca. Etā tisso tisso katvā cha rattīyo, tasmā sabbattha pakkhavacanam yojetabbaṃ “pakkhassa cātuddasī pakkhassa pañcadasi pakkhassa aṭṭhamī”ti. Atha pañcamī kasmā na gahitāti? Asabbakālikattā. Buddhe kira bhagavati anuppannepi uppajjitvā aparinibbutepi pañcamī anabilakkhitāyeva, parinibbuta pana dhammasaṅgāhakattherā cintesuṃ “dhammassavanam cirena hotī”ti. Tato sammantivā pañcamīti dhammassavanadivasam ṭhapesuṃ, tato pabhuti sā abhilakkhitā jātā, evam asabbakālikattā ettha na gahitāti.

Tathārūpāsūti tathāvidhāsu. **Ārāmacetiyanīti** pupphārāmaphalārāmādayo ārāmā eva ārāmacetiyanī.

Cittīkātāṭṭhena hi **ceṭṭiyānī**ti vuccanti, pūjanīyaṭṭhenāti vuttaṃ hoti. **Vanacetiyānī**ti baliharaṇavanasaṅḍasubhagavanadevasālavanādīni vanāniyeva vanacetiyāni. **Rukkhacetiyaṇī**ti gāmanigamādidvāresu pūjanīyarukkhāyeva rukkhacetiyaṇī. Lokiyā hi dibbādhivatthāti vā maññamānā tesuyeva vā dibbasaññino hutvā āramavanarukkhe cittīkaronti, pūjenti, tena te sabbepe **ceṭṭiyānī**ti vuccanti. **Bhimsanakānī**ti bhayajanakāni, passatopi suṇatopi bhayaṃ janenti. **Salomahaṃsānī**ti saheva lomahaṃsena vattanti, pavisaṃsasseva lomahaṃsajananto. **Appeva nāma passeyyanti** api nāma taṃ bhayabheravaṃ passeyyameva. **Apparena samayenāti**, “etadahosi yaṃnūnāha”nti evaṃ cintitakālato paṭṭhāya aññena kālena.

Tattha ca me brāhmaṇa viharatoti tathārūpesu senāsanesu yaṃ yaṃ manussānaṃ āyācanaupahāraṇārahamaṃ yakkhaṭṭhānaṃ pupphadhūpamaṃsaruhiravasāmedapīhakaṃpapphāsasurāmerayādīhi okiṇṇakilinnadharaṇitalaṃ ekanipātaṃ viya yakkharakkhasapisācānaṃ, yaṃ divāpi passantānaṃ hadayaṃ maññe phalati, taṃ ṭhānaṃ sandhāyāha “tattha ca me, brāhmaṇa, viharato”ti. **Mago vā āgacchatī**ti siṅgāni vā khurāni vā koṭṭento gokaṇṇakhaggadīpivarāhādibhedo mago vā āgacchati, sabbacatuppadānañhi idha **magoti** nāmaṃ. Katthaci pana kāḷasiṅgālopi vuccati. Yathāha –

“Usabhasseva te khandho, sīhasseva vijambhitāṃ;
Magarāja namo tyatthu, api kiñci labhāmase”ti. (jā. 1.3.133);

Moro vā kaṭṭhaṃ pāteṭīti moro vā sukkhakaṭṭhaṃ rukkhato cāletvā pāteṭī. Moraggahaṇena ca idha sabbapakkhiggahaṇaṃ adhippetāṃ, tena yo koci pakkhīti vuttaṃ hoti. Atha vā moro vāti vā saddena añño vā koci pakkhīti. Esa nayo purime magaggahaṇepi. **Vāto vā paṇṇakasaṭṭhaṃ ereṭī**ti vāto vā paṇṇakacavaraṃ ghaṭṭeti. **Etaṃ nūna taṃ bhayabheravaṃ āgacchatī**ti yametaṃ āgacchati, taṃ bhayabheravaṃ nūnāti. Ito pabhuti ca ārammaṇameva bhayabheravanti veditabbaṃ. Parittassa ca adhimattassa ca bhayassa ārammaṇattā sukhārammaṇaṃ rūpaṃ sukhamiva. **Kiṃ nu kho ahaṃ aññadatthu bhayapaṭṭikaṅkhī viharāmī**ti ahaṃ kho kiṃ kāraṇaṃ ekaṃseneva bhayaṃ ākaṅkhamāno icchamāno hutvā viharāmi.

Yathābhūtaṃ yathābhūtassāti yena yena iriyāpathena bhūtassa bhavitassa sato vattamānassa samaṅgībhūtassa vā. **Meti** mama santike. **Tathābhūtaṃ tathābhūto vāti** tena teneva iriyāpathena bhūto bhavito santo vattamāno samaṅgībhūto vāti attho. **So kho ahaṃ...pe... paṭṭivinemī**ti bodhisattassa kira caṅkamantassa tasmīṃ magasiṅgakhurasaddādibhede bhayabheravārammaṇe āgate neva mahāsatto tiṭṭhati, na nisīdati na sayati, atha kho caṅkamantova parivīmaṃsanto parivicinanto bhayabheravaṃ na passati, magasiṅgakhurasaddādimattameva cetāṃ hoti, so taṃ ñatvā idaṃ nāmetaṃ, na bhayabheravanti tato tiṭṭhati vā nisīdati vā sayati vā. Etamatthaṃ dassento “so kho aha”ntiādimāha. Esa nayo sabbapeyyālesu. Ito parañca iriyāpathapaṭṭipāṭiyā avatvā āsannaṭṭipāṭiyā iriyāpathā vuttāti veditabbā, caṅkamantassa hi bhayabherave āgate na ṭhito na nisinno na nipanno ṭhitassāpi āgate na caṅkamīti evaṃ tassa āsannaṭṭipāṭiyā vuttāti.

Bhayabheravasenāsanādivaṇṇanā niṭṭhitā.

Asammohavīhāraṇṇanā

50. Evaṃ bhimsanakesupi ṭhānesu attano bhayabheravābhāvaṃ dassetvā idāni jhāyīnaṃ sammohaṭṭhānesu attano asammohavīhāraṇṇanā dassetuṃ **santi kho pana, brāhmaṇā**tiādimāha.

Tattha **santī**ti atthi saṃvijjanti upalabbhanti. **Rattīyeva samānanti** rattīyeva santaṃ, **divāti sañjānantī**ti “divaso aya”nti sañjānantī. **Divāyeva samānanti** divasaṃyeva santaṃ. **Rattīti sañjānantī**ti “ratti aya”nti sañjānantī. Kasmā panete evaṃsaññino hontīti. Vuṭṭhānakosallābhāvato vā sakuṇarutato vā. Kathaṃ? Idhekacco odātakasiṅgalābhī divā parikammaṃ katvā divā samāpanno divāyeva vuṭṭhahāmīti manasikāraṃ uppādeti, no ca kho addhānaparicchede kusalo hoti. So divasaṃ atikkamitvā rattibhāge vuṭṭhāti. Odātakasiṅgapharaṇavasena cassa visadaṃ hoti vibhūtaṃ suvibhūtaṃ. So, divā vuṭṭhahāmīti uppādītamānasikāratāya odātakasiṅgapharaṇavisadavibhūtatāya ca rattīyeva samānaṃ divāti sañjānāti. Idha panekacco nīlakasiṅgalābhī rattīṃ parikammaṃ katvā rattīṃ samāpanno rattīyeva vuṭṭhahāmīti manasikāraṃ uppādeti, no ca kho addhānaparicchede kusalo hoti. So rattīṃ atikkamitvā divasabhāge vuṭṭhāti. Nīlakasiṅgapharaṇavasena cassa avisadaṃ hoti avibhūtaṃ. So rattīṃ vuṭṭhahāmīti uppādītamānasikāratāya

nīlakasiṇapharaṇāvisadāvibhūtatāya ca divāyeva samānaṃ rattīti sañjānāti. Evaṃ tāva vuṭṭhānakosallābhāvato evaṃsaññino honti.

Sakuṇarutato pana idhekacco antosenāsane nisinno hoti. Atha divā ravanakasakuṇā kākādayo candālokena divāti maññamānā rattim ravanti, aññehi vā kāraṇehi. So tesam saddaṃ sutvā rattimyeva samānaṃ divāti sañjānāti. Idha panekacco pabbatantare gambhīrāya ghanavanappaṭicchannāya giriguhāya sattāhavaddalikāya vattamānāya antarahitasūriyāloke kāle nisinno hoti. Atha rattim ravanakasakuṇā ulūkādayo majjhanhikasamayepi tattha tattha samandhakāre nīlīnā rattisaññāya vā aññehi vā kāraṇehi ravanti. So tesam saddaṃ sutvā divāyeva samānaṃ rattīti sañjānāti. Evaṃ sakuṇarutato evaṃsaññino hontīti. **Idamahanti** idaṃ ahaṃ evaṃ sañjānaṃ. **Sammohavihārasmiṃ vadāmīti** sammohavihārapariyāpannaṃ antogadhaṃ, sammohavihārānaṃ aññatarāṃ vadāmīti vuttaṃ hoti.

Ahaṃ kho pana brāhmaṇa...pe... sañjānāmīti pākaṭo bodhisattassa rattindivaparicchedo sattāhavaddalepi candimasūriyesu adissamānesupi jānātiyeva “ettakaṃ purebhattakālo gato, ettakaṃ pacchābhattakālo, ettakaṃ paṭhamayāmo, ettakaṃ majjhimayāmo, ettakaṃ pacchimayāmo”ti, tasmā evamāha. Anacchariyañcetaṃ yaṃ pūritapāramī bodhisatto evaṃ jānāti. Padesaññāne ṭhitānaṃ sāvakānampi hi rattindivaparicchedo pākaṭo hoti.

Kalyāṇiyamahāvihāre kira godattathero dvaṅgulakāle bhattaṃ gahetvā aṅgulakāle bhuñjati. Sūriye adissamānepi pātoyeva senāsanaṃ pavisitvā tāya velāya nikkhamati. Ekadivasaṃ āramikā “sve therassa nikkhamanakāle passamā”ti bhattaṃ sampādetvā kālatthambhamūle nisīdiṃsu. Thero dvaṅgulakāleyeva nikkhamati. Tato pabhuti kira sūriye adissamānepi therassa nikkhamanasaññāya eva bherim ākoṭenti.

Ajaravihārepi kāḷadevatthero antovasse yāmagandikaṃ paharati, āciṇṇametaṃ therassa. Na ca yāmayantanālikaṃ payojeti, aññe bhikkhū payojenti. Atha nikkhante paṭhame yāme there muggaraṃ gahetvā ṭhitamatteyeva ekaṃ dve vāre paharanteyeva vā yāmayantaṃ patati, evaṃ tīsu yāmesu samaṇadhammaṃ katvā thero pātoyeva gāmaṃ pavisitvā piṇḍapātaṃ ādāya vihāraṃ āgantvā bhojanavelāya pattaṃ gahetvā divā vihāraṭṭhānaṃ gantvā samaṇadhammaṃ karoti. Bhikkhū kālatthambhaṃ disvā therassa adisvā āgamanatthāya pesenti. So bhikkhu therāṃ divā vihāraṭṭhānā nikkhamantameva vā antarāmagge vā passati. Evaṃ padesaññāne ṭhitānaṃ sāvakānampi rattindivaparicchedo pākaṭo hoti, kimaṅgaṃ pana bodhisattānanti.

Yaṃ kho taṃ brāhmaṇa...pe... vadeyyāti ettha pana “yaṃ kho taṃ, brāhmaṇa, asammohadhammo satto loke uppanno...pe... sukhāya devamanussāna”nti vacanaṃ vadamāno koci sammā vadeyya, sammā vadamāno siyā, na vitathavādī assa. Mameva taṃ vacanaṃ vadamāno sammā vadeyya, sammā vadamāno siyā, na vitathavādī assāti evaṃ padasambandho veditaḃbo.

Tattha **asammohadhammoti** asammohasabhāvo. **Loketi** manussaloke. **Bahujanahitāyāti** bahujanassa hitatthāya, paññāsampattiyā diṭṭhadhammikasamparāyikahitūpadesakoti. **Bahujanasukhāyāti** bahujanassa sukhathāya, cāgasampattiyā upakaraṇasukhassa dāyakoti. **Lokānukampāyāti** lokassa anukampatthāya, mettākaraṇāsampattiyā mātāpitaro viya lokassa rakkhitā gopayitāti. **Atthāya hitāya sukhāya devamanussānanti** idha devamanussaggahaṇena ca bhābapuggalaveneyyasatteyeva gahetvā tesam nibbānamaggaphalādhigamāya attano uppattim dasseti veditabbo. **Atthāyāti** hi vutte paramatthathāya nibbānāyāti vuttaṃ hoti. **Hitāyāti** vutte taṃ sampāpakamaggatthāyāti vuttaṃ hoti, nibbānasampāpakamaggato hi uttari hitaṃ nāma natthi. **Sukhāyāti** vutte phalasaṃpattisukhatthāyāti vuttaṃ hoti, tato uttari sukhābhāvato. Vuttañcetaṃ “ayaṃ samādhī paccuppannasukho ceva āyatiñca sukhavipāko”ti (dī. ni. 3.355; a. ni. 5.27; vibha. 804).

Asammohavihāraṇṇanā niṭṭhitā.

Pubbabhāgapaṭipadādivaṇṇanā

51. Evaṃ bhagavā buddhaguṇapaṭilābhāvasānaṃ attano asammohavihāraṃ brāhmaṇassa dassetvā idāni yāya paṭipadāya taṃ koṭippattaṃ asammohavihāraṃ adhigato, taṃ pubbabhāgato pabhuti dassetuṃ **āraddhaṃ kho pana me brāhmaṇāti**ādīmāha.

Keci panāhu “imaṃ asammoḥavihāraṃ sutvā brāhmaṇassa cittamevaṃ uppannaṃ ‘kāya nu kho paṭipadāya imaṃ patto’ti, tassa cittamaññāya imāyāhaṃ paṭipadāya imaṃ uttamaṃ asammoḥavihāraṃ pattoti dassento evamaññā”ti.

Tattha āraddhaṃ kho pana me, brāhmaṇa, vīriyaṃ ahoṣīti, brāhmaṇa, na mayā ayaṃ uttamo asammoḥavihāro kusītena muṭṭhassatinā sāraddhakāyena vikkhittacittena vā adhigato, apica kho tadadhigamāya āraddhaṃ kho pana me vīriyaṃ ahoṣi, bodhimaṇḍe nisinnena mayā caturaṅgavīriyaṃ āraddhaṃ ahoṣi, paggaḥitaṃ asithilappavattitanti vuttaṃ hoti. Āraddhattāyeva ca metaṃ **asallinaṃ** ahoṣi.

Upaṭṭhitā sati asammuṭṭhāti na kevalaṅca vīriyameva, satipi me ārammaṇābhimukhībhāvena upaṭṭhitā ahoṣi. Upaṭṭhitattāyeva ca asammuṭṭhā. **Passaddho kāyoti** kāyacittappassaddhisambhavana kāyopi me passaddho ahoṣi. Tattha yasmā nāmakāye passaddhe rūpakāyopi passaddhoyeva hoti, tasmā nāmakāyo rūpakāyoti avisesetvāva passaddho kāyoti vuttaṃ. **Asāraddhoti** so ca kho passaddhattāyeva asāraddho, vigatadarathoti vuttaṃ hoti. **Samāhitaṃ cittaṃ ekagganti** cittaṃpi me sammā āhitaṃ suṭṭhu ṭhapitaṃ appitaṃ viya ahoṣi. Samāhitattā eva ca ekaggaṃ acalaṃ nipphandaṇanti, ettāvata jhānassa pubbabhāgapaṭipadā kathitā hoti.

Idāni imāya paṭipadāya adhigataṃ paṭhamajjhānaṃ ādiṃ katvā vijjāttayapariyosānaṃ viśesaṃ dassento **so kho ahanti**ādīmāha. Tattha **viviceva kāmehi...pe... catutthajjhānaṃ upasampajja viḥāsinti** ettha tāva yaṃ vattabbaṃ siyā, taṃ sabbaṃ visuddhimagge pathavīkaṣiṇakathāyaṃ vuttaṃ. Kevalaṅhi tattha “upasampajja viharatī”ti āgataṃ, idha “viḥāsī”nti, ayameva viśeso. Kiṃ katvā pana bhagavā imāni jhānāni upasampajja viḥāsīti, kammaṭṭhānaṃ bhāvetvā. Kataraṃ? Ānāpānassatikammaṭṭhānaṃ.

Imāni ca pana cattāri jhānāni kesaṅci cittekaggatathāni honti, kesaṅci vipassanāpādakāni, kesaṅci abhiññāpādakāni, kesaṅci nirodhapādakāni, kesaṅci bhavokkamanatthāni. Tattha khīṇāsavaṇaṃ cittekaggatathāni honti. Te hi samāpajjitvā ekaggacittā sukhaṃ divasaṃ viharissāmāti iccevaṃ kaṣiṇaparikkamaṃ katvā aṭṭha samāpattiyo nibbattenti. Sekkhaputhujjanānaṃ samāpattito vuṭṭhāya samāhiteṇa cittena vipassissāmāti nibbattentānaṃ vipassanāpādakāni honti. Ye pana aṭṭha samāpattiyo nibbattetvā abhiññāpādakajjhānaṃ samāpajjitvā samāpattito vuṭṭhāya “ekopi hutvā bahudhā hotī”ti (dī. ni. 1.238; paṭi. ma. 1.102) vuttanayā abhiññāyo patthentā nibbattenti, tesāṃ abhiññāpādakāni honti. Ye pana aṭṭha samāpattiyo nibbattetvā nirodhasamāpattiṃ samāpajjitvā sattāhaṃ acittā hutvā diṭṭheva dhamme nirodhaṃ nibbānaṃ patvā sukhaṃ viharissāmāti nibbattenti, tesāṃ nirodhapādakāni honti. Ye pana aṭṭha samāpattiyo nibbattetvā aparihīnājjhānā brahmaloke uppajjissāmāti nibbattenti, tesāṃ bhavokkamanatthāni honti.

Bhagavatā panidaṃ catutthajjhānaṃ bodhirukkhamūle nibbattitaṃ, taṃ tassa vipassanāpādakañceva ahoṣi abhiññāpādakaṅca sabbakiccaśādhakaṅca, sabbalokiyalokuttaraguṇādāyakaṅca veditabbaṃ.

Pubbabhāgapaṭipadādivaṇṇanā niṭṭhitā.

Pubbenivāsakathāvaṇṇanā

52. Yesaṅca guṇānaṃ dāyakaṃ ahoṣi, tesāṃ ekadesaṃ dassento **so evaṃ samāhite citteti**ādīmāha. Tattha dvinnaṃ vijjānaṃ anupadavaṇṇanā ceva bhāvanānayo ca visuddhimagge vitthārito. Kevalaṅhi tattha “so evaṃ samāhite citte...pe... abhininnāmetī”ti vuttaṃ, idha “abhininnāmesi”nti. **Ayaṃ kho me brāhmaṇāti** ayaṅca appanāvāro tattha anāgatoti ayameva viśeso. Tattha **soti** so ahaṃ. **Abhininnāmesinti** abhinīharaṃ. Abhininnāmesinti ca vacanato **soti** ettha so ahanti evamattho veditabbo.

Yasmā cidaṃ bhagavato vasena pubbenivāsānussatiññaṃ āgataṃ, tasmā “so tato cuto idhūpapanno”ti ettha evaṃ yojanā veditabbā. Ettha hi **so tato cutoti** paṇinivattantassa paccavekkhaṇaṃ. Tasmā **idhūpapannoti** imissā idhūpapattiyā anantaraṃ. **Amutra udapādi**nti tusitabhavanaṃ sandhāyāhāti veditabbo. **Tatrāpāsīṃ evaṃnāmoti** tatrāpi tusitabhavane setaketu nāma devaputto ahoṣiṃ. **Evaṃgottoti** tāhi devatāhi saddhiṃ ekagotto. **Evaṃvaṇṇoti** suvaṇṇavaṇṇo. **Evamaññāroti** dibbasudhāhāro. **Evaṃsukhadukkhappaṭisaṃvedīti** evaṃ dibbasukhappaṭisaṃvedī. Dukkhaṃ pana saṅkhāradukkhamaṭṭameva. **Evamāyupariyantoti** evaṃ sattapaññāsavassakoṭisaṭṭhivassasatasahassāyupariyanto. **So tato cutoti** so ahaṃ tato tusitabhavanaṃ cuto.

Idhūpapannoti idha mahāmāyā deviyā kucchimhi nibbatto.

Ayaṃ kho me brāhmaṇātiādīsu meti mayā. **Vijjāti** viditakaraṇaṭṭhena vijjā. Kim viditaṃ karoti? Pubbenivāsaṃ. **Avijjāti** tasseva pubbenivāsassa aviditakaraṇaṭṭhena tappaticchādako moho vuccati. **Tamoti** sveva moho paṭicchādakaṭṭhena “tamo”ti vuccati. **Ālokoti** sāyeva vijjā obhāsakaraṇaṭṭhena “āloko”ti vuccati. Ettha ca vijjā adhigatāti ayaṃ attho, sesaṃ pasaṃsāvacaṇaṃ. Yojanā panettha ayaṃ kho me vijjā adhigatā, tassa me adhigatavijjassa avijjā vihatā, vinaṭṭhāti attho. Kasmā? Yasmā vijjā uppannā. Esa nayo itarasmimpi padadvaye.

Yathā tanti ettha **yathāti** opamme. **Tanti** nipāto. Satiyā avippavāsena **appamattassa**. Vīriyāṭāpena **ātāpino**. Kāye ca jīvite ca anapekkhatāya **pahitattassa**, pesitattassāti attho. Idam vuttaṃ hoti “yathā appamattassa ātāpino pahitattassa viharato avijjā vihaññeyya, vijjā uppajjeyya. Tamo vihaññeyya, āloko uppajjeyya. Evameva mama avijjā vihatā, vijjā uppannā. Tamo vihato, āloko uppanno. Etassa me padhānānuyogassa anurūpameva phalaṃ laddha”nti.

Pubbenivāsakathāvaṇṇanā niṭṭhitā.

Dibbacakkhuñāṇakathāvaṇṇanā

53. Cutūpapātakathāyaṃ yasmā idha bhagavato vasena pāḷi āgatā, tasmā “passāmi pajānāmī”ti vuttaṃ, ayaṃ viseso. Sesaṃ visuddhimagge vuttasadisameva.

Ettha pana **vijjāti** dibbacakkhuñāṇavijjā. **Avijjāti** sattānaṃ cutipaṭisandhipaṭicchādikā avijjā. Sesaṃ vuttanayamevāti. Yasmā ca pūritapāramīnaṃ mahāsattānaṃ parikammakiccaṃ nāma natthi. Te hi citte abhininnāmitamatteyeva anekavihitaṃ pubbenivāsaṃ anussaranti, dibbena cakkhunā satte passanti. Tasmā yo tattha parikammaṃ ādiṃ katvā bhāvanānayo vutto, na tena idha atthoti.

Dibbacakkhuñāṇakathāvaṇṇanā niṭṭhitā.

Āsavakkhayañāṇakathāvaṇṇanā

54. Tativavijjāya **so evaṃ samāhite citteti** vipassanāpādakaṃ catutthajjhānacittaṃ veditabbaṃ. **Āsavānaṃ khayañāyāti** arahattamaggañāṇatthāya. Arahattamaggo hi āsavavināsanato āsavānaṃ khayoti vuccati, tatra cetamā ñāṇaṃ, tappariyāpannattāti. **Cittaṃ abhininnāmesinti** vipassanācittaṃ abhinīharimī. **So idam dukkhanti** evamādīsu “ettakaṃ dukkhaṃ, na ito bhiyyo”ti sabbampi dukkhasaccaṃ sarasalakkaṇapaṭivedhena yathābhūtaṃ abbaññāsīm jāniṃ paṭivijjhimī. Tassa ca dukkhassa nibbattikaṃ taṇhaṃ **ayaṃ dukkhasamudayoti**. Tadubhayampi yaṃ thānaṃ patvā nirujjhati, taṃ tesamā appavattiṃ nibbānaṃ **ayaṃ dukkhanirodhoti**. Tassa sampāpakaṃ ariyamaggaṃ **ayaṃ dukkhanirodhagāminī paṭipadāti** sarasalakkaṇapaṭivedhena yathābhūtaṃ abbaññāsīm jāniṃ paṭivijjhinti evamattho veditabbo.

Evaṃ sarūpato saccāni dassetvā idāni kilesavasena pariyaṃyato dassento **ime āsavātiādīmāha**. **Tassa me evaṃ jānato evaṃ passantoti** tassa mayhaṃ evaṃ jānantassa evaṃ passantassa. Saha vipassanāya koṭippattaṃ maggaṃ katheti. **Kāmāsavāti** kāmāsavato. **Vimuccitthāti** iminā phalakkhaṇaṃ dasseti, maggakkhaṇe hi cittaṃ vimuccati, phalakkhaṇe vimuttaṃ hoti. **Vimuttasmiṃ vimuttamīti** ñāṇanti iminā paccavekkhaṇaṇāṇaṃ dasseti. **Khīṇā jātītiādīhi** tassa bhūmiṃ, tena hi ñāṇena bhagavā paccavekkhanto “khīṇā jāti”tiādīni abbaññāsī. Katamā pana bhagavato jāti khīṇā, kathaṇca naṃ abbaññāsīti? Na tāvassa atīta jāti khīṇā, pubbeva khīṇattā, na anāgatā, anāgate vāyāmābhāvato, na paccuppannā, vijjamānattā. Yā pana maggassa abhāvītattā uppajjeyya ekacatupañcavokārabhavesu ekacatupañcakkhandhabhedā jāti, sā maggassa bhāvītattā anuppādadhammataṃ āpajjanena khīṇā, taṃ so maggabhāvanāya pahīnakilese paccavekkhitvā “kilesābhāve vijjamānampi kammaṃ āyatimā appaṭisandhikaṃ hoti”ti jānanto abbaññāsī.

Vusitanti vuttaṃ parivuttaṃ, kataṃ caritaṃ niṭṭhitanti attho. **Brahmacariyanti** maggabrahmacariyaṃ, puthujjanakalyāṇakena hi saddhimā sattasekkhā brahmacariyavāsaṃ vasanti nāma, khīṇāsavo vuttavāso. Tasmā bhagavā attano brahmacariyavāsaṃ paccavekkhanto “vusitaṃ brahmacariya”nti abbaññāsī. **Kataṃ**

karaṇīyanti catūsu saccesu catūhi maggehi pariññāpahānasacchikiriyaḥbhāvanāvasena soḷasavidhampi kiccaṃ niṭṭhāpitanti attho. Puthujjanakalyāṇakādayo hi taṃ kiccaṃ karonti, khīṇāsavo katakaraṇīyo. Tasmā bhagavā attano karaṇīyaṃ paccavekkhanto “kataṃ karaṇīya”nti abbhaññāsi.

Nāparaṃ itthattāyāti idāni puna itthabhāvāya evaṃsoḷasakiccabhāvāya, kilesakkhayāya vā maggabhāvanākiccaṃ me natthīti abbhaññāsi. Atha vā **itthattāyāti** itthabhāvato imasmā evaṃpakārā idāni vattamānakkhandhasantānā aparāṃ khandhasantānaṃ mayhaṃ natthi. Ime pana pañcakkhandhā pariññātā tiṭṭhanti chinnamūlakā rukkhā viya. Te carimakaviññāṇanirodhena anupādāno viya jātavedo nibbāyissanti abbhaññāsi.

Idāni evaṃ paccavekkhaṇaṇāpariggahitaṃ āsavānaṃ khayaññādhigamaṃ brāhmaṇassa dassento, **ayaṃ kho me brāhmaṇāti**ādīmāha. Tattha **vijjāti** arahattamaggaññāvijjā. **Avijjāti** catusaccaṭṭhādikā avijjā. Sesāṃ vuttanayameva. Ettāvata ca pubbenivāsaññāna atītaṃsaññaṃ, dibbacakkhunā paccuppannānāgataṃsaññaṃ, āsavakkhayena sakalalokiyalokuttaraguṇanti evaṃ tīhi vijjāhi sabbepi sabbaññiguṇe saṅgahetvā pakāsento attano asammohavihāraṃ brāhmaṇassa dassesi.

Āsavakkhayaññākathāvaṇṇanā niṭṭhitā.

Araññavāsakāraṇavaṇṇanā

55. Evaṃ vutte kira brāhmaṇo cintesi – “samaṇo gotamo sabbaññutaṃ paṭijānāti, ajjāpi ca araññavāsaṃ na vijahati, atthi nu khvassa aññampi kiñci karaṇīya”nti. Athassa bhagavā ajjhāsayaṃ viditvā iminā ajjhāsayaṇusandhinā, **siyā kho pana teti**ādīmāha. Tattha **siyā kho pana te, brāhmaṇa, evamassāti**, brāhmaṇa, kadāci tuyhaṃ evaṃ bhaveyya. **Na kho panetaṃ brāhmaṇa evaṃ daṭṭhabbanti** etaṃ kho pana, brāhmaṇa, tayā mayhaṃ pantasenāsanapaṭisevanaṃ avītarāgādītāyāti evaṃ na daṭṭhabbaṃ. Evaṃ pantasenāsanapaṭisevane akāraṇaṃ paṭikkhipitvā kāraṇaṃ dassento **dve kho ahanti**ādīmāha. Tattha atthoyeva atthavaso. Tasmā **dve kho ahaṃ, brāhmaṇa, atthavaseti** ahaṃ kho, brāhmaṇa, dve atthe dve kāraṇāni sampassamānoti vuttaṃ hoti. **Attano ca diṭṭhadhammasukhavihāraṇti** ettha **diṭṭhadhammo** nāma ayaṃ paccakkho attabhāvo. **Sukhavihāro** nāma catunnaṃpi iriyāpathavihāraṇaṃ phāsutā, ekakassa hi araññe antamaso uccārapassāvakkiccaṃ upādāya sabbeva iriyāpathā phāsukā honti, tasmā diṭṭhadhammassa sukhavihāraṇti ayamatto veditabbo. **Pacchimañca janataṃ anukampamānoti** kathaṃ araññavāsena pacchimā janatā anukampitā hoti? Saddhāpabbajitā hi kulaputtā bhagavato araññavāsaṃ disvā bhagavāpi nāma araññasenāsanāni na muñcati, yassa nevatthi pariññātabbaṃ na pahātabbaṃ na bhāvetabbaṃ na sacchikātabbaṃ, kimaṅgaṃ pana mayanti cintetvā tattha vasitabbameva maññissanti. Evaṃ khippameva dukkhassantakarā bhavissanti. Evaṃ pacchimā janatā anukampitā hoti. Etamatthaṃ dassento āha “pacchimañca janataṃ anukampamāno”ti.

Araññavāsakāraṇavaṇṇanā niṭṭhitā.

Desanānumodanāvaṇṇanā

56. Taṃ sutvā attamano brāhmaṇo **anukampitarūpāti**ādīmāha. Tattha **anukampitarūpāti** anukampitaṭṭhātikā anukampitasabhāvā. **Janatāti** janasamūho. **Yathā taṃ arahatā sammāsambuddhenāti** yathā arahataṃ sammāsambuddho anukampeyya, tatheva anukampitarūpāti.

Evañca pana vatvā puna taṃ bhagavato dhammadesanaṃ abhhanumodamāno bhagavantaṃ etadavoca **abhikkantaṃ, bho gotama, abhikkantaṃ, bho gotamāti**. Tattāyaṃ abhikkantasaddo khayasundarābhīrūpaabhhanumodanesu dissati. “Abhikkantā, bhante, ratti, nikkhanto paṭhāmo yāmo, ciranisinno bhikkhusaṅgho”tiādīsu (cūḷava. 383; a. ni. 8.20) hi khaye dissati. “Ayaṃ imesaṃ catunnaṃ puggalānaṃ abhikkantataro ca paṇītataro cā”tiādīsu (a. ni. 4.100) sundare.

“Ko me vandati pādāni, iddhiyā yasaṃ jālaṃ;
Abhikkantena vaṇṇena, sabbā obhāsayaṃ disā”ti. –

Ādīsu (vi. va. 857) abhirūpe. “Abhikkantaṃ, bhante”tiādīsu (dī. ni. 1.250; pārā. 15) abbhanumodane. Idhāpi abbhanumodaneyeva. Yasmā ca abbhanumodane, tasmā sādhu sādhu bho, gotamāti vuttaṃ hotīti veditabbaṃ.

“Bhaye kodhe pasaṃsāyaṃ, turite kotūhalacchare;
Hāse soke pasāde ca, kare āmedītaṃ budho”ti. –

Iminā ca lakkhaṇena idha pasādavasena pasaṃsāvasena cāyaṃ dvikkhattuṃ vuttoti veditabbo. Atha vā **abhikkantanti** abhikantaṃ. Atiīṭṭhaṃ atimanāpaṃ, atisundaranti vuttaṃ hoti.

Tattha ekena abhikkantasaddena desanaṃ thometi, ekena attano pasādaṃ. Ayañhettha adhippāyo – abhikkantaṃ, bho gotama, yadidaṃ bhoto gotamassa dhammadesanā, abhikkantaṃ yadidaṃ bhoto gotamassa dhammadesanaṃ āgamma mama pasādoti. Bhagavatoyeva vā vacanaṃ dve dve atthe sandhāya thometi – bhoto gotamassa vacanaṃ abhikkantaṃ dosanāsanato, abhikkantaṃ guṇādhighamanato, tathā saddhājananato, paññājananato, sātthato, sabyañjanato, uttānapadato, gambhīratthato, kaṇṇasukhato, hadayaṅgamato, anattukkaṃsanato, aparavambhanato, karuṇāsītāto, paññāvadātato, āpātharamaṇīyato, vimaddakkhamato, suyyamānasukhato, vīmaṃsīyamānahitatoti evamādīhi yojetabbaṃ.

Tato parampi catūhi upamāhi desanaṃyeva thometi. Tattha **nikkujjanti** adhomukhaṭṭhapitaṃ, heṭṭhāmukhajātaṃ vā. **Ukkujjeyyāti** upari mukhaṃ kareyya. **Paṭicchannanti** tiṇapaṇṇādicchāditaṃ. **Vivareyyāti** ugghāṭeyya. **Mūlhassāti** disāmūlhassa. **Maggam ācikkheyyāti** hatthe gahetvā “esa maggo”ti vadeyya. **Andhakāreti** kāḷapakkhacātuddasāḍḍharattaghanavanasaṇḍameghapaṭalehi caturaṅge tame, ayaṃ tāva anuttānapadattho.

Ayaṃ pana adhippāyayojanā – yathā koci nikkujjitaṃ ukkujjeyya, evaṃ saddhammavimukhaṃ asaddhamme patitaṃ maṃ asaddhammā vuṭṭhāpentena, yathā paṭicchannaṃ vivareyya. Evaṃ kassapassa bhagavato sāsananataradhānato pabhuti micchādīṭṭhigahanapaṭicchannaṃ sāsanaṃ vivarantena, yathā mūlhassa maggaṃ ācikkheyya, evaṃ kummaggamicchāmaggaṃ paṭipannassa me saggamokkhamaggaṃ ācikkhantena, yathā andhakāre telapajjotaṃ dhāreyya, evaṃ mohandhakāre nimuggassa me buddhādiratanarūpāni apassato tappaṭicchādakamohandhakāraviddhamśakadesanāpajjotadhāraṇena mayhaṃ bhotā gotamena etehi pariyāyehi pakāsītattā anekapariyāyena dhammo pakāsītoti.

Desanānumodanāvaṇṇanā niṭṭhitā.

Pasannākāravaṇṇanā

Evaṃ desanaṃ thometvā imāya desanāya ratanattayapasannacitto pasannākāraṃ karonto **esāhanti**ādīmāha. Tattha **esāhanti** eso ahaṃ. **Bhavantaṃ gotamaṃ saraṇaṃ gacchāmīti** bhavaṃ me gotamo saraṇaṃ parāyaṇaṃ, aghassa tātā, hitassa ca vidhātāti iminā adhippāyena bhavantaṃ gotamaṃ gacchāmi, bhajāmi, sevāmi, payirupāsāmi, evaṃ vā jānāmi, bujjhāmīti. Yesaṃhi dhātūnaṃ gatiattho, buddhipi tesam attho. Tasmā gacchāmīti imassa jānāmi, bujjhāmīti ayamattho vutto. **Dhammañca bhikkhusaṅghaṇcāti** ettha pana adhigatamagge sacchikatanirodhe yathānusiṭṭhaṃ paṭipajjamāne ca apāyesu apatamāne dhāretīti **dhammo**, so atthato ariyamaggo ceva nibbānañca. Vuttañhettaṃ – “yāvatā, bhikkhave, dhammā saṅkhatā, ariyo aṭṭhaṅgiko maggo tesam aggamakkhāyatī”ti (a. ni. 4.34) vitthāro. Na kevalaṇca ariyamaggo ceva nibbānañca, apica kho ariyaphalehi saddhiṃ pariyattidhammopi. Vuttañhettaṃ chattamaṇavakavimāne –

“Rāgavirāgamanejamasokaṃ, dhammamasāṅkhatamappaṭikūlaṃ;
Madhuramimaṃ paguṇaṃ suvibhattaṃ, dhammamimaṃ saraṇatthamupehī”ti. (vi. va. 887);

Ettha **rāgavirāgoti** maggo kathito. **Anejamasokanti** phalaṃ. **Dhammamasāṅkhatanti** nibbānaṃ. **Appaṭikūlaṃ madhuramimaṃ paguṇaṃ suvibhattanti** piṭakattayena vibhattā sabbadhammakhandhāti. Diṭṭhisīlasaṅghātena saṃhatoti **saṅgho**, so atthato aṭṭha ariyapuggalasamūho. Vuttañhettaṃ tasmiṃyeva vimāne.

“Yattha ca dinnamahapphalamāhu, catūsu sucīsu purisayugesu;

Aṭṭha ca puggala dhammasā te, saṅghamimaṃ saraṇatthamupehī'ti. (vi. va. 888);

Bhikkhūnaṃ saṅgho **bhikkhusaṅgho**. Ettāvataṃ brāhmaṇo tīṇi saraṇagamanāni paṭivedesi.

Pasannākāraṇaṇā niṭṭhitā.

Saraṇagamanakathāvaṇṇanā

Idāni tesu saraṇagamanesu kosallatthaṃ saraṇaṃ, saraṇagamanāṃ. Yo ca saraṇaṃ gacchati, saraṇagamanappabhedo, saraṇagamanassa phalaṃ, saṃkilesa, bhedoti ayaṃ vidhi veditabbo. Seyyathidaṃ – padatthato tāva hiṃsatīti **saraṇaṃ**, saraṇagataṇaṃ teneva saraṇagamanena bhayaṃ santāsaṃ dukkhaṃ duggatiparikilesaṃ hanati vināsetīti attho, ratanattayassevetāṃ adhivacanaṃ.

Atha vā hite pavattanena ahitā ca nivattanena sattānaṃ bhayaṃ hiṃsati buddho. Bhavakantārā uttāraṇena assāsādānena ca dhammo. Appakānampi kāraṇaṃ vipulaphalapaṭilābhakaraṇena saṅgho. Tasmā imināpi pariyaṇena ratanattayaṃ saraṇaṃ. Tappasādataggarutāhi vihatakiṇeso tapparāyaṇatākārapavatto cittuppādo saraṇagamanāṃ. Taṃsamaṅgisatto saraṇaṃ gacchati, vuttappakārena cittuppādena etāni me tīṇi saraṇāni saraṇaṃ, etāni parāyaṇanti evaṃ upetīti attho. Evaṃ tāva **saraṇaṃ saraṇagamanāṃ yo ca saraṇaṃ gacchatīti** idaṃ tayaṃ veditabbaṃ.

Saraṇagamanappabhede pana duvidhaṃ saraṇagamanāṃ lokuttaraṃ lokiyañca. Tattha lokuttaraṃ diṭṭhasaccānaṃ maggakkhaṇe saraṇagamanupakkilesasamucchadena ārammaṇato nibbānārammaṇaṃ hutvā kiccato sakalepi ratanattaye ijjhati. Lokiyaṃ puthujjanānaṃ saraṇagamanupakkilesavikkhambhanaena ārammaṇato buddhādiguṇārammaṇaṃ hutvā ijjhati, taṃ atthato buddhādīsu vatthūsu saddhāpaṭilābho, saddhāmūlikā ca sammādiṭṭhi dasasu puññakiriyavatthūsu diṭṭhijukammanti vuccati.

Tayidaṃ catudhā pavattati attasanniyyātanena tapparāyaṇatāya sissabhāvūpagamanaena paṇipātenāti. Tattha **attasanniyyātanāṃ** nāma “ajja ādiṃ katvā ahaṃ attānaṃ buddhassa niyyātemi, dhammassa, saṅghassa”ti evaṃ buddhādīnaṃ attapariccajanaṃ. **Tapparāyaṇatā** nāma “ajja ādiṃ katvā ahaṃ buddhaparāyaṇo, dhammaparāyaṇo, saṅghaparāyaṇo iti maṃ dhārethā”ti evaṃ tapparāyaṇabhāvo. **Sissabhāvūpagamanaṃ** nāma “ajja ādiṃ katvā ahaṃ buddhassa antevāsiko, dhammassa, saṅghassāti maṃ dhārethā”ti evaṃ sissabhāvūpagamo. **Paṇipāto** nāma “ajja ādiṃ katvā ahaṃ abhivādanapaccuṭṭhānaañjalikammaṃsāmīcikkammaṃ buddhādīnaṃyeva tiṇṇaṃ vatthūnaṃ karomi, iti maṃ dhārethā”ti evaṃ buddhādīsu paramanipaccakāro. Imesañhi catunnaṃ ākāraṇaṃ aññatarampi karontena gahitaṃyeva hoti saraṇagamanāṃ.

Apica bhagavato attānaṃ pariccajāmi, dhammassa, saṅghassa attānaṃ pariccajāmi. Jīvitaṃ pariccajāmi, pariccattoyeva me attā, pariccattaṃyeva me jīvitaṃ, jīvitapariyantikaṃ buddhaṃ saraṇaṃ gacchāmi, buddho me saraṇaṃ leṇaṃ tāṇanti evampi attasanniyyātanāṃ veditabbaṃ. “Sathārañca vatāhaṃ passeyyaṃ bhagavantameva passeyyaṃ, sugatañca vatāhaṃ passeyyaṃ bhagavantameva passeyyaṃ, sammāsambuddhañca vatāhaṃ passeyyaṃ bhagavantameva passeyya”nti (saṃ. ni. 2.154) evampi mahākassapassa saraṇagamanāṃ viya sissabhāvūpagamanaṃ daṭṭhabbaṃ.

“So ahaṃ vicarissāmi, gāmā gāmaṃ purā purāṃ;

Namassamāno sambuddhaṃ, dhammassa ca sudhammata”nti. (su. ni. 194; saṃ. ni. 1.246) –

Evampi ālavakādīnaṃ saraṇagamanāṃ viya tapparāyaṇatā veditabbā. “Atha kho brahmāyu brāhmaṇo utṭhāyāsanaṃ ekaṃsaṃ uttarāsaṅgaṃ karitvā bhagavato pādesu sirasā nipatitvā bhagavato pādāni mukhena ca paricumbati, paṇīhi ca parisambāhati, nāmañca sāveti brahmāyu ahaṃ, bho gotama, brāhmaṇo, brahmāyu ahaṃ, bho gotama, brāhmaṇo”ti (ma. ni. 2.394) evampi paṇipāto daṭṭhabbo.

So panesa ñātibhayaṇācariyadakkhiṇeyyavasena catubbidho hoti. Tattha dakkhiṇeyyapaṇipātena saraṇagamanāṃ hoti, na itarehi. Seṭṭhavaseneva hi saraṇaṃ gayhati, seṭṭhavasena bhijjati, tasmā yo sākiyo vā koliyo vā “buddho amhākaṃ ñātako”ti vandati, aggahitameva hoti saraṇaṃ. Yo vā “samaṇo gotamo

rājavūjito mahānubhāvo, avandiyamāno anattampi kareyyā’’ti bhayena vandati, aggahitameva hoti saraṇaṃ. Yo vā bodhisattakāle bhagavato santike kiñci uggahitaṃ saramāno buddhakāle vā –

‘‘Ekena bhoge bhuñjeyya, dvīhi kammaṃ payojaye;
Catutthañca nidhāpeyya, āpadāsu bhavissatī’’ti. (dī. ni. 3.265) –

Evarūpaṃ anusāsaniṃ uggahetvā ‘‘ācariyo me’’ti vandati, aggahitameva hoti saraṇaṃ. Yo pana ‘‘ayaṃ loke aggadakkhiṇeyyo’’ti vandati, teneva gahitaṃ hoti saraṇaṃ.

Evaṃ gahitasaraṇassa ca upāsakassa vā upāsikāya vā aññatitthiyesu pabbajitampi nātiṃ ‘‘nātako me aya’’nti vandato saraṇagamaṇaṃ na bhijjati, pageva apabbajitaṃ. Tathā rājānaṃ bhayavasena vandato, so hi raṭṭhapūjjitattā avandiyamāno anattampi kareyyāti. Tathā yaṃkiñci sippaṃ sikkhāpakaṃ titthiyaṃ ‘‘ācariyo me aya’’nti vandatopi na bhijjatīti evaṃ saraṇagamaṇappabhedo veditabbo.

Ettha ca lokuttarassa saraṇagamaṇassa cattāri sāmāññaphalāni vipākaphalaṃ, sabbadukkhakkhayo ānisaṃsaphalaṃ. Vuttañhettaṃ –

‘‘Yo ca buddhañca dhammañca, saṅghañca saraṇaṃ gato;
Cattāri ariyasaccāni, sammappaññāya passati.

Dukkhāṃ dukkhasamuppādaṃ, dukkhassa ca atikkamaṃ;
Ariyañcaṭṭhaṅgikaṃ maggaṃ, dukkhūpasamaḡāmināṃ.

Etaṃ kho saraṇaṃ khemaṃ, etaṃ saraṇamuttamaṃ;
Etaṃ saraṇamāḡamma, sabbadukkhā pamuccatī’’ti. (dha. pa. 190-192);

Apica niccato anupagamaṇādivasena petassa ānisaṃsaphalaṃ veditabbaṃ. Vuttañhettaṃ, ‘‘aṭṭhānametaṃ, bhikkhave, anavakāso, yaṃ diṭṭhisampanno puggalo kañci saṅkhāraṃ niccato upagaccheyya, sukhato upagaccheyya, kañci dhammaṃ attato upagaccheyya, mātaraṃ jīvitā voropeyya, pīturaṃ arahantaṃ jīvitā voropeyya, duṭṭhacitto tathāgatassa lohitaṃ uppādeyya, saṅghaṃ bhindeyya, aññaṃ satthāraṃ uddiseyya, nettaṃ ṭhānaṃ vijjatī’’ti (ma. ni. 3.128; a. ni. 1.268-276).

Lokiyassa pana saraṇagamaṇassa bhavasampadāpi bhogasampadāpi phalameva. Vuttañhettaṃ –

‘‘Yekeci buddhaṃ saraṇaṃ gatāse,
Na te gamissanti apāyabhūmiṃ;
Pahāya mānusaṃ dehaṃ,
Devakāyaṃ paripūressantī’’ti. (saṃ. ni. 1.37);

Aparampi vuttaṃ ‘‘atha kho sakko devānamindo asītiyā devatāsahashehi saddhiṃ yenāyasmā mahāmoggallāno, tenupasaṅkami...pe... ekamantaṃ ṭhitaṃ kho sakkaṃ devānamindaṃ āyasmā mahāmoggallāno etadvoca ‘sādhu kho devānaminda buddhaṃ saraṇagamaṇaṃ hoti, buddhaṃ saraṇagamaṇahetu kho devānaminda evamidhekacce sattā kāyassa bhedaṃ paraṃ maraṇā sugatiṃ saggāṃ lokaṃ upapajjantī’’ti. Te aññe deve dasahi ṭhānehi adhigaṇhanti dibbena āyunā dibbena vaṇṇena sukkena yasena ādhipateyyena dibbehi rūpehi saddehi gandhehi rasehi phoṭṭhabbehi’’ti (saṃ. ni. 4.341). Esa nayo dhamme saṅghe ca. Apica velāmasuttādivasenāpi (a. ni. 9.20) saraṇagamaṇassa phalaviseso veditabbo. Evaṃ saraṇagamaṇaphalaṃ veditabbaṃ.

Tattha lokiyasaraṇagamaṇaṃ tīsu vatthūsu aññānasamāyamicchāññādīhi saṃkilissati, na mahājutikaṃ hoti, na mahāvipphāraṃ. Lokuttarassa natthi saṃkilesa. Lokiyassa ca saraṇagamaṇassa duvidho bhedo sāvajjo anavajjo ca. Tattha sāvajjo aññasatthārādīsū attasanniyyātanādīhi hoti, so anīṭṭhaphalo. Anavajjo kālaṃ kiriyāya, so avipākattā aphalo. Lokuttarassa pana nevatthi bhedo. Bhavantarepi hi ariyasāvako aññasatthāraṃ na uddisatīti evaṃ saraṇagamaṇassa saṃkilesa ca bhedo ca veditabboti. **Upāsakaṃ maṃ bhavaṃ gotamo dhāretūti** maṃ bhavaṃ gotamo ‘‘upāsako aya’’nti evaṃ dhāretu, jānātūti attho.

Saraṇagamanakathāvaṇṇanā niṭṭhitā.

Upāsakavidhikathāvaṇṇanā

Upāsakavidhikosallatthaṃ panettha ko upāsako, kasmā upāsakoti vuccati, kimassa sīlaṃ, ko ājīvo, kā vipatti, kā sampattīti idaṃ pakīṇṇakaṃ veditabbaṃ.

Tattha **ko upāsakoti** yo koci tisaṇagato gahaṭṭho. Vuttañhettaṃ – “yato kho mahānāma upāsako buddhaṃ saraṇaṃ gato hoti, dhammaṃ saraṇaṃ gato hoti, saṅghaṃ saraṇaṃ gato hoti. Ettāvataṃ kho mahānāma upāsako hotī”ti (saṃ. ni. 5.1033).

Kasmā upāsakoti ratanattayassa upāsanaṭo. So hi buddhaṃ upāsati upāsako. Dhammaṃ, saṅghaṃ upāsati upāsako.

Kimassa sīlanti pañca veramaṇiyo. Yathāha “yato kho mahānāma upāsako pāṇātipātā paṭivirato hoti adinnādānā, kāmesu micchācārā, musāvādā, surāmerayamajjapamādaṭṭhānā paṭivirato hoti. Ettāvataṃ kho mahānāma upāsako sīlavā hotī”ti (saṃ. ni. 5.1033).

Ko ājīvoti pañca micchāvaṇijjā pahāya dhammena samena jīvitakappaṇaṃ. Vuttañhettaṃ “pañcimā, bhikkhave, vaṇijjā upāsakena akaraṇīyā. Katamā pañca? Sattavaṇijjā, sattavaṇijjā, maṃsavaṇijjā, majjavaṇijjā, visavaṇijjā. Imā kho, bhikkhave, pañca vaṇijjā upāsakena akaraṇīyā”ti (a. ni. 5.177).

Kā vipattīti yā tasseva sīlassa ca ājīvassa ca vipatti, ayamassa vipatti. Apica yāya esa caṇḍālo ceva hoti malañca patikuṭṭho ca. Sāpissa vipattīti veditabbā. Te ca atthato assaddhiyādayo pañca dhammā honti. Yathāha “pañcahi, bhikkhave, dhammehi samannāgato upāsako upāsakacaṇḍālo ca hoti upāsakamalañca upāsakapatikuṭṭho ca. Katamehi pañcahi? Assaddho hoti, dussīlo hoti, kotūhalamaṅgaliko hoti, maṅgalaṃ pacceti no kammaṃ, ito ca bahiddhā dakkhiṇeyyaṃ pariyesati tattha ca pubbakāraṃ karotī”ti (a. ni. 5.175).

Kā sampattīti yā cassa sīlasampadā ca ājīvasampadā ca, sā sampatti. Ye cassa ratanabhāvādikarā saddhādayo pañca dhammā. Yathāha “pañcahi, bhikkhave, dhammehi samannāgato upāsako upāsakaratanāñca hoti upāsakapadumañca upāsakapuṇḍarīkañca. Katamehi pañcahi? Saddho hoti, sīlavā hoti, na kotūhalamaṅgaliko hoti, kammaṃ pacceti no maṅgalaṃ, na ito bahiddhā dakkhiṇeyyaṃ gavesati, idha ca pubbakāraṃ karotī”ti (a. ni. 5.175).

Ajjataggeti ettha ayaṃ aggasaddo ādikoṭikoṭṭhāsaseṭṭhesu dissati. “Ajjatagge, samma dovārika, āvarāmi dvāraṃ niṅaṇṭhānaṃ niṅaṇṭhīna”ntiādīsu (ma. ni. 2.70) hi ādimhi dissati. “Teneva aṅgulaggena taṃ aṅgulaggaṃ parāmaseyya, (kathā. 441) ucchaggaṃ veḷagga”ntiādīsu koṭiyam. “Ambilaggaṃ vā madhuraggaṃ vā tittakaggaṃ vā (saṃ. ni. 5.374), anujānāmi, bhikkhave, vihāraggena vā pariveṇaggena vā bhājetu”ntiādīsu (cūḷava. 318) koṭṭhāse. “Yāvataṃ, bhikkhave, sattā apadā vā...pe... tathāgato tesam aggamakkhāyatī”ntiādīsu (a. ni. 4.34) seṭṭhe. Idha panāyaṃ ādimhi daṭṭhabbo. Tasmā **ajjataggeti** ajjataṃ ādiṃ katvā, evamettha attho veditabbo. **Ajjatanti** ajjabhāvaṃ. Ajjadaggeti vā pāṭho, da-kāro padasandhikaro, ajja aggaṃ katvāti attho.

Pāṇupetanti pāṇehi upetaṃ, yāva me jīviṃ pavattati, tāva upetaṃ. Anaññasatthukaṃ tīhi saraṇagamehi saraṇaṃ gataṃ upāsakaṃ kappiyakāraṃ maṃ bhavaṃ gotamo dhāretu jānātu. Ahañhi saṅghaṃ “na saṅgho”ti vā vadeyyanti. Evaṃ attasanniyyātanena saraṇaṃ gantvā catūhi ca paccayehi pavāretvā utṭhāyaṇā bhagavantaṃ abhivādetvā tikkhattuṃ padakkhiṇaṃ katvā pakkāmiti.

Upāsakavidhikathāvaṇṇanā niṭṭhitā.

Papañcasūdaniyā majjhimanikāyaṭṭhakathāya

Bhayabheravasuttavaṇṇanā niṭṭhitā.

5. Anaṅgaṇasuttavaṇṇanā

57. **Evaṃ me sutam...pe... āyasmā sārīputtoti** anaṅgaṇasuttam. Tatrāyaṃ anuttānapadavaṇṇanā – yathā cettha, evaṃ sabbasuttesu. Tasmā ito paraṃ ettakampi avatvā apubbapadavaṇṇanaṃyeva karissāma.

Cattāroti gaṇanaparicchedo. **Puggalā**ti sattā narā posā. Ettāvata ca puggalavādī mahātheroti na gaṇetabbaṃ, ayañhi āyasmā buddhaputtānaṃ seṭṭho, so buddhassa bhagavato desanaṃ avilomentoyeva deseti.

Sammutiparamatthadesanākathāvaṇṇanā

Buddhassa bhagavato duvidhā desanā sammutidesanā, paramatthadesanā cāti. Tattha puggalo satto itthi puriso khattiyō brāhmaṇo devo māroti evarūpā **sammutidesanā**. Aniccaṃ dukkhaṃ anattā, khandhā dhātū āyatanāni satipaṭṭhānāti evarūpā **paramatthadesanā**.

Tattha bhagavā ye sammutivasena desanaṃ sutvā atthaṃ paṭivijjhivā mohaṃ pahāya viśesaṃ adhigantaṃ samatthā, tesam sammutidesanaṃ deseti. Ye pana paramatthavasena desanaṃ sutvā atthaṃ paṭivijjhivā mohaṃ pahāya viśesamadhigantaṃ samatthā, tesam paramatthadesanaṃ deseti. Tatthāyaṃ upamā, yathā hi desabhāsākusalo tiṇṇaṃ vedānaṃ atthasaṃvaṇṇanako ācariyo ye dāmiḷabhāsāya vutte atthaṃ jānanti, tesam dāmiḷabhāsāya ācikkhati. Ye andhakabhāsādīsu aññatarāya, tesam tāya tāya bhāsāya. Evaṃ te māṇavakā chekaṃ byattaṃ ācariyamāgamma khippameva sippaṃ uggaṇhanti. Tattha ācariyo viya buddho bhagavā. Tayo vedā viya kathetabbabhāvena ṭhitāni tīṇi piṭakāni. Desabhāsākosallamiva sammutiparamatthakosallaṃ. Nānādesabhāsā māṇavakā viya sammutiparamatthadesanāpaṭivijjhanasamatthā veneyyasattā. Ācariyassa dāmiḷabhāsādiācikkhanaṃ viya bhagavato sammutiparamatthavasena desanā veditabbā. Āha cettha –

“Duve saccāni akkhāsi, sambuddho vadataṃ varo;
Sammutiṃ paramatthañca, tatiyaṃ nūpalabbhati.

Saṅketavacanaṃ saccaṃ, lokasammutikāraṇā;
Paramatthavacanaṃ saccaṃ, dhammānaṃ bhūtakāraṇā.

Tasmā vohārakusalassa, lokanāthassa satthuno;
Sammutiṃ voharantassa, musāvādo na jāyati”ti.

Apica aṭṭhahi kāraṇehi bhagavā puggalakathaṃ katheti – hirottappadīpanatthaṃ, kammassakatādīpanatthaṃ, paccattapurisakārādīpanatthaṃ, ānantariyadīpanatthaṃ, brahmavihāradīpanatthaṃ, pubbenivāsadīpanatthaṃ, dakkhiṇāvisuddhidīpanatthaṃ, lokasammutiyā appahānatthañcāti. “Khandhadhātuāyatanāni hiriyanti ottappanti”ti hi vutte mahājano na jānāti, sammohamāpajjati, paṭisattu hoti “kimidaṃ khandhadhātuāyatanāni hiriyanti ottappanti nāmā”ti. “Itthi hiriyati ottappati puriso khattiyō brāhmaṇo devo māro”ti vutte pana jānāti, na sammohamāpajjati, na paṭisattu hoti. Tasmā bhagavā **hirottappadīpanatthaṃ** puggalakathaṃ katheti.

“Khandhā kammassakā dhātuyo āyatanāni”ti vuttepi eseva nayo. Tasmā bhagavā **kammassakatādīpanatthaṃ** puggalakathaṃ katheti.

“Veḷuvanādayo mahāvihārā khandhehi kārapitā dhātūhi āyatanehi”ti vuttepi eseva nayo. Tasmā bhagavā **paccattapurisakārādīpanatthaṃ** puggalakathaṃ katheti.

“Khandhā mātaraṃ jīvitā voropenti pitaraṃ arahantaṃ ruhiruppādakammaṃ karonti, saṅghabhedakammaṃ karonti, dhātuyo āyatanāni”ti vuttepi eseva nayo. Tasmā bhagavā **ānantariyadīpanatthaṃ** puggalakathaṃ katheti. “Khandhā mettāyanti dhātuyo āyatanāni”ti vuttepi eseva nayo. Tasmā bhagavā **brahmavihāradīpanatthaṃ** puggalakathaṃ katheti.

“Khandhā pubbenivāsamanussaranti dhātuyo āyatanāni”ti vuttepi eseva nayo. Tasmā bhagavā **pubbenivāsadīpanatthaṃ** puggalakathaṃ katheti. “Khandhā dānaṃ paṭiggaṇhanti dhātuyo āyatanāni”ti

vuttepi mahājano na jānāti, sammohamāpajjati, paṭisattu hoti “kimidaṃ khandhadhātuāyatanāni paṭiggaṇhanti nāmā”ti. “Puggalā paṭiggaṇhanti sīlavanto kalyāṇadhammā”ti vutte pana jānāti, na sammohamāpajjati, na paṭisattu hoti. Tasmā bhagavā **dakkhiṇāvisuddhīpanattham** puggalakatham katheti.

Lokasammutiṅca buddhā bhagavanto nappajahanti, lokasamaññāya lokaniruttiyaṃ lokābhilāpe ṭhitāyeva dhammaṃ desenti. Tasmā bhagavā **lokasammutiyā appahānatthampi** puggalakatham katheti. Tasmā ayampi āyasmā lokavohārakusalatāya buddhassa bhagavato desanaṃ avilomanto lokasammutiyaṃ ṭhatvāva **cattārome, āvuso, puggalāti** āha. Tasmā ettha paramatthavasena aggahetvā sammutivaseneva puggalo veditabbo.

Santo samvijjamānāti lokasaṅketavasena atthi upalabbhamānā. **Lokasminti** sattaloke. **Sāṅgaṇova samānoti**ādīsu pana **aṅgaṇanti** katthaci kilesā vuccanti. Yathāha “tattha katamāni tīṇi aṅgaṇāni? Rāgo aṅgaṇaṃ, doso aṅgaṇaṃ, moho aṅgaṇa”nti (vibha. 924). Katthaci yaṃkiñci malaṃ vā paṅko vā, yathāha “tasseva rajassa vā aṅgaṇassa vā pahānāya vāyamatī”ti. Katthaci tathārūpo bhūmibhāgo, so bodhiyaṅgaṇaṃ cetiyaṅgaṇantiādīnaṃ vasena veditabbo. Idha pana nānappakārā tibbakilesā “aṅgaṇa”nti adhippetā. Tathā hi vakkhati “pāpakānaṃ kho etaṃ, āvuso, akusalānaṃ icchāvacaṇānaṃ adhivacaṇaṃ, yadidaṃ aṅgaṇa”nti (ma. ni. 1.60). Saha aṅgaṇena **sāṅgaṇo**.

Sāṅgaṇova samānoti sakilesoyeva santo. **Atthi me ajjhataṃ aṅgaṇanti yathābhūtaṃ nappajānātīti** mayhaṃ attano cittasantāne kilesa atthītipi na jānāti. “Ime kilesā nāma kakkhaḷā vāḷā jahitabbā na gahitabbā visaduṭṭhasallasadisā”ti evaṃ yāthāvasarasatopi na jānāti. Yo atthīti ca jānāti, evaṅca jānāti. So “atthi me ajjhataṃ aṅgaṇanti yathābhūtaṃ pajānātī”ti vuccati. Yassa pana na ca maggena samūhatā kilesā, na ca uppajjanti yena vā tena vā vāritattā, ayamidha anaṅgaṇoti adhippeto. **Natthi me ajjhataṃ aṅgaṇanti yathābhūtaṃ nappajānātīti** “mayhaṃ kilesā yena vā tena vā vāritattā natthi, na maggena samūhatattā”ti na jānāti, “te uppajjamānā mahāanattaṃ karissanti kakkhaḷā vāḷā visaduṭṭhasallasadisā”ti evaṃ yāthāvasarasatopi na jānāti. Yo pana “iminā kāraṇena natthi”ti ca jānāti, evaṅca jānāti, so “natthi me ajjhataṃ aṅgaṇanti yathābhūtaṃ pajānātī”ti vuccati. **Tatrāti** tesu catūsu puggalesu, tesu vā dvīsu sāṅgaṇesu, **vāyanti** yo ayaṃ, yāyanti paṭho.

58. Ko nu kho, āvuso, sārīputta, hetu ko paccayoti ubhayaṅkāpi kāraṇameva pucchati. **Yenimesanti** yena hetunā yena paccayena imesaṃ dvinnāṃ eko seṭṭhapuriso eko hīnapuriso akkhāyati, so ko hetu ko paccayoti evamettha sambandho veditabbo. Tattha kiñcāpi “nappajānāti pajānātī”ti evaṃ vuttaṃ, pajānanā nappajānanāti idameva ubhayaṃ hetu ceva paccayo ca.

59. Thero pana attano vicitraṭṭhānātāya taṃ pākāṭataraṃ katvā dassetaṃ puna **tatrāvusoti**ādīmāha. Tattha **tasettaṃ pāṭikānkhanti** tassa puggalassa etaṃ pāṭikānkhitaṃ. Idameva esa pāpuṇissati, na aññanti icchitaṃ, avassaṃ bhāvīti vuttaṃ hoti. “Na chandaṃ janessati”tiādīnā nayena vuttaṃ achandajananādim sandhāyāha.

Tattha ca **na chandaṃ janessatīti** appajānanto tassa aṅgaṇassa pahānattham kattukamyatāchandaṃ na janessati. **Na vāyamissatīti** tato balavataraṃ vāyamaṃ na karissati, **na vīriyaṃ ārabhissatīti** thāmagatavīriyaṃ pana neva ārabhissati, na pavattessatīti vuttaṃ hoti. **Sāṅgaṇoti** imehi rāgādīhi aṅgaṇehi sāṅgaṇo. **Samkiliṭṭhacittoti** tehiyeva suṭṭhutaṃ kiliṭṭhacitto malīnacitto vibādhitacitto upatāpitacitto ca hutvā. **Kālaṃ karissatīti** marissati.

Seyyathāpīti yathā nāma. **Kaṃsapātīti** kaṃsalohabhājanaṃ. **Ābhatāti** ānītā. **Āpaṇā vā kammārakulā vāti** āpaṇato vā kaṃsapātīkāraṇānaṃ kammāraṇaṃ gharato vā. **Rajenāti** āgantukarajena paṃsuādinā. **Malenāti** tattheva uṭṭhitena lohamalena. **Pariyonaddhāti** sañchannā. **Na ceva paribhuñjeyyunti** udakakhādanīyapakkhipanādīhi paribhogaṃ na kareyyuṃ. **Na ca pariyaḍapeyyunti** dhovanaghaṃsanādīhi na parisuddhaṃ kāraṇeyyūṃ. **Rajāpatheti** rajapathe. Ayameva vā paṭho, rajassa āgamaṇatṭhāne vā vuṭṭhānūṭṭhāne vā heṭṭhāmañce vā thusakoṭṭhake vā bhājanantare vā, yattha rajena okiriyatīti attho. **Samkiliṭṭhatarā assa malaggahitāti** ettha rajāpathe nikkhipanena samkiliṭṭhatarā, aparibhogāpariyaḍapanehi malaggahitatarāti vuttaṃ hoti, paṭipucchāvacaṇaṅcetaṃ. Tenassa evamattho veditabbo, āvuso, sā kaṃsapātī evaṃ kariyamānā aparena kālena samkiliṭṭhatarā ca malaggahitatarā ca mattikapātīti vā kaṃsapātīti vā itipi dujjānā bhavēyya nu

kho noti, thero taṃ paṭijānanto āha “evamāvuso”ti. Puna dhammasenāpati opammaṃ sampaṭipādentō, **evameva khoti**ādīmāha. Tatthevaṃ opammasaṃsandanaṃ veditabbā – kiliṭṭhakaṃsapātisadisō sāṅgaṇo puggalo. Saṃkiliṭṭhakaṃsapātiyā napaṭibhuñjanamādiṃ katvā rajāpathanikkhepo viya tassa puggalassa pabbajjamaṃ labhamānassa vejjakammādisu pasutapuggalasantike pabbajjāpaṭilābho. Saṃkiliṭṭhakaṃsapātiyā puna saṃkiliṭṭhatarabhāvo viya tassa puggalassa anukkamena ācariyupajjhāyānaṃ anusikkhato vejjakammādikaraṇaṃ, ettha ṭhitassa sāṅgaṇakālakiriya. Atha vā anukkamena dukkaṭadubbhāsītavītikkamaṇaṃ, ettha ṭhitassa sāṅgaṇakālakiriya. Atha vā anukkamena pācittiyathullaccayavītikkamaṇaṃ, saṅghādisesavītikkamaṇaṃ, pārājikavītikkamaṇaṃ, mātuḡhātādiānantariyakaraṇaṃ, ettha ṭhitassa sāṅgaṇakālakiriya.

Samkiliṭṭhacitto kālaṃ karissatīti ettha ca akusalacittena kālaṃ karissatīti na evamattho daṭṭhabbo. Sabbasattā hi pakaticittena bhavaṅgacitteneva kālaṃ karonti. Ayaṃ pana avisodhetvā cittasantānaṃ kālaṃ karissatīti etamatthaṃ sandhāya evaṃ vuttoti veditabbo.

Dutiyavāre **pariyodapeyyunti** dhovanaghaṃsanasaṅghārikāparimajjanādīhi parisuddhaṃ ādāsamaṅgalasadisamaṃ kareyyuṃ. **Na ca naṃ rajāpatheti** pubbe vuttappakāre ṭhāne anikkhipitvā karaṇḍamañjūsādīsu vā ṭhapeyyuṃ, paliveṭhetvā vā nāgadante lageyyuṃ. Sesamaṃ vuttanayānusāreṇeva gahetabbaṃ.

Upamāsaṃsandanaṃ cettha evaṃ veditabbā – kiliṭṭhakaṃsapātisadisō sāṅgaṇo bhābbapuggalo. Kiliṭṭhakaṃsapātiyā paṭibhuñjanamādiṃ katvā suddhaṭṭhāne ṭhapanamaṃ viya tassa puggalassa pabbajjamaṃ labhamānassa pesalabhikkhūnaṃ santike pabbajjāpaṭilābho. Ye ovaḍanti anusāsanti appamattakampi pamādaṃ disvā daṇḍakammaṃ katvā punappunaṃ sikkhāpentī, saṃkiliṭṭhakaṃsapātiyā aparakāle parisuddhapaṭiyodātabhāvo viya tassa puggalassa ācariyupajjhāyānaṃ anusikkhato anukkamena sammāvattapaṭipatti, ettha ṭhitassa anaṅgaṇakālakiriya. Atha vā anukkamena parisuddhe sīle paṭiṭṭhāya attano anurūpaṃ buddhavacanaṃ uggaṇhitvā dhutaṅgāni samādāya attano anukūlakammaṭṭhānaṃ gahetvā gāmantasēnaṃ avāsaṃ muñcītvā paṭasēnaṃ avāso, ettha ṭhitassa anaṅgaṇakālakiriya. Atha vā anukkamena kaṣiṇapaṭikammaṃ katvā aṭṭhasamāpattinibbattaṇaṃ kilesavikkhambhanaṃ, vipassanāpādaḍakajjhānaṃ vuttāyā vipassanāya kilesānaṃ tadaṅganivāraṇaṃ, sotāpaṭṭiphalādhigama...pe... arahattasacchikiriyaṭi ettha ṭhitassa accantaṃ anaṅgaṇakālakiriya eva.

Tatīyavāre **subhanimittanti** rāgaṭṭhāniyaṃ iṭṭhāraṃmaṇaṃ. **Manasi karissatīti** tasmaṃ vipannassati taṃ nimittaṃ āvajjissati. **Tassa subhanimittassa manasikārāti** tassa puggalassa subhanimittamanasikārakāraṇa. **Anuddhaṃsessatīti** hiṃsissati adhibhavissati. Rāgo hi uppajjanto kusalavāraṃ pacchindītvā sayameva akusalajavanaṃ hutvā tiṭṭhanto kusalacittaṃ anuddhaṃsetīti veditabbo. Sesamaṃ vuttanayānusāreṇeva gahetabbaṃ.

Opammasaṃsandanaṃ panettha evaṃ veditabbā – parisuddhakaṃsapātisadisō pakatiyā appakilesō anaṅgaṇapuggalo. Parisuddhakaṃsapātiyā napaṭibhuñjanaṃ ādiṃ katvā rajāpathe nikkhepo viya tassa puggalassa pabbajjamaṃ labhamānassatīti ito paraṃ sabbaṃ paṭhamavārasadisameva.

Catutthavāre **subhanimittaṃ na manasi karissatīti** tasmaṃ sativiraḡbhāvato taṃ nimittaṃ nāvajjissati, sesamaṃ dutiyavārānusāreṇa veditabbaṃ. “Ayaṃ kho, āvuso”tiādi “ko nu kho, āvuso”tiādimhi vuttanayameva.

60. Idāni taṃ aṅgaṇaṃ nānappaḡarato pākāṭaṃ kārapetukāmenāyasmātā mahāmogallānena “aṅgaṇaṃ aṅgaṇa”ntiādinā nayena puṭṭho taṃ byākaronto **pāpakānaṃ kho etaṃ, āvusoti**ādīmāha. Tattha **icchāvacaṇānanti** icchāya avacaṇaṃ, icchāvasena otiṇṇānaṃ pavattānaṃ nānappaḡarānaṃ kopaappaccayānanti attho. **Yaṃ idhekaccassāti** yena idhekaccassa evaṃ icchā uppajjeyya, taṃ ṭhānaṃ taṃ kāraṇaṃ vijjati atthī, upalabbhatīti vuttaṃ hoti. **Āpanno assanti** āpanno bhaveyyaṃ. **Na ca maṃ bhikkhū jāneyyunti** bhikkhū ca maṃ na jāneyyūṃ. Kiṃ panettha ṭhānaṃ, lābhatthikatā. Lābhatthiko hi bhikkhu pakatiyāpi ca katapuñño manussehi sakkato garukato evaṃ cinteti “āpattiṃ āpannaṃ bhikkhuṃ therā ṇatvā majjhimānaṃ ārocenti, te navakānaṃ, navakā vihāre vighāsādādinā, te ovādaṃ āgatānaṃ bhikkhunīnaṃ, evaṃ kamena catasso parisā jānanti. Evamassa lābhantarāyo hoti. Aho vatāhaṃ āpattiṃca vata āpanno assaṃ, na ca maṃ bhikkhū jāneyyu”nti.

Yaṃ taṃ bhikkhuṃ bhikkhū jāneyyunti yena kāraṇena taṃ bhikkhuṃ aññe bhikkhū jāneyyumuṃ, taṃ kāraṇaṃ vijjati kho pana atthiyeva, no natthi. Therā hi ñatvā majjhimanāṃ ārocenti. Evaṃ so pubbe vuttanayena catūsu parisāsu pākaṭo hoti. Evaṃ pākaṭo ca ayasābhībhūto gāmasatampi pavisitvā ummārasatesu ṭhānesu uñchitvā yathādhoteṇa pattena nikkhamati. Tato **jānanti maṃ bhikkhū āpattiṃ āpannoti** tehi camhi evaṃ nāsitoti cintevā, **iti so kupito hoti appatīto** so iminā kāraṇena kupito ceva hoti kodhābhībhūto appatīto ca domanassābhībhūto.

Yo ceva kho, **āvuso, kopo yo ca appaccayo ubhayametam aṅgaṇanti**, āvuso, yo cāyaṃ saṅkhārakkhandhasaṅgahito kopo, yo ca vedanākkhandhasaṅgahito appaccayo, etaṃ ubhayaṃ aṅgaṇanti evamettha attho daṭṭhabbo. Idañca tādīsanaṃ puggalānaṃ vasena vuttaṃ. Lobho pana imassa aṅgaṇassa pubbhāgavasena, moho sampayogavasenāpi gahitoyeva hoti.

Anuraho manti purimasadisameva bhikkhuṃ gahetvā vihārapaccante senāsanam pavesetvā dvāraṃ thaketvā codente icchati. **Ṭhānaṃ kho panetanti** etaṃ kāraṇaṃ vijjati, yaṃ taṃ bhikkhuṃ catuparisamajjhe ānetvā byattā vinītā “tayā asukamhi nāma ṭhāne vejjakammaṃ kata” ntiādinā nayena codeyyumuṃ. So catūsu parisāsu pākaṭo hoti. Evaṃ pākaṭo ca ayasābhībhūtoti sabbam purimasadisameva.

Sappaṭipuggaloti samāno puggalo. **Samānoti** sāpattiko. **Paṭipuggaloti** codako. Ayaṃ sāpattikeneva codanaṃ icchati, tvampi imañcīmañca āpattiṃ āpanno, taṃ tāva paṭikarohi pacchā maṃ codessasīti vattum sakkāti maññamāno. Apica jātiādīhipi samāno puggalo sappaṭipuggalo. Ayañhi attano jātiyā kulena bāhusaccena byattatāya dhutaṅgenāti evamādīhipi samāneneva codanaṃ icchati, tādīsena vuttaṃ nātidukkham hotīti maññamāno. **Appaṭipuggaloti** ettha ayutto paṭipuggalo appaṭipuggalo. Imehi āpattādīhi asadisattā paṭisattu paṭisallo codako bhavituṃ ayuttoti vuttaṃ hoti. **Iti so kupitoti** iti so imāya appaṭipuggalacodanāya evaṃ kupito hoti.

Catutthavāre **aho vatāti** “aho vata re amhākaṃ paṇḍitakā, aho vata re amhākaṃ bahussutakā tevijjakā” ti (dī. ni. 1.291) garahāyaṃ dissati. “Aho vata maṃ daharaṃyeva samānaṃ rajje abhisīñceyyu” nti (mahāva. 57) patthanāyaṃ. Idha patthanāyameva. **Paṭipucchitvā paṭipucchitvāti** punappunaṃ pucchitvā. Ayaṃ bhikkhu lābhatthiko bhagavato attānaṃ paṭipucchitabbaṃ icchati, tañca kho anumati pucchāya, no maggaṃ vā phalaṃ vā vipassanaṃ vā antaraṃ katvā. Ayañhi passati bhagavantaṃ sārīputtādayo mahāthere “taṃ kiṃ maññasi, sārīputta, moggallāna, kassapa, rāhula cakkhuṃ niccaṃ vā aniccaṃ vā” ti evaṃ parisamajjhe paṭipucchitvā paṭipucchitvā dhammaṃ desentaṃ, manusse ca “tesa paṇḍitā therā satthu cittaṃ ārādentī” ti vaṇṇaṃ bhaṇante, lābhasakkārañca upaharante. Tasmā taṃ lābhasakkāraṃ icchanto evaṃ cintetvā nikkhañitvā ṭhapitakhāṇu viya bhagavato puratova hoti.

Iti so kupitoti atha bhagavā taṃ amanasikarivāva aññaṃ theram paṭipucchitvā dhammaṃ deseti, tena so kupito hoti bhagavato ca therassa ca. Kathaṃ bhagavato kuppāti? “Ahaṃ pabbajitakālato pabhuti gandhakuṭipariveṇato bahinikkhamaṇaṃ na jānāmi, sabbakālaṃ chāyāva na vijahāmi, maṃ nāma pucchitvā dhammadesanāmetampi natthi. Tamuhuttaṃ diṭṭhamattakameva theram pucchitvā dhammaṃ deseti” ti evaṃ bhagavato kuppāti. Kathaṃ therassa kuppāti? “Ayaṃ mahallakatthero bhagavato purato khāṇu viya nisīdati, kadā nu kho imaṃ dhammakammikā abhabbaṭṭhānaṃ pāpetvā nīharissanti, ayañhi yadi imasmim vihāre na bhavye, avassaṃ bhagavā mayā saddhiṃ sallapeyyā” ti evaṃ therassa kuppāti.

Purakkhatvā purakkhatvāti purato purato katvā, samparivāretvāti vuttaṃ hoti. Ayampi lābhatthikoyeva, ayañhi passati bahussute bhikkhū mahāparivāreṇa gāmaṃ pavisante, cetiyaṃ vandante, tesañca taṃ sampattiṃ disvā upāsake pasanne pasannākāraṃ karonte. Tasmā evaṃ icchati. **Kupitoti** ayampi dvīsu ṭhānesu kuppāti bhikkhūnaṃ therassa ca. Kathaṃ bhikkhūnaṃ? “Ime yadeva mayhaṃ uppajjati cīvaraṃ vā piṇḍapāto vā, taṃ gahetvā paribhuñjanti, mayhaṃ pana pattacīvaraṃ gahetvā piṭṭhito āgacchantopi natthi” ti evaṃ bhikkhūnaṃ kuppāti. Kathaṃ therassa? “Eso mahallakatthero tesu tesu ṭhānesu sayameva paññāyati, kudāssu nāma naṃ dhammakammikā nikkadḍhissanti, imasmim asati avassaṃ maṃyeva parivāressanti” ti.

Bhattachgeti bhojanatṭhāne. **Aggāsanti** saṅghattherāsaṇaṃ. **Aggodakanti** dakkhiṇodakaṃ. **Aggapiṇḍanti** saṅghattherapiṇḍaṃ. Sabbattha vā **agganti** paṇītādhivacanametam. Tattha **ahameva labheyyanti** icchā nātimahāsāvajjā. **Na añño bhikkhu labheyyāti** pana atimahāsāvajjā. Ayampi lābhatthiko

pāsādiko hoti cīvaradhāraṇādīhi, kadāci pabbajati, kadāci vibbhamati. Tena so pubbe laddhapubbaṃ āsanādiṃ pacchā alabhanto evaṃ cintesi. **Na so bhikkhu labheyyāti** na so bhikkhu therānaṃ aggāsanādīsu tadanusārena majjhimānaṃ aññesaṅca navānaṃ kadāci yaṃ vā taṃ vā sabbanihīnaṃ āsanādiṃ labhati. **Kupitoti** ayampi dvīsu ṭhānesu kuppatti manussānaṅca therānaṅca. Kathaṃ manussānaṃ? “Ime maṅgalādīsu maṃ nissāya bhikkhū labhanti, ete, ‘bhante, ettake bhikkhū gahetvā amhākaṃ anukampaṃ karoṭhā’ ti vadanti, idāni taṃmuhuttaṃ diṭṭhamattakaṃ mahallakattheraṃ gahetvā gatā, hotu idāni, nesaṃ kicce uppanne jānissāmi” ti evaṃ manussānaṃ kuppatti. Kathaṃ therānaṃ? “Ime nāma yadi na bhaveyyuṃ, maṃyeva manussā nimanteyyu” nti evaṃ therānaṃ kuppatti.

Anumodeyyanti anumodanaṃ kareyyaṃ. Ayampi lābhatthiko yaṃ vā taṃ vā khaṇḍānumodanaṃ jānāti, “so anumodanaṭṭhāne bahū mātugāmā āgacchanti, tā maṃ sañjānitvā tato pabhuti thālakabhikkhaṃ dassanti” ti patthento evaṃ cintesi. **Ṭhānanti** bahussutānaṃ anumodanā bhāro, tena bahussuto anumodeyyāti vuttaṃ hoti. **Kupitoti** ayampi tīsu ṭhānesu kuppatti manussānaṃ therassa dhammakathikassa ca. Kathaṃ manussānaṃ? “Ime pubbe maṃyeva upasaṅkamitvā yācanti ‘amhākaṃ nāgatthero amhākaṃ sumanatthero anumodatū’ ti, ajja pana nāvocu” nti evaṃ manussānaṃ kuppatti. Kathaṃ therassa? “Ayaṃ saṅghatthero ‘tumhākaṃ kulupakaṃ nāgattheraṃ sumanattheraṃ upasaṅkamatha, ayaṃ anumodissati’ ti na bhaṇati” ti evaṃ therassa kuppatti. Kathaṃ dhammakathikassa? “Therena vuttamatteyyeva pahāraṃ laddhakukkuṭo viya turitaturitaṃ vassati, imaṃ nāma nikkadḍhantā natthi, imasmiṃhi asati ahameva anumodeyya” nti evaṃ dhammakathikassa kuppatti.

Ārāmagatānanti vihāre sannipatitānaṃ. Ayampi lābhatthiko yaṃ vā taṃ vā khaṇḍadhammakathaṃ jānāti, so passati tādīsesu ṭhānesu dvīyojanatīyojanato sannipatitvā bhikkhū sabbarattikāni dhammassavanāni suṇante, tuṭṭhacitte ca dahare vā sāmaṇere vā sādhu sādhuṭi mahāsaddena sādhuḥkāraṃ dente, tato dutiyadivase antogāmagate bhikkhū upāsakā pucchanti “ke, bhante, dhammaṃ kathesu” nti. Te bhaṇanti “asuko ca asuko cā” ti. Taṃ sutvā pasannā manussā dhammakathikānaṃ mahāsakkāraṃ karonti. So taṃ icchamāno evaṃ cintesi. **Ṭhānanti** bahussutānaṃ vinicchayakusalānaṃ dhammadesanā bhāro, tena bahussuto deseyyāti vuttaṃ hoti. **Kupitoti** catuppadikaṃ gāthampi vattum okāsaṃ alabhamāno kupito hoti attano mandabhāvassa “ahaṅhi mando duppaṅṅo kuto labhissāmi desetu” nti.

Bhikkhunīnanti ovādatthaṃ vā uddesatthaṃ vā paripucchatthaṃ vā pūjākaraṇatthaṃ vā ārāmaṃ āgantvā sannipatitabhikkhunīnaṃ. Ayampi lābhatthiko, tassevaṃ hoti imā mahākulā pabbajitā bhikkhuniyo, tāsū kulesu pavisetvā nisinnāsu manussā pucchissanti “kassa santike ovādaṃ vā uddesaṃ vā paripucchaṃ vā gaṇhathā” ti. Tato vakkhanti “asuko nāma ayyo bahussuto, tassa detha karoṭhā” ti, tenassa evaṃ icchā uppajjati. **Ṭhānanti** ovādādayo nāma bahussutānaṃ bhāro, tena bahussuto deseyyāti vuttaṃ hoti. **Kupitoti** ayampi dvīsu ṭhānesu kuppatti, tāsāṅca bhikkhunīnaṃ “imā pubbe maṃ nissāya uposathappavāraṇādīni labhanti, tā idāni taṃmuhuttaṃ diṭṭhamattakamahallakattherassa santikaṃ gatā” ti. Dhammakathikassa ca “esa imāsaṃ sahasā ovādaṃ adāsiyevā” ti.

Upāsakānanti, ārāmagatānaṃ upāsakānaṃ. Nissaṭṭhakammantā nāma mahāupāsakā honti, te puttabhātukānaṃ kammaṃ niyyātetvā dhammaṃ suṇantā vicaranti, ayaṃ tesam desetuṃ icchati, kiṃ kāraṇā? Ime pasīditvā upāsikānampi āroccanti, tato saddhiṃ upāsikāhi mayhameva lābhasakkāraṃ upaharissanti. **Ṭhānaṃ** bahussuteneva yojetabbaṃ. **Kupitoti** ayampi dvīsu ṭhānesu kuppatti, upāsakānaṅca “ime aññattha suṇanti, amhākaṃ kulupakassa santike suṇāmāti nāgacchanti, hotu idāni, tesam uppanne kicce jānissāmi” ti dhammakathikassa ca, “ayametesam deseti” ti.

Upāsikānanti ārāmagatānaṃ. **Upāsikā** nāma āsanapūjādīkaraṇatthaṃ vā uposathadivase vā dhammassavanatthaṃ sannipatitā. Sesam upāsakavāre vuttanayameva.

Sakkareyyunti sakkaccaṅca kareyyuṃ, sundaraṅca kareyyuṃ. Iminā attani kāraṃ karīyamānaṃ sakkaccaṃ kataṅca sundaraṅca pattheti. **Garuṃ kareyyunti** bhāriyaṃ kareyyuṃ. Iminā bhikkhūhi attānaṃ garuṭṭhāne ṭhapīyamānaṃ pattheti. **Māneyyunti** piyāyeyyuṃ. **Pūjeyyunti** evaṃ sakkarontā garuṃ karontā mānentā paccayehi pūjeyyunti paccayapūjaṃ pattheti. **Ṭhānanti** “piyo garu bhāvaniyo” ti vuttappakāro bahussuto ca sīlavā ca etaṃ vidhiṃ arahati tena bhikkhū evarūpaṃ evaṃ kareyyunti vuttaṃ hoti. **Kupitoti** ayampi dvīsu ṭhānesu kuppatti bhikkhūnaṅca “ime etaṃ sakkarontī” ti therassa ca “imasmiṃ asati maṃyeva sakkareyyu” nti. Esa nayo ito paresu tīsu vāresu.

Paṇitānaṃ cīvarānanti paṭṭadukūlapaṭṭuṇṇakoseyyādīnaṃ mahagghasukhumasukhasamphassānaṃ cīvarānaṃ. Idhāpi **ahameva lābhī assanti** icchā nātimahāsāvajjā. **Na añño bhikkhu lābhī assāti** pana mahāsāvajjā.

Paṇitānaṃ piṇḍapātānanti sappitelamadhusakkarādipūritānaṃ seṭṭhapīṇḍapātānaṃ. **Paṇitānaṃ senāsānānanti** anekasatasahassagghanakānaṃ mañcapīṭhādīnaṃ paṇitānaṃ.

Gilānappaccayabhesajjaparikkhārānanti sappitelamadhuphāṇitādīnaṃ uttamabhesajjānaṃ. Sabbatthāpi ṭhānaṃ bahussutehi puññavantehi ca yojetabbaṃ. **Kupitoti** sabbatthāpi dvīsu ṭhānesu kuppāti, manussānañca “imesaṃ nāma paricitabhāvopi natthi, dīgharattaṃ ekato vasantassa paṃsukūlatthāya vā piṇḍapātathāya vā sappitelādikāraṇā vā gharapaṭipāṭiyā carantassāpi me ekadivasampi kiñci paṇitaṃ paccayaṃ na denti. Āgantukaṃ mahallakaṃ pana disvāva yaṃ icchati, taṃ denti”ti, therassa ca “ayampi mahallako imesaṃ attānaṃ dassentoyeva carati, kudāssu nāma naṃ dhammakammikā nikkadḍheyyuṃ, evaṃ imasmiṃ asati ahameva lābhī assa”nti.

Imesaṃ kho, etaṃ āvusoti imesaṃ heṭṭhā ekūnavīsativārehi vuttānaṃ icchāvacarānaṃ.

61. Dissanti ceva sūyanti cāti na icchāvacarā cakkhunā dissanti, na sotena sūyanti, manoviññānavisayattā. Appahīnaicchāvacarassa pana puggalassa icchāvacaravasena pavattakāyakammaṃ disvā diṭṭhā viya vacīkammaṃ sutvā sutā viya ca hontī, tena vuttaṃ “dissanti ceva sūyanti cā”ti. Paccakkhakāle dissanti, “asuko kira bhikkhu īdiso”ti tirokkhakāle sūyanti. **Kiñcāpīti** anuggahagarahavacanaṃ. Tena āraññikattaṃ anuggaṇhāti, icchāvacarānaṃ appahānaṃ garahati.

Tatrāyaṃ yojanā, kiñcāpi so bhikkhu gāmantasenāsanaṃ paṭikkhipitvā āraññiko hoti, ante pantasenāsane vasati, ime cassa ettakā icchāvacarā appahīnā. Kiñcāpi so atirekalābhaṃ paṭikkhipitvā piṇḍapātiko hoti. Kiñcāpi so loluppacāraṃ vajjetvā sapadānacārī hoti. Kiñcāpi so gahapaticīvaraṃ paṭikkhipitvā paṃsukūliko hoti.

Lūkhacīvaradharoti ettha pana **lūkhanti** satthalūkhaṃ suttalūkhaṃ rajanalūkhanti tīhi kāraṇehi lūkhaṃ veditabbaṃ. Tattha satthena khaṇḍākhāṇḍikaṃ chinnaṃ **satthalūkhaṃ** nāma, taṃ agghena parihāyati, thūladīghasuttakena sibbitaṃ **suttalūkhaṃ** nāma, taṃ phassena parihāyati kharasamphassaṃ hoti. Rajanena rattaṃ **rajanalūkhaṃ** nāma, taṃ vaṇṇena parihāyati dubbaṇṇaṃ hoti. Kiñcāpi so bhikkhu evaṃ satthalūkhasuttalūkharajanalūkhacīvaradharo hoti, ime cassa ettakā icchāvacarā appahīnā dissanti ceva sūyanti ca, atha kho naṃ viññū sabrahmacārī neva sakkaronti...pe... na pūjentīti. **Taṃ kissa hetūti** ettha **tanti** nipātamaṃ, **kissa hetūti** kiṃ kāraṇā. **Te hi tassa...pe... sūyanti** ca yasmā tassa te pāpakā sūyanti cāti vuttaṃ hoti. Imesaṃ icchāvacarānaṃ appahīnattāti ayamettha adhippāyo.

Idāni tamattaṃ upamāya pākātaṃ karonto **seyyathāpīti**adimāha. Tattha **kuṇapanti** matakāḷevaraṃ. Ahissa kuṇapaṃ **ahikuṇapaṃ**. Evaṃ itarāni. Atipaṭikūlajjigucchanīyabhāvato cettha imāneva tīpi vuttānīti veditabbāni. Aññesañhi sasasūkarādīnaṃ kuṇapaṃ manussa kaṭukabhaṇḍādīhi abhisāṅkharitvā paribhuñjantīpi. Imesaṃ pana kuṇapaṃ abhinavampi jigucchantīyeva, ko pana vādo kālātikkamena pūtibhūte. **Racayitvāti** vaḍḍhetvā, paripūretvāti attho, kuṇapaṃ gahetvā kaṃsapātiyaṃ pakkhipitvāti vuttaṃ hoti. **Aññissāti** aparāya. **Paṭikujjivāti** pidahitvā. **Antarāpaṇanti** āpaṇānamantare mahājanasaṃkiṇṇaṃ racchāmukhaṃ. **Paṭipajjeyyunti** gaccheyyūṃ. **Jaññajaññaṃ viyāti** cakkhacokkhaṃ viya manāpamanāpaṃ viya. Apica vadhukāpaṇṇākāraṃ viyāti vuttaṃ hoti. **Vadhukāti** janetti vuccati, tassā nīyamānaṃ paṇṇākāraṃ jaññaṃ, ubhayatthāpi ādaravasena vā pasamsāvasena vā punaruttaṃ. “Jaññajaññaṃ byā”tipi pāṭho.

Apāpuritvāti vivaritvā. **Tassa saha dassanena amanāpatā ca saṅṭhaheyyāti** tassa kuṇapassa dassanena saheva tassa janassa amanāpatā tiṭṭheyya. **Amanāpatāti** ca “amanāpamida”nti uppannacittacetāsikanametaṃ adhivacanaṃ. Esa nayo **paṭikulyajegucchatāsu. Jighacchitānampīti** chātānampī. **Na bhottukamyatā assāti** bhūñjitukāmatā na bhaveyya. **Pageva suhitānanti** dhātānaṃ pana paṭhamatameva bhūñjitukāmatā na bhaveyyāti vuttaṃ hoti.

Tatrāyaṃ upamāsaṃsandanā – parisuddhakaṃsapātīsadisaṃ imassa pabbajjāliṅgaṃ, kuṇaparacanaṃ viya icchāvacarānaṃ appahānaṃ, aparakaṃsapātiyā paṭikujjhaṃ viya āraññikaṅgādīhi

icchāvacarappaṭicchādanam, kaṃsapātim vivarivā kuṇapadassanena janassa amanāpatā viya āraññikaṅgādīni anādiyivā icchāvacaradassanena sabrahmacārīnam asakkāraṅgādītī.

62. Sukkapakkhe pana, **kiñcāpīti** anuggahapasamsāvacaṇam, tena āraññikattam anuggaṇhāti, icchāvacarappahānam pasamsati. **Nemantanikoti** nimantanapaṭiggāhako. **Vicitakāḷakanti** vicinitvā apanītakāḷakam. **Anekasūpaṃ anekabyañjananti** ettha **sūpo** nāma hatthahāriyo vuccati. **Byañjananti** uttaribhaṅgam, tena macchamamsamuggasūpādīhi anekasūpaṃ, nānappakāramamsādibyañjanehi anekabyañjananti vuttam hoti. Sesam vuttanayeneva vedītabbam.

Upamāsamsandane ca sālivarabhattaracaṇam viya icchāvacarappahānam, aparakaṃsapātiyā paṭikujjhanam viya appicchatāsamuttāhānehi gāmantavihārādīhi icchāvacarappahānapaṭicchādakam, kaṃsapātim vivarivā sālivarabhattadassanena janassa manāpatā viya gāmantavihārādīni anādiyivā icchāvacarappahānadassanena sabrahmacārīnam sakkāraṅgādītī vedītabbā.

63. **Upamā maṃ, āvuso sārīputta, paṭibhātīti** mayham, āvuso sārīputta, upamā upaṭṭhāti. Ekam upamaṃ vuttakāmo ahanti adhippāyo. **Paṭibhātu tanti** tuyham paṭibhātu upaṭṭhātu, vada tvanti adhippāyo. **Ekamidāhanti** ettha **idāti** nipātamattam, ekasmiṃ samaye ahanti vuttam hoti, bhummatthe upayogavacaṇam. **Rājagahe viharāmi giribbajeti, rājagahanti** tassa nagarassa nāmaṃ. Samantato pana giriparikkhepena vajo viya saṅghitattā **giribbajanti** vuccati. Tasmīṃ nagare viharāmi, tam nissāya aham viharāmīti vuttam hoti. **Atha khvāhanti** atha kho aham. Ettha ca **athāti** aññadhikāravacaṇārambhe nipāto. **Khoti** padapūraṇamatte. **Pubbaṅhasamayanti** divasassa pubbaṅhasamayam. Pubbaṅhasamayeti attho, pubbaṅhe vā samayam pubbaṅhasamayam, pubbaṅhe ekam khaṇanti vuttam hoti, evam accantasamyoge upayogavacaṇam labbhati. **Nivāsetvāti** paridahitvā, viharānivāsanaparivattanavasenetam vedītabbam. Gāmapavesanattāyā vā saṅghapetvā nivāsanavasena, na hi so tato pubbe anivattho ahosi.

Pattacīvaramādāyāti pattam hatthena cīvaram kāyena ādiyivā. **Piṇḍāyāti** piṇḍapātattāyā. **Samīṭīti** tassa nāmaṃ. **Yānakāraputtoti** rathakāraputto. **Paṇḍuputtoti** paṇḍussa putto. **Ājīvakoti** naggasamaṇako. **Purāṇayānakāraputtoti** porāṇayānakāraikulassa putto. **Paccupaṭṭhitoti** upagantvā ṭhito. **Vaṅkam** nāma ekato kuṭīlam. **Jimham** nāma sappagatamaggasadisam. **Dosanti** phegguvīsamagaṅghikādi. **Yathā yathāti** kālatthe nipāto, yadā yadā yasmīṃ tasmīṃ kāleti vuttam hoti. **Tathā tathāti** ayampi kālatthoyeva, tasmīṃ tasmīṃ kāleti vuttam hoti. So attano suttānulomena cintesi, itaro tena cintitakkhaṇe cintitaṭṭhānameva tacchati. **Attamanoti** sakamano tuṭṭhamano pītisomanassehi gahitamano. **Attamanavācam nicchāresīti** attamanatāyā vācam, attamanabhāvassa vā yuttam vācam nicchāresi udīrayi, pabyāharīti vuttam hoti. **Hadayā hadayam maññe aññāyāti** cittaṇa cittaṃ jānitvā viya.

Assaddhāti buddhadhammasaṅghesu saddhāvīrahitā. **Jīvikatthāti** iṇabhayādīhi pīḷitā bahi jīvitum asakkontā idha jīvikatthikā hutvā. **Na saddhāti** na saddhāyā. **Saṭṭhā māyāvinoti** māyāsāṭṭheyyehi yuttā. **Ketabinoti** sikkhitakerāṭīkā, nipphannathāmagatasāṭṭheyyāti vuttam hoti. Sāṭṭheyyāñhi abhūtaguṇadassanato abhūtabhaṇḍaguṇadassanasamaṃ katvā “kerāṭīyā”nti vuccati. **Unnaḷāti** uggatanaḷā, utṭhitatucchamānāti vuttam hoti. **Capalāti** pattacīvaramaṇḍanādīnā cāpallena yuttā. **Mukharāti** mukhakharā, kharavacaṇāti vuttam hoti, **vikīṇṇavācāti** asaṃyatavacaṇā, divasampi nīratthakavacaṇappalāpīno. **Indriyesu aguttadvārāti** chasu indriyesu asaṃvutakammadvārā. **Bhojane amattaññunoti** bhojane yā mattā jānitabbā pariyesanapaṭiggahaṇaparibhogesu yuttatā, tassā ajānanakā. **Jāgariyam ananuyuttāti** jāgare ananuyuttā. **Sāmaññe anapekkhavantoti** samaṇadhamme nīrapekkhā, dhammānudhammappaṭipattirahitāti attho. **Sikkhāyā na tibbagāravāti** sikkhāpadesu bahulagāravā na honti, āpattivīttikkamabahulā vā. **Bāhulikātiādi** dhammadāyāde vuttam, **kusītātiādi** bhayabherave. **Dhammapariyāyenāti** dhammadesanāyā.

Saddhā agārasmāti pakatīyāpi saddhā, pabbajitāpi saddhāyā agārasmā anagāriyam pabbajitā. **Pivanti maññe ghasanti maññeti** pivanti viya ghasanti viya. Attamanavācam nicchārentā vacasā pivanti viya, abbhanumodantā manasā ghasanti viya. **Sādhu vatāti** sundaram vata. **Sabrahmacārīti** rassampi vaṭṭati dīghampi. Rasse sati sārīputtassa upari hoti, dīghe sati sabrahmacārīnam. Yadā sārīputtassa upari hoti, tadā sabrahmacārī sārīputto amhe akusalā vuṭṭhāpetvāti attho. Yadā sabrahmacārīnam, tadā sabrahmacārīyo akusalā vuṭṭhāpetvāti attho. **Daharoti** taruṇo. **Yuvāti** yobbanabhāve ṭhito. **Maṇḍanakajātīkoti** alaṅkārasabhāvo. Tattha koci taruṇopi yuvā na hoti yathā atitaruṇo, koci yuvāpi maṇḍanakajātīko na hoti yathā upasantasabhāvo,

ālasiyabyasanādīhi vā abhibhūto, idha pana daharo ceva yuvā ca maṇḍanakajātiko ca adhippeto, tasmā evamāha. **Uppalādīni** lokasammatattā vuttāni. **Itiha teti** evaṃ te. **Ubho mahānāgāti** dvepi mahānāgā, dvepi hi ete aggasāvaka “mahānāgā”ti vuccanti. Tatrāyaṃ vacanatto, chandādīhi na gacchantīti **nāgā**, tena tena maggena pahīne kilese na āgacchantīti **nāgā**, nānappakāraṃ āgūṃ na karontīti **nāgā**, ayamettha saṅkhepo. Vitthāro pana mahānidde (mahāni. 80) vuttanayeneva veditabbo. Apica –

“Āgūṃ na karoti kiñci loke,
Sabbasaṃyoge visajja bandhanāni;
Sabbattha na sajjatī vimutto,
Nāgo tādi pavuccate tathattā”ti. (su. ni. 527; mahāni. 80);

Evamettha attho veditabbo. Mahantā nāgā **mahānāgā**, aññehi khīṇāsavanāgehi pujjatarā ca pāsamsatarā cāti attho. **Aññamaññassāti** añño aññassa. **Samanumodiṃsūti** samaṃ anumodiṃsu. Tattha imāya upamāya mahāmogallāno anumodi, paṭibhātu taṃ āvusoti dhammasenāpati. Tena vuttaṃ “aññamaññassa subhāsitaṃ samanumodiṃsū”ti.

Sammutiparamatthadesanākathāvaṇṇanā niṭṭhitā.

Papañcasūdaniyā majjhimanikāyaṭṭhakathāya

Anaṅgaṇasuttavaṇṇanā niṭṭhitā.

6. Ākaṅkheyyasuttavaṇṇanā

64. Evaṃ me sutanti ākaṅkheyyasuttaṃ. Tattha **sampannasīlāti** tividhaṃ sampannaṃ paripuṇṇasamaṅgimadhuravasena. Tattha –

“Sampannaṃ sālakedāraṃ, suvā bhuñjanti kosiya;
Paṭivedemi te brahme, na naṃ vāretumussahe”ti. (jā. 1.14.1);

Idaṃ **paripuṇṇasampannaṃ** nāma. “Iminā pātīmokkhasaṃvarena upeto hoti samupeto upāgato samupāgato upapanno sampanno samannāgato”ti (vibha. 511) idaṃ **samaṅgisampannaṃ** nāma. “Imissā, bhante, mahāpathaviyā heṭṭhimatalaṃ sampannaṃ, seyyathāpi khuddamadhuṃ aneḷakaṃ, evamassāda”nti (pārā. 17) idaṃ **madhurasampannaṃ** nāma. Idha pana paripuṇṇasampannaṃpi samaṅgisampannaṃpi vaṭṭati. Tasmā sampannasīlāti paripuṇṇasīlā hutvātipi sīlasamaṅgino hutvātipi evamettha attho vedibbo. **Sīlanti** kenaṭṭhena sīlaṃ? Sīlanatṭhena **sīlaṃ**. Tassa vitthārakathā **visuddhimagge** vuttā.

Tattha “paripuṇṇasīlā”ti iminā atthena khettdosavigamena khettapāripūrī viya sīladosavigamena sīlapāripūrī vuttā hoti. Yathā hi khettaṃ bījakaṇḍaṃ vappakaṇḍaṃ udakakaṇḍaṃ ūsakaṇḍanti catudosasamannāgataṃ aparipūraṃ hoti.

Tattha **bījakaṇḍaṃ** nāma yattha antarantarā bījāni kaṇḍāni vā pūtīni vā hontī, tāni yattha vapanti, tattha sassaṃ na utṭheti, khettaṃ kaṇḍaṃ hoti. **Vappakaṇḍaṃ** nāma yattha akusalo bījāni vapanto antarantarā nipātetī. Evañhi sabbattha sassaṃ na utṭheti, khettaṃ kaṇḍaṃ hoti. **Udakakaṇḍaṃ** nāma yattha katthaci udakaṃ atibahu vā na vā hoti, tatrāpi hi sassāni na utṭhenti, khettaṃ kaṇḍaṃ hoti. **Ūsakaṇḍaṃ** nāma yattha kassako kismiñci padese naṅgalena bhūmiṃ cattāro pañca vāre kasanto atigambhīraṃ karoti, tato ūsaṃ uppajjati, tatrāpi hi sassaṃ na utṭheti, khettaṃ kaṇḍaṃ hoti, tādisaṅca khettaṃ na mahapphalaṃ hoti na mahānisamsaṃ, tatrāpi hi bahumpi vapitvā appaṃ labhati. Imesaṃ pana catunnaṃ dosānaṃ vigamā khettaṃ paripuṇṇaṃ hoti. Tādisaṅca khettaṃ mahapphalaṃ hoti mahānisamsaṃ. Evameva kaṇḍaṃ chiddaṃ sabalaṃ kammāsanti catudosasamannāgataṃ sīlaṃ aparipūraṃ hoti. Tādisaṅca sīlaṃ na mahapphalaṃ hoti, na mahānisamsaṃ. Imesaṃ pana catunnaṃ dosānaṃ vigamā sīlakkhettaṃ paripuṇṇaṃ hoti, tādisaṅca sīlaṃ mahapphalaṃ hoti mahānisamsaṃ.

“Sīlasamaṅgino”ti iminā panatthena sīlena samaṅgibhūtā samodhānaṃ gatā samannāgatā hutvā

viharathāti idameva vuttaṃ hoti. Tattha dvīhi kāraṇehi sampannasīlā hoti sīlavipattiyā ca ādīnavadassanena sīlasampattiyā ca ānisaṃsadassanena. Tadubhayampi **visuddhimagge** vitthāritam.

Tattha “sampannasīlā”ti ettāvata kira bhagavā catupārisuddhisīlaṃ uddisitvā “pātimokkhasaṃvarasaṃvutā”ti iminā tattha jeṭṭhakasīlaṃ vitthāretvā dassesīti dīpavīhāravāsī sumanatto āha. Antevāsiko panassa **tepiṭakacūlanāgatthero** āha – ubhayatthāpi pātimokkhasaṃvaro bhagavatā vutto, pātimokkhasaṃvaroyeva hi sīlaṃ. Itarāni pana tīṇi sīlanti vuttaṭṭhānaṃ nāma atthīti ananujānanto vatvā āha – “indriyasamvaro nāma chadvārarakkhāmatkameva, ājīvapārisuddhi dhammena samena paccayuppattimattakaṃ, paccayanissitaṃ paṭiladdhapaccaye idamatthanti paccavekkhitvā paribhuñjanamattakaṃ. Nippariyāyena pātimokkhasaṃvarova sīlaṃ. Yassa so bhinno, ayaṃ chinnaśiso viya puriso hatthapāde sesāni rakkhissatīti na vattabbo. Yassa pana so arogo, ayaṃ acchinnaśiso viya puriso jīvitaṃ sesāni puna pākatikāni katvā rakkhituṃ sakkoti. Tasmā ‘sampannasīlā’ti iminā pātimokkhasaṃvaraṃ uddisitvā ‘sampannapātimokkhā’ti tasseva vevacanaṃ vatvā taṃ vitthāretvā dassento ‘pātimokkhasaṃvarasaṃvutā’tiādimāhā”ti.

Tattha **pātimokkhasaṃvarasaṃvutā**ti pātimokkhasaṃvarena samannāgatā. **Ācāragocarasaṃpannā**ti ācārena ca gocarena ca sampannā. **Aṇumattesūti** appamattakesu. **Vajjesūti** akusaladhammesu. **Bhayadassāvīti** bhayadassino. **Samādāyāti** sammā ādiyivā. **Sikkhatha sikkhāpadesūti** sikkhāpadesu taṃ taṃ sikkhāpadaṃ samādiyivā sikkhatha. Apica **samādāya sikkhatha sikkhāpadesūti** yaṃkiñci sikkhākoṭṭhāsesu sikkhitabbaṃ kāyikaṃ vācasikaṃca, taṃ sabbaṃ samādāya sikkhathāti ayamettha saṅkhepo, vitthārato pana sabbānetāni pātimokkhasaṃvarādīni padāni **visuddhimagge** vuttāni.

65. Ākaṅkheyya ceti idaṃ kasmā āraddhaṃ? Sīlanisaṃsadassanattaṃ. Sacepi acirapabbajitānaṃ vā duppaññānaṃ vā evamassa “bhagavā sīlaṃ pūrethāti vadati, ko nu kho sīlapūraṇe ānisaṃso, ko viseso, kā vaḍḍhī”ti? Tesam sattarasa ānisaṃse dassetuṃ evamāha. Appeva nāma etaṃ sabrahmacārīnaṃ piyamaṇāpatādiāsavakkhayapariyosānaṃ ānisaṃsaṃ sutvāpi sīlaṃ paripūreyyunti. Visakaṇṭakavāṇījo viya. **Visakaṇṭakavāṇījo** nāma guḷavāṇījo vuccati.

So kira guḷaphāṇitakhaṇḍasakkharādīni sakaṭenādāya paccantaḡamaṃ gantvā “visakaṇṭakaṃ gaṇhatha, visakaṇṭakaṃ gaṇhathā”ti ugghosesi. Taṃ sutvā gāmikā “visaṃ nāma kakkhaḷaṃ, yo naṃ khādāti, so marati, kaṇṭakampi vijjhivā māreti, ubhopete kakkhaḷā, ko ettha ānisaṃso”ti gehadvārāni thakesuṃ, dārake ca palāpesuṃ. Taṃ disvā vāṇījo “avohārukusalā ime gāmikā, handa ne upāyena gaṇhāpemi”ti “atimadhuraṃ gaṇhatha, atisāduṃ gaṇhatha, guḷaṃ phāṇitaṃ sakkharaṃ samagghaṃ labbhati, kūṭamāsakakūṭakahāpaṇādīhipi labbhatī”ti ugghosesi. Taṃ sutvā gāmikā haṭṭhatuṭṭhā āgantvā bahumpi mūlaṃ datvā gahesuṃ. Tattha vāṇījassa “visakaṇṭakaṃ gaṇhathā”ti ugghosanaṃ viya bhagavato “sampannasīlā, bhikkhave, viharatha... pe... samādāya sikkhatha sikkhāpadesū”ti vacanaṃ. “Ubhopete kakkhaḷā, ko ettha ānisaṃso”ti gāmikānaṃ cintanaṃ viya bhagavā “sampannasīlā viharathā”ti āha, “sīlaṅca nāmetaṃ kakkhaḷaṃ pharusam khiḍḍāpaccanīkaṃ, ko nu kho sampannasīlānaṃ ānisaṃso”ti bhikkhūnaṃ cintanaṃ. Atha tassa vāṇījassa “atimadhuraṃ gaṇhathā”tiādivacanaṃ viya bhagavato piyamaṇāpatādiāsavakkhayapariyosānaṃ sattarasaānisaṃsappakāsanattaṃ “ākaṅkheyya ce”tiādivacanaṃ veditabbaṃ.

Tattha **ākaṅkheyya ceti** yadi ākaṅkheyya yadi iccheyya. **Piyo ca assanti** piyacakkhūhi sampassitabbo, sinehuppattiyā padaṭṭhānabhūto bhaveyyanti vuttaṃ hoti. **Manāpoti** tesam manavaḍḍhanako, tesam vā manena pattabbo, mettacittena pharitabboti vuttaṃ hoti. **Garūti** tesam garuṭṭhāniyo pāsānacchattasadiṣo. **Bhāvanīyoti** “addhā ayamāyasmā jānaṃ jānāti passaṃ passatī”ti evaṃ sambhāvanīyo. **Sīlesvevassa paripūrakārīti** catupārisuddhisīlesuyeva paripūrakārī assa, anūnena paripūritākārena samannāgato bhaveyyāti vuttaṃ hoti. **Ajjhattaṃ cetosamathamanuyuttoti** attano cittasamathe yutto, ettha hi ajjhattanti vā attanoti vā etaṃ ekatthaṃ, byañjanaṃ nānaṃ. Bhummatthe panetaṃ samathanti upayogavacanaṃ. Anūti iminā upasaggena yoge siddhaṃ. **Anirākatajjhānoti** bahi anīhaṭṭajjhāno, avināsitajjhāno vā, nīharaṇavināsatthañhi idaṃ nirākaraṇaṃ nāma. Thambhaṃ niraṃkatvā nivātavuttītiādisu cassa payogo daṭṭhabbo.

Vipassanāya samannāgatoti sattavidhāya anupassanāya yutto, sattavidhā **anupassanā** nāma aniccānupassanā dukkhānupassanā anattānupassanā nibbidānupassanā virāḡānupassanā nirodhānupassanā paṭinissagḡānupassanāti. Tā **visuddhimagge** vitthāritā. **Brūhetā suñṅāḡārānanti** vaḍḍhetā suñṅāḡārānaṃ,

ettha ca samathavipassanāvasena kammaṭṭhānaṃ gahetvā rattindivaṃ suññāgāraṃ pavisitvā nisīdamāno bhikkhu “brūhetā suññāgārāna”nti veditabbo. Ekabhūmakādipāsāde kurumānopi pana neva suññāgārānaṃ brūhetāti daṭṭhabboti.

Ettāvata ca yathā taṇhāvicaritadesanā paṭhamam taṇhāvasena āradhāpi taṇhāpadatṭhānattā mānadiṭṭhānaṃ mānadiṭṭhiyo osarivā kamena papañcattayadesanā jātā, evamayam desanā paṭhamam adhisīlasikkhāvasena āradhāpi sīlapadatṭhānattā samathavipassanānaṃ samathavipassanāyo osarivā kamena sikkhattayadesanā jātāti veditabbā.

Ettha hi “sīlesvevassa paripūrākārī”ti ettāvata adhisīlasikkhā vuttā. “Ajjhattam cetosamathamānuyutto anirākatajjhāno”ti ettāvata adhicitasikkhā, “vipassanāya samannāgato”ti ettāvata adhipaññāsikkhā, “brūhetā suññāgārāna”nti iminā pana samathavasena suññāgāravaḍḍhane adhicitasikkhā, vipassanāvasena adhipaññāsikkhāti evam dvepi sikkhā saṅgahetvā vuttā. Ettha ca “ajjhattam cetosamathamānuyutto anirākatajjhāno”ti imehi padehi sīlānurakkhikā eva cittekaggatā kathitā. “Vipassanāya”ti iminā padena sīlānurakkhiko saṅkhārapariggaho.

Katham cittekaggatā sīlamanurakkhati? Yassa hi cittekaggatā natthi, so byādhimhi uppanne vihaññati, so byādhivihato vikkhittacitto sīlam vināsetvāpi byādhivūpasamaṃ kattā hoti. Yassa pana cittekaggatā atthi, so tam byādhidukkham vikkhambhetvā samāpattim samāpajjati, samāpannakkhaṇe dukkham dūrāpakataṃ hoti, balavatarasukhamuppajjati. Evam cittekaggatā sīlam anurakkhati.

Katham saṅkhārapariggaho sīlamanurakkhati? Yassa hi saṅkhārapariggaho natthi, tassa “mama rūpaṃ mama viññāna”nti attabhāve balavamamattam hoti, so tathārūpesu dubbhikkhabyādhibhayādīsu sampattesu sīlam vināsetvāpi attabhāvaṃ posetā hoti. Yassa pana saṅkhārapariggaho atthi, tassa attabhāve balavamamattam vā sineho vā na hoti, so tathārūpesu dubbhikkhabyādhibhayādīsu sampattesu sacepissa antāni bahi nikkhamanti, sacepi ussussati visussati, khaṇḍākhāṇḍiko vā hoti satadhāpi sahasadhāpi, neva sīlam vināsetvā attabhāvaṃ posetā hoti. Evam saṅkhārapariggaho sīlamanurakkhati. “Brūhetā suññāgārāna”nti iminā pana tasseva ubhayassa brūhanā vaḍḍhanā sātaccakiriyaṃ dassitā.

Evam bhagavā yasmā “sābrahmacārīnaṃ piyo cassaṃ manāpo ca garu ca bhāvanīyo cā”ti ime cattāro dhamme ākaṅkhaṇena natthaññaṃ kiñci kātabbam, aññadatthu sīlādiguṇasamannāgatena bhavitabbam, idiso hi sābrahmacārīnaṃ piyo hoti manāpo garu bhāvanīyo. Vuttampi hetam –

“Sīladassanasampannaṃ, dhammaṭṭhaṃ saccavādinaṃ;
Attano kamma kubbānaṃ, tam jano kurute piya”nti. (dha. pa. 217);

Tasmā “ākaṅkheyya ce, bhikkhave, bhikkhu sābrahmacārīnaṃ piyo cassaṃ manāpo ca garu ca bhāvanīyo cāti sīlesvevassa paripūrākārī...pe... suññāgārāna”nti vatvā idāni yasmā paccayalābhādim patthayantenāpi idameva karaṇīyaṃ, na aññaṃ kiñci, tasmā “ākaṅkheyya ce, bhikkhave, bhikkhu lābhī assa”ntiādīmāha. Na cettha bhagavā lābhanimittam sīlādi paripūraṇam kathetīti veditabbo. Bhagavā hi ghāsesanaṃ chinnakatho na vācam payuttaṃ bhaṇeti, evam sāvake ovadati, so katham lābhanimittam sīlādi paripūraṇam kathessati, puggalajjhāsaya vasena panetaṃ vuttaṃ. Yesaṃhi evam ajjhāsayo bhavye “sace mayam catūhi paccayehi na kilameyyāma, sīlādim pūreṇam sakkuṇeyyāmā”ti, tesam ajjhāsaya vasena bhagavā evamāha. Apica rasānisamso esa sīlassa, yadidaṃ cattāro paccayā nāma. Tathā hi paṇḍitamanussā koṭṭhādīsu ṭhapitaṃ nīharitvā puttādīnampi adatvā attanāpi aparibhuñjitvā sīlavantānaṃ dentīti sīlassa sarasānisamsadassanattaṃ petam vuttaṃ.

Tatīyavāre **yesāhanti** yesam aham. **Tesam te kārāti** tesam devānaṃ vā manussānaṃ vā te mayi katā paccayadānakārā. Devāpi hi sīlādiguṇayuttānaṃ paccaye denti, na kevalam manussāyeva, sakko viya āyasmato mahākassapassa. **Mahapphalā mahānisamsāti** ubhayametaṃ atthato ekaṃ, byañjana meva nānaṃ. Mahantaṃ vā lokiyasukham phalaṅtīti **mahapphalā**. Mahato lokuttarasukhassa ca paccayā hontīti **mahānisamsā**. Sīlādiguṇayuttassa hi kaṭacchubhikkhāpi pañcaratanaṃ attāya bhūmiyā paṇṇasālāpi katvā dinnā anekāni kappasahassāni duggativinipātato rakkhati, pariyoṣāne ca amatāya parinibbānadhātuyāpaccayo hoti. “Khīrodanaṃ ahamadasi”ntiādīni (vi. va. 413) cettha vatthūni, sakalameva vā **petavatthu vimānavatthu** ca

sādhakaṃ. Tasmā paccayadāyakehi attani katānaṃ kārānaṃ mahapphalataṃ icchantenāpi sīlādiguṇayutteneva bhavitabbanti dasseti.

Catutthavāre **ñāṭṭi** sassusasurapakkhikā. **Sālohitā**ti ekalohitasambaddhā pītipitāmahādayo. **Petā**ti peccabhāvaṃ gatā. **Kālaṅkatā**ti matā. **Tesaṃ tanti** tesaṃ taṃ mayi pasannacittataṃ vā pasannena cittena anussaraṇaṃ vā. Yassa hi bhikkhuno kālaṅkato pitā vā mātā vā “amhākaṃ ñātako thero sīlavā kalyāṇadhammo”ti pasannacitto hutvā taṃ bhikkhuṃ anussarati, tassa so cittappasādopi taṃ anussaraṇamattampi mahapphalaṃ mahānisaṃsameva hoti, anekāni kappasatasahassāni duggatito vāretuṃ ante ca amataṃ pāpetuṃ samatthameva hoti. Vuttañhetuṃ bhagavatā “ye te, bhikkhave, bhikkhū sīlasampannā samādhisampannā paññā, vimutti, vimuttiñāṇadassanasampannā, dassanaṃpāhaṃ, bhikkhave, tesaṃ bhikkhūnaṃ bahukāraṃ vadāmi. Savanaṃ, anussatiṃ, anupabbajjaṃ, upasaṅkamaṇaṃ, payirupāsanaṃpāhaṃ, bhikkhave, tesaṃ bhikkhūnaṃ bahukāraṃ vadāmi”ti (itivu. 104). Tasmā ñāṭṭisālohitānaṃ attani cittappasādassa anussatiyā ca mahapphalataṃ icchantenāpi sīlādiguṇayutteneva, bhavitabbanti dasseti.

66. Pañcamavāre **aratiratisaho** assanti aratiyā ratiyā ca saho abhibhavitā ajjhottharitā bhaveyyaṃ. Ettha ca **arati**ti adhikusalesu dhammesu pantasenāsanesu ca ukkaṅṭhā. **Rati**ti pañcakāmaguṇarati. **Na ca maṃ arati saheyyā**ti mañca arati na abhibhaveyya na maddeyya na ajjhotthareyya. **Uppannanti** jātaṃ nibbattaṃ. Sīlādiguṇayutto hi aratiñca ratiñca sahati ajjhottharati madditvā tiṭṭhati. Tasmā īdisaṃ attānaṃ icchantenāpi sīlādiguṇayutteneva bhavitabbanti dasseti.

Chaṭṭhavāre **bhayaṃ** cittutrāsopi ārammaṇampi. **Bheravaṃ** ārammaṇameva. Sesaṃ pañcamavāre vuttanayameva. Sīlādiguṇayutto hi bhayabheravaṃ sahati ajjhottharati madditvā tiṭṭhati ariyakoṭiyavāsīmahādattathero viya.

Thero kira maggaṃ paṭipanno aññataraṃ pāsādikaṃ araññaṃ disvā “idhevajja samaṇadhammaṃ katvā gamissāmi”ti maggā okkamma aññatarasmīṃ rukkhamaṇe saṅghāṭiṃ paññapetvā pallaṅkaṃ ābhujitvā nisīdi. Rukkhadevatāya dāraṅkā therassa sīlatejena sakabhāvena saṅghātuṃ asakkontā vissaramakaṃsu. Devatāpi rukkhamaṃ cālesi. Thero acalova nisīdi. Sā devatā dhūmāyi, pajjali, neva sakkhi theramaṃ cāletuṃ, tato upāsakavaṇṇenāgantvā vanditvā aṭṭhāsi. “Ko eso”ti vuttā “ahaṃ, bhante, etasmīṃ rukkhe adhivatthā devatā”ti avoca. Tvaṃ ete vikāre akāsīti. Āma bhanteti. Kasmāti ca vuttā āha – “tumhākaṃ, bhante, sīlatejena dāraṅkā sakabhāvena saṅghātuṃ asakkontā vissaramakaṃsu, sāhaṃ tumhe palāpetuṃ evamakāsi”nti. Thero āha – “atha kasmā idha, bhante, mā vasatha, mayhaṃ aphāsūti paṭikacceva nāvācāsi. Idāni pana mā kiñci avaca, ariyakoṭiyamahādatto amanussabhayena gatoti vacanato lajjāmi, tenāhaṃ idheva vasissaṃ, tvaṃ pana ajjekadivasaṃ yattha katthaci vasāhi”ti. Evaṃ sīlādiguṇayutto bhayabheravasaho hoti. Tasmā īdisamattānaṃ icchantenāpi sīlādiguṇayutteneva bhavitabbanti dasseti.

Sattamavāre **ābhicetasikānanti** **ābhicetoti** abhikkantaṃ visuddhacittaṃ vuccati, adhicittaṃ vā, ābhicetasi jātāni ābhicetasikāni, ābhiceto sannissitānīti vā ābhicetasikāni. **Diṭṭhadhammasukhavihārānanti** diṭṭhadhamme sukhavihārānaṃ. **Diṭṭhadhammoti** paccakkho attabhāvo vuccati, tatha sukhavihārabhūtānanti attho, rūpāvacarajjhānānametaṃ adhivacanaṃ. Tāni hi appetvā nisinnā jhāyino imasmīṃyeva attabhāve asaṃkiliṭṭhaṃ nekkhammasukhaṃ vindanti, tasmā “diṭṭhadhammasukhavihārāni”ti vuccanti. **Nikāmalābhīti** nikāmena lābhī attano icchāvasena lābhī, icchiticchitakkhaṇe samāpajjituṃ samatthoti vuttaṃ hoti. **Ākicchalābhīti** sukheneva paccanīkadhamme vikkhambhetvā samāpajjituṃ samatthoti vuttaṃ hoti. **Ākasiralābhīti** akasirānaṃ vipulānaṃ lābhī, yathāparicchedeveya vuṭṭhātuṃ samatthoti vuttaṃ hoti. Ekacco hi lābhīyeva hoti, na pana sakkoti icchiticchitakkhaṇe samāpajjituṃ. Ekacco sakkoti tathā samāpajjituṃ, pāribandhike pana kicchena vikkhambheti. Ekacco tathā samāpajjati, pāribandhike ca ākiccheneva vikkhambheti, na sakkoti nālikāyantaṃ viya yathāparicchedeveya ca vuṭṭhātuṃ. Yo pana imaṃ tividhampi sampadaṃ icchati, so pi sīlesvevassa paripūrakārīti.

Evaṃ abhiññāpādake jhāne vutte kiñcāpi abhiññānaṃ vāro āgato, atha kho naṃ bhagavā aggahetvāva yasmā na kevalaṃ abhiññāpādakajjhānāni ca abhiññāyoyeva ca sīlānaṃ ānisaṃso, apica kho cattāri āruppajjhānāni tayo ca heṭṭhimā ariyamaggā, tasmā taṃ sabbamaṃ pariyādiyitvā dassetuṃ **ākaṅkheyya ce... pe... ye te santā**ti evamādimāha.

Tattha **santāti** aṅgasantatāya ceva ārammaṇasantatāya ca. **Vimokkhāti** paccanīkadhammehi vimuttattā ārammaṇe ca adhimuttattā. **Atikkamma rūpeti** rūpāvacarajjhāne atikkamivā, ye te vimokkhā atikkamma rūpe santāti padasambandho, itarathā hi atikkamma rūpe kiṃ karotīti na paññāyeyyūṃ. **Āruppāti** ārammaṇato ca vipākato ca rūpavirahitā. **Kāyena phusitvāti** nāmakāyena phusitvā pāpuṇitvā, adhigantvāti vuttaṃ hoti. Sesam vuttānameva. Idam vuttaṃ hoti “yopi bhikkhu ime vimokkhe phusitvā viharitukāmo, sopi sīlesvevassa paripūrakārī”ti.

67. Navamavāre **tiṇṇaṃ saṃyojanānanti** sakkāyaditṭhivicikicchāsīlabbataparāmāsasaṅkhātānaṃ tiṇṇaṃ bandhanānaṃ. Tāni hi saṃyojenti khandhagatibhavādīhi khandhagatibhavādayo, kammaṃ vā phalena, tasmā **saṃyojanānīti** vuccanti, bandhanānīti attho. **Parikkhayāti** parikkhayena. **Sotāpannoti** sotaṃ āpanno. Sototi ca maggasetam adhivacanaṃ. **Sotāpannoti** taṃsamaṅgipuggalassa. Yathāha “soto sototi hidam, sārīputta, vuccati. Katamo nu kho, sārīputta, sototi? Ayameva hi, bhante, ariyo aṭṭhaṅgiko maggo. Seyyathidam, sammāditṭhi...pe... sammāsamādhīti. Sotāpanno sotāpannoti hidam, sārīputta, vuccati. Katamo nu kho, sārīputta, sotāpannoti? Yo hi, bhante, iminā aṭṭhaṅgikena maggena samannāgato, ayam vuccati sotāpanno, yoyam āyasmā evaṃnāmo evaṃgotto”ti. Idha pana maggena phalassa nāmaṃ dinnam, tasmā phalaṭṭho “sotāpanno”ti veditabbo. **Avinipātadhammoti** vinipāteṭīti vinipāto, nāssa vinipāto dhammoti avinipātadhammo, na attānaṃ apāye vinipātasabhāvoti vuttaṃ hoti. Kasmā? Ye dhammā apāyagamaniyā, tesam pahīnattā. Sambodhi paraṃ ayanam gati assāti **sambodhiparāyaṇo**, uparimaggattayam avassam sampāpakoti attho. Kasmā? Paṭiladdhapaṭṭhamamaggattā. **Sīlesvevāti** īdiso hotukāmopi sīlesvevassa paripūraṇārīti.

Dasamavāre paṭṭhamamaggena parikkhīṇānīpi tīṇi saṃyojanāni sakadāgāmimaggassa vaṇṇabhaṇanattam vuttāni. **Rāgadosamohānaṃ tanuttāti** etesam tanubhāvena, tanuttakaraṇenāti vuttaṃ hoti. Tattha dvīhi kāraṇehi tanuttaṃ veditabbaṃ adhiccuppattiyā ca pariyaṭṭhānamandatāya ca. Sakadāgāmiṃ hi vaṭṭānusārīmahājanasseva kilesā abhiṇṇam na uppajjanti, kadāci karahaci uppajjanti viraḷākārā hutvā, viraḷavāpīte khetto aṅkurā viya. Uppajjamānāpi ca vaṭṭānusārīmahājanasseva maddantā pharantā chādentā andhakāram karontā na uppajjanti, mandamandā uppajjanti tanukākārā hutvā, abbhapaṭalamiva makkhikāpattamiva ca.

Tattha keci therā bhaṇanti “sakadāgāmiṃ kilesā kiñcāpi cirena uppajjanti, bahalāva uppajjanti, tathā hissa puttā ca dhītarō ca dissanti”ti, etaṃ pana appamāṇam. Puttadhītarō hi aṅgapaccāṅgaparāmasanamattenapi hontīti. Dvīhiyeva kāraṇehissa kilesānaṃ tanuttaṃ veditabbaṃ adhiccuppattiyā ca pariyaṭṭhānamandatāya cāti.

Sakadāgāmīti sakim āgamanadhammo. **Sakideva imaṃ lokaṃ āgantvāti** ekavāraṃyeva imaṃ manussalokaṃ paṭisandhivasena āgantvā. Yopi hi idha sakadāgāmimaggam bhāvetvā idheva parinibbāti, sopi idha na gahito. Yopi idha maggam bhāvetvā devesu upapajjitvā tattheva parinibbāti. Yopi devaloke maggam bhāvetvā tattheva parinibbāti. Yopi devaloke maggam bhāvetvā idheva manussaloke nibbattitvā parinibbāti. Yo pana idha maggam bhāvetvā devaloke nibbato, tattha yāvatāyukam ṭhatvā puna idheva upapajjitvā parinibbāti, ayamidha gahitoti veditabbo. **Dukkassantaṃ kareyyanti** vaṭṭadukkassa paricchedam kareyyam. **Sīlesvevāti** īdiso hotukāmopi sīlesvevassa paripūrakārīti.

Ekādasamavāre **pañcannanti** gaṇanaparicchedo. **Oraṃbhāgiyānanti** oraṃ vuccati heṭṭhā, heṭṭhābhāgiyānanti attho, kāmvācaraloke uppattipaccayānanti adhippāyo. **Saṃyojanānanti** bandhanānaṃ, tāni kāmarāgabyāpādasamyojanehi saddhim pubbe vuttasamyojanāneva veditabbāni. Yassa hi etāni appahīnāni, so kiñcāpi bhavagge uppanno hoti, atha kho āyuparikkhayā kāmvācare nibbattatiyeva, gilitabalisamacchūpamo svāyam puggalo dīghasuttakena pāde baddhavihaṅgūpamo cāti veditabbo. Pubbe vuttānampi cettha vacanaṃ vaṇṇabhaṇanattamevāti veditabbaṃ. **Opaṭīkoti** sesayonipaṭikkhepavacanametam. **Tatthaparīnibbāyīti** tattheva brahmaloke parīnibbāyī. **Anāvattidhammo tasmā lokāti** tato brahmalokā paṭisandhivasena puna anāvattisabhāvo. **Sīlesvevāti** īdiso hotukāmopi sīlesvevassa paripūrakārīti.

68. Evaṃ anāgāmimagge vutte kiñcāpi catutthamaggassa vāro āgato, atha kho nam bhagavā aggahetvāva yasmā na kevalā āsavakkhayābhīññā eva sīlānaṃ ānisaṃso, apica kho lokiyapañcābhīññāyopi, tasmā tāpi

dassetum, yasmā ca āsavakkhaye kathite desanā niṭṭhitā hoti, evañca sati imesaṃ guṇānaṃ akathitattā ayam kathā muṇḍābhiññākathā nāma bhaveyya, tasmā ca abhiññāpāripūriṃ katvā dassetumpi, yasmā ca anāgāmagge t̥hitassa sukhena iddhivikuppanā ijjhati, samādhiparibandhānaṃ kāmarāgabyāpādānaṃ samūhatattā, anāgāmī hi sīlesu ca samādhimhi ca paripūrakārī, tasmā yuttaṭṭhāneyeva lokiyābhiññāyo dassetumpi “ākānkheyya ce...pe... anekavihita”nti evamādīmāhāti ayamanusandhi.

Tattha “anekavihitaṃ iddhividha”ntiādinā nayena āgatānaṃ pañcannampi lokiyābhiññānaṃ pāḷivaṇṇanā saddhiṃ bhāvanāyena **visuddhimagge** vuttā.

69. Chaṭṭhābhiññāya āsavānaṃ khayāti arahattamaggena sabbakilesānaṃ khayā. **Anāsavanti** āsavavirahitaṃ. **Cetovimuttiṃ paññāvimuttiṃ** ettha cetovacanena arahattaphalasampayuttova samādhi, paññāvacanena taṃsampayuttā paññāva vuttā. Tattha ca samādhi rāgato vimuttattā **cetovimutti**, paññā avijjāya vimuttattā **paññāvimutti**ti veditabbā. Vuttañcetaṃ bhagavatā “yo hissa, bhikkhave, samādhi, tadassa samādhindriyaṃ. Yā hissa, bhikkhave, paññā, tadassa paññindriyaṃ. Iti kho, bhikkhave, rāgavirāgā cetovimutti, avijjāvirāgā paññāvimutti”ti, apicettha samathaphalaṃ **cetovimutti**, vipassanāphalaṃ **paññāvimutti**ti veditabbā.

Diṭṭheva dhammeti imasmimyeva attabhāve. **Sayaṃ abhiññā sacchikatvāti** attanoyeva paññāya paccakkhaṃ katvā, aparapaccayena ñatvāti attho. **Upasampajja vihareyyanti** pāpuṇitvā sampādetvā vihareyyaṃ. **Silesvevāti** evaṃ sabbāsava niddhunitvā cetovimuttiṃ paññāvimuttiṃ adhigantukāmopi silesvevassa paripūrakārīti.

Evaṃ bhagavā sīlānisamsakathaṃ yāva arahattā kathetvā idāni sabbampi taṃ sīlānisamsaṃ sampiṇḍetvā dassento nigamaṃ āha “samppannasīlā, bhikkhave...pe... idametaṃ paṭicca vutta”nti. Tassāyaṃ saṅkhepattho, “samppannasīlā, bhikkhave, viharatha...pe... samādāya sikkhatha sikkhāpadesu”ti iti yaṃ taṃ mayā pubbe evaṃ vuttaṃ, idaṃ sabbampi sampannasīlo bhikkhu sabrahmacārīnaṃ piyo hoti manāpo, garu bhāvanāyo paccayānaṃ lābhī, paccayadāyakaṇaṃ mahapphalakaro, pubbañātīnaṃ anussaraṇacetanāya phalamahattakaro, aratiratisaho, bhayabheravasaho, rūpāvacarajjhānānaṃ arūpāvacarajjhānānaṃ lābhī, heṭṭhimāni tīṇi sāmāññaphalāni pañca lokiyābhiññā āsavakkhayañānti ca ime ca guṇe sayaṃ abhiññā sacchikatvāti hoti, etaṃ paṭicca idaṃ sandhāya vuttanti. Idamavoca bhagavā, attamaṇā te bhikkhu bhagavato bhāsitaṃ abhinanduntī.

Papañcasūdaniyā majjhimanikāyaṭṭhakathāya

Ākānkheyyasuttavaṇṇanā niṭṭhitā.

7. Vatthasuttavaṇṇanā

70. Evaṃ me sutanti vatthasuttaṃ. Tattha **seyyathāpi, bhikkhave, vatthanti** upamāvacanamevetam. Upamaṃ karonto ca bhagavā katthaci paṭhamaṃyeva upamaṃ dassetvā pacchā atthaṃ dasseti, katthaci paṭhamamatthaṃ dassetvā pacchā upamaṃ, katthaci upamāya atthaṃ parivāretvā dasseti, katthaci atthena upamaṃ.

Tathā hesa – “seyyathāpissu, bhikkhave, dve agārā sadvārā, tattha cakkhumā puriso majjhe t̥hito passeyyā”ti (ma. ni. 3.261) sakalampi devadūtasuttaṃ upamaṃ paṭhamaṃ dassetvā pacchā atthaṃ dassento āha. “Tirokuttaṃ tiropākāraṃ tiropabbataṃ asajjamāno gacchati, seyyathāpi ākāse”tiādinā (dī. ni. 1.238; paṭi. ma. 1.102) pana nayena sakalampi iddhividhamatthaṃ paṭhamaṃ dassetvā pacchā upamaṃ dassento āha. “Seyyathāpi brāhmaṇapuriso sārattthiko sārāgavesī”tiādināva (ma. ni. 1.318) nayena sakalampi cūlasāropamasuttaṃ upamāya atthaṃ parivāretvā dassento āha. “Idha pana, bhikkhave, ekacce kulaputtā dhammaṃ pariyaṇanti suttaṃ...pe... seyyathāpi, bhikkhave, puriso alagaddatthiko”tiādinā (ma. ni. 1.238) nayena sakalampi alagaddasuttaṃ mahāsāropamasuttanti evamādīni suttāni atthena upamaṃ parivāretvā dassento āha.

Svāyaṃ idha paṭhamaṃ upamaṃ dassetvā pacchā atthaṃ dasseti. Kasmā panevaṃ bhagavā dassetīti?

Puggalajjhāsayena vā desanāvīlāsena vā. Ye hi puggalā paṭhamam upamam dassetvā vuccamānamattham sukkena paṭivijjhanti, tesam paṭhamam upamam dasseti. Esa nayo sabbattha. Yassā ca dhammadhātuyā suppaṭividdhattā desanāvīlāsam patto hoti, tassā suppaṭividdhā. Tasmā esa desanāvīlāsampatto dhammissaro dhammarājā, so yathā yathā icchati, tathā tathā dhammam desetīti evam iminā puggalajjhāsayena vā desanāvīlāsena vā evam dassetīti veditabbo.

Tattha **vatthanti** pakatiparisuddham vattham. **Samkiliṭṭham malaggahitanti** āgantukena paṃsurajādīnā samkilesena samkiliṭṭham, sedajallikādīnā malena gahitattā malaggahitam. **Raṅgajātetī** ettha raṅgameva raṅgajātam. **Upasamhareyyāti** upanāmeyya. **Yadi nilakāyāti** nilakāya vā, nilakathāya vāti vuttam hoti. Evam sabbattha. Rajako hi nilakathāya upasamharanto kaṃsanīlapalāsanīlādike nilaraṅge upasamharati. Pītakathāya upasamharanto kaṇikārapupphasadise pītakaraṅge. Lohitakathāya upasamharanto bandhujīvakaupupphasadise lohitakaraṅge. Mañjiṭṭhakathāya upasamharanto kaṇavīrapupphasadise mandarattaraṅge. Tena vuttam ‘yadi nilakāya...pe... yadi mañjiṭṭhakāyā’ ti.

Durattavaṇṇamevassāti duṭṭhu rañjītavaṇṇameva assa. **Aparisuddhavaṇṇamevassāti** nīlavaṇṇopissa parisuddho na bhavēyya, sesavaṇṇopi. Tādisaṅhi vattham nīlakumbhiyā pakkhittampi sunīlam na hoti, sesakumbhīsu pakkhittampi pītakādivaṇṇam na hoti, milātanīla kuraṇḍa-kaṇikāra-bandhujīvaka-kaṇavīrapupphavaṇṇameva hoti. **Tam kissa hetūti** tam vattham kissa hetu kiṃ kāraṇā īdisam hoti, tasmim vā vatthe raṅgajātam kissa hetu īdisam durattavaṇṇam aparisuddhavaṇṇam hoṭīti? Yasmā panassa vatthassa samkiliṭṭhabhāvoyevettha kāraṇam, na aññaṃ kiñci, tasmā ‘aparissuddhattā, bhikkhave, vatthassā’ ti āha.

Evameva khoti upamāsampaṭipādanam. **Citte samkiliṭṭheti** cittamhi samkiliṭṭhamhi. Kasmā pana bhagavā samkiliṭṭhavatthena opammaṃ akāsīti ce, vāyāmamahapphaladassanattam. Yathā hi āgantukehi malehi samkiliṭṭham vattham pakatiyā paṇḍarattā puna dhovīyamānam paṇḍaram hoti, na tattha jātikālake viya eḷakalome vāyāmo nipphalo hoti, evam cittampi āgantukehi kilesehi samkiliṭṭham. Pakatiyā pana tam sakalepi paṭisandhibhavaṅgavāre paṇḍarameva. Yathāha – ‘pabhassaramidaṃ, bhikkhave, cittam, tañca kho āgantukehi upakkilesehi upakkiliṭṭha’ nti (a. ni. 1.51). Tam visodhīyamānam sakkā pabhassarataram kātum, na tattha vāyāmo nipphaloti evam vāyāmamahapphaladassanattam samkiliṭṭhavatthena opammaṃ akāsīti veditabbo.

Duggati pāṭikānkhāti īdise citte duggati pāṭikānkhittabbā, duggatiṃ eva esa pāpuṇissati, nāññanti evam duggati icchittabbā, avassam bhāvīti vuttam hoti. Sā cāyam duggati nāma paṭipattiduggati, gatiduggatīti duvidhā hoti. Paṭipattiduggatipi agāriyapaṭipattiduggati, anagāriyapaṭipattiduggatīti duvidhā hoti.

Agāriyo hi samkiliṭṭhacitto pāṇampi hanati, adinnampi ādiyati, sakalepi dasa akusalakammapathe pūreti, ayamassa **agāriyapaṭipattiduggati**. So tattha ṭhito kāyassa bhedaṃ nirayampi gacchati, tiracchānayanimpi, pettivisayampi gacchati, ayamassa **gatiduggati**.

Anagāriyopi imasmim sāsane pabbajito samkiliṭṭhacitto dūteyyapahiṇagamanam gacchati, vejjakammam karoti, saṅghabhedāya cetiyabhedāya parakkamati, veḷudānādīhi jīvikam kappeti, sakalampi anācāram agocaraṇca paripūreti, ayamassa **anagāriyapaṭipattiduggati**. So tattha ṭhito kāyassa bhedaṃ nirayampi gacchati, tiracchānayanimpi, pettivisayampi gacchati samaṇayakkho nāma hoti samaṇapeto, ādittehi saṅghāṭīādīhi sampajjalitakāyo aṭṭassaram karonto vicarati, ayamassa **gatiduggati**.

Seyyathāpīti sukkapakkham dassetumāraddho, tassattho kaṇhapakkhe vuttapaccanīkeneva veditabbo. Etthāpi ca sugati nāma paṭipattisugati gatisugatīti duvidhā hoti. Paṭipattisugatipi agāriyapaṭipattisugati anagāriyapaṭipattisugatīti duvidhā hoti. Agāriyo hi parisuddhacitto pāṇātipātāpi viramati, adinnādānāpi, sakalepi dasa kusalakammapathe paripūreti, ayamassa **agāriyapaṭipattisugati**. So tattha ṭhito kāyassa bhedaṃ manussamahantatampi devamahantatampi upapajjati, ayamassa **gatisugati**.

Anagāriyopi imasmim sāsane pabbajivā parisuddhacitto catupārisuddhisīlam sodheti, terasa dhutaṅgāni samādiyati, aṭṭhatimsārammaṇesu attano anukūlakammaṭṭhānam gahetvā pantasenāsane paṭisevamāno kaṣiṇaparikkammaṃ katvā jhānasamāpattiyo nibbatteti, soṭāpattimaggam bhāveti...pe... anāgānimaggam bhāveti, ayamassa **anagāriyapaṭipattisugati**. So tattha ṭhito kāyassa bhedaṃ manussaloke vā tīsu mahākulesu, chasu vā kāmāvacaradevesu, dasasu vā brahmabhavanesu, pañcasu vā suddhāvāsesu, catūsu vā āruppesu

upapajjati, ayamassa **gatisugatīti**.

71. Evaṃ saṃkiliṭṭhe citte duggati pāṭikānkhā, asaṃkiliṭṭhe ca sugatīti vatvā idāni yehi upakkilesehi cittaṃ saṃkiliṭṭhaṃ hoti, te dassento **katame ca, bhikkhave, cittaṃ upakkilesā? Abhijjhā visamalobhoti**ādīmāha.

Tattha sakabhaṇḍe chandarāgo **abhijjhā**, parabhaṇḍe **visamalobho**. Atha vā sakabhaṇḍe vā parabhaṇḍe vā hotu, yuttapattaṭṭhāne chandarāgo abhijjhā, ayuttapattaṭṭhāne visamalobho. Thero panāha “kissa vinibbhogaṃ karoṭha, yutte vā ayutte vā hotu, ‘rāgo visamaṃ doso visamaṃ moho visama’nti (vibha. 924) vacanato na koci lobho avisamo nāma, tasmā lobhoyeva abhijjhāyanaṭṭhena abhijjhā, visamaṭṭhena visamaṃ, ekatthametam byañjanameva nāna’nti. So panesa abhijjhāvisamalobho uppajjitvā cittaṃ dūseti, obhāsituṃ na deti. Tasmā “cittaṃ upakkilesa’nti vuccati.

Yathā cesa, evaṃ navavidhāghātavattusambhavo **byāpādo**. Dasavidhāghātavattusambhavo **kodho**. Punappunaṃ citta-pariyonandhana **upanāho**. Agāriyassa vā anagāriyassa vā sukatakaṇḍavināsano **makkho**. Agāriyopi hi kenaci anukampakena daliddo samāno ucce ṭhāne ṭhapito, aparena samayena “kiṃ tayā mayhaṃ kata’nti tassa sukatakaṇḍaṃ vināseti. Anagāriyopi sāmaṇerakālato pabhuṭi ācariyena vā upajjhāyena vā catūhi paccayehi uddesaparipucchāhi ca anuggahetvā dhammakathānaya-pakaraṇakosallādīni sikkhāpito, aparena samayena rājarājamahāmatṭādīhi sakkato garukato ācariyupajjhāyesu acittikato caramāno “ayaṃ amhehi daharakāle evaṃ anuggahito saṃvaḍḍhito ca, atha panidāni nissineho jāto’nti vuccamāno “kiṃ mayhaṃ tumhehi kata’nti tesam sukatakaṇḍaṃ vināseti, tassa so sukatakaṇḍavināsano makkho uppajjitvā cittaṃ dūseti, obhāsituṃ na deti. Tasmā “cittaṃ upakkilesa’nti vuccati.

Yathā cāyaṃ, evaṃ bahussutepi puggale ajjhottharivā “īdisassa ceva bahussutassa aniyatā gati, tava vā mama vā ko viseso’ntiādīnā nayena uppajjamāno yugaggāhagāhī **paḷāso**. Paresaṃ sakkārādīni khīyanā **issā**. Attano sampattiyā parehi sādharmaṇabhāvaṃ asahamānaṃ **macchariyaṃ**. Vañcanikacariyabhūtā **māyā**. Kerāṭikabhāvena uppajjamānaṃ **sāṭheyyaṃ**. Kerāṭiko hi āyatanamaccho viya hoti. **Āyatanamaccho** nāma kira macchānaṃ naṅguṭṭhaṃ dasseti sappānaṃ sīsaṃ, “tumhehi sadiso aha’nti jānāpetuṃ. Evameva kerāṭiko puggalo yaṃ yaṃ suttantikaṃ vā ābhiddhammikaṃ vā upasaṅkamati, taṃ taṃ evaṃ vadati “ahaṃ tumhākaṃ baddhacaro, tumhe mayhaṃ anukampakā, nāhaṃ tumhe muñcāmī’nti “evamete ‘sagāravo ayaṃ amhesu sappatisso’nti maññissanti’nti. Tassetam kerāṭikabhāvena uppajjamānaṃ sāṭheyyaṃ uppajjitvā cittaṃ dūseti, obhāsituṃ na deti. Tasmā “cittaṃ upakkilesa’nti vuccati.

Yathā cetam, evaṃ vātabharitabhastasadisathaddhabhāvapaggahitasiraanivātavuttikāraṇaṃ **thambho**. Taduttarikaṇḍaṃ **sārambho**. So duvidhena labbhati akusalavasena ceva kusalavasena ca. Tattha agāriyassa parena kataṃ alaṅkāradīṃ disvā taddiguṇakaraṇena uppajjamāno, anagāriyassa ca yattakaṃ yattakaṃ paro pariyāpuṇāti vā katheti vā, mānavasena taddiguṇataddiguṇakaraṇena uppajjamāno akusalo. Agāriyassa pana paraṃ ekaṃ salākabhataṃ dentaṃ disvā attanā dve vā tīṇi vā dātukāmatāya uppajjamāno, anagāriyassa ca parena ekanikāye gahite mānaṃ anissāya kevalaṃ taṃ disvā attanā ālasiyaṃ abhibhuyya dve nikāye gahetukāmatāya uppajjamāno kusalo. Idha pana akusalo adhippeto. Ayañhi uppajjitvā cittaṃ dūseti, obhāsituṃ na deti. Tasmā “cittaṃ upakkilesa’nti vuccati.

Yathā cāyaṃ, evaṃ jātiādīni nissāya cittaṃ upattivasena pavattamāno **māno**, accuṇṇativasena **atimāno**, madaggahaṇākāro **mado**, kāmaguṇesu citta-vossaggavasena uppajjamāno **pamādo** uppajjitvā cittaṃ dūseti, obhāsituṃ na deti. Tasmā “cittaṃ upakkilesa’nti vuccati.

Kasmā pana bhagavā upakkilesaṃ dassento lobhamādiṃ katvā dassetīti? Tassa paṭhamuppattito. Sabbasattānañhi yattha katthaci upapannānaṃ antamaso suddhāvāsabhūmiyampi sabbapaṭhamam bhavanikantivasena lobho uppajjati, tato attano attano anurūpapaccayaṃ paṭicca yathāsambhavaṃ itare, na ca ete soḷaseva cittaṃ upakkilesā, etena pana nayena sabbepi kilesā gahitāyeva hontīti veditabbā.

72. Ettāvātā saṃkilesaṃ dassetvā idāni vodānaṃ dassento **sa kho so, bhikkhave**tiādīmāha. Tattha **iti viditvāti** evaṃ jānitvā. **Pajahatīti** samucchadappahānavasena ariyamaggena pajahati. Tattha kilesapaṭipāṭiyā maggapāṭipāṭiyāti dvidhā pahānaṃ veditabbam. Kilesapaṭipāṭiyā tāva abhijjhāvisamalobho thambho sārambho

māno atimāno madoti ime cha kilesā arahattamaggena pahīyanti. Byāpādo kodho upanāho pamādoti ime cattāro kilesā anāgāmimaggena pahīyanti. Makkho paḷāso issā macchariyaṃ māyā sāṭṭheyyanti ime cha sotāpattimaggena pahīyantīti. Maggapaṭipāṭiyā pana, sotāpattimaggena makkho paḷāso issā macchariyaṃ māyā sāṭṭheyyanti ime cha pahīyanti. Anāgāmimaggena byāpādo kodho upanāho pamādoti ime cattāro. Arahattamaggena abhijjhāvisamalobho thambho sārāmbho māno atimāno madoti ime cha pahīyantīti.

Imasmiṃ pana ṭhāne ime kilesā sotāpattimaggevajjhā vā hontu, sesamaggavajjhā vā, atha kho anāgāmimaggeneva pahānaṃ sandhāya “abhijjhāvisamalobhaṃ cittassa upakkilesaṃ pajahatī”tiādīmāhāti vedītabbā. Ayamettha pavenimaggāgato sambhavo, so ca upari catutthamaggasseva niddiṭṭhattā yujjati, tatiyamaggena pahīnāvasesānañhi visamalobhādīnaṃ tena pahānaṃ hoti, sesānaṃ imināva. Yepi hi sotāpattimaggena pahīyanti, tepi taṃsamuṭṭhāpakacittānaṃ appahīnattā anāgāmimaggeneva supphānā hontīti. Keci pana paṭhamamaggena cettha pahānaṃ vaṇṇayanti, taṃ pubbāparena na sandhiyati. Keci vikkhambhanappahānampi, taṃ tesā icchāmatteva.

73. Yato kho, bhikkhavi ettha **yatoti** yamhi kāle. **Pahīno hotīti** anāgāmimaggakkaṇe pahānaṃ sandhāyevāha.

74. So buddhe aveccappasādenāti etaṃ “yato kho, bhikkhave, abhijjhāvisamalobho pahīno hoti, so buddhe aveccappasādena samannāgato hotī”ti evaṃ ekamekena padena yojetabbaṃ. Imassa hi bhikkhuno anāgāmimaggena lokuttarappasādo āgato, athassa aparena samayena buddhaguṇe dhammaguṇe saṅhaguṇe ca anussarato lokiyo uppajjati, tamassa sabbampi lokiyalokuttaramissakaṃ pasādaṃ dassento bhagavā “buddhe aveccappasādenā”tiādīmāha.

Tattha **aveccappasādenāti** buddhadhammasaṅhaguṇānaṃ yāthāvato nātattā acalena accutena pasādena. Idāni yathā tassa bhikkhuno anussarato so aveccappasādo uppanno, taṃ vidhiṃ dassento “itipi so bhagavā”tiādīnā nayena tīṇi anussatiṭṭhānāni vitthāresi. Tesā atthavaṇṇanā sabbākārena **visuddhimagge** anussatikathāyaṃ vuttā.

75. Evamassa lokiyalokuttaramissakaṃ pasādaṃ dassetvā idāni kilesappahānaṃ aveccappasādasamannāgatañca paccavekkhato uppajjamaṇaṃ somanassādiānisamsaṃ dassento **yathodhi kho panassāti**ādīmāha. Anāgāmiṃ hi paccante vuṭṭhitāṃ corupaddavaṃ vūpasametvā taṃ paccavekkhato mahānagare vasantassa rañño viya ime cime ca mama kilesā pahīnāti attano kilesappahānaṃ paccavekkhato balavasomanassaṃ uppajjati. Taṃ dassento bhagavā “yathodhi kho panassā”tiādīmāha.

Tassattho – yvāyaṃ anāgāmī bhikkhu evaṃ “buddhe aveccappasādena samannāgato hoti...pe... dhamme...pe... saṅghe...pe... anuttaraṃ puññakkhettaṃ lokassā”ti, tassa yathodhi kho cattaṃ hoti paṭinissaṭṭhaṃ, sakasakaodhivasena cattameva hoti, taṃ taṃ kilesajātaṃ vantaṃ muttaṃ pahīnaṃ paṭinissaṭṭhaṃ. **Sakasakaodhivasenāti** dve odhī kilesodhi ca maggodhi ca. Tattha kilesodhivasenāpi ye kilesā yaṃ maggavajjhā, te aññamaggavajjhehi amissā hutvā sakeneva odhinā pahīnā. Maggodhivasenāpi ye kilesā yena maggena pahātabbā, tena teyeva pahīnā honti. Evaṃ sakasakaodhivasena taṃ taṃ kilesajātaṃ cattameva hoti paṭinissaṭṭhaṃ, taṃ paccavekkhitvā ca laddhasomanasso tatuttaripi so “buddhe aveccappasādena samannāgatomhī”ti labhati atthavedanti sambandho.

Yatodhi **khotipi** pāṭho. Tassa vasena ayamattho, assa bhikkhuno yatodhi kho pana cattaṃ hoti paṭinissaṭṭhaṃ. Tattha **yatoti** kāraṇavacanaṃ, yasmāti vuttaṃ hoti. **Odhīti** heṭṭhā tayo maggā vuccanti. Kasmā? Te hi odhiṃ katvā koṭṭhāsaṃ katvā uparimaggena pahātabbakilese ṭhapetvā pajahanti, tasmā **odhīti** vuccanti. Arahattamaggo pana kiñci kilesaṃ anavasesetvā pajahati, tasmā **anodhīti** vuccati. Imassa ca bhikkhuno heṭṭhāmagattayena cattaṃ. Tena vuttaṃ “yatodhi kho panassa cattaṃ hotī”ti. Tattha **kho panāti** nipātamattaṃ. Ayaṃ pana piṇḍattho. Yasmā assa odhi cattaṃ hoti paṭinissaṭṭhaṃ, tasmā taṃ paccavekkhitvā ca laddhasomanasso tatuttaripi so “buddhe aveccappasādena samannāgatomhī”ti labhati atthavedanti yathāpālī netabbaṃ.

Tattha **cattanti** idaṃ sakabhāvaparicajanavasena vuttaṃ. **Vantanti** idaṃ pana anādiyanabhāvadassanavasena. **Muttanti** idaṃ santatīto vinimocanavasena. **Pahīnanti** idaṃ muttassapi kvaci

anavatthānadassanavasena. **Paṭinissatthanti** idaṃ pubbe ādinnapubbassa paṭinissaggadassanavasena paṭimukhaṃ vā nissatthabhāvadassanavasena bhāvanābalena abhibhuyya nissatthabhāvadassanavasenaṅti vuttaṃ hoti. **Labhati atthavedaṃ labhati dhammavedanti** ettha buddhādīsu aveccappasādoyeva araṇīyato **attho**, upagantabbatoti vuttaṃ hoti. Dhāraṇato **dhammo**, vinipatitū appadānatoti vuttaṃ hoti. **Vedoti** ganthopi nāṇampi somanassampi. “Tiṇṇaṃ vedānaṃ pāragū”tiādīsu (dī. ni. 1.256) hi gantho “vedo”ti vuccati. “Yaṃ brāhmaṇaṃ vedagumābhijaññā, akiñcanaṃ kāmabhāve asatta”ntiādīsu (su. ni. 1065) nāṇaṃ. “Ye vedajātā vicaranti loke”tiādīsu somanassaṃ. Idha pana somanassañca somanassasampayuttaññañca adhippettaṃ, tasmā “labhati atthavedaṃ labhati dhammavedanti aveccappasādārammaṇasomanassañca somanassamayaññañca labhati”ti evamettha attho veditabbo.

Atha vā **atthavedanti** aveccappasādaṃ paccavekkhato uppannaṃ vuttappakārameva vedānaṃ. **Dhammavedanti** aveccappasādassa hetuṃ odhiso kilesappahānaṃ paccavekkhato uppannaṃ vuttappakārameva vedanti evampi ettha attho veditabbo. Vuttañhettaṃ “hetumhi nāṇaṃ dhammapaṭisambhidā, hetuphale nāṇaṃ atthapaṭisambhidā”ti (vibha. 718-719). **Dhammūpasamhitāṃ pāmojjanti** tameva atthañca dhammañca atthadhammānisamsabhūtaṃ vedañca paccavekkhato uppannaṃ pāmojjaṃ. Tañhi anavajjalakkhaṇena paccavekkhaṇākārappavattena dhammena **upasañhitanti** vuccati. **Pamuditassa pīti jāyatīti** iminā pāmojjena pamuditassa nirāmisā pīti jāyati. **Pītimanassāti** tāya pītiyā pīnitamanassa. **Kāyo passambhatīti** kāyopi passaddho hoti vūpasantadaratho. **Passaddhakāyo sukhanti** evaṃ vūpasantakāyadaratho cetasiṃ sukhaṃ paṭisaṃvedeti. **Cittaṃ samādhiyatīti** cittaṃ sammā ādhiyati appitaṃ viya acalaṃ tiṭṭhati.

76. Evamassa kilesappahānaṃ aveccappasādasamannāgataṃ paccavekkhato uppajjamānaṃ somanassādiānisamsaṃ dassetvā idāni “yathodhi kho pana me”ti vārena tassa paccavekkhaṇāya pavattākāraṃ pakāsetvā tasseva anāgāmimaggānubhāvasūcakaṃ phalaṃ dassento **sa kho so, bhikkhavi**tiādīmāha.

Tattha **evaṃsiloti** tassa anāgāmimaggasampayuttaṃ sīlakkhandhaṃ dasseti. **Evaṃdhammo evaṃpaññoti** taṃsāmpayuttameva samādhikkhandhaṃ paññākkhandhañca dasseti. **Sālinanti** lohitasāligandhasāliādīnaṃ anekarūpanaṃ. **Piṇḍapātanti** odanaṃ. **Vicitakālakanti** apanītakālakākaṃ. **Nevassa taṃ hoti antarāyāyati** tassa evaṃvidhassa bhikkhuno taṃ vuttappakārapaṇḍapātabhojanaṃ maggassa vā phalassa vā neva antarāyāya hoti, paṭiladdhaguṇassa hi taṃ kimantarāyaṃ karissati? Yopissa appaṭiladdho catutthamaggo ca phalaṃ ca tappaṭilābhāya vipassanaṃ ārabhatopi nevassa taṃ hoti antarāyāya, antarāyaṃ kātuṃ asamatthameva hoti. Kasmā? Vuttappakārasīladhammapaññāsaṅgahena maggena visuddhacittatā.

Yasmā cettha etadeva kāraṇaṃ, tasmā tadanurūpaṃ upamaṃ dassento **seyyathāpīti**tiādīmāha.

Tattha **acchanti** vipasannaṃ. **Parisuddhaṃ** malavigamena. **Pariyodātaṃ** pabhassaratāya. **Ukkāmukhanti** suvaṇṇakārānaṃ mūsāmukhaṃ. Suvaṇṇakārānaṃ mūsā hi idha **ukkā**, aññattha pana dīpikādayopi vuccanti. “Ukkāsu dhārīyamānāsū”ti (dī. ni. 1.159) hi āgataṭṭhāne dīpikā “ukkā”ti vuccati. “Ukkaṃ bandheyya, ukkaṃ bandhitvā ukkāmukhaṃ ālimpeyyā”ti (ma. ni. 3.360) āgataṭṭhāne aṅgārakapallaṃ. “Kammārānaṃ yathā ukkā, anto jhāyati no bahī”ti (jā. 2.22.649) āgataṭṭhāne kammāruddhanaṃ. “Evaṃvipāko ukkāpāto bhavissati”ti (dī. ni. 1.24) āgataṭṭhāne vātavego “ukkā”ti vuccati. Imasmim̐ pana ṭhāne aññesu ca evarūpesu “saṇḍāsenā jātarūpaṃ gahetvā ukkāmukhe pakkhipati”ti āgataṭṭhānesu suvaṇṇakārānaṃ mūsā “ukkā”ti veditabbā.

Tatrāyaṃ upamāsaṃsandanā – saṃkiliṭṭhavatthaṃ viya hi saṃkiliṭṭhajātarūpaṃ viya ca imassa bhikkhuno puthujjanakāle kāmarāgādimalānugataṃ cittaṃ daṭṭhabbaṃ. Acchodakaṃ viya ukkāmukhaṃ viya ca anāgāmimaggo. Taṃ udakaṃ ukkāmukhañca āgamma vatthasuvaṇṇānaṃ parisuddhatā viya tassa bhikkhuno vuttappakārasīladhammapaññāsaṅgahaṃ anāgāmimaggaṃ āgamma visuddhacittatāti.

77. **So mettāsahagatena cetasāti** yathānusandhivasena desanā āgatā. Tayo hi anusandhī pucchānusandhi ajjhāsayaṇusandhi yathānusandhīti. Tattha “evaṃ vutte aññataro bhikkhu bhagavantaṃ etadavoca ‘siyā nu kho, bhante, bahiddhā asati paritassanā’ti? ‘Siyā bhikkhū’ti bhagavā avocā”ti (ma. ni. 1.242). Evaṃ pucchantānaṃ vissajjitasuttavasena **pucchānusandhi** veditabbo. “Siyā kho pana te brāhmaṇa evamassa, ajjāpi nūna samaṇo gotamo avītarāgo”ti (ma. ni. 1.55) evaṃ paresaṃ ajjhāsayaṃ viditvā vuttassa suttassa vasena

ajjhāsayanusandhi veditabbo. Yena pana dhammena ādimhi desanā uṭṭhitā, tassa dhammassa anurūpadhammasvasena vā paṭipakkhavasena vā yesu suttesu upari desanā āgacchati, tesam vasena **yathānusandhi** veditabbo. Seyyathidaṃ, ākaṅkheyyasutte heṭṭhā sīlena desanā uṭṭhitā, upari cha abhiññā āgatā. Kakacūpame heṭṭhā akkhantiyā uṭṭhitā, upari kakacūpamovādo āgato. Alagadde heṭṭhā diṭṭhiparidīpanena uṭṭhitā, upari tiparivattasufñātāpakāsana āgatā, cūḷaassapure heṭṭhā kilesaparidīpanena uṭṭhitā, upari brahmavihārā āgatā. Kosambiyasutte heṭṭhā bhaṇḍanena uṭṭhitā, upari sāraṇiyadhammā āgatā. Imasmimpi vatthasutte heṭṭhā kilesaparidīpanena uṭṭhitā, upari brahmavihārā āgatā. Tena vuttaṃ “yathānusandhivasena desanā āgatā”ti. Brahmavihāresu pana anupadavaṇṇanā ca bhāvanānayo ca sabbo sabbākārena visuddhimagge vutto.

78. Evaṃ bhagavā abhijjhādīnaṃ upakkilesānaṃ paṭipakkhabhūtaṃ sabbaso ca kāmarāgabyāpādappahānena vihatapaccatthikattā laddhapadaṭṭhānaṃ tassa anāgāmīno brahmavihārabhāvanaṃ dassetvā idānissa arahattāya vipassanaṃ dassetvā arahattappattiṃ dassetuṃ **so atthi idanti**ādīmāha.

Tassattho – so anāgāmī evaṃ bhāvitabrahmavihāro etesaṃ brahmavihārānaṃ yato kutoci vuṭṭhāya te eva brahmavihāradhamme nāmasvasena tesam nissayaṃ hadayavatthum vatthunissayāni bhūtānīti iminā nayena bhūtopādāyadhamme rūpavasena ca vavatthapetvā **atthi idanti** pajānāti, ettāvatānena dukkhasaccavavathānaṃ kataṃ hoti. Tato tassa dukkhasa samudayaṃ paṭivijjhanto **atthi hīnanti** pajānāti, ettāvatānena samudayasaccavavathānaṃ kataṃ hoti. Tato tassa pahānupāyaṃ vicinanto **atthi pañīnti** pajānāti, ettāvatānena maggasaccavavathānaṃ kataṃ hoti. Tato tena maggena adhigantabbatṭhānaṃ vicinanto **atthi uttari imassa saññāgatassa nissaraṇanti** pajānāti, imassa mayā adhigatassa brahmavihārasaññāgatassa uttari nissaraṇaṃ nibbānaṃ atthīti evaṃ pajānātīti adhippāyo, ettāvatānena nirodhasaccavavathānaṃ kataṃ hoti. **Tassa evaṃ jānato evaṃ passatoti** tassa vipassanāpaññāya evaṃ catūhi ākārehi cattāri saccāni jānato, maggapaññāya evaṃ passato, bhayabherave vuttanayeneva kāmāsavāpi cittaṃ vimuccati...pe... itthattāyāti pajānātīti.

Evaṃ yāva arahattā desanaṃ pāpetvā idāni yasmā tassaṃ parisati nhānasuddhiko brāhmaṇo nisinnō, so evaṃ nhānasuddhiyā vaṇṇaṃ vuccamānaṃ sutvā pabbajitvā arahattaṃ pāpuṇissatīti bhagavatā vidito, tasmā tassa codanattāya “ayaṃ vuccati, bhikkhave, bhikkhu sināto antarena sinānena”ti imaṃ paṭiyekkaṃ anusandhimāha. Tattha **antarena sinānenāti** abhantarena kilesavutṭhānasinānena.

79. Sundarikabhāradvājoti bhāradvājo nāma so brāhmaṇo attano gottavasena, sundarikāya pana nadiyā sinātassa pāpappahānaṃ hotīti ayamassa diṭṭhi, tasmā “sundarikabhāradvājo”ti vuccati. So taṃ bhagavato vacanaṃ sutvā cintesi “mayāṃ sinānasuddhiṃ vaṇṇema, samaṇopi gotamo tatheva vaṇṇeti, samānacchando dāni esa amhehī”ti. Atha bhagavantaṃ bāhukaṃ nadiṃ gantvā taṃ tattha pāpaṃ pavāhetvā āgataṃ viya maññamāno āha “gacchati pana bhavaṃ gotamo bāhukaṃ nadiṃ sināyitu”nti? Bhagavā tassa gacchāmīti vā na gacchāmīti vā avatvāyeva brāhmaṇassa diṭṭhisamugghātaṃ kattukāmo “kiṃ brāhmaṇa bāhukāya nadiyā, kiṃ bāhukā nadī karissatī”ti āha. Tassattho kiṃ payojanaṃ bāhukāya, kiṃ sā karissati? Asamatthā sā kassaci atthāya, kiṃ tattha gamissāmīti?

Atha brāhmaṇo taṃ pasamsanto **lokkhasammatāti**ādīmāha. Tattha **lokkhasammatāti** lūkhabhāvasammatā, **lūkhabhāvanti** cokkhabhāvaṃ, visuddhibhāvaṃ detīti evaṃ sammatāti vuttaṃ hoti. **Lokyasammatāti**tipi pāṭho. Tassattho, seṭṭhaṃ lokaṃ gamayatīti evaṃ sammatāti. **Puññasammatāti** puññanti sammatā. **Pavāhetīti** gamayati visodheti. **Gāthāhi ajjhabhāsīti** gāthāhi abhāsī. Gāthā ca vuccamānā tadatthadīpanatthameva vā gāthārucikānaṃ vuccati, visesatthadīpanattham vā. Idha panetā ubhayatthadīpanattham vuttāti veditabbā.

Bāhukanti idameva hi ettha vacanaṃ tadatthadīpakaṃ, sesāni visesatthadīpakāni. Yatheva hi bāhukaṃ, evaṃ adhikakkādīnipi loko gacchati nhānena pāpaṃ pavāhetuṃ. Tattha ye tesam ṭhānānaṃ āsannā honti, te divasassa tikkhattuṃ nhāyanti. Ye dūrā, te yathākkamaṃ dvikkhattuṃ sakim ekadivasantaraṃ, evaṃ yāva samvaccharantaraṃ nhāyanti. Ye pana sabbathāpi gantuṃ na sakkonti, te ghaṭehipi tato udakaṃ āharāpetvā nhāyanti. Sabbañcetaṃ niratthakaṃ, tasmā imaṃ visesattham dīpetuṃ **adhikakkādīnipīti** āha.

Tattha **adhikakkanti** nhānasambhāravasena laddhavohāraṃ ekaṃ titthaṃ vuccati. **Gayātipi**

maṇḍalavāpisaṅṭhānaṃ titthameva vuccati. **Payāgāti** etampi gaṅgāya ekaṃ titthameva mahāpanādassa rañño gaṅgāyaṃ nimuggapāsādassa sopānasammukhaṅṭhānaṃ, bāhukā sundarikā sarassatī bāhumatīti imā pana catasso nadiyo. **Bāloti** duppañño. **Pakkhandoti** pavisanto. **Na sujhatīti** kilesasuddhiṃ na pāpuṇāti, kevalaṃ rajojallameva pavāheti.

Kiṃ sundarikā karissatīti sundarikā kilesavisodhane kiṃ karissati? Na kiñci kātuṃ samatthāti adhippāyo. Esa nayo **payāgabāhukāsu**. Imehi ca tīhi padehi vuttehi itarānipi cattāri lakkhaṅṭhānaṃ yena vuttāneva hontī, tasmā yatheva sundarikā payāgā bāhukā na kiñci karonti, tathā adhikakkādayopīti vedītabbā.

Verinti pāṇātipātādīpaṅcaverasamannāgataṃ. **Katakibbisanti** kataluddakammaṃ. **Na hi naṃ sodhayeti** sundarikā vā payāgā vā bāhukā vā na sodhaye, na sodhetīti vuttaṃ hoti. **Pāpakamminanti** pāpakehi verakibbisakammehi yuttaṃ, lāmakakamme yuttaṃ vā verakibbisabhāvaṃ appattehi khuddakehipi pāpehi yuttanti vuttaṃ hoti.

Suddhassāti nikkilesassa. **Sadā phaggūti** niccampi phaggunīnakkhattameva. Phaggunamāse kira “uttaraphaggunadivase yo nhāyati, so saṃvaccharaṃ katapāpaṃ sodhetī”ti evaṃ diṭṭhiko so brāhmaṇo, tenassa bhagavā taṃ diṭṭhiṃ paṭihananto āha “suddhassa ve sadā phaggū”ti. Nikkilesassa niccaṃ phaggunīnakkhattaṃ, itaro kiṃ sujhatīti? **Uposatho sadāti** suddhassa ca cātuddasapannarasādīsu uposathaṅgāni asamādiyatopi niccameva uposatho. **Suddhassa sucikammassāti** nikkilesatāya suddhassa sucīhi ca kāyakammādīhi samannāgataṃ. **Sadā sampajjate vatanti** īdisassa ca kusalūpasañhitaṃ vatasamādānampi niccaṃ sampannaṃ eva hotīti. **Idheva sināhīti** imasmiṃyeva mama sāsane sināhi. Kiṃ vuttaṃ hoti? “Sace ajjhattikakilesasamalappavāhanaṃ icchasi, idheva mama sāsane aṭṭhaṅgikamaggasallena sināhi, aññatra hi idaṃ natthī”ti.

Idānissa sappāyadesanāvāsena tīsupi dvāresu suddhiṃ dassento **sabbabhūtesu karohi khematanti**ādīmaḥa. Tattha **khematanti** abhayaṃ hitabhāvaṃ, mettanti vuttaṃ hoti. Etenassa manodvārasuddhi dassitā hoti.

Sace musā na bhaṇasīti etenassa vacīdvārasuddhi. **Sace pāṇaṃ na hiṃsasi sace adinnaṃ nādiyasīti** etehi kāyadvārasuddhi. **Saddahāno amaccharīti** etehi pana naṃ evaṃ parisuddhadvāraṃ saddhāsampadāya cāgasampadāya ca niyojesi. **Kiṃ kāhasi gayāṃ gantvā, udapānopi te gayāti** ayaṃ pana upaḍḍhagāthā, sace sabbabhūtesu khemataṃ karissasi, musā na bhaṇissasi, pāṇaṃ na hanissasi, adinnaṃ nādiyissasi, saddahāno amaccharī bhavissasi, kiṃ kāhasi gayāṃ gantvā udapānopi te gayā, gayāyapi hi te nhāyantassa udapānopi imāya eva paṭipattiyā kilesasuddhi, sarīramalasuddhi pana ubhayattha samāti evaṃ yojetabbaṃ. Yasmā ca loke gayā sammatatarā, tasmā tassa bhagavā “gacchati pana bhavaṃ gotamo bāhuka”nti puṭṭhopi “kiṃ kāhasi bāhukaṃ gantvā”ti avatvā “kiṃ kāhasi gayāṃ gantvā”ti āhāti vedītabbo.

80. Evaṃ vutteti evamādi bhayaḥherave vuttatā pākaṭameva. **Eko vūpakatṭhoti**ādīsu pana **eko** kāyavivekena. **Vūpakatṭho** cittavivekena. **Appamatto** kammaṅṭhāne satī avijāhanena. **Ātāpi** kāyikacetāsikavīriyasāṅkhātena ātāpena. **Pahitatto** kāye ca jīvite ca anapekkhatāya. **Viharanto** aññatarairiyāpathavīhārena. **Nacirassevāti** pabbajjaṃ upādāya vuccati. **Kulaputtāti** duvidhā kulaputtā jātikulaputtā ca ācārakulaputtā ca, ayaṃ pana ubhayathāpi kulaputto. **Agārasmāti** gharā. Agārassa hitaṃ **agāriyaṃ**, kasigorakkhādikuṭumbaposaṅkammaṃ vuccati, natthi ettha agāriyanti **anagāriyaṃ**, pabbajjāyetaṃ adhivacanaṃ. **Pabbajantīti** upagacchanti upasaṅkamanti. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyassa pariyoṣānaṃ, arahattaphalanti vuttaṃ hoti. Tassa hi atthāya kulaputtā pabbajanti. **Diṭṭheva dhammeti** tasmiṃyeva attabhāve. **Sayaṃ abhiññā sacchikatvāti** attanāyeva paññāya paccakkhaṃ katvā, aparappaccayaṃ katvāti attho. **Upasampajja vihāsīti** pāpuṇitvā sampādetvā vihāsīti, evaṃ viharanto ca khīṇā jāti...pe... abbaññāsīti. Etenassa paccavekkhaṇabhūmiṃ dasseti.

Katamā panassa jāti khīṇā? Kathaṅca naṃ abbaññāsīti? Vuccate, kāmāñcetaṃ bhayaḥheravepi vuttaṃ, tathāpi naṃ idha paṭhamapurisavasena yojanāyassa dassanattaṃ puna saṅkhepato bhaṅgāma. Na tāvassa atīta jāti khīṇā, pubbeva khīṇatā. Na anāgatā, tattha vāyāmābhāvato. Na paccuppanā, vijjāmanatā. Maggassa pana abhāvītattā yā uppajjeyya ekacatupaṅcavokārabhavesu ekacatupaṅcakkhandhappabhedā jāti, sā maggassa bhāvītattā anuppādadhammataṃ āpajjanena khīṇā, taṃ so maggabhāvanāya pahīnakilese paccavekkhitvā

kilesābhāve vijjamānampi kammaṃ āyatim appaṭisandhikaṃ hotīti jānanto jānāti.

Vusitanti vutthaṃ parivutthaṃ, kataṃ caritaṃ niṭṭhāpitanti attho. **Brahmacariyanti** maggabrahmacariyaṃ. **Kataṃ karaṇīyanti** catūsu saccesu catūhi maggehi pariññāpahānasacchikiriyabhāvanāvasena soḷasavidhampi kiccaṃ niṭṭhāpitanti attho. **Nāparaṃ itthattāyāti** idāni punaitthabhāvāya evaṃsoḷasakiccabhāvāya, kilesakkhayāya vā maggabhāvanā natthīti. Atha vā, **itthattāyāti** itthabhāvato imasmā evaṃpakārā idāni vattamānakkhandhasantānā aparāṃ khandhasantānaṃ natthi. Ime pana pañcakkhandhā pariññātā tiṭṭhanti, chinnamūlako rukkho viyāti abbhāññāsi. **Aññataroti** eko. **Arahatanti** arahantānaṃ, bhagavato sāvakānaṃ arahataṃ abbhantaro ahoṣīti.

Papañcasūdaniyā majjhimanikāyaṭṭhakathāya

Vatthasuttavaṇṇanā niṭṭhitā.

8. Sallekhasuttavaṇṇanā

81. Evaṃ me sutanti sallekhasuttaṃ. Tattha **mahācundoti** tassa therassa nāmaṃ. **Sāyanhasamayanti** sāyanhakāle. **Paṭisallānā vuṭṭhitoti** ettha **paṭisallānanti** tehi tehi sattasaṅkhārehi paṭinivattitvā sallānaṃ nilīyanaṃ, ekībhāvo pavivekoti vuttaṃ hoti. Yo tato vuṭṭhito, so paṭisallānā vuṭṭhito nāma hoti. Ayaṃ pana yasmā paṭisallānānaṃ uttamato phalasamāpattito vuṭṭhāsi, tasmā “paṭisallānā vuṭṭhito”ti vutto. **Bhagavantam abhivādetvāti** samadasanakhujjalavibhūsitena sirasā bhagavantaṃ sakkaccaṃ vanditvā, abhivādāpetvā vā “sukhī bhava, cundā”ti evaṃ vacībhedaṃ kārāpetvā, bhagavā pana kira vandito samāno suvaṇṇadundubhisadisāṃ gīvaṃ paggayha kaṇṇasukhaṃ pemaṇiyaṃ amatābhisekasadisāṃ brahmaghosaṃ nicchārento “sukhī hohi”ti tassa tassa nāmaṃ gahetvā vadati, etaṃ āciṇṇaṃ tathāgatānaṃ. Tatridaṃ sādhasuttaṃ, “sakko, bhante, devānamindo sāmacco saparijano bhagavato pāde sirasā vandatīti, sukhi hotu pañcasikha sakko devānamindo sāmacco saparijano, sukhakāmā hi devā manussā asurā nāgā gandhabbā, ye caññe santi puthukāyā”ti. Evañca pana tathāgatā evarūpe mahesakkhe yakkhe abhivadantīti.

Yā imāti idāni vattabbābhimukhaṃ karonto viya āha. **Anekavihitāti** nānappakārā. **Diṭṭhiyoti** micchādiṭṭhiyo. **Loke uppajjantīti** sattesu pātubhavanti. **Attavādappaṭisaṃyuttāti** “rūpaṃ attato samanupassatī”tiādinayappavattena attavādena paṭisaṃyuttā, tā vīsati bhavanti. **Lokavādappaṭisaṃyuttāti** “sassato attā ca loko cā”tiādinayappavattena lokavādena paṭisaṃyuttā, tā aṭṭha honti sassato, asassato, sassato ca asassato ca, neva sassato nāsassato, antavā, anantavā, antavā ca anantavā ca, nevantavā nānantavā attā ca loko cāti evaṃ pavattattā.

Ādimevātiādīsu ayamatto kiṃ nu kho bhante ādimeva manasikarontassa appatvāpi sotāpattimaggaṃ vipassanāmissakapaṭhamamanasikārameva manasikarontassa bhikkhuno evametāsaṃ ettakeneva upāyena etāsaṃ diṭṭhīnaṃ pahānañca paṭinissaggo ca hotīti. Idañca thero attanā anadhimānikopi samāno adhimānikānaṃ adhimānappahānatthaṃ adhimāniko viya hutvā pucchatiṭī veditabbo. Apare panāhu “therassa antevāsikā ādimanasikāreneva diṭṭhīnaṃ samucchadappahānaṃ hotīti evaṃsaññinopi, samāpattivihārā sallekhavīhārāti evaṃsaññinopi atthi. So tesāṃ atthāya bhagavantaṃ pucchati”ti.

82. Athassa bhagavā tāsāṃ diṭṭhīnaṃ pahānūpāyaṃ dassento **yā imāti**ādimāha. Tattha yattha cetā diṭṭhiyo uppajjantītiādi pañcakkhandhe sandhāya vuttaṃ. Etesu hi etā diṭṭhiyo uppajjanti. Yathāha “rūpe kho, bhikkhave, sati rūpaṃ abhinivissa evaṃ diṭṭhi uppajjati, so attā so loko so pecca bhavissāmi nicco dhuvo sassato avipariñāmadhammo”ti (saṃ. ni. 3.152) vitthāro. Ārammaṇavasena pana ekavacanaṃ katvā **yattha cāti** āha, yasmim ārammaṇe uppajjantīti vuttaṃ hoti. Ettha ca **uppajjanti anusenti samudācarantīti** imesaṃ evaṃ nānākaraṇaṃ veditabbaṃ. Jātivasena hi ajātā jāyamānā **uppajjantīti** vuccanti. Punappunaṃ āsevītā thāmagatā appaṭiviniṭā **anusentīti**. Kāyavacīdvāraṃ sampattā **samudācarantīti**, idametesāṃ nānākaraṇaṃ. **Taṃ netam mamāti**ādīsu taṃ pañcakkhandhappabhedāṃ ārammaṇametaṃ mayhaṃ na hoti, ahampi eso na asmi, eso me attāpi na hotīti evametaṃ yathābhūtaṃ sammappaññāya passatoti evaṃ tāva padattho veditabbo.

Yasmā pana ettha etaṃ mamāti taṇhāgāho, tañca gaṇhanto aṭṭhasatataṇhāvicaritappabhedāṃ taṇhāpapañcaṃ gaṇhāti. Esohamasmīti mānagāho, tañca gaṇhanto navappabhedāṃ mānapapañcaṃ gaṇhāti.

Eso me attāti diṭṭhigāho, tañca gaṇhanto dvāsaṭṭhidiṭṭhigatappabhedam diṭṭhipapañcam gaṇhāti. Tasmā **netam mamāti** vadanto bhagavā yathāvuttappabhedam tañhāpapañcam paṭikkhipati. **Nesohamasmīti** mānapapañcam. **Na meso attāti** diṭṭhipapañcam. Diṭṭhekaṭṭhāyeva cetha tañhāmānā veditabbā. **Evametanti** evam “netam mamā”tiādina ākārena etaṃ khandhapañcakam. **Yathābhūta**nti yathā sabhāvaṃ, yathā atthīti vuttam hoti. Khandhapañcakañhi eteneva ākārena atthi. Mamantiādina pana gayhamānampi tenākārena nevattīti adhippāyo. **Sammappaññāya passatoti** sotāpattimaggaññāpariyosānāya vipassanāpaññāya suṭṭhu passantassa. **Evametāsanti** etena upāyena etāsam. **Pahānam paṇissaggoti** ubhayampetaṃ samucchadappahānassevādhivacanam.

Evam bhagavā ādimanasikāreneva diṭṭhīnam pahānam hoti nu kho notī āyasmatā mahācundena adhimānikānam vasena pañham puṭṭho sotāpattimaggena diṭṭhippahānam dassetvā idāni sayameva adhimānikānam jhānam vibhajanto **thānam kho panetanti**ādīmāha. Tattha **adhimānikā** nāma yesam appatte pattasaññāya adhimāno uppajjati, svāyam uppajjamāno neva lokavattānusārīnam bālaputhujjanānam uppajjati, na ariyasāvakanam. Na hi sotāpannassa “sakadāgāmī aha”nti adhimāno uppajjati, na sakadāgāmissa “anāgāmī aha”nti, na anāgāmīno “arahā aha”nti, kārakasseva pana samathavasena vā vipassanāvasena vā vikkhambhitakilesassa niccam yuttapayuttassa āradhāvippassakassa uppajjati. Tassa hi samathavikkhambhitānam vā vipassanāvikkhambhitānam vā kilesānam samudācāram apassato “sotāpanno ahanti vā, sakadāgāmī, anāgāmī, arahā aha”nti vā adhimāno uppajjati, talaṅgaratissapabbatavāsīdhammadinnattherena ovādiyamānattherānam viya.

Therassa kira acirūpasampannasseva ovāde ṭhatvā bahū bhikkhū viśesaṃ adhigacchimsu. Tam pavattim sutvā tissamahāvihāravāsī bhikkhusaṅgho “na aṭṭhānaniyojako theroti theram ānethā”ti sambahule bhikkhū pāhesi. Te gantvā, “āvuso, dhammadinna bhikkhusaṅgho tam pakkosāpetī”ti āhamsu. So āha “kiṃ pana tumhe, bhante, attānam gavesatha para”nti? Attānam sappurisāti, so tesam kammaṭṭhānamadāsi, sabbeva arahattam pāpuṇimsu. Bhikkhusaṅgho puna aññe bhikkhū pāhesi, evam yāvattiyam pahitā sabbepi tattheva arahattam patvā vihariṃsu.

Tato saṅgho gatagatā nāgacchantīti aññataram vuḍḍhapabbajitam pāhesi. So gantvā ca, “bhante, dhammadinna tikkhattam tissamahāvihāravāsī bhikkhusaṅgho tuyham santike pesesi, tvam nāma saṅghassa ānam garum na karosi, nāgacchasi”ti āha. Thero kimetanti pañnasālam appavisitvāva pattacīvaram gāhāpetvā tāvadeva nikkhami, so antarāmagge hañkanavihāram pāvīsi. Tattha ceko mahāthero saṭṭhivassātīto adhimānena arahattam paṭijānāti. Thero tam upasaṅkamitvā vanditvā paṭisanthāram katvā adhigamam pucchi. Thero āha “āma dhammadinna, yam pabbajitena kātabbam, cirakatam tam mayā, atītasatṭhivassomhī etarahī”ti. Kiṃ, bhante, iddhimpi vaḷañjethāti. Āma dhammadinnāti. Sādhu vata, bhante, hatthim tumhākam paṭimukham āgacchantam māpethāti. Sādhāvusoti thero sabbasetam sattappatiṭṭham tidhāpabhinnam naṅguṭṭham bījāyāmānam soṇḍam mukhe pakkhipitvā dvīhi dantehi vijjhītukāmam viya paṭimukham āgacchantam mahāhatthim māpesi. So tam attanāyeva māpitam hatthim disvā bhīto palāyitum ārabhi. Tadāva attānam “nāham arahā”ti ṇatvā dhammadinnassa pādāmule ukkuṭīkam nisīditvā “patiṭṭhā me hohi, āvuso”ti āha. Dhammadinno “mā, bhante, soci, mā anattamano ahosi, kārakānamyeva adhimāno uppajjati”ti theram samassāsetvā kammaṭṭhānamadāsi. Thero tassovāde ṭhatvā arahattam pāpuṇi.

Cittalapabbatepi tādisova thero vasati. Dhammadinno tampi upasaṅkamitvā tattheva pucchi. Sopi tattheva byākāsi. Tato nam dhammadinno kiṃ, bhante, iddhimpi vaḷañjethāti āha. Āmāvusoti. Sādhu vata, bhante, ekaṃ pokkharāṇim māpethāti. Thero māpesi. Ettha, bhante, padumagumbaṃ māpethāti. Tampi māpesi. Padumagumbe mahāpadumaṃ māpethāti. Tampi māpesi. Etasmiṃ padumagumbe ṭhatvā madhurassarena gāyantaṃ naccantañca ekaṃ itthiviggamaṃ māpethāti. Tampi māpesi. So etaṃ, bhante, punappunam upanijjhāyathāti vatvā sayam pāsādam pāvīsi. Therassa tam upanijjhāyato saṭṭhivassāni vikkhambhitakilesā calimsu, so tadā attānam ṇatvā purimatthero viya dhammadinnattherassa santike kammaṭṭhānam gahetvā arahattam pāpuṇi.

Dhammadinnopi anupubbena tissamahāvihāram agamāsi. Tasmīñca samaye therā cetiyāṅgaṇam sammajjitvā buddhārammaṇam pītim uppādetvā nisinnā honti, etaṃ kira tesam vattam. Tena nesam ekopi “idha pattacīvaram ṭhāpethī”ti dhammadinnaṃ vattā pucchitāpi nāhosi. Dhammadinno eso bhaveyyāti ṇatvā pana pañham pucchimsu. So pucchitapañhe tiñhena asinā kumudanaḷakalāpaṃ viya chinditvā pādaṅguliyā

mahāpathaviṃ pahari. Bhante ayaṃ acetanā mahāpathavīpi dhammadinnassa guṇaṃ jānāti. Tumhe pana na jānitthāti ca vatvā imaṃ gāthamāha –

“Acetanāyaṃ pathavī, vijānāti guṇāguṇaṃ;
Sacetanātha kho bhante, na jānātha guṇāguṇa”nti.

Tāvadeva ca ākāse abbhuggantvā talaṅgaratissapabbatameva agamāsi. Evaṃ kārakasseva adhimāno uppajjati. Tasmā bhagavā tādisānaṃ bhikkhūnaṃ vasena jhānaṃ vibhajanto **jhānaṃ kho panetanti**ādīmāha.

Tassattho, atthetaṃ kāraṇaṃ, no natthi. Yena idhekacco bhikkhu bāhiraparibbājakehi sādharmaṇaṃ vivicceva kāmehi...pe... paṭhamaṃ jhānaṃ upasampajja vihareyya, yaṃ pana **tassa evamassa sallekhena viharāmīti**, yaṃ paṭipattividhānaṃ kilese saṃlikhati, tenāhaṃ viharāmīti, taṃ na yujjati, na hi adhimānikassa bhikkhuno jhānaṃ sallekho vā sallekhapaṭipadā vā hoti. Kasmā? Avipassanāpādakattā. Na hi so jhānaṃ samāpajjitvā tato vuṭṭhāya saṅkhāre sammasati, jhānaṃ panassa cittekaggamattaṃ karoti, diṭṭhadhammasukhavihāro hoti. Tasmā tamatthaṃ dassento bhagavā “na kho panete, cunda, ariyassa vinaye sallekhā vuccanti, diṭṭhadhammasukhavihārā ete ariyassa vinaye vuccanti”ti āha.

Tattha **eteti** jhānadhammasena bahuvacanaṃ veditabbaṃ, ete paṭhamajjhānadhammāti vuttaṃ hoti. Samāpattivasena vā, ekampi hi paṭhamajjhānaṃ punappunaṃ samāpattivasena pavattattā bahuttaṃ gacchati. Ārammaṇavasena vā, ekampi hi paṭhamajjhānaṃ pathavīkasiṇādisu pavattivasena bahuttaṃ gacchati. Esa nayo dutiyatatiyacatutthajjhānesu. Āruppajjhānesu pana ārammaṇabhedābhāvato purimakāraṇadvayavaseneva bahuvacanaṃ veditabbaṃ.

Yasmā cetesaṃ aṅgānīpi santāni ārammaṇānīpi, nibbutāni ceva sukhumāni cāti vuttaṃ hoti, tasmā tāni **santā ete viharāti** evaṃ vuttānīti veditabbāni. Ayaṃ tāva tesāṃ catunnampi sādharmaṇā vaṇṇanā. Visesaṇṇanā pana “sabbaso rūpasaññāna”ntiātipadānūsārato vattabbā siyā. Sā **visuddhimagge** sabbākārena vuttāyeva.

83. Evaṃ yasmā adhimānikassa bhikkhuno jhānavihāro avipassanāpādakattā sallekhavihāro na hoti, na hi so jhānaṃ samāpajjitvā tato vuṭṭhāya saṅkhāre sammasati, cittekaggakaro diṭṭhadhamme sukhavihāro panassa hoti, tasmā tamatthaṃ dassento rūpajjhānāni ca arūpajjhānāni ca vibhajitvā idāni ca yattha sallekho kātabbo catucattālīsāya ākārehi, tañca vatthum tañca sallekhaṃ dassento **idha kho pana voti**ādīmāha.

Kasmā pana “aṭṭhahi samāpattīhi avihimsādayo sallekhā”ti vuttā? Lokuttarapādakattā. Bāhirakānañhi aṭṭha samāpattīyo vaṭṭapādakāyeva. Sāsane saraṇagamanampi lokuttarapādakaṃ, pageva avihimsādayo. Imināyeva ca suttana veditabbaṃ “yathā bāhirakassa aṭṭhasamāpattīlābhino pañcābhīṇassāpi dinnadānato sāsane tisarāṇagatassa dinnadānaṃ mahapphalataraṃ hoti”ti. Idañhi sandhāya dakkhiṇāvisuddhisutte “bāhirake kāmesu vītaraṅge dānaṃ datvā koṭisatasahassaguṇā pāṭikaṅkhitabbā. Sotāpattīphalasacchikiriyāya paṭipanne dānaṃ datvā asaṅkheyyā appameyyā dakkhiṇā pāṭikaṅkhitabbā, ko pana vādo sotāpanne”ti vuttaṃ (ma. ni. 3.379). Saraṇagamanato paṭṭhāya hi tattha sotāpattīphalasacchikiriyāya paṭipanno adhippetoti, ayaṃ tāvettha pāḷiyojanā.

Anupadavaṇṇanāyaṃ pana **idhāti** vihiṃsādivatthudīpanametaṃ. **Kho panāti** nipātamattaṃ. **Voti** karaṇatthe sāmivacanaṃ, ayaṃ pana saṅkhepattho, yadetam “pare vihiṃsakā bhavissanti”tiādinā nayena vihiṃsādivatthum vadāma. Idha, cunda, tumhehi sallekho kātabboti.

Evaṃ saṅkhepato vatvā idāni vitthārento “pare vihiṃsakā bhavissanti, mayamettha avihimsakā bhavissamāti sallekho karaṇīyo”tiādimāha.

Tattha **pareti** ye keci imaṃ sallekhamananuyuttā. **Vihimsakā bhavissanti**ti pāṇinā vā leḍḍunā vātiādīhi sattānaṃ vihesakā bhavissanti. **Mayamettha avihimsakā bhavissamāti** mayam pana yattheva vatthusmiṃ pare evaṃ vihiṃsakā bhavissanti, ettheva avihimsakā bhavissāma, avihimsaṃ uppādetvā viharissāma. **Iti sallekho karaṇīyoti** evaṃ tumhehi sallekho kātabbo. **Sallekhoti** ca idha avihimsāva veditabbā. Avihimsā hi vihiṃsaṃ sallekhati, taṃ chindati, tasmā **sallekhoti** vuccati. Esa nayo sabbattha. Ayaṃ pana viseso. **Pare**

micchādiṭṭhī ettha kammaṭṭhānaṃ antamicchādiṭṭhiṃca micchattānaṃ ādimicchādiṭṭhiṃca missetvā diṭṭhi vuttāti vedītabbā. Tathā **mayamettha sammādiṭṭhī** vuttaṭṭhāne sammādiṭṭhi. Ettha ca kammaṭṭhakathā vitthārato sammādiṭṭhisutte āvi bhavissati. Micchattesu micchādiṭṭhiādayo dvedhāvītakke.

Ayaṃ panettha saṅkhepo, pāṇaṃ atipātentīti **pāṇātipātī** pāṇaghātakāti attho. Adinnaṃ ādiyantīti **adinnādāyī**, parassa hārinoti attho. Abrahmaṃ hīnaṃ lāmakadhammaṃ carantīti **abrahmacārī**, methunadharmappaṭisevakāti attho. Brahmaṃ seṭṭhaṃ paṭipadaṃ carantīti **brahmacārī**, methunā paṭiviratāti attho. Ettha ca brahmacariyaṃ sallekhoti vedītabbā. Brahmācariyaṃ abrahmacariyaṃ sallekhati. Musā vadantīti **musāvādī**, paresaṃ atthabhañjanakaṃ tuccaṃ alikaṃ vācaṃ bhāsitaroti attho. Pisuṇā vācā etesanti **pisuṇavācā**. Paresaṃ mammacchedikā pharusā vācā etesanti **pharusavācā**. Samphaṃ niratthakavacanaṃ palapanṭīti **samphappalāpī**. Abhijjhāyantīti **abhijjhālū**, parabhaṇḍalubbhanasīlāti attho. Byāpannaṃ pūtibhūtaṃ cittametesanti **byāpannacittā**. Micchā pāpikā viññugarahitā etesaṃ diṭṭhīti **micchādiṭṭhī**, kammaṭṭhapariyāpannāya natthi dinnantiādivatthukāya, micchattapariyāpannāya aniyānikadiṭṭhiyā ca samannāgatāti attho. Sammā sobhanā viññuppasatthā etesaṃ diṭṭhīti **sammādiṭṭhī**, kammaṭṭhapariyāpannāya atthi dinnantiādikāya kammassakatādiṭṭhiyā, sammattapariyāpannāya maggadiṭṭhiyā ca samannāgatāti attho.

Micchāsāṅkappāti ayāthāvaaniyyānikaakusalasāṅkappā. Esa nayo **micchāvācāti**ādīsu. Ayaṃ pana viśeso, micchāsāṅkappādayo viya hi **micchāsati** nāma pāṭiekkko koci dhammo natthi, atītaṃ pana cintayato pavattānaṃ catunnampi akusalakkhandhānametaṃ adhivacanaṃ. Yampi vuttaṃ bhagavatā – “atthesā, bhikkhave, anussati, nesā natthīti vadāmi, puttalābhaṃ vā, bhikkhave, anussarato, dhanalābhaṃ vā, bhikkhave, anussarato, yasalābhaṃ vā, bhikkhave, anussarato”ti, tampi taṃ taṃ cintentassa satipatirūpakena uppattim sandhāya vuttanti vedītabbā. **Micchāñāṇī** ettha ca **micchāñāṇanti** pāpakiriyāsu upāyacintāvasena pāpaṃ katvā “sukataṃ mayā”ti paccavekkhaṇākārena ca uppanno moho vedītabbo, tena samannāgatā puggalā **micchāñāṇī**. **Sammāñāṇī** ettha pana ekūnavīsatisabhedāṃ paccavekkhaṇāñāṇaṃ “sammāñāṇa”nti vuccati, tena samannāgatā puggalā **sammāñāṇī**. **Micchāvimuttī**ti avimuttāyeva samānā “vimuttā maya”nti evaṃsaññīno, avimuttiyaṃ vā vimuttisaññīno. Tatrāyaṃ vacanattho, micchā pāpikā viparītā vimutti etesaṃ atthīti **micchāvimuttī**. Micchāvimuttīti ca yathāvuttenākārena pavattānaṃ akusalakkhandhānametaṃ adhivacanaṃ. Phalasampayuttāni pana sammādiṭṭhiādinī atṭhaṅgāni ṭhapetvā sesadhammā **sammāvimuttī**ti vedītabbā. Sā ca micchāvimuttiṃ sallikhitvā ṭhitattā **sallekhoti** vedītabbā. Tattha niyojento āha “mayamettha sammāvimuttī bhavissāmīti sallekho karaṇīyo”ti.

Ito parāni tīṇi nīvaraṇavasena vuttāni. **Abhijjhālū byāpannacittā**ti evaṃ kammaṭṭhesu vuttattā panettha paṭhamāni dve nīvaraṇāni na vuttāntīti vedītabbāni. Tattha thinamiddhena pariyuṭṭhitā abhibhūtatī **thinamiddhapariyuṭṭhitā**. Uddhaccena samannāgatāti **uddhatā**. Vicinantā kicchanti na sakkonti sannīṭṭhānaṃ kātunti **vicikicchī**. **Kodhanāti**ādīni dasa cittassa upakkilesavasena vuttāni. Tattha kodhādīsu yaṃ vattabbaṃ siyā, taṃ sabbaṃ dhammādyādavatthasuttasu vuttaṃ. Ayaṃ panettha vacanattho – **kodhanāti** kujjhanasīlā. **Upanāhī**ti upanāhanasīlā, upanāho vā etesaṃ atthīti **upanāhī**. Tathā **makkhī palāsī** ca. Issantīti **issukī**. Maccharāyantīti **maccharī**, maccheraṃ vā etesaṃ atthīti maccharī. Saṭṭhayantīti **saṭṭhā**, na sammā bhāsantīti vuttaṃ hoti, kerāṭīkayuttānametaṃ adhivacanaṃ. Māyā etesaṃ atthīti **māyāvī**. Thambhasamaṅgītāya **thaddhā**. Atimānayogena **atimānī**. Vuttapaccanīkanayena sukkapakkho vedītabbo.

Dubbacāti vattum dukkhā kiñci vuccamānā na sahanti. Tabbiparītā **suvacā**. Devadattādisadisā pāpakā mittā etesanti **pāpamittā**. Buddhā vā sārīputtādisadisā vā kalyāṇā mittā etesanti **kalyāṇamittā**. Kāyaduccarītādisū cittavossaggavasena **pamattā**. Viparītā **appamattā**ti vedītabbā. Imāni tīṇi pakiṇṇakavasena vuttāni. **Assaddhāti**ādīni satta asaddhammavasena. Tattha tīsu vatthūsu saddhā etesaṃ natthīti **assaddhā**. Sukkapakkhe saddahantīti **saddhā**, saddhā vā etesaṃ atthītipi saddhā. Natthi etesaṃ hirīti **ahirikā**, akusalasamāpattiyā ajjucchamānānametaṃ adhivacanaṃ. Hirī etesaṃ mane, hiriyā vā yuttamanāti **hirimanā**. Na ottappantīti **anottappī**, akusalasamāpattiyā na bhāyantīti vuttaṃ hoti. Tabbiparītā **ottappī**. Appaṃ sutametesanti **appassutā**, **appanti** ca thokanti na gahetabbaṃ, natthīti gahetabbaṃ. “Appassutā”ti hi nissutā sutavirahitā vuccanti. Bahu sutametesanti **bahussutā**, tathāgatabhāsitaṃ ekampi gāthaṃ yāthāvato ṇatvā anurūpapaṭipannānametaṃ adhivacanaṃ. Kucchitā sīdantīti **kusitā**, hīnavīriyānametaṃ adhivacanaṃ. Āraddhaṃ vīriyametesanti **āraddhavīriyā**, sammappadhānayuttānametaṃ adhivacanaṃ, muṭṭhā sati etesanti **muṭṭhassatī**, naṭṭhassatīti vuttaṃ hoti. Upaṭṭhitā sati etesanti **upaṭṭhitassatī**, niccaṃ ārammaṇābhīmukhappavattasatīnametaṃ adhivacanaṃ. Duṭṭhā paññā etesanti **duppaññā**, naṭṭhapaññāti

vuttam hoti. Paññāya sampunnāti **paññāsampunnā**, **paññāti** ca idha vipassanāpaññā veditabbā. Vipassanāsambhāro hi paripūro imasmim thāne āgato, tasmā vipassanāpaññāva ayanti porāṇanam āṇā.

Idāni ekameva lokuttaraguṇanam antarāyakaram aniyānikadiṭṭhim tihākārehi dassento **sandiṭṭhiparāmāsī**tiādīmāha. Tattha sandiṭṭhim parāmasantīti **sandiṭṭhiparāmāsī**. Ādhānam gaṇhantīti **ādhānaggāhi**, **ādhānanti** daḷham vuccati, daḷhaggāhīti attho. Yuttakāraṇam dīsvāva laddhim paṭinissajjantīti **paṭinissaggi**, dukkhena kicchena kasirena bahumpi kāraṇam dassetvā na sakkā paṭinissaggaṃ kātuntī **duppaṭinissaggi**, ye attano uppannam diṭṭhim idameva saccanti daḷham gaṇhītvā api buddhādīhi kāraṇam dassetvā vuccamānā na paṭinissajjanti, tesametam adhvācanam. Tādisā hi puggalā yaṃ yadeva dhammam vā adhammam vā gaṇhanti, tam sabbam “evaṃ amhākaṃ ācariyehi kathitam, evaṃ amhehi suta”nti kummova aṅgāni sake kapāle antoyeva samodahanti, kumbhīlaggāham gaṇhanti na vissajjanti. Vuttavipariyāyena sukkapakkho veditabbo.

84. Evaṃ catucattālīsāya ākārehi sallekham dassetvā idāni tasmim sallekhe cittuppādassāpi bahūpakāratam dassetum **cittuppādampi kho ahanti**tiādīmāha.

Tassattho, aham, cunda, kusalesu dhammesu cittuppādampi bahūpakāram vadāmi, yā panetā kāyena ca vācāya ca anuvidhiyanā, yathā paṭhamam cittaṃ uppannam, tatheva tesam dhammānam kāyena karaṇam, vācāya ca “karothā”ti āṇāpanam vā, uggahaparipucchādīni vā, tattha vādoyeva ko, ekantabahūpakārāyeva hi tā anuvidhiyanāti dasseti. Kasmā panettha cittuppādopi bahūpakāroti? Ekantahitasukhāvahattā anuvidhiyanānam hetuttā ca.

“Dānam dassāmī”ti hi cittuppādo sayampi ekantahitasukhāvaho anuvidhiyanānampi hetu, evaṇhi uppannacittattāyeva dutiyadivase mahāvīthim pidahitvā mahāmaṇḍapam katvā bhikkhusatassa vā bhikkhusahassassa vā dānam deti, “bhikkhusaṅgham nimantetha pūjetha parivisathā”ti parijane āṇāpeti. Evaṃ “saṅghassa cīvaram senāsanam bhesajjam dassāmī”ti cittuppādo sayampi ekantahitasukhāvaho anuvidhiyanānampi hetu, evaṃ uppannacittattāyeva hi cīvarādīni abhisankharoti deti dāpeti ca. Esa nayo saraṇagamanādisu.

“Saraṇam gacchāmī”ti hi cittaṃ uppādetvāva pacchā kāyena vā vācāya vā saraṇam gaṇhāti. Tathā “pañcaṅgam aṭṭhaṅgam dasaṅgam vā sīlam samādiyissāmī”ti cittaṃ uppādetvā kāyena vā vācāya vā samādiyati, “pabbajitvā catūsu sīlesu paṭiṭṭhahissāmī”ti ca cittaṃ uppādetvā kāyena vācāya ca pūretabbam sīlam pūreti. “Buddhāvācanam uggahessāmī”ti cittaṃ uppādetvāva ekaṃ vā nikāyam dve vā tayo vā cattāro vā pañca vā nikāye vācāya uggaṇhāti. Evaṃ dhutaṅgasamādāna-kammaṭṭhānuggaha-kasiṇaparikkamma-jhānasamāpattivipassanāmaggaḥala- paccekabodhi-sammāsambodhivasena netabbam.

“Buddho bhavissāmī”ti hi cittuppādo sayampi ekantahitasukhāvaho anuvidhiyanānampi hetu, evaṇhi uppannacittattāyeva aparena samayena kappasatasahassādhikāni cattāri asaṅkheyyāni kāyena vācāya ca pāramiyo pūretvā sadevakaṃ lokaṃ tārento vicarati. Evaṃ sabbattha cittuppādopi bahūpakāro. Kāyavācāhi pana anuvidhiyanā atibahūpakārāyevāti veditabbā.

Evaṃ kusalesu dhammesu cittuppādassāpi bahūpakāratam dassetvā idāni tattha niyojento “tasmā tiha cundā”tiādīmāha. Tam atthato pākāmeva.

85. Evaṃ catucattālīsāya ākārehi dassite sallekhe cittuppādassāpi bahūpakāratam dassetvā idāni tasseva sallekhassa hitādhigamāya maggabhāvam dassento **seyyathāpī**tiādīmāha.

Tassattho, yathā nāma, cunda, khāṇukaṇṭakapāsāṇādīhi visamo maggo bhavēyya, tassa parikkamanāya parivajjanatthāya añño suparikkamakato viya bhūmibhāgo samo maggo bhavēyya, yathā ca rukkhamūlapāsāṇapapātakumbhīlamakarādī paribhāyakaṃ visamaṃ tittamassa, tassa parikkamanāya parivajjanatthāya aññaṃ avisamaṃ anupubbagamabhīram sopānaphalakasadisam tittam bhavēyya, yaṃ paṭipanno sukheva tam nadim vā taḷakam vā ajjhogāhetvā nhāyēyya vā uttareyya vā, evameva kho, cunda, visamamaggavisamatitthasadisāya vihiṃsāya samannāgatassa vihiṃsakapuggalassa samamaggasamatitthasadisā avihimsā hoti parikkamanāya. Yatheva hi visamamaggatitthaparivajjanatthāya

samo maggo ca titthañca paṭiyattaṃ, evaṃ vihiṃsāparivajjanatthāya avihimsā paṭiyattā, yaṃ paṭipanno sukheveva manussagatiṃ vā devagatiṃ vā ajjhogāhetvā sampattiṃ vā anubhaveyya uttareyya vā lokā. Eteneva upāyena sabbapadāni yojetabbāni.

86. Evaṃ tasseva hitādhigamāya maggabhāvaṃ dassetvā idāni uparibhāgaṅgamanīyatam dassento, **seyyathāpītiādīmāha.**

Tassattho, yathā nāma, cunda, ye keci akusalā dhammā paṭisandhiyā janakā vā ajanakā vā, dinnāyapi paṭisandhiyā vipākajanakā vā ajanakā vā, sabbe te jātivaseṇa adbhohhāgaṅgamanīyāti evaṃnāmāva honti, vipākakāle aniṭṭhākantavipākattā. Yathā ca ye keci kusalā dhammā paṭisandhiyā janakā vā ajanakā vā dinnāyapi paṭisandhiyā vipākajanakā vā ajanakā vā, sabbe te jātivaseṇa uparibhāgaṅgamanīyāti evaṃnāmāva honti, vipākakāle iṭṭhākantavipākattā, evameva kho, cunda, vihiṃsakassa...pe... uparibhāgāyāti. Tatrāyaṃ opammasaṃsandana – yathā sabbe akusalā adbhohhāgaṅgamanīyā, evaṃ vihiṃsakassa ekā vihiṃsāpi. Yathā ca sabbe kusalā uparibhāgaṅgamanīyā, evaṃ avihimsakassa ekā avihimsāpi. Eteneva upāyena akusalaṃ akusalena kusalañca kusalena upametabbaṃ, ayaṃ kirettha adhippāyoti.

87. Evaṃ tasseva sallekhassa uparibhāgaṅgamanīyatam dassetvā idāni parinibbāpane samatthabhāvaṃ dassetuṃ **so vata cundātiādīmāha.** Tattha **soti** vuttapakārapuggalaniddeso. Tassa yoti imaṃ uddesavacanaṃ āharitvā yo attanā palipapalipanno, so vata, cunda, paraṃ palipapalipannaṃ uddharissatīti evaṃ sabbapadesu sambandho veditabbo. **Palipapalipannoti** gambhīrakaddame nimuggo vuccati, no ca kho ariyassa vinaye. Ariyassa pana vinaye **palipanti** pañca kāmagaṇā vuccanti. **Palipannoti** tattha nimuggo bālaputhujjano, tasmā evamettha atthayojanā veditabbā. Yathā, cunda, koci puriso yāva nāsikaggā gambhīre kaddame nimuggo aparaṃ tattheva nimuggaṃ hatthe vā sīse vā gahetvā uddharissatīti netam ṭhānaṃ vijjati, na hi taṃ kāraṇamatthi, yena so taṃ uddharitvā thale patiṭṭhapeyya, evameva yo attanā pañcakāmagaṇapalipe palipanno, so vata paraṃ tattheva palipapalipannaṃ uddharissatīti netam ṭhānaṃ vijjati.

Tattha siyā ayuttametam, puthujjanānampi bhikkhubhikkhunūpāsakaupāsikānaṃ dhammadesanaṃ sutvā hontiyeva dhammaṃ abhisametāro, tasmā palipapalipanno uddharatīti, taṃ na tathā datṭhabbaṃ. Bhagavāyeva hi tattha uddharati, pasaṃsāmatameva pana dhammakathikā labhanti rañña pahitalekhavācako viya. Yathā hi rañña paccantajanapade pahitaṃ lekhaṃ tattha manussā lekhaṃ vācetuṃ ajānantā yo vācetuṃ jānāti, tena vācāpetvā tamatthaṃ sutvā “rañña āṇā”ti ādarena sampādentī, na ca nesam hoti “lekhavācakassa ayaṃ āṇā”ti. Lekhavācako pana “vissatṭhāya vācāya vācesī anelagaḷāyā”ti pasaṃsāmatameva labhati, evameva kiñcāpi sārīputtapabhutayo dhammakathikā dhammaṃ desenti, atha kho likhitapaṇṇavācako viya te honti. Bhagavatoyeva pana sā dhammadesanā rañña āṇā viya. Ye ca taṃ sutvā dhammaṃ abhisamenti, te bhagavāyeva uddharatīti veditabbā. Dhammakathikā pana “vissatṭhāya vācāya dhammaṃ desenti anelagaḷāyā”ti pasaṃsāmatameva labhantīti. Tasmā yuttamevetanti. Vuttavipariyāyena sukkapakkho veditabbo.

Adanto avinīto aparinibbutoti ettha pana anibbisatāya **adanto.** Asikkhitavinayatāya **avinīto.** Anibbutakilesatāya **aparinibbutoti** veditabbo. So tādiso paraṃ damessati, nibbisam karissati, vinessati vā tisso sikkhā sikkhāpessati, parinibbāpessati vā tassa kilese nibbāpessatīti netam ṭhānaṃ vijjati. Vuttavipariyāyena sukkapakkho veditabbo.

Evameva kho, cunda, vihiṃsakassa...pe... parinibbānāyāti ettha pana evamattho veditabbo – yathā hi attanā apalipapalipanno paraṃ palipapalipannaṃ uddharissati, danto damessati, vinīto vinessati, parinibbuto parinibbāpessatīti ṭhānametaṃ vijjatīti. Kiṃ pana tanti? Apalipapalipannattaṃ, dantattaṃ vinītattaṃ parinibbutattañca, evameva kho, cunda, vihiṃsakassa purisapuggalassa avihimsā hoti parinibbānāya. Kiṃ vuttaṃ hoti? Yo attanā avihimsako, tassa yā avihimsā, ayaṃ yā eṣā vihiṃsakassa parassa vihiṃsā, tassā parinibbānāya hoti, attanā hi avihimsako parassa vihiṃsācetanam nibbāpessatīti ṭhānametaṃ vijjati. Kiṃ pana tanti? Avihimsakattameva. Yañhi yena attanā adhigataṃ hoti, so paraṃ tadatthāya samādapetuṃ sakkotīti.

Atha vā yathā attanā apalipanno danto vinīto parinibbuto paraṃ palipapalipannaṃ adantaṃ avinītam aparinibbutañca uddharissati damessati vinessati parinibbāpessatīti ṭhānametaṃ vijjati, evameva vihiṃsakassa purisapuggalassa vihiṃsāpahānāya maggaṃ bhāvayato uppannā avihimsā hoti parinibbānāya. Parinibbuto viya

hi aparinibbutaṃ avihimsācetanāva vihimsācetanāṃ parinibbāpetuṃ samatthā. Etamatthaṃ dassento “evameva kho, cundā” tiādīmāhāti evamettha attho daṭṭhabbo. Yathā cettha, evaṃ sabbapadesu. Ativittārabhayena pana anupadayojanā na katāti.

88. Evaṃ tassa parinibbāpane samatthabhāvaṃ dassetvā idāni taṃ desanaṃ nigametvā dhammapaṭipattiyaṃ niyojetuṃ **iti kho, cundā** tiādīmāha. Tattha **sallekha** **pariyāyoti** sallekhakāraṇaṃ. Esa nayo sabbattha ettha avihimsādayo eva vihimsādīnaṃ sallekhanato sallekhakāraṇaṃ. Tesāṃ vasena cittaṃ uppādetabbato cittupādakāraṇaṃ, vihimsādi, parikkamanassa hetuto parikkamanakāraṇaṃ, uparibhāganipphādanato uparibhāgakāraṇaṃ, vihimsādīnaṃ parinibbāpanato parinibbānakāraṇanti veditabbā. **Hitesinā** ti hitaṃ esantena. **Anukampakenā** ti anukampamānena. **Anukampaṃ upādāyā** ti anukampaṃ cittaṃ pariggahetvā, pariccātipi vuttaṃ hoti. **Kataṃ vo taṃ mayā** ti taṃ mayā ime pañca pariyāye dassentena tumhākaṃ kataṃ. Ettakameva hi anukampakassa satthu kiccaṃ, yadidaṃ aviparītadhammadesanā. Ito paraṃ pana paṭipatti nāma sāvakaṇaṃ kiccaṃ. Tenāha **etāni, cunda, rukkhāmūlāni...pe... amhākaṃ anusāsanti**.

Tattha ca **rukkhamūlāni** ti iminā rukkhāmūlasenāsanāṃ dasseti. **Suññāgārāni** ti iminā janavivittatṭhānaṃ. Ubhayenāpi ca yogānurūpasenāsanamācikkhati, dāyajjaṃ niyyātetī. **Jhāyathā** ti ārammaṇūpanijjhānena aṭṭhatimsārammaṇāni, lakkhaṇūpanijjhānena ca aniccādito khandhāyatanādīni upanijjhāyatha, samathañca vipassanañca vaḍḍhethāti vuttaṃ hoti. **Mā pamādatthāti** mā pamajjittha. **Mā pacchā vippaṭisārino ahuvatthāti** ye hi pubbe daharakāle, ārogyakāle, sattaṃpāyādisampattikāle, satthu sammukhībhāvakāle ca yonisomanasikāravirahitā rattindivaṃ maṅgulabhattā hutvā seyyasukhaṃ middhasukhamanubhontā pamajjanti, te pacchā jarākāle, rogakāle, maraṇakāle, vipattikāle, satthu parinibbutakāle ca taṃ pubbe pamādavihāraṃ anussarantā, sappaṭisandhikālakiriyañca bhāriyaṃ sampassamānā vippaṭisārino honti, tumhe pana tādisā mā ahuvatthāti etamatthaṃ dassento āha “mā pacchā vippaṭisārino ahuvatthā” ti. **Ayaṃ vo amhākaṃ anusāsanti** ayaṃ amhākaṃ santikā “jhāyatha mā pamādatthā” ti tumhākaṃ anusāsanti, ovādoti vuttaṃ hoti.

Papañcasūdaniyā majjhimanikāyaṭṭhakathāya

Sallekhasuttavaṇṇanā niṭṭhitā.

9. Sammādiṭṭhisuttavaṇṇanā

89. Evaṃ me sutanti sammādiṭṭhisuttaṃ. Tattha “sammādiṭṭhi sammādiṭṭhī, āvuso, vuccati, kittāvatā nu kho, āvuso” ti vā “katamaṃ panāvuso, akusala” nti vā evaṃ yattakā therena pucchā vuttā, sabbā kathetukamyatā pucchā eva.

Tattha yasmā jānantāpi sammādiṭṭhī vadanti ajānantāpi bāhirakāpi sāsaniakāpi anussavādivasenāpi attapaccakkheṇāpi, tasmā taṃ bahūnaṃ vacanaṃ upādāya dvikkhattuṃ āmasanto “sammādiṭṭhi sammādiṭṭhī, āvuso, vuccati” ti āha. Ayañhi ettha adhippāyo, aparehipi sammādiṭṭhī vuccati, athāparehipi sammādiṭṭhī vuccati, svāyaṃ evaṃ vuccamāno atthañca lakkhaṇaṃ upādāya kittāvatā nu kho, āvuso, ariyasāvako sammādiṭṭhi hotīti. Tattha **sammādiṭṭhī** ti sobhanāya pasatthāya ca diṭṭhiyā samannāgato. Yadā pana dhammeyeva ayaṃ sammādiṭṭhisaddo vattati, tadāssa sobhanā pasatthā ca diṭṭhi **sammādiṭṭhī** ti evamattho veditabbo.

Sā cāyaṃ sammādiṭṭhi duvidhā hoti lokiyā lokuttarāti. Tattha kammassakatāññaṃ saccānulomikaññañca lokiyā sammādiṭṭhi, saṅkhepato vā sabbāpi sāsavā paññā. Ariyamaggaphalasampayuttā paññā lokuttarā sammādiṭṭhi. Puggalo pana tividho hoti puthujjano sekkho asekkho ca. Tattha puthujjano duvidho hoti bāhirako sāsaniako ca. Tattha bāhirako kammavādī kammassakatādiṭṭhiyā sammādiṭṭhi hoti, no saccānulomikāya attadiṭṭhiparāmāsakattā. Sāsaniako dvīhipi. Sekkho niyatāya sammādiṭṭhiyā sammādiṭṭhi. Asekkho asekkhāya. Idha pana niyatāya niyyānikāya lokuttarakusalasammādiṭṭhiyā samannāgato “sammādiṭṭhi” ti adhippeto. Tenevāha “ujugatāssa diṭṭhi dhamme aveccappasādena samannāgato āgato imaṃ saddhamma” nti, lokuttarakusalasammādiṭṭhiyeva hi antadvayamanupagamma ujubhāvena gatattā, kāyavaṅkādīni ca sabbavaṅkāni samucchindivā gatattā ujugatā hoti, tāyeva ca diṭṭhiyā samannāgato navappakārepi lokuttaradhamme aveccappasādena acalappasādena samannāgato hoti, sabbadiṭṭhigahanāni ca vinibbēhento sabbakilese pajahanto jātisaṃsārā nikkhamanto paṭipattiṃ pariniṭṭhapento ariyena maggena

āgato imaṃ sambuddhappaveditaṃ amatogadhaṃ nibbānasaṅkhātāṃ **saddhammanti** vuccati.

Yato khoti kālaparicchavedāvacanametaṃ, yasmaṃ kāleti vuttaṃ hoti. **Akusalañca pajānātīti** dasākusalakammappathasaṅkhātāṃ akusalañca pajānāti, nirodhārammaṇāya pajānanāya kiccavasena “idaṃ dukkha”nti paṭivijjhanto akusalaṃ pajānāti. **Akusalamūlañca pajānātīti** tassa mūlapaccayabhūtaṃ akusalamūlañca pajānāti, teneva pakārena “ayaṃ dukkhasamudayo”ti paṭivijjhanto. Esa nayo **kusalañca kusalamūlañcāti** etthāpi. Yathā cettha, evaṃ ito paresu sabbavāresu kiccavaseneva vatthupajānanā veditabbā. **Ettāvātāpīti** ettakena iminā akusalādippajānanenāpi. **Sammādiṭṭhi hotīti** vuttappakārya lokuttarasammādiṭṭhiyā samannāgato hoti. **Ujugatāssa...pe... imaṃ saddhammanti** ettāvātā saṃkhittadesanā niṭṭhitā hoti. Desanāyeva cesā saṃkhittā, tesāṃ pana bhikkhūnaṃ vitthāraseneva sammāmanasikārappaṭivedho veditabbo.

Dutiyavāre pana desanāpi vitthārena manasikārappaṭivedhopi vitthāreneva vuttoti veditabbo. Tattha “saṃkhittadesanāya dve heṭṭhimaggā, vitthāradesanāya dve uparimaggā kathitā”ti bhikkhū āhaṃsu vitthāradesanāvasāne “sabbaso rāgānusayaṃ pahāyā”tiādivacanāṃ sampassamānā. Thero panāha “saṃkhittadesanāyapi cattāro maggā rāsito kathitā, vitthāradesanāyapī”ti. Yā cāyaṃ idha saṃkhittavithāradesanāsu vicāraṇā āvikatā, sā sabbavāresu idha vuttanayeneva veditabbā. Apubbānuttānapadavaṇṇanāṃmattameva hi ito paraṃ karissāma.

Akusalakammappathavaṇṇanā

Tattha paṭhamavārassa tāva vitthāradesanāya “pāṇātipāto kho, āvuso, akusala”ntiādisu akosallappavattiyā akusalaṃ veditabbaṃ, parato vattabakusalappaṭipakkhato vā. Taṃ lakkhaṇato sāvajjadukkhavipākaṃ saṃkiliṭṭhaṃ vā. Ayaṃ tāvettha sādharmaṇapadavaṇṇanā.

Asādhāraṇesu pana pāṇassa atipāto **pāṇātipāto**, pāṇavadho pāṇaghātoti vuttaṃ hoti. **Pāṇoti** cettha vohārato satto, paramatthato jīvitindriyaṃ. Tasmaṃ pana pāṇe pāṇasaññino jīvitindriyupacchedakaupakkamasamuṭṭhāpikā kāyavacīdvārānaṃ aññataradvārappavattā vadhakacetanā pāṇātipāto. So guṇavirahitesu tiracchānagatādisu pāṇesu khuddake pāṇe appasāvajjo, mahāsārīre mahāsāvajjo. Kasmā? Payogamahantatāya. Payogasamattepi vatthumahantatāya. Guṇavantesu manussādisu appaguṇe pāṇe appasāvajjo, mahāguṇe mahāsāvajjo. Sarīraguṇānaṃ pana samabhāve satī kilesānaṃ upakkamānañca mudutāya appasāvajjo, tibbatāya mahāsāvajjoti veditabbo. Tassa pañca sambhārā hontī pāṇo, pāṇasaññitā, vadhakacittaṃ, upakkamo, tena maraṇanti. Cha payogā sāhatthiko, āṇattiko, nissaggiyo, thāvaro, vijjāmayo, iddhiyoti. Imasmiṃ panettha vitthārīyamāne atipapañco hoti, tasmā naṃ na vitthārayāma, aññañca evarūpaṃ. Atthikehi pana **samantapāsādikaṃ vinayaṭṭhakathaṃ** (pārā. aṭṭha. 2.172) oloketvā gahetabbo.

Adinnassa ādānaṃ **adinnādānaṃ**, parassa haraṇaṃ theyyaṃ, corikāti vuttaṃ hoti. Tattha **adinnanti** parapariggahitaṃ, yattha paro yathākāmakāritaṃ āpajjanto adaṇḍāraho anupavajjo ca hoti. Tasmaṃ pana parapariggahite parapariggahitasaññino tadādāyakaupakkamasamuṭṭhāpikā theyyacetanā adinnādānaṃ. Taṃ hīne parasantake appasāvajjaṃ, paṇṭe mahāsāvajjaṃ. Kasmā? Vatthupaṇṭatāya. Vatthusamatte satī guṇādhikānaṃ santake vatthusmiṃ mahāsāvajjaṃ. Taṃ taṃ guṇādhikaṃ upādāya tato tato hīnaguṇassa santake vatthusmiṃ appasāvajjaṃ. Tassa pañca sambhārā hontī parapariggahitaṃ, parapariggahitasaññitā, theyyacittaṃ, upakkamo, tena haraṇanti. Cha payogā sāhatthikādayova. Te ca kho yathānurūpaṃ theyyāvahāro, pasayhāvahāro, paṭicchannāvahāro, parikappāvahāro, kusāvahāroti imesaṃ avahārānaṃ vasena pavattāti ayamettha saṅkhepo. Vitthāro pana **samantapāsādikāyaṃ** (pārā. aṭṭha. 1.92) vutto.

Kāmesumicchācāroti ettha pana **kāmesūti** methunasamācāresu. **Micchācāroti** ekantanindito lāmakācāro. Lakkhaṇato pana asaddhammādhippāyena kāyadvārappavattā agamaṇīyaṭṭhānavītikkamacetanā kāmesumicchācāro.

Tattha **agamaṇīyaṭṭhānaṃ** nāma purisānaṃ tāva māturakkhitā, pīturakkhitā, māṭāpīturakkhitā, bhāturakkhitā, bhāginirakkhitā, nātirakkhitā, gottarakkhitā, dhammarakkhitā, sārakkhā, sapaṇḍāṇḍāti māturakkhitādayo dasa; dhanakkhitā, chandavāsini, bhogavāsini, paṭāvāsini, odapattakini, obhaṭacumbaṭā, dāsī ca bhariyā ca, kammakārī ca bhariyā ca, dhajāhatā, muhuttikāti etā ca dhanakkhitādayo dasāti **visati itthiyo**.

Itthīsu pana dvinnam sārakkhāsaparidaṇḍānam, dasannañca dhanakkītādīnanti dvādasannaṃ itthīnaṃ aññe purisā, idaṃ **agamanīyaṭṭhānaṃ** nāma. So panesa micchācāro sīlādiguṇarahite agamanīyaṭṭhāne appasāvajjo, sīlādiguṇasampanne mahāsāvajjo. Tassa cattāro sambhārā agamanīyavattu, tasmim sevanacittam, sevanapayogo, maggenamaggappaṭipattīadhivāsanti. Eko payogo sāhatthiko eva.

Musāti viṣaṃvādanapurekkhārassa atthabhañjako vacīpayogo kāyapayogo vā. Viṣaṃvādanādhippāyena panassa paraviṣaṃvādanakāyavacīpayogasamuṭṭhāpikā cetanā **musāvādo**. Aparo nayo **musāti** abhūtaṃ atacchaṃ vatthu. **Vādoti** tassa bhūtaṃ tacchato viññāpanaṃ. Lakkhaṇato pana atathaṃ vatthum tathato paraṃ viññāpetukāmassa tathāviññāttisamuṭṭhāpikā cetanā musāvādo. So yamattaṃ bhañjati, tassa appatāya appasāvajjo, mahantatāya mahāsāvajjo. Apica gahaṭṭhānaṃ attano santakaṃ adātukāmatāya natthītiādīnappavatto appasāvajjo, sakkhinā hutvā atthabhañjanattaṃ vutto mahāsāvajjo. Pabbajitānaṃ appakampi telaṃ vā sappiṃ vā labhitvā hasādhippāyena “ajja gāme telaṃ nadīmaññe sandatī”ti purāṇakathānāyena pavatto appasāvajjo, adīṭṭhaṃyeva pana dīṭṭhantiādīnā nayena vadantānaṃ mahāsāvajjo. Tassa cattāro sambhārā honti atathaṃ vatthu, viṣaṃvādanacittam, tajjo vāyāmo, parassa tadatthavijānananti. Eko payogo sāhatthikova. So kāyena vā kāyappaṭibaddhena vā vācāya vā viṣaṃvādakiriyākaraṇe daṭṭhabbo. Tāya ce kiriyāya paro tamattaṃ jānāti, ayaṃ kiriyāsamuṭṭhāpikacetanākkhaṇeyeva musāvādakammunā bajjhati.

Pisuṇā vācātiādīsu yāya vācāya yassa taṃ vācaṃ bhāsati, tassa hadaye attano piyabhāvaṃ parassa ca suññabhāvaṃ karotī, sā **pisuṇā vācā**. Yāya pana attānampi parampi pharusampi karotī, sā vācā sayampi pharusā neva kaṇṇasukhā na hadayasukhā vā, ayaṃ **pharusā vācā**. Yena samphaṃ palapati niratthakaṃ, so **samphappalāpo**. Tesaṃ mūlabhūtā cetanāpi pisuṇāvācādinānameva labhati, sā eva ca idha adhippetāti. Tattha saṃkiliṭṭhacittassa paresaṃ vā bhedaṃ attano piyakamyatāya vā kāyavacīpayogasamuṭṭhāpikā cetanā pisuṇā vācā. Sā yassa bhedaṃ karotī, tassa appaṇatāya appasāvajjā, mahāṇatāya mahāsāvajjā. Tassā cattāro sambhārā bhinditabbo paro, “iti ime nānā bhavissanti vinā bhavissanti”ti bhedapurekkhārātā vā, “ahaṃ piyo bhavissāmi vissāsiko”ti piyakamyatā vā, tajjo vāyāmo, tassa tadatthavijānananti.

Parassa mammachedakakāyavacīpayogasamuṭṭhāpikā ekantapharusā cetanā pharusā vācā. Tassa āvibhāvattamidaṃ vatthu – eko kira dārako mātuvacanaṃ anādiyivā araññaṃ gacchati, taṃ mātā nivattetuṃ asakkonti “caṇḍā taṃ mahimsī anubandhatū”ti akkosi. Athassa tattheva araññaṃ mahimsī uṭṭhāsi. Dārako “yaṃ mama mātā mukhena kathesi taṃ mā hotu, yaṃ cittena cintesi taṃ hotū”ti saccakiriyamakāsi. Mahimsī tattheva baddhā viya atṭhāsi. Evaṃ mammachedakopi payogo cittasaṇhatāya pharusā vācā na hoti. Mātāpitāro hi kadāci puttake evampi vadanti “corā vo khaṇḍākhāṇḍikaṃ karontū”ti, uppalapattampi ca nesaṃ upari patantaṃ na icchanti. Ācariyupajjhāyā ca kadāci nissitake evaṃ vadanti “kiṃ ime ahirikā anottappino caranti niddhamatha ne”ti. Atha kho nesaṃ āgamādhigamasampattiṃ icchanti. Yathā ca cittasaṇhatāya pharusā vācā na hoti, evaṃ vacanaṇhatāya aphaṇḍā vācāpi na hoti. Na hi mārāpetukāmassa “imaṃ sukhaṃ sayāpethā”ti vacanaṃ aphaṇḍā vācā hoti. Cittapharusatāya panesā pharusā vācāya. Sā yaṃ sandhāya pavattitā, tassa appaṇatāya appasāvajjā, mahāṇatāya mahāsāvajjā. Tassā tayo sambhārā akkositabbo paro, kupitacittam, akkosanāti.

Anatthaviññāpakakāyavacīpayogasamuṭṭhāpikā akusalacetanā **samphappalāpo**. So āsevanamandatāya appasāvajjo, āsevanamahantatāya mahāsāvajjo. Tassa dve sambhārā bhāratayuddhasītāharaṇādīniratthakakathāpurekkhārātā, tathārūpīkathākathananti.

Abhijjhāyatīti **abhijjhā**, parabhaṇḍābhimukhī hutvā tanninatāya pavattatīti attho. Sā “aho vata idaṃ mamassā”ti evaṃ parabhaṇḍābhijjhāyanalakkhaṇā. Adinnādānaṃ viya appasāvajjā ca mahāsāvajjā ca. Tassā dve sambhārā parabhaṇḍaṃ, attano pariṇāmanañca. Parabhaṇḍavattuke hi lobhe uppannepi na tāva kammaṭṭhābhedo hoti, yāva “aho vatīdaṃ mamassā”ti attano na pariṇāmeti.

Hitasukhaṃ byāpādayatīti **byāpādo**. So paravināsāya manopadosalakkhaṇo, pharusā vācā viya appasāvajjo mahāsāvajjo ca. Tassa dve sambhārā parasatto ca, tassa ca vināsacintā. Parasattavattuke hi kodhe uppannepi na tāva kammaṭṭhābhedo hoti, yāva “aho vatāyaṃ ucchijjeyya vinasseyyā”ti tassa vināsaṃ na cinteti.

Yathābhuccagahaṇābhāvena micchā passatīti **micchādiṭṭhi**. Sā “natthi dinna”ntiādinā nayena viparītadassanalakkhaṇā. Samphappalāpo viya appasāvajjā mahāsāvajjā ca. Apica aniyatā appasāvajjā, niyatā mahāsāvajjā. Tassā dve sambhārā vatthuno ca gahitākāraviparītātā, yathā ca taṃ gaṇhāti, tathābhāvena tassupaṭṭhānanti.

Imesaṃ pana dasannaṃ akusalakammaphānaṃ dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo.

Tattha **dhammatoti** etesu hi paṭipāṭiyā satta, cetanādhammāva honti, abhijjhādayo tayo cetanāsampayuttā.

Koṭṭhāsototi paṭipāṭiyā satta, micchādiṭṭhi cāti ime aṭṭha kammaphā eva honti, no mūlāni. Abhijjhābyāpādā kammaphā ceva mūlāni ca. Abhijjhā hi mūlaṃ patvā lobho akusalamūlaṃ hoti. Byāpādo doso akusalamūlaṃ.

Ārammaṇototi pāṇātipāto jīvitindriyārammaṇato saṅkhārārammaṇo hoti. Adinnādānaṃ sattārammaṇaṃ vā saṅkhārārammaṇaṃ vā. Micchācāro phoṭṭhabbavasena saṅkhārārammaṇo. Sattārammaṇotipi eke. Musāvādo sattārammaṇo vā saṅkhārārammaṇo vā. Tathā pisaṇā vācā. Pharusā vācā sattārammaṇāva. Samphappalāpo diṭṭhasutamutaviññātasena sattārammaṇo vā saṅkhārārammaṇo vā, tathā abhijjhā. Byāpādo sattārammaṇova. Micchādiṭṭhi tebhūmakadhamavasena saṅkhārārammaṇā.

Vedanātoti pāṇātipāto dukkhavedano hoti. Kiñcāpi hi rājāno coraṃ disvā hasamānāpi “gacchatha naṃ ghāthethā”ti vadanti, sannitṭhāpakacetanā pana nesaṃ dukkhasampayuttāva hoti. Adinnādānaṃ tivedanaṃ. Micchācāro sukhamajjhattavasena dvivedano, sannitṭhāpakacitte pana majjhattavedano na hoti. Musāvādo tivedano, tathā pisaṇā vācā. Pharusā vācā dukkhavedanāva. Samphappalāpo tivedano. Abhijjhā sukhamajjhattavasena dvivedanā, tathā micchādiṭṭhi. Byāpādo dukkhavedano.

Mūlatoti pāṇātipāto dosamohavasena dvimūlako hoti. Adinnādānaṃ dosamohavasena vā lobhamohavasena vā. Micchācāro lobhamohavasena. Musāvādo dosamohavasena vā lobhamohavasena vā, tathā pisaṇā vācā samphappalāpo ca. Pharusā vācā dosamohavasena. Abhijjhā mohavasena ekamūlā, tathā byāpādo. Micchādiṭṭhi lobhamohavasena dvimūlāti.

Lobho akusalamūlantiādīsu lubbhātīti **lobho**. Dussatīti **dosso**. Muyhatīti **moho**. Tesu lobho sayañca akusalo sāvajjadukkhavipākattṭhena, imesañca pāṇātipātādīnaṃ akusalānaṃ kesañci sampayuttappabhāvakaṭṭhena kesañci upanissayapaccayaṭṭhena mūlanti **akusalamūlaṃ**. Vuttampi cetam “ratto kho āvuso rāgena abhibhūto pariyādinnacitto pāṇampi hanatī”tiādi. Dosamohānaṃ akusalamūlabhāvepi eseva nayo.

Akusalakammaphavaṇṇanā niṭṭhitā.

Kusalakammaphavaṇṇanā

Pāṇātipātā veramaṇī kusalantiādīsu **pāṇātipātā**dayo vuttatthā eva. Veraṃ maṇatīti **veramaṇī**, veraṃ pajahatīti attho. Viramati vā etāya karaṇabhūtāya, vikārassa vekāraṃ katvāpi **veramaṇī**. Ayaṃ tāvettha byañjanato vaṇṇanā. Atthato pana **veramaṇī**ti kusalacittasampayuttā virati. Yā “pāṇātipātā viramantassa, yā tasmim samaye pāṇātipātā āratī viratī”ti evaṃ vuttā kusalacittasampayuttā virati, sā bhedato tividho hoti sampattavirati samādānavirati samucchadaviratīti. Tattha asamādinnaṃ sikkhāpadānaṃ attano jātivayabāhusaccādīni paccavekkhitvā “ayuttaṃ amhākaṃ evarūpaṃ kātu”nti sampattavatthum avitikkamantānaṃ uppajjamānā virati **sampattaviratī**ti veditabbā sīhaḷadīpe **cakkanaupāsakassa** viya.

Tassa kira daharakāleyeva mātuyā rogo uppajji. Vejjena ca “allasasamaṃsaṃ laddhuṃ vaṭṭatī”ti vuttaṃ. Tato cakkanassa bhātā “gaccha tāta khettaṃ āhiṇḍāhī”ti cakkanam pesesi. So tattha gato. Tasmīñca samaye eko saso taruṇasassaṃ khādituṃ āgato hoti, so taṃ disvā vegena dhāvanto valliyā baddho “kiri kirī”ti saddamakāsi. Cakkano tena saddena gantvā taṃ gahetvā cintesi “mātu bhesajjaṃ karomī”ti. Puna cintesi “na metaṃ patirūpaṃ, yvāhaṃ mātu jīvitakāraṇā paraṃ jīvitā voropeyya”nti. Atha naṃ “gaccha araṇṇe sasehi

saddhiṃ tiṇodakaṃ paribhuñjā’’ti muñci. Bhātārā ca ‘‘kiṃ tāta saso laddho’’ti pucchito taṃ pavattim ācikkhi. Tato naṃ bhātā paribhāsi. So mātusantikaṃ gantvā ‘‘yatohaṃ jāto, nābhijānāmi sañcicca pāṇaṃ jīvītā voropetā’’ti saccam vatvā adhiṭṭhāsi. Tāvadevassa mātā arogā ahoṣi.

Samādinnaṣikkhāpadānaṃ pana sikkhāpadasamādāne ca tatuttari ca attano jīvitaṃ pariccajivā vatthum avītikkamantānaṃ uppajjamānā virati **samādānaviratī**ti veditabbā uttaravaḍḍhamānapabbatavāsūpāsakassa viya.

So kira **ambariyavihāravāsīpiṅgalabuddharakkhitattherassa** santike sikkhāpadāni gahetvā khettaṃ kassati. Athassa goṇo naṭṭho, so taṃ gavesanto uttaravaḍḍhamānapabbataṃ āruhi, tatra naṃ mahāsuppaṃ aggaheṣi. So cintesi ‘‘imāyassa tikhiṇavāsīyā sīsaṃ chindāmi’’ti. Puna cintesi ‘‘na metaṃ patirūpaṃ, yvāhaṃ bhāvanīyassa garuno santike sikkhāpadaṃ gahetvā bhindeyya’’nti. Evaṃ yāvataṃ cintetvā ‘‘jīvitaṃ pariccajāmi, na sikkhāpada’’nti aṃse ṭhapitaṃ tikhiṇadaṇḍavāsīṃ araññe chaḍḍesi. Tāvadeva naṃ mahāvālo muñcivā agamāsīti.

Ariyamaggasampayuttā pana virati **samucchadaviratī**ti veditabbā. Yassā uppattito pabhuti ‘‘pāṇaṃ ghātesāmi’’ti ariyapuggalānaṃ cittampi na uppajjatīti. Sā panāyaṃ virati kosallappavattiyā **kusalanti** vuttā. Kucchitasayanato vā kusanti laddhavohāraṃ dussīlyaṃ lunāṭṭipi **kusalaṃ**. Katamañcāvuso kusalanti imassa pana pañhassa ananurūpatā kusalāti na vuttā.

Yathā ca akusalānaṃ, evaṃ imesampi kusalakammapathānaṃ dhammato koṭṭhāsato ārammaṇato vedanāto mūlatoti pañcahākārehi vinicchayo veditabbo.

Tattha **dhammatoti** etesu hi paṭipāṭiyā satta cetanāpi vaṭṭanti, viratīyopi. Ante tayo cetanāsampayuttāva.

Koṭṭhāsatotī paṭipāṭiyā satta kammaṃpathā eva, no mūlāni. Ante tayo kammaṃpathā ceva mūlāni ca. Anabhijjhā hi mūlaṃ patvā alobho kusalamūlaṃ hoti. Abyāpādo adoso kusalamūlaṃ. Sammādiṭṭhi amoho kusalamūlaṃ.

Ārammaṇatotī paṇātipātādīnaṃ ārammaṇāneva etesaṃ ārammaṇāni, vītikkamitabbatoyeva hi veramaṇī nāma hoti. Yathā pana nibbānārammaṇo ariyamaggo kilese pajahati, evaṃ jīvitindriyādiārammaṇāpete kammaṃpathā paṇātipātādīni dussīlyāni pajahantīti veditabbā.

Vedanātotī sabbe sukhavedanā vā hontī, majjhavedanā vā. Kusalaṃ patvā hi dukkhavedanā nāma natthi.

Mūlatotī paṭipāṭiyā satta kammaṃpathā nāṇasampayuttacittena viramantassa alobhaadosaamohavasena timūlā hontī. Nāṇavippayuttacittena viramantassa dvimūlā. Anabhijjhā nāṇasampayuttacittena viramantassa dvimūlā. Nāṇavippayuttacittena ekamūlā. Alobho pana attanāva attano mūlaṃ na hoti, abyāpādepi eseva nayo. Sammādiṭṭhi alobhādosavasena dvimūlāvātī.

Alobho kusalamūlantiādīsu na lobhoti **alobho**, lobhapaṭipakkhassa dhammassetaṃ adhivacanaṃ. Adosāmoheṣupi eseva nayo. Tesu alobho sayañca kusalaṃ, imesañca paṇātipātā veramaṇīādīnaṃ kusalānaṃ kesañci sampayuttappabhāvakaṭṭhena kesañci upanissayapaccayaṭṭhena mūlanti **kusalamūlaṃ**. Adosāmoḥānampi kusalamūlabhāve eseva nayo.

Idāni sabbampi taṃ saṅkhepena ca vitthārena ca desitamattaṃ nigamento **yato kho āvusotī**adiappanāvāramāha. Tattha **evaṃ akusalaṃ pajānātīti** evaṃ yathānidhiṭṭhadasākusalakammapathavasena akusalaṃ pajānāti. **Evaṃ akusalamūlantiādīsupi** eseva nayo. Ettāvata ekena nayena catusaccakammaṭṭhānikassa yāva arahattā niyyānaṃ kathitaṃ hoti. Kathaṃ? Ettha hi ṭhapetvā abhijjhaṃ dasa akusalakammapathā ca kusalakammapathā ca dukkhasaccaṃ. Abhijjhā ca lobho akusalamūlañcātī ime dve dhammā nipariyāyena samudayasaccaṃ. Pariyāyena pana sabbepi kammaṃpathā dukkhasaccaṃ. Sabbāni kusalākusalamūlāni samudayasaccaṃ. Ubhinnaṃ appavatti nirodhasaccaṃ. Dukkhaṃ parijānanto samudayaṃ pajahamāno nirodhaṃ pajānanto ariyamaggo maggasaccanti iti dve saccāni sarūpena

vuttāni, dve āvattahārasena veditabbāni.

So sabbaso rāgānusayaṃ pahāyāti so evaṃ akusalādīni pajānanto sabbākārena rāgānusayaṃ pajahitvā. **Paṭighānusayaṃ paṭivinodetvāti** paṭighānusayaṃca sabbākāreṇa nīharitvāti vuttaṃ hoti. Ettāvataṃ anāgāmiṃ maggo kathito. **Asmīti diṭṭhimānānusayaṃ samūhanitvāti** pañcasu khandhesu kañci dhammaṃ anavakārikarivā “asmī”ti iminā samūhaggahaṇākāreṇa pavattaṃ diṭṭhimānānusayaṃ samugghāṭetvā.

Tattha **diṭṭhimānānusayanti** diṭṭhisadisam mānānusayanti vuttaṃ hoti. Ayañhi mānānusayo asmīti pavattatā diṭṭhisadiso hoti, tasmā evaṃ vutto. Imañca asmimānaṃ vitthārato viññātukāmena khandhiyavagge khemakasuttaṃ (saṃ. ni. 3.89) oloketabbanti.

Avijjaṃ pahāyāti vaṭṭamūlaṃ avijjaṃ pajahitvā. **Vijjaṃ uppādetvāti** tassā avijjāya samugghāṭikaṃ arahattamaggavijjaṃ uppādetvā. Ettāvataṃ arahattamaggo kathito. **Diṭṭheva dhamme dukkhassantakaro hotīti** asmiṃyeva atabhāve vaṭṭadukkhassa paricchedakaro hoti. **Ettāvataṃpi kho, āvusoti** desanaṃ niyyātetī, imāya kammaṃ pathadesanāya vuttamanasikārapaṭivedhavasenaṃ pīti vuttaṃ hoti. Sesaṃ vuttanayameva. Evaṃ anāgāmiṃ maggaarahattamaggehi desanaṃ niṭṭhapesīti.

Kusalakammaṃ pathavaṇṇanā niṭṭhitā.

Āhāravāraṇṇanā

90. Sādhāvusoti kho...pe... āgato imaṃ saddhammanti evaṃ āyasmato sārīputtassa kusalākusalāmukhena catusaccadesanaṃ sutvā taṃ āyasmato sārīputtassa bhāsitaṃ “sādhāvuso”ti iminā vacanena te bhikkhū abhinanditvā imasseva vacanassa samuṭṭhāpakena cittaṇa anumoditvā vacasā sampaṭicchitvā cetasā sampiyāyitvāti vuttaṃ hoti. Idāni yasmā thero nānappakāreṇa catusaccadesanaṃ desetuṃ paṭibalo, yathāha “sārīputto, bhikkhave, pahoti cattāri ariyasaccāni vitthāreṇa ācikkhituṃ desetu”nti yasmā vā uttarimpī desetukāmo hutvā “ettāvataṃpi kho”ti avaca, tasmā aparenapī nayena saccadesanaṃ sotukāmā te bhikkhū āyasmantaṃ sārīputtaṃ uttarim pañhaṃ apucchimsu. Tena sayameva pucchitvā vissajjitapañhato uttarim siyā kho panāvuso, aññopi pariyāyo bhaveyya aññampi kāraṇanti iminā nayena aññaṃ atirekaṃ pañhaṃ pucchimsu, purimapañhassa vā uparibhāge pucchimsūti vuttaṃ hoti. Atha nesaṃ byākaramāno thero **siyā, āvusoti**ādīmāha. Tatthāyaṃ anuttānapadavaṇṇanā, **āhāraṇti** paccayaṃ. Paccayo hi āharati attano phalaṃ, tasmā “āhāro”ti vuccati.

Bhūtānaṃ vā sattānantiādīsu **bhūtāti** sañjātā, nibbattā. **Sambhavesīnanti** ye sambhavaṃ jātiṃ nibbattiṃ esanti gavesanti. Tattha catūsu yonīsu aṇḍajalābujā sattā yāva aṇḍakosaṃ vatthikosaṃca na bhindanti, tāva **sambhavesino** nāma. Aṇḍakosaṃ vatthikosaṃca bhinditvā bahi nikkhantā **bhūtā** nāma. Saṃsedajā opapātikā ca paṭhamacittakkaṇe sambhavesino nāma. Dutiyacittakkaṇato pabhuti bhūtā nāma. Yena yena vā iriyāpathena jāyanti, yāva te tato aññaṃ na pāpuṇanti, tāva sambhavesino nāma. Tato paraṃ bhūtā nāma.

Atha vā **bhūtāti** jātā abhinibbattā, ye bhūtāyeva na puna bhavissanti saṅkhyāṃ gacchanti, tesam khīṇāsavānametaṃ adhivacanaṃ. Sambhavesantīti **sambhavesino**. Appahīnabhavasamyojanattā āyatimpī sambhavaṃ esantānaṃ sekkhaputhujjanānametaṃ adhivacanaṃ. Evaṃ sabbathāpi imehi dvīhi padehi sabbasatte pariyādiyati. **Vāsaddo** cettha sampiṇḍanatto, tasmā bhūtānaṃca sambhavesīnañcāti ayamatto veditabbo.

Ṭhitiyāti ṭhitatthaṃ. **Anuggahāyāti** anuggahatthaṃ upakāratthaṃ. Vacanabhedo cesa, attho pana dvinnampī padānaṃ ekoyeva. Atha vā **ṭhitiyāti** tassa tassa sattassa uppannadhammānaṃ anuppabandhavasena avicchedāya. **Anuggahāyāti** anuppannānaṃ uppādāya. Ubhopi cetāni bhūtānaṃ ṭhitiyā ceva anuggahāya ca. Sambhavesīnaṃ vā ṭhitiyā ceva anuggahāya cāti evaṃ ubhayattha daṭṭhabbāni. **Kabaḷikāro āhāro**ti kabaḷaṃ katvā ajjhoharitabbato kabaḷikāro āhāro, odanakummāsādivatthukāya oḷāyetaṃ adhivacanaṃ. **Oḷāriko vā sukhumo vāti** vatthu oḷārikatāya oḷāriko, vatthusukhumatāya sukhumo. Sabhāvena pana sukhumarūpapariyāpannatā kabaḷikāro āhāro sukhumova hoti. Sāpi cassa vatthuto oḷārikatā sukhumatā ca upādāyupādāya veditabbā.

Kumbhīlānañhi āhāraṃ upādāya morānaṃ āhāro sukhumo. Kumbhīlā kira pāsāṇe gilanti. Te ca nesam kucchippattāva vilīyanti. Morā sappavicchikādīpāṇe khādanti. Morānaṃ pana āhāraṃ upādāya taracchānaṃ āhāro sukhumo. Te kira tivassachadditāni visāṇāni ceva aṭṭhīni ca khādanti. Tāni ca nesam kheḷena temitamatteneva kandaṃulāṃ viya mudukāni honti. Taracchānaṃpi āhāraṃ upādāya hatthīnaṃ āhāro sukhumo. Tepi nānārukkhasākhāyo khādanti. Hatthīnaṃ āhārato gavayagokaṇṇamigādīnaṃ āhāro sukhumo. Te kira nissārāni nānārukkhapaṇṇādīni khādanti. Tesampi āhārato gunnaṃ āhāro sukhumo. Te allasukkhatiṇāni khādanti. Tesam āhārato sasānaṃ āhāro sukhumo. Sasānaṃ āhārato sakuṇānaṃ āhāro sukhumo. Sakuṇānaṃ āhārato paccantavāsīnaṃ āhāro sukhumo. Paccantavāsīnaṃ āhārato gāmaḥojakānaṃ āhāro sukhumo. Gāmaḥojakānaṃ āhārato rājarājamahāmattānaṃ āhāro sukhumo. Tesampi āhārato cakkavattino āhāro sukhumo. Cakkavattino āhārato bhummadevānaṃ āhāro sukhumo. Bhummadevānaṃ āhārato cātumahārājikānaṃ āhāro sukhumo. Evaṃ yāva paranimmitavasavattīnaṃ āhāro vitthāretabbo, tesam āhāro sukhumotveva niṭṭhaṃ patto.

Ettha ca oḷārike vatthusmiṃ oḷā paritṭā hoti dubbalā, sukhume balavatī. Tathā hi ekapattapūrampi yāguṃ pīvato muhutteneva jigacchito hoti, yaṃkañcīdeva khādītukāmo. Sappiṃ pana pasaṭamattaṃ pivītvā divasaṃ abhottukāmo hoti. Tattha vatthu parissamaṃ vinodeti, na pana sakkoti pāletuṃ. Oḷā pāleti, na sakkoti parissamaṃ vinodetuṃ. Dve pana ekato hutvā parissamañceva vinodenti pāleti cāti.

Phasso dutiyoti cakkhusamphassādi chabbidhopi phasso. Etesu catūsu āhāresu dutiyo āhārōti vedītabbo. Desanānayo eva cesa. Tasmā iminā nāma kāraṇena dutiyo vā tatiyo vāti idamettha na gavesitabbaṃ. **Manosañcetanāti** cetanā eva vuccati. **Viññāṇanti** yaṃkiñci cittaṃ.

Etthāha, yadī paccayaṭṭho āhāraṭṭho, atha kasmā aññesupī sattānaṃ paccayesu vijjamānesu imeyeva cattāro vuttāti? Vuccate, ajjhattikasantatiyā visesapaccayattā. Visesapaccayo hi kabaḷīkārāhārahakkhānaṃ sattānaṃ rūpakāyassa kabaḷīkāro āhāro. Nāmakāye vedanāya phasso, viññāṇassa manosañcetanā, nāmarūpassa viññāṇaṃ. Yathāha –

“Seyyathāpi, bhikkhave, ayaṃ kāyo āhāraṭṭhitiko, āhāraṃ paṭicca tiṭṭhati, anāhāro no tiṭṭhati. Tathā phassapaccayā vedanā, saṅkhārapaccayā viññāṇaṃ, viññāṇapaccayā nāmarūpa”nti.

Ko panettha āhāro, kiṃ āharatīti? Kabaḷīkārāhāro ojaṭṭhamakarūpāni āharati. Phassāhāro tisso vedanā, manosañcetanāhāro tayo bhava, viññāṇāhāro paṭisandhināmarūpanti.

Kathaṃ? Kabaḷīkārāhāro tāva mukhe ṭhapitamattoyeva aṭṭha rūpāni samuṭṭhāpeti. Dantavicuṇṇitaṃ pana ajjhohariyamānaṃ ekekaṃ sitthaṃ aṭṭhaṭṭha rūpāni samuṭṭhāpetiyeva. Evaṃ ojaṭṭhamakarūpāni āharati.

Phassāhāro pana sukhavedaniyo phasso uppajjamāno sukhavedanaṃ āharati, tathā dukkhavedaniyo dukkhaṃ, adukkhamasukhavedaniyo adukkhamasukhanti evaṃ sabbathāpi phassāhāro tisso vedanā āharati.

Manosañcetanāhāro kāmaḥavūpagaṃ kammaṃ kāmaḥavaṃ āharati, rūpārūpabhavūpagāni taṃ taṃ bhavaṃ. Evaṃ sabbathāpi manosañcetanāhāro tayo bhava āharati.

Viññāṇāhāro pana ye ca paṭisandhikkhaṇe taṃsampaṃyuttakā tayo khandhā, yāni ca tisantativasena tiṃsarūpāni uppajjanti, saḥajātādīpaccayanayena tāni āharatīti vuccati. Evaṃ viññāṇāhāro paṭisandhināmarūpaṃ āharatīti.

Ettha ca manosañcetanāhāro tayo bhava āharatīti sāsavā kusalākusalacetanāva vuttā. Viññāṇaṃ paṭisandhināmarūpaṃ āharatīti paṭisandhiviññāṇameva vuttaṃ. Avisesena pana taṃsampaṃyuttataṃsamuṭṭhānadharmānaṃ āhāraṇato pete **āharāti** vedītabbā.

Etesu catūsu āhāresu kabaḷīkārāhāro upatthambhento āhāraḥkiccaṃ sādheti. Phasso phusantoyeva, manosañcetanā āyūhamānāva. Viññāṇaṃ vijānantameva.

Kathaṃ? Kabaḷīkārāhāro hi upatthambhento yeva kāyaṭṭhapanena sattānaṃ ṭhītiyā hoti. Kammajanitopi hi

ayaṃ kāyo kabaḷikārāhārena upatthambhito dasapi vassāni vassasatampi yāva āyuparimāṇaṃ tiṭṭhati. Yathā kiṃ? Yathā mātuyā janitopi dārako dhātiyā thaññādīni pāyevā posiyamānova ciraṃ tiṭṭhati, yathā cupatthambhena upatthambhitagehaṃ. Vuttampi cetam –

“Yathā mahārāja gehe patante aññena dārunā upatthambhenti, aññena dārunā upatthambhitaṃ santam evaṃ taṃ gehaṃ na patati, evameva kho mahārāja ayaṃ kāyo āhāraṭṭhitiko, āhāraṃ paṭicca tiṭṭhatī”ti.

Evaṃ kabaḷikāro āhāro upatthambhento āhāraḷakkaṃ sādheti. Evaṃ sādhentopi ca kabaḷikāro āhāro dvinnaṃ rūpasantatīnaṃ paccayo hoti āhārasamuṭṭhānassa ca upādinnaṃ ca. Kammaḷānaṃ anupālako hutvā paccayo hoti. Āhārasamuṭṭhānānaṃ janako hutvā paccayo hoti.

Phasso pana sukhādivatthubhūtaṃ ārammaṇaṃ phusantoyeva sukhādivedanāpavattanena sattānaṃ ṭṭhiyā hoti. Manosañcetanā kusalākusalakammavasena āyūhamānāyeva bhavamūlanipphādanato sattānaṃ ṭṭhiyā hoti. Viññānaṃ vijānantameva nāmarūpappavattanena sattānaṃ ṭṭhiyā hoti.

Evaṃ upatthambhanādivasena āhāraḷakkaṃ sādhamānesu panetesu cattāri bhayāni daṭṭhabbāni. Seyyathidaṃ, kabaḷikārāhāre nikantiyeva bhayaṃ, phasse upagamaṇameva, manosañcetanāya āyūhanameva, viññāṇe abhinipātoyeva bhayanti. Kiṃ kāraṇā? Kabaḷikārāhāre hi nikantiṃ katvā sītādīnaṃ purekkhatā sattā āhāratthāya muddāgaṇanādīkammāni karontā anappakaṃ dukkhaṃ nigacchanti. Ekacce ca imasmiṃ sāsane pabbajitvāpi vejjakammādīkāya anesanāya āhāraṃ pariyesantā diṭṭhepi dhamme gārayhā honti. Samparāyepi tassa saṅghāṭīpi ādittā sampajjalitātīdinā lakkhaṇasaṃyutte vuttanayena samaṇapetā honti. Imināva tāva kāraṇena kabaḷikārāhāre nikantiyeva bhayanti veditabbā.

Phassaṃ upagacchantāpi phassassādino paresaṃ rakkhitagopitesu dārādīsu bhaṇḍesu aparajjhanti. Te saha bhaṇḍena bhaṇḍasāmikā gahetvā khaṇḍākhāṇḍikaṃ vā chinditvā saṅkārakūṭesu chaḍḍenti. Rañño vā niyyātentī. Tato ne rājā vividhā kammakāraṇā kārapeti. Kāyassa ca bhedaḷ duggati nesam pāṭīkankhā hoti. Iti phassassādamūlakaṃ diṭṭhadhammikampi samparāyīkampi bhayaṃ sabbamāgatameva hoti. Iminā kāraṇena phassāhāre upagamaṇameva bhayanti veditabbam.

Kusalākusalakammāyūhananena pana tammūlakaṃ tīsu bhavesu bhayaṃ sabbamāgataṃyeva hoti. Iminā kāraṇena manosañcetanāhāre āyūhanameva bhayanti veditabbam.

Paṭisandhiviññāṇaṇca yasmiṃ yasmiṃ ṭṭhāne abhinipatati, tasmiṃ tasmiṃ ṭṭhāne paṭisandhināmarūpaṃ gahetvāva nibbattati, tasmiṇca nibbatte sabbabhayāni nibbattāniyeva honti, tammūlakattāti, iminā kāraṇena viññāṇāhāre abhinipātoyeva bhayanti veditabbo.

Evaṃ sabhayesu pana imesu āhāresu sammāsambuddho kabaḷikārāhāre nikantipariyādānatthaṃ “seyyathāpi, bhikkhave, dve jāyampatikā”tiādīnā (saṃ. ni. 2.63) nayena **puttamamsūpamaṃ** desesi. Phassāhāre nikantipariyādānatthaṃ “seyyathāpi, bhikkhave, gāvī niccammā”tiādīnā nayena **niccammagāvūpamaṃ** desesi. Manosañcetanāhāre nikantipariyādānatthaṃ “seyyathāpi, bhikkhave, aṅgārakāsū”tiādīnā nayena **aṅgārakāsūpamaṃ** desesi. Viññāṇāhāre nikantipariyādānatthaṃ “seyyathāpi, bhikkhave, coraṃ āgucāri”ntiādīnā nayena **sattisatāhatūpamaṃ** desesi.

Tatrāyaṃ bhūtamattaṃ katvā saṅkhepato atthayojanā, dve kira jāyampatikā puttaṃ gahetvā parittena pātheyyena yojanasatikam kantāramaggaṃ paṭipajjīṃsu. Tesam paññāsa yojanāni gantvā pātheyyaṃ niṭṭhāsī. Te khuppiṇpāsāturā viraḷacchāyāyaṃ nisīdiṃsu. Tato puriso bhariyaṃ āha “bhadde ito samantā paññāsa yojanāni gāmo vā nigamo vā natthi, tasmā yaṃ taṃ purisena kātabbam bahumpi kasigorakkhādīkammaṃ, na dāni sakkā taṃ mayā kātuṃ, ehi maṃ māretvā upaḍḍhamamsam khādītva upaḍḍham pātheyyaṃ katvā puttana saddhiṃ kantāraṃ nittharāhi”ti. Sāpi āha “sāmi mayā dāni yaṃ taṃ itthiyā kātabbam bahumpi suttakantaṇādīkammaṃ, taṃ kātuṃ na sakkā, ehi maṃ māretvā upaḍḍhamamsam khādītva upaḍḍham pātheyyaṃ katvā puttana saddhiṃ kantāraṃ nittharāhi”ti. Tato so taṃ āha “bhadde māṭugāmaraṇena dvinnaṃ maraṇaṃ paññāyati. Na hi mando kumāro mātaṃ vinā jīvitum sakkoti. Yadi pana mayaṃ jīvāma, puna dārakaṃ labheyyāma, handa dāni puttakaṃ māretvā maṃsaṃ gahetvā kantāraṃ nittharāmā”ti.

Tato mātā puttamaḥa “tāta pitu santikaṃ gacchāhī”ti. So agamāsi. Athassa pitā “mayā puttakaṃ poṣṣamīti kasigorakkhādīhi anappakaṃ dukkhamanubhūtaṃ, na sakkomi puttaṃ māretuṃ, tvaṃyeva tava puttaṃ mārehi”ti vatvā “tāta mātusantikameva gacchāhī”ti āha. So agamāsi. Athassa mātāpi “mayā puttaṃ patthentiya govatakkuravatadevatāyācanādīhipi tāva anappakaṃ dukkhaṃ anubhūtaṃ, ko pana vādo kucchinā pariharantiyā? Na sakkāhaṃ puttaṃ māretu”nti vatvā “tāta pitusantikaṃyeva gacchāhī”ti āha. Evaṃ so dvinnāṃ antarā gacchantoyeva mato. Te taṃ disvā paridevitvā pubbe vuttanayeneva maṃsāni gahetvā khādantā pakkamiṃsu. Tesāṃ so puttamaṃsāhāro navahi kāraṇehi paṭikulattā neva davāya hoti, na madāya na maṇḍanāya na vibhūsanāya, kevalaṃ kantāranittharaṇatthāyeva hoti.

Katamehi navahi kāraṇehi paṭikūloti ce? Sajātimaṃsatāya nātimaṃsatāya puttamaṃsatāya piyaputtamaṃsatāya taruṇamaṃsatāya āmakamaṃsatāya agorasamaṃsatāya aloṇatāya adhūpitatāyāti. Tasmā yo bhikkhu kabaḷīkārahāraṃ evaṃ puttamaṃsasadiṣaṃ passati, so tattha nikantiṃ pariyādiyati. Ayaṃ tāva **puttamaṃsūpamāyaṃ** atthayojanā.

Niccammaḡāvūpamāyaṃ pana yathā sā ḡāvī ḡivato yāva khurā, tāva cammaṃ uddāletvā muttā yaṃ yadeva nissāya tiṭṭhati, tattha pāṇakehi khajjamānā dukkhassevādhikaraṇaṃ hoti, evaṃ phassopi yaṃ yadeva vatthuṃ ārammaṇaṃ vā nissāya tiṭṭhati, taṃtaṃvatthārammaṇasambhavassa vedayitadukkhassa adhikaraṇameva hoti. Tasmā yo bhikkhu phassāhāraṃ evaṃ niccammaḡavisadiṣaṃ passati, so tattha nikantiṃ pariyādiyati, ayaṃ **niccammaḡāvūpamāyaṃ** atthayojanā.

Āṅgārakāsūpamāyaṃ pana yathā sā āṅgārakāsu, evaṃ mahāpariḷāhaṭṭhena tayo bhavā. Yathā nānābhāsu gahetvā tattha upakaḍḍhakā dve purisā, evaṃ bhavesu upakaḍḍhanaṭṭhena manosañcetanā. Tasmā yo bhikkhu manosañcetanāhāraṃ evaṃ āṅgārakāsūpakaḍḍhakapurisadiṣaṃ passati, so tattha nikantiṃ pariyādiyati, ayaṃ **āṅgārakāsūpamāyaṃ** atthayojanā.

Sattisatāhatūpamāyaṃ pana yena so puriso pubbaṇhasamaye sattisatena haññati, tamassa sarīre vaṇamukhasataṃ katvā antarā atṭhatvā vinivijjhivā aparabhāgeyeva patati, evaṃ itarāni dve sattisatāni, evamassa patitokāse apatitvā apatitvā gatāhi sattihi sabbasarīraṃ chiddāvachiddameva hoti, tassa ekavaṇamukhepi uppanassa dukkhassa pamāṇaṃ natthi, ko pana vādo tīsu vaṇamukhasatesu? Tattha sattinipātakālo viya paṭisandhiviññānanibbattakālo. Vaṇamukhajananaṃ viya khandhajananaṃ. Vaṇamukhesu dukkhavedanuppādo viya jātesu khandhesu vaṭṭamūlakanānāvihadukkhuppādo. Aparo nayo, āgucārī puriso viya paṭisandhiviññānaṃ. Tassa sattighātehi uppannavāṇamukhāni viya viññānapaccayā nāmarūpaṃ. Vaṇamukhapaccayā tassa purisassa kakkhāladukkhuppādo viya nāmarūpapaccayā viññānassa dvattiṃsakammakāraṇaṭṭhanavutiroḡādivasena nānappakāradukkhuppādo daṭṭhabbo. Tasmā yo bhikkhu viññānāhāraṃ evaṃ sattisatāhataṣadiṣaṃ passati. So tattha nikantiṃ pariyādiyati, ayaṃ **sattisatāhatūpamāyaṃ** atthayojanā.

So evaṃ imesu āhāresu nikantiṃ pariyādiyanto cattāropi āhāre parijānāti, yesu pariññātesu sabbampi pariññātaṃ vatthu pariññātameva hoti. Vuttañhetāṃ bhagavatā –

“Kabaḷīkāre, bhikkhave, āhāre pariññāte pañcakāmaguṇiko rāḡo pariññāto hoti. Pañcakāmaguṇike rāḡe pariññāte natthi taṃ saṃyojanaṃ, yena saṃyojanena saṃyutto ariyasāvako puna imaṃ lokaṃ āgaccheyya. Phasse, bhikkhave, āhāre pariññāte tisso vedanā pariññātā hontī. Tīsu vedanāsu pariññātāsu ariyasāvakassa natthi kiñci uttarikaraṇīyanti vadāmi. Manosañcetanāya, bhikkhave, āhāre pariññāte tisso taṇhā pariññātā hontī. Tīsu taṇhāsu pariññātāsu ariyasāvakassa natthi kiñci uttarikaraṇīyanti vadāmi. Viññāṇe, bhikkhave, āhāre pariññāte nāmarūpaṃ pariññātaṃ hoti. Nāmarūpe pariññāte ariyasāvakassa natthi kiñci uttarikaraṇīyanti vadāmi”ti (saṃ. ni. 2.63).

Taṇhāsamudayā āhārasamudayoti purimataṇhāsamudayā paṭisandhikānaṃ āhārānaṃ samudayo nibbato hotīti attho. Kathaṃ? Paṭisandhikkhaṇe hi tisantivasena uppannasamatīsarūpabbhantare jātā oḡā atthi. Ayaṃ taṇhāpaccayā nibbato upādinnakabaḷīkārahāro. Paṭisandhicittasampayuttā pana phassacetanā sayañca cittaṃ viññānanti ime taṇhāpaccayā nibbattā upādinnakaphassamanosañcetanā viññānāhārāti. Evaṃ tāva purimataṇhāsamudayā paṭisandhikānaṃ āhārānaṃ samudayo veditabbo. Yasmā panidha upādinnakāpi anupādinnakāpi āhārā missetvā kathitā, tasmā anupādinnakānampi evaṃ taṇhāsamudayā āhārasamudayo

veditabbo. Aṭṭhalobhasahagatacittasamuṭṭhitesu hi rūpesu oḷā atthi, ayaṃ sahaḷātatanhāpaccayā nibbatto anupādinnakakabaḷīkārāhāro. Lobhasahagatacittasampayuttā pana phassacetanā sayañca cittaṃ viññāṇanti ime taṇhāpaccayā nibbatā anupādinnakaphassamanosañcetanā viññāṇāhārāti.

Taṇhānirodhā āhāranirodhoti imissā upādinnakānañca anupādinnakānañca āhārānaṃ paccayabhūtāya taṇhāya nirodhena āhāranirodho paññāyati. Sesam vuttanayameva. Ayaṃ pana viseso, idha cattāripi saccāni sarūpeneva vuttāni. Yathā ca idha, evaṃ ito uttarimpi sabbavāresūti. Tasmā sabbattha asammuyhantena saccāni uddharitabbāni. Sabbavāresu ca “ettāvātāpi kho āvuso”ti idaṃ desanāniyyātanaṃ tattha tattha desitadhamavasena yojetabbaṃ. Tassa idha tāva ayaṃ yojanā **ettāvātāpīti** imāya āhāradesanāya vuttamanasikārappaṭivedhavasenāpīti vuttaṃ hoti. Esa nayo sabbatthāpi.

Āhāravāraṇṇanā niṭṭhitā.

Saccavāraṇṇanā

91. Idāni “sādhāvuso”ti purimanayeneva therassa bhāsitaṃ abhinanditvā anumoditvā te bhikkhū uttarimpi pañhaṃ pucchimsu. Thero ca nesam aññenapi pariyāyena byākāsi. Esa nayo ito paresupi sabbavāresu. Tasmā ito param evarūpāni vacanāni anāmasitvā yena yena pariyāyena byākaroti, tassa tasseva atthaṃ vaṇṇayissāma. Imassa pana vārassa saṅkhepadesanāyaṃ **dukkhañca pajānātīti** ettha **dukkhanti** dukkhasaccaṃ. Vitthāradesanāyaṃ pana yaṃ vattabbaṃ siyā, taṃ sabbaṃ **visuddhimagge** saccaniddese vuttamevāti.

Saccavāraṇṇanā niṭṭhitā.

Jarāmarañavāraṇṇanā

92. Ito param paṭiccasamuppādavasena desanā hoti. Tattha jarāmarañavāre tāva **tesam tesanti** ayaṃ saṅkhepato anekesaṃ sattānaṃ sādharmaṇaniddesoti ñātabbo. Yā devadattassa jarā, yā somadattassa jarāti evañhi divasampi kathentassa neva sattā pariyādānaṃ gacchanti. Imehi pana dvīhi padehi na koci satto apariyādinno hoti. Tasmā vuttaṃ “ayaṃ saṅkhepato anekesaṃ sattānaṃ sādharmaṇaniddeso”ti.

Tamhi tamhīti ayaṃ gatijātivaseva anekesaṃ nikāyānaṃ sādharmaṇaniddeso. **Sattanikāyeti** sādharmaṇaniddesena niddiṭṭhassa sarūpanidassanaṃ. **Jarā jiraṇātīti** adisu pana **jarāti** sabhāvaniddeso. **Jiraṇātīti** ākāraniddeso. **Khaṇḍiccanti** adayo kālātikkame kiccaniddesā. Pacchimā dve pakatiniddesā. Ayañhi **jarāti** iminā padena sabhāvato dīpitā, tenassāyaṃ sabhāvaniddeso. **Jiraṇātīti** iminā ākarato. Tenassāyaṃ ākāraniddeso. **Khaṇḍiccanti** iminā kālātikkame dantanakhānaṃ khaṇḍitabhāvakaraṇakiccato. **Pāliccanti** iminā kesalomānaṃ palitabhāvakaraṇakiccato. **Valittacatīti** iminā maṃsaṃ milāpetvā tace valittabhāvakaraṇakiccato dīpitā. Tenassā ime **khaṇḍiccanti** adayo tayo kālātikkame kiccaniddesā. Tehi imesaṃ vikāraṇaṃ dassanavasena pākaṭībhūtā pākaṭajarā dassitā. Yatheva hi udakassa vā aggino vā vātassa vā tiṇarukkhādīnaṃ sambhaggapalibhaggatāya vā jhāmatāya vā gatamaggo pākaṭo hoti, na ca so gatamaggo tāneva udakādīni, evameva jarāya dantādīsu khaṇḍiccādīvasena gatamaggo pākaṭo, cakkhuṃ ummīletvāpi gayhati. Na ca khaṇḍiccādīneva jarā, na hi jarā cakkhuviññeyyā hoti.

Āyuno samhāni indriyānaṃ paripākoti imehi pana padehi kālātikkameyeva abhibyattatāya āyukkhayacakkhādiindriyaparipākasaññitāya pakatiyā dīpitā. Tenassime pacchimā dve pakatiniddesāti veditabbā.

Tattha yasmā jaraṃ pattassa āyu hāyati, tasmā jarā “āyuno samhānī”ti phalūpacārena vuttā. Yasmā ca daharakāle suppasannāni sukhumampi attano visayaṃ sukheva gaṇhanasamatthāni cakkhādīni indriyāni jaraṃ pattassa paripakkāni āluḷitāni avisadāni oḷārikampi attano visayaṃ gahetuṃ asamatthāni honti, tasmā “indriyānaṃ paripāko”tipi phalūpacāreneva vuttā. Sā panāyaṃ evaṃ niddiṭṭhā sabbāpi jarā pākaṭā paṭicchannāti duvidhā hoti.

Tattha dantādīsu khaṇḍabhāvādīdassanato rūpadhammesu jarā **pākaṭajarā** nāma. Arūpadhammesu pana

tādisassa vikārassa adassanato **paṭicchannajarā** nāma. Tattha yvāyaṃ khaṇḍādibhāvo dissati, so tādisānaṃ dantādīnaṃ suviññeyyattā vaṇṇoyeva, taṃ cakkhunā disvā manodvārena cintetvā “ime dantā jarāya pahaṭā”ti jaraṃ jānāti udakaṭṭhāne baddhāni gosīsādīni oloketvā heṭṭhā udakassa atthibhāvaṃ jānanaṃ viya. Puna avīci savīcīti evampi duvidhā hoti. Tattha maṇikanakarajatapavālasūriyādīnaṃ mandadasakādīsu pāṇīnaṃ viya pupphaphalapallavādīsu ca apāṇīnaṃ viya antarantarā vaṇṇavisesādīnaṃ duviññeyyattā jarā **avīcijarā** nāma, niranantarajarāti attho. Tato aññesu pana yathāvuttesu antarantarā vaṇṇavisesādīnaṃ suviññeyyattā jarā **savīcijarā** nāmāti veditabbā.

Ito paraṃ, **tesaṃ tesantiādi** vuttanayeneva veditabbaṃ. **Cuti cavanatāti**ādīsu pana **cutīti** cavanakavasena vuccati, ekacatupañcakkhandhānaṃ sāmāññavacanametamaṃ. **Cavanatāti** bhāvavacanena lakkhaṇanidassanaṃ. **Bhedoti** cutikkhandhānaṃ bhaṅgupattiparidīpanaṃ. **Antaradhānanti** ghaṭasseva bhinnassa bhinnānaṃ cutikkhandhānaṃ yena kenaci pariyāyena ṭhānābhāvaparidīpanaṃ. **Maccu maraṇanti** maccusaṅkhātaṃ maraṇaṃ. Tena **samucchedamaraṇādīni** nisedheti. **Kālo** nāma antako, tassa kiriyāti **kālakiriyā**. Etena lokasammutiyā maraṇaṃ dīpeti.

Idāni paramatthena dīpetuṃ, **khandhānaṃ bhedoti**ādīmāha. Paramatthena hi khandhāyeva bhijjanti, na satto nāma koci marati. Khandhesu pana bhijjamānesu satto marati, bhinnesu matoti vohāro hoti.

Ettha ca catuvokāravasena khandhānaṃ bhedo, ekavokāravasena kaḷavarassa nikkhepo. Catuvokāravasena vā khandhānaṃ bhedo, sesadvayavasena kaḷavarassa nikkhepo veditabbo. Kasmā? Bhavadvayepi rūpakāyasaṅkhātassa kaḷavarassa sambhavato. Atha vā yasmā ca cātumahārājikādīsu khandhā bhijjanteva, na kiñci nikkhipanti, tasmā tesaṃ vasena khandhānaṃ bhedo, manussādīsu kaḷavarassa nikkhepo. Ettha ca kaḷavarassa nikkhepakāraṇato maraṇaṃ kaḷavarassa nikkhepoti vuttanti evamattho daṭṭhabbo.

Iti ayañca jarā idañca maraṇaṃ. Idamaṃ vuccatāvusoti idamaṃ ubhayampi ekato katvā jarāmaraṇanti kathiyati. Sesaṃ vuttanayamevāti.

Jarāmaraṇavāraṇṇanā niṭṭhitā.

Jātivāraṇṇanā

93. Jātivāre **jāti sañjāti**ādīsu jāyanatṭhena **jāti**, sā aparipuṇṇāyatanavasena yuttā. Sañjāyanatṭhena **sañjāti**, sā paripuṇṇāyatanavasena yuttā. Okkamanaṭṭhena **okkanti**, sā aṇḍajalābujavasena yuttā. Te hi aṇḍakosañca vatthikosañca okkamantā pavisantā viya paṭisandhiṃ gaṇhanti. Abhinibbattanaṭṭhena **abhinibbatti**, sā saṃsedajaopapātikavasena yuttā, te hi pākāṭeyeva hutvā nibbattanti. Ayaṃ tāva vohāradesanā.

Idāni paramatthadesanā hoti. Khandhāyeva hi paramatthato pātubhavanti, na satto. Tattha ca **khandhānanti** ekavokārabhave ekassa catuvokārabhave catunnaṃ pañcavokārabhave pañcannampi gahaṇaṃ veditabbaṃ. **Pātubhāvoti** uppatti. **Āyatanānanti** ettha tatra tatra uppajjamānāyatanavaseneva saṅgaho veditabbo. **Paṭilābhoti** santatiyaṃ pātubhāvoyeva. Pātubhavantāneva hi tāni paṭiladdhāni nāma hontī. **Ayaṃ vuccatāvuso jāti**ti iminā padena vohārato paramatthato ca desitāya jātiyā nigamaṇaṃ karotīti. **Bhavasamudayāti** ettha pana jātiyā paccayabhūto kammabhavo veditabbo. Sesaṃ vuttanayamevāti.

Jātivāraṇṇanā niṭṭhitā.

Bhavavāraṇṇanā

94. Bhavavāre **kāmabhavoti** kammabhavo ca upapattibhavo ca. Tattha **kammabhavo** nāma kāmabhavūpaṅgaṃ kammameva. Tañhi upapattibhavassa kāraṇatā “sukho buddhānamuppādo (dha. pa. 194) dukkho pāpassa uccayo”tiādīni (dha. pa. 117) viya phalavohārena bhavoti vuttaṃ. **Upapattibhavo** nāma tena kammena nibbattaṃ upādinnakhandhapañcakaṃ. Tañhi tattha bhavatīti katvā **bhavoti** vuttaṃ. Evaṃ sabbathāpi idamaṃ kammañca upapatti ca ubhayampetaṃidha “kāmabhavo”ti vuttaṃ. Esa nayo **rūpārūpabhavesu. Upādānasamudayāti** ettha pana upādānaṃ kusalakammabhavassa upanissayavaseneva paccayo hoti. Akusalakammabhavassa upanissayavasenapi saḥajātādivasenapi. Upapattibhavassa pana

sabbassāpi upanissayavaseneva. Sesam vuttanayamevāti.

Bhavavāraṇṇanā niṭṭhitā.

Upādānavāraṇṇanā

95. Upādānavāre **kāmupādānanti**ādīsu vatthukāmaṃ upādiyati etena, sayam vā taṃ upādiyati **kāmupādānaṃ**. Kāmo ca so upādānañcāti vā kāmupādānaṃ. **Upādānanti** daḷhaggahaṇaṃ vuccati. Daḷhattho hi ettha upasaddo, “upāyāsa upakaṭṭhā”tiādīsu viya pañcakāmaguṇīkarāgassetam adhivacanaṃ. Ayamettha saṅkhepo. Vitthārato panetaṃ “tatha katamaṃ kāmupādānaṃ, yo kāmesu kāmaccchando”ti (dha. sa. 1220; vibha. 938) vuttanayena veditabbaṃ.

Tathā diṭṭhi ca sā upādānañcāti **diṭṭhupādānaṃ**. Atha vā diṭṭhiṃ upādiyati, upādiyanti vā etena diṭṭhinti diṭṭhupādānaṃ. Upādiyati hi purimadiṭṭhiṃ uttaradiṭṭhi. Upādiyanti ca tāya diṭṭhiṃ. Yathāha “sassato attā ca loko ca, idameva saccaṃ moghamañña”ntiādi (ma. ni. 3.27), sīlabbatupādānaattavādupādānavajjassa sabbadiṭṭhigatassetam adhivacanaṃ. Ayamettha saṅkhepo. Vitthārato panetaṃ “tatha katamaṃ diṭṭhupādānaṃ natthi dīna”nti (dha. sa. 1220; vibha. 938) vuttanayena veditabbaṃ.

Tathā sīlabbataṃ upādiyanti etena, sayam vā taṃ upādiyati, sīlabbatañca taṃ upādānañcāti vā **sīlabbatupādānaṃ**. Gosīlagovatādīni hi evaṃ suddhīti abhinivesato sayameva upādānāni ayamettha saṅkhepo. Vitthārato panetaṃ “tatha katamaṃ sīlabbatupādānaṃ, ito bahiddhā samaṇabrāhmaṇānaṃ sīlena suddhī”ti vuttanayena veditabbaṃ.

Idāni vadanti etenāti **vādo**. Upādiyanti etenāti **upādānaṃ**. Kiṃ vadanti, upādiyanti vā? Attānaṃ. Attano vādupādānaṃ **attavādupādānaṃ**. Attavādamattameva vā attāti upādiyati etenāti attavādupādānaṃ, vīsativatthukāya sakkāyadiṭṭhiyā etaṃ adhivacanaṃ. Ayamettha saṅkhepo. Vitthārato panetaṃ “tatha katamaṃ attavādupādānaṃ, idha assutavā puthujjano ariyānaṃ adassāvī”ti (dha. sa. 1223) vuttanayena veditabbaṃ.

Taṇhāsamudayāti ettha taṇhā kāmupādānassa upanissayavasena anantarasamanantaranatthivigatāsevanavasena vā paccayo. Avasesānaṃ pana sahaḷatādivasenāpi. Sesam vuttanayamevāti.

Upādānavāraṇṇanā niṭṭhitā.

Taṇhāvāraṇṇanā

96. Taṇhāvāre **rūpataṇhā...pe... dhammataṇhāti** evaṃ cakkhudvārādīsu javanavīthiyaṃ pavattāya taṇhāya “seṭṭhiputto brāhmaṇaputto”ti evamādīsu pitito nāmaṃ viya pitisadisārammaṇato nāmaṃ. Ettha ca rūpārammaṇā taṇhā, rūpe taṇhāti **rūpataṇhā**. Sā kāmarāgabhāvena rūpaṃ assādentī pavattamānā **kāmataṇhā**. Sassatadiṭṭhisahagatarāgabhāvena rūpaṃ niccaṃ dhuvam sassatanti evaṃ assādentī pavattamānā **bhavataṇhā**. Uccchedadiṭṭhisahagatarāgabhāvena rūpaṃ ucchijjati vinassati pecca na bhavissatīti evaṃ assādentī pavattamānā **vibhavataṇhāti** evaṃ tividhā hoti. Yathā ca rūpataṇhā, tathā saddataṇhādayopīti etāni aṭṭhārasa taṇhāvīcaritāni honti. Tāni ajjhatarūpādīsu aṭṭhārasa, bahiddhārūpādīsu aṭṭhārasāti chattimsa. Iti atītāni chattimsa, anāgatāni chattimsa, paccuppannāni chattimsāti aṭṭhasataṃ. “Ajjhattikassupādāya ‘asmī’ti hoti, ‘itthasmī’ti hoti”ti (vibha. 973-974) vā evamādīnā ajjhattikarūpādīnissitāni aṭṭhārasa, “bāhirassupādāya ‘iminā asmī’ti hoti, ‘iminā itthasmī’ti hoti”ti vā (vibha. 975) evamādīnā bāhirarūpādīnissitāni aṭṭhārasāti chattimsa. Iti atītāni chattimsa, anāgatāni chattimsa, paccuppannāni chattimsāti evampi **aṭṭhasatataṇhāvīcaritāni** honti. Puna saṅgahe karīyamāne rūpādīsu ārammaṇesu chaḷeva taṇhākāyā tissoyeva kāmataṇhādayo hontīti evaṃ –

Niddesatthena niddesa-vitthārā vitthārassa ca;
Puna saṅgahato taṇhā, viññātabbā vibhāvīnāti.

Vedanāsamudayāti ettha pana **vedanāti** vipākavedanā adhippetā. Sā kathaṃ chasu dvāresu taṇhāya

paccayo hotīti ce? Assādanīyato. Sukhāya hi vedanāya assādanena sattā vedanaṃ mamāyantā vedanāya taṇhaṃ uppādetvā vedanārāgarattā hutvā cakkhudvāre iṭṭhameva rūpaṃ patthenti, laddhā ca naṃ assādentī, ārammaṇadāyakaṇaṅca citta-kārādīnaṃ sakkāraṃ karonti. Tathā sotadvārādīsu iṭṭhe ca saddādayo patthenti, laddhā ca ne assādentī, ārammaṇadāyakaṇaṅca vīṇāvādaka-gandhikasūda-tantavāya-nānāvīdhasippasandassakādīnaṃ sakkāraṃ karonti. Yathā kiṃ? Yathā puttāsinehena puttaṃ mamāyantā dhātiyā sakkāraṃ karonti, sappāyasappikhīrādīniyeva naṃ pāyenti ceva bhojenti ca. Sesam vuttanayameva.

Taṇhāvāraṇṇanā niṭṭhitā.

Vedanāvāraṇṇanā

97. Vedanāvāre **vedanākāyāti** vedanāsamūhā. **Cakkhusamphassajā vedanā...pe... manosamphassajā vedanāti** etaṃ “cakkhusamphassajā vedanā atthi kusalā, atthi akusalā, atthi abyākatā”ti (vibha. 34) evaṃ vibhaṅge āgatattā cakkhudvārādīsu pavattānaṃ kusalākusalābyākatavedanānaṃ “sāriputto, mantāṇiputto”ti evamādīsu mātito nāmaṃ viya mātisadisavatthuto nāmaṃ. Vacanattho panettha cakkhusamphassahetu jātā vedanā **cakkhusamphassajā vedanāti**. Esa nayo sabbattha. Ayaṃ tāvettha sabbasaṅgāhikakathā. Vipākavasena pana cakkhudvāre dve cakkhuvīñṇāṇāni, dve manodhātuyo, tisso manovīñṇādhātuyoti etāhi sampayuttavasena vedanā vedītabbā. Esa nayo sotadvārādīsu. Manodvāre manovīñṇādhātusampayuttāva.

Phassasamudayāti ettha pana pañcadvāre pañcavatthukavedanānaṃ saha-jāta-cakkhusamphassādisamudayā samudayo hotī. Avasesānaṃ cakkhusamphassādayo upanissayādivasena paccayā. Manodvāre tadārammaṇavedanānaṃ advārikānaṅca paṭisandhibhavaṅgacutivedanānaṃ saha-jātamanosamphassasamudayā samudayo hotīti vedītabbo. Sesam vuttanayameva.

Vedanāvāraṇṇanā niṭṭhitā.

Phassavāraṇṇanā

98. Phassavāre **cakkhusamphassoti** cakkhumhi samphasso. Esa nayo sabbattha. **Cakkhusamphasso...pe... kāyasamphassoti** ettāvata ca kusalākusalavipākā pañcavatthukā dasa samphassā vuttā honti. **Manosamphassoti** iminā sesā bāvīsati lokiyavipākamanasampayuttaphassā. **Salāyatanasamudayāti** channaṃ cakkhādīnaṃ āyatanānaṃ samudayena imassa chabbidhassāpi samphassassa samudayo hotīti vedītabbo. Sesam vuttanayamevāti.

Phassavāraṇṇanā niṭṭhitā.

Salāyatana-vāraṇṇanā

99. Salāyatana-vāre **cakkhāyatana**ntiādīsu yaṃ vattabbaṃ, taṃ sabbaṃ **visuddhimagge** khandhaniddese ceva āyatananiddese ca vuttanayameva. **Nāmarūpasamudayāti** ettha pana yaṃ nāmaṃ yaṅca rūpaṃ, yaṅca nāmarūpaṃ yassa āyatanassa paccayo hoti, tassa vasena **visuddhimagge** paṭiccasamuppādaniddese vuttanayena nāmarūpasamudayā salāyatanasamudayo vedītabbo. Sesam vuttappakāramevāti.

Salāyatana-vāraṇṇanā niṭṭhitā.

Nāmarūpa-vāraṇṇanā

100. Nāmarūpa-vāre namanalakkhaṇaṃ **nāmaṃ**. Ruppenalakkhaṇaṃ **rūpaṃ**. Vitthāravāre panassa **vedanāti** vedanākkhandho. **Saññāti** saññākkhandho. **Cetanā phasso manasikāroti** saṅkhārakkhandho vedītabbo. Kāmaṅca aññepi saṅkhārakkhandhasaṅgahitā dhammā santi, ime pana tayo sabbadubbalesupi cittesu santi. Tasmā etesaṃyeva vasenettha saṅkhārakkhandhopi dassito. **Cattāri ca mahābhūtānīti** ettha **cattārīti** gaṇanaparicchedo. **Mahābhūtānīti** pathavīpatejavāyānametaṃ adhivacanaṃ. Yena pana kāraṇena tāni mahābhūtānīti vuccanti, yo cettha añño vinicchayanayo, so sabbo **visuddhimagge** rūpakhandhaniddese vutto.

Catunnañca mahābhūtānaṃ upādāyāti ettha pana **catunnanti** upayogathe sāmivacaṇaṃ, cattāri ca mahābhūtānāni vuttaṃ hoti. **Upādāyāti** upādiyivā, gahetvāti attho. Nissāyāti pi eke. Vattamānanti ayañcettha pāṭhaseso. Samūhatthe vā etaṃ sāmivacaṇaṃ. Tena catunnañca mahābhūtānaṃ samūhaṃ upādāya pavattamānaṃ rūpanti ayamattho veditabbo. Evaṃ sabbatthāpi yāni cattāri pathavīdāni mahābhūtāni, yañca catunnaṃ mahābhūtānaṃ upādāya vattamānaṃ cakkhāyatanādibhedena abhidhammapāḷiyameva vuttaṃ tevīsatividhaṃ rūpaṃ, taṃ sabbampi “rūpa”nti veditabbaṃ. **Viññāṇasamudayāti** ettha pana yaṃ viññāṇaṃ yassa nāmassa yassa ca rūpassa yassa ca nāmarūpassa paccayo hoti, tassa vasena **visuddhimagge** paṭiccasamuppādaniddese vuttanayeneva viññāṇasamudayā nāmarūpasamudayo veditabbo. Sesam vuttanayamevāti.

Nāmarūpavāraṇṇanā niṭṭhitā.

Viññāṇavāraṇṇanā

101. Viññāṇavāre **cakkhuvīññāṇanti** cakkhumhi viññāṇaṃ, cakkhuto vā jātaṃ viññāṇanti **cakkhuvīññāṇaṃ**. Evaṃ **sotaghānāvijhākāyaviññāṇāni**. Itaraṃ pana manoyeva viññāṇanti **manovīññāṇaṃ**. Dvīpañcaviññāṇavajjassa tebhūmakavīpākacittasetaṃ adhivacaṇaṃ. **Saṅkhārasamudayāti** ettha pana yo saṅkhāro yassa viññāṇassa paccayo hoti, tassa vasena saṅkhārasamudayā viññāṇasamudayo veditabbo. Sesam vuttanayamevāti.

Viññāṇavāraṇṇanā niṭṭhitā.

Saṅkhāravāraṇṇanā

102. Saṅkhāravāre abhisāṅkharaṇalakkhaṇo **saṅkhāro**. Vitthāravāre panassa **kāyasaṅkhāro**ti kāyato pavattasaṅkhāro, kāyadvāre copanavasena pavattānaṃ kāmāvacarakusalato aṭṭhannaṃ, akusalato dvādasannanti vīsatiyā kāyasañcetanānametaṃ adhivacaṇaṃ. **Vacīsaṅkhāro**ti vacito pavattasaṅkhāro, vacīdvāre vacanabhedavasena pavattānaṃ vīsatiyā eva vacīsañcetanānametaṃ adhivacaṇaṃ. **Cittasaṅkhāro**ti cittato pavattasaṅkhāro, kāyavacīdvāre copanaṃ akatvā raho nisīditvā cintayantassa pavattānaṃ lokiyakusalākusalavasena ekūnatīṃsamanosañcetanānametaṃ adhivacaṇaṃ. **Avijjāsamudayāti** ettha pana kusalānaṃ upanissayavasena akusalānaṃ saḥajātādivasenāpi avijjāpaccayo hotīti veditabbā. Sesam vuttanayamevāti.

Saṅkhāravāraṇṇanā niṭṭhitā.

Avijjāvāraṇṇanā

103. Avijjāvāre **dukkhe aññāṇanti** dukkhasacce aññāṇaṃ, mohassetam adhivacaṇaṃ. Esa nayo **samudaye aññāṇanti**ādīsu. Tattha catūhi kāraṇehi dukkhe aññāṇaṃ veditabbaṃ antogadhato vatthuto ārammaṇato paṭicchādanato ca. Tathā hi taṃ dukkhasaccapariyāpannattā dukkhe antogadhaṃ, dukkhasaccañcassa nissayapaccayabhāvena vatthu, ārammaṇapaccayabhāvena ārammaṇaṃ, dukkhasaccañca etaṃ paṭicchādeti, tassa yāthāvalakkhaṇappaṭivedhanivāraṇena, ñāṇappavattiyā cettha appadānena.

Samudaye aññāṇaṃ tīhi kāraṇehi veditabbaṃ vatthuto ārammaṇato paṭicchādanato ca. Nirodhe paṭipadāyañca aññāṇaṃ ekeneva kāraṇena veditabbaṃ paṭicchādanato. Nirodhapaṭipadāya hi paṭicchādakameva aññāṇaṃ tesam yāthāvalakkhaṇappaṭivedhanivāraṇena, tesu ca ñāṇappavattiyā appadānena. Na pana tattha antogadhaṃ, tasmim saccadvaye apaniyāpannattā. Na tassa taṃ saccadvayaṃ vatthu, asahajātattā. Nārammaṇaṃ, tadārabba appavattanato. Pacchimañhi saccadvayaṃ gambhīrattā duddasaṃ, na cettha andhabhūtaṃ aññāṇaṃ pavattati. Purimaṃ pana vañcanyatṭhena sabhāvalakkhaṇassa duddasattā gambhīraṃ, tattha vipallāsaggāhasena pavattati.

Apica **dukkheti** ettāvataṃ saṅghato vatthuto ārammaṇato kiccato ca avijjā dīpitā. **Dukkhasamudayeti** ettāvataṃ vatthuto ārammaṇato kiccato ca. **Dukkhanirodhe dukkhanirodhagāminiyā paṭipadāyāti** ettāvataṃ kiccato. Avisesato pana **aññāṇanti** etena sabhāvato niddiṭṭhāti nītabbā. **Āsavasamudayāti** ettha pana

kāmāsavabhavāsavā sahaḥātādivasena avijjāya paccayā honti. Avijjāsavo upanissayavaseneva. Pubbuppannā cettha avijjā avijjāsavoti veditabbā. Sā aparāparuppannāya avijjāya upanissayapaccayo hoti. Sesam vuttanayamevāti.

Avijjāvāraṇṇanā niṭṭhitā.

Āsavavāraṇṇanā

104. Āsavavāre **avijjāsamudayā**ti ettha avijjā kāmāsavabhavāsavānaṃ sahaḥātādivasena paccayo hoti. Avijjāsavassa upanissayavaseneva. Aparāparuppannā cettha avijjā avijjāsavoti veditabbā. Pubbuppannā avijjāyevassa aparāparuppannassa avijjāsavassa upanissayapaccayo hoti. Sesam vuttanayamevāti. Ayaṃ vāro yā eṣā paṭiccasamuppādapadesu jeṭṭhikā avijjā, tassāpi paccayadassanavasena vutto. Evaṃ vuttana vārena saṃsārassa anamataggaṭā sādhitā hoti. Kathaṃ? Āsavasamudayena hi avijjāsamudayo. Avijjāsamudayenāpi āsavasamudayo. Evaṃ āsavā avijjāya avijjāpi āsavānaṃ paccayoti katvā pubbakoṭi na paññāyati avijjāya, tassā apaññāyanato saṃsārassa anamataggaṭā siddhā hotīti.

Evaṃ sabbepime imasmiṃ sutte kammaṭṭhāvāro āhāravāro dukkhāvāro jarā-maraṇa-jāti-bhava-upādāna-taṇhā-vedanā-phassa-saḥāyatana-nāmarūpa- viññāna-saṅkhāra-avijjā-āsavavāroti **soḷasavārā** vuttā.

Tesu ekekassa vārassa saṅkhepavithārasena dvidhā vibhattā dvattiṃsaṭṭhānāni honti. Iti imasmiṃ sutte imesu dvattiṃsaṭṭhānesu cattāri saccāni kathitāni. Etesaṃyeva vitthārasena vuttetu soḷasasu ṭhānesu arahattaṃ kathitaṃ. Therassa pana matena dvattiṃsāyapi ṭhānesu cattāri saccāni cattāro ca maggā kathitāti. Iti sakalepi pañcamahānikāyasaṅgahite buddhavacane natthi taṃ suttaṃ, yattha dvattiṃsakkhattuṃ cattāri saccāni dvattiṃsakkhattuṃca arahattaṃ pakāsitaṃ aññatra imamhā sammādiṭṭhisuttāti.

Idamavocāyasmā sārīputtoti idaṃ dvattiṃsāya catusaccapariyāyehi dvattiṃsāya arahattapariyāyehīti catusaṭṭhiyā kāraṇehi alaṅkaritvā sammādiṭṭhisuttaṃ āyasmā sārīputto avoca, attamanā te bhikkhū āyasmato sārīputtassa bhāsitaṃ abhinanduntī.

Āsavavāraṇṇanā niṭṭhitā.

Papañcasūdaniyā majjhimanikāyaṭṭhakathāya

Sammādiṭṭhisuttavaṇṇanā niṭṭhitā.

10. Satipaṭṭhānasuttavaṇṇanā

105. Evaṃ **me sutanti** satipaṭṭhānasuttaṃ. Tattha **kurūsu viharatīti** kurunāmakā jānapadino rājakumārā, tesam nivāso ekopi janapado ruḥhīsaddena **kurūti** vuccati, tasmīṃ kurūsu janapade. Aṭṭhakathācariyā panāhu – mandhātukāle tīsu dīpesu manussā jambudīpo nāma buddhappaccakabuddhamahāsāvakaṃcakkavattipabhutīnaṃ uttamapurisānaṃ uppattibhūmi uttamadīpo atiramaṇīyoti sutvā raññā mandhātucakkavattinā cakkaratanaṃ purakkhatvā cattāro dīpe anusamīyāntena saddhiṃ āgamaṃsu. Tato rājā pariṇāyakaratanam pucchi –

“Atthi nu kho manussalokato ramaṇīyataram ṭhāna”nti?

“Kasmā deva evaṃ bhaṇasi?”

“Kiṃ na passasi candīmasūriyānaṃ ānubhāvaṃ?”

“Nanu etesaṃ ṭhānaṃ ito ramaṇīyatara”nti?

Rājā cakkaratanaṃ purakkhatvā tattha agamāsī. Cattāro mahārājāno “mandhātumahārājā āgato”ti sutvāva “mahiddhiko mahānubhāvo rājā na sakkā yuddhena paṭibāhito”nti sakarajjaṃ niyyātesuṃ. So taṃ gahetvā puna pucchi – “atthi nu kho ito ramaṇīyataram ṭhāna”nti. Athassa tāvatīmsabhavanaṃ kathayīmsu –

“tāvatiṃsabhavanam, deva, ramaṇīyataram, tattha sakkassa devarañño ime cattāro mahārājāno paricārakā dovārikabhūmiyam tiṭṭhanti. Sakko devarājā mahiddhiko mahānubhāvo. Tassimāni pana upabhogaṭṭhānāni, yojanasahassubbedho vejyantapāsādo, pañcayojanasatubbedhā sudhammā devasabhā, diyaḍḍhayaōjanasatiko vejyantaratho, tathā erāvaṇo hatthī, dibbarukkhasahassapaṭimaṇḍitam nandanavanam cittalatāvanam phārusakavanam missakavanam. Yojanasatubbedho pāricchattako kovīlāro, tassa heṭṭhā saṭṭhiyojanāyāmā paṇṇāsayojanavitthata pañcadasayojanubbedhā jayasumanapupphavaṇṇā paṇḍukambalasilā, yassā mudutāya sakkassa nisīdato upaḍḍhakāyo anupavisati”ti.

Taṃ sutvā rājā tattha gantukāmo cakkaratanaṃ abbhukkiri. Taṃ ākāse patiṭṭhāsi saddhiṃ caturaṅginīyā senāya. Atha dvinnam devalokānam vemajjhato cakkaratanaṃ otarivā pathaviyam patiṭṭhāsi saddhiṃ pariṇāyakaratanappamukhāya caturaṅginīyā senāya. Rājā ekakova tāvatiṃsabhavanam agamāsi. Sakko “mandhātā āgato”ti sutvā tassa paccuggamaṃ katvā – “svāgataṃ te, mahārāja, sakaṃ te, mahārāja. Anusāsa, mahārājā”ti vatvā saddhiṃ nātakehi rajjam dvebhāge katvā ekaṃ bhāgamadāsi. Rañño tāvatiṃsabhavane patiṭṭhitamattasseva manussabhāvo vigacchi, devabhāvo pāturahosi.

Tassa kira sakkena saddhiṃ paṇḍukambalasilāyam nisinnassa akkhinimisamattena nānattam paññāyati. Taṃ asallakkhentā devā sakkassa ca tassa ca nānatte muyhanti. So tattha dibbasampattiṃ anubhavamāno yāva chattimsa sakkā uppajjitvā cutā, tāva rajjam kāretvā atittoyeva kāmehi tato cavitvā attano uyyāne patiṭṭhito vātātapena phuṭṭhagatto kālamakāsi.

Cakkaratane pana pathaviyam patiṭṭhite pariṇāyakaratanam suvaṇṇapaṭṭe mandhātuupāhanam likhāpetvā idaṃ mandhāturajjanti rajjamanusāsi. Tepi tīhi dīpehi āgatamanussā puna gantum asakkontā pariṇāyakaratanam upasaṅkamitvā “deva mayaṃ rañño ānubhāvena āgatā, idāni gantum na sakkoma, vasanaṭṭhānam no dehi”ti yācimsu. So tesam ekekaṃ janapadamadāsi. Tattha pubbavidehato āgatamanussehi āvasitapadeso tāyeva purimasaññāya **videharaṭṭhanti** nāmam labhi. Aparagoyānato āgatamanussehi āvasitapadeso **aparantajanapadoti** nāmam labhi. Uttarakuruto āgatamanussehi āvasitapadeso **kururaṭṭhanti** nāmam labhīti. Bahuke pana gāmanigamādayo upādāya bahuvacanena voharīyati. Tena vuttam “**kurūsu viharati**”ti.

Kammāsadhammam nāma kurūnam nigamoti. Kammāsadhammanti ettha keci dha-kārassa da-kārena attham vaṇṇayanti. Kammāso ettha damitoti **kammāsadammo. Kammāso**ti kammāsapādo porisādo vuccati. Tassa kira pāde khāṇukena vidhāṭṭhāne vaṇo ruhanto cittadārusadiso hutvā ruhi, tasmā **kammāsapādoti** paññāyittha. So ca tasmim okāse damito porisādabhāvato paṭisedhito. Kena? Mahāsattena. Katarasmim jātake? **Mahāsutasomajātake**ti eke. Ime pana therā **jayaddisajātake**ti vadanti. Tadā hi mahāsattena kammāsapādo damito. Yathāha –

“Putto yadā homi jayaddisassa,
Pañcālaraṭṭhādhipatissa atrajo;
Cajitvāna pānam pitaram pamocayim,
Kammāsapādampi caham pasādayi”nti.

Keci pana dha-kārenea attham vaṇṇayanti. Kururaṭṭhavāsīnam kira kuruvattadhammo tasmim kammāso jāto, tasmā tam ṭhānam kammāso ettha dhammo jātoti **kammāsadhammanti** vuccati. Tattha nivīṭṭhanigamassāpi etadeva nāmam. Bhummavacanena kasmā na vuttanti? Avasanokāsato. Bhagavato kira tasmim nigame vasanokāso koci vihāro nāhosi. Nigamato pana apakkamma aññatarasmim udakasampanne ramaṇīye bhūmibhāge mahāvanasaṇḍo ahoṣi. Tattha bhagavā vihāsi. Taṃ nigamaṃ gocaragāmaṃ katvā, tasmā evamettha attho vedītabbo “kurūsu viharati kammāsadhammam nāma kurūnam nigamo, tam gocaragāmaṃ katvā”ti.

Uddesavārakathavaṇṇanā

106. Ekāyano ayam, bhikkhave, maggoti. Kasmā bhagavā idaṃ suttamabhāsi? Kururaṭṭhavāsīnam gambhīradesanāpaṭiggahaṇasamatthāyā. Kururaṭṭhavāsino kira bhikkhū bhikkhuniyo upāsakā upāsikāyo utupaccayādisampannatā tassa raṭṭhassa sappāyautupaccayasevanena niccam kallasarīrā kallacittā ca honti. Te

cittasarīrakallatāya anuggahitapaññābalā gambhīrakathaṃ pariggahetuṃ samatthā honti. Tena tesam bhagavā imaṃ gambhīradesanāpaṭiggahaṇasamatthataṃ sampassanto ekavīsatiyā ṭhānesu kammaṭṭhānaṃ arahatte pakkhipitvā idaṃ gambhīratthaṃ satipaṭṭhānasuttaṃ abhāsi. Yathā hi puriso suvaṇṇacaṅkoṭakaṃ labhitvā tatha nānāpupphāni pakkhipeyya, suvaṇṇamañjūsam vā pana labhitvā sattaratanāni pakkhipeyya, evaṃ bhagavā kururaṭṭhavāsiparisam labhitvā gambhīradesanaṃ desesi. Tenevettha aññānipi gambhīratthāni dīghanikāye **mahānidānaṃ mahāsatipaṭṭhānaṃ** imasmiṃ majjhimanikāye **sāropamaṃ rukkhūpamaṃ raṭṭhapālaṃ māgaṇḍiyaṃ āneñjasappāyanti** aññānipi suttāni desesi.

Apica tasmim janapade catasso parisā pakatiyāva satipaṭṭhānabhāvanānuyogamanuyuttā viharanti, antamaso dāsakammakaraparijanāpi satipaṭṭhānappaṭisaṃyuttameva kathaṃ kathenti. Udakatiṭṭhasuttakantanaṭṭhānādīsipi niratthakakathā nāma na pavattati. Sace kāci ithī “amma tvaṃ kataṃ satipaṭṭhānabhāvanaṃ manasikarosi”ti pucchitā “na kiñcī”ti vadati. Taṃ garahanti “dhiratthu tava jīvitam, jīvamānāpi tvaṃ matasadisā”ti. Atha naṃ “mā dāni puna evamakāsī”ti ovaditvā aññataraṃ satipaṭṭhānaṃ uggaṇhāpentī. Yā pana “ahaṃ asukaṃ satipaṭṭhānaṃ manasikaromī”ti vadati. Tassā “sādhu sādhu”ti sādhu kāraṃ datvā “tava jīvitam sujīvitam, tvaṃ nāma manussattaṃ pattā, tavatthāya sammāsambuddho uppanno”tiādīhi pasamsanti. Na kevalaṅcetha manussajātiyāyeva satipaṭṭhānāmanasikārayuttā, te nissāya viharantā tiracchānagatāpi. Tatridaṃ vatthu – eko kira naṭako suvapotaṃ gahetvā sikkhāpento vicarati. So bhikkhunupassayaṃ upanissāya vasitvā gamanakāle suvapotaṃ pamussitvā gato. Taṃ sāmaṇeriyo gahetvā paṭijaggimsu. Buddharakkhitotissa nāmaṃ akaṃsu. Taṃ ekadivasam purato nisinnaṃ disvā mahātherī āha – “buddharakkhitā”ti?

Kiṃ ayyeti.

Atthi koci tava manasikāroti?

Natthi ayyeti.

Āvuso, pabbajitānaṃ santike vasantena nāma vissatṭhaattabhāvena bhavituṃ na vaṭṭati, kocideva manasikāro icchitabbo, tvaṃ pana aññaṃ na sakkhissasi “aṭṭhi aṭṭhī”ti sajjhāyaṃ karohīti. So theriyā ovāde ṭhatvā “aṭṭhi aṭṭhī”ti sajjhāyanto carati.

Taṃ ekadivasam pātova toraṇagge nisīditvā bālātaṃ tapamānaṃ eko sakuṇo nakhapañjarena aggahesi. So “kiri kiri”ti saddamakāsī. Sāmaṇeriyo sutvā “ayye buddharakkhito sakuṇena gahito, mocema na”nti leḍḍuādīni gahetvā anubandhitvā mocesuṃ. Taṃ ānetvā purato ṭhapitaṃ therī āha –

“Buddharakkhita, sakuṇena gahitakāle kiṃ cintesi”ti?

Na ayye aññaṃ cintesiṃ, “aṭṭhipuñjova aṭṭhipuñjaṃ gahetvā gacchati, katarasmimpi ṭhāne vippakirissatī”ti evaṃ ayye aṭṭhipuñjameva cintesinti.

Sādhu sādhu, buddharakkhita, anāgate bhavakkhayassa te paccayo bhavissatīti. Evaṃ tatha tiracchānagatāpi satipaṭṭhānāmanasikārayuttā, tasmā nesaṃ bhagavā satipaṭṭhānabuddhimeva janento idaṃ suttaṃ abhāsi.

Tattha **ekāyanoti** ekamaggo. Maggassa hi –

“Maggo pantho patho pajjo, añjasam vaṭumāyanaṃ;
Nāvā uttarasetū ca, kullo ca bhisisaṅkamo”ti. (cūḷani. 101) –

Bahūni nāmāni. Svāyaṃ idha ayananāmena vutto. Tasmā **ekāyano ayaṃ, bhikkhave, maggoti** ettha ekamaggo ayaṃ, bhikkhave, maggo, na dvedhāpathabhūtoti evamattho daṭṭhabbo. Atha vā ekena ayitabboti ekāyano. **Ekenāti** gaṇasaṅgaṇikaṃ pahāya vūpakaṭṭhena pavivittacittena. **Ayitabboti** paṭipajjitabbo. Ayanti vā etenāti **ayano**, saṃsārato nibbānaṃ gacchantīti attho. Ekassa ayano **ekāyano, ekassāti** seṭṭhassa. Sabbasattānaṃ seṭṭho ca bhagavā, tasmā bhagavatoti vuttaṃ hoti. Kiñcāpi hi tena aññepi ayanti, evaṃ santepi

bhagavatova so ayano tena uppāditattā. Yathāha “so hi, brāhmaṇa, bhagavā anuppanassa maggassa uppādetā”tiādi (ma. ni. 3.79). Ayatīti vā **ayano**, gacchati pavattatīti attho. Ekasmiṃ ayanoti **ekāyano**, imasmiṃyeva dhammavinaye pavattati, na aññatrāti vuttaṃ hoti. Yathāha “imasmiṃ kho, subhadda, dhammavinaye ariyo aṭṭhaṅgiko maggo upalabbhatī”ti (dī. ni. 2.214). Desanābhedoyeva heso, attho paneko. Apica ekaṃ ayatīti ekāyano. Pubbhāge nānāmukhabhāvanāyappavattopi aparabhāge ekaṃ nibbānameva gacchatīti vuttaṃ hoti. Yathāha brahmā sahampati –

“Ekāyanam jātikhayantadassī,
Maggam pajānāti hitānukampī;
Etena maggena tariṃsu pubbe,
Tarissanti ye ca taranti ogha”nti. (saṃ. ni. 5.409);

Keci pana “na pāram diguṇam yantī”ti gāthāyena yasmā ekavāram nibbānam gacchati. Tasmā “ekāyano”ti vadanti, taṃ na yujjati. Imassa hi atthassa sakiṃ ayanoti iminā byañjanena bhavitabbaṃ. Yadi pana ekaṃ ayanamassa ekā gati pavattīti evamattham yojetvā vucceyya, byañjanam yujjeyya, attho pana ubhayathāpi na yujjati. Kasmā? Idha pubbhāgamaggassa adhippetattā. Kāyādicatuārammaṇappavatto hi pubbhāgasatipaṭṭhānamaggo idha adhippeto, na lokuttaro. So ca anekavārampi ayati, anekaṅcassa ayanaṃ hoti.

Pubbepe ca imasmiṃ pade mahātherānam sākacchā ahoṣiyeva. Tipiṭakacūlanāgattthero “pubbhāgasatipaṭṭhānamaggo”ti āha. Ācariyo panassa tipīṭakacūlasumatthero “missakamaggo”ti āha. Pubbhāgo bhanteti. Missako āvusoti. Ācariye punappunam bhaṇante appaṭibāhitvā tuṅhī ahoṣi. Pañham avinicchinitvāva uṭṭhahimsu. Athācariyatthero nhānakoṭṭhakaṃ gacchanto “mayā missakamaggo kathito, cūlanāgo pubbhāgoti ādāya voharati, ko nu kho ettha nicchayo”ti suttantaṃ ādito paṭṭhāya parivattento “yo hi koci, bhikkhave, ime cattāro satipaṭṭhāne evaṃ bhāveyya satta vassānī”ti imasmiṃ ṭhāne sallakkhesi, lokuttaramaggo uppajjitvā satta vassāni tiṭṭhamāno nāma natthi, mayā vutto missakamaggo na labbhati, cūlanāgena diṭṭho pubbhāgamaggova labbhātīti nātvā aṭṭhamiyaṃ dhammassavane saṅghuṭṭhe agamāsi.

Porāṇakattherā kira piyadhammassavanā honti. Saddam sutvāva “ahaṃ paṭṭhamam, ahaṃ paṭṭhama”nti ekappahārenea osaranti. Tasmīṅca divase cūlanāgatttherassa vāro. Tena dhammāsane nisīditvā vijānim gahetvā pubbagāthāsu vuttāsu therassa āsanapīṭhiyaṃ ṭhitassa etadahosi “raho nisīditvā na vakkhāmī”ti. Porāṇakattherā hi anusūyakā honti, na attano rucimeva ucchubhāram viya evaṃ ukkhipitvā vicaranti, kāraṇameva gaṇhanti, akāraṇam vissajjenti. Tasmā thero “āvuso cūlanāgā”ti āha. So ācariyassa viya saddoti dhammam ṭhapetvā “kiṃ bhante”ti āha. Āvuso cūlanāga mayā vutto missakamaggo na labbhati, tayā vutto pubbhāgasatipaṭṭhānamaggova labbhātīti.

Thero cintesi “amhākaṃ ācariyo sabbapariyattiko tepiṭako sutabuddho, evarūpassapi nāma bhikkhuno ayam pañho āluḷeti, anāgate mama bhātikā imaṃ pañham āluḷessantīti suttaṃ gahetvā imaṃ pañham niccalaṃ karissāmī”ti paṭisambhidāmaggo “ekāyanamaggo vuccati pubbhāgasatipaṭṭhānamaggo –

“Maggānaṭṭhaṅgiko seṭṭho, saccānam caturo padā;
Virāgo seṭṭho dhammānam, dvipadānaṅca cakkhumā.

Eseva maggo natthāñño, dassanassa visuddhiyā;
Etañhi tumhe paṭipajjatha, mārasenappamaddanam;
Etañhi tumhe paṭipannā, dukkhassantaṃ karissathā”ti. (dha. pa. 273-275) –

Suttaṃ āharitvā ṭhapesi.

Maggoti kenatthena maggo? Nibbānagamanatthena nibbānatthikehi magganiyatthena ca. Sattānam visuddhiyāti rāgādīhi malehi abhijjhāvisamalobhādīhi ca upakkilesehi kiliṭṭhacittānam sattānam visuddhatthāya. Tathā hi imināva maggena ito satasahassakappādhikānam catunnam asaṅkhyeyyānam upari ekasmiññeva kappe nibbatte taṅhaṅkaramedhaṅkarasaraṅkaṅkaradīpaṅkaraṅamake buddhe ādiṃ katvā sakyamunipariyosānā aneke sammāsambuddhā anekasatā paccakabuddhā gaṇanapatham vītivattā ariyasāvakā

cāti ime sattā sabbe cittamalaṃ pavāhetvā paramavisuddhiṃ pattā. Rūpamalavasena pana saṃkilesavodānapaññattiyeva natthi. Tathā hi –

Rūpena saṃkiliṭṭhena, saṃkilissanti māṇavā;
Rūpe suddhe visuḷḷhanti, anakkhātaṃ mahesinā.

Cittena saṃkiliṭṭhena, saṃkilissanti māṇavā;
Citte suddhe visuḷḷhanti, iti vuttaṃ mahesinā.

Yathāha “cittasaṃkilesā, bhikkhave, sattā saṃkilissanti, cittavodānā visuḷḷhantī”ti (saṃ. ni. 3.100). Tañca cittavodānaṃ iminā satipaṭṭhānamaggena hoti. Tenāha “sattānaṃ visuddhiyā”ti.

Sokaparidevānaṃ samatikkamāyāti sokassa ca paridevassa ca samatikkamāya, pahānāyāti attho. Ayañhi maggo bhāvito **santatimahāmattādīnaṃ** viya sokasamatikkamāya, **paṭācārādīnaṃ** viya ca paridevasamatikkamāya ca saṃvattati. Tenāha “sokaparidevānaṃ samatikkamāyā”ti. Kiñcāpi hi santatimahāmatto –

“Yaṃ pubbe taṃ visodhehi, pacchā te māhu kiñcanaṃ;
Majjhe ce no gahessasi, upasanto carissasī”ti. (su. ni. 955);

Imaṃ gāthaṃ sutvā saha paṭisambhidāhi arahattaṃ patto.

Paṭācārā –

“Na santi puttā tāṇāya, na pitā nāpi bandhavā;
Antakenādhīpanassa, natthi nātīsu tāṇatā”ti. (dha. pa. 288);

Imaṃ gāthaṃ sutvā sotāpattiṃhale patiṭṭhitā. Yasmā pana kāyavedanācittadhammesu kañci dhammaṃ anāmasitvā bhāvanā nāma natthi, tasmā tepi imināva maggena sokaparideve samatikkantāti veditabbā.

Dukkhadomanassānaṃ atthaṅgamāyāti kāyikadukkhassa ca cetasadomanassassa cāti imesaṃ dvinnāṃ atthaṅgamāya, nirodhāyāti attho. Ayañhi maggo bhāvito tissattherādīnaṃ viya dukkhassa, sakkādīnaṃ viya ca domanassassa atthaṅgamāya saṃvattati.

Tatrāyaṃ atthadīpanā – sāvatthiyaṃ kira **tisso** nāma kuṭumbikaputto cattālīsa hiraññakoṭiyo pahāya pabbajitvā agāmake araññe viharati. Tassa kaniṭṭhabhātubhariyā “gacchatha naṃ jīvitā voropethā”ti pañcasate core pesesi. Te gantvā therāṃ parivāretvā nisīdiṃsu. Thero āha “kasmā āgatatha upāsakā”ti? Taṃ jīvitā voropessāmāti. Pāṭibhogaṃ me upāsakā gahetvā ajjekarattim jīvitaṃ dethāti. Ko te, samaṇa, imasmim ṭhāne pāṭibhogo bhavissatīti? Thero mahantaṃ pāsānaṃ gahetvā dve ūruṭṭhīni bhinditvā “vaṭṭati upāsakā pāṭibhogo”ti āha. Te apakkamitvā caṅkamanasīse aggiṃ katvā nipajjiṃsu. Therassa vedanaṃ vikkhambhetvā sīlaṃ paccavekkhato parisuddhaṃ sīlaṃ nissāya pītipāmojjaṃ uppajji. Tato anukkamena vipassanaṃ vaḍḍhento tiyāmarattim samaṇadhammaṃ katvā aruṇuggamane arahattaṃ patto imaṃ udānaṃ udānesi –

“Ubho pādāni bhinditvā, saññāpessāmi vo ahaṃ;
Aṭṭiyāmi harāyāmi, sarāgamaraṇaṃ ahaṃ.

Evāhaṃ cintayitvāna, yathābhūtaṃ vipassisaṃ;
Sampatte aruṇuggamhi, arahattapaṇḍitaṃ”nti.

Apārepi tiṃsa bhikkhū bhagavato santike kammaṭṭhānaṃ gahetvā araññavihāre vassaṃ upagantvā “āvuso, tiyāmarattim samaṇadhammova kātabbo, na aññamaññassa santikaṃ āgantabba”nti vatvā viharimṃsu. Tesāṃ samaṇadhammaṃ katvā paccūsasamaye pacalāyantaṃ eko byaggho āgantvā ekekaṃ bhikkhū gahetvā gacchati. Na koci “maṃ byaggho gañhi”ti vācampi nicchāresi. Evaṃ pañcasu dasasu bhikkhūsu khāditesu uposathadivase “itare, āvuso, kuhi”nti pucchitvā nātva ca “idāni gahitena, gahitomhīti vattabba”nti

vatvā vihariṃsu.

Atha aññataraṃ daharabhikkhuṃ purimanayeneva byaggho gaṇhi. So “byaggho, bhante”ti āha. Bhikkhū kattaradaṇḍe ca ukkāyo ca gahetvā mocessāmāti anubandhiṃsu. Byaggho bhikkhūnaṃ agatiṃ chinnataṭṭhānaṃ āruya taṃ bhikkhuṃ pādaṅguṭṭhakato paṭṭhāya khādituṃ ārabhi. Itarepi “idāni, sappurisa, amhehi kattabbaṃ natthi, bhikkhūnaṃ viseso nāma evarūpe ṭhāne paññāyatī”ti āhaṃsu. So byagghamukhe nipannova taṃ vedanaṃ vikkhambhetvā vipassanaṃ vaḍḍhento yāva gopphakā khāditasamaye sotāpanno hutvā, yāva jaṇṇukā khāditasamaye sakadāgāmī, yāva nābhīyā khāditasamaye anāgāmī hutvā, hadayarūpe akhāditeyeva saha paṭisambhidāhi arahattaṃ patvā imaṃ udānaṃ udānesi –

“Sīlavā vatasampanno, paññavā susamāhito;
Muhuttaṃ pamādamanvāya, byagghenoruddhamānaso.

Pañjarasmiṃ gahetvāna, silāya uparīkato;
Kāmaṃ khādātu maṃ byaggho, bhakkho kāyo amittānaṃ;
Paṭiladdhe kammaṭṭhāne, maraṇaṃ hehiti bhaddaka”nti.

Aparopi pītamallatthero nāma gihikāle tīsu rajjesu paṭākaṃ gahetvā **tambapaṇṇidīpaṃ** āgamma rājānaṃ disvā raññā katānuggaho ekadivasaṃ kilañjakāpaṇasāladvārena gacchanto “rūpaṃ, bhikkhave, na tumhākaṃ, taṃ pajahatha, taṃ vo pahīnaṃ dīgharattaṃ hitāya sukhāya bhavissatī”ti (saṃ. ni. 3.33-34) natumhākavaggaṃ sutvā cintesi “neva kira rūpaṃ attano, na vedanā”ti. So taṃyeva aṅkusaṃ katvā nikkhamitvā mahāvihāraṃ gantvā pabbajjaṃ yācitvā pabbajito upasampanno dvemātikā paguṇaṃ katvā tiṃsa bhikkhū gahetvā gabalavāliyaanṅaṇaṃ gantvā samaṇadhammakāsi. Pādesu avahantesu jaṇṇukehi caṅkamati. Tameṇaṃ rattim eko migaluddako migoti maññamāno sattiya pahari. Satti vinivijjhita gatā. So taṃ sattiṃ harāpetvā pahāramukhāni tiṇavaṭṭiyā pūrāpetvā pāsānapitṭhiyaṃ attānaṃ nisīdāpetvā okāsaṃ kāretvā vipassanaṃ vaḍḍhetvā saha paṭisambhidāhi arahattaṃ patvā ukkāsitassaddena āgatānaṃ bhikkhūnaṃ byākaritvā imaṃ udānaṃ udānesi –

“Bhāsitaṃ buddhaseṭṭhassa, sabbalokaggavādino;
Na tumhākamidaṃ rūpaṃ, taṃ jaheyyātha bhikkhavo.

Aniccā vata saṅkhārā, uppādavayadhammino;
Uppajjitvā nirujjhanti, tesāṃ vūpasamo sukho”ti.

Atha naṃ bhikkhū āhaṃsu “sace, bhante, sammāsambuddho arogo abhavissā, addhā te muddhamatthake hatthaṃ pasāretvā sīsaṃ parāmaseyyā”ti. Ettāvata āyaṃ maggo tissattherādīnaṃ viya dukkhassa atthaṅgamāya saṃvattati.

Sakko pana devānamindo attano pañcavidhaṃ pubbanimittaṃ disvā maraṇabhayasantaṃjito domanassajāto bhagavantaṃ upasaṅkamitvā pañhaṃ pucchi. So upekkhāpañhavissajjanāvasāne asītisahassāhi devatāhi saddhiṃ sotāpattiṃhale paṭiṭṭhāsi. Sā cassa upapatti puna pākatikāva ahoṣi.

Subrahmāpi devaputto accharāsahassaparivāro saggasampattiṃ anubhoti, tattha pañcasatā accharāyo rukkhatto pupphāni ocinantiyo cavitvā niraye upapannā. So “kiṃ imā cirāyanti”ti upadhārento tāsāṃ niraye nibbattabhāvaṃ disvā “kittakaṃ nu kho mama āyū”ti upaparikkhanto attanopi āyuparikkhayaṃ viditvā tattheva niraye nibbattanabhāvaṃ disvā bhīto ativiya domanassajāto hutvā “imaṃ me domanassaṃ satthā vinayissati na añño”ti avasesā pañcasatā accharāyo gahetvā bhagavantaṃ upasaṅkamitvā pañhaṃ pucchi –

“Niccaṃ utrastamidaṃ cittaṃ, niccaṃ ubbiggidaṃ mano;
Anuppannesu kicchesu, atho uppatitesu ca;
Sace atthi anutrastaṃ, taṃ me akkhāhi pucchito”ti. (saṃ. ni. 1.98);

Tato naṃ bhagavā āha –

‘Nāññatra bojjhā tapasā, nāññatrindriyasamvarā;
Nāññatra sabbanissaggā, sotthim passāmi pāṇina’nti. (sam. ni. 1.98);

So desanāpariyosāne pañcahi accharāsatehi saddhiṃ sotāpattiphale patiṭṭhāya taṃ sampattiṃ thāvaram katvā devalokameva agamāsīti. Evamayaṃ maggo bhāvito sakkādīnaṃ viya domanassassa atthaṅgamāya samvattatīti veditabbo.

Ñāyassa adhigamāyāti ñāyo vuccati ariyo aṭṭhaṅgiko maggo, tassa adhigamāya, pattiyāti vuttaṃ hoti. Ayañhi pubbhāge lokiyo satipaṭṭhānamaggo bhāvito lokuttarassa maggassa adhigamāya samvattati. Tenāha ‘ñāyassa adhigamāyā’ti. **Nibbānassa sacchikiriyāyāti** taṇhāvānavirahitattā nibbānanti laddhanāmassa amatassa sacchikiriyāya, attapaccakkhatāyāti vuttaṃ hoti. Ayañhi maggo bhāvito anupubbena nibbānasacchikiriyam sādheti. Tenāha ‘nibbānassa sacchikiriyāyā’ti.

Tattha kiñcāpi ‘sattānaṃ visuddhiyā’ti vutte sokasamatikkamādīni atthato siddhāneva honti, ṭhapetvā pana sāsana-yuttikovidā aññesaṃ na pākaṭāni, na ca bhagavā paṭhamaṃ sāsana-yuttikovidam janam katvā pacchā dhammam deseti. Tena teneva pana suttena taṃ taṃ attham ñāpeti. Tasmā idha yaṃ yaṃ attham ekāyanamaggo sādheti, taṃ taṃ pākaṭam katvā dassento ‘sokaparidevānaṃ samatikkamāyā’tiādīmāha. Yasmā vā yā sattānaṃ visuddhi ekāyanamaggena samvattati, sā sokaparidevānaṃ samatikkamena hoti, sokaparidevānaṃ samatikkamo dukkhadomanassānaṃ atthaṅgamaṃ, dukkhadomanassānaṃ atthaṅgamo ñāyassādhigamena, ñāyassādhigamo nibbānassa sacchikiriyāya. Tasmā imampi kamaṃ dassento ‘sattānaṃ visuddhiyā’ti vatvā ‘sokaparidevānaṃ samatikkamāyā’tiādīmāha.

Apica vaṇṇabhaṇanametaṃ ekāyanamaggassa. Yatheva hi bhagavā ‘dhammam vo, bhikkhave, desessāmi ādikalyānaṃ majjhakalyānaṃ pariyosānakalyānaṃ sāttham sabyañjanaṃ kevalaparipuṇṇaṃ parisuddham brahmacariyaṃ pakāsesāmi, yadidaṃ chachakkānī’ti (ma. ni. 3.420) chachakkadesanāya aṭṭhahi padehi vaṇṇam abhāsi, yathā ca ariyavaṃsadesanāya ‘cattārome, bhikkhave, ariyavaṃsā aggaññā rattaññā vaṃsaññā porāṇā asaṃkiṇṇā asaṃkiṇṇapubbā na saṃkīyanti, na saṃkīyissanti, appaṭikuṭṭhā samaṇehi brāhmaṇehi viññūhī’ti (a. ni. 4.28) navahi padehi vaṇṇam abhāsi, evaṃ imassapi ekāyanamaggassa sattānaṃ visuddhiyātiādīhi sattahi padehi vaṇṇam abhāsi.

Kasmā iti ce? Tesam bhikkhūnaṃ ussāhajanattham. Vaṇṇabhāsanañhi sutvā te bhikkhū ‘ayaṃ kira maggo hadayasantāpabhūtaṃ sokaṃ, vācavippalāpabhūtaṃ paridevaṃ, kāyikaasātabhūtaṃ dukkhaṃ, cetasaasātabhūtaṃ domanassanti cattāro upaddave hanati, visuddhiṃ ñāyaṃ nibbānanti tayo visese āvahaṭī’ti ussāhajātā imaṃ dhammadesanaṃ uggahettabbaṃ pariyāpuṇitabbaṃ dhāretabbaṃ vācetaṃ, imaṃ maggaṃ bhāvetabbaṃ maññissanti. Iti tesam bhikkhūnaṃ ussāhajanattham vaṇṇam abhāsi, kambalavāṇijādayo kambalādīnaṃ vaṇṇam viya.

Yathā hi satahassagghanikapāṇḍukambalavāṇijena kambalam gaṇhathāti ugghositepi asukakambaloti na tāva manussā jānanti. Kesakambalavālakambalādayopi hi duggandhā kharasamphassā kambalātveva vuccanti. Yadā pana tena gandhārako rattakambalo sukhumo ujalo sukhasamphassoti ugghositaṃ hoti, tadā ye pahonti, te gaṇhanti. Ye na pahonti, tepi dassanakāmā honti, evamevaṃ ‘ekāyano ayaṃ, bhikkhave, maggo’ti vuttepi asukamaggoti na tāva pākaṭo hoti. Nānappakārakā hi aniyānamaggāpi maggātveva vuccanti. ‘Sattānaṃ visuddhiyā’tiādīmhi pana vutte ‘ayaṃ kira maggo cattāro upaddave hanati, tayo visese āvahaṭī’ti ussāhajātā imaṃ dhammadesanaṃ uggahettabbaṃ pariyāpuṇitabbaṃ dhāretabbaṃ vācetaṃ, imaṃ maggaṃ bhāvetabbaṃ maññissanti vaṇṇam bhāsanto ‘sattānaṃ visuddhiyā’tiādīmāha. Yathā ca satahassagghanikapāṇḍukambalavāṇijopamā, evaṃ rattajambunadasuvaṇṇaudakappasādakamaṇiratanasuvissuddhamuttāratanaḍḍhotapavāḍḍivāṇijūpamādayopettha āharitabbā.

Yadidanti nipāto, ye imeti ayamassa attho. **Cattāro**ti gaṇanaparicchedo, tena na tato heṭṭhā na uddhanti satipaṭṭhānaparicchedam dīpeti. **Satipaṭṭhānāti** tayo satipaṭṭhānā satigocaropi, tidhā paṭipannesu sāvakesu satthuno paṭighānuna-yavītivattatāpi, satipi. ‘Catunnaṃ, bhikkhave, satipaṭṭhānānaṃ samudayañca atthaṅgamañca desessāmi, taṃ suñātha...pe.... Ko ca, bhikkhave, kāyassa samudayo? Āhārasamudayā kāyasamudayo’tiādīsū (sam. ni. 3.408) hi satigocarō **satipaṭṭhānanti** vuccati. Tathā ‘kāyo paṭṭhānaṃ, no sati.

Sati paṭṭhānañceva sati cā''tiādīsupi (paṭi. ma. 3.35). Tassattho – paṭiṭṭhāti asminti paṭṭhānaṃ. Kā paṭiṭṭhāti? Sati. Satiyā paṭṭhānaṃ **satipaṭṭhānaṃ**. Padhānaṭṭhānanti vā paṭṭhānaṃ. Satiyā paṭṭhānaṃ satipaṭṭhānaṃ, hatthiṭṭhānaassaṭṭhānādīni viya. “Tayo satipaṭṭhānā, yadariyo sevati, yadariyo sevamāno satthā gaṇamanusāsītumarahati’’ti (ma. ni. 3.311) etthāpi tidhā paṭipannesu sāvakesu satthuno paṭighānūnāvavāṭivattatā “satipaṭṭhāna’’nti vuttā. Tassattho – paṭṭhapetabbato paṭṭhānaṃ, pavattayitabbatoti attho. Kena paṭṭhapetabbatoti? Satiyā. Satiyā paṭṭhānaṃ satipaṭṭhānanti. “Cattāro satipaṭṭhānā bhāvitā bahulikatā satta bojjhāge paripūrenti’’tiādīsu (saṃ. ni. 5.989) pana satiyeva “satipaṭṭhāna’’nti vuccati. Tassattho – paṭiṭṭhātīti paṭṭhānaṃ, upaṭṭhāti okkantitvā pakkhanditvā pavattatīti attho. Satiyeva paṭṭhānaṃ satipaṭṭhānaṃ. Atha vā saraṇaṭṭhena sati, upaṭṭhānaṭṭhena paṭṭhānaṃ. Iti sati ca sā paṭṭhānañcātipi satipaṭṭhānaṃ. Idamidha adhippetam.

Yadi evaṃ, kasmā “satipaṭṭhānā’’ti bahuvacanaṃ? Satibahuttā. Ārammaṇabhedenā hi bahukā etā satiyo. Atha maggoti kasmā ekavacanaṃ? Maggaṭṭhena ekattā. Catassopi hi etā satiyo maggaṭṭhena ekattaṃ gacchanti. Vuttañhetam “maggoti kenaṭṭhena maggo? Nibbānagamaṇaṭṭhena, nibbānatthikehi maggaṇīyaṭṭhena cā’’ti. Catassopi cetā aparabhāge kāyādīsu ārammaṇesu kiccaṃ sādhaṃyānā nibbānaṃ gacchanti. Ādito paṭṭhāya ca nibbānatthikehi maggīyanti, tasmā catassopi eko maggoti vuccanti. Evañca sati vacanānusandhinā sānusandhikāva desanā hoti, “mārasenappamaddanaṃ vo, bhikkhave, maggaṃ desessāmi, taṃ suṇātha...pe... katamo ca, bhikkhave, mārasenappamaddano maggo? Yadiḍaṃ sattabojjhāṅgā’’tiādīsu (saṃ. ni. 5.224) viya hi yathā mārasenappamaddanoti ca sattabojjhāṅgāti ca atthato ekaṃ, byañjanamevettha nānaṃ. Evaṃ ekāyanamaggoti ca cattāro satipaṭṭhānāti ca atthato ekaṃ, byañjanamevettha nānaṃ. Tasmā maggaṭṭhena ekattā ekavacanaṃ, ārammaṇabhedenā satibahuttā bahuvacanaṃ veditabbaṃ.

Kasmā pana bhagavatā cattārova satipaṭṭhānā vuttā anūnā anadhikāti? Veneyyahitattā. Taṇhācaritadīṭṭhacaritasamathayānikavipassanāyānikesu hi mandatikkhavasena dvedhā dvedhā pavattesu veneyyesu mandassa taṇhācaritassa oḷārikaṃ kāyānupassanāsatiipaṭṭhānaṃ **visuddhimaggo**, tikkhassa sukhamaṃ vedanānupassanaṃ satipaṭṭhānaṃ. Dīṭṭhacaritassāpi mandassa nātipabbhedagataṃ cittānupassanāsatiipaṭṭhānaṃ visuddhimaggo, tikkhassa atippabbhedagataṃ dhammānupassanāsatiipaṭṭhānaṃ. Samathayānikassa ca mandassa akicchena adhigantabbanimittaṃ paṭṭhamaṃ satipaṭṭhānaṃ visuddhimaggo, tikkhassa oḷārikārammaṇe asaṇṭhahanato dutiyaṃ. Vipassanāyānikassāpi mandassa nātipabbhedagatārammaṇaṃ tatiyaṃ, tikkhassa atippabbhedagatārammaṇaṃ catutthaṃ. Iti cattārova vuttā anūnā anadhikāti.

Subhasukhaniccaattabhāvavipallāsapahānattham vā. Kāyo hi asubho, tattha ca subhavipallāsavipallatthā sattā, tesam tattha asubhabhāvadassanena tassa vipallāsassa pahānattham paṭṭhamaṃ satipaṭṭhānaṃ vuttam. Sukham niccam attāti gahitesupi ca vedanādīsu vedanā dukkhā, cittaṃ aniccam, dhammā anattā, tesu ca sukhaniccaattavipallāsavipallatthā sattā, tesam tattha dukkhādibhāvadassanena tesam vipallāsanaṃ pahānattham sesāni tīṇi vuttānti evaṃ subhasukhaniccaattabhāvavipallāsapahānattham vā cattārova vuttā anūnā anadhikāti veditabbā.

Na kevalaṅca vipallāsapahānatthameva, atha kho caturōghayogāsavaganthaupādānaagatipahānatthampi catubbidhāhārapariññatthañca cattārova vuttāti veditabbā. Ayaṃ tāva pakaraṇanayo.

Aṭṭhakathāyaṃ pana saraṇavasena ceva ekattasamosaraṇavasena ca ekameva satipaṭṭhānaṃ ārammaṇavasena cattāroti etadeva vuttam. Yathā hi catudvāre nagare pācīnato āgacchantā pācīnadisāya uṭṭhānakaṃ bhaṇḍam gahetvā pācīnadvārena nagameva pavisanti, dakkhiṇato pacchimoto uttarato āgacchantā uttaradisāya uṭṭhānakaṃ bhaṇḍam gahetvā uttaradvārena nagameva pavisanti, evaṃsampadamidaṃ veditabbaṃ. Nagaram viya hi nibbānamahānagaram. Dvāram viya aṭṭhaṅgiko lokuttaramaggo. Pācīnadisādayo viya kāyādayo.

Yathā pācīnato āgacchantā pācīnadisāya uṭṭhānakaṃ bhaṇḍam gahetvā pācīnadvārena nagameva pavisanti, evaṃ kāyānupassanāmukhena āgacchantā cuddasavidhena kāyānupassanaṃ bhāvetvā kāyānupassanābhāvanānubhāvanibbattena ariyamaggena ekaṃ nibbānameva osaranti.

Yathā dakkhiṇato āgacchantā dakkhiṇadisāya uṭṭhānakaṃ bhaṇḍam gahetvā dakkhiṇadvārena nagameva

pavisanti, evaṃ vedanānupassanāmukhena āgacchantā navavidhena vedanānupassanaṃ bhāvetvā vedanānupassanābhāvanānubhāvanibbattena ariyamaggena ekaṃ nibbānameva osaranti.

Yathā pacchimoto āgacchantā pacchimadisāya uttānakaṃ bhaṇḍaṃ gahetvā pacchimadvārena nagarameva pavisanti, evaṃ cittānupassanāmukhena āgacchantā soḷasavidhena cittānupassanaṃ bhāvetvā cittānupassanābhāvanānubhāvanibbattena ariyamaggena ekaṃ nibbānameva osaranti.

Yathā uttarato āgacchantā uttaradisāya uttānakaṃ bhaṇḍaṃ gahetvā uttaradvārena nagarameva pavisanti, evaṃ dhammānupassanāmukhena āgacchantā pañcavidhena dhammānupassanaṃ bhāvetvā dhammānupassanābhāvanānubhāvanibbattena ariyamaggena ekaṃ nibbānameva osaranti.

Evaṃ saraṇavasena ceva ekattasamosaraṇavasena ca ekameva satipaṭṭhānaṃ ārammaṇavasena cattārova vuttāti veditabbā.

Katame cattāroti kathetukamyatā pucchā. **Idhā**ti imasmiṃ sāsane. **Bhikkhavi**ti dhammapaṭiggāhakupuggalāpanametam. **Bhikkhū**ti paṭipattisampādakapuggalanidassanametam. Aññepi ca devamanussā paṭipattim sampādentiyeva, seṭṭhattā pana paṭipattiyā bhikkhubhāvadassanato ca, “bhikkhū”ti āha. Bhagavato hi anusāsaniṃ sampaṭicchantesu bhikkhu seṭṭho, sabbappakārāya anusāsaniyā bhājanabhāvato, tasmā seṭṭhattā “bhikkhū”ti āha. Tasmim gahite pana sesā gahitāva honti rājagamanādīsu rājaggahaṇena sesaparisā viya. Yo ca imaṃ paṭipattim paṭipajjati, so bhikkhu nāma hotīti paṭipattiyā bhikkhubhāvadassanatopi “bhikkhū”ti āha. Paṭipannako hi devo vā hotu manusso vā, “bhikkhū”ti saṅkhaṃ gacchatiyeva. Yathāha –

“Alaṅkato cepi samaṃ careyya,
Santo danto niyato brahmacārī;
Sabbesu bhūtesu nidhāya daṇḍaṃ,
So brāhmaṇo so samaṇo sa bhikkhū”ti. (dha. pa. 142);

Kāyeti rūpakāye. Rūpakāyo hi idha aṅgapaccaṅgānaṃ kesādīnaṃ dhammānaṃ samūhaṭṭhena hatthikāyarathakāyādayo viya kāyoti adhippeto. Yathā ca samūhaṭṭhena, evaṃ kucchitānaṃ āyaṭṭhena. Kucchitānaṃhi paramajegucchānaṃ so āyotipi **kāyo**. **Āyoti** uppattideso. Tatrāyaṃ vacanattho, āyanti tatoti āyo. Ke āyanti? Kucchitā kesādayo. Iti kucchitānaṃ āyoti **kāyo**. Kāyānupassīti kāyamanupassanasīlo, kāyaṃ vā anupassamāno.

“Kāye”ti ca vatvāpi puna “kāyānupassī”ti dutiyaṃ kāyaggahaṇaṃ asammissato vavathānaghanavinibbhogādīdassanattaṃ katanti veditabbaṃ. Tena na kāye vedanānupassī vā, cittadhammānupassī vā, atha kho kāyānupassīyevāti kāyasaṅkhāte vatthusmiṃ kāyānupassanākārasseva dassanena asammissato vavathānaṃ dassitaṃ hoti. Tathā na kāye aṅgapaccaṅgavimuttaekadhammānupassī, nāpi kesalomādivinimuttaithipurisānupassī. Yopi cettha kesalomādiko bhūtopādāyasamūhasaṅkhāto kāyo, tatthapi na bhūtopādāyavinimuttaekadhammānupassī, atha kho rathasambhārānupassako viya aṅgapaccasamūhānupassī, nagarāvayavānupassako viya kesalomādisamūhānupassī, kadalikkhandhapattavaṭṭhivinibbhujanako viya rittamuṭṭhiviniveṭṭhako viya ca bhūtopādāyasamūhānupassīyevāti nānappakārato samūhavaseneva kāyasaṅkhātassa vatthuno dassanena ghanavinibbhogo dassito hoti. Na hettha yathāvuttasamūhavinimutto kāyo vā itthī vā puriso vā añño vā koci dhammo dissati, yathāvuttadhammasamūhamatteyeva pana tathā tathā sattā micchābhinivesaṃ karonti. Tenāhu porāṇā –

“Yaṃ passati na taṃ diṭṭhaṃ, yaṃ diṭṭhaṃ taṃ na passati;
Apassaṃ bajjhate mūlho, bajjhamāno na muccati”ti. –

Ghanavinibbhogādīdassanattanti vuttaṃ. Ādisaddena cettha ayampi attho veditabbo – ayañhi ekasmiṃ kāye kāyānupassīyeva, na aññadhammānupassī. Kiṃ vuttaṃ hoti? Yathā anudakabhūṭāyapi marīciyā udakānupassino honti, na evaṃ aniccadukkhānattaasubhabhūteyeva imasmiṃ kāye nicasukhaattasubhabhāvānupassī, atha kho kāyānupassī aniccadukkhānattaasubhākārasamūhānupassīyevāti. Atha vā yvāyaṃ parato “idha, bhikkhave, bhikkhu araññaṃgato vā...pe... so satova assasati”tiādīnā nayena

assāsapassāsādicuṇṇikajātaatṭhikapariyosāno kāyo vutto, yo ca “idhekacco pathavikāyaṃ aniccato anupassati āpokāyaṃ tejokāyaṃ vāyokāyaṃ kesakāyaṃ lomakāyaṃ chavikāyaṃ cammakāyaṃ mamsakāyaṃ ruhirakāyaṃ nahārukāyaṃ aṭṭhikāyaṃ aṭṭhimiṇṇjakāya”nti paṭisambhidāyaṃ (paṭi. ma. 3.35) kāyo vutto, tassa sabbassa imasmiṃyeva kāye anupassanato “kāye kāyānupassī”ti evampi attho daṭṭhabbo.

Atha vā kāye ahanti vā mamanti vā evaṃ gahetabbassa yassa kassaci ananupassanato tassa tasseva pana kesālomādikassa nānādharmasamūhassa anupassanato kāye kesādīdhammasamūhasaṅkhātākāyānupassīti evamattho daṭṭhabbo. Apica “imasmiṃ kāye aniccato anupassati, no niccato”tiādīnā nayena paṭisambhidāyaṃ āgatanayassa sabbasseva aniccalakkhaṇādīno ākārasamūhasaṅkhātassa kāyānupassanato “kāye kāyānupassī”ti evampi attho daṭṭhabbo.

Tathā hi ayaṃ kāye kāyānupassanāpaṭipadaṃ paṭipanno bhikkhu imaṃ kāyaṃ aniccānupassanādīnaṃ sattannaṃ anupassanānaṃ vasena aniccato anupassati, no niccato. Dukkhato anupassati, no sukhato. Anattato anupassati, no attato. Nibbindati, no nandati. Virajjati, no rajjati. Nirodheti, no samudeti. Paṭinissajjati, no ādiyati. So taṃ aniccato anupassanto niccasaññaṃ pajahati, dukkhato anupassanto sukhasaññaṃ pajahati, anattato anupassanto attasaññaṃ pajahati, nibbindanto nandiṃ pajahati, virajjanto rāgaṃ pajahati, nirodhento samudayaṃ pajahati, paṭinissajjanto ādānaṃ pajahatīti veditabbo.

Viharatīti iriyati. **Ātāpīti** tīsu bhavesu kilese ātāpetīti ātāpo, vīriyassettaṃ nāmaṃ. Ātāpo assa atthīti **ātāpī**. **Sampajānoti** sampajāññaṃsaṅkhātena ñāṇena samannāgato. **Satimāti** kāyapariggāhikāya satiyā samannāgato. Ayaṃ pana yasmā satiyā ārammaṇaṃ pariggahetvā paññāya anupassati, na hi sativirahitassa anupassanā nāma atthi. Tenevāha “satiñca khvāhaṃ, bhikkhave, sabbatthikaṃ vadāmi”ti (saṃ. ni. 5.234). Tasmā ettha “kāye kāyānupassī viharatī”ti ettāvata kāyānupassanāsatiṭṭhānakammaṭṭhānaṃ vuttaṃ hoti. Atha vā yasmā anātāpino antosaṅkhepo antarāyakaro hoti, asampajāno upāyapariggahe anupāyaparivajjane ca sammuyhati, muṭṭhassati upāyapariccāge anupāyapariggahe ca asamattho hoti, tenassa taṃ kammaṭṭhānaṃ na sampajjati, tasmā yesaṃ dhammānaṃ ānubhāvena taṃ sampajjati. Tesam dassanattham “ātāpī sampajāno satimāti idaṃ vutta”nti veditabbaṃ.

Iti kāyānupassanāsatiṭṭhānaṃ sampayogaṅgañcassa dassetvā idāni pahānaṅgaṃ dassetvaṃ **vineyya loke abhijjhādomanassanti** vuttaṃ. Tatha **vineyyāti** tadaṅgavinayena vā vikkhambhanavinayena vā vinayitvā. **Loketi** tasmīyeva kāye. Kāyo hi idha lujjanapalujanatṭhena lokoti adhippeto. Yasmā panassa na kāyamatteyeva abhijjhādomanassaṃ pahiyati, vedanādīsupi pahiyatiyeva, tasmā “pañcapi upādānakkhandhā loko”ti **vibhaṅge** (vibha. 362) vuttaṃ. Lokasaṅkhātattā vā tesam dhammānaṃ atthuddhāranayena vuttaṃ. Yaṃ panāha “tatha katamo loko? Sveva kāyo loko”ti. Ayamevettha attho, tasmīṃ loke abhijjhādomanassaṃ vineyyāti evaṃ sambandho daṭṭhabbo. Yasmā panettha abhijjhāgahaṇena kāmaccando, domanassaggahaṇena byāpādo saṅgahaṃ gacchati, tasmā nīvaraṇapariyāpannabalavadhammadvayadassanena nīvaraṇappahānaṃ vuttaṃ hotīti veditabbaṃ.

Visesena cettha abhijjhāvinayena kāyasampattimūlakassa anurodhassa, domanassavinayena pana kāyavipattimūlakassa virodhassa, abhijjhāvinayena ca kāye abhiratiyā, domanassavinayena kāyabhāvanāya anabhiratiyā, abhijjhāvinayena kāye abhūtānaṃ subhasukhabhāvādīnaṃ pakkhepassa, domanassavinayena ca kāye bhūtānaṃ asubhāsukhabhāvādīnaṃ apanayanassa ca pahānaṃ vuttaṃ. Tena yogāvacarassa yogānubhāvo yogasamatthata ca dīpitā hoti. Yogānubhāvo hi esa, yadidaṃ anurodhavirodhavippamutto aratiratisaho abhūtapakkhepabhūtāpanayanavirahito ca hoti. Anurodhavirodhavippamutto cesa aratiratisaho abhūtaṃ apakkipanto bhūtañca anapanento yogasamattho hotīti.

Aparo nayo “kāye kāyānupassī”ti ettha anupassanāya kammaṭṭhānaṃ vuttaṃ. “Viharatī”ti ettha vuttavīhārena kammaṭṭhānikassa kāyapariharaṇaṃ. “Ātāpī”tiādīsu ātāpena sammappadhānaṃ, satisampajāññaṇena sabbatthikakammaṭṭhānaṃ, kammaṭṭhānapariharaṇupāyo vā, satiyā vā kāyānupassanāvasena paṭiladdhasamatho, sampajāññaṇena vipassanā, abhijjhādomanassavinayena bhāvanāphalaṃ vuttanti veditabbaṃ.

Vibhaṅge pana “**anupassī**”ti tatha katamā anupassanā? Yā paññā pajānaṇā...pe... sammādiṭṭhi. Ayaṃ vuccati anupassanā. Imāya anupassanāya upeto hoti samupeto upāgato samupāgato upapanno sampanno samannāgato. Tena vuccati anupassīti.

Viharatīti iriyati vattati pāleti yapeti yāpeti carati viharati. Tena vuccati viharatīti.

Ātāpīti tattha katamo ātāpo? Yo cetasiko vīriyārambho...pe... sammāvāyāmo. Ayaṃ vuccati ātāpo. Iminā ātāpena upeto hoti...pe... samannāgato. Tena vuccati ātāpīti.

Sampajānoti tattha katamaṃ sampajāññaṃ? Yā paññā pajānanā...pe... sammādiṭṭhi. Imaṃ vuccati sampajāññaṃ. Iminā sampajāññaena upeto hoti...pe... samannāgato. Tena vuccati sampajānoti.

Satimāti tattha katamā sati? Yā sati anussati...pe... sammāsati. Ayaṃ vuccati sati. Imāya satiyā upeto hoti...pe... samannāgato. Tena vuccati satimāti.

Vineyya loke abhijjhādomanassanti tattha katamo loko? Sveva kāyo loko, pañcapi upādānakkhandhā loko. Ayaṃ vuccati loko. Tattha katamā abhijjhā? Yo rāgo sārāgo anunayo anurodho nandī nandīrāgo cittassa sārāgo, ayaṃ vuccati abhijjhā. Tattha katamaṃ domanassaṃ? Yaṃ cetasikaṃ asātaṃ, cetasikaṃ dukkhaṃ, cetosamphassaṃ asātaṃ...pe... dukkhā vedanā. Imaṃ vuccati domanassaṃ. Iti ayañca abhijjhā idañca domanassaṃ imamhi loke vinītā honti paṭivinītā santā vūpasantā samitā vūpasamitā atthaṅgatā abbatthaṅgatā appitā byappitā sositā visositā byantīkatā, tena vuccati vineyya loke abhijjhādomanassanti (vibha. 356) evametesam padānamattho vutto. Tena saha ayaṃ aṭṭhakathānayo yathā saṃsandati, evaṃ vedītabbo. Ayaṃ tāva kāyānupassanāsatiṭṭhānuddesassa atthavaṇṇanā.

Vedanāsu... citte... dhammesu dhammānupassī viharati...pe... vineyya loke abhijjhādomanassanti ettha pana **vedanānupassīti** evamādīsu vedanādīnaṃ puna vacane payojanaṃ kāyānupassanāyaṃ vuttanayeneva vedītabbaṃ. **Vedanāsu vedanānupassī, citte cittānupassī, dhammesu dhammānupassīti** ettha pana **vedanāti** tisso vedanā, tā ca lokiyā eva. Cittampi lokiyaṃ, tathā dhammā. Tesam vibhāgo niddesavāre pākāto bhavissati. Kevalaṃ panidha yathā vedanā anupassitabbā, tathā anupassanto **vedanāsu vedanānupassīti** vedītabbo. Esa nayo cittadhammesupī. Kathaṃca vedanā anupassitabbāti? Sukhā tāva vedanā dukkhato, dukkhā sallato, adukkhamasukhā aniccato. Yathāha –

“Yo sukhaṃ dukkhato adda, dukkhamaddakkhi sallato;
Adukkhamasukhaṃ santaṃ, adakkhi naṃ aniccato;
Sa ve sammaddaso bhikkhu, upasanto carissatī”ti. (saṃ. ni. 4.253);

Sabbā eva cetā dukkhātipi anupassitabbā. Vuttañhetam “yaṃkiñci vedayītam, sabbam taṃ dukkhasminti vadāmi”ti (saṃ. ni. 4.259). Sukhadukkhato ca anupassitabbā. Yathāha “sukhā vedanā ṭṭhisukhā vipariṇāmadukkhā”ti (ma. ni. 1.464) sabbam vitthāretabbam. Apica aniccādisattānupassanāvasenapi anupassitabbā. Sesam niddesavāreyeva pākātam bhavissati. Cittadhammesupī cittaṃ tāva ārammaṇādhipatisahajātabhūmikammavipākakiriyādinānattabhedānaṃ aniccādisattānupassanānaṃ niddesavāre āgatasarāgādibhedānañca vasena anupassitabbam. Dhammā salakkhaṇasāmaññalakkhaṇaṃ suññatadhammassa aniccādisattānupassanānaṃ niddesavāre āgatasantāsantādibhedānañca vasena anupassitabbā. Sesam vuttanayameva. Kāmañcetta yassa kāyasaṅkhāte loke abhijjhādomanassaṃ pahīnaṃ, tassa vedanādīlokesupī taṃ pahīnameva. Nānāpuggalavasena pana nānācittakkaṇikasatiṭṭhānabhāvanāvasena ca sabbattha vuttaṃ. Yato vā ekattha pahīnaṃ sesesupī pahīnaṃ hoti. Tenevassa tattha pahānadassanattampī evaṃ vuttanti vedītabbanti.

Uddesavārakathāvaṇṇanā niṭṭhitā.

Kāyānupassanānāpānapabbavaṇṇanā

107. Idāni seyyathāpi nāma cheko vilīvakārako thūlakilañjasaṅhakilañjacākoṭakapeḷāpuṭādīni upakaraṇāni kattukāmo ekaṃ mahāveṇuṃ labhitvā catudhā bhinditvā tato ekekaṃ veṇukhaṇḍaṃ gahetvā phāletvā taṃ taṃ upakaraṇaṃ kareyya, evameva bhagavā satipaṭṭhānadesanāya sattānaṃ anekappakāravisesādhigamaṃ kattukāmo ekameva sammāsatiṃ “cattāro satipaṭṭhānā. Katame cattāro? Idha, bhikkhave, bhikkhu kāye kāyānupassī viharatī”tiādīnā nayena ārammaṇavasena catudhā bhinditvā tato ekekaṃ satipaṭṭhānaṃ gahetvā vibhajanto “kathaṃca bhikkhave”tiādīnā nayena niddesavāraṃ vattumāraddho.

Tattha **kathañcā**tiādi vitthāretukamyatā pucchā. Ayaṃ panettha sañkhepattho – bhikkhave, kena ca pakārena bhikkhu kāye kāyānupassī viharatīti? Esa nayo sabbapucchāvāresu. **Idha, bhikkhave, bhikkhūti**, bhikkhave, imasmiṃ sāsane bhikkhu. Ayañhettha idha-saddo sabbappakārakāyānupassanānibbattakassa puggalassa sannissayabhūtasāsanaparidīpano aññasāsanassa tathābhāvapaṭisedhano ca. Vuttañhettaṃ “idheva, bhikkhave, samaṇo...pe... suññā parappavādā samaṇebhi aññehī”ti (ma. ni. 1.139). Tena vuttaṃ “imasmiṃ sāsane bhikkhū”ti.

“Araññagato vā...pe... suññāgāragato vā”ti idamassa satipaṭṭhānabhāvanānurūpasenāsanapariggahaparidīpanaṃ. Imassa hi bhikkhuno dīgharattaṃ rūpādīsu ārammaṇesu anuvisaṭṭhaṃ cittaṃ kammaṭṭhānavīthiṃ otarituṃ na icchatī, kūṭagoṇayuttaratho viya uppathameva dhāvati, tasmā seyyathāpi nāma gopo kūṭadhenuyā sabbam khīraṃ pivitvā vaḍḍhitam kūṭavacchaṃ dametukāmo dhenuto apanetvā ekamante mahantaṃ thambhaṃ nikhaṇitvā tattha yottena bandheyya. Athassa so vaccho ito cito ca vipphanditvā palāyituṃ asakkonto tameva thambhaṃ upanisiḍeyya vā upanipajjeyya vā, evameva imināpi bhikkhunā dīgharattaṃ rūpārammaṇādirasapānavaḍḍhitam duṭṭhacittaṃ dametukāmena rūpādīārammaṇato apanetvā araññaṃ vā rukkhamaṃ vā suññāgāraṃ vā pavesetvā tattha satipaṭṭhānārammaṇatthambhe satiyottena bandhitabbaṃ. Evamassa taṃ cittaṃ ito cito ca vipphanditvāpi pubbe āciṇṇārammaṇaṃ alabhamānaṃ satiyottaṃ chinditvā palāyituṃ asakkontaṃ tamevārammaṇaṃ upacārappanāvasena upanisiḍati ceva upanipajjati ca. Tenāhu porāṇā –

“Yathā thambhe nibandheyya, vacchaṃ damaṃ naro idha;
Bandheyyevaṃ sakaṃ cittaṃ, satiyārammaṇe daḷha”nti.

Evamassa taṃ senāsaṇaṃ bhāvanānurūpaṃ hoti. Tena vuttaṃ “idamassa satipaṭṭhānabhāvanānurūpasenāsanapariggahaparidīpana”nti.

Apica yasmā idaṃ kāyānupassanāya muddhabhūtaṃ sabbabuddhapaccekabuddhabuddhasāvakaṇaṃ visesādhigamadiṭṭhadhammasukhavihārapadaṭṭhānaṃ ānāpānassatikammaṭṭhānaṃ itthipurisahaṭṭhiassādisaddasamākulaṃ gāmantam apariccajitvā na sukaram sampādetuṃ, saddakaṇṭakattā jhānassa. Agāmake pana araññe sukaram yogāvacarena idaṃ kammaṭṭhānaṃ pariggahetvā ānāpānacatutthajjhānaṃ nibbattetvā tadeva jhānaṃ pādakaṃ katvā sañkhāre sammasitvā aggaphalaṃ arahattaṃ pāpuṇituṃ. Tasmāssa anurūpasenāsaṇaṃ dassento bhagavā “araññagato vā”tiādimāha.

Vatthuvijjācariyo viya hi bhagavā. So yathā vatthuvijjācariyo nagarabhūmiṃ passitvā suṭṭhu upaparikkhitvā “ettha nagaram māpethā”ti upadisati, sotthinā ca nagare niṭṭhite rājakulato mahāsakkāram labhati, evameva yogāvacarassa anurūpaṃ senāsaṇaṃ upaparikkhitvā “ettha kammaṭṭhānaṃ anuyuñjitaṃ”nti upadisati. Tato tattha kammaṭṭhānaṃ anuyuñjantena yoginā anukkamena arahatte patte “sammāsambuddho vata so bhagavā”ti mahantaṃ sakkāram labhati.

Ayaṃ pana bhikkhu dīpisadisoti vuccati. Yathā hi mahādīpirājā araññe tiṇagahanaṃ vā vanagahanaṃ vā pabbatagahanaṃ vā nissāya nilīyitvā vanamahimsagokaṇṇasūkarādayo mige gaṇhāti, evameva ayaṃ araññādīsu kammaṭṭhānaṃ anuyuñjanto bhikkhu yathākkamena cattāro magge ceva cattāri ariyaphalāni ca gaṇhāti. Tenāhu porāṇā –

“Yathāpi dīpiko nāma, nilīyitvā gaṇhātī mige;
Tathevāyaṃ buddhaputto, yuttayogo vipassako;
Araññaṃ pavisitvāna, gaṇhātī phalamuttama”nti.

Tenassa parakkamajavayoggabhūmiṃ araññasenāsaṇaṃ dassento bhagavā “araññagato vā”tiādimāha. Ito paraṃ imasmiṃ tāva ānāpānapabbe yaṃ vattabbaṃ siyā, taṃ **visuddhimagge** vuttameva.

Tassa pana imesaṃ “dīghaṃ vā assasanto dīghaṃ assasāmīti pajānāti...pe... passambhayaṃ kāyasañkhāraṃ passasissāmīti sikkhatī”ti evaṃ vuttānaṃ assāsapassāsānaṃ vasena sikkhato assāsapassāsānimitte cattāri jhānāni uppajjanti. So jhānā vuṭṭhahitvā assāsapassāsā vā pariggāṇhāti jhānaṅgāni vā. Tattha assāsapassāsakammiko “ime assāsapassāsā kiṃ nissitā, vatthuṃ nissitā, vatthu nāma karajakāyo,

karajakāyo nāma cattāri mahābhūtāni upādārūpañcā’’ti evaṃ rūpaṃ pariग्गāṇhāti, tato tadārammaṇe phassaṇācamake nāmaṃti evaṃ nāmarūpaṃ pariग्गahetvā tassa paccayaṃ pariyesanto avijjādipaṭṭicasamuppādaṃ disvā ‘‘paccayapaccayuppannadhammattamevetam, añño satto vā puggalo vā natthi’’ti vitiṇṇakaṅkho sappaccayanāmarūpe tilakkhaṇaṃ āropetvā vipassanaṃ vaḍḍhento anukkamena arahattaṃ pāpuṇāti. Idaṃ ekassa bhikkhuno yāva arahattā niyyānamukhaṃ.

Jhānakammikopi ‘‘imāni jhānaṅgāni kiṃ nissitāni, vatthuṃ nissitāni. Vatthu nāma karajakāyoti jhānaṅgāni nāmaṃ, karajakāyo rūpa’’nti nāmarūpaṃ vavattapetvā tassa paccayaṃ pariyesanto avijjādipaccayākāraṃ disvā ‘‘paccayapaccayuppannadhammattamevetam, añño satto vā puggalo vā natthi’’ti vitiṇṇakaṅkho sappaccayanāmarūpe tilakkhaṇaṃ āropetvā vipassanaṃ vaḍḍhento anukkamena arahattaṃ pāpuṇāti, idaṃ ekassa bhikkhuno yāva arahattā niyyānamukhaṃ.

Iti ajjhattaṃ vāti evaṃ attano vā assāsapassāsakāye kāyānupassī viharati. **Bahiddhā vāti** parassa vā assāsapassāsakāye. **Ajjhattabahiddhā vāti** kālena attano, kālena parassa assāsapassāsakāye. Etenassa paguṇakammaṭṭhānaṃ aṭṭhapetvā aparāparaṃ sañcaraṇakālo kathito. Ekasmiṃ kāle panidaṃ ubhayaṃ na labbhati.

Samudayadhammānupassī vāti yathā nāma kammārabhastāṇa gaggaraṇāḷiṇa tajjaṇa vāyāmaṃ paṭicca vāto aparāparaṃ sañcarati, evaṃ bhikkhuno karajakāyaṇa nāsāpuṭaṇa cittaṇa paṭicca assāsapassāsakāyo aparāparaṃ sañcarati. Kāyādayo dhammā samudayadhammā, te passanto ‘‘samudayadhammānupassī vā kāyasmīṃ viharatī’’ti vuccati. **Vayadhammānupassī vāti** yathā bhastāya apanītāya gaggaraṇāḷiyā bhinnāya tajje ca vāyāme asatī so vāto nappavattatī, evameva kāye bhinne nāsāpuṭe viddhaste citte ca niruddhe assāsapassāsakāyo nāma nappavattatīti kāyādinirodhā assāsapassāsānirodhoti evaṃ passanto ‘‘vayadhammānupassī vā kāyasmīṃ viharatī’’ti vuccati. **Samudayavayadhammānupassī vāti** kālena samudayaṃ, kālena vayaṃ anupassanto. **Atthi kāyoti vā panassatī** kāyova atthi, na satto, na puggalo, na itthī, na puriso, na attā, na attaniyaṃ, nāhaṃ, na mama, na koci, na kassacīti evamassa sati paccupaṭṭhitā hoti.

Yāvadevāti payojanaparicchedavavattāpanametaṃ. Idaṃ vuttaṃ hoti – yā sati paccupaṭṭhitā hoti, sā na aññatthāya. Atha kho yāvadeva ñāṇamattāya aparāparaṃ uttaruttari ñāṇapamaṇatthāya ceva satipamaṇatthāya ca, satisampajaññaṃ vaḍḍhatthāyātī attho. **Anissito ca viharatīti** taṇhānissayaditṭhinissayānaṃ vasena anissito viharatī. **Na ca kiñci loke upādiyatīti** lokasmiṃ kiñci rūpaṃ vā...pe... viññāṇaṃ vā ‘‘ayaṃ me attā vā attaniyaṃ vā’’ti na gaṇhāti. **Evampīti** upariatthaṃ upādāya sampiṇḍanatto pikāro. Iminā pana padena bhagavā ānāpānabbadesanaṃ niyyātetvā dasseti.

Tattha assāsapassāsaparigghāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ appavatti nirodhasaccaṃ, dukkhaparijānanaṃ samudayapajahanaṃ nirodhārammaṇo ariyamaggo maggasaccaṃ. Evaṃ catusaccavasena ussakkivā nibbutiṃ pāpuṇātīti idamekassa assāsapassāsavasena abhinivīṭṭhassa bhikkhuno yāva arahattā niyyānamukhanti.

Ānāpānabbavaṇṇanā niṭṭhitā.

Iriyāpathapabbavaṇṇanā

108. Evaṃ assāsapassāsavasena kāyānupassanaṃ vibhajitvā idāni iriyāpathavasena vibhajitūṃ **puna caparanti**ādīmāha. Tattha kāmaṃ soṇasiṅgālādayopi gacchantā ‘‘gacchāmā’’ti jānanti. Na panetaṃ evarūpaṃ jānanaṃ sandhāya vuttaṃ. Evarūpañhi jānanaṃ sattūpaladdhiṃ na pajahati, attasaññaṃ na ugghāṇeti, kammaṭṭhānaṃ vā satipaṭṭhānabhāvanā vā na hoti. Imassa pana bhikkhuno jānanaṃ sattūpaladdhiṃ pajahati, attasaññaṃ ugghāṇeti, kammaṭṭhānañceva satipaṭṭhānabhāvanā ca hoti. Idañhi ‘‘ko gacchati, kassa gamaṇaṃ, kiṃ kāraṇā gacchatī’’ti evaṃ sampajānanaṃ sandhāya vuttaṃ. Ṭhānādīsupi eseva nayo.

Tattha **ko gacchatīti** na koci satto vā puggalo vā gacchati. **Kassa gamananti** na kassaci sattassa vā puggalassa vā gamaṇaṃ. **Kiṃ kāraṇā gacchatīti** cittakiriyavāyodhātuvipphārena gacchati. Tasmā esa evaṃ pajānāti ‘‘gacchāmī’’ti cittaṃ uppajjati, taṃ vāyaṃ janeti, vāyo viññattim janeti, cittakiriyavāyodhātuvipphārena sakalakāyassa purato abhinīhāro gamananti vuccati. Ṭhānādīsupi eseva nayo.

Tatrāpi hi “tiṭṭhāmī”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena sakalakāyassa koṭito paṭṭhāya ussitabhāvo ṭhānanti vuccati. “Nisīdāmī”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena heṭṭhimakāyassa samiñjanaṃ uparimakāyassa ussitabhāvo nisajjāti vuccati. “Sayāmī”ti cittaṃ uppajjati, taṃ vāyaṃ janeti, vāyo viññattiṃ janeti, cittakiriyavāyodhātuvipphārena sakalasarīrassa tiriyato pasāraṇaṃ sayananti vuccatīti.

Tassa evaṃ pajānato evaṃ hoti “satto gacchati satto tiṭṭhatī”ti vuccati. Atthi pana koci satto gacchanto vā ṭhito vā natthi. Yathā pana “sakaṭaṃ gacchati sakaṭaṃ tiṭṭhatī”ti vuccati, na ca kiñci sakaṭaṃ nāma gacchantam vā tiṭṭhantaṃ vā atthi. Cattāro pana goṇe yojetvā chekamhi sārathimhi pājente “sakaṭaṃ gacchati sakaṭaṃ tiṭṭhatī”ti vohāramattameva hoti, evameva ajānanatṭhena sakaṭaṃ viya kāyo. Goṇa viya cittajavātā. Sārathi viya cittaṃ. Gacchāmi tiṭṭhāmīti citte uppane vāyodhātu viññattiṃ janayamānā uppajjati, cittakiriyavāyodhātuvipphārena gamanādīni pavattanti. Tato “satto gacchati, satto tiṭṭhatī, ahaṃ gacchāmi, ahaṃ tiṭṭhāmī”ti vohāramattaṃ hotīti. Tenāha –

“Nāvā mālutavegena, jiyāvegena tejanaṃ;
Yathā yāti tathā kāyo, yāti vātāhato ayaṃ.

Yantaṃ suttavaseneva, cittasuttavasenaṃ;
Payuttaṃ kāyayantampi, yāti ṭhāti nisīdati.

Ko nāma ettha so satto, yo vinā hetupaccaye;
Attano ānubhāvena, tiṭṭhe vā yadi vā vaje’ti.

Tasmā evaṃ hetupaccayavaseneva pavattāni gamanādīni sallakkhento esa gacchanto vā gacchāmīti pajānāti, ṭhito vā, nisinna vā, sayāno vā sayānomhīti pajānātīti veditabbo.

Yathā yathā vā panassa kāyo pañihito hoti, tathā tathā naṃ pajānātīti sabbasaṅgāhikavacanametam. Idaṃ vuttaṃ hoti – yena yena vā ākārena tassa kāyo ṭhito hoti, tena tena naṃ pajānāti. Gamanākārena ṭhitaṃ gacchatīti pajānāti. ṭhānanisajjāsayanākārena ṭhitaṃ sayānoti pajānātīti.

Iti ajjhattaṃ vāti evaṃ attano vā catuiriyāpathapariggaṇhanena kāye kāyānupassī viharati. **Bahiddhā vāti** parassa vā catuiriyāpathapariggaṇhanena. **Ajjhattabahiddhā vāti** kālena attano, kālena parassa catuiriyāpathapariggaṇhanena kāye kāyānupassī viharati. **Samudayadhammānupassī vāti** adīsu pana “avijjāsamudayā rūpasamudayo”tiādīnā (paṭi. ma. 1.49) nayena pañcahākārehi rūpakkhandhassa samudayo ca vayo ca nīharitabbo. Tañhi sandhāya idha “samudayadhammānupassī vā”tiādi vuttaṃ. **Atthi kāyoti vā panassātiādi vuttasadisameva.**

Idha pana catuiriyāpathapariggāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ appavattī nirodhasaccaṃ, dukkhaparijānāno samudayapajahano nirodhārammaṇo ariyamaggo maggasaccaṃ. Evaṃ catusaccavasena ussakitvā nibbutiṃ pāpuṇātīti idamekassa catuiriyāpathapariggāhakassa bhikkhuno yāva arahattā niyyānamukhanti.

Iriyāpathapabbavaṇṇanā niṭṭhitā.

Catusampajaññapabbavaṇṇanā

109. Evaṃ iriyāpathavasena kāyānupassanaṃ vibhajitvā idāni catusampajaññavasena vibhajitum **puna caparantiādimāha.** Tatha **abhikkante paṭikkanteti** ettha tāva **abhikkantaṃ** vuccati gamaṇaṃ. **Paṭikkantaṃ** nivattanaṃ. Tadubhayampi catūsu iriyāpathesu labbhati. Gamane tāva purato kāyaṃ abhiharanto **abhikkamati** nāma. Paṭinivattento **paṭikkamati** nāma. ṭhānepi ṭhitakova kāyaṃ purato onāmento abhikkamati nāma. Pacchato apanāmento paṭikkamati nāma. Nisajjāyapi nisinnakova āsanassa purimaṅgābhimukho saṃsaranto abhikkamati nāma. Pacchimaṅgappadesaṃ pacchā saṃsaranto paṭikkamati nāma. Nipajjāyapi eseva nayo.

Sampajānakārī hotīti sampajaññena sabbakiccekārī, sampajaññameva vā kārī. So hi abhikkantādīsu

sampajaññaṃ karoteva, na katthaci sampajaññavirahito hoti. Tattha sātthakasampajaññaṃ sappāyasampajaññaṃ gocarasampajaññaṃ asammohasampajaññanti catubbidhaṃ sampajaññaṃ. Tattha abhikkamanacitte uppanne cittavaseneva agantvā “kiṃ nu me ettha gatena attho atthi natthī”ti atthānatthaṃ pariggaṇhitvā atthapariggahaṇaṃ **sātthakasampajaññaṃ**. Tattha ca atthoti cetiyadassanabodhidassanasāṅghadassanatheradassanaasubhadassanādivasena dhammato vaḍḍhi. Cetiyaṃ vā bodhiṃ vā disvāpi hi buddhārammaṇaṃ saṅghadassanena saṅghārammaṇaṃ pītiṃ uppādetvā tadeva khayavayato sammāsanto arahattaṃ pāpuṇāti. There disvā tesam ovāde patitthāya asubhaṃ disvā tattha paṭhamajjhānaṃ uppādetvā tadeva khayavayato sammāsanto arahattaṃ pāpuṇāti. Tasmā etesaṃ dassanaṃ sātthakaṃ. Keci pana “āmisatopi vaḍḍhi atthoyeva, taṃ nissāya brahmacariyānuggahāya paṭipannattā”ti vadanti.

Tasmiṃ pana gamane sappāyāsappāyaṃ pariggaṇhitvā sappāyapariggahaṇaṃ **sappāyasampajaññaṃ**. Seyyathidaṃ, cetiyadassanaṃ tāva sātthakaṃ. Sace pana cetiyassa mahāpūjāya dasadvādasayojanantare parisā sannipatanti. Attano vibhavanurūpaṃ itthiyopi purisāpi alaṅkatappaṭiyattā cittaṃkammaṃrūpakāni viya sañcaranti. Tatra cassa itthe ārammaṇe lobho, anitthe paṭigho, asamapekkhane moho uppajjati, kāyasamsaggāpattiṃ vā āpajjati, jīvitabrahmacariyānaṃ vā antarāyo hoti, evaṃ taṃ ṭhānaṃ asappāyaṃ hoti. Vuttappakāraantarāyābhāve sappāyaṃ. Bodhidassanepi eseve nayo. Saṅghadassanampi sātthaṃ. Sace pana antogāme mahāmaṇḍapaṃ kāretvā sabbarattiṃ dhammassavanaṃ kārentesu manussesu vuttappakāreneva janasannipāto ceva antarāyo ca hoti, evaṃ taṃ ṭhānaṃ asappāyaṃ. Antarāyābhāve sappāyaṃ. Mahāparisaparivāraṇaṃ therānaṃ dassanepi eseve nayo.

Asubhadassanampi sātthaṃ. Tadatthadīpanatthañca idaṃ vatthu – eko kira daharabhikkhu sāmaṇeraṃ gahetvā dantakaṭṭhatthāya gato. Sāmaṇero maggā okkamitvā purato gacchanto asubhaṃ disvā paṭhamajjhānaṃ nibbattetvā tadeva pādakaṃ katvā saṅkhāre sammāsanto tīṇi phalāni sacchikatvā uparimaggatthāya kammaṭṭhānaṃ pariggahetvā aṭṭhāsi. Daharo taṃ apassanto “sāmaṇerā”ti pakkosī. So “mayā pabbajitadivasato paṭṭhāya bhikkhunā saddhiṃ dve kathā nāma na kathitapubbā. Aññasmimpī divase uparivisesaṃ nibbattessāmī”ti cintetvā “kiṃ, bhante”ti paṭivacanaṃ adāsi. Ehīti ca vutte ekavacaneneva āgantvā “bhante, iminā tāva maggena gantvā mayā ṭhitokāse muhuttaṃ puratthābhimukho ṭhatvā olokethā”ti āha. So tathā katvā tena pattavisesameva pāpuṇi. Evaṃ ekaṃ asubhaṃ dvinnaṃ janānaṃ atthāya jāyati. Evaṃ sātthampi panetaṃ purisassa mātuḡāmāsuhamaṃ asappāyaṃ. Mātuḡāmassa ca purisāsuhamaṃ sabhāgameva sappāyanti evaṃ sappāyapariggahaṇaṃ **sappāyasampajaññaṃ** nāma.

Evaṃ pariggahitasātthasappāyassa pana aṭṭhatimsāya kammaṭṭhānesu attano cittaṃcittakammaṭṭhānasāṅkhātaṃ gocaṃ uggahetvā bhikkhācāragocare taṃ gahetvā gamaṇaṃ **gocarasampajaññaṃ** nāma. Tassāvibhāvattaṃ idaṃ catukkaṃ veditabbaṃ. Idhekacco bhikkhu harati na paccāharati, ekacco na harati paccāharati, ekacco neva harati na paccāharati, ekacco harati ca paccāharati ca.

Tattha yo bhikkhu divasaṃ caṅkameṇa nisajjāya āvaraṇīyehi dhammehi cittaṃ parisodhetvā tathā rattiyaṃ paṭhamaṃ yāmaṃ majjhime yāme seyyaṃ kappetvā pacchimayāmeṇi nisajjācaṅkameṇi vītināmetvā pageva cetiyaṅgaṇabodhiyaṅgaṇavattaṃ katvā bodhirukkhe udakaṃ abhisiṅcitvā pānīyaṃ paribhojanīyaṃ paccupaṭṭhapetvā ācariyupajjhāyavattādīni sabbāni khandhakavattāni samādāya vattati. So sarīraparikammaṃ katvā senāsanaṃ pavisitvā dve tayo pallaṅke usumaṃ gāhāpento kammaṭṭhānaṃ anuyuñjittvā bhikkhācāraṇelāya uṭṭhahitvā kammaṭṭhānasīseneva pattacīvaramādāya senāsanaṃ nikkhamitvā kammaṭṭhānaṃ manasikarontova cetiyaṅgaṇaṃ gantvā sace buddhānussatikammaṭṭhānaṃ hoti, taṃ avissajjetvā cetiyaṅgaṇaṃ pavisati. Aññaṃ ce kammaṭṭhānaṃ hoti, sopānapādamūle ṭhatvā hatthena gahitabhaṇḍaṃ viya taṃ ṭhapetvā buddhārammaṇaṃ pītiṃ gahetvā cetiyaṅgaṇaṃ āruya mahantaṃ cetiyaṃ ce, tikkhattaṃ padakkhiṇaṃ katvā catūsu ṭhānesu vanditabbaṃ. Khuddakaṃ cetiyaṃ ce, tatheva padakkhiṇaṃ katvā aṭṭhasu ṭhānesu vanditabbaṃ. Cetiyaṃ vanditvā bodhiyaṅgaṇaṃ pattenāpi buddhassa bhagavato sammukhā viya nipaccakāraṃ dassetvā bodhi vanditabbo. So evaṃ cetiyañca bodhiñca vanditvā paṭisāmitaṭṭhānaṃ gantvā paṭisāmitabhaṇḍakaṃ hatthena gaṇhanto viya nikkhattakammaṭṭhānaṃ gahetvā gāmasamīpe kammaṭṭhānasīseneva cīvaraṃ pārupitvā gāmaṃ piṇḍāya pavisati.

Atha naṃ manussā disvā “ayyo no āgato”ti paccuggantvā pattaṃ gahetvā āsanasālāyaṃ vā gehe vā nisīdāpetvā yāguṃ datvā yāva bhattaṃ na niṭṭhāti, tāva pāde dhovitvā telena makkhetvā purato nisīditvā pañhaṃ vā pucchanti, dhammaṃ vā sotukāmā honti. Sacepi na kathāpentī, janasaṅghatthaṃ dhammakathā

nāma kātābbāyevāti aṭṭhakathācariyā vadanti. Dhammakathā hi kammaṭṭhānavinimuttā nāma natthi. Tasmā kammaṭṭhānasīseveva dhammaṃ kathetvā kammaṭṭhānasīseveva āhāraṃ paribhuñjitvā anumodanaṃ katvā nivattiyamānehipi manussehi anugatova gāmato nikkhamitvā tattheva nivattetvā maggaṃ paṭipajjati. Atha naṃ puretaraṃ nikkhamitvā bahigāme katabhattakiccā sāmaṇeradahaṃbhikkhū disvā paccuggantvā pattacīvaramassa gaṇhanti.

Porāṇā bhikkhū kira “na amhākaṃ upajjhāyo ācariyo”ti mukhaṃ ulloketvā vattaṃ karonti. Sampattaparicchedeneva karonti. Te taṃ pucchanti “bhante, ete manussā tumhākaṃ kiṃ honti mātupakkhato sambandhā pitipakkhato”ti. Kiṃ disvā pucchathāti. Tumhesu etesaṃ pemaṃ bahumānanti. Āvuso, yaṃ mātāpitūhipi dukkaraṃ, taṃ ete amhākaṃ karonti, pattacīvarampi no etesaṃ santakameva, etesaṃ ānubhāvena neva bhaye bhayaṃ, na chātake chātaṃ jānāma, edisā nāma amhākaṃ upakārino natthīti tesam guṇe kathento gacchati, ayaṃ vuccati **harati na paccāharatīti**.

Yassa pana pageva vuttappakāraṃ vattapaṭipattiṃ karontassa kammajatejo pajjalati, anupādinnaṃ muñcitvā upādinnaṃ gaṇhāti, sarīrato sedā muccanti, kammaṭṭhānavīthiṃ nārohati, so pageva pattacīvaramādāya vegasāva cetiyaṃ vanditvā gorūpānaṃ nikkhamanavelāyameva gāmaṃ yāgubhikkhāya pavisitvā yāguṃ labhitvā āsanasālaṃ gantvā pivati. Athassa dvattikkhattuṃ ajjhoharaṇamatteneva kammajatejo upādinnaṃ muñcitvā anupādinnaṃ gaṇhāti. Ghaṭasatena nhāto viya tejodhātupariṭāhanibbāpanaṃ patvā kammaṭṭhānasīseva yāguṃ paribhuñjitvā pattañca mukhañca dhovitvā antarābhatte kammaṭṭhānaṃ manasikatvā avasesaṭṭhāne piṇḍāya caritvā kammaṭṭhānasīseva āhāraṃ paribhuñjitvā tato paṭṭhāya poṅkhānupoṅkhaṃ upaṭṭhahamānaṃ kammaṭṭhānaṃ gahetvāva āgacchati, ayaṃ vuccati **na harati paccāharatīti**. Edisā ca bhikkhū yāguṃ pivitvā vipassanaṃ ārabhitvā buddhasāsane arahattaṃ pattā nāma gaṇanapathaṃ vītivattā, sīhalaḍḍipeyeva tesu tesu gāmesu āsanasālayaṃ na taṃ āsanaṃ atthi, yattha yāguṃ pivitvā arahattappattabhikkhū natthīti.

Yo pana pamādavihārī hoti nikkhattadhuro, sabbavattāni bhinditvā pañcavidhacetokhilavinibandhacitto viharanto “kammaṭṭhānaṃ nāma atthī”tipi saññaṃ akatvā gāmaṃ piṇḍāya pavisitvā ananulomikena gihisaṃsaggena saṃsaṭṭho caritvā ca bhuñjitvā ca tuccho nikkhamati, ayaṃ vuccati **neva harati na paccāharatīti**.

Yo panāyaṃ harati ca paccāharati cāti vutto, so gatapaccāgatikavattavasena veditabbo. Attakāmā hi kulaputtā sāsane pabbajitvā dasapi vīsampi tiṃsampi cattālīsampi paññāsampi satampi ekato vasantā katikavattaṃ katvā viharanti, āvuso, tumhe na iṇaṭṭhā na bhayaṭṭā na jīvikāpakatā pabbajitā, dukkhā muccitukāmā panettha pabbajitā, tasmā gamane uppannakilesaṃ gamaneyeva niggaṇhatha, ṭhāne, nisajjāyaṃ, sayane uppannakilesaṃ sayaneyeva niggaṇhathāti. Te evaṃ katikavattaṃ katvā bhikkhācāraṃ gacchantā aḍḍhausabhausabhaaḍḍhagāvutagāvutantaresu pāsāṇā honti. Tāya saññāya kammaṭṭhānaṃ manasikarontāva gacchanti. Sace kassaci gamane kilesaṃ uppajjati, tattheva naṃ niggaṇhāti. Tathā asakkonto tiṭṭhati. Athassa pacchato āgacchantopi tiṭṭhati. So “ayaṃ bhikkhu tuyhaṃ uppannavitakkaṃ jānāti, ananucchavikaṃ te eta”nti attānaṃ paṭicodetvā vipassanaṃ vadḍhetvā tattheva ariyabhūmiṃ okkamati. Tathā asakkonto nisīdati. Athassa pacchato āgacchantopi nisīdatīti soyeva nayo. Ariyabhūmiṃ okkamituṃ asakkontopi taṃ kilesaṃ vikkhambhetvā kammaṭṭhānaṃ manasikarontova gacchati. Na kammaṭṭhānavippayuttena cittena pādaṃ uddharati. Uddharati ce, paṭinivattetvā purimapadesaṃ yeva eti ālīndakavāsī mahāphussadevatthero viya.

So kira ekūnavāsativassāni gatapaccāgatikavattaṃ pūrento eva vihāsi. Manussāpi sudaṃ antarāmagge kasantā ca vapantā ca maddantā ca kammāni ca karontā theram tathāgacchantam disvā “ayaṃ thero punappunaṃ nivattitvā gacchati. Kiṃ nu kho maggaṃ uḍḍhu kiñci pamuṭṭho”ti samullapanti. So taṃ anādiyitvā kammaṭṭhānayuttacitteneva samaṇadhammaṃ karonto vāsativassabbhantare arahattaṃ pāpuṇi. Arahattappattadivaseyevassa caṅkamanakoṭiyaṃ addivatthā devatā aṅgulīhi dīpaṃ ujjaletvā aṭṭhāsi. Cattāropi mahārājāno sakko ca devānamindo brahmā ca sahampati upaṭṭhānaṃ agamaṃsu. Tañca obhāsaṃ disvā vanavāsīmahātissatthero taṃ dutiyadivase pucchi “rattibhāge āyasmato santike obhāso ahoṣi, kiṃ so obhāso”ti. Thero vikkhepaṃ karonto “obhāso nāma dīpobhāsoṃ hoti maṇiobhāsoṃ”ti evamādimāha. Tato paṭicchādetha tumheti nibaddho āmāti paṭijānitvā ārocesi kālavallimaṇḍapavāsī mahānāgattthero viya ca.

Sopi kira gatapaccāgatikavattaṃ pūrento paṭhamam tāva bhagavato mahāpadhānaṃ pūjessāmīti satta

vassāni ṭhānacaṅkamanameva adhiṭṭhāsi. Puna soḷasa vassāni gatapaccāgatikavattaṃ pūretvā arahattaṃ pāpuṇi. So kammaṭṭhānayutteneva cittaena pādaṃ uddharanto viyuttena uddhate paṭinivattanto gāmassa samīpaṃ gantvā “gāvī nu pabbajito nū”ti āsaṅkanīyapadese ṭhatvā cīvaraṃ pārupitvā kacchakantarato udakena pattaṃ dhovivā udakagaṇḍusaṃ karoti. Kiṃ kāraṇā? Mā me bhikkhaṃ dātuṃ vandituṃ vā āgate manusse dīghāyukā hothāti vacanamattenāpi kammaṭṭhānavikkhepo ahoṣīti. Ajja, bhante, katimīti divasaṃ vā bhikkhugaṇaṇaṃ vā pañhe vā pucchito pana udakaṃ gilitvā ārocesi. Sace divasādipucchakā na honti, nikkhamanavelāya gāmadvāre niṭṭhubhitvāya yāti kalambatitthavihāre vassūpagatapaññāsabhikkhū viya.

Te kira āsālhipuṇṇamāyaṃ katikavattaṃ akaṃsu “arahattaṃ appatvā aññamaññaṃ na ālapissāmā”ti. Gāmañca piṇḍāya pavisaṇṭā udakagaṇḍusaṃ katvā pavisiṃsu. Divasādīsu pucchitesu vuttanayeneva paṭipajjimsu. Tattha manussā niṭṭhubhanaṃ disvā jāniṃsu, “ajjeko āgato, ajja dve”ti. Evañca cintesuṃ “kiṃ nu kho ete amhehiyeva saddhiṃ na sallapanti, udāhu aññamaññaṃpi, yadi aññamaññaṃ na sallapanti, addhā vivādajātā bhavissanti, etha ne aññamaññaṃ khamāpessāmā”ti sabbe vihāraṃ gantvā paññāsāya bhikkhusu dvepi bhikkhū ekokāse nāddasaṃsu. Tato yo tesu cakkhumā puriso, so āha “na bho kalahakāraṇaṃ okāso īdiso hoti, susammaṭṭhaṃ cetiyaṅgaṇaṃ bodhiyaṅgaṇaṃ, sunikkhittā sammajjaniyo, sūpaṭṭhapitaṃ pānīyaṃ paribhojanīya”nti. Te tatova nivattā, tepi bhikkhū antotemāseyeva arahattaṃ patvā mahāpavāraṇāya visuddhipavāraṇaṃ pavāresuṃ.

Evaṃ kālavallimaṇḍapavāsī mahānāgatthero viya kalambatitthavihāre vassūpagatabhikkhū viya ca kammaṭṭhānayutteneva cittaena pādaṃ uddharanto gāmasamīpaṃ patvā udakagaṇḍusaṃ katvā vīthiyo sallakkhetvā yatha surāsoṇḍadhuttādayo kalahakāraṇā caṇḍahatthiassādayo vā natthi, taṃ vīthiṃ paṭipajjati. Tattha ca piṇḍāya caramāno na turitaturito viya javena gacchati. Na hi javena piṇḍapāṭiyadhutaṅgaṃ nāma kiñci atthi. Visamabhūmibhāgappattaṃ pana udakasakaṭaṃ viya niccalo hutvā gacchati. Anugharaṃ pavatṭho ca taṃ dātukāmaṃ vā adātukāmaṃ vā sallakkhetuṃ tadanurūpaṃ kālaṃ āgamento bhikkhaṃ gahetvā antogāme vā bahigāme vā vihārameva vā āgantvā yathāphāsuke patirūpe okāse nisīditvā kammaṭṭhānaṃ manasikaronto āhāre paṭikūlasaññaṃ upaṭṭhāpetvā akkhabbhañjanavaṇalepanaputtamaṃsūpamāvasena naṃ paccavekkhanto aṭṭhaṅgasamannāgataṃ āhāraṃ āhāreti, neva davāya na madāya na maṇḍanāya na vibhūsanāya. Bhuttāvī ca udakakiccaṃ katvā muhuttaṃ bhattakilamathaṃ paṭippassambhetvā yathā purebhattaṃ, evaṃ pacchābhattaṃ. Yathā purimayāmaṃ, evaṃ pacchimayāmañca kammaṭṭhānameva manasi karoti, ayaṃ vuccati **harati ca paccāharati cāti**.

Idaṃ pana haraṇapaccāharaṇasankhātāṃ gatapaccāgatikavattaṃ pūrento yadi upanissayasampanno hoti. Paṭhamavaye eva arahattaṃ pāpuṇāti. No ce paṭhamavaye pāpuṇāti, atha majjhimavaye. No ce majjhimavaye pāpuṇāti, atha pacchimavaye. No ce pacchimavaye pāpuṇāti, atha maraṇasamaye. No ce maraṇasamaye pāpuṇāti, atha devaputto hutvā. No ce devaputto hutvā pāpuṇāti, anuppanne buddhe nibbato paccakabodhiṃ sacchikaroti. No ce paccakabodhiṃ sacchikaroti, atha buddhānaṃ sammukhībhāve khippābhīṇo vā hoti seyyathāpi thero bāhiyo dārucīriyo, mahāpañño vā seyyathāpi thero sārīputto, mahiddhiko vā seyyathāpi thero mahāmoggallāno, dhutaṅgadhāro vā seyyathāpi thero mahākassapo, dībbacakkhuko vā seyyathāpi thero anuruddho, vinayadhāro vā seyyathāpi thero upāli, dhammakathiko vā seyyathāpi thero puṇṇo mantāniputto, āraññiko vā seyyathāpi thero revato, bahussuto vā seyyathāpi thero ānando, sikkhākāmo vā seyyathāpi thero rāhulo buddhaputtoti. Iti imasmiṃ catukke yvāyaṃ harati ca paccāharati ca, tassa **gocarasampajaññaṃ** sikhāpattaṃ hoti.

Abhikkamādīsu pana asammuyhanaṃ **asammohasampajaññaṃ**. Taṃ evaṃ veditabbaṃ – idha bhikkhu abhikkamanto vā paṭikkamanto vā yathā andhaputhujjanā abhikkamādīsu “attā abhikkamati, attanā abhikkamo nibbattito”ti vā “ahaṃ abhikkamāmi, mayā abhikkamo nibbattito”ti vā sammuyhanti. Tathā asammuyhanto “abhikkamāmi”ti citte uppajjamāne teneva cittaena saddhiṃ cittasamuṭṭhānā vāyodhātu viññattiṃ janayamānā uppajjati, iti cittakiriyavāyodhātuvipphārasena ayaṃ kāyasammato aṭṭhisāṅghāto abhikkamati, tassevaṃ abhikkamato ekekapādudharāṇe pathavīdhātu āpodhātūti dve dhātuyo omattā honti mandā, itarā dve adhimattā honti balavatiyo, tathā atiharaṇavītiaraṇesu. Vossajjane tejovāyodhātuyo omattā honti mandā, itarā dve adhimattā honti balavatiyo. Tathā sannikkhepanasannirumbhanesu. Tattha uddharāṇe pavattā rūpārūpadhammā atiharaṇaṃ na pāpuṇanti. Tathā atiharaṇe pavattā vītiaraṇaṃ, vītiaraṇe pavattā vossajjanaṃ, vossajjane pavattā sannikkhepanaṃ, sannikkhepane pavattā sannirumbhanaṃ na pāpuṇanti. Tattha tattheva pabbaṃ pabbaṃ sandhi sandhi odhi odhi hutvā tattakapāle pakkhittatilāni viya paṭapaṭāyantā bhijjanti. Tattha ko eko abhikkamati? Kassa vā ekassa abhikkamanaṃ? Paramatthato hi dhātūnaṃyeva

gamaṇaṃ, dhātūnaṃ ṭhānaṃ, dhātūnaṃ nisajjanaṃ, dhātūnaṃ sayanaṃ, tasmiṃ tasmiṃhi koṭṭhāse
saddhiṃ rūpena –

Aññaṃ uppajjate cittaṃ, aññaṃ cittaṃ nirujjhati;
Avācimanusambandho, nadīsotova vattatīti.

Evaṃ abhikkamādisu asammuyhanaṃ **asammohasampajaññaṃ** nāmāti;
Niṭṭhito abhikkante paṭikkante sampajānakārī hotīti padassa attho;

Ālokite vilokiteti ettha pana **ālokitaṃ** nāma purato pekkhanaṃ. **Vilokitaṃ** nāma anudisāpekkhanaṃ.
Aññānīpi heṭṭhā upari pacchato pekkhanavasena olokitaullokitāpalokitāni nāma honti, tāni idha na gahitāni.
Sāruppavasena pana imāneva dve gahitāni, iminā vā mukhena sabbānīpi tāni gahitānevāti.

Tattha ‘‘ālokessāmī’’ti citte uppanne cittavaseneva anoloketvā atthapariggahaṇaṃ sātthakasampajaññaṃ.
Taṃ āyasmantaṃ nandaṃ kāyasakkhiṃ katvā veditabbaṃ. Vuttañhettaṃ bhagavatā – ‘‘sace, bhikkhave,
nandassa puratthimā disā āloketabbā hoti, sabbaṃ cetasā samannāharitvā nando puratthimaṃ disaṃ āloketi,
evaṃ me puratthimaṃ disaṃ ālokayato na abhijjhādomanassā pāpakā akusalā dhammā anvāssaveyyunti iti so
tatha sampajāno hoti, sace, bhikkhave, nandassa pacchimā disā, uttarā disā, dakkhiṇā disā, uddhaṃ, adho,
anudisā āloketabbā hoti, sabbaṃ cetaso samannāharitvā nando anudisaṃ āloketi. Evaṃ me anudisaṃ
ālokayato...pe... sampajāno hotī’’ti (a. ni. 8.9).

Apica idhāpi pubbe vuttacetiyadassanādivaseneva sātthakatā ca sappāyatā ca veditabbā. Kammatṭhānassa
pana avijhanaṃeva gocarasampajaññaṃ. Tasmā khandhadhātuāyatanakammattṭhānikēhi attano
kammattṭhānavaseneva, kasiṇādīkammattṭhānikēhi vā pana kammattṭhānasīseneva ālokanavilokanaṃ kātabbaṃ.
Abbhantare attā nāma āloketā vā viloketā vā natthi, ālokessāmīti pana citte uppajjamāne teneva cittaena saddhiṃ
cittasamuṭṭhānā vāyodhātu viññattim janayamānā uppajjati. Iti cittakiriyavāyodhātuvipphāravaseneva
heṭṭhimaṃ akkhidalaṃ adho sīdati, uparimaṃ uddhaṃ laṅgheti, koci yantakena vivaranto nāma natthi, tato
cakkhuvīññāṇaṃ dassanakiccaṃ sādhettaṃ uppajjatīti. Evaṃ sampajānaṃ panetta
asammohasampajaññaṃ nāma.

Apica mūlapariññāgantukatāvakālikabhāvavasena pettha asammohasampajaññaṃ veditabbaṃ.
Mūlapariññāvasena tāva –

Bhavaṅgāvajjanañceva, dassanaṃ sampaṭicchanaṃ;
Santīraṇaṃ voṭṭhabbaṃ, javanaṃ bhavati sattamaṃ.

Tattha bhavaṅgaṃ upapattibhavassa āṅgaciccaṃ sādhayamānaṃ pavattati, taṃ āvaṭṭetvā kiriyamanodhātu
āvajjanakiccaṃ sādhayamānā, tannirodhā cakkhuvīññāṇaṃ dassanakiccaṃ sādhayamānaṃ, tannirodhā
vipākamanodhātu sampaṭicchanaṃ sādhayamānā, tannirodhā vipākamanovīññāṇadhātu santīraṇakiccaṃ
sādhayamānā, tannirodhā kiriyamanovīññāṇadhātu voṭṭhabbanakiccaṃ sādhayamānā, tannirodhā
sattakkhattuṃ javanaṃ javatī. Tattha paṭhamajavanepi ‘‘ayaṃ itthī, ayaṃ puriso’’ti
rajjanadussanamuyhanavasena ālokitavilokitaṃ na hoti. Dutiyajavanepi...pe... sattamajavanepi. Etesu pana
yuddhamaṅḍale yodhesu viya heṭṭhupariyavasena bhijjivā patitesu ‘‘ayaṃ itthī, ayaṃ puriso’’ti
rajjanādivasena ālokitavilokitaṃ hoti. Evaṃ tāvettha mūlapariññāvasena asammohasampajaññaṃ veditabbaṃ.

Cakkhudvāre pana rūpe āpāthagate bhavaṅgacalanato uddhaṃ sakakiccaṃ nipphādanavasena āvajjanādīsu
uppajjivā niruddhesu avasāne javanaṃ uppajjati. Taṃ pubbe uppanānaṃ āvajjanādīnaṃ gehabhūte
cakkhudvāre āgantukapuriso viya hoti. Tassa yathā paragehe kiñci yācituṃ pavitṭhassa āgantukapurisassa
gehasāmikesu tuṅhīmāsinesu āṅākaraṇaṃ na yuttaṃ. Evaṃ āvajjanādīnaṃ gehabhūte cakkhudvāre
āvajjanādīsopi arajjantesu adussantesu amuyhantesu ca rajjanadussanamuyhanaṃ ayuttanti evaṃ
āgantukabhāvavasena asammohasampajaññaṃ veditabbaṃ.

Yāni pana tāni cakkhudvāre voṭṭhabbanapariyosānāni cittāni uppajjanti, tāni saddhiṃ
sampayuttadhammehi tattha tattheva bhijjanti, aññaṃaññaṃ na passantīti ittarāni tāvakālikāni honti. Tattha

yathā ekasmiṃ ghare sabbesu mānusakesu matesu avasesassa ekassa taṅkhaṇeññeva maraṇadhammassa na yuttā naccagītādīsu abhirati nāma, evameva ekadvāre sasampayuttesu āvajjanādīsu tattha tattheva matesu avasesassa taṅkhaṇeññeva maraṇadhammassa javanassāpi rajjanadussanamuyhanavasena abhirati nāma na yuttāti evaṃ tāvakālikabhāvavasena asammosampajaññaṃ veditaḅbaṃ.

Apica khandhāyatanadhātupaccayapaccavekkhaṇavasenapetaṃ veditaḅbaṃ. Ettha hi cakkhu ceva rūpañca rūpakkhando, dassanaṃ viññāṅkhandho, taṃsampayuttā vedanā vedanākkhandho, saññā saññākkhandho, phassādikā saṅkhārakkhandho. Evametesam pañcannaṃ khandhānaṃ samavāye ālokanavilokanaṃ paññāyati. Tattha ko eko āloketi, ko viloketi? Tathā cakkhu cakkhāyatanam, rūpaṃ rūpāyatanam, dassanaṃ manāyatanam, vedanādayo sampayuttadhammā dhammāyatanam. Evametesam catunnaṃ āyatanānaṃ samavāye ālokanavilokanaṃ paññāyati. Tattha ko eko āloketi, ko viloketi? Tathā cakkhu cakkhudhātu, rūpaṃ rūpadhātu, dassanaṃ cakkhuvinnādhātu, taṃsampayuttā vedanādayo dhammadhātu. Evametasam catunnaṃ dhātūnaṃ samavāye ālokanavilokanaṃ paññāyati. Tattha ko eko āloketi, ko viloketi? Tathā cakkhu nissayapaccayo, rūpaṃ ārammaṇapaccayo, āvajjanaṃ anantarasamanantarūpanissayanatthivigatapaccayo, āloko upanissayapaccayo vedanādayo sahaḷāpaccayo. Evametesam paccayānaṃ samavāye ālokanavilokanaṃ paññāyati. Tattha ko eko āloketi, ko viloketi? Evamettha khandhāyatanadhātupaccayapaccavekkhaṇavasenapi asammosampajaññaṃ veditaḅbaṃ.

Samiñjite pasāriteti pabbānaṃ samiñjanapasāraṇe. Tattha cittavaseneva samiñjanapasāraṇaṃ akatvā hatthapādānaṃ samiñjanapasāraṇapaccayā atthānatthaṃ pariggahetvā atthapariggahaṇaṃ sātthakasampajaññaṃ. Tattha hatthapāde aticiraṃ samiñjetvā pasāretvā eva vā ʒhitassa khaṇe khaṇe vedanā uppajjanti, cittaṃ ekaggaṃ na labhati, kammaṭṭhānaṃ paripatati, viśesaṃ nādhigacchati. Kāle samiñjentassa kāle pasārentassa pana tā vedanā na uppajjanti, cittaṃ ekaggaṃ hoti, kammaṭṭhānaṃ phātiṃ gacchati, viśesamadhigacchatīti evaṃ atthānatthapariggahaṇaṃ veditaḅbaṃ.

Atthe pana satipi sappāyāsappāyaṃ pariggaṇhitvā sappāyapariggahaṇaṃ sappāyasampajaññaṃ. Tatrāyaṃ nayo – mahācetiyaṅgaṇe kira daharabhikkhū sajjhāyaṃ gaṇhanti. Tesam piṭṭhipasse daharabhikkhuniyo dhammaṃ suṇanti. Tatreko daharo hatthaṃ pasārento kāyasaṃsaggaṃ patvā teneva kāraṇena gihī jāto. Aparopi bhikkhu pādaṃ pasārento aggimhi pasāresi, atṭhiṃ āhacca pādo jhāyi. Aparo vammike pasāresi, so āsīvisena daṭṭho. Aparo cīvarakuṭidaṇḍake pasāresi, taṃ maṇisappo ḍaṃsi. Tasmā evarūpe asappāye pasāretvā sappāye pasāretabbaṃ. Idamettha sappāyasampajaññaṃ.

Gocarasampajaññaṃ pana mahātheravattunā dīpetabbaṃ – mahāthero kira divāṭṭhāne nisinno antevāsikehi saddhiṃ kathayamāno sahasā hatthaṃ samiñjetvā puna yathāṭṭhāne ʒhapetvā saṅikaṃ samiñjesi. Taṃ antevāsikā pucchimṃsu “kasmā bhante sahasā hatthaṃ samiñjetvā puna yathāṭṭhāne ʒhapetvā saṅikaṃ samiñjayitthā”ti. Yato paṭṭhāyāhaṃ, āvuso, kammaṭṭhānaṃ manasikātuṃ āraddho, na me kammaṭṭhānaṃ muñcitvā hattho samiñjitapubbo, idāni pana tumhehi saddhiṃ kathayamānena kammaṭṭhānaṃ muñcitvā samiñjito, tasmā puna yathāṭṭhāne ʒhapetvā samiñjesinti. Sādhu, bhante, bhikkhunā nāma evarūpena bhavitābanti. Evametthāpi kammaṭṭhānavijahanameva gocarasampajaññanti veditaḅbaṃ.

Abbhantare attā nāma koci samiñjento vā pasārento vā natthi. Vuttappakāracittakiriyavāyodhātuvipphārena pana suttakaḍḍhanavasena dāruyantassa hatthapādalaḷanaṃ viya samiñjanapasāraṇaṃ hotīti evaṃ parijānanaṃ panettha asammosampajaññanti veditaḅbaṃ.

Saṅghātipattacīvaradhāraṇeti ettha saṅghāticīvarānaṃ nivāsanapārūpanavasena pattassa bhikkhāpaṭiggahaṇādivasena paribhogo dhāraṇaṃ nāma. Tattha saṅghāticīvaradhāraṇe tāva nivāsetvā pārūpitvā ca piṇḍāya carato āmisalābho “sītassa paṭighātāyā”tiādinā nayena bhagavatā vuttappakāroyeva ca attho attho nāma. Tassa vasena sātthakasampajaññaṃ veditaḅbaṃ.

Uṇhapakatikassa pana dubbalassa ca cīvaraṃ sukhumaṃ sappāyaṃ. Sītālukassa ghaṇaṃ dupaṭṭaṃ. Viparītaṃ asappāyaṃ. Yassa kassaci jiṇṇaṃ asappāyameva. Aggaḷādīdāne hissa taṃ palibodhakaraṃ hoti. Tathā paṭṭunṇadukūlādibhedam lobhanīyacīvaraṃ. Tādīsāñhi araṇṇe ekakassa nivāsantarāyakaraṃ jīvitantarāyakaraṃ vāpi hoti. Nippariyāyena pana yaṃ nimittakammādimicchājīvavasena uppannaṃ, yañcassa sevamānassa akusalā dhammā abhivaḍḍhanti, kusalā dhammā parihāyanti, taṃ asappāyaṃ. Viparītaṃ

sappāyaṃ. Tassa vasenettha sappāyasampajaññaṃ, kammaṭṭhānāvijahanavaseneva ca gocarasampajaññaṃ veditabbaṃ.

Abbhantare attā nāma koci cīvaraṃ pārupanto natthi. Vuttappakāracittakiriyavāyodhātuvipphārenea pana cīvarapārupanaṃ hoti. Tattha cīvarampi acetanaṃ, kāyopi acetano. Cīvaraṃ na jānāti “mayā kāyo pāruto”ti. Kāyopi na jānāti “ahaṃ cīvarena pāruto”ti, dhātuyova dhātusamūhaṃ paṭicchādenti paṭapilotikāya potthakarūpapaṭicchādane viya. Tasmā neva sundaraṃ cīvaraṃ labhitvā somanassaṃ kātappaṃ, na asundaraṃ labhitvā domanassaṃ. Nāgavammikacetiyaṃ hi keci mālāgandhadhūmavattadhāni sakkāraṃ karonti, keci gūthamuttakaddamaṇḍasatthappahārādhi asakkāraṃ, na te nāgavammikarukkhadayo somanassaṃ vā domanassaṃ vā karonti; evameva neva sundaraṃ cīvaraṃ labhitvā somanassaṃ kātappaṃ, na asundaraṃ labhitvā domanassaṃ evaṃ pavattapaṭisaṅkhānāvasena panettha asammohasampajaññaṃ veditabbaṃ.

Pattadhāraṇepi pattaṃ sahasāva aggahetvā imaṃ gahetvā piṇḍāya caramāno bhikkhaṃ labhissāmīti evaṃ pattagahaṇapaccayā paṭilabhitabbaṃ sātthakasampajaññaṃ veditabbaṃ.

Kisadubbalaṣārassa pana garu patto asappāyo. Yassa kassaci catupaṇcagaṇḍikāhato dubbisodhanīyo asappāyova. Duddhotapatto hi na vaṭṭati, taṃ dhovantasseva cassa palibodho hoti. Maṇivaṇṇapatto pana lobhanīyo cīvare vuttanayeneva asappāyo. Nimittakammādivasena laddho pana yañcassa sevamānassa akusalā dhammā abhivaḍḍhanti, kusalā dhammā parihāyanti, ayaṃ ekantaasappāyova. Viparīto sappāyo. Tassa vasenettha sappāyasampajaññaṃ, kammaṭṭhānāvijahanavaseneva ca gocarasampajaññaṃ veditabbaṃ.

Abbhantare attā nāma koci pattaṃ gaṇhanto natthi. Vuttappakāracittakiriyavāyodhātuvipphārenea pana pattagahaṇaṃ nāma hoti. Tattha pattaṃ acetano, hatthāpi acetanā. Patto na jānāti “ahaṃ hatthehi gahito”ti. Hatthāpi na jānāti “pattaṃ amhehi gahito”ti. Dhātuyova dhātusamūhaṃ gaṇhanti saṇḍāsena aggivaṇṇapattagahaṇe viyāti evaṃ pavattapaṭisaṅkhānāvasenettha asammohasampajaññaṃ veditabbaṃ.

Apica yathā chinnahatthapāde vaṇamukhehi paggharitaṃ pubbalohitakimikule nīlamakkhikasamparikiṇṇe anāthasālāyaṃ nīpanne anāthamanusse disvā dayālukā purisā tesam vaṇapaṭṭaṇṇakāni ceva kapālādhi ca bhesajjāni upanāmenti. Tattha ṇṇakāni kesaṇci saṇhāni, kesaṇci thūlāni pāpuṇanti. Bhesajjakapālāni kesaṇci susaṇhāni, kesaṇci dussaṇhāni pāpuṇanti, na te tattha sumanā vā dummanā vā honti. Vaṇapaṭṭaṇṇamatteneva hi ṇṇakāni bhesajjapaṭṭaṇṇamatteneva ca kapālāni tesamattā, evameva yo bhikkhu vaṇapaṭṭaṇṇamatteneva viya cīvaraṃ, bhesajjakapālāni viya pattaṃ, kapāle bhesajjamiva ca patte laddhaṃ bhikkhaṃ sallakkheti. Ayaṃ saṅghāṭipattacīvaradhāraṇe asammohasampajaññaṃ uttamasampajānākarīti veditabbo.

Asitādīsu **asiteti** piṇḍapātabhojane. **Piteti** yāguādiṇā. **Khāyiteti** piṭṭhakkhāyādikādhāne. **Sāyiteti** madhuphāṇitādisāyane. Tattha “neva davāyā”tiādīni nāyena vutto aṭṭhavidhāni attho attho nāma. Tassa vasena sātthakasampajaññaṃ veditabbaṃ. Lūkhapaṇṇatittamadhurādīsu pana yena bhojanena yassa aphāsu hoti, taṃ tassa asappāyaṃ. Yaṃ pana nimittakammādivasena paṭiladdhaṃ, yañcassa bhuñjato akusalā dhammā abhivaḍḍhanti, kusalā dhammā parihāyanti, taṃ ekantaasappāyameva. Viparītaṃ sappāyaṃ. Tassa vasenettha sappāyasampajaññaṃ, kammaṭṭhānāvijahanavaseneva ca gocarasampajaññaṃ veditabbaṃ.

Abbhantare attā nāma koci bhuñjako natthi, vuttappakāracittakiriyavāyodhātuvipphāravaseneva pana pattapaṭṭaṇṇaṃ nāma hoti. Cittakiriyavāyodhātuvipphārenea hatthassa patte oṭṭaṇṇaṃ nāma hoti. Cittakiriyavāyodhātuvipphārenea ālopakāraṇaṃ ālopaudharaṇaṃ mukhavivaraṇaṇca hoti. Na koci kuṇḍikāya yantakena ca hanukaṭṭhīni vivarati, cittakiriyavāyodhātuvipphārenea ālopassa mukhe ṭṭhānaṃ, uparidantānaṃ musalakkiccasādhanaṃ, heṭṭhādantānaṃ udukkhalakkiccasādhanaṃ, jivhāya hatthakkiccasādhanaṇca hoti.

Iti taṃ tattha aggajivhāya tanukakheḷo mūlajivhāya bahalakheḷo makkheti. Taṃ heṭṭhādantaudukkhalo jivhāhatthaparivattitaṃ kheḷaudakatemitāṃ uparidantamusalasaṇcunṇitaṃ koci kaṭacchunā vā dabbīyā vā antopavesento nāma natthi, vāyodhātuyāva pavisati. Pavittānaṃ pavittānaṃ koci palālasantharaṃ katvā dhārento nāma natthi, vāyodhātuyāva pavisati. Thitaṃ thitaṃ koci uddhanaṃ katvā aggim jāletvā pacanto nāma natthi, tejodhātuyāva paccati. Pakkaṃ pakkaṃ koci daṇḍena vā yaṭṭhiyā vā bahi nīhāraṇo nāma natthi,

vāyodhātuyeva nīharati.

Iti vāyodhātu atiharati ca vītiharati ca dhāreti ca parivatteti ca sañcuññeti visoseti ca nīharati ca. Pathavīdhātu dhāreti ca parivatteti ca sañcuññeti ca visoseti ca. Āpodhātu sineheti ca allattañca anupāleti. Tejodhātu antopaviṭṭhaṃ paripāceti. Ākāsadhātu añjaso hoti. Viññādhātu tattha tattha sammāpayogamanvāya ābhujatīti evaṃpavattapaṭisañkhānavasenettha asammohasampajaññaṃ veditabbaṃ.

Apica gamanato pariyesanato paribhogato āsayato nidhānato aparipakkato paripakkato phalato nissandato sammakkhaṇatoti evaṃ dasavidhapaṭikūlabhāvapaccavekkhaṇatopettha asammohasampajaññaṃ veditabbaṃ. Vitthārakathā panettha **visuddhimagge** āhārapaṭikūlasaññāniddesato gahetabbā.

Uccārapassāvakkammeti uccārassa ca passāvassa ca karaṇe. Tattha pattakāle uccārapassāvaṃ akarontassa sakalasarīrato sedā muccanti, akkhīni bhamanti, cittaṃ na ekaggaṃ hoti, aññe ca rogā uppajjanti. Karontassa pana sabbaṃ taṃ na hotīti ayamettha attho. Tassa vasena sātthakasampajaññaṃ veditabbaṃ. Aṭṭhāne uccārapassāvaṃ karontassa pana āpatti hoti, ayaso vaḍḍhati, jīvitantarāyo hoti. Patirūpe ṭhāne karontassa sabbaṃ taṃ na hotīti idamettha sappāyaṃ. Tassa vasena sappāyasampajaññaṃ, kammatṭhānavijahanavaseneva ca gocarasampajaññaṃ veditabbaṃ.

Abbhantare attā nāma koci uccārapassāvaṃ karonto natthi. Cittakiriyaṃ vāyodhātuvipphāreṇeva pana uccārapassāvakkammaṃ hoti. Yathā pana pakke gaṇḍe gaṇḍabhedena pubbalohitaṃ akāmatāya nikkhamati, yathā ca atibharitā udakabhājanā udakaṃ akāmatāya nikkhamati, evaṃ pakkāsayamuttavattḥisu sannicitā uccārapassāvā vāyuvegasamuppilīta akāmatāyapi nikkhamanti. So panāyaṃ evaṃ nikkhamanto uccārapassāvo neva tassa bhikkhuno attano hoti, na parassa. Kevalaṃ sarīranissandova hoti. Yathā kiṃ? Yathā udakakumbhato purāṇaudakaṃ chaḍḍentassa neva taṃ attano hoti, na paresaṃ. Kevalaṃ paṭijjaggaṇamattameva hoti. Evāṃpavattapaṭisañkhānavasenettha asammohasampajaññaṃ veditabbaṃ.

Gatādīsu **gate**ti gamane. **Ṭhiteti** ṭhāne. **Nisinneti** nisajjāya. **Sutteti** sayane. **Jāgariteti** jāgaraṇe. **Bhāsiteti** kathane. **Tuṇhībhave**ti akathane. “Gacchanto vā gacchāmīti pajānāti, ṭhito vā ṭhitomhīti pajānāti, nisinno vā nisinnomhīti pajānāti, sayāno vā sayānomhīti pajānāti”ti imasmiñhi ṭhāne addhānairiyāpathā kathitā. “Abhikkante paṭikkante ālokite vilokite samiñjite pasārīte”ti imasmiṃ majjhimā. “Gate ṭhite nisinne sutte jāgarite”ti idha pana khuddakacuññikairiyāpathā kathitā. Tasmā etesupi vuttanayeneva sampajānakārītā veditabbā.

Tipiṭakamahāsīvatthero panāha – yo ciraṃ gantvā vā caṅkamitvā vā aparabhāge ṭhito iti paṭisañcikkhati “caṅkamanakāle pavattā rūpārūpadhammā ettheva niruddhā”ti, ayaṃ **gate sampajānakārī** nāma. Yo sajjhāyaṃ vā karonto pañhaṃ vā vissajjento kammatṭhānaṃ vā manasikaronto ciraṃ ṭhatvā aparabhāge nisinno iti paṭisañcikkhati “ṭhitakāle pavattā rūpārūpadhammā ettheva niruddhā”ti, ayaṃ **ṭhite sampajānakārī** nāma. Yo sajjhāyādikaraṇavaseneva ciraṃ nisīditvā aparabhāge nipanno iti paṭisañcikkhati “nisinnakāle pavattā rūpārūpadhammā ettheva niruddhā”ti, ayaṃ **nisinne sampajānakārī** nāma. Yo pana nipannako sajjhāyaṃ vā karonto kammatṭhānaṃ vā manasikaronto niddaṃ okkamitvā aparabhāge vuṭṭhāya iti paṭisañcikkhati “sayanakāle pavattā rūpārūpadhammā ettheva niruddhā”ti, ayaṃ **sutte jāgarite ca sampajānakārī** nāma. Kiriyaṃyacittānañhi appavattaṃ suttāṃ nāma, pavattaṃ jāgaritaṃ nāmāti. Yo pana bhāsamāno “ayaṃ saddo nāma oṭṭhe ca paṭicca dante ca jivhañca tāluñca paṭicca cittassa tadanurūpaṃ payogaṃ paṭicca jāyatī”ti sato sampajāno bhāsati, ciraṃ vā pana kālaṃ sajjhāyaṃ vā katvā dhammaṃ vā kathetvā kammatṭhānaṃ vā parivattetvā pañhaṃ vā vissajjetvā aparabhāge tuṇhībhūto iti paṭisañcikkhati “bhāsitaṅkāle uppannā rūpārūpadhammā ettheva niruddhā”ti, ayaṃ **bhāsīte sampajānakārī** nāma. Yo tuṇhībhūto ciraṃ dhammaṃ vā kammatṭhānaṃ vā manasikatvā aparabhāge iti paṭisañcikkhati “tuṇhībhūtakāle pavattā rūpārūpadhammā ettheva niruddhā, upādārūpapavattiyā sati **bhāsati** nāma, asati **tuṇhī bhavati** nāmā”ti, ayaṃ **tuṇhībhave sampajānakārī** nāmāti.

Tayidaṃ mahāsīvattherena vuttaṃ asammohadhuraṃ imasmiṃ **satipaṭṭhānasutte** adhippetāṃ. **Sāmaññaphale** pana sabbampi catubbidhaṃ sampajaññaṃ labbhati. Tasmā visesato ettha asammohasampajaññasseva vasena sampajānakārītā veditabbā. Sampajānakārī sampajānakārīti ca sabbapadesu satisampayuttasseva sampajaññassa vasenattho veditabbo. **Vibhaṅgappakaraṇe** pana, “sato sampajāno

abhikkamati, sato sampajāno paṭikkamati’’ti (vibha. 523) evametāni padāni vibhattāneva.

Iti ajjhataṃ vāti evaṃ catusampajāññapariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati. Idha **samudayavayadhammānupassī**tiādīsu rūpakkhandhasseva samudayo ca vayo ca nīharitabbo. Sesam vuttasadisameva.

Idha catusampajāññapariggāhikā sati dukkhasaccam, tassā samuṭṭhāpikā purimataṅhā samudayasaccam, ubhinnaṃ appavatti nirodhasaccam, vuttappakāro ariyamaggo maggasaccam. Evaṃ catusaccavasena ussakkivā nibbutiṃ pāpuṇātīti idamekassa catusampajāññapariggāhakassa bhikkhuno vasena yāva arahattā niyyānamukhanti.

Catusampajāññapabbavaṇṇanā niṭṭhitā.

Paṭikūlamanasikārapabbavaṇṇanā

110. Evaṃ catusampajāññavasena kāyānupassanaṃ vibhajitvā idāni paṭikūlamanasikāravasena vibhajitum **puna caparanti**tiādīmāha. Tattha **imameva kāyanti**tiādīsu yaṃ vattabbaṃ siyā, taṃ sabbaṃ sabbākārena vitthārato **visuddhimagge** kāyagatāsaticammaṭṭhāne vuttaṃ. **Ubhatomukhāti** heṭṭhā ca upari cāti dvīhi mukhehi yuttā. **Nānāvihitassāti** nānāvīdhassa.

Idaṃ panettha opammasaṃsandanaṃ – ubhatomukhā putoli viya hi cātumahābhūṭiko kāyo, tattha missetvā pakkhittanānāvīdhadhaññaṃ viya kesādayo dvattiṃsākārā, cakkhumā puriso viya yogāvacarō, tassa taṃ putoliṃ muñcitvā paccavekkhato nānāvīdhadhaññassa pākāṭakālo viya yogino dvattiṃsākārassa vibhūṭākāro veditabbo.

Iti ajjhataṃ vāti evaṃ kesādiapariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati, ito paraṃ vuttanayameva. Kevalaṅhi idha dvattiṃsākārapariggāhikā sati dukkhasaccanti evaṃ yojanaṃ katvā niyyānamukhaṃ veditabbaṃ. Sesam purimasadisamevāti.

Paṭikūlamanasikārapabbavaṇṇanā niṭṭhitā.

Dhātumanasikārapabbavaṇṇanā

111. Evaṃ paṭikūlamanasikāravasena kāyānupassanaṃ vibhajitvā idāni dhātumanasikāravasena vibhajitum **puna caparanti**tiādīmāha. Tatrāyaṃ opammasaṃsandanaṃ saddhiṃ atthavaṇṇanā – yathā koci goghātako vā tasseva vā bhattavetanabhato antevāsiko gāviṃ vadhitvā vinivijjhivā catasso disā gatānaṃ mahāpathānaṃ vemajjhāṭṭhānaṃsaṅkhāte catumahāpathe koṭṭhāsaṃ koṭṭhāsaṃ katvā nisinna assa, evameva bhikkhu catunnaṃ iriyāpathānaṃ yena kenaci ākārena ṭhitattā yathāṭṭhitam, yathāṭṭhitattā ca yathāpaṇihitam kāyaṃ – “atthi imasmiṃ kāye pathavīdhātu...pe... vāyodhātū’’ti evaṃ paccavekkhati.

Kim vuttaṃ hoti – yathā goghātakassa gāviṃ posentassāpi āghātanaṃ āharantassāpi āharitvā tattha bandhitvā ṭhapentassāpi vadhentassāpi vadhitam matam passantassāpi tāvadeva gāvīti saññā na antaradhāyati, yāva naṃ padāletvā bīlaso na vibhajati. Vibhajitvā nisinnassa pana gāvīti saññā antaradhāyati, maṃsasaññā pavattati, nāssa evaṃ hoti “ahaṃ gāviṃ vikkiṇāmi, ime gāviṃ haranti’’ti. Atha khvassa “ahaṃ maṃsaṃ vikkiṇāmi, ime maṃsaṃ haranti’’ccea hoti, evameva imassāpi bhikkhuno pubbe bālaputhujjanakāle gihbhūṭassāpi pabbajitassāpi tāvadeva sattoti vā puggaloti vā saññā na antaradhāyati, yāva imameva kāyaṃ yathāṭṭhitam yathāpaṇihitam ghanavinibbhogaṃ katvā dhātuso na paccavekkhati. Dhātuso paccavekkhato panassa sattasaññā antaradhāyati, dhātuvaseṇeva cittaṃ santiṭṭhati. Tenāha bhagavā – “imameva kāyaṃ yathāṭṭhitam yathāpaṇihitam dhātuso paccavekkhati, atthi imasmiṃ kāye pathavīdhātu āpodhātu tejjodhātu vāyodhātūti. Seyyathāpi, bhikkhave, dakkho goghātako vā...pe... vāyodhātū’’ti.

Goghātako viya hi yogī, gāvīti saññā viya sattasaññā, catumahāpatho viya catuiriyāpatho, bīlaso vibhajitvā nisinnabhāvo viya dhātuso paccavekkhanti ayamettha pāḷivaṇṇanā, kammaṭṭhānakathā pana **visuddhimagge** vitthāritā.

Iti ajjhataṃ vāti evaṃ catudhātupariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati. Ito paraṃ vuttanayameva. Kevalañhi idha catudhātupariggāhikā sati dukkhasaccanti evaṃ yojanaṃ katvā niyyānamukhaṃ veditabbaṃ. Sesam purimasadisamevāti.

Dhātumanasikārapabbavaṇṇanā niṭṭhitā.

Navasivathikapabbavaṇṇanā

112. Evaṃ dhātumanasikāravasena kāyānupassanaṃ vibhajitvā idāni navahi sivathikapabbehi vibhajitum, **puna caparantiādimāha.** Tattha **seyyathāpi passeyyāti** yathā passeyya. **Sarīranti** matasarīraṃ. **Sivathikāya chaddīti** susāne apaviddhaṃ. Ekāhaṃ matassa assāti **ekāhamataṃ.** Dvīhaṃ matassa assāti **dvīhamataṃ.** Tīhaṃ matassa assāti **tīhamataṃ.** Bhastā viya vāyunā uddhaṃ jīvitapariyādānā yathānukkamaṃ samuggatena sūnabhāvena uddhumātattā **uddhumātakaṃ.** Vinīlaṃ vuccati viparibhinnavaṇṇaṃ. Vilīnameva **vinīlakaṃ.** Paṭikūlattā vā kucchitaṃ vinīlanti **vinīlakaṃ.** Maṃsussadaṭṭhānesu rattavaṇṇassa pubbasannicayaṭṭhānesu setavaṇṇassa yebhuyyena ca nīlavaṇṇassa nīlaṭṭhānesu nīlasāṭṭakapārutasseva chavasarīrassetaṃ adhivacanaṃ. Paribhinnaṭṭhānehi navahi vā vaṇamukhehi visandamaṇaṃ pubbaṃ vipubbaṃ. Vipubbameva **vipubbakaṃ,** paṭikūlattā vā kucchitaṃ vipubbanti **vipubbakaṃ.** Vipubbakaṃ jātaṃ tathābhāvaṃ gatanti **vipubbakajātaṃ.**

So imameva kāyanti so bhikkhu imaṃ attano kāyaṃ tena kāyena saddhiṃ ñāṇena upasaṃharati upaneti. Kathaṃ? Ayampi kho kāyo evaṃdhammo evaṃbhāvī evaṃanattitoti. Idaṃ vuttaṃ hoti – āyu, usmā, viññāṇanti imesaṃ tiṇṇaṃ dhammaṇaṃ atthitāya ayaṃ kāyo ṭhānagamaṇādikhāmo hoti imesaṃ pana vigamā ayampi evaṃdhammo evaṃpūtikasabhāvoyeva, **evaṃbhāvī** evaṃuddhumātādibhedo bhavissati, **evaṃanattito** evaṃuddhumātādibhāvaṃ anatikkantoti.

Iti ajjhataṃ vāti evaṃ uddhumātādipariggahaṇena attano vā kāye, parassa vā kāye, kālena vā attano, kālena vā parassa kāye kāyānupassī viharati.

Khajjamānanti udarādīsu nisīditvā udaramaṃsaoṭṭhamamaṃsaakkhikūṭādīni luñcitvā luñcitvā khādiyamaṇaṃ. **Samaṃsalohitanti** sesāvasesamaṃsalohitayuttaṃ. **Nimaṃsalohitamakkhitanti** maṃse khīnēpi lohitaṃ na sussati, taṃ sandhāya vuttaṃ “nimaṃsalohitamakkhita”nti. **Aññenāti** aññena disābhāgena. **Hatthaṭṭhikanti** catusaṭṭhibhedampi hatthaṭṭhikaṃ paṭiyekkaṃ vippakiṇṇaṃ. **Pādaṭṭhikādīsupi** eseva nayo. **Terovassikānīti** atikkantasamvaccharāni. **Pūtīnīti** abbhokāse ṭhitāni vātātapavutṭhisamphassena terovassikāneva pūtīni hontī. Antobhūmigatāni pana cirataraṃ tiṭṭhanti. **Cuṇṇakajātānīti** cuṇṇaṃ cuṇṇaṃ hutvā vippakiṇṇāni. Sabbattha so imamevāti vuttanayena khajjamānādīnaṃ vasena yojanā kātabbā.

Iti ajjhataṃ vāti evaṃ khajjamānādipariggahaṇena yāva cuṇṇakabhāvā attano vā kāye, parassa vā kāye, kālena vā attano, kālena vā parassa kāye kāyānupassī viharati.

Idha pana ṭhatvā navasivathikā samodhānetabbā. “Ekāhamataṃ vā”tiādīnā nayena vuttā sabbāpi ekā, “kākehi vā khajjamāna”ntiādīkā ekā, “aṭṭhikasankhalikaṃ samaṃsalohitaṃ nhārusambandha”nti ekā, “nimaṃsalohitamakkhitaṃ nhārusambandha”nti ekā, “apagatamaṃsalohitaṃ nhārusambandha”nti ekā, “aṭṭhikāni apagatasambandhānī”tiādīkā ekā, “aṭṭhikāni setāni saṅkhavaṇṇapaṭibhāgānī”ti ekā, “puñjakitāni terovassikānī”ti ekā, “pūtīni cuṇṇakajātānī”ti ekā.

Evaṃ kho, bhikkhveti idaṃ navasivathikā dassetvā kāyānupassanaṃ niṭṭhapento āha. Tattha navasivathikapariggāhikā sati dukkhasaccaṃ, tassā samuṭṭhāpikā purimataṇhā samudayasaccaṃ, ubhinnaṃ appavattī nirodhasaccaṃ, dukkhariparījānanaṃ samudayapajāhano nirodhārammaṇo ariyamaggo maggasaccaṃ. Evaṃ catusaccavaseneva ussakkivā nibbutiṃ pāpuṇātīti idaṃ navasivathikapariggāhakānaṃ bhikkhūnaṃ yāva arahattā niyyānamukhanti.

Navasivathikapabbavaṇṇanā niṭṭhitā.

Ettāvata ca ānāpānapabbaṃ iriyāpathapabbaṃ catusampajāññapabbaṃ paṭikūlamanasikārapabbaṃ dhātumanasikārapabbaṃ navasivathikapabbānīti cuddasapabbā kāyānupassanā niṭṭhitā hoti.

Tattha ānāpānappabbaṃ paṭikūlamanasikārapabbanti imāneva dve appanākammatṭhānāni. Sivathikānaṃ pana ādīnavānupassanāvasena vuttattā sesāni dvādasāpi upacārakammatṭhānānevāti.

Kāyānupassanā niṭṭhitā.

Vedanānupassanāvaṇṇanā

113. Evaṃ bhagavā cuddasavidhena kāyānupassanāsatipaṭṭhānaṃ kathetvā idāni navavidhena vedanānupassanaṃ kathetuṃ **kathaṅca, bhikkhavi**tiādimāha. Tattha **sukhaṃ vedananti** kāyikaṃ vā cetasikaṃ vā sukhaṃ vedanaṃ vedayamāno “ahaṃ sukhaṃ vedanaṃ vedayāmi”ti pajānāti attho. Tattha kāmaṃ uttānaseyyakāpi dāraḷaṃ thaṅṅāpivanādikāle sukhaṃ vedayamānā “sukhaṃ vedayāmi”ti pajānanti, na panetaṃ evarūpaṃ jānanaṃ sandhāya vuttaṃ. Evarūpaṃ jānanaṃ hi sattūpaladdhiṃ na jahati, sattasaṅṅhaṃ na ugghāṭeti, kammatṭhānaṃ vā satipaṭṭhānabhāvanā vā na hoti. Imassa pana bhikkhuno jānanaṃ sattūpaladdhiṃ jahati, sattasaṅṅhaṃ ugghāṭeti, kammatṭhānaṃ ceva satipaṭṭhānabhāvanā ca hoti. Idaṅhi “ko vedayati, kassa vedanā, kiṃ kāraṇā vedanā”ti evaṃ sampajānavediyaṇaṃ sandhāya vuttaṃ.

Tattha **ko vedayatīti** na koci satto vā puggalo vā vedayati. **Kassa vedanāti** na kassaci sattassa vā puggalassa vā vedanā. **Kiṃ kāraṇā vedanāti** vatthuārammaṇāva panassa vedanā. Tasmā esa evaṃ pajānāti – “taṃ taṃ sukhādīnaṃ vatthuṃ ārammaṇaṃ katvā vedanāva vedayati. Taṃ pana vedanāpavattiṃ upādāya ‘ahaṃ vedayāmi’ti vohāramattaṃ hoti”ti. Evaṃ vedanāva vatthuṃ ārammaṇaṃ katvā vedanāva vedayatīti sallakkhento esa “sukhaṃ vedanaṃ vedayāmi”ti pajānāti veditabbo. Cittalapabbate aññataro therō viya. Thero kira aphāsukakāle balavavedanāya nitthunanto aparāparaṃ parivattati. Tameko daharo āha “kataraṃ vo, bhante, thānaṃ rujjati”ti. Āvuso, pāṭiyekkaṃ rujjanaṭṭhānaṃ nāma natthi, vatthuṃ ārammaṇaṃ katvā vedanāva vedayatīti. Evaṃ jānanakālaṭo paṭṭhāya adhiṅvāsetuṃ vaṭṭati no, bhanteti. Adhiṅvāsemi āvusoti. Adhiṅvāsanā, bhante, seyyāti. Thero adhiṅvāsesi. Tato vāto yāva hadayā phālesi, maṅcake antāni rāsikatāni ahesuṃ. Thero daharassa dassesi “vaṭṭatāvuso, ettakā adhiṅvāsanā”ti. Daharo tuṅṅhi ahoṣi. Thero vīriyasamataṃ jojetvā saha paṭisambhidāhi arahattaṃ pāpuṇitvā samasīsī hutvā parinibbāyi.

Yathā ca sukhaṃ, evaṃ dukkhaṃ...pe... nirāmiṣaṃ adukkhamasukhaṃ vedanaṃ vedayamāno “nirāmiṣaṃ adukkhamasukhaṃ vedanaṃ vedayāmi”ti pajānāti. Iti bhagavā rūpakammatṭhānaṃ kathetvā arūpakammatṭhānaṃ kathento vedanāvasena kathesi. Duvidhaṅhi kammatṭhānaṃ rūpakammatṭhānaṅca arūpakammatṭhānaṅca. Rūpariṅggaḷo arūpariṅggaḷhotipi etadeva vuccati. Tattha bhagavā rūpakammatṭhānaṃ kathento saṅkhepamanasikāraṅvasena vā vitthāramanasikāraṅvasena vā catudhātuvavattṭhānaṃ kathesi. Tadubhayampi sabbākāraṭo **visuddhimagge** dassitameva.

Arūpakammatṭhānaṃ pana kathento yebhuyyena vedanāvasena katheti. Tividho hi arūpakammatṭhāne abhiniveso phassavasena vedanāvasena cittavasenāti. Kathaṃ? Ekaccassa hi saṃkhittena vā vitthārena vā pariṅggaḷite rūpakammatṭhāne tasmīṃ ārammaṅce cittacetasikānaṃ paṭhamābhiniṅpāto taṃ ārammaṅca phusanto uppajjamaṅno phasso pākāto hoti. Ekaccassa taṃ ārammaṅca anubhavanti uppajjamaṅnā vedanā pākāṭa hoti. Ekaccassa taṃ ārammaṅca pariṅggaḷetvā vijānantaṃ uppajjamaṅnaṃ viññāṅca pākāṭaṃ hoti. Tattha yassa phasso pākāto hoti, sopi “na kevalaṃ phassoṅva uppajjati, tena saddhiṃ tadeva ārammaṅca anubhavamaṅnā vedanāpi uppajjati, saṅjānanaṅmaṅnā saṅṅāpi, cetayamaṅnā cetanāpi, vijānanaṅmaṅnaṃ viññāṅca uppajjati”ti phassapaṅcamakeyeva pariṅggaḷhāti. Yassa vedanā pākāṭa hoti. So “na kevalaṃ vedanāṅva uppajjati, tāya saddhiṃ tadevārammaṅca phusamaṅno phassopi uppajjati, saṅjānanaṅmaṅnā saṅṅāpi, cetayamaṅnā cetanāpi, vijānanaṅmaṅnaṃ viññāṅca uppajjati”ti phassapaṅcamakeyeva pariṅggaḷhāti. Yassa viññāṅca pākāṭaṃ hoti, so “na kevalaṃ viññāṅca uppajjati, tena saddhiṃ tadevārammaṅca phusamaṅno phassopi uppajjati, anubhavamaṅnā vedanāpi, saṅjānanaṅmaṅnā saṅṅāpi, cetayamaṅnā cetanāpi uppajjati”ti phassapaṅcamakeyeva pariṅggaḷhāti.

So “ime phassapaṅcamakā dhammā kiṃ nissitā”ti upadhārento “vatthuṃ nissitā”ti pajānāti. Vatthu nāma karajakāyo, yaṃ sandhāya vuttaṃ “idaṅca me viññāṅca ettha sitaṃ ettha paṭibaddha”nti (dī. ni. 1.234,235; ma. ni. 2.252). So atthato bhūtāni ceva upādārūpāni ca. Evamettha “vatthu rūpaṃ, phassapaṅcamakā nāma”nti nāmarūpamattameva passati. Rūpaṃ cettha rūpakkaḷandho, nāmaṃ cattāro arūpino kkaḷandhāti paṅcakkkaḷandhamattaṃ hoti. Nāmarūpavinimuttā hi paṅcakkkaḷandhā, paṅcakkkaḷandhavinimuttāṅca

nāmarūpaṃ natthi.

So “ime pañcakkhandhā kiṃ hetukā”ti upaparikkhanto “avijjādihetukā”ti passati. Tato paccayo ceva paccayuppannañca idaṃ, añño satto vā puggalo vā natthi, suddhasaṅkhārapuñjamattamevāti sappaccayanāmarūpavasena tilakkhaṇaṃ āropetvā vipassanāpaṭipāṭiyā “aniccaṃ dukkhaṃ anattā”ti sammasanto vicarati.

So “ajja ajjā”ti paṭivedhaṃ ākaṅkhamāno tathārūpe divase utusappāya puggalasappāya bhojanasappāya dhammassavanasappāyaṃ labhivā ekapallaṅkena nisinnō vipassanaṃ matthakaṃ pāpetvā arahatte paṭiṭṭhāti. Evaṃ imesampi tiṇṇaṃ janānaṃ yāva arahattā kammaṭṭhānaṃ kathitaṃ hoti.

Idha pana bhagavā arūpakammaṭṭhānaṃ kathento vedanāvasena kathesi. Phassavasena vā hi viññānavasena vā kathīyamānaṃ na pākaṭaṃ hoti, andhakāraṃ viya khāyati. Vedanāvasena pana pākaṭaṃ hoti. Kasmā? Vedanānaṃ uppattipākaṭatāya. Sukhadukkhavedanānañhi uppatti pākaṭā. Yadā sukhaṃ uppajjati, sakalasarīraṃ khobhentaṃ maddantaṃ pharamānaṃ abhisandayamānaṃ satadhotāṃ sappiṃ khādāpayantaṃ viya satapākatelaṃ makkhayamānaṃ viya ghaṭasahassena pariḷāhaṃ nibbāpayamānaṃ viya “aho sukhaṃ aho sukha”nti vācaṃ nicchārayamānameva uppajjati. Yadā dukkhaṃ uppajjati, sakalasarīraṃ khobhentaṃ maddantaṃ pharamānaṃ abhisandayamānaṃ tattaphālaṃ pavesentaṃ viya vilīnatambalohena āsiñcantaṃ viya sukkhataṇavanappatimhi araññe dāruukkākalāpaṃ khipamānaṃ viya “aho dukkhaṃ aho dukkha”nti vipalāpayamānameva uppajjati. Iti sukhadukkhavedanānaṃ uppatti pākaṭā hoti.

Adukkhamasukhā pana duddīpanā andhakārāva avibhūtā. Sā sukhadukkhānaṃ apagame sātāsātappaṭikkhepavasena majjhataṅkārabhūtā adukkhamasukhā vedanāti nayato gaṇhantassa pākaṭā hoti. Yathā kiṃ? Yathā antarā piṭṭhipāsānaṃ ārohitvā palātassa migassa anupathaṃ gacchanto migaluddako piṭṭhipāsānaṃ orabhāgepi parabhāgepi padaṃ disvā majjhe apassantopi “ito āruḷho, ito oruḷho, majjhe piṭṭhipāsāne iminā padesena gato bhavissatī”ti nayato jānāti, evaṃ āruḷhaṭṭhāne padaṃ viya hi sukhavedanāya uppatti pākaṭā hoti. Oruḷhaṭṭhāne padaṃ viya dukkhavedanāya uppatti pākaṭā hoti. “Ito āruyha ito oruyha majjhe evaṃ gato”ti nayato gahaṇaṃ viya sukhadukkhānaṃ apagame sātāsātappaṭikkhepavasena majjhataṅkārabhūtā adukkhamasukhā vedanāti nayato gaṇhantassa pākaṭā hoti. Evaṃ bhagavā paṭhamam rūpakammaṭṭhānaṃ kathetvā pacchā arūpakammaṭṭhānaṃ vedanāvasena nibbattetvāva dassesi.

Na kevalaṅca idheva evaṃ dassesi, cūḷaṅhāsāṅkhaye, mahāṅhāsāṅkhaye, cūḷavedalle, mahāvedalle, raṭṭhapālasutte, māgaṇḍiyasutte, dhātuvibhaṅge, āneñjasappāye, **dīghanikāyamhi** mahānidāne, sakkapañhe, mahāsatiṭṭhāne, **saṃyuttamhi** cūḷanidānasutte, rukkhopame, parivīmaṃsanassutte, sakale vedanāsaṃyutteti evaṃ anekesu suttesu paṭhamam rūpakammaṭṭhānaṃ kathetvā pacchā arūpakammaṭṭhānaṃ vedanāvasena nibbattetvā dassesi. Yathā ca tesu, evaṃ imasmimpi satipaṭṭhānasutte paṭhamam rūpakammaṭṭhānaṃ kathetvā pacchā arūpakammaṭṭhānaṃ vedanāvasena nibbattetvā dassesi.

Tattha **sukhaṃ vedananti**ādīsu ayaṃ aparopi pajānanapariyāyo – **sukhaṃ vedanaṃ vedayāmīti pajānātīti** sukhavedanākkhaṇe dukkhāya vedanāya abhāvato sukhaṃ vedanaṃ vedayamāno “sukhaṃ vedanaṃ vedayāmī”ti pajānāti. Tena yā pubbe anubhūtapubbā dukkhā vedanā, tassā idāni abhāvato imissā ca sukhāya vedanāya ito paṭhamam abhāvato vedanā nāma aniccā adhuvā vipariṇāmadhammā, itiha tattha sampajāno hoti.

Vuttampi cetam bhagavatā –

“Yasmiṃ aggivessana samaye sukhaṃ vedanaṃ vedeti, neva tasmīṃ samaye dukkhaṃ vedanaṃ vedeti, na adukkhamasukhaṃ vedanaṃ vedeti, sukhaṃyeva tasmīṃ samaye vedanaṃ vedeti, yasmiṃ aggivessana samaye dukkhaṃ...pe... adukkhamasukhaṃ vedanaṃ vedeti, neva tasmīṃ samaye sukhaṃ vedanaṃ vedeti, na dukkhaṃ vedanaṃ vedeti, adukkhamasukhaññeva tasmīṃ samaye vedanaṃ vedeti. Sukhāpi kho aggivessana vedanā aniccā saṅkhatā paṭiccasamuppannā khayadhammā vayadhammā virāgadhammā nirodhadhammā. Dukkhāpi kho...pe... adukkhamasukhāpi kho aggivessana vedanā aniccā...pe... nirodhadhammā. Evaṃ passaṃ aggivessana sutavā ariyasāvako sukhāyapi vedanāya dukkhāyapi vedanāya adukkhamasukhāyapi vedanāya nibbindati, nibbindam

virajjati, virāgā vimuccati, vimuttasmiṃ vimuttamiti nāṇaṃ hoti. ‘Khīṇā jāti, vusitaṃ brahmacariyaṃ, kataṃ karaṇīyaṃ, nāparaṃ itthattāyā’ ti pajānāti’ ti (ma. ni. 2.205).

Sāmisam vā sukhantiādīsu sāmisā sukhā nāma pañcakāmaguṇāmisānissitā cha gehasitasomanassavedanā. **Nirāmisā sukhā** nāma cha nekkhammasitasomanassavedanā. **Sāmisā dukkhā** nāma cha gehasitadomanassavedanā. **Nirāmisā dukkhā** nāma cha nekkhammasitadomanassavedanā. **Sāmisā adukkhamasukhā** nāma cha gehasitaupekkhā vedanā. **Nirāmisā adukkhamasukhā** nāma cha nekkhammasitaupekkhā vedanā. Tāsaṃ vibhāgo uparipañṇāsake pāliyaṃ āgatoyeva.

Iti ajjhataṃ vāti evaṃ sukhavedanādipariggahaṇena attano vā vedanāsu, parassa vā vedanāsu, kālena vā attano, kālena vā parassa vedanāsu vedanānupassī viharati. **Samudayavayadhammānupassī vāti** ettha pana ‘‘avijjāsamudayā vedanāsamudayo’’tiādīhi (paṭi. ma. 1.50) pañcahi pañcahi ākārehi vedanānaṃ samudayañca vayañca passanto samudayadhammānupassī vā vedanāsu viharati, vayadhammānupassī vā vedanāsu viharati, kālena samudayadhammānupassī vā, kālena vayadhammānupassī vā vedanāsu viharatīti vedītabbo. Ito paraṃ kāyānupassanāyaṃ vuttanayameva.

Kevalaṇhi idha vedanāpariggāhikā sati dukkhasaccanti evaṃ yojanaṃ katvā vedanāpariggāhakassa bhikkhuno niyyānamukhaṃ vedītabbaṃ. Sesam tādīsamevāti.

Vedanānupassanā niṭṭhitā.

Cittānupassanāvaṇṇanā

114. Evaṃ navavidhena vedanānupassanāsatipatṭhānaṃ kathetvā idāni soḷasavidhena cittānupassanaṃ kathetuṃ **kathaṇca, bhikkhavi**tiādīmāha. Tattha **sarāganti** aṭṭhavidhaṃ lobhasahagataṃ. **Vitarāganti** lokiyakusalābyākataṃ. Idaṃ pana yasmā sammasanaṃ na dhammasamodhānaṃ, tasmā idha ekapadepi lokuttaraṃ na labbhati. Sesāni cattāri akusalacittāni neva purimapaḍaṃ, na pacchimapaḍaṃ bhajanti. **Sadosanti** duvidhaṃ dosasahagataṃ. **Vītdosanti** lokiyakusalābyākataṃ. Sesāni dasākusalacittāni neva purimaṃ paḍaṃ, na pacchimaṃ paḍaṃ bhajanti. **Samohanti** vicikicchāsahagatañceva uddhaccasahagatañcāti duvidhaṃ. Yasmā pana moho sabbākusalesu uppajjati, tasmā tānipi idha vaṭṭantiyeva. Imasmiṃyeva hi duke dvādasākusalacittāni pariyādiṇṇānīti. **Vītamohanti** lokiyakusalābyākataṃ. **Samkhittanti** thinamiddhānupatitaṃ, etaṇhi samkuṭṭacittaṃ nāma. **Vikkhittanti** uddhaccasahagataṃ, etaṇhi pasaṭacittaṃ nāma.

Mahaggatanti rūpārūpāvacaraṃ. **Amahaggatanti** kāmāvacaraṃ. **Sauttaranti** kāmāvacaraṃ. **Anuttaranti** rūpāvacarañca arūpāvacarañca. Tatrāpi sauttaraṃ rūpāvacaraṃ, anuttaraṃ arūpāvacarameva. **Samāhitanti** yassa appanāsamādhi upacārasamādhi vā atthi. **Asamāhitanti** ubhayasamādhivirahitaṃ. **Vimuttanti** tadaṅgavikkhambhanavimuttīhi vimuttaṃ. **Avimuttanti** ubhayavimuttivirahitaṃ, samucchedaṭṭapaṭṭipassaddhinissaraṇavimuttīnaṃ pana idha okāsova natthi.

Iti ajjhataṃ vāti evaṃ sarāgādipariggahaṇena yasmiṃ yasmiṃ khaṇe yaṃ yaṃ cittaṃ pavattati, taṃ taṃ sallakkhento attano vā citte, parassa vā citte, kālena vā attano, kālena vā parassa citte cittānupassī viharati. **Samudayavayadhammānupassīti** ettha pana ‘‘avijjāsamudayā viññāṇasamudayo’’ti (paṭi. ma. 1.50) evaṃ pañcahi pañcahi ākārehi viññāṇassa samudayo ca vayo ca nīharītabbo. Ito paraṃ vuttanayameva.

Kevalaṇhi idha cittapariggāhikā sati dukkhasaccanti evaṃ yojanaṃ katvā cittapariggāhakassa bhikkhuno niyyānamukhaṃ vedītabbaṃ. Sesam tādīsamevāti.

Cittānupassanāvaṇṇanā niṭṭhitā.

Dhammānupassanā nīvaraṇapabbavaṇṇanā

115. Evaṃ soḷasavidhena cittānupassanāsatipatṭhānaṃ kathetvā idāni pañcavidhena dhammānupassanaṃ kathetuṃ **kathaṇca, bhikkhavi**tiādīmāha. Apica bhagavatā kāyānupassanāya suddharūpariggaho kathito,

vedanācittānupassanāhi suddhaarūpapariggaho. Idāni rūpārūpamissakapariggahaṃ kathetuṃ “kathaṇca, bhikkhave” tiādimāha. Kāyānupassanāya vā rūpakkhandhapariggahova kathito, vedanānupassanāya vedanākkhandhapariggahova, cittānupassanāya viññāṇakkhandhapariggahovāti idāni saññāsāṅkhārakkhandhapariggahampi kathetuṃ “kathaṇca, bhikkhave” tiādimāha.

Tattha **santanti** abhiṅhasamudācāravasena saṃvijjamānaṃ. **Asantanti** asamudācāravasena vā pahīnattā vā avijjamānaṃ. **Yathā cāti** yena kāraṇena kāmacchandassa uppādo hoti. **Taṇca pajānāti** taṇca kāraṇaṃ pajānāti. Iminā nayena sabbapadesu attho veditabbo.

Tattha subhanimitte ayonisomanasikārena kāmacchandassa uppādo hoti. Subhanimittaṃ nāma subhampi subhanimittaṃ, subhārammaṇampi subhanimittaṃ. **Ayonisomanasikāro** nāma anupāyamanasikāro uppathamanasikāro anicce niccanti vā dukkhe sukhanti vā anattani attāti vā asubhe subhanti vā manasikāro, taṃ tattha bahulaṃ pavattayato kāmacchando uppajjati. Tenāha bhagavā – “atthi, bhikkhave, subhanimittaṃ, tattha ayonisomanasikārabahulīkāro, ayamāhāro anuppannassa vā kāmacchandassa uppādāya uppannassa vā kāmacchandassa bhīyyobhāvāya vepullāyā” ti (saṃ. ni. 5.232).

Asubhanimitte pana yonisomanasikārenassa pahānaṃ hoti. **Asubhanimittaṃ** nāma asubhampi asubhārammaṇampi. **Yonisomanasikāro** nāma upāyamanasikāro pathamanasikāro anicce aniccanti vā dukkhe dukkhanti vā anattani anattāti vā asubhe asubhanti vā manasikāro, taṃ tattha bahulaṃ pavattayato kāmacchando pahīyati. Tenāha bhagavā – “atthi, bhikkhave, asubhanimittaṃ, tattha yonisomanasikārabahulīkāro, ayamanāhāro anuppannassa vā kāmacchandassa anuppādāya uppannassa vā kāmacchandassa pahānāyā” ti (saṃ. ni. 5.232).

Apica cha dhammā kāmacchandassa pahānāya saṃvattanti asubhanimittassa uggaho asubhabhāvanānuyogo indriyesu guttadvāratā bhojane mattaññutā kalyāṇamittatā sappāyakathāti. Dasavidhañhi asubhanimittaṃ uggaṇhantassāpi kāmacchando pahīyati, bhāventassāpi, indriyesu pihitadvārassāpi, catunnaṃ pañcannaṃ ālopānaṃ okāse sati udakaṃ pivivā yāpanasīlatāya bhojane mattaññunopi. Tenetaṃ vuttaṃ –

“Cattāro pañca ālope, abhuvā udakaṃ pive;
Alaṃ phāsuvihārāya, pahitattassa bhikkhuno” ti. (theragā. 983);

Asubhakammikatissattherasadise asubhabhāvanārate kalyāṇamitte sevantassāpi kāmacchando pahīyati, ṭhānanisajjādīsu dasaasubhanissitasappāyakathāyapi pahīyati. Tena vuttaṃ “cha dhammā kāmacchandassa pahānāya saṃvattanti” ti. Imehi pana chahi dhammehi pahīnassa kāmacchandassa arahattamaggena āyatim anuppādo hotīti pajānāti.

Paṭighanimitte ayonisomanasikārena pana byāpādassa uppādo hoti. Tattha paṭighampi paṭighanimittaṃ, paṭighārammaṇampi paṭighanimittaṃ. Ayonisomanasikāro sabbattha ekalakkhaṇova. Taṃ tasmiṃ nimitte bahulaṃ pavattayato byāpādo uppajjati. Tenāha bhagavā – “atthi, bhikkhave, paṭighanimittaṃ, tattha ayonisomanasikārabahulīkāro, ayamāhāro anuppannassa vā byāpādassa uppādāya uppannassa vā byāpādassa bhīyyobhāvāya vepullāyā” ti (saṃ. ni. 5.232).

Mettāya pana cetovimuttiyā yonisomanasikārenassa pahānaṃ hoti. Tattha tattha “mettā” ti vutte appanāpi upacāropi vaṭṭati. “Cetovimutti” ti appanāva. Yonisomanasikāro vuttalakkhaṇova. Taṃ tattha bahulaṃ pavattayato byāpādo pahīyati. Tenāha bhagavā – “atthi, bhikkhave, mettā cetovimutti, tattha yonisomanasikārabahulīkāro, ayamanāhāro anuppannassa vā byāpādassa anuppādāya uppannassa vā byāpādassa pahānāyā” ti (saṃ. ni. 5.232).

Apica cha dhammā byāpādassa pahānāya saṃvattanti mettānimittassa uggaho mettābhāvanānuyogo kammassakatāpaccavekkhāṇā paṭisaṅkhānabahutā kalyāṇamittatā sappāyakathāti. Odhisakaanodhisakadisāpharaṇānañhi aññataravasena mettaṃ uggaṇhantassāpi byāpādo pahīyati, odhiso anodhiso disāpharaṇavasena mettaṃ bhāventassāpi. “Tvamaṃ etassa kuddho kiṃ karissasi, kimassa sīlādīni nāsetuṃ sakkhissasi, nanu tvamaṃ attano kammaṇa āgantvā attano kammeneva gamissasi, parassa kujjhaṇaṃ

nāma vītaccitaṅgāra-tattaayasalāka-gūthādīni gahetvā paraṃ paharītukāmatāsadisam hoti. Esopi tava kuddho kiṃ karissati, kiṃ te silādīni vināsetuṃ sakkhissati, esa attano kammeneva āgantvā attano kammena gamissati, appaṭicchitapaheṇakam viya paṭivātam khittarajomuṭṭhi viya ca etassevesa kodho matthake patissati’ ti evaṃ attano ca parassa ca kammassakatam paccavekkhatopi, ubhayakammassakatam paccavekkhitvā paṭisaṅkhāne ṭhitassāpi, assaguttatherasadise mettābhāvanārate kalyāṇamitte sevantassāpi byāpādo pahīyati. Ṭhānanisajjādīsu mettānissitasappāyakathāyapi pahīyati. Tena vuttam ‘‘cha dhammā byāpādassa pahānāya saṃvattanti’’ ti. Imehi pana chahi dhammehi pahīnassa byāpādassa anāgāmimaggena āyatim anuppādo hotīti pajānāti.

Aratiādīsu ayonisomanasikārena thinamiddhassa uppādo hoti. **Arati** nāma ukkaṅṅhitā. **Tandī** nāma kāyālasiyatā. **Vijambhitā** nāma kāyavināmanā. **Bhattasammado** nāma bhattamucchā bhattaparijāho. **Cetaso līnattam** nāma cittassa līnākāro. Imesu aratiādīsu ayonisomanasikāram bahulam pavattayato thinamiddham uppajjati. Tenāha – ‘‘atthi, bhikkhave, arati tandī vijambhitā bhattasammado cetaso līnattam, tattha ayonisomanasikārabahulīkāro, ayamāhāro anuppannassa vā thinamiddhassa uppādāya uppannassa vā thinamiddhassa bhīyyobhāvāya vepullāyā’’ ti (saṃ. ni. 5.232).

Ārambhadhātuādīsu pana yonisomanasikārenassa pahānam hoti. **Ārambhadhātu** nāma paṭhamārambhavīriyam. **Nikkamadhātu** nāma kosajjato nikkhantatāya tato balavataram. **Parakkamadhātu** nāma paraṃ paraṃ ṭhānam akkamanato tatopi balavataram. Imasmiṃ tippabhede vīriye yonisomanasikāram bahulam pavattayato thinamiddham pahīyati. Tenāha – ‘‘atthi, bhikkhave, ārambhadhātu nikkamadhātu parakkamadhātu, tattha yonisomanasikārabahulīkāro, ayamāhāro anuppannassa vā thinamiddhassa anuppādāya uppannassa vā thinamiddhassa pahānāya’’ ti (saṃ. ni. 5.232).

Apica cha dhammā thinamiddhassa pahānāya saṃvattanti, atibhojane nimittaggāho iriyāpathasamparivattanatā ālokasaññāmanasikāro abbhokāsavāso kalyāṇamittatā sappāyakathāti. Āharahatthakatatravaṭṭakalaṃsātakakākamāsakabhuttavamitakabhōjanam bhuñjitvā rattiṭṭhāne divāṭṭhāne nisinnassa hi samaṇadhammam karoto thinamiddham mahāhatthī viya ottharantam āgacchati. Catupañcaālopaokāsam pana ṭhapetvā pānīyam pivivā yāpanasīlassa bhikkhuno tam na hotīti evaṃ atibhojane nimittam gaṇhantassāpi thinamiddham pahīyati. Yasmiṃ iriyāpathe thinamiddham okkamati, tato aññam parivattentassāpi, rattiṃ candālokadīpālokaukkāloke divā sūriyālokam manasikarontassāpi, abbhokāse vasantassāpi, mahākassapattherasadise pahīnathinamiddhe kalyāṇamitte sevantassāpi thinamiddham pahīyati. Ṭhānanisajjādīsu dhutaṅganissitasappāyakathāyapi pahīyati. Tena vuttam ‘‘cha dhammā thinamiddhassa pahānāya saṃvattanti’’ ti. Imehi pana chahi dhammehi pahīnassa thinamiddhassa arahattamaggena āyatim anuppādo hotīti pajānāti.

Cetaso avūpasame ayonisomanasikārena uddhaccakukkuccassa uppādo hoti. **Avūpasamo** nāma avūpasantākāro. Uddhaccakukkuccamevetam atthato. Tattha ayonisomanasikāram bahulam pavattayato uddhaccakukkuccam uppajjati. Tenāha ‘‘atthi, bhikkhave, cetaso avūpasamo, tattha ayonisomanasikārabahulīkāro, ayamāhāro anuppannassa vā uddhaccakukkuccassa uppādāya uppannassa vā uddhaccakukkuccassa bhīyyobhāvāya vepullāyā’’ ti (saṃ. ni. 5.232).

Samādhisāṅkhāte pana cetaso vūpasame yonisomanasikārenassa pahānam hoti. Tenāha – ‘‘atthi, bhikkhave, cetaso vūpasamo, tattha yonisomanasikārabahulīkāro, ayamāhāro anuppannassa vā uddhaccakukkuccassa anuppādāya uppannassa vā uddhaccakukkuccassa pahānāyā’’ ti (saṃ. ni. 5.232).

Apica cha dhammā uddhaccakukkuccassa pahānāya saṃvattanti bahussutatā paripucchakatā vinaye pakataññutā vuddhasevitā kalyāṇamittatā sappāyakathāti. Bāhusaccenapi hi ekaṃ vā dve vā tayo vā cattāro vā pañca vā nikāye pāḷivasena ca atthavasena ca uggaṇhantassāpi uddhaccakukkuccam pahīyati. Kappiyākappiyaparipucchābahulassāpi, vinayapaññattiyam ciṅṇavasibhāvatāya pakataññunopi, vuddhe mahallakatthere upasānkamantassāpi, upālītherasadise vinayadhare kalyāṇamitte sevantassāpi uddhaccakukkuccam pahīyati. Ṭhānanisajjādīsu kappiyākappiyānissitasappāyakathāyapi pahīyati. Tena vuttam – ‘‘cha dhammā uddhaccakukkuccassa pahānāya saṃvattanti’’ ti. Imehi pana chahi dhammehi pahīne uddhaccakukkucce uddhaccassa arahattamaggena kukkuccassa anāgāmimaggena āyatim anuppādo hotīti pajānāti.

Vicikicchāṭṭhānīyesu dhammesu ayonisomanasikārena vicikicchāya uppādo hoti. **Vicikicchāṭṭhānīyā** dhammā nāma punappunaṃ vicikicchāya kāraṇattā vicikicchāva. Tattha ayonisomanasikāraṃ bahulaṃ pavattayato vicikicchā uppajjati. Tenāha – “atthi, bhikkhave, vicikicchāṭṭhānīyā dhammā, tattha ayonisomanasikārabahulīkāro, ayamāhāro anuppannāya vā vicikicchāya uppādāya uppannāya vā vicikicchāya bhīyyobhāvāya vepullāyā”ti (saṃ. ni. 5.232).

Kusalādīsu dhammesu yonisomanasikārena panassā pahānaṃ hoti. Tenāha – “atthi, bhikkhave, kusalākusalā dhammā sāvajjānavajjā dhammā sevītabbāsevītabbā dhammā hīnappaṇīṭā dhammā kaṇhasukkasappaṭibhāgā dhammā, tattha yonisomanasikārabahulīkāro, ayamāhāro anuppannāya vā vicikicchāya anuppādāya uppannāya vā vicikicchāya pahānāyā”ti (saṃ. ni. 5.232).

Apica cha dhammā vicikicchāya pahānāya saṃvattanti bahussutatā paripucchakatā vinaye pakataññutā adhimokkhabahulatā kalyāṇamittatā sappāyakathāti. Bāhusaccenapi hi ekaṃ vā...pe... pañca vā nikāye pāḷivasena atthavasena ca uggaṇhantassāpi vicikicchā pahīyati. Tīṇi ratanāni ārabba paripucchābahulassāpi, vinaye ciṇṇavasibhāvassāpi, tīsu ratanesu okappaniyasaddhāsānkhātādhimokkhabahulassāpi, saddhādhimutte vakkalitherasadise kalyāṇamitte sevantassāpi vicikicchā pahīyati. Ṭhānanisajjādīsu tiṇṇaṃ ratanānaṃ guṇanissitasappāyakathāyapi pahīyati. Tena vuttaṃ – “cha dhammā vicikicchāya pahānāya saṃvattanti”ti. Imehi pana chahi dhammehi pahīnāya vicikicchāya sotāpattimaggena āyatim anuppādo hotīti pajānāti.

Iti ajjhattaṃ vāti evaṃ pañcanīvaraṇapariggahaṇena attano vā dhammesu, parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha subhanimitta asubhanimittādīsu ayonisomanasikārayonisomanasikāravasena pañcasu nīvaraṇesu vuttanayena nīharitabbā. Ito paraṃ vuttanayameva.

Kevalaṇhi idha nīvaraṇapariggāhikā sati dukkhasaccanti evaṃ yojanaṃ katvā nīvaraṇapariggāhakassa bhikkhuno niyyānamukhaṃ vedītabbaṃ. Sesāṃ tādīsamevāti.

Nīvaraṇapabbavaṇṇanā niṭṭhitā.

Khandhapabbavaṇṇanā

116. Evaṃ pañcanīvaraṇavasena dhammānupassanaṃ vibhajivā idāni pañcakkhandhavasena vibhajitum **puna caparanti**tiādimāha. Tattha **pañcasu upādānakkhandhesūti** upādānassa khandhā upādānakkhandhā, upādānassa paccayabhūtā dhammapuñjā dhammarāsayoti attho. Ayamettha saṅkhepo. Vitthārato pana khandhakathā **visuddhimagge** vuttā. **Iti rūpanti** “idaṃ rūpaṃ, ettaṃ rūpaṃ, na ito paraṃ rūpaṃ atthī”ti sabhāvato rūpaṃ pajānāti. **Vedanādīsupi** eseva nayo. Ayamettha saṅkhepo. Vitthārena pana rūpādāni **visuddhimagge** khandhakathāyameva vuttāni. **Iti rūpassa samudayoti** evaṃ avijjāsamudayādivasena pañcahākārehi rūpassa samudayo. **Iti rūpassa atthaṅgamo**ti evaṃ avijjānirodhādivasena pañcahākārehi rūpassa atthaṅgamo, vedanādīsupi eseva nayo. Ayamettha saṅkhepo. Vitthāro pana **visuddhimagge** udayabbayaññakathāyaṃ vutto.

Iti ajjhattaṃ vāti evaṃ pañcakkhandhapariggahaṇena attano vā dhammesu, parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha “avijjāsamudayā rūpasamudayo”tiādināṃ (paṭi. ma. 1.50) pañcasu khandhesu vuttānaṃ paññāsāya lakkhaṇānaṃ vasena nīharitabbā. Ito paraṃ vuttanayameva.

Kevalaṇhi idha khandhapariggāhikā sati dukkhasaccanti evaṃ yojanaṃ katvā khandhapariggāhakassa bhikkhuno niyyānamukhaṃ vedītabbaṃ. Sesāṃ tādīsamevāti.

Khandhapabbavaṇṇanā niṭṭhitā.

Āyatanapabbavaṇṇanā

117. Evaṃ pañcakkhandhavasena dhammānupassanaṃ vibhajivā idāni āyatanavasena vibhajitum **puna**

caparantiādimāha. Tattha **chasu ajjhattikabāhiresu āyatanesūti** cakkhu sotam ghānaṃ jivhā kāyo manoti imesu chasu ajjhattikesu rūpaṃ saddo gandho raso phoṭṭhabbo dhammāti imesu chasu bāhiresu. **Cakkhum ca pajānāti**ti cakkhupasādaṃ yāthāvasarasalakkhaṇavasena pajānāti. **Rūpe ca pajānāti**ti bahiddhā catusamuṭṭhānikarūpaṇca yāthāvasarasalakkhaṇavasena pajānāti. **Yañca tadubhayaṃ paṭicca uppajjati samyojananti** yañca taṃ cakkhum ceva rūpe cāti ubhayaṃ paṭicca kāmarāgasamyojanaṃ paṭigha-māna-dīṭṭhi-vicikicchā-sīlabbataparāmāsa-bhavarāga-issā-macchariyāvijjāsamyojananti dasavidhaṃ samyojanaṃ uppajjati, tañca yāthāvasarasalakkhaṇavasena pajānāti.

Kathaṃ panetaṃ uppajjati? Cakkhudvāre tāva āpāthagataṃ iṭṭhārammaṇaṃ kāmāssādasena assādayato abhinandato kāmarāgasamyojanaṃ uppajjati. Anīṭṭhārammaṇe kujjhato paṭighasamyojanaṃ uppajjati. “Ṭhapetvā maṃ na koci añño etaṃ ārammaṇaṃ vibhāvetuṃ samattho atthi”ti maññato mānasamyojanaṃ uppajjati. “Etaṃ rūpārammaṇaṃ niccaṃ dhuva”nti gaṇhato dīṭṭhisamyojanaṃ uppajjati. “Etaṃ rūpārammaṇaṃ satto nu kho, sattassa nu kho”ti vicikicchato vicikicchāsamyojanaṃ uppajjati. “Sampattibhave vata no idaṃ sulabhaṃ jāta”nti bhavaṃ patthentassa bhavarāgasamyojanaṃ uppajjati. “Āyatimpi evarūpaṃ sīlabbataṃ samādiyivā sakkā laddhu”nti sīlabbataṃ samādiyantassa sīlabbataparāmāsasamyojanaṃ uppajjati. “Aho vata etaṃ rūpārammaṇaṃ añño na labheyyu”nti usūyato issāsamyojanaṃ uppajjati. Attanā laddhaṃ rūpārammaṇaṃ aññassa maccharāyato macchariyasamyojanaṃ uppajjati. Sabbeheva sahaṃjātāaññāvasena avijjāsamyojanaṃ uppajjati.

Yathā ca anuppanassāti yena kāraṇena asamudācāravasena anuppanassa tassa dasavidhassāpi samyojanassa uppādo hoti, tañca kāraṇaṃ pajānāti. **Yathā ca uppanassāti** appahīnaṭṭhena pana samudācāravasena vā uppanassa tassa dasavidhassāpi samyojanassa yena kāraṇena pahānaṃ hoti, tañca kāraṇaṃ pajānāti. **Yathā ca pahīnassāti** tadaṅgavikkhambhanappahānavasena pahīnassāpi tassa dasavidhassa samyojanassa yena kāraṇena āyatim anuppādo hoti, tañca pajānāti. Kena kāraṇena panassa āyatim anuppādo hoti? Dīṭṭhivicikicchāsīlabbataparāmāsaissāmacchariyabhedassa tāva pañcavidhassa samyojanassa sotāpattimaggena āyatim anuppādo hoti. Kāmarāgapaṭighasamyojanadvayassa oḷārikassa sakadāgāmimaggena, aṇusahagatassa anāgāmimaggena, mānabhavarāgāvijjāsamyojanattayassa arahattamaggena āyatim anuppādo hoti.

Sotañca pajānāti sadde cā tiādīsūpi eseva nayo. Apicettha āyatanakathā vitthārato **visuddhimagge** āyatananiddese vuttanayeneva veditabbā.

Iti ajjhattaṃ vāti evaṃ ajjhattikāyatanapariggahaṇena attano vā dhammesu, bāhirāyatanapariggahaṇena parassa vā dhammesu, kālena vā attano, kālena vā parassa dhammesu dhammānupassī viharati. Samudayavayā panettha “avijjāsamudayā cakkhusamudayo”ti rūpāyatanassa rūpakkhandhe, arūpāyatanesu manāyatanassa viññāṇakkhandhe, dhammāyatanassa sesakkhandhesu vuttanayena nīharitabbā. Lokuttaradhammā na gahetabbā. Ito paraṃ vuttanayameva.

Kevalañhi idha āyatanapariggāhikā sati dukkhasaccanti evaṃ yojanaṃ katvā āyatanapariggāhakassa bhikkhuno niyyānamukhaṃ veditabbā. Sesam tādisamevāti.

Āyatanapabbavaṇṇanā niṭṭhitā.

Bojjhaṅgapabbavaṇṇanā

118. Evaṃ cha ajjhattikabāhirāyatanavasena dhammānupassanaṃ vibhajivā idāni bojjhaṅgavasena vibhajituṃ **puna caparanti** ādimāha. Tattha **bojjhaṅgesūti** bujjanakasattassa aṅgesu. **Santanti** paṭilābhavasena saṃvijjamānaṃ. **Satisambojjhaṅanti** satisaṅkhātaṃ sambojjhaṅgaṃ. Ettha hi sambujjhati āradhavi-passakato paṭṭhāya yogāvacaroti sambodhi, yāya vā so satiādikāya sattadhammasāmaggiyā sambujjhati kilesaniddāto utṭhāti, saccāni vā paṭivijjhati, sā dhammasāmaggī sambodhi. Tassa sambodhissa, tassā vā sambodhiyā aṅganti **sambojjhaṅgaṃ**. Tena vuttaṃ “satisaṅkhātaṃ sambojjhaṅga”nti. Sesasambojjhaṅgesūpi imināva nayena vacanattho veditabbo.

Asantanti appaṭilābhavasena avijjamānaṃ. **Yathā ca anuppanassāti**ādīsū pana satisambojjhaṅgassa

tāva – ‘‘atthi, bhikkhave, satisambojjhaṅgaṭṭhānīyā dhammā, tattha yonisomanasikārabahulīkāro, ayamāhāro anuppannassa vā satisambojjhaṅgassa uppādāya, uppannassa vā satisambojjhaṅgassa bhīyyobhāvāya vepullāya bhāvanāya pāripūriyā saṃvattatī’’ti (saṃ. ni. 5.183) evaṃ uppādo hoti. Tattha satiyeva satisambojjhaṅgaṭṭhānīyā dhammā. Yonisomanasikāro vuttalakkaṇoyeva, taṃ tattha bahulaṃ pavattayato satisambojjhaṅgo uppajjati.

Apica cattāro dhammā satisambojjhaṅgassa uppādāya saṃvattanti satisampajaññaṃ muṭṭhassatipuggalaparivajjanatā upaṭṭhitassatipuggalasevanatā tadadhimuttatāti. Abhikkantādīsu hi sattasu ṭhānesu satisampajaññaṃ bhattanikkhittakākasadise muṭṭhassatipuggale parivajjanena tīssadattatheraabhayatherasadise upaṭṭhitassatipuggale sevanena ṭhānanisajjādīsu satisamuṭṭhāpanatthaṃ nīnnaṇṇapabbhāracittatāya ca satisambojjhaṅgo uppajjati. Evaṃ catūhi kāraṇehi uppannassa paṇassa arahattamaggena bhāvanāpāripūrī hotīti pajānāti.

Dhammavicayasambojjhaṅgassa pana – ‘‘atthi, bhikkhave, kusalākusalā dhammā...pe... kaṇhasukkasappaṭibhāgā dhammā, tattha yonisomanasikārabahulīkāro, ayamāhāro anuppannassa vā dhammavicayasambojjhaṅgassa uppādāya, uppannassa vā dhammavicayasambojjhaṅgassa bhīyyobhāvāya vepullāya bhāvanāya pāripūriyā saṃvattatī’’ti (saṃ. ni. 5.232) evaṃ uppādo hoti.

Apica satta dhammā dhammavicayasambojjhaṅgassa uppādāya saṃvattanti paripucchakatā vatthuvisadakiriyā indriyasamattapaṭipādanā duppaññapuggalaparivajjanā paññavantapuggalasevanā gambhīraññācariyapaccavekkhaṇā tadadhimuttatāti. Tattha **paripucchakatāti** khandhadhātuāyatanaindriyabalabojjhaṅgamaggaṅgajhānaṅgasamathavipassanānaṃ atthasannissītaparipucchābahulatā.

Vatthuvisadakiriyāti ajjhattikabāhirānaṃ vatthūnaṃ visadabhāvakaraṇaṃ. Yadā hissa kesanakhalomā atidīghā hontī, sarīraṃ vā ussannadosaṅgeva sedamalamakkhitaṅca, tadā ajjhattikaṃ vatthu avisadaṃ hoti aparisuddhaṃ. Yadā pana cīvaraṃ jīṇaṃ kiliṭṭhaṃ duggandhaṃ hoti, senāsanaṃ vā uklāpaṃ, tadā bāhiraṃ vatthu avisadaṃ hoti aparisuddhaṃ. Tasmā kesādicchedāpanena uddhaṃvirecanaadhovirecanādīhi sarīrasallahukabhāvakaraṇena ucchādananāpanena ca ajjhattikaṃ vatthu visadaṃ kātabbaṃ.

Sūcīkammadhovanarajanaparibhaṇḍakaraṇādīhi bāhiraṃ vatthu visadaṃ kātabbaṃ. Etasmiñhi ajjhattikabāhire vatthusmiṃ avisade uppannesu cittacetāsikesu ñāṇampi aparisuddhaṃ hoti, aparisuddhāni dīpakapallakavaṭṭitelāni nissāya uppannadīpasikhāya obhāso viya. Visade pana ajjhattikabāhire vatthumhi uppannesu cittacetāsikesu ñāṇampi visadaṃ hoti, parisuddhāni dīpakapallakavaṭṭitelāni nissāya uppannadīpasikhāya obhāso viya. Tena vuttaṃ – ‘‘vatthuvisadakiriyā dhammavicayasambojjhaṅgassa uppādāya saṃvattatī’’ti.

Indriyasamattapaṭipādanā nāma saddhādīnaṃ indriyānaṃ samabhāvakaraṇaṃ. Sace hissa saddhindriyaṃ balavaṃ hoti, itarāni mandāni. Tato vīriyindriyaṃ paggahakiccaṃ, satindriyaṃ upaṭṭhānakiccaṃ, samādhindriyaṃ avikkhepakiccaṃ, paññindriyaṃ dassanakiccaṃ kātuṃ na sakkoti. Tasmā taṃ dhammasabhāvapaccavekkhaṇena vā yathā vā manasikaroto balavaṃ jātaṃ, tathā amanasikāreṇa hāpetabbaṃ. Vakkalītherassa vatthu cettha nidassanaṃ. Sace pana vīriyindriyaṃ balavaṃ hoti, atha neva saddhindriyaṃ adhimokkhaṅgiccaṃ kātuṃ sakkoti, na itarāni itarakiccabhedā. Tasmā taṃ passaddhādībhāvanāya hāpetabbaṃ. Tatrāpi soṇattherassa vatthu dassetabbaṃ. Evaṃ sesesupi ekassa balavabhāve sati itaresaṃ attano kiccesu asamattatā veditabbā.

Visesato panettha saddhāpaññānaṃ samādhivīriyānaṃ ca samataṃ pasamsanti. Balavasaddho hi mandapañño mudhāpasanno hoti, avatthusmiṃ pasīdati. Balavapañño mandasaddho kerāṭīkapakkhaṃ bhajati. Bhesajjasamuṭṭhito viya rogo atekiccho hoti. Cittuppādamatteneva kusalaṃ hotīti atidhāvītvā dānādīni akaronto niraye uppajjati. Ubhinnaṃ samatāya vatthusmiṃyeva pasīdati. Balavasamādhimā pana mandavīriyaṃ samādhissa kosajjapakkhattā kosajjaṃ adhibhavati. Balavavīriyaṃ mandasamādhimā vīriyassa uddhaccapakkhattā uddhaccaṃ adhibhavati. Samādhī pana vīriyena saṃyojito kosajje patitūṃ na labhati. Vīriyaṃ samādhinā saṃyojitaṃ uddhacce patitūṃ na labhati. Tasmā tadubhayaṃ samaṃ kātabbaṃ. Ubhayasamatāya hi appanā hoti.

Apica samādhikammikassa balavatīpi saddhā vaṭṭati. Evaṃ saddahanto okappento appanaṃ pāpuṇissati. Samādhipaṇṇāsu pana samādhikammikassa ekaggatā balavatī vaṭṭati, evaṇhi so appanaṃ pāpuṇāti. Vipassanākammikassa paṇṇā balavatī vaṭṭati, evaṇhi so lakkhaṇappaṭivedhaṃ pāpuṇāti. Ubhinnaṃ pana samatāyapi appanā hotiyeva. Sati pana sabbattha balavatī vaṭṭati. Sati hi cittaṃ uddhaccapakkhikānaṃ saddhāvīriyapaṇṇānaṃ vasena uddhaccapātato, kosajjapakkhikena ca samādhinā kosajjapātato rakkhati. Tasmā sā loṇadhūpanaṃ viya sabbabyañjanesu sabbakammikaamacco viya ca sabbarājakicesu sabbattha icchitabbā. Tenāha – “sati ca pana sabbatthikā vuttā bhagavatā. Kiṃ kāraṇā? Cittaṇhi sati paṭisaraṇaṃ, ārakkhapaccupaṭṭhānā ca sati, na ca vinā satiyā cittassa paggahaniggaho hotī”ti.

Duppaṇṇapuggalaparivajjanā nāma khandhādibhede anogaḷhapaṇṇānaṃ dummedhapuggalānaṃ ārakāva parivajjanaṃ. **Paṇṇavantapuggalasevanā** nāma samapaṇṇāsalakkhaṇapariggāhikāya udayabbayapaṇṇāya samannāgatapuggalasevanā. **Gambhīraṇṇacariyapaccavekkhaṇā** nāma gambhīresu khandhādīsu pavattāya gambhīrapaṇṇāya pabhedapaccavekkhaṇā. **Tadadhimuttatā** nāma ṭhānanisajjādīsu dhammavicayasambojjhaṅgasamuṭṭhāpanatthaṃ ninnapoṇapabbhāracittatā. Evaṃ uppanassa panassa arahattamaggena bhāvanāpāripūrī hotīti pajānāti.

Vīriyasambojjhaṅgassa – “atthi, bhikkhave, ārabhadhātu nikkamadhātu parakkamadhātu, tattha yoniso manasikārabahulikāro, ayamāhāro anuppanassa vā vīriyasambojjhaṅgassa uppādāya, uppanassa vā vīriyasambojjhaṅgassa bhīyobhāvāya vepullāya bhāvanāya pāripūriyā saṃvattatī”ti (saṃ. ni. 5.232) evaṃ uppādo hotī.

Apica ekādasa dhammā vīriyasambojjhaṅgassa uppādāya saṃvattanti apāyabhayapaccavekkhaṇatā ānisaṃsadassāvītā gamanavīthipaccavekkhaṇatā piṇḍapātāpacāyanatā dāyajjamahattapaccavekkhaṇatā satthumahattapaccavekkhaṇatā jātimahattapaccavekkhaṇatā sabrahmacārimahattapaccavekkhaṇatā kusītapuggalaparivajjanatā āradhāvīriyapuggalasevanatā tadadhimuttatāti.

Tattha nirayesu pañcavidhabandhanakammakāraṇato paṭṭhāya mahādukkhaṃ anubhavanakālepi, tiracchānayanoniyam jālakkhipakumīnādīhi gahitakālepi, pājanakaṇṭakādippahāratunnassa pana sakaṭavāhanādīkalepi, pettivisaye anekānipi vassasahassāni ekaṃ buddhantarampi khuppipāsāhi āturitakālepi, kālakaṅjikaasuresu saṭṭhihatthaasītihatthappamaṇena aṭṭhicammamatteneva attabhāvena vātātapādidukkhanubhavanakālepi na sakkā vīriyasambojjhaṅgaṃ uppādetuṃ. Ayameva te bhikkhu kālo vīriyakaraṇāyāti evaṃ apāyabhayaṃ paccavekkhantassāpi vīriyasambojjhaṅgo uppajjati.

“Na sakkā kusītena navalokuttaradhammaṃ laddhuṃ, āradhāvīriyeneva sakkā ayamānisaṃso vīriyassā”ti evaṃ ānisaṃsadassāvīnopi uppajjati. “Sabbabuddhapaccekabuddhamahāsāvakehi te gatamaggo gantabbo, so ca na sakkā kusītena gantu”nti evaṃ gamanavīthiṃ paccavekkhantassāpi uppajjati. “Ye taṃ piṇḍapātādīhi upaṭṭhahanti, ime te manussā neva ṇātakā, na dāsakammakarā, nāpi ‘taṃ nissāya jīvissāmā’ti te paṇītāni piṇḍapātādīni denti, atha kho attano kāraṇaṃ mahapphalataṃ paccāsīsamānā denti, satthārāpi ‘ayam ime paccaye paribhuṅjitvā kāyadaḷhībahulo sukhaṃ viharissatī’ti na evaṃ sampassatā tuyhaṃ paccayā anuṇṇātā, atha kho ‘ayam ime paribhuṅjamāno samaṇadhammaṃ katvā vaṭṭadukkhato muccissatī’ti te paccayā anuṇṇātā, so dāni tvaṃ kusīto viharanto na taṃ piṇḍaṃ apacāyissasi, āradhāvīriyasēva hi piṇḍapātāpacāyanaṃ nāma hotī”ti evaṃ piṇḍapātāpacāyanaṃ paccavekkhantassāpi uppajjati mahāmittattherassa viya.

Thero kira kassakaleṇe nāma paṭivasati. Tassa ca gocaragāme ekā mahāupāsikā theram puttam katvā paṭijaggati. Sā ekadivasam araṇṇam gacchantī dhītaram āha – “amma asukasmim ṭhāne purāṇataṇḍulā, asukasmim khīram, asukasmim sappi, asukasmim phāṇitam, tava bhātikassa ayyamittassa āgatakāle bhattam pacitvā khīrasappiphāṇitehi saddhim dehi, tvaṃ ca bhuṅjeyyāsī, aham pana hiyyo pakkaṃ pārivāsikabhattam kaṅjīkena bhuttāmhī”ti. Divā kiṃ bhuṅjissasi ammāti? Sākaṇṇam pakkipitvā kaṇṭaṇḍulehi ambilayāguṃ pacitvā ṭhapehi ammāti.

Thero cīvaram pārupitvā pattam nīharantova taṃ saddam sutvā attānam ovadi – “mahāupāsikā kira kaṅjīyena pārivāsikabhattam bhuṅji, divāpi kaṇṭaṇṇambilayāguṃ bhuṅjissati, tuyham atthāya pana purāṇataṇḍulādīni ācikkhati, taṃ nissāya kho panesā neva khettaṃ na vatthum na bhattam na vattham

paccāsīsati, tisso pana sampattiyo patthayamānā deti, tvaṃ etissā tā sampattiyo dātuṃ sakkhissasi na sakkhissasīti, ayaṃ kho pana piṇḍapāto tayā sarāgena sadosena samohena na sakkā gaṇhitunti pattam thavikāya pakkhipitvā gaṇṭhikaṃ muñcivā nivattivā kassakaleṇameva gantvā pattam heṭṭhamañce cīvaram cīvaravaṃse ṭhapetvā arahattam apāpuṇitvā na nikkhamissāmī’ ti vīriyaṃ adhiṭṭhahitvā nisīdi. Dīgharattam appamatto hutvā nivutthabhikkhu vipassanaṃ vadhetvā purebhattameva arahattam patvā vikasitaṃ viya padumaṃ mahākhiṇāsavo sitaṃ karontova nikkhami. Leṇadvāre rukkhamhi adhivatthā devatā –

‘‘Namo te purisājañña, namo te purisuttama;
Yassa te āsavā khīṇā, dakkhiṇeyyosi mārisā’’ti. –

Evam udānaṃ udānetvā ‘‘bhante, piṇḍāya pavitthānaṃ tumhādisānaṃ arahantānaṃ bhikkham datvā mahallakittihyo dukkhā muccissanti’’ti āha.

Thero utthahitvā dvāraṃ vivaritvā kālaṃ olovento pātoyevāti ñatvā pattacīvaramādāya gāmaṃ pāvīsi. Dārikāpi bhattam sampādetvā ‘‘idāni me bhātā āgamissati, idāni āgamissati’’ti dvāraṃ olokayamānā nisīdi. Sā there gharadvāraṃ sampatte pattam gahetvā sappiphāṇitayojitassa khīrapaṇḍapātassa pūretvā hatthe ṭhapesi. Thero ‘‘sukham hotu’’ti anumodanaṃ katvā pakkāmi. Sāpi tam olokayamānāva aṭṭhāsi. Therassa hi tadā ativiya parisuddho chavivaṇṇo ahosi, vipassanāni indriyāni, mukham bandhanā pamuttatālapakkaṃ viya ativiya virocittha. Mahāupāsikā arañña āgantvā ‘‘kiṃ amma, bhātiko te āgato’’ti pucchi. Sā sabbam tam pavattim ārocesi. Sā upāsikā ‘‘ajja me puttassa pabbajitakiccaṃ matthakaṃ patta’’nti ñatvā ‘‘abhiramati te amma bhātā buddhasāsane na ukkaṇṭhati’’ti āha.

‘‘Mahantaṃ kho panetaṃ satthu dāyajjaṃ, yadidaṃ sattaariyadhanaṃ nāma, tam na sakkā kusītena gahetuṃ. Yathā hi vipaṭṭipannaṃ puttaṃ mātāpitaro ‘ayaṃ amhākaṃ aputto’’ti paribāhiraṃ karonti, so tesam accayena dāyajjaṃ na labhati, evam kusītopi idaṃ ariyadhanadāyajjaṃ na labhati, āradhaviṇṇiyaova labhati’’ti dāyajjamahattataṃ paccavekkhatopi uppajjati. ‘‘Mahā kho pana te satthā, satthuno hi mātukucchismiṃ paṭisandhiggahaṇakālepi abhinikkhamanepi abhisambodhiyampi dhammacakkappavattanayamakapāṭihāriyadevorohaṇa-āyusānkhāravossajjanesupi parinibbānakālepi dasasahasilokadhātu kampittha, yuttaṃ nu te evarūpassa satthuno sāsane ‘pabbajitvā kusītena bhavitu’’nti evam satthumahattaṃ paccavekkhatopi uppajjati.

Jātiyāpi – ‘‘tvaṃ idāni na lāmakajātiko, asambhinnāya mahāsammaṭṭapaveṇiyā āgato, ukkākarājavamse jātosī, suddhodhanamahārājassa mahāmāyādeviyā ca nattā, rāhulabhaddassa kaniṭṭho, tayā nāma evarūpena jinaputtana hutvā na yuttaṃ kusītena viharitu’’nti evam jātimahattaṃ paccavekkhatopi uppajjati. ‘‘Sāriputtamoggallānā ceva asīti ca mahāsāvaka vīriyeneva lokuttaradhammaṃ paṭivijjhimsu, tvaṃ etesaṃ sabrahmacārīnaṃ maggaṃ paṭipajjissasi na paṭipajjissasī’’ti evam sabrahmacārīmahattaṃ paccavekkhatopi uppajjati. Kucchiṃ pūretvā ṭhitaajagarasadiṣe vissaṭṭhakāyikacetasikavīriye kusītapuggale parivajjantassāpi, āradhaviṇṇiya pahitatte puggale sevantassāpi, ṭhānanisajjādīsu vīriyuppādanattham ninnapaṇapabbhāracittassāpi uppajjati. Evam uppanassa panassa arahattamaggena bhāvanāpāripūrī hotīti pajānāti.

Pītisambojjhaṅgassa – ‘‘atthi, bhikkhave, pītisambojjhaṅgaṭṭhānīyā dhammā, tattha yonisomanasikārabhulīkāro, ayamāhāro anuppanassa vā pītisambojjhaṅgassa uppādāya, uppanassa vā pītisambojjhaṅgassa bhīyobhāvāya vepullāya bhāvanāya pāripūriyā saṃvattati’’ti (saṃ. ni. 5.232) evam uppādo hoti. Tattha pītiyeva pītisambojjhaṅgaṭṭhānīyā dhammā nāma, tassa uppādakamanasikāro yonisomanasikāro nāma.

Apica ekādasa dhammā pītisambojjhaṅgassa uppādāya saṃvattanti buddhānussati dhammasaṅghasīlacāgadevatānussati upasamānussati lūkhapuggalaparivajjanatā siniddhapuggalasevanatā pasādanīyasuttantapaccavekkhaṇatā tadadhimuttatīti.

Buddhagūṇe anussarantassāpi hi yāva upacārā sakalasarīraṃ pharamāno pītisambojjhaṅgo uppajjati. Dhammasaṅghagūṇe anussarantassāpi, dīgharattam akhaṇḍam katvā rakkhitaṃ catupārisuddhisīlam paccavekkhantassāpi, gihino dasasīlapaṇcasīlam paccavekkhantassāpi, dubbhikkhabhayādīsu paṇītam

bhojanaṃ sabrahmacārīnaṃ datvā “evaṃ nāma adamhā”ti cāgaṃ paccavekkhantassāpi, gihinopi evarūpe kāle sīlavantānaṃ dinnadānaṃ paccavekkhantassāpi, yehi guṇehi samannāgatā devatā devattaṃ pattā, tathārūpānaṃ guṇānaṃ attani atthitaṃ paccavekkhantassāpi, “samāpattiyā vikkhambhitā kilesā saṭṭhipi, sattatipi vassāni na samudācaranti”ti paccavekkhantassāpi, cetiyadassanabodhidassanatheradassanesu asakkaccakiriyāya saṃsūcitalūkkhabhāve buddhādīsu pasādasinehābhāvena gadrabhapitṭhe rajasadise lūkkhapuggale parivajjantassāpi, buddhādīsu pasādabahule muducitte siniddhapuggale sevantassāpi, ratanattayaguṇaparidīpake pasādanīye suttante paccavekkhantassāpi, ṭhānanisajjādīsu pītiuppādanatthaṃ ninnapoṇapabbhāracittassāpi uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Passaddhisambojjhaṅgassa – “atthi, bhikkhave, kāyapassaddhi cittapassaddhi, tattha yonisomanasikārabahulīkāro, ayamāhāro anuppanassa vā passaddhisambojjhaṅgassa uppādāya, uppanassa vā passaddhisambojjhaṅgassa bhīyyobhāvāya vepullāya bhāvanāya pāripūriyā saṃvattatī”ti evaṃ uppādo hoti.

Apica satta dhammā passaddhisambojjhaṅgassa uppādāya saṃvattanti paṇītabhojanasevanatā utusukhasevanatā iriyāpathasukhasevanatā majjhataṇṇapayogātā sāraddhakāyapuggalaparivajjanatā passaddhakāyapuggalasevanatā tadadhimuttatāti.

Paṇītañhi siniddhaṃ sappāyabhojanaṃ bhuñjantassāpi, sītuṅhesu utūsu ṭhānādīsu iriyāpathesu sappāyaṃ utuṃ ca iriyāpathaṃ ca sevantassāpi passaddhi uppajjati. Yo pana mahāpurisajātiko sabbautiriyāpathakkhamaṃ hoti, na taṃ sandhāyetaṃ vuttaṃ. Yassa sabhāgavisabhāgatā atthi, tasseva visabhāge utiriyāpathe vajjetvā sabhāge sevantassāpi uppajjati. Majjhataṇṇapayogo vuccati attano ca parassa ca kammassakatāpaccavekkhānā, iminā majjhataṇṇapayogena uppajjati. Yo leḍḍudaṇḍādīhi paraṃ viheṭṭhayamānova vicarati. Evarūpaṃ sāraddhakāyaṃ puggalaṃ parivajjantassāpi, saṃyatapādapāṇiṃ passaddhakāyaṃ puggalaṃ sevantassāpi, ṭhānanisajjādīsu passaddhiuppādanatthāya ninnapoṇapabbhāracittassāpi uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Samādhisambojjhaṅgassa – “atthi, bhikkhave, samathanimittaṃ abyaggaṇimittaṃ, tattha yonisomanasikārabahulīkāro, ayamāhāro anuppanassa vā samādhisambojjhaṅgassa uppādāya, uppanassa vā samādhisambojjhaṅgassa bhīyyobhāvāya vepullāya bhāvanāya pāripūriyā saṃvattatī”ti (saṃ. ni. 5.232) evaṃ uppādo hoti. Tattha samathova samathanimittaṃ, avikkhepaṭṭhena ca abyaggaṇimittanti.

Apica ekādasa dhammā samādhisambojjhaṅgassa uppādāya saṃvattanti vatthuvisadakiriyatā indriyasamattapaṭipādanatā nimittakusalatā samaye cittassa paggahaṇatā samaye cittassa niggaṇatā samaye sampahaṃsanatā samaye ajjupekkhanatā asamāhitapuggalaparivajjanatā samāhitapuggalasevanatā jhānavimokkhapaccavekkhānatā tadadhimuttatāti. Tattha **vatthuvisadakiriyatā ca indriyasamattapaṭipādanatā** ca vuttanayeneva veditabbā.

Nimittakusalatā nāma kasiṇanimittassa uggahaṇakusalatā. **Samaye cittassa paggahaṇatā**ti yasmim samaye atisithilavīriyatādīhi līnaṃ cittaṃ hoti, tasmim samaye dhammavicayavīriyasambojjhaṅgasamuṭṭhāpanena tassa paggahaṇaṃ. **Samaye cittassa niggaṇatā**ti yasmim samaye accāraddhavīriyatādīhi uddhataṃ cittaṃ hoti, tasmim samaye passaddhisamādhipekkhāsambojjhaṅgasamuṭṭhāpanena tassa niggaṇaṃ. **Samaye sampahaṃsanatā**ti yasmim samaye cittaṃ paññāpayogamandatāya vā upasamasukhānadhigamena vā nirassādaṃ hoti, tasmim samaye aṭṭhasaṃvegavattupaccavekkhānena saṃvejeti. Aṭṭha saṃvegavattūni nāma jātijarābyādhimaraṇāni cattāri, apāyadukkhaṃ pañcamāṃ, atīte vaṭṭamūlakaṃ dukkhaṃ, anāgate vaṭṭamūlakaṃ dukkhaṃ, paccuppanne āhārapariyeṭṭhimūlakaṃ dukkhanti. Ratanattayaguṇānussaraṇena ca pasādaṃ janeti. Ayaṃ vuccati “samaye sampahaṃsanatā”ti.

Samaye ajjupekkhanatā nāma yasmim samaye sammāpaṭipattiṃ āgamma alīnaṃ anuddhataṃ anirassādaṃ āramaṇe samappavattaṃ samathavīthipaṭipannaṃ cittaṃ hoti, tadāssa paggahaniggahasampahaṃsanesu na byāpāraṃ āpajjati sārathi viya samappavattesu. Assesu. Ayaṃ vuccati “samaye ajjupekkhanatā”ti. **Asamāhitapuggalaparivajjanatā** nāma upacāraṃ vā appanaṃ vā appattānaṃ vikkhittacittānaṃ puggalānaṃ ārakā parivajjanaṃ. **Samāhitapuggalasevanatā** nāma upacārena vā appanāya

vā samāhitacittānaṃ sevanā bhajanā payirupāsana. **Tadadhimuttatā** nāma ṭhānanisajjādīsu samādhīuppādanatthaṃyeva ninnapoṇapabbhāracittatā. Evañhi paṭipajjato esa uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Upekkhāsambojjhaṅgassa – “atthi, bhikkhave, upekkhāsambojjhaṅgaṭṭhānīyā dhammā, tattha yonisomanasikārabahulīkāro, ayamāhāro anuppanassa vā upekkhāsambojjhaṅgassa uppādāya, uppanassa vā upekkhāsambojjhaṅgassa bhīyyobhāvāya vepullāya bhāvanāya pāripūriyā saṃvattatī”ti (saṃ. ni. 5.232) evaṃ uppādo hotī. Tattha upekkhāyeva upekkhāsambojjhaṅgaṭṭhānīyā dhammā nāma.

Apica pañca dhammā upekkhāsambojjhaṅgassa uppādāya saṃvattanti sattamajjhataṭṭā saṅkhāramajjhataṭṭā sattasaṅkhārakelāyanapuggalaparivajjanatā sattasaṅkhāramajjhataṭṭapuggalasevanatā tadadhimuttatāti.

Tattha dvīhākārehi sattamajjhataṭṭaṃ samuṭṭhāpeti – “tvam attano kamma āgantvā attano kamma gamissasi, esopi attano kamma āgantvā attano kamma gamissati, tvam kaṃ kelāyasī”ti evaṃ kammassakatāpaccavekkhaṇena ca, “paramatthato sattoyeva natthi, so tvam kaṃ kelāyasī”ti evaṃ nissattapaccavekkhaṇena ca. Dvīhevākārehi saṅkhāramajjhataṭṭaṃ samuṭṭhāpeti – “idaṃ cīvaraṃ anupubbena vaṇṇavīkāraṃ ceva jīṇabhāvaṃ ca upagantvā pādapuñchanacoḷakaṃ hutvā yaṭṭhikoṭiyā chaḍḍanīyaṃ bhavissati, sace panassa sāmiko bhavye, nāssa evaṃ vinassituṃ dadeyyā”ti evaṃ asāmikabhāvaṃ paccavekkhaṇena, “anaddhaniyaṃ idaṃ tāvakālika”nti evaṃ tāvakālikatāpaccavekkhaṇena ca. Yathā ca cīvare, evaṃ pattādīsipi yojanā kātābbā.

Sattasaṅkhārakelāyanapuggalaparivajjanatāti ettha yo puggalo gihi vā attano puttadhītādike, pabbajito vā attano antevāsikasamānupajjhāyakādike mamāyati, sahattheneva nesam kesacchedanasūcikkamma cīvaradhovanarajanapattapacanādīni karoti, muhuttampi apassanto “asuko sāmaṇero kuhiṃ, asuko daharo kuhi”nti bhantamigo viya ito cito ca āloketi, aññena kesacchedanādīnaṃ atthāya “muhuttam tāva asukaṃ pesethā”ti yācīyamānopi “amhepi tam attano kammaṃ na kārema, tumhe tam gahetvā kilamessathā”ti na deti. Ayaṃ **sattakelāyano** nāma. Yo pana pattacīvarathālakakattarayattīādīni mamāyati, aññassa hatthena parāmasitumpi na deti, tāvakālikaṃ yācīto “mayampi idaṃ mamāyantā na paribhuñjāma, tumhākaṃ kiṃ dassāmā”ti vadati. Ayaṃ **saṅkhārakelāyano** nāma. Yo pana tesu dvīsipi vatthūsu majjhato udāsino. Ayaṃ **sattasaṅkhāramajjhato** nāma. Iti ayaṃ upekkhāsambojjhaṅgo evarūpaṃ sattasaṅkhārakelāyanaṃ puggalaṃ ārakā parivajjantassāpi, sattasaṅkhāramajjhataṭṭapuggalaṃ sevantassāpi, ṭhānanisajjādīsu taduppādanatthaṃ ninnapoṇapabbhāracittassāpi uppajjati. Evaṃ uppanassa panassa arahattamaggena bhāvanāpāripūrī hotīti pajānāti.

Iti ajjhataṃ vāti evaṃ attano vā satta sambojjhaṅge pariggaṇhitvā, parassa vā, kālena vā attano, kālena vā parassa bojjhaṅge pariggaṇhitvā dhammesu dhammānupassī viharati. Samudayavayā panettha bojjhaṅgānaṃ nibbattinirodhavasena veditābbā. Ito paraṃ vuttanayameva.

Kevalañhi idha bojjhaṅgapariggāhikā sati dukkhasaccanti evaṃ yojanaṃ katvā bojjhaṅgapariggāhakassa bhikkhuno niyyānamukhaṃ veditābbaṃ. Sesam tādisamevāti.

Bojjhaṅgapabbavaṇṇanā niṭṭhitā.

Catusaccapabbavaṇṇanā

119. Evaṃ sattabojjhaṅgavasena dhammānupassanaṃ vibhajitvā idāni catusaccavasena vibhajitum **puna caparanti**ādīmāha.

Tattha **idaṃ dukkhanti yathābhūtaṃ pajānāti**ti ṭhapetvā taṇhaṃ tebhūmake dhamme “idaṃ dukkha”nti yathāsabhāvato pajānāti, tasseva kho pana dukkhassa janikaṃ samuṭṭhāpikaṃ purimataṇhaṃ “ayaṃ dukkhasamudayo”ti, ubhinnaṃ appavattim nibbānaṃ “ayaṃ dukkhanirodho”ti, dukkhaparijānaṃ samudayapajhanaṃ nirodhasacchikaraṇaṃ ariyamaggaṃ “ayaṃ dukkhanirodhagāminī paṭipadā”ti yathāsabhāvato pajānāti attho. Avasesā ariyasaccakathā **visuddhimagge** vitthāritāyeva.

Iti ajjhataṃ vāti evaṃ attano vā cattāri saccāni pariggaṇhitvā, parassa vā, kālena vā attano, kālena vā parassa cattāri saccāni pariggaṇhitvā dhammesu dhammānupassī viharati. Samudayavayā panettha catunnaṃ saccānaṃ yathāsambhavato uppattinivattivasena veditabbā. Ito paraṃ vuttanayameva.

Kevalaṅhi idha catusaccapariggāhikā sati dukkhasaccanti evaṃ yojanaṃ katvā saccapariggāhakassa bhikkhuno niyyānamukhaṃ veditabbaṃ. Sesam tādisevavāti.

Catusaccapabbavaṇṇanā niṭṭhitā.

Ettāvata ānāpānaṃ catuiriyāpathaṃ catusampajaññaṃ dvattiṃsākāraṃ catudhātuvavatthānaṃ navasivathikā vedanānupassanā cittānupassanā nīvaraṇapariggaho khandhapariggaho āyatanapariggaho bojjhaṅgapariggaho saccapariggahoti ekavīsati kammaṭṭhānāni vuttāni. Tesu ānāpānaṃ dvattiṃsākāro navasivathikāti ekādasa appanākammaṭṭhānāni honti. Dīghabhāṇakamahāsīvatthero pana “navasivathikā ādīnavānupassanāvasena vuttā”ti āha. Tasmā tassa matena dveyeva appanākammaṭṭhānāni, sesāni upacārakammaṭṭhānāni. Kiṃ panetesu sabbesu abhiniveso jāyatīti? Na jāyati. Iriyāpathasampajaññanīvaraṇabojjhaṅgesu hi abhiniveso na jāyati, sesesu jāyatīti. Mahāsīvatthero panāha – “etesupi abhiniveso jāyati, ayaṅhi atthi nu kho me cattāro iriyāpathā, udāhu natthi, atthi nu kho me catusampajaññaṃ, udāhu natthi, atthi nu kho me pañcānīvaraṇā, udāhu natthi, atthi nu kho me sattabojjhaṅgā, udāhu natthīti evaṃ pariggaṇhāti, tasmā sabbattha abhiniveso jāyatī”ti.

137. Yo hi koci, bhikkhavi yo hi koci bhikkhu vā bhikkhunī vā upāsako vā upāsikā vā. **Evaṃ bhāveyyāti** ādito paṭṭhāya vuttena bhāvanānukkamena bhāveyya. **Paṭikaṅkhanti** paṭikaṅkhitabbaṃ, avassaṃ bhāvīti attho. **Aññāti** arahattaṃ. **Sati vā upādiseseti** upādānasese vā sati aparikkhīṇe. **Anāgāmitāti** anāgāmi bhāvo.

Evaṃ sattannaṃ vassānaṃ vasena sāsanassa niyyānikabhāvaṃ dassetvā puna tato appatarepi kāle dassento “tiṭṭhantu, bhikkhave”tiādīmāha. Sabbampi cetaṃ majjhimasseva neyyapuggalassa vasena vuttaṃ. Tikkhapaññaṃ pana sandhāya – “pāto anusitṭho sāyaṃ visesaṃ adhigamissati, sāyaṃ anusitṭho pāto visesaṃ adhigamissati”ti (ma. ni. 2.345) vuttaṃ.

Iti bhagavā “evaṃniyyānikaṃ, bhikkhave, mama sāsana”nti dassetvā ekavīsatiyāpi ṭhānesu arahattanikūṭena desitaṃ desanaṃ niyyātentō “ekāyano ayaṃ, bhikkhave, maggo...pe... iti yaṃ taṃ vuttaṃ, idametam paṭicca vutta”nti āha. Sesam uttānatthamevāti.

Papañcasūdaniyā majjhimānikāyaṭṭhakathāya

Satipaṭṭhānasuttavaṇṇanā niṭṭhitā.

Paṭhamavaggavaṇṇanā niṭṭhitā.

2. Sīhanādavaggo

1. Cūlasīhanādasuttavaṇṇanā

139. Evaṃ me sutanti cūlasīhanādasuttaṃ. Yasmā panassa atthuppattiko nikkhepo, tasmā taṃ dassetvā cassa anupubbapadaṇṇanaṃ karissāma. Katarāya panidaṃ atthuppattiyā nikkhittanti? Lābhasakkārapaccayā titthiyaparidevite. Bhagavato kira dhammadāyādasutte vuttanayena mahālābhasakkāro uppajji. Catuppamāṅiko hi ayaṃ lokasannivāso, rūpappamāṅo rūpappasanno, ghosappamāṅo ghosappasanno, lūkhappamāṅo lūkhappasanno, dhammappamāṅo dhammappasanno imesaṃ puggalānaṃ vasena catudhā ṭhito.

Tesaṃ idaṃ nānākaraṇaṃ – katamo ca puggalo rūpappamāṅo rūpappasanno? Idhekacco puggalo ārohaṃ vā passitvā pariṇāhaṃ vā passitvā saṅghānaṃ vā passitvā pāripūriṃ vā passitvā tattha pamāṇaṃ gahetvā pasādaṃ janeti, ayaṃ vuccati puggalo rūpappamāṅo rūpappasanno.

Katamo ca puggalo ghosappamāṇo ghosappasanno? Idhekacco puggalo paravaṇṇanāya parathomānāya parapasamsanāya paravaṇṇahārikāya, tattha pamāṇaṃ gahetvā pasādaṃ janeti, ayaṃ vuccati puggalo ghosappamāṇo ghosappasanno.

Katamo ca puggalo lūkhappamāṇo lūkhappasanno? Idhekacco puggalo cīvaralūkhaṃ vā passivā pattalūkhaṃ vā passivā, senāsanalūkhaṃ vā passivā vividhaṃ vā dukkarakārikaṃ passivā tattha pamāṇaṃ gahetvā pasādaṃ janeti, ayaṃ vuccati puggalo lūkhappamāṇo lūkhappasanno.

Katamo ca puggalo dhammappamāṇo dhammappasanno? Idhekacco puggalo sīlaṃ vā passivā samādhiṃ vā passivā paññaṃ vā passivā tattha pamāṇaṃ gahetvā pasādaṃ janeti, ayaṃ vuccati puggalo dhammappamāṇo dhammappasanno.

Imesu catūsu puggalesu rūpappamāṇopi bhagavato ārohapariṇāhasaṅṭhānapāripūriyaṇṇapokkharataṃ, asītiyanubyañjanappaṭimaṇḍitattā nānāratanaavicittamiva suvaṇṇamahāpaṭaṃ, dvattiṃsamahāpurisalakkhaṇasamākiṇṇatāya tārāgaṇasamujjalaṃ viya gaganatalaṃ sabbaphāliphullaṃ viya ca yojanasatubbedhaṃ pāricchattaṃ aṭṭhārasaratanubbedhaṃ byāmapabhāparikkhepaṃ sassirikaṃ anopamasarīraṃ disvā sammāsambuddheya pasīdati.

Ghosappamāṇopi, bhagavatā kappasatasahassādhikāni cattāri asankhyyeṃyāni dasa pāramiyo dasa upapāramiyo dasa paramatthapāramiyo pūritā aṅgapariccāgo puttadārapariccāgo, rajjapariccāgo attapariccāgo nayanapariccāgo ca katotiādīnā nayena pavattaṃ ghosaṃ sutvā sammāsambuddheya pasīdati.

Lūkhappamāṇopi bhagavato cīvaralūkhaṃ disvā “sace bhagavā agāraṃ ajjhāvasissa, kāsikavatthameva adhārayissa. Pabbajitvā panānena sāṇapaṃsukūlacīvarena santussamānena bhāriyaṃ kata”nti sammāsambuddheya pasīdati. Pattalūkhampi disvā – “iminā agāraṃ ajjhāvasantena rattavarasuvaṇṇabhājanesu cakkavattibhojanārahaṃ sugandhasālībhojanaṃ paribhuttaṃ, pabbajitvā pana pāsānamayaṃ pattaṃ ādāya uccanīcakuladvāresu sapadānaṃ piṇḍāya caritvā laddhapiṇḍiyālopena santussamāno bhāriyaṃ karotī”ti sammāsambuddheya pasīdati. Senāsanalūkhaṃ disvāpi – “ayaṃ agāraṃ ajjhāvasanto tiṇṇaṃ utūnaṃ anucchavikesu tīsu pāsādesu tividhanātakaparivāro dibbasampattiṃ viya rajjasiriṃ anubhavitvā idāni pabbajjūpagato rukkhamūlasenāsanādīsu dārupalakasilāpaṭṭapīṭhamañcakādīhi santussamāno bhāriyaṃ karotī”ti sammāsambuddheya pasīdati. Dukkarakārikamassa disvāpi – “chabbassāni nāma muggayūsakulattayūsahareṇuyūsādīnaṃ pasaṭamattena yāpessati, appāṇakaṃ jhānaṃ jhāyissati, sarīre ca jīvite ca anapekkho viharissati, aho dukkarakārako bhagavā”ti sammāsambuddheya pasīdati.

Dhammappamāṇopi bhagavato sīlaguṇaṃ samādhiguṇaṃ paññāguṇaṃ jhānavimokkhasamādhisamāpattisampadaṃ abhiññāpāripūriṃ yamakapāṭihāriyaṃ devorohaṇaṃ pāthikaputtadamanādīni ca anekāni acchariyāni disvā sammāsambuddheya pasīdati, te evaṃ pasannaṃ bhagavato mahantaṃ lābhasakkāraṃ abhiharanti. Titthiyānaṃ pana **bāverujātake** kākassa viya lābhasakkāro pariḥāyittha. Yathāha –

“Adassanena morassa, sikhino mañjubhāṇino;
Kākaṃ tattha apūjesuṃ, maṃsena ca phalena ca.

Yadā ca sarasampanno, moro bāverumāgamā;
Atha lābho ca sakkāro, vāyasassa ahāyatha.

Yāva nuppajjati buddho, dhammarājā pabhaṅkaro;
Tāva aññe apūjesuṃ, puthū samaṇabrāhmaṇe.

Yadā ca sarasampanno, buddho dhammadesayi;
Atha lābho ca sakkāro, titthiyānaṃ ahāyathā”ti. (jā. 1.4.153-156);

Te evaṃ pahīnalābhasakkārā rattiṃ ekadvaṅgulamattaṃ obhāsetvāpi sūriyuggamane khajjopanakā viya

hatappabhā ahesuṃ.

Yathā hi khajjopanakā, kāḷapakkhamhi rattiyā;
Nidassayanti obhāsaṃ, etesaṃ visayo hi so.

Yadā ca rasmisampanno, abbhudeti pabhaṅkaro;
Atha khajjupasaṅghānaṃ, pabhā antaradhāyati.

Evaṃ khajjupasadisā, titthiyāpi puthū idha;
Kāḷapakkhūpame loke, dīpayanti sakaṃ guṇaṃ.

Yadā ca buddho lokasmiṃ, udeti amitappabho;
Nippabhā titthiyā honti, sūriye khajjupakā yathāti.

Te evaṃ nippabhā hutvā kacchupilaḷakādīhi kiṇṇasarīrā paramapārijuṇṇapattā yena buddho yena dhammo yena saṅgho yena ca mahājanassa sannipāto, tena tena gantvā antaravīthiyampi siṅghātakepi catukkepi sabhāyampi tthatvā paridevanti –

“Kiṃ bho samaṇoyeva gotamo samaṇo, mayaṃ assamaṇā; samaṇasseva gotamassa sāvakā samaṇā, amhākaṃ sāvakā assamaṇā? Samaṇasseva gotamassa sāvakānañcassa dinnāṃ mahapphalaṃ, na amhākaṃ, sāvakānañca no dinnāṃ mahapphalaṃ? Nanu samaṇopi gotamo samaṇo, mayampi samaṇā. Samaṇassapi gotamassa sāvakā samaṇā, amhākampi sāvakā samaṇā. Samaṇassapi gotamassa sāvakānañcassa dinnāṃ mahapphalaṃ, amhākampi sāvakānañca no dinnāṃ mahapphalañceva? Samaṇassapi gotamassa sāvakānañcassa detha karoṭha, amhākampi sāvakānañca no detha sakkarotha? Nanu samaṇo gotamo purimāni divasāni uppanno, mayaṃ pana loke uppajjamāneyeva uppannā”ti.

Evaṃ nānappakāraṃ viravanti. Atha bhikkhū bhikkhuniyo upāsakā upāsikāyoti catasso parisā tesāṃ saddaṃ sutvā bhagavato ārocesuṃ “titthiyā bhante idañcidañca kathenti”ti. Taṃ sutvā bhagavā – “mā tumhe, bhikkhave, titthiyānaṃ vacanena ‘aññatra samaṇo atthi’ti saññino ahuvathā”ti vatvā aññatitthiyesu samaṇabhāvaṃ paṭisedhento idheva ca anujānanto imissā atthuppattiyā **idheva, bhikkhave, samaṇoti** idaṃ suttaṃ abhāsi.

Tattha **idhevāti** imasmimyeva sāsane. Ayaṃ pana niyamo sesapadesupi veditabbo. Dutiyādayopi hi samaṇā idheva, na aññattha. **Samaṇoti** sotāpanno. Tenevāha – “katamo ca, bhikkhave, paṭhamo samaṇo? Idha, bhikkhave, bhikkhu tiṇṇaṃ saṃyojanānaṃ parikkhayā sotāpanno hoti avinipātadhammo niyato sambodhiparāyaṇo, ayaṃ, bhikkhave, paṭhamo samaṇo”ti (a. ni. 4.241).

Dutiyoti sakadāgāmī. Tenevāha – “katamo ca? Bhikkhave, dutiyo samaṇo. Idha, bhikkhave, bhikkhu tiṇṇaṃ saṃyojanānaṃ parikkhayā rāgadosamohānaṃ tanuttā sakadāgāmī hoti, sakideva imaṃ lokaṃ āgantvā dukkhassantaṃ karoti. Ayaṃ, bhikkhave, dutiyo samaṇo”ti.

Tatīyoti anāgāmī. Tenevāha – “katamo ca, bhikkhave, tatiyo samaṇo? Idha, bhikkhave, bhikkhu pañcannaṃ orambhāgiyānaṃ saṃyojanānaṃ parikkhayā opapātiko hoti tattha parinibbāyī anāvattidhammo tasmā lokā. Ayaṃ, bhikkhave, tatiyo samaṇo”ti.

Catutthoti arahā. Tenevāha – “katamo ca, bhikkhave, catuttho samaṇo? Idha, bhikkhave, bhikkhu āsavānaṃ khayā anāsavaṃ cetovimuttiṃ paññāvimuttiṃ diṭṭheva dhamme sayaṃ abhiññā sacchikatvā upasampajja viharati. Ayaṃ, bhikkhave, catuttho samaṇo”ti (a. ni. 4.241). Iti imasmim tḥāne cattāro phalaṭṭhakasamaṇāva adhippetā.

Suññāti rittā tucchā. **Parappavādāti** cattāro sassatavādā, cattāro ekaccasassatikā, cattāro antānantikā, cattāro amarāvikkhepikā, dve adhiccasamuppannikā, soḷasa saññivādā, aṭṭha asaññivādā, aṭṭha nevasaññināsaññivādā, satta ucchedavādā, pañca diṭṭhadhammanibbānavādāti ime sabbepi **brahmajāle** āgatā dvāsaṭṭhi diṭṭhiyo. Ito bāhirānaṃ paresaṃ vādā **parappavādā** nāma. Te sabbepi imehi catūhi

phalaṭṭhakasamaṇehi suññā, na hi te ettha santi. Na kevalaṅca etheva suññā, catūhi pana maggaṭṭhakasamaṇehipi catunnaṃ maggānaṃ atthāya āradhaviṇṇaṃ dvādasahipi samaṇehi suññā eva. Imameva atthaṃ sandhāya bhagavatā **mahāparinibbāne** vuttaṃ –

‘Ekūnatimso vayasā subhadda,
Yaṃ pabbajim kiṃ kusalanuesī;
Vassāni paññāsa samādhikāni,
Yato ahaṃ pabbajito subhadda;
Ñāyassa dhammassa padasavattī,
Ito bahiddhā samaṇopi natthi.

‘Dutiyopi samaṇo natthi, tatiyopi samaṇo natthi, catutthopi samaṇo natthi. Suññā parappavādā samaṇebhi aññehī’ ti (dī. ni. 2.214).

Ettha hi padasavattīti āradhaviṇṇakā adhippeto. Tasmā sotāpattimagassa āradhaviṇṇakā maggaṭṭhaṃ phalaṭṭhanti tayopi ekato katvā samaṇopi natthīti āha. Sakadāgāmiṇimagassa āradhaviṇṇakā maggaṭṭhaṃ phalaṭṭhanti tayopi ekato katvā dutiyopi samaṇo natthīti āha. Itaresupi dvīsū eseva nayo.

Kasmā panete aññattha natthīti? Akhetatāya. Yathā hi na āragge sāsapo tiṭṭhati, na udakapiṭṭhe aggi jalati, na piṭṭhipāsāṇe bijāni ruhanti, evameva bhāhiresu tiṭṭhāyatanesu na ime samaṇā uppajjanti, imasmiṃyeva pana sāsane uppajjanti. Kasmā? Khetatāya. Tesāṃ akhetatā ca khetatā ca ariyamaggaṃ abhāvato ca bhāvato ca veditabbā. Tenāha bhagavā –

‘Yasmiṃ kho, subhadda, dhammavinaye ariyo aṭṭhaṅgiko maggo na upalabbhati, samaṇopi tattha na upalabbhati, dutiyopi tattha samaṇo na upalabbhati, tatiyopi tattha samaṇo na upalabbhati, catutthopi tattha samaṇo na upalabbhati. Yasmiṃca kho, subhadda, dhammavinaye ariyo aṭṭhaṅgiko maggo upalabbhati, samaṇopi tattha upalabbhati, dutiyopi tattha...pe... Catutthopi tattha samaṇo upalabbhati. Imasmiṃ kho, subhadda, dhammavinaye ariyo aṭṭhaṅgiko maggo upalabbhati, idheva, subhadda, samaṇo, idha dutiyo samaṇo, idha tatiyo samaṇo, idha catuttho samaṇo, suññā parappavādā samaṇebhi aññehī’ ti (dī. ni. 2.214).

Evaṃ yasmā tiṭṭhāyanaṃ akhettaṃ, sāsanaṃ khettaṃ, tasmā yathā surattahatthapādo sūrakasarako sīho migarājā na susāne vā saṅkārakūṭe vā paṭivasati, tiyojanasahassavittatāṃ pana himavantaṃ ajjhogāhetvā maṇiguhāyameva paṭivasati. Yathā ca chaddanto nāgarājā na gocariyahatthikulādīsū navasū nāgakulesu uppajjati, chaddantakuleyeva uppajjati. Yathā ca valāhako assarājā na gadrabhakule vā ghoṭakakule vā uppajjati, sindhuyā tīre pana sindhavakuleyeva uppajjati. Yathā ca sabbakāmadadaṃ manoharaṃ maṇiratanaṃ na saṅkārakūṭe vā paṃsupabbatādīsū vā uppajjati, vepullapabbatabhantareyeva uppajjati. Yathā ca timirapiṅgalo maccharājā na khuddakapokkharāṇīsū uppajjati, caturāsītīyojanasahassagambhīre mahāsamuddeyeva uppajjati. Yathā ca diyaḍḍhayaṃjanasatiko supaṇṇarājā na gāmadvāre eraṇḍavanādīsū paṭivasati, mahāsamuddaṃ pana ajjhogāhetvā simbalidahavaneyeva paṭivasati. Yathā ca dhatarattho suvaṇṇahaṃso na gāmadvāre āvāṭakādīsū paṭivasati, navutihaṃsasahassaparivāro hutvā cittakūṭapabbateyeva paṭivasati. Yathā ca catuddīpissaro cakkavattirājā na nīcakule uppajjati, asambhinnajātikhattiyakuleyeva pana uppajjati. Evameva imesu samaṇesu ekasamaṇopi na aññatitthāyatane uppajjati, ariyamaggaṃ parikkhitte pana buddhasāsaneyeva uppajjati. Tenāha bhagavā ‘idheva, bhikkhave, samaṇo...pe... suññā parappavādā samaṇehi samaṇebhi aññehī’ ti.

Sammā sīhanādaṃ nadathāti ettha **sammāti** hetunā yena kāraṇena. **Sīhanādanti** seṭṭhanādaṃ abhītanādaṃ appaṭinādaṃ. Imesaṅhi catunnaṃ samaṇānaṃ idheva atthitāya ayaṃ nādo seṭṭhanādo nāma hoti uttamanādo. ‘Ime samaṇā idheva atthī’ ti vadantassa aññāto bhayaṃ vā āsaṅkā vā natthīti abhītanādo nāma hoti. ‘Amhākampi sāsane ime samaṇā atthī’ ti pūraṇādīsū ekassāpi uttāhitvā vattum asamattatāya ayaṃ nādo appaṭinādo nāma hoti. Tena vuttaṃ ‘sīhanādanti seṭṭhanādaṃ abhītanādaṃ appaṭināda’ nti.

140. Thānaṃ kho panetaṃ vijjatīti idaṃ kho pana kāraṇaṃ vijjati. Yaṃ **aññatitthiyāti** yena kāraṇena aññatitthiyā. Ettha ca titthaṃ jānitabbāṃ, titthakaro jānitabbo titthiyā jānitabbā, titthiyasāvakaṃ jānitabbā. **Titthaṃ**nāma dvāsattīhi ditthiyo. Ettha hi sattā taranti uppalavanti ummujjanimujjaṃ karonti, tasmā titthanti

vuccanti. Tāsaṃ diṭṭhīnaṃ uppādetā **titthakaro** nāma. Tassa laddhiṃ gahetvā pabbajitā **titthiyā** nāma. Tesam paccayadāyaka **titthiyasāvaka**ti vedittabbā. **Paribbājakā**ti ghibbandhanaṃ pahāya pabbajjūpagatā. **Assāsoti** avassayo patitṭhā upatthambho. **Balanti** thāmo. **Yena tumheti** yena assāsena vā balena vā evaṃ vadetha.

Atthi kho no, āvuso, tena bhagavatā jānatā passatā arahatā sammāsambuddhenāti ettha ayaṃ saṅkhepattho – yo so bhagavā samatiṃsa pāramiyo pūretvā sabbakilese bhañjitvā anuttaraṃ sammāsambodhiṃ abhisambuddho, tena bhagavatā tesam tesam sattānaṃ āsayānusayaṃ **jānatā**, hatthatale ṭhapitaṃ āmalakaṃ viya sabbaṃ ñeyyadhammaṃ **passatā**. Apica pubbenivāsādīhi jānatā, dibbena cakkhunā passatā. Tīhi vijjāhi chahi vā pana abhiññāhi jānatā, sabbattha appaṭihatena samantacakkhunā passatā. Sabbadhammajānanasamatthāya paññāya jānatā, sabbasattānaṃ cakkhuvisayātītāni tirokuṭṭādīgatāni vāpi rūpāni ativisuddhena maṃsacakkhunā passatā. Attahitasādhikāya samādhipadaṭṭhānāya paṭivedhapaññāya jānatā, parahitasādhikāya karuṇāpadaṭṭhānāya desanāpaññāya passatā. Arīnaṃ hatattā paccayādīnaṃ arahattā ca **arahatā**, sammā sāmañca saccānaṃ buddhattā **sammāsambuddhena**. Antarāyikadhamme vā jānatā, niyyānikadhamme passatā. Kilesārīnaṃ hatattā arahatā, sammā sāmaṃ sabbadhammānaṃ buddhattā sammāsambuddhenāti, evaṃ catuvesārajjavasena catūhi ākārehi thomitena cattāro dhammā akkhātā, ye mayaṃ attani sampassamānā evaṃ vadema, na rājarājamahāmattādīnaṃ upatthambhaṃ kāyabalanti.

Satthari pasādoti “itipi so bhagavā”tiādīnā nayena buddhaguṇe anussarantānaṃ uppannappasādo. **Dhamme pasādoti** “svākkhāto bhagavatā dhammo”tiādīnā nayena dhammaguṇe anussarantānaṃ uppannappasādo. **Sīlesu paripūrakāritā**ti ariyakantesu sīlesu paripūrakāritā. Ariyakantasīlāni nāma **pañcasīlāni**. Tāni hi bhavantaragatopi ariyasāvako attano ariyasāvaka bhāvaṃ ajānantopi na vītikkamati. Sacepi hi naṃ koci vadeyya – “imaṃ sakalaṃ cakkavattirajjaṃ sampaṭicchitvā khuddakamakkhikaṃ jīvītā voropehī”ti, aṭṭhānametaṃ, yaṃ so tassa vacanaṃ kareyya. Evaṃ ariyānaṃ sīlāni kantāni piyāni manāpāni. Tāni sandhāya vuttaṃ “sīlesu paripūrakāritā”ti.

Sahadhammikā kho panāti bhikkhu bhikkhunī sikkhamānā sāmaṇero sāmaṇerī upāsako upāsikāti ete satta **sahadhammacārino**. Etesu hi bhikkhu bhikkhūhi saddhiṃ sahadhammaṃ carati samānasikkhatāya. Tathā bhikkhunī bhikkhunīhi...pe... upāsikā upāsikāhi, sotāpanno sotāpannehi, sakadāgāmī...pe... anāgāmīhi sahadhammaṃ carati. Tasmā sabbepe **sahadhammikā**ti vuccanti. Apicettha ariyasāvaka yeva adhippetā. Tesāhi bhavantarepi maggadassanāmi vivādo natthi, tasmā te accantaṃ ekadhammacāritāya sahadhammikā. Iminā, “suppaṭipanno bhagavato sāvakasaṅgho”tiādīnā nayena saṅghaṃ anussarantānaṃ uppannappasādo kathito. Ettāvātā cattāri sotāpannassa aṅgāni kathitāni hontī.

Ime kho no, āvusoti, āvuso, ime cattāro dhammā tena bhagavatā amhākaṃ assāso ceva balañcāti akkhātā, ye mayaṃ attani sampassamānā evaṃ vadema.

141. Yo amhākaṃ satthāti iminā pūraṇakassapādike cha satthāro apadissanti. Yathā pana idāni sāsane ācariyupajjhāyādīsu “amhākaṃ ācariyo, amhākaṃ upajjhāyo”ti gehasitapemaṃ hoti. Evarūpaṃ pemaṃ sandhāya “satthari pasādo”ti vadanti. Thero panāha – “yasmā satthā nāma na ekassa, na dvīnaṃ hoti, sadevakassa lokassa ekova satthā, tasmā titthiyā ‘amhākaṃ satthā’ ti ekapadeneva satthāraṃ visuṃ katvā imināva padena viruddhā parājita”ti. **Dhamme pasādoti** idaṃ pana yathā idāni sāsane “amhākaṃ **dīghanikāyo** amhākaṃ **majjhimanikāyo**”ti mamāyanti, evaṃ attano attano pariyaṭṭidhamme gehasitapemaṃ sandhāya vadanti. **Sīlesūti** ajasīlagosīlameṇḍakasīlakukkurasiṭādīsu. **Idha no āvusoti** ettha **idhāti** pasādaṃ sandhāya vadanti. **Ko adhippayāsoti** ko adhippayogo. **Yadidanti** yamidaṃ tumhākañceva amhākañca nānākaraṇaṃ vadeyyātha. Taṃ kiṃ nāma? Tumhākampi hi catūsu ṭhānesu pasādo, amhākampi. Nanu etasmiṃ pasāde tumhe ca amhe ca dvedhā bhinnasuvannaṃ viya ekasadisāti vācāya samadhurā hutvā aṭṭhaṃsu.

Atha nesam taṃ samadhurataṃ bhindanto bhagavā **evaṃ vādinoti**ādīmāha. Tattha **ekā niṭṭhāti** yā tassa pasādassa pariyośanabhūtā niṭṭhā, kiṃ sā ekā, udāhu puthūti evaṃ pucchathāti vadati. Yasmā pana tasmim tasmim samaye niṭṭhaṃ apaññapento nāma natthi, brāhmaṇānañhi brahmaloko niṭṭhā, mahātāpasānaṃ ābhassarā, paribbājakānaṃ subhakiṇhā, ājivakānaṃ “anantamānaso”ti evaṃ parikappito asaññibhavo. Imasmiṃ sāsane pana arahattaṃ niṭṭhā. Sabbeva cete arahattameva niṭṭhāti vadanti. Diṭṭhivasena pana brahmalokādīni paññapenti. Tasmā attano attano laddhivasena ekameva niṭṭhaṃ paññapenti, taṃ dassetuṃ

bhagavā sammā byākaramānātiādīmāha.

Idāni bhikkhūnampi ekā niṭṭhā, titthiyānampi ekā niṭṭhāti dvīsu aṭṭakārakesu viya ṭhitesu bhagavā anuyogavattaṃ dassento sā panāvuso, niṭṭhā sarāgassa, udāhu vītarāgassātiādīmāha. Tattha yasmā rāgarattādīnaṃ niṭṭhā nāma natthi. Yadi siyā, soṇasingālādīnampi siyāti imaṃ dosaṃ passantānaṃ titthiyānaṃ “vītarāgassa āvuso sā niṭṭhā”tiādīnā nayena byākaraṇaṃ dassitaṃ.

Tattha viddasunoti paṇḍitassa. Anuruddhapaṭiviruddhassāti rāgena anuruddhassa kodhena paṭiviruddhassa. Papañcārāmassa papañcaratinoti ettha āramanti etthāti ārāmo. Papañco ārāmo assāti papañcārāmo. Papañce rati assāti papañcarati. Papañcoti ca mattapamattākārabhāvena pavattānaṃ taṇhādīṭṭhimānāmetamaṃ adhivacanaṃ. Idha pana taṇhādīṭṭhiyova adhippetā. Sarāgassātiādīsu pañcasu ṭhānesu ekova kilesa āgato. Tassa ākārato nānattaṃ veditabbaṃ. Sarāgassāti hi vuttaṭṭhāne pañcakāmaguṇikarāgavasena gahito. Sataṇhassāti bhavataṇhāvasena. Saupādānassāti gahaṇavasena. Anuruddhapaṭiviruddhassāti yugaḷavasena. Papañcārāmassāti papañcuppattidassanavasena. Sarāgassāti vā ettha akusalamūlavasena gahito. Sataṇhassāti ettha taṇhāpaccayā upādānadassanavasena. Sesama purimasadisameva. Thero paṇāha “kasmā evama viddhamsetha? Ekoyeva hi ayama lobho rajjanavasena rāgoti vutto. Taṇhākaraṇavasena taṇhā. Gahaṇaṭṭhena upādānaṃ. Yugaḷavasena anurodhapaṭivirodho. Papañcuppattidassanaṭṭhena papañco”ti.

142. Idāni imesaṃ kilesānaṃ mūlabhūtaṃ diṭṭhivādaṃ dassento dvemā, bhikkhave, diṭṭhiyotiādīmāha.

Tattha bhavadiṭṭhīti sassatadiṭṭhi. Vibhavadiṭṭhīti ucchedadiṭṭhi. Bhavadiṭṭhiṃ allīnāti taṇhādīṭṭhivasena sassatadiṭṭhiṃ allīnā. Upagatāti taṇhādīṭṭhivaseneva upagatā. Ajjhositāti taṇhādīṭṭhivaseneva anupaviṭṭhā. Vibhavadiṭṭhiyā te paṭiviruddhāti te sabbe ucchedavādīhi saddhiṃ – “tumhe andhabālā na jānātha, sassato ayama loko, nāyama loko ucchijjati”ti paṭiviruddhā niccaṃ kalahabhaṇḍanapasutā viharanti. Dutiyavārepi eseva nayo.

Samudayañcātiādīsu dve diṭṭhīnaṃ samudayā khaṇikasamudayo paccayasamudayo ca. Khaṇikasamudayo diṭṭhīnaṃ nibbatti. Paccayasamudayo aṭṭha ṭhānāni. Seyyathidaṃ, khandhāpi diṭṭhiṭṭhānaṃ, avijjāpi, phassopi, saññāpi, vitakkopi, ayonisomanasikāropi, pāpamittopi, paratoghosopi diṭṭhiṭṭhānaṃ. “Khandhā hetu khandhā paccayo diṭṭhīnaṃ upādāya samuṭṭhānaṭṭhena. Evama khandhāpi diṭṭhiṭṭhānaṃ. Avijjā... phasso... saññā... vitakko... ayonisomanasikāro... pāpamitto... paratoghoso hetu, paratoghoso paccayo diṭṭhīnaṃ upādāya samuṭṭhānaṭṭhena. Evama paratoghosopi diṭṭhiṭṭhānaṃ” (paṭi. ma. 1.124). Atthaṅgamāpi dveveva khaṇikatthaṅgamo paccayatthaṅgamo ca. Khaṇikatthaṅgamo nāma khayō vayo bhedo paribhedo aniccatā antaradhānaṃ. Paccayatthaṅgamo nāma sotāpattimaggo. Sotāpattimaggo hi diṭṭhiṭṭhānasamugghātōti vutto.

Assādanti diṭṭhimūlakaṃ ānisaṃsaṃ. Yama sandhāya vuttaṃ – “yama diṭṭhiko sathā hoti, tama diṭṭhikā sāvakā honti. Yama diṭṭhikā sathāraṃ sāvakā sakkaronti, garuṃ karonti, mānenti, pūjenti, labhanti tatonidānaṃ cīvarapiṇḍapātasenāsanagilānapaccayabhesajjaparikkhāraṃ. Ayama, bhikkhave, diṭṭhiyā diṭṭhadhammiko ānisaṃso”ti. Ādinavanti diṭṭhiggahaṇamūlakaṃ upaddavaṃ. So vaggulivataṃ ukkuṭikappadhānaṃ kaṇṭakāpassayatā pañcātapatappanaṃ sānupapātapatanaṃ kesamassuluñcanaṃ appoṇakaṃ jhānantiādīnaṃ vasenaṃ veditabbo. Nissaraṇanti diṭṭhīnaṃ nissaraṇaṃ nāma nibbānaṃ. Yathābhūtaṃ nappajānantīti ye etaṃ sabbaṃ yathāsabhāvaṃ na jānanti. Na parimuccanti dukkhasmāti sakalavaṭṭadukkhato na parimuccanti. Iminā etesaṃ niṭṭhā nāma natthīti dasseti. Parimuccanti dukkhasmāti sakalavaṭṭadukkhato parimuccanti. Iminā etesaṃ niṭṭhā nāma atthīti dvinnaṃ aṭṭakārakānaṃ aṭṭaṃ chindanto viya sāsanasmiṃyeva niṭṭhāya atthitaṃ paṭiṭṭhapeti.

143. Idāni diṭṭhicchedanaṃ dassento cattārimāni, bhikkhave, upādānānītiādīmāha. Tesama vitthārakathā visuddhimagge vuttāyeva.

Sabbupādānapariññāvādā paṭijānamānāti mayama sabbesaṃ upādānānaṃ pariññaṃ samatikkamaṃ vadāmāti evama paṭijānamānā. Na sammā sabbupādānapariññanti sabbesaṃ upādānānaṃ samatikkamaṃ sammā na paññapenti. Keci kāmupādānamattassa pariññaṃ paññapenti. Keci diṭṭhupādānamattassa paññapenti,

keci sīlabbatupādānassāpi. Attavādupādānassa pana pariññam paññapento nāma natthi. Tesam pana bhedaṃ dassento **kāmupādānassa pariññam paññapenti**tiādīmāha. Tattha sabbepi kāmupādānassa pariññam paññapentiyeva, channavuti pāsaṇḍāpi hi “kāmā kho pabbajitena na sevittabbā”ti vatthupaṭisevanam kāmam kappatīti na paññapenti, akappiyameva katvā paññapenti. Ye pana sevanti, te theyyena sevanti. Tena vuttam “kāmupādānassa pariññam paññapenti”ti.

Yasmā “natthi dinna”ntiādīni gahetvā caranti. “Sīlena suddhi vatena suddhi, bhāvanāya suddhī”ti gaṇhanti, attupaladdhiṃ na pajahanti, tasmā na diṭṭhupādānassa, na sīlabbatupādānassa, na attavādupādānassa pariññam paññapenti. **Tam kissa hetūti** tam apaññāpanam etesaṃ kissa hetu, kiṃ kārāṇā? **Imāni hi te bhontoti** yasmā te bhonto imāni tīṇi kārāṇāni yathāsabhāvato na jānantīti attho. Ye panettha dvinnaṃ pariññānam paññāpanakārānam diṭṭhiñceva sīlabbatañca “etaṃ pahātabba”nti yathāsabhāvato jānanti. Te sandhāya parato dve vārā vuttā. Tattha ye “atthi dinna”ntiādīni gaṇhanti, te diṭṭhupādānassa pariññam paññapenti. Ye pana “na sīlena suddhi, na vatena suddhi, na bhāvanāya suddhī”ti gaṇhanti, te sīlabbatupādānassa pariññam paññapenti. Attavādupādānassa pariññam pana ekopi paññapetuṃ na sakkoti. Aṭṭhasamāpattilābhinihi ca candimasūriye pāṇinā parimajjitvā caramānāpi ca titthiyā tisso pariññā paññapenti. Attavādam muñcituṃ na sakkonti. Tasmā punappunam vaṭṭasmiṃyeva patanti. Pathavijigucchanasasako viya hi ete.

Tatthāyam atthasallāpikā upamā – pathavī kira sasakam āha – “bho sasakā”ti. Sasako āha – “ko eso”ti. “Kasmā mameva upari sabbairiyāpathe kappento uccārapassāvam karonto maṃ na jānāsī”ti. “Sutṭhu tayā ahaṃ diṭṭho, mayā akkantaṭṭhānampi āngulaggehi phuṭṭhaṭṭhānam viya hoti, vissaṭṭhaudakam appamattakam, karīsam katakaphalamattam. Hatthiassādīhi pana akkantaṭṭhānampi mahantaṃ, passāvopi nesaṃ ghaṭamatto hoti, uccāropi pacchimatto hoti, alam mayham tayā”ti uppatitvā aññasmim ṭhāne patito. Tato nam pathavī āha – “are dūram gatopi nanu mayham upariyeva patitosī”ti. So puna tam jigucchanto uppatitvā aññattha patito, evam vassasahassampi uppatitvā patamāno sasako pathaviṃ muñcituṃ na sakkoti. Evamevam titthiyā sabbūpādānapariññam paññapentopi kāmupādānādīnam tiṇṇam yeva samatikkamaṃ paññapenti. Attavādam pana muñcituṃ na sakkonti, asakkontā punappunam vaṭṭasmiṃyeva patantīti.

Evam yam titthiyā samatikkamituṃ na sakkonti, tassa vasena diṭṭhicchedavādam vatvā idāni pasādapacchedavādam dassento **evarūpe kho, bhikkhave, dhammavinayeti**tiādīmāha. Tattha **dhammavinayeti** dhamme ceva vinaye ca, ubhayenapi aniyānikasāsanam dasseti. “Yo sathari pasādo so na sammaggato”ti aniyānikasāsanamhi hi sathā kalam katvā sīhopi hoti, byagghopi hoti, dīpipi acchopi taracchopi. Sāvakā panassa migāpi sūkarāpi pasādāpi honti, so “ime mayham pubbe upatthakā paccayadāyaka”ti khantiṃ vā mettam vā anuddayam vā akatvā tesam upari patitvā lohitaṃ pivati, thūlathūlamaṃsānihi khādāti. Sathā vā pana biḷāro hoti, sāvakā kukkuṭā vā mūsikā vā. Atha ne vuttanayena anukampaṃ akatvā khādāti. Atha vā sathā nirayapālo hoti, sāvakā nerayikasattā. So “ime mayham pubbe upatthakā paccayadāyaka”ti anukampaṃ akatvā vividhā kammakārāṇā karoti, ādittepi rathe yojeti, āṅgārapabbatampi āropeti, lohakumbhiyampi khipati, anekhepi dukkhadhammehi sampayojeti. Sāvakā vā pana kalam katvā sīhādayo honti, sathā migādīsū aññataro. Te “imaṃ mayham pubbe catūhi paccayehi upatthahimhā, sathā no aya”nti tasmim khantiṃ vā mettam vā anuddayam vā akatvā vuttanayena anayabyasanam pāpenti. Evam aniyānikasāsane yo sathari pasādo, so na sammaggato hoti, kañci kalam gantvāpi pacchā vinassatiyeva.

Yo dhamme pasādoti aniyānikasāsanasmīhi dhamme pasādo nāma, uggahitapariyāpuṭa – dhāritavācittamattake tantidhamme pasādo hoti, vaṭṭamokkho panettha natthi. Tasmā yo ettha pasādo, so punappunam vaṭṭameva gambhīram karotīti sāsanasmiṃ asammaggato asabhāvato akkhāyati.

Yā sīlesu paripūrakāritāti yāpi ca aniyānikasāsane ajasīlādīnam vasena paripūrakāritā, sāpi yasmā vaṭṭamokkham bhavanissaraṇam na sampāpeti, sampajjamānā pana tiracchānayanim āvahati, vipaccamānā nirayam, tasmā sā na sammaggatā akkhāyati. **Yā sahadhammikesūti** aniyānikasāsanasmīhi ye sahadhammikā, tesu yasmā ekacce kalam katvā sīhādayopi honti, ekacce migādayo, tattha sīhādibhūtā “ime amhākam sahadhammikā ahesu”nti migādibhūtesu khantiādīni akatvā pubbe vuttanayena nesaṃ mahādukkham uppāpenti. Tasmā ettha sahadhammikesu piyamanāpatāpi asammaggatā akkhāyati.

Idaṃ pana sabbampi kāraṇabhedaṃ ekato katvā dassento bhagavā **taṃ kissa hetu? Evañhetam, bhikkhave, hotīti**ādīmāha. Tatrāyaṃ saṃkhepattho – evañhetam, bhikkhave, hoti, yaṃ mayā vuttam “yo satthari pasādo so na sammaggato akkhāyati”tiādi, taṃ evameva hoti. Kasmā? Yasmā te pasādādayo durakkhāte dhammavinaye ...pe... asammāsambuddhappavedite, ettha hi **yathā tanti** kāraṇatthe nipāto. Tattha **durakkhāte**ti dukkathite, dukkathitattāyeva **duppavedite**. So panesa yasmā maggaphalattāyā na niyyāti, tasmā **aniyyāniko**. Rāgādīnaṃ upasamāya asaṃvattanato **anupasamasamvattaniko**. Na sammāsambuddhena sabbaññunā pavidoti **asammāsambuddhappavedito**. Tasmim **aniyyānike anupasamasamvattanike asammāsambuddhappavedite**. Ettāvatā bhagavā titthiyesu pasādo surāpītasīngāle pasādo viya niratthakoti dasseti.

Eko kira kāḷasiṅgālo rattim nagaraṃ pavittḥo surājallikaṃ khāditvā punnāgavane nipajjivā niddāyanto sūriyuggamane pabujjhivā cintesi “imasim kāle na sakkā gantum, bahū amhākaṃ verino, ekaṃ vañcetum vaṭṭati”ti. So ekaṃ brāhmaṇaṃ gacchantam disvā imaṃ vañcessāmīti “ayya brāhmaṇā”ti āha. Ko eso brāhmaṇaṃ pakkosati. “Ahaṃ, sāmī, ito tāva ehīti. Kim bhoti? Maṃ bahigāmaṃ nehi, ahaṃ te dve kahāpaṇasatāni dassāmīti. Sopi nayissāmīti taṃ pādesu gaṇhi. Are bāla brāhmaṇa, na mayhaṃ kahāpaṇā chaḍḍitakā atthi, dullabhā kahāpaṇā, sādhukaṃ maṃ gaṇhāhīti. Kathaṃ bho gaṇhāmīti? Uttarāsaṅgena gaṇṭhikaṃ katvā aṃse laggetvā gaṇhāhīti. Brāhmaṇo taṃ tathā gahetvā dakkhiṇadvārasamīpaṭṭhānaṃ gantvā ettha otāremīti pucchi. Kataratṭhānaṃ nāma etanti? Mahādvāraṃ etanti. Are bāla, brāhmaṇa, kim tava nītakā antaradvāre kahāpaṇaṃ ṭhapenti, parato maṃ harā”ti. So punappunaṃ thokaṃ thokaṃ gantvā “ettha otāremīti ettha otāremī”ti pucchivā tena tajjito khematṭhānaṃ gantvā tattha otārehīti vutto otāretvā sātakaṃ gaṇhi. Kāḷasiṅgālo āha “ahaṃ te dve kahāpaṇasatāni dassāmīti avocaṃ. Mayhaṃ pana kahāpaṇā bahū, na dve kahāpaṇasatāneva, yāva ahaṃ kahāpaṇe āharāmi, tāva tvaṃ sūriyaṃ olokento tiṭṭhā”ti vatvā thokaṃ gantvā nivattetvā puna brāhmaṇaṃ āha “ayya brāhmaṇa mā ito olokehi, sūriyameva olokento tiṭṭhā”ti. Evañca pana vatvā ketakavanaṃ pavisitvā yathārucciṃ pakkanto. Brāhmaṇassapi sūriyaṃ oloketasseva nalāṭato ceva kacchehi ca sedā mucciṃsu. Atha naṃ rukkadevatā āha –

“Saddahāsi siṅgālassa, surāpītassa brāhmaṇa;
Sippikānaṃ sataṃ natthi, kuto kaṃsasatā duve”ti. (jā. 1.1.113);

Evaṃ yathā kāḷasiṅgāle pasādo niratthako, evaṃ titthiyesupīti.

144. Aniyānikasāsane pasādassa niratthakabhāvaṃ dassetvā niyyānikasāsane tassa sātthakataṃ dassetuṃ **tathāgato ca kho, bhikkhaveli**ādīmāha. Tattha **kāmupādānassa pariññam paññapetīti** arahattamaggena kāmupādānassa pahānapariññam samatikkamaṃ paññapeti, itaresaṃ tiṇṇaṃ upādānānaṃ sotāpattimaggena pariññam paññapeti. **Evarūpe kho, bhikkhave, dhammavinayeti**, bhikkhave, evarūpe dhamme ca vinaye ca. Ubhayenapi niyyānikasāsanaṃ dasseti. **Satthari pasādoti** evarūpe sāsane yo satthari pasādo, so sammaggato akkhāyati, bhavadukkhaniṣṣaraṇāya saṃvattati.

Tatrimāni vatthūni – bhagavā kira vediyakapabbate indasālaguhāyaṃ paṭivasati. Atheko ulūkasakuṇo bhagavati gāmaṃ piṇḍāya pavisante upaḍḍhamaggaṃ anugacchati, nikkhamante upaḍḍhamaggaṃ paccuggamaṃ karoti. So ekadivasam sammāsambuddhaṃ sāyanhasamaye bhikkhusaṅghaparivutaṃ nisinnaṃ pabbatā oruyha vanditvā pakkhe paṇāmetvā añjaliṃ paggayha sīsaṃ heṭṭhā katvā dasabalaṃ namassamāno atṭhāsi. Bhagavā taṃ oloketvā sitaṃ pātākāsi. Ānandatthero “ko nu kho, bhante, hetu ko paccayo sitassa pātukammāyā”ti pucchi. “Passānanda, imaṃ ulūkasakuṇaṃ, ayaṃ mayi ca bhikkhusaṅghe ca cittaṃ pasādetvā satasahassakappe devesu ca manussesu ca saṃsaritvā somanasso nāma paccakabuddho bhavissati”ti āha –

Ulūkamaṇḍalakkhika, vediyake ciradīghavāsika;
Sukhitosi tvaṃ ayya kosiya, kāluṭṭhitaṃ passasi buddhavaraṃ.

Mayi cittaṃ pasādetvā, bhikkhusaṅghe anuttare;
Kappānaṃ satasahassāni, duggateso na gacchati.

Devalokā cavitvāna, kusalamūlena codito;

Bhavissati anantañño, somanassoti vissutoti.

Aññānīpi cettha rājagahanagare sumanamālākāravatthu mahābherivādakavatthu morajikavatthu vīṇāvādakavatthu saṅkhadhamakavattūti evamādīni vatthūni vitthāretabbāni. Evaṃ niyyānikasāsane sathari pasādo sammaggato hoti.

Dhamme pasādoti niyyānikasāsanamhi dhamme pasādo sammaggato hoti. Saramatte nimittam gahetvā suṇantānaṃ tiracchānagatānaṃpi sampattidāyako hoti, paramatthe kiṃ pana vattabbaṃ. Ayamatto maṇḍūkadevaputtādīnaṃ vatthuvaseṇa veditabbo.

Sīlesu paripūrakāritāti niyyānikasāsanamhi sīlesu paripūrakāritāpi sammaggatā hoti, saggamokkhasampattim āvahati. Tattha chattamāṇavakavattusāmaṇeravatthuādīni dīpetabbāni.

Sahadhammikesūti niyyānikasāsane sahadhammikesu piyamanāpatāpi sammaggatā hoti, mahāsampattim āvahati. Ayamatto **vimānapetavatthūhi** dīpetabbo. Vuttañhetam –

“Khīrodanamahamadāsīm, bhikkhuno piṇḍāya carantassa...pe...

Phāṇitam...pe... ucchukhaṇḍikam... timbarusakam... kakkārikam...

Eḷalukam... vallipakkam... phārusakam... hatthapatākam...

Sākamuttim... pupphakamuttim... mūlakam... nimbamuttim...

Ambikañjikam... doṇinimmajjanim... kāyabandhanam...

Aṃsabaddhakam... āyogapaṭṭam... vidhūpanam... tālavanṭam...

Morahattham... chattam... upāhanam... pūvam modakam...

Sakkhalikam ahamadāsīm, bhikkhuno piṇḍāya carantassa...pe...

Tassā me passa vimānaṃ, accharā kāmavaṇṇinīhamasmī’ti (vi. va. 406).

Tam kissa hetūtiādi vuttanayānusāreṇeva yojetvā veditabbaṃ.

145. Idāni yesam upādānaṃ titthiyā na sammā pariññaṃ paññapeti, tathāgato paññapeti, tesam paccayaṃ dassetuṃ **ime ca, bhikkhavi**tiādīmāha. Tattha **kiṃnidānā**tiādīsu nidānādīni sabbāneva kāraṇavevacanāni. Kāraṇaṇhi yasmā phalaṃ nideti handa, naṃ gaṇhathāti appeti viya, tasmā **nidānanti** vuccati. Yasmā tam tato jāyati samudeti pabhavati, tasmā **samudayo, jāti, pabhavoti** vuccati. Ayaṃ panettha padattho – kiṃ nidānaṃ etesanti **kiṃnidānā**. Ko samudayo etesanti **kiṃsamudayā**. Kā jāti etesanti **kiṃjātikā**. Ko pabhavo etesanti **kiṃpabhavā**. Yasmā pana tesam taṇhā yathāvuttena atthena nidānañceva samudayo ca jāti ca pabhavo ca, tasmā “taṇhānidānā”tiādīmāha. Evaṃ sabbapadesu attho veditabbo. Yasmā pana bhagavā na kevalam upādānasseva paccayaṃ jānāti, upādānassa paccayabhūtāya taṇhāyapi, taṇhādipaccayānaṃ vedanādīnaṃpi paccayaṃ jānātiyeva, tasmā **taṇhā cāyam, bhikkhavi**tiādīmāha.

Yato ca khoti yasmim kāle. **Avijjā pahīnā hotīti** vaṭṭamūlikā avijjā anuppādanirodhena pahīnā hoti. **Vijjā uppānāti** arahattamaggavijjā uppānā. **So avijjāviraḡā vijjuppādāti**. So bhikkhu avijjāya ca pahīnattā vijjāya ca uppānattā. **Neva kāmupādānaṃ upādiyatīti** neva kāmupādānaṃ gaṇhāti na upeti, na sesāni upādānāni. **Anupādiyam na paritassatīti** evam kiñci upādānaṃ aggaṇhanto taṇhāparitassanāya na paritassati. **Aparitassanti** aparitassanto taṇham anuppādentō. **Paccattameva parinibbāyatīti** sayameva kilesaparinibbānena parinibbāyati. Evamassa āsavakkhayaṃ dassetvā idāni khīṇāsavassa bhikkhuno paccavekkhaṇam dassento **khīṇā jātīti**ādīmāha. Tam vuttatthamevāti.

Papañcasūdanīyā majjhimanikāyaṭṭhakathāya

Cūlasīhanādasuttavaṇṇanā niṭṭhitā.

2. Mahāsīhanādasuttavaṇṇanā

Vesālinagaravaṇṇanā

146. Evaṃ me sutanti mahāsīhanādasuttaṃ. Tattha **vesāliyaṃ** evaṃnāmake nagare. Taṃ kira aparāparaṃ visālībhūtātāya “vesālī”ti saṅkhaṃ gataṃ. Tatrāyaṃ anupubbakathā – bārāṇasirañño kira aggamaheṣiyā kucchimhi gabbho saṅṭhāsi. Sā ñatvā rañño nivedesi. Rājā gabbhaparīhāraṃ adāsi. Sā sammā pariharīyamānā gabbhaparīpākakāle vijāyanagharaṃ pāvīsi. Puññavantīnaṃ paccūsasamaye gabbhavuṭṭhānaṃ hoti, sā ca tāsāṃ aññatarā, tena paccūsasamaye alattakapaṭalabandhujīvakapupphasadisāṃ maṃsapesiṃ vijāyī. Tato “aññā devīyo suvaṇṇabimbāsādise putte vijāyanti, aggamaheṣī maṃsapesinti rañño purato mama avaṇṇo uppajjeyyā”ti cintetvā tena avaṇṇabhayena taṃ maṃsapesiṃ ekasmiṃ bhājane pakkhipitvā paṭikujjitvā rājamuddikāya lañchetvā gaṅgāya sote pakkhipāpesi. Manussehi chaḍḍitamatte devatā ārakkhaṃ saṃvidahiṃsu. Suvaṇṇapaṭṭakañcetha jātiṅgulakena “bārāṇasirañño aggamaheṣiyā pajā”ti likhitvā bandhiṃsu. Tato taṃ bhājanaṃ ūmibhayādīhi anupaddutaṃ gaṅgāsotena pāyāsi.

Tena ca samayena aññataro tāpaso gopālakakulaṃ nissāya gaṅgātīre viharati. So pātova gaṅgaṃ otiṇṇo taṃ bhājanaṃ āgacchantaṃ disvā paṃsukūlasaññāya aggahesi. Athettha taṃ akkharapaṭṭikam rājamuddikālañchanaṃ ca disvā muñcitvā taṃ maṃsapesiṃ addasa, disvānassa etadahosi “siyā gabbho, tathā hissa duggandhapūtīkabhāvo natthī”ti. Assamaṃ netvā suddhe okāse ṭhapesi. Atha aḍḍhamāsaccayena dve maṃsapesiyo ahesuṃ. Tāpaso disvā sādhitaraṃ ṭhapesi. Tato puna aḍḍhamāsaccayena ekamekissā maṃsapesiyaṃ hatthapādasīsānamatthāya pañca pañca piḷakā uṭṭhahiṃsu. Atha tato aḍḍhamāsaccayena ekā maṃsapesi suvaṇṇabimbāsādiso dārako, ekā dārikā ahoṣi.

Tesu tāpasassa puttasiṃheho uppajji, aṅguṭṭhakato cassa khīraṃ nibbatti. Tato pabhuti ca khīrabhattaṃ alabhittha, so bhattaṃ bhuñjitvā khīraṃ dārakānaṃ mukhe āsiñcati. Tesāṃ udaraṃ yaṃ yaṃ pavisati, taṃ taṃ sabbaṃ mañibhājanagataṃ viya dissati, evaṃ nicchavī ahesuṃ. Apare āhu “sibbetvā ṭhapitā viya nesāṃ aññamaññaṃ līnā chavī ahoṣi”ti. Evaṃ te nicchavitāya vā līnacchavitāya vā **licchavīti** paññāyīṃsu.

Tāpaso dārake posento ussūre gāmaṃ sikkhāya pavisati, atidivā paṭikkamati. Tassa taṃ byāpāraṃ ñatvā gopālakā āhaṃsu – “bhante, pabbajitānaṃ dārakaposaṇaṃ palibodho, amhākaṃ dārake detha, mayaṃ posessāma, tumhe attano kammaṃ karoṭhā”ti. Tāpaso sādhitūti paṭissuṇi. Gopālakā dutiyādivase maggaṃ samaṃ katvā pupphehi okiritvā dhajapaṭākā ussāpetvā tūriyehi vajjamānehi assamaṃ āgatā. Tāpaso – “mahāpuññā dārakā appamādena vaḍḍhetha, vaḍḍhetvā ca aññamaññaṃ āvāhavivāhaṃ karoṭhā, pañcagorasena rājānaṃ tosetvā bhūmibhāgaṃ gahetvā nagaraṃ māpetha, tattha kumāraṃ abhisīñcathā”ti vatvā dārake adāsi. Te sādhitūti paṭissuṇitvā dārake netvā posesuṃ.

Dārakā vuddhimanvāya kīlāntā vivādatṭhānesu aññe gopālakadārake hatthenapi pādenapi paharanti. Te rodanti. “Kissa rodathā”ti ca mātāpitūhi vuttā “ime nimmātāpitikā tāpasapositā amhe atipaharantī”ti vadanti. Tato tesāṃ mātāpitāro “ime dārakā aññe dārake vināsenti dukkhāpentī, na ime saṅgahetabbā, vajjetabbā ime”ti āhaṃsu. Tato pabhuti kira so padeso **vajjīti** vuccati yojanasatiko parimāṇena. Atha taṃ padesaṃ gopālakā rājānaṃ tosetvā aggahesuṃ. Tattha ca nagaraṃ māpetvā soḷasavassuddesikaṃ kumāraṃ abhisīñcitvā rājānaṃ akaṃsu. Tāya cassa dārikāya saddhiṃ vivāhaṃ katvā katikaṃ akaṃsu “bāhirakadārikā na ānetabbā, ito dārikā na kassaci dātabbā”ti. Tesāṃ paṭhamasaṃvāsena dve dārakā jātā dhītā ca putto ca. Evaṃ soḷasakkhattuṃ dve dve jātā. Tato tesāṃ dārakānaṃ yathākkamaṃ vaḍḍhantānaṃ ārāmuyyānanivāsattṭhānaparivārasampattiṃ gahetuṃ appahontā nagaraṃ tikkhattuṃ gāvutantarena gāvutantarena parikkhipiṃsu. Tassa punappunaṃ visālīkatattā vesālītveva nāmaṃ jātāṃ. Tena vuttaṃ “vesāliyaṃ evaṃ nāmake nagare”ti.

01 Bahinagareti nagarassa bahi, na ambapālīvanaṃ viya antonagarasmīṃ. Ayaṃ pana jīvakambavanaṃ viya nagarassa bahiddhā vanasaṅḍo. Tena vuttaṃ “bahinagare”ti. **Aparapureti** purassa apare,

pacchimadisāyanti attho. **Vanasaṇḍeti** so kira vanasaṇḍo nagarassa pacchimadisāyaṃ gāvutamatte thāne. Tattha manussā bhagavato gandhakuṭiṃ katvā taṃ parivāretvā bhikkhūnaṃ rattitthānadivātthānacaṅkamaṇeṇakuṭimaṇḍapādīni patiṭṭhapesuṃ, bhagavā tattha viharati. Tena vuttaṃ “aparapure vanasaṇḍe”’ti. **Sunakkhattoti** tassa nāmaṃ. Licchavīnaṃ pana puttattā **licchavi puttoti** vutto. **Acirapakkantoti** vibbhamitvā gihibhāvūpagamanena adhunāpakkanto. **Parisatīti** parisamajjhe. **Uttarimanussadhammāti** ettha **manussadhammā** nāma dasakusalakammāpathā. Te paṭisedhetuṃ na sakkoti. Kasmā? Upārambhābhayā. Vesāliyañhi bahū manussā ratanattaye pasannā buddhamāmakā dhammāmāmakā saṅghamāmakā. Te dasakusalakammāpathamattampi natthi samaṇassa gotamassāti vutte tvāṃ kattha bhagavantaṃ pāṇaṃ hanantaṃ addasa, kattha adinnaṃ ādiyantantiādīni vatvā attano pamāṇaṃ na jānāsi? Kiṃ dantā me atthīti pāsānasakkharā khādasi, ahinaṅguṭṭhe gaṇhituṃ vāyamasī, kakacadantesu pupphāvaḷikaṃ kīḷituṃ icchasi? Mukhato te dante pātesamāti vadeyyuṃ. So tesāṃ upārambhābhayā evaṃ vattuṃ na sakkoti.

Vesālinagaravaṇṇanā niṭṭhitā.

Uttarimanussadhammādivaṇṇanā

Tato uttariṃ pana visesādhiḡamaṃ paṭisedhento **uttari manussadhammā alamariyañāṇadassanavisesoti** āha.

Tattha alamariyaṃ nātunti **alamariyo**, ariyabhāvāya samatthoti vuttaṃ hoti. Nāṇadassanameva **ñāṇadassanaviseso**. Alamariyo ca so ñāṇadassanaviseso cāti **alamariyañāṇadassanaviseso**. Nāṇadassananti dibbacakkhupi vipassanāpi maggopi phalampi paccavekkhaṇañāṇampi sabbaññutaññāṇampi vuccati. “Appamatto samāno ñāṇadassanaṃ ārādheti”’ti (ma. ni. 1.311) hi ettha dibbacakkhu ñāṇadassanaṃ nāma. “Ñāṇadassanāya cittaṃ abhinīharati abhininnāmetī”’ti (dī. ni. 1.235) ettha vipassanāñāṇaṃ. “Abhabbā te ñāṇadassanāya anuttarāya sambodhāyā”’ti (a. ni. 4.196) ettha maggo. “Ayamañño uttari manussadhammā alamariyañāṇadassanaviseso adhiḡato phāsu vihāro”’ti (ma. ni. 1.328) ettha phalaṃ. “Ñāṇaṅca pana me dassanaṃ udapādi, akuppā me cetovimutti, ayamantimā jāti, natthi dāni punabbhavo”’ti (mahāva. 16) ettha paccavekkhaṇañāṇaṃ. “Ñāṇaṅca pana me dassanaṃ udapādi sattāhakālaṅkato āḷāro kāḷāmo”’ti (ma. ni. 2.340) ettha sabbaññutaññāṇaṃ. Idha pana lokuttaramaggo adhippeto. Tañhi so bhagavato paṭisedheti.

Takkapariyāhatanti iminā ācariyaṃ paṭibāhati. Evaṃ kirassa ahosi – samaṇena gotamena ācariye upasaṅkamitvā sukhumaṃ dhammantaraṃ gahitaṃ nāma natthi, takkapariyāhataṃ pana takketvā evaṃ bhavissati evaṃ bhavissatīti takkapariyāhataṃ dhammaṃ desetīti. **Vīmaṃsānucaritanti** iminā cassa lokiyapaññaṃ anujānāti. Samaṇo gotamo paññavā, so taṃ paññāsaṅkhātaṃ indavajirūpamaṃ vīmaṃsaṃ evaṃ vaṭṭissati, evaṃ vaṭṭissatīti ito cito ca anucarāpetvā vīmaṃsāya anucaritaṃ dhammaṃ deseti. **Sayaṃpaṭibhānanti** imināssa dhammesu paccakkhabhāvaṃ paṭibāhati. Evaṃ hissa ahosi – samaṇassa gotamassa sukhumaṃ dhammantaraṃ vipassanā vā maggo vā phalaṃ vā paccavekkhaṇā vā natthi, ayaṃ pana laddhāpariso, rājānaṃ cakkavattiṃ viya naṃ cattāro vaṇṇā parivārenti, suphusitaṃ panassa dantāvaraṇaṃ, mudukā jivhā, madhuro saro, anelagaḷā vācā, so yaṃ yadevassa upaṭṭhāti, taṃ taṃ gahetvā sayaṃpaṭibhānaṃ kathento mahājanaṃ rañjetīti.

Yassa ca khvāssa atthāya dhammo desitoti yassa ca kho atthāya assa dhammo desito. Seyyathidaṃ, rāḡapaṭiḡhātathāya asubhakkammaṭṭhānaṃ, dosappaṭiḡhātathāya mettābhāvanā, mohappaṭiḡhātathāya pañca dhammā, vitakkūpacchedāya ānāpānassati.

So niyyāti takkarassa sammā dukkhakkhayāyāti so dhammo yo taṃ yathādesitaṃ karoti, tassa takkarassa sammā hetunā nayena kāraṇena vaṭṭadukkhakkhayāya niyyāti gacchati tamatthaṃ sādhetīti dīpeti. Idaṃ panesa na attano ajjhāsāyena vadati. Buddhānañhi dhammo aniyyānikoti evamevaṃ pavedeyya, na pana sakkoti vattuṃ. Kasmā? Upārambhābhayā. Vesāliyañhi bahū sotāpanna-sakadāḡāmi-anāḡāmiupāsakā. Te evaṃ vadeyyuṃ “sunakkhatta tvāṃ bhagavatā desitadhammo aniyyānikoti vadasi, yadi ayaṃ dhammo aniyyāniko, imasmiṃ nagare ime kasmā ettakā sotāpannā jātā, ettakā sakadāḡāmī, ettakā anāḡāmīti pubbe vuttanāyena upārambhaṃ kareyyu”’nti. So iminā upārambhābhayena aniyyānikoti vattuṃ asakkonto ajjunena vissatṭhakaṇḍaṃ viya assa dhammo amogho niyyāti, abhantare panassa kiñci natthīti vadati.

Assosi khoti vesāliyaṃ brāhmaṇakulaseṭṭhikulādīsu tattha tattha parisamajjhe evaṃ bhāsamānassa taṃ vacanaṃ suṇi, na pana paṭisedhesi. Kasmā? Kāruṇṇatāya. Evaṃ kirassa ahosi ayaṃ kuddho jhāyamānaṃ veļuvanaṃ viya pakkhittaloṇaṃ uddhanaṃ viya ca kodhavasena paṭapaṭayati, mayā paṭibāhito pana mayipi āghātaṃ bandhissati, evamassa tathāgate ca mayi cāti dvīsu janesu āghāto atibhāriyo bhavissatīti kāruṇṇatāya na paṭisedhesi. Api cassa evaṃ ahosi, buddhānaṃ avaṇṇakathanaṃ nāma puṇṇacande dosāropanasadisam, ko imassa kathaṃ gaṇhissati? Sayameva kheḷe pacchinne mukhe sukkhe oramissatīti iminā kāraṇena na paṭisedhesi. **Piṇḍapātaṭikkantoti** piṇḍapātapariyesanato apagato.

147. Kodhanoti caṇḍo pharuso. **Moghapurisoti** tucchapuriso. Yassa hi tasmim attabhāve maggaphalānaṃ upanissayo natthi, taṃ buddhā “moghapuriso”ti vadanti. Upanissaye satipi tasmim khaṇe magge vā phale vā asati “moghapuriso”ti vadantiyeva. Imassa pana tasmim attabhāve maggaphalānaṃ upanissayo samucchinnoyeva, tena taṃ “moghapuriso”ti āha. **Kodhā ca panassa esā vācā bhāsītā**ti esā ca panassa vācā kodhena bhāsītā.

Kasmā panesa bhagavato kuddhoti? Ayañhi pubbe bhagavantaṃ upasaṅkamitvā dibbacakkhuparikammaṃ pucchi. Athassa bhagavā kathesi. So dibbacakkhuṃ nibbattetvā ālokaṃ vaḍḍhetvā devaloke olokento nandanavanacittalatāvanaphārusakavanamissakavanesu dibbasampattiṃ anubhavamāne devaputte ca devadhītarō ca disvā etesaṃ evarūpāya attabhāvasampattiyā tṭhitānaṃ kīvamadhuro nu kho saddo bhavissatīti saddaṃ sotukāmo hutvā dasabalaṃ upasaṅkamitvā dibbasotadhātuparikammaṃ pucchi. Bhagavā panassa dibbasotadhātuyā upanissayo natthīti nītvā parikammaṃ na kathesi. Na hi buddhā upanissayavirahita tassa parikammaṃ kathenti. So bhagavati āghātaṃ bandhitvā cintesi “ahaṃ samaṇaṃ gotamaṃ paṭhamaṃ dibbacakkhuparikammaṃ pucchiṃ, so ‘mayhaṃ taṃ sampajjatu vā mā vā sampajjatū’ti kathesi. Ahaṃ pana paccattapurisakārena taṃ nibbattetvā dibbasotadhātuparikammaṃ pucchiṃ, taṃ me na kathesi. Addhāssa evaṃ hoti ‘ayaṃ rājapabbajito dibbacakkhuññaṃ nibbattetvā dibbasotadhātuññaṃ nibbattetvā cetopariyaññaṃ nibbattetvā āsavānaṃ khayaññaṃ nibbattetvā mayā samasamo bhavissatīti issāmacchariyavasena mayhaṃ na kathetī’ti. Bhiyyoso āghātaṃ bandhitvā kāsāyāni chaḍḍetvā gihibhāvaṃ patvāpi na tuṇhībhūto vicarati. Dasabalaṃ pana asatā tucchena abbhācikkhanto vicarati. Tenāha bhagavā “kodhā ca panassa esā vācā bhāsītā”ti.

Vaṇṇo heso, sārīputtāti, sārīputta, tathāgatena satasahassakappādhikāni cattāri asaṅkhyeyyāni pāramiyo pūrentena etadatthameva vāyāmo kato “desanāddhammo me niyyāniko bhavissatī”ti. Tasmā yo evaṃ vadeyya, so vaṇṇaṃyeva tathāgatassa bhāsati. Vaṇṇo heso, sārīputta, tathāgatassa guṇo eso tathāgatassa, na aguṇoti dasseti.

Ayampi hi nāma sārīputtātiadinā kiṃ dasseti? Sunakkhattena paṭisiddhassa uttarimanussadhammassa attani atthitaṃ dasseti. Bhagavā kira ayaṃ, sārīputta, sunakkhatto moghapuriso natthi tathāgatassa uttarimanussadhammoti vadati. Mayhañca sabbaññutaññānaṃ nāma atthi, iddhiḍḍhaññaṃ nāma atthi, dibbasotadhātuññaṃ nāma atthi, cetopariyaññaṃ nāma atthi, dasabalaññaṃ nāma atthi, catuvesārajaññaṃ nāma atthi, aṭṭhasu parisāsu akampanaññaṃ nāma atthi, catuyoniparicchedakaññaṃ nāma atthi, pañcagatiparicchedakaññaṃ nāma atthi, sabbepi cete uttarimanussadhammāyeva. Evarūpesu uttarimanussadhammesu ekassāpi vijānanasamattaṃ dhammanvayamattampi nāma etassa moghapurissassa na bhavissatīti etamatthaṃ dassetuṃ **ayampi hi nāma sārīputtā**tiadinā nayena imaṃ desanaṃ ārabhi. Tattha anvetīti **anvayo**, jānāti, anubujjhatīti attho. Dhammassa anvayo **dhammanvayo**, taṃ taṃ sabbaññutaññānādidhammaṃ jānanaṃpāññāyetaṃ adhivacanaṃ. “Itipi so bhagavā”tiadinā evarūpampi nāma mayhaṃ sabbaññutaññānāsaṅkhātaṃ uttarimanussadhammaṃ vijjamaṇameva atthīti jānituṃ tassa moghapurissassa dhammanvayopi na bhavissatīti dasseti. Iddhiḍḍhaññādisupi evaṃ yojanā veditabbā.

Uttarimanussadhammādivaṇṇanā niṭṭhitā.

Dasabalaññādivaṇṇanā

148. Ettha ca kiñcāpi cetopariyaññānantaraṃ tisso vijjā vattabbā siyumaṃ, yasmā pana tāsu vuttāsu upari dasabalaññaṃ na paripūrati, tasmā tā avatvā tathāgatassa dasabalaññaṃ paripūraṃ katvā dassento **dasa kho panimāni sārīputtā**tiadinā. Tattha **tathāgatabalānī**ti aññehi asādhāraṇāni tathāgatasseva balāni. Yathā vā

pubbabuddhānaṃ balāni puññussayasampattiyā āgatāni, tathā āgatabalānītipi attho. Tattha duvidhaṃ tathāgatabalaṃ kāyabalaṃ nāṇabalaṃ. Tesu kāyabalaṃ hatthikulānusārena veditabbaṃ. Vuttañhetam porāṇehi –

“Kālāvakaṇṇa gaṅgeyyaṃ, paṇḍaraṃ tambapiṅgalaṃ;
Gandhamaṅgalahemaṇṇa, uposathachaddantime dasā”ti.

Imāni hi dasa hatthikulāni. Tattha kālāvakanti pakatihatthikulaṃ datṭhabbaṃ. Yaṃ dasannaṃ purisānaṃ kāyabalaṃ, taṃ ekassa kālāvakahatthino. Yaṃ dasannaṃ kālāvakānaṃ balaṃ, taṃ ekassa gaṅgeyyassa. Yaṃ dasannaṃ gaṅgeyyānaṃ, taṃ ekassa paṇḍarassa. Yaṃ dasannaṃ paṇḍarānaṃ, taṃ ekassa tambassa. Yaṃ dasannaṃ tambānaṃ, taṃ ekassa piṅgalassa. Yaṃ dasannaṃ piṅgalānaṃ, taṃ ekassa gandhahatthino. Yaṃ dasannaṃ gandhahatthīnaṃ, taṃ ekassa maṅgalassa. Yaṃ dasannaṃ maṅgalānaṃ, taṃ ekassa hemavatassa. Yaṃ dasannaṃ hemavatānaṃ, taṃ ekassa uposathassa. Yaṃ dasannaṃ uposathānaṃ, taṃ ekassa chaddantassa. Yaṃ dasannaṃ chaddantānaṃ taṃ ekassa tathāgatassa. Nārāyanasaṅghātabalantipi idameva vuccati. Tadetam pakatihatthigaṇanāya hatthīnaṃ koṭisahassānaṃ purisagaṇanāya dasannaṃ purisakoṭisahassānaṃ balaṃ hoti. Idam tāva tathāgatassa **kāyabalaṃ**.

Nāṇabalaṃ pana pāḷiyaṃ tāva āgatameva. Dasabalaññaṃ, catuvesārajjaññaṃ, aṭṭhasu parisāsu akampanaññaṃ, catuyoniparicchadakaññaṃ, pañcagatiparicchadakaññaṃ. Saṃyuttake (saṃ. ni. 2.34) āgatāni tesattati nāṇāni sattsattati nāṇānīti evaṃ aññānīpi anekāni nāṇasahassāni, etaṃ **nāṇabalaṃ** nāma. Idhāpi nāṇabalameva adhippetam. Nāṇāñhi akampiyaṭṭhena upatthambhanaṭṭhena ca **balanti** vuttaṃ.

Yehi balehi samannāgatoti yehi dasahi nāṇabalehi upeto samupeto. **Āsabhaṃ ṭhānanti** seṭṭhatṭhānaṃ uttamatṭhānaṃ. Āsabhā vā pubbabuddhā, tesam ṭhānanti attho. Apica gavasatajeṭṭhako usabho, gavasahassajeṭṭhako vasabho. Vajasatajeṭṭhako vā usabho, vajasahassajeṭṭhako vasabho. Sabbagavaseṭṭho sabbaparissayasaho seto pāsādiko mahābhāravaho asanisatasaddehipi akampaniyo nisabho, so idha usabhoti adhippeto. Idampi hi tassa pariyaṃvacanaṃ. Usabhassa idanti **āsabhaṃ**. **Ṭhānanti** catūhi pādehi pathaviṃ uppīletvā acalaṭṭhānaṃ. Idam pana āsabhaṃ viyāti āsabhaṃ. Yatheva hi nisabhasaṅkhāto usabho usabhabalena samannāgato catūhi pādehi pathaviṃ uppīletvā acalaṭṭhānena tiṭṭhati, evaṃ tathāgatopi dasahi tathāgatabalehi samannāgato catūhi vesārajapādehi aṭṭhaparipathaviṃ uppīletvā sadevake loke kenaci paccatthikena paccāmittena akampiyo acalaṭṭhānena tiṭṭhati. Evaṃ tiṭṭhamānova taṃ āsabhaṃ ṭhānaṃ paṭijānāti, upagacchati na paccakkhāti attani āropeti. Tena vuttaṃ “āsabhaṃ ṭhānaṃ paṭijānātī”ti.

Parisāsūti aṭṭhasu parisāsu. **Sīhanādaṃ nadatīti** seṭṭhanādaṃ abhītanādaṃ nadati, sīhanādasadisam vā nādaṃ nadati. Ayamatto sīhanādasuttēna dīpetabbo. Yathā vā sīho sahanato hananato ca sīhoti vuccati, evaṃ tathāgato lokadhammānaṃ sahanato parappavādānaṃ hananato sīhoti vuccati. Evaṃ vuttassa sīhassa nādaṃ sīhanādaṃ. Tattha yathā sīho sīhabalena samannāgato sabbattha visārado vīgatalomahaṃso sīhanādaṃ nadati, evaṃ tathāgatasīhopi tathāgatabalehi samannāgato aṭṭhasu parisāsu visārado vīgatalomahaṃso iti rūpantiādīnā nayena nānāvīdhadesanāvīlāsasampannaṃ sīhanādaṃ nadati. Tena vuttaṃ “parisāsu sīhanādaṃ nadatī”ti.

Brahmacakkaṃ pavattetīti ettha **brahmanti** seṭṭham uttamaṃ visiṭṭham. Cakka-saddo panāyaṃ –

Sampattiyaṃ lakkhaṇe ca, rathaṅge iriyāpathe;
Dāne ratanadhammūra-cakkādīsū ca dissati;
Dhammacakke idha mato, taṅca dvedhā vibhāvaye.

“Cattārimāni, bhikkhave, cakkāni, yehi samannāgatānaṃ devamanussāna”ntiādīsū (a. ni. 4.31) hi ayam sampattiyaṃ dissati. “Pādālesu cakkāni jātanī”ti (dī. ni. 2.35) ettha lakkhaṇe. “Cakkaṃva vahato pada”nti (dha. pa. 1) ettha rathaṅge. “Catucakkaṃ navadvāra”nti (saṃ. ni. 1.29) ettha iriyāpathe. “Dadaṃ bhuñja mā ca pamādo, cakkaṃ pavattaya sabbapāṇina”nti (jā. 1.7.149) ettha dāne. “Dibbaṃ cakkaratanaṃ pāturahosī”ti (dī. ni. 2.243) ettha ratanacakke. “Mayā pavattitaṃ cakka”nti (su. ni. 562) ettha dhammacakke. “Icchāhatassa posassa, cakkaṃ bhamati matthake”ti (jā. 1.1.104; 1.5.103) ettha uracakke. “Khurapariyantena cepi cakkenā”ti (dī. ni. 1.166) ettha paharaṇacakke. “Asanivicakka”nti (dī. ni. 3.61; saṃ. ni. 2.162) ettha asanimaṇḍale. Idha panāyaṃ dhammacakke adhippeto.

Taṃ pana dhammacakkaṃ duvidhaṃ hoti paṭivedhaññañceva desanāññañca. Tattha paññāpabhāvitam attano ariyabalāvahaṃ paṭivedhaññaṃ. Karuṇāpabhāvitam sāvakaṇaṃ ariyabalāvahaṃ desanāññaṃ. Tattha paṭivedhaññaṃ uppajjamaṇaṃ uppannanti duvidhaṃ. Tañhi abhinikkhamaṇato yāva arahattamaggā uppajjamaṇaṃ, phalakkhaṇe uppannaṃ nāma. Tusitabhavaṇato vā yāva mahābodhipallaṅke arahattamaggā uppajjamaṇaṃ, phalakkhaṇe uppannaṃ nāma. Dīpaṅkaradasabalato paṭṭhāya vā yāva arahattamaggā uppajjamaṇaṃ, phalakkhaṇe uppannaṃ nāma. Desanāññaṃpi pavattamaṇaṃ pavattanti duvidhaṃ. Tañhi yāva aññātakonḍaññaṃ sotāpattimaggā pavattamaṇaṃ, phalakkhaṇe pavattaṃ nāma. Tesu paṭivedhaññaṃ lokuttaraṃ, desanāññaṃ lokiyaṃ. Ubhayampi panetaṃ aññehi asādhāraṇaṃ, buddhānaṃyeva orasaññaṃ.

Idāni yehi balehi samannāgato tathāgato āsabaṃ ṭhānaṃ paṭijānāti, yāni āditova “dasa kho paṇimāni, sārīputta, tathāgatassa tathāgatabalāni”ti nikkhittāni, tāni vitthārato dassetuṃ **katamāni dasa? Idha, sārīputta, tathāgato ṭhānañca ṭhānatoti**ādīmāha. Tattha **ṭhānañca ṭhānatoti** kāraṇaṇca kāraṇato. Kāraṇaṇhi yasmā tattha phalaṃ tiṭṭhati tadāyattavuttīyāya uppajjati ceva pavattati ca, tasmā ṭhānanti vuccati. Taṃ bhagavā “ye ye dhammā yesaṃ yesaṃ dhammānaṃ hetū paccayā uppādāya, taṃ taṃ ṭhānaṃ. Ye ye dhammā yesaṃ yesaṃ dhammānaṃ na hetū na paccayā uppādāya, taṃ taṃ aṭṭhāna”nti pajānanto ṭhānañca ṭhānato aṭṭhānañca aṭṭhānato yathābhūtaṃ pajānāti. Abhidhamme panetaṃ, “tattha katamaṃ tathāgatassa ṭhānañca ṭhānato aṭṭhānañca aṭṭhānato yathābhūtaṃ ṇāṇa”ntiādīnā (vibha. 809) nayena vitthāritameva. **Yampīti** yena ṇāṇena. **Idampi, sārīputta, tathāgatassāti** idampi ṭhānāṭṭhānaññaṃ tathāgatassa tathāgatabalaṃ nāma hotīti attho. Evaṃ sabbapadesu yojanā veditabbā.

Kammasamādānānanti samādiyitvā katānaṃ kusalākusalakammānaṃ, kammameva vā kammasamādānaṃ. **Ṭhānaso hetusoti** paccayato ceva hetuto ca. Tattha gatiupadhikālapayogā vipākassa ṭhānaṃ. Kammaṃ hetu. Imassa pana ṇāṇassa vitthārakathā “atthekaccāni pāpakāni kammasamādānāni gatisampattiṭṭhāni na vipaccantī”tiādīnā (vibha. 810) nayena **abhidhamme** āgatāyeva.

Sabbatthagāmininti sabbagatigāminīṃ agatigāminiñca. **Paṭipadanti** maggaṃ. **Yathābhūtaṃ pajānātīti** bahūsupi manussesu ekameva pāṇaṃ ghātentesu imassa cetanā nirayagāminī bhavissati, imassa cetanā tiracchānāyonigāminīti iminā nayena ekavattusmimpi kusalākusalacetanāsankhātānaṃ paṭipattīnaṃ aviparītato sabhāvaṃ jānāti. Imassa ca ṇāṇassa vitthārakathā “tattha katamaṃ tathāgatassa sabbatthagāminīṃ paṭipadaṃ yathābhūtaṃ ṇāṇaṃ? Idha tathāgato ayaṃ maggo ayaṃ paṭipadā nirayagāminīti pajānāti”tiādīnā (vibha. 811) nayena **abhidhamme** āgatāyeva.

Anekadhātunti cakkhuhātuādīhi kāmādhātuādīhi vā dhātūhi bahudhātuṃ. **Nānādhātunti** tāsāmyeva dhātūnaṃ vilakkhaṇatāya nānappakāradhātuṃ. **Lokanti** khandhāyatanadhātulokaṃ. **Yathābhūtaṃ pajānātīti** tāsāṃ tāsāṃ dhātūnaṃ aviparītato sabhāvaṃ paṭivijjhati. Idampi ṇāṇaṃ “tattha katamaṃ tathāgatassa anekadhātunānādhātulokaṃ yathābhūtaṃ ṇāṇaṃ, idha tathāgato khandhanānattaṃ pajānāti”tiādīnā nayena **abhidhamme** vitthāritameva.

Nānādhimuttikatanti hīnādīhi adhimuttīhi nānādhimuttikabhāvaṃ. Idampi ṇāṇaṃ, “tattha katamaṃ tathāgatassa sattānaṃ nānādhimuttikaṃ yathābhūtaṃ ṇāṇaṃ, idha tathāgato pajānāti santi sattā hīnādhimuttikā”ti ādinā nayena **abhidhamme** vitthāritameva.

Parasattānanti padhānasattānaṃ. **Parapuggalānanti** tato paresaṃ hīnasattānaṃ. Ekattameva vā etaṃ padadvayaṃ. Veneyyavasena pana dvedhā vuttaṃ. **Indriyaparopariyattanti** saddhādīnaṃ indriyānaṃ parabhāvaṃ aparabhāvañca, vuddhiñca hāniñcāti attho. Imassapī ṇāṇassa vitthārakathā – “tattha katamaṃ tathāgatassa parasattānaṃ parapuggalānaṃ indriyaparopariyattaṃ yathābhūtaṃ ṇāṇaṃ, idha tathāgato sattānaṃ āsayaṃ pajānāti anusayaṃ pajānāti”tiādīnā (vibha. 814) nayena **abhidhamme** āgatāyeva.

Jhānavimokkhasamādhisamāpattīnanti paṭhamādīnaṃ catunnaṃ jhānaṃ rūpī rūpāni passatītiādīnaṃ aṭṭhannaṃ vimokkhānaṃ savitakkasavicārādīnaṃ tiṇṇaṃ samādhīnaṃ paṭhamajjhānasamāpattīādīnañca navannaṃ anupubbasaṃpattīnaṃ. **Samkilesanti** hānabhāgiyadhammaṃ. **Vodānanti** visesabhāgiyadhammaṃ. **Vuṭṭhānanti** “vodānampi vuṭṭhānaṃ. Tamhā tamhā samādhimhā vuṭṭhānampi vuṭṭhāna”nti (vibha. 828) evaṃ vuttapaguṇajjhānañceva bhavaṅgaphalasaṃpattiyo ca. Heṭṭhimaṃ heṭṭhimañhi paguṇajjhānaṃ uparimassa uparimassa padaṭṭhānaṃ hotī. Tasmā “vodānampi vuṭṭhāna”nti vuttaṃ. Bhavaṅgena pana sabbajjhānehi

vuṭṭhānaṃ hoti. Phalasaṃpattiyā nirodhasaṃpattito vuṭṭhānaṃ hoti. Taṃ sandhāya “tamhā tamhā samādhimhā vuṭṭhānampi vuṭṭhāna”nti vuttaṃ. Idampi ñānaṃ “tatha katamaṃ tathāgatassa jhānavimokkhasamādhisaṃpattinaṃ saṃkilesaṃ vodānaṃ vuṭṭhānaṃ yathābhūtaṃ ñānaṃ, jhāyīti cattāro jhāyī, atthekacco jhāyī sampattiṃyeva samānaṃ vipattīti pacceṭī”tiādina (vibha. 828) nayena **abhidhamme** vitthāritaṃ. Sattanaṃ ñānaṃ vitthārakathāvinicchayo sammohavinodaniyaṃ **vibhaṅgaṭṭhakathāyaṃ** vutto. Pubbenivāsānussatidibbacakkuñāṅkathā **visuddhimage** vitthāritā. Āsavakkhayaṅkathā bhayaḥherave.

149. Imāni kho sārīputtāti yāni pubbe “dasa kho panimāni, sārīputta, tathāgatassa tathāgatabalānī”ti avocaṃ, imāni tānīti appanaṃ karoti. Tattha paravādīkathā hoti – **dasabalañānaṃ** nāma pāṭiyekkaṃ natthi, sabbaññūtaññānaṃ pabhedoti. Taṃ na tathā daṭṭhabbaṃ. Aññameva hi dasabalañānaṃ, aññaṃ sabbaññūtaññānaṃ. Dasabalañānañhi sakasakakicameva jānāti. Sabbaññūtaññānaṃ tampi tato avasesampi pajānāti. Dasabalañānesu hi paṭhamāṃ kāraṇākāraṇameva jānāti. Dutiyāṃ kammantaravipākantameva. Tatiyaṃ kammaparicchedameva. Catutthaṃ dhātunānattakāraṇameva. Pañcamaṃ sattānaṃ ajjhāsāyādhimuttimeva. Chaṭṭhaṃ indriyānaṃ tikkhamudubhāvameva. Sattamaṃ jhānādīhi saddhiṃ tesāṃ saṃkilesādimeva. Aṭṭhamaṃ pubbenivuttakhandhasantatimeva. Navamaṃ sattānaṃ cutipāṭisaṃdhammeva. Dasamaṃ saccaparicchedameva. Sabbaññūtaññānaṃ pana etehi jānītabbañca tato uttariñca pajānāti. Etesāṃ pana kiccaṃ na sabbaṃ karoti. Tañhi jhānaṃ hutvā appetuṃ na sakkoti, iddhi hutvā vikubbituṃ na sakkoti, maggo hutvā kilese khetuṃ na sakkoti. Apica paravādī evaṃ pucchitabbo – “dasabalañānaṃ nāma etaṃ savitakkasavicāraṃ avitakkavicāramattaṃ avitakkaavicāraṃ kāmāvacaraṃ rūpāvacaraṃ arūpāvacaraṃ lokiyaṃ lokuttara”nti? Jānanto paṭipāṭiyā satta ñānāni savitakkasavicārānīti vakkhati. Tato parāni dve avitakkaavicārānīti vakkhati. Āsavakkhayañānaṃ siyā savitakkasavicāraṃ, siyā avitakkaavicāramattaṃ, siyā avitakkaavicārānīti vakkhati. Tathā paṭipāṭiyā satta kāmāvacarāni, tato parāni dve rūpāvacarāni, avasāne ekaṃ lokuttarānīti vakkhati, sabbaññūtaññānaṃ pana savitakkasavicārameva kāmāvacarameva lokiyamevāti vakkhati.

Evamettha anupadavañṇanaṃ katvā idāni yasmā tathāgato paṭhamāyeva ṭhānāṭṭhānañānaṃ veneyyasattānaṃ āsavakkhayaṅkathāyādhigamassa ceva anadhigamassa ca ṭhānāṭṭhānabhūtaṃ kilesāvaraṅgabhāvaṃ passati, lokiyasammādiṭṭhiṭṭhānadassanato niyatamicchādīṭṭhiṭṭhānābhāvadassanato ca. Atha nesaṃ kammavipākāñānaṃ vipākāvaraṅgabhāvaṃ passati, tihetukapaṭisaṃdhidassanato. Sabbatthagāminīpaṭipadāñānaṃ kammāvaraṅgabhāvaṃ passati, anantariyakammābhāvadassanato. Evaṃ anāvaraṅgānaṃ anekadhātunādhātūñānaṃ anukūladhammadesanattaṃ cariyavisesaṃ passati, dhātuvemattadassanato. Atha nesaṃ nānādhimuttikatāñānaṃ adhimuttiṃ passati, payogaṃ anādiyitvāpi adhimuttivasena dhammadesanattaṃ. Athevaṃ diṭṭhādhiṃ uttānaṃ yathāsatti yathābalaṃ dhammaṃ desetūṃ indriyaparopariyattañānaṃ indriyaparopariyattaṃ passati, saddhādīnaṃ tikkhamudubhāvadassanato. Evaṃ pariññānīndriyaparopariyattā pana te sace dūre hontī, paṭhamajjhānādīsu vasībhūtattā iddhivisesena te khippaṃ upagacchati. Upagantvā ca nesaṃ pubbenivāsānussatīñānaṃ pubbaṅgābhāvaṃ, dibbacakkuñāṅgānubhāvato pattabbena cetopariyāñānaṃ sampati cittavisesaṃ passanto āsavakkhayañāṅgānubhāvena āsavakkhayaṅgāminiyā paṭipadāya vigatasammohattā āsavakkhayaṅgā dhammaṃ deseti. Tasmā iminā anukkamaṃ imāni dasabalāni vuttānīti vedītabbāni.

Taṃ, sārīputta, vācaṃ appahāyātiādīsu puna evarūpiṃ vācaṃ na vakkhāmīti vadanto taṃ vācaṃ pajahati nāma. Puna evarūpaṃ cittaṃ na uppādessāmīti cintento cittaṃ pajahati nāma. Puna evarūpaṃ diṭṭhiṃ na gaṇhissāmīti pajahanto diṭṭhiṃ paṭinissajjati nāma, tathā akaronto neva pajahati, na paṭinissajjati. **So yathābhattaṃ nikkhitto evaṃ nirayeti** yathā nirayapālehi āharitvā niraye ṭhapito, evaṃ niraye ṭhapitoyevāti vedītabbo.

Idānissa atthasādhakaṃ upamaṃ dassento **seyyathāpīti**ādīmāha. Tattha **sīlasampannoti**ādīsu lokiyalokuttarā sīlasamādhīpaññā vedītabbā. Lokuttaravaseneva vinivattetumpi vaṭṭati. Ayañhi sammāvācākamantāṅgāni sīlasampanno, sammāvāyāmasatisamādhīhi samādhisampanno, sammādiṭṭhisāṅkappēhi paññāsampanno, so evaṃ sīlādisampanno bhikkhu yathā diṭṭheva dhamme imasmiṃyeva attabhāve aññaṃ ārādheti arahattaṃ pāpuṅāti, evaṃ sampadamidaṃ, sārīputta, vadāmi imampi kāraṇaṃ evarūpameva. Yathā hi maggānantaraṃ avirajjhītvā phalaṃ nibbattati, evameva imassāpi puggalassa cutīnantaraṃ avirajjhītvā niraye paṭisaṃdhi hoṭīti dasseti. Sakalasmīñhi buddhavacane imāya upamāya gāḥhataṃ katvā vuttaupamaṃ nāma natthi.

150. Vesārajjanīti ettha sārājjaṭṭhāpakko vesārajjaṃ, catūsu ṭhānesu sārājjaḅhāvaṃ paccavekkhantassa uppannasomanassamaññaṃ nāmaṃ. **Sammāsambuddhassa te paṭijānato**ti ahaṃ sammāsambuddho, sabbe dhammā mayā abhisambuddhāti evaṃ paṭijānato tava. **Anabhisambuddhāti** ime nāma dhammā tayā anabhisambuddhā. **Tatra vatāti** tesu vata anabhisambuddhāti evaṃ dassitadhammesu. **Sahadhammenāti** sahetunā sakāraṇena vacanena sunakkhatto viya vippalapanto appamaṇaṃ. **Nimittametanti** ettha puggalopi dhammopi nimittanti adhippeto. Taṃ puggalaṃ na passāmi, yo maṃ paṭicodessati, taṃ dhammaṃ na passāmi, yaṃ dassetvā ayaṃ nāma dhammo tayā anabhisambuddhoti maṃ paṭicodessatīti ayamettha attho. **Khemappattoti** khemaṃ patto, sesapadadvayaṃ imasseva vevacanaṃ. Sabbañhetuṃ vesārajjaññaṃ sandhāya vuttaṃ. Dasabalassa hi ayaṃ nāma dhammo tayā anabhisambuddhoti codakaṃ puggalaṃ vā codanākāraṇaṃ anabhisambuddhadhammaṃ vā apassato sabhāvabuddhoyeva vā samāno ahaṃ buddhosmīti vadāmīti paccavekkhantassa balavataraṃ somanassaṃ uppajjati. Tena sampayuttaṃ ñaṇaṃ **vesārajjaṃ** nāma. Taṃ sandhāya ‘‘khemappatto’’tiādimāha. Evaṃ sabbattha attho veditabbo.

Antarāyikā dhammāti ettha pana antarāyaṃ karontīti **antarāyikā**, te atthato sañcicca vītikantā satta āpattikkhandhā. Sañcicca vītikantañhi antamaso dukkaṭa-dubbhāsitaṃ maggaphalānaṃ antarāyaṃ karoti. Idha pana methunadhammo adhippeto. Methunaṃ sevato hi yassa kassaci nissamaṃyameva maggaphalānaṃ antarāyo hoti. **Yassa kho pana tesu atthāyāti** rāgakkhayādīsu yassa atthāya. **Dhammo desitoti** asubhabhāvanādīdhammo kathito. **Tatra vata manti** tasmīṃ aniyāyānikadhamme maṃ. Sesamaṃ vuttanayeneva veditabbaṃ.

Dasabalaññādivaṇṇanā niṭṭhitā.

Atṭhapaṇisavaṇṇanā

151. ‘‘Atṭha kho imā sārīputtā’’ti idaṃ kasmā āradhamaṃ? Vesārajjaññaṃ baladassanattaṃ. Yathā hi byattaṃ paṇisaṃ ajjhogāhetvā viññūnaṃ cittaṃ āradhanasamatthāya kathāya dhammakathikassa chekabhāvo paññāyati, evaṃ imā atṭha paṇisā patvā vesārajjaññaṃ vesārajjabhāvo sakkā ñātunti vesārajjaññaṃ balaṃ dassento, **atṭha kho imā sārīputtā**tiādimāha.

Tattha **khattiyapaṇisā**ti khattiyānaṃ sannipatitvā nisinnaṭṭhānaṃ, esa nayo sabbattha. Mārakāyikānaṃ pana sannipatitvā nisinnaṭṭhānaṃ māraparisā veditabbā, na mārānaṃ. Sabbāpi cetā paṇisā uggaṭṭhānadassanavasena gahitā. Manussa hi ‘‘ettha rājā nisinna’’ti pakativacanaṃ vattumaṃ na sakkonti, kacchehi sedā muccanti. Evaṃ uggaṭṭhānaparisā. Brāhmaṇā tīsu vedesu kusalā honti, gahapatayo nānāvohāresu ceva akkharacintāya ca. Samaṇā sakavādaparavādesu kusalā honti. Tesamaṃ majjhe dhammakathākathanaṃ nāma ativiya bhāro. Amanussaṃpi uggaṭṭhā honti. Amanussoti hi vuttamattepi manussānaṃ sakalasarīraṃ saṅkampaṃ, tesamaṃ rūpaṃ vā disvā saddamaṃ vā sutvā sattaṃ visaññino honti. Evaṃ amanussapaṇisā uggaṭṭhā. Tāsupi dhammakathākathanaṃ nāma ativiya bhāro. Iti uggaṭṭhānadassanavasena tā gahitāti veditabbā.

Ajjhogāhatīti anupavisati. **Anekasataṃ khattiyapaṇisanti** bimbisārasamāgama ñāṭisamāgama licchavīsamāgasadisamaṃ. Aññesupi cakkavāḷesu labbhāyeva. Kiṃ pana bhagavā aññāni cakkavāḷānīpi gacchatīti? Āma gacchati. Kīdiso hutvā? Yādisā te, tādisoyeva. Tenevāha ‘‘abhijānāmi kho paṇāhaṃ, ānanda, anekasataṃ khattiyapaṇisaṃ upasaṅkamitā, tattha yādisako tesamaṃ vaṇṇo hoti, tādisako mayamaṃ vaṇṇo hoti. Yādisako tesamaṃ saro hoti, tādisako mayamaṃ saro hoti. Dhammiyā kathāya sandassemi samādapemi samuttejemi sampamaṃsemi. Bhāsamaṇaṅca maṃ na jānanti ‘ko nu kho ayaṃ bhāsati devo vā manusso vā’’ti. Dhammiyā kathāya sandassetvā samādapetvā samuttejetvā sampamaṃsetvā antaradhāyāmi. Antarahitaṅca maṃ na jānanti ‘ko nu kho ayaṃ antarahito devo vā manusso vā’’ti (dī. ni. 2.172).

Khattiyā keyūraṅgadamālāgandhādivibhūsitā nānāviraḅavasana āmukkamaṅikuṅḅalā moḷidharā honti. Kiṃ bhagavāpi evaṃ attānaṃ maṅḅeti? Te ca odātāpi honti kāḷāpi maṅgulacchavīpi. Kiṃ satthāpi evarūpo hotīti? Satthā attano pabbajitavaseneva gacchati, tesamaṃ pana tādiso hutvā upaṭṭhāti, gantvā rājāsane nisinnaṃ attānaṃ dasseti, tesamaṃ ‘‘ajja amhākaṃ rājā ativiya virocatī’’ti hoti. Te ca bhinnassarāpi honti gaggassarāpi kākassarāpi. Satthā brahmāsareneva dhammaṃ katheti. Tādisako mayamaṃ saro hotīti idaṃ pana bhāsantaraṃ sandhāya kathitaṃ. Manussaṃnaṃ pana taṃ sutvā ‘‘ajja rājā madhurena sarena katheti’’ti hoti. Kathetvā pakkante ca bhagavati puna rājānaṃ āgataṃ disvā ‘‘ko nu kho aya’’nti vīmaṃsā uppajjati.

Idaṃ vuttaṃ hoti – ko nu kho ayaṃ imasmiṃ ṭhāne idāneva māgadhabhāsāya sīhaḷabhāsāya madhurena sarena kathento antarāhito, kiṃ devo, udāhu manusso? Kimatthaṃ panevaṃ ajānantānaṃ dhammaṃ desetīti? Vāsantthāya. Evaṃ sutopi hi dhammo anāgate paccayo hotiyevāti anāgataṃ paṭicca desetīti.

Sannisinnapubbanti saṅgama nisinnapubbaṃ. **Sallapitapubbanti** ālāpasallāpo katapubbo. **Sākacchāti** dhammasākacchāpi samāpajjitapubbā. **Anekasataṃ brāhmaṇaparisi**ntiādīnampi soṇadaṇḍasamāgamādivasena ceva aññacakkavāḷavasena ca sambhavo vedītabbo.

Aṭṭhāparisavaṇṇanā niṭṭhitā.

Catuyonivaṇṇanā

152. Catasso kho imā, sārīputta, yoniyoti ettha yonīti khandhakoṭṭhāsassapi kāraṇassapi passāvamaggassapi nāmaṃ. “Catasso nāgayoniyo catasso supaṇṇayoniyo”ti (saṃ. ni. 3.342, 392) ettha hi khandhakoṭṭhāso yoni nāma. “Yoni hesā bhūmija phalassa adhigamāyā”ti (ma. ni. 2.227) ettha kāraṇaṃ. “Na cāhaṃ brāhmaṇaṃ brūmi, yonijaṃ mattisambhava”nti (ma. ni. 2.457; dha. pa. 396) ettha passāvamaggo. Idha pana khandhakoṭṭhāso yonīti adhippeto. Tattha aṇḍe jātā **aṇḍajā**. Jalābumhi jātā **jalābujā**. Saṃsede jātā **saṃsedajā**. Vinā etehi kāraṇehi uppativā viya nibbattā abhinibbattāti **opapātikā**. **Abhinibbhijja jāyantī** bhindivā nikkhamanavasena jāyanti. **Pūtikunape vāti**ādīhi anīṭṭhaṭṭhānāneva dassitāni. Iṭṭhesupi sappitelamadhuphānitādisu sattā jāyanti eva. **Devāti**ādīsu cātumahārājikato paṭṭhāya uparidevā opapātikāva honti. Bhūmadevā pana catuyonikā. **Ekacce ca manussāti** manussesu keci devā viya opapātikā ca honti. Yebhuyyena panete jalābujāva, aṇḍajāpi ettha kontaputtā dvebhātiyattherā viya, saṃsedajāpi padumagabbhe nibbattapokkharasātibrahmaṇapadumavatidevīdayo viya, evaṃ vinipātikesu nījjhāmataṇhikapetā nerayikā viya opapātikāyeva, avasesā catuyonikāpi honti. Yathā te evaṃ yakkhāpi sabbacatuppadapakkhijātīdighajātīdayopi sabbe catuyonikāyeva.

Catuyonivaṇṇanā niṭṭhitā.

Pañcagatīvaṇṇanā

153. Pañca kho imā, sārīputta, gatiyoti ettha sukatadukkaṭakammavasena gantabbāti gatiyo. Apica gatigati nibbattigati ajjhāsāyagati vibhavagati nipphattigatīti bahuvidhā gati nāma. Tattha “taṃ gatiṃ pecca gacchāmi”ti (a. ni. 4.184) ca, “yassa gatiṃ na jānanti, devā gandhabbamānusā”ti (dha. pa. 420) ca ayaṃ **gatigati** nāma. “Imesaṃ kho ahaṃ bhikkhūnaṃ silavantānaṃ neva jānāmi gatiṃ vā agatiṃ vā”ti (ma. ni. 1.508) ayaṃ **nibbattigati** nāma. “Evampi kho te ahaṃ brahme gatiṃ ca pajānāmi jutiṇca pajānāmi”ti (ma. ni. 1.503) ayaṃ **ajjhāsāyagati** nāma. “Vibhavo gati dhammānaṃ, nibbānaṃ arahato gatī”ti (pari. 339) ayaṃ **vibhavagati** nāma. “Dveyeva gatiyo bhavanti anaññā”ti (dī. ni. 1.258; 2.34) ayaṃ **nipphattigati** nāma. Tāsu idha gatigati adhippetā.

Nirayotiādīsu niratiatthena nirassādaṭṭhena **nirayo**. Tiriyāṃ añchitāti **tiracchānā**. Tesā yoni **tiracchānayoni**. Peccabhāvaṃ pattānaṃ visayoti **pettivisayo**. Manaso ussannattā **manussā**. Pañcahi kāmagaṇehi attano attano ānubhāvehi ca dibbantīti **devā**. **Nirayañcāhaṃ, sārīputtā**tiādīsu nirayoti saddhiṃ okāsena khandhā. **Tiracchānayoniṃ cāti**ādīsipi eseva nayo. **Maggāṃ paṭipadanti** ubhayenāpi vuttagatisaṃvattanika kammameva dasseti. **Yathā ca paṭipannoti** yena maggena yāya paṭipadāya paṭipannoti ubhayampi ekato katvā niddisati. **Apāyanti**ādīsu vaḍḍhisāṅkhātā sukhasāṅkhātā vā ayā apētattā **apāyo**. Dukkassa gati paṭisaraṇanti **duggati**. Dukkaṭakārino ettha vinipātanti **vinipāto**. **Nibbānañcāhanti** idaṃ pana na kevalaṃ gatigatimeva, gatinissaraṇaṃ nibbānampi jānāmīti dassanattamāha. Idha **maggo paṭipadāti** ubhayenāpi ariyamaggo vutto.

Pañcagatīvaṇṇanā niṭṭhitā.

Ñāṇappavattākāraṇaṇṇanā

154. Idāni yathāvuttesu sattasu ṭhānesu aṭṭhasu ṭhānesu attano ñāṇappavattākāraṇaṃ dassento **idhāhaṃ**,

sāriputtātiādīmāha.

Tattha **ekantadukkhā**ti niccadukkhā nirantaradukkhā. **Tibbā**ti bahalā. **Kaṭukā**ti kharā. **Seyyathā**pītiādīni opammadassanattaṃ vuttāni. Tattha **kāsū**ti āvāṭopi vuccati rāsipi.

“Kinnu santaramānova, kāsūṃ khaṇasi sārathi;
Puṭṭho me samma akkhāhi, kiṃ kāsuyā karissasī”ti. (jā. 2.22.3) –

Ettha hi āvāṭo kāsu nāma.

“Āngārakāsūṃ apare phunanti, narā rudantā paridaḍḍhagattā”ti. (jā. 2.22.462) –

Ettha rāsī. Idha pana āvāṭo adhippeto. Tenevāha “sādhikaporisā”ti. Tattha sādhikaṃ porisaṃ pamāṇaṃ assāti **sādhikaporisā**, atirekapañcaratanāti attho. **Vitaccikānaṃ vitadhūmānanti** etaṃ pariḷāhassa balavabhāvadīpanattaṃ vuttaṃ, acciyā vā sati dhūme vā sati, vāto samuṭṭhāti, tena pariḷāho na balavā hoti. **Ghammaparetoti** ghammānugato. **Tasitoti** jātataṇho. **Pipāsitoti** udakaṃ pātukāmo. **Ekāyanena maggenā**ti ekapatheneva maggena, anukkamaniyena ubhosu passesu nirantarakaṇṭakarukkhagahanena. **Pañidhāyāti** āngārakāsuyāṃ patthanā nāma natthi, āngārakāsūṃ ārabba pana iriyāpathassa ṭhapitattā evaṃ vuttaṃ.

Evameva khoti ettha idaṃ opammasaṃsandanaṃ – āngārakāsu viya hi nirayo daṭṭhabbo.

Āngārakāsūmaggo viya nirayūpagaṃ kammaṃ. Maggārulho viya kammaṃsaṃgī puggalo. Cakkhumā puriso viya dībbacakkhuko bhagavā. Yathā so puriso maggārulhaṃ disvā vijānāti “ayaṃ iminā maggena gantvā āngārakāsuyāṃ patissati”ti, evamevaṃ bhagavā pañātipātādīsu yaṃkiñci kammaṃ āyūhantaṃ evaṃ jānāti “ayaṃ imaṃ kammaṃ katvā niraye nibbattissati”ti. Yathā so puriso aparabhāge taṃ āngārakāsuyā patitaṃ passati, evameva bhagavā aparabhāge “so puriso taṃ kammaṃ katvā kuhiṃ nibbatta”ti ālokaṃ vaḍḍhetvā dībbacakkhunā olokento niraye nibbattaṃ passati pañcavidhabandhanādīmahādukkhaṃ anubhavantaṃ. Tattha kiñcāpi tassa kammāyūhanakāle añño vaṇṇo, niraye nibbattassa añño. Athāpi “so satta taṃ kammaṃ katvā kattha nibbatta”ti olokentassa anekasahassānaṃ sattānaṃ majjhe ṭhitopi “ayaṃ so”ti soyeva satta āpāthaṃ āgacchati, “dībbacakkhubalaṃ nāma eta”nti vadanti.

Dutiyaupamāyaṃ yasmā āngārakāsuyāṃ viya gūthakūpe pariḷāho natthi, tasmā “ekantadukkhā”ti avatvā “dukkhā”tiādīmāha. Etthāpi purimanayeneva opammasaṃsandanaṃ vedītabbaṃ. Imampi hi puggalaṃ bhagavā hatthiyoniādīsu yattha katthaci nibbattaṃ vadhabandhanaākaḍḍhanavikaḍḍhanādīhi mahādukkhaṃ anubhavamānaṃ passatiyeva.

Tatiyaupamāyaṃ **tanupattapalāsoti** na abbhapaṭalaṃ viya tanupaṇṇo, viraḷapaṇṇattaṃ panassa sandhāya idaṃ vuttaṃ. **Kabaracchāyoti** viraḷacchāyo. **Dukkhabahulā**ti pettivisayasmiñhi dukkhameva bahulaṃ, sukhaṃ parittaṃ kadāci anubhavītabbaṃ hoti, tasmā evamāha. Etthāpi purimanayeneva opammasaṃsandanaṃ vedītabbaṃ.

Catutthaupamāyaṃ **bahalapattapalāsoti** nirantaraṇṇo pattasañchanno. **Santacchāyoti** pāsānacchattaṃ viya ghanacchāyo. **Sukhabahulā vedanā**ti manussaloke khattiyakulādīsu sukhabahulā vedanā vedayitabbā hoti, tā vedayamānaṃ nīpannaṃ vā nisinnaṃ vā passāmīti dasseti. Idhāpi opammasaṃsandanaṃ purimanayeneva vedītabbaṃ.

Pañcamaupamāyaṃ **pāsādoti** dīghapāsādo. **Ullittāvalittanti** anto ceva ullittaṃ bahi ca avalittaṃ. **Phusitaggalaṃ**ti dvārābhāhi saddhiṃ supihitakavāṭaṃ. **Gonakatthato**ti caturaṅgulādīhikalomena kāḷakojevāna atthato. **Paṭikatthato**ti unṇāmayena setaattharaṇena atthato. **Paṭalikatthato**ti ghanapupphakena unṇāmayaattharaṇena atthato. **Kadalimigapavarapaccattharaṇoti** kadalimigacammaṃ mayena uttamapaccattharaṇena atthato. Taṃ kira paccattharaṇaṃ setavatthassa upari kadalimigacammaṃ attharivā sībbetvā karontī. **Sauttaracchadoti** saha uttaracchadena, uttaribaddhena rattavitānena saddhinti attho. **Ubhatolohitakūpadhānoti** sīsūpadhānañca pādūpadhānañcāti pallaṅkassa ubhato ṭhapitalohitakūpadhāno. Idhāpi upamāsaṃsandanaṃ purimanayeneva vedītabbaṃ.

Ayaṃ panettha aparabhāgayojanā, yathā so puriso maggāruḷhameva jānāti “ayaṃ etena maggena gantvā pāsādaṃ āruyha kūṭāgāraṃ pavisitvā pallaṅke nisīdissati vā nipajjissati vā”ti, evamevaṃ bhagavā dānādīsu puññakiriyavatthūsu yaṃkiñci kusalakammaṃ āyūhantaṃyeva puggalaṃ disvā “ayaṃ imaṃ katvā devaloke nibbattissatī”ti jānāti. Yathā so puriso aparabhāge taṃ pāsādaṃ āruyha kūṭāgāraṃ pavisitvā pallaṅke nisinnaṃ vā nipannaṃ vā ekantasukhaṃ nirantarasukhaṃ vedanaṃ vedayamānaṃ passati, evamevaṃ bhagavā aparabhāge “so taṃ kalyāṇaṃ katvā kuhiṃ nibbatta”ti ālokaṃ vaḍḍhetvā dibbacakkhunā olovento devaloke nibbattaṃ passati, nandanavanādīsu accharāsaṅghaparivutaṃ dibbasampattiṃ anubhavamānaṃ.

Ñāṇappavattākāraṇaṇā niṭṭhitā.

Āsavakkhayavāraṇaṇā

Āsavakkhayavāre “dibbena cakkhunā”ti avatvā “tameṇaṃ passāmī”ti vuttaṃ. Taṃ kasmāti ce? Niyamābhāvā. Imañhi puggalaṃ dibbacakkhunāpi passissati, cetopariyaññāṇāpi jānissati, sabbaññūtaññāṇāpi jānissatiyeva. **Ekantasukhā vedanā**ti idaṃ kiñcāpi devalokasukhena saddhiṃ byañjanato ekaṃ, atthato pana nānā hoti. Devalokasukhañhi rāgapariḷhādīnaṃ atthitāya na ekanteneva sukhaṃ. Nibbānasukhaṃ pana sabbapariḷhānaṃ vūpasamāya sabbākārena ekantasukhaṃ. Upamāyampi “yathā pāsāde ekantasukhā”ti vuttaṃ. Taṃ maggapariḷhassa avūpasantaṭāya chātājhattatāya pipāsābhībhūtāya ca na ekantameva sukhaṃ. Vanasaṅḍe pana pokkharāṇiyaṃ oruyha rajojallassa pavāhitattā maggadārathassa vūpasantaṭāya bhisamūlakhādanena ceva madhurodakapānena ca khuppiḷāsānaṃ vinītāya udakasāṭakaṃ parivattetvā maṭṭhadukūlaṃ nivāsetvā taṇḍulathavikaṃ ussīsake katvā udakasāṭakaṃ piḷetvā hadaye ṭhapetvā mandamandena ca vātena bījayamānassa nipannattā sabbākārena ekantasukhaṃ hoti.

Evameva khoti ettha idaṃ opammaṣaṃsandanaṃ – pokkharāṇī viya hi ariyamaggo daṭṭhabbo. Pokkharāṇimaggo viya pubbabhāgapaṭipadā. Maggāruḷho viya paṭipadāsamaṅgīpuggalo. Cakkhumā puriso viya dibbacakkhu bhagavā. Vanasaṅḍo viya nibbānaṃ. Yathā so puriso maggāruḷhaṃ disvā jānāti “ayaṃ iminā maggena gantvā pokkharāṇiyaṃ nhatvā ramaṇīye vanasaṅḍe rukkhamūle nisīdissati vā nipajjissati vā”ti, evamevaṃ bhagavā paṭipadaṃ pūrentameva nāmarūpaṃ paricchindantameva paccayapariggahaṃ karontameva lakkhaṇārammaṇāya vipassanāya kammaṃ karontameva jānāti “ayaṃ imaṃ paṭipadaṃ pūretvā sabbaāsava khetvā anāsavaṃ cetovimuttiṃ paññāvimuttinti evaṃ vuttaṃ phalasaṃpattiṃ upasampajja viharissatī”ti. Yathā so puriso aparabhāge tāyaṃ pokkharāṇiyaṃ nhatvā vanasaṅḍaṃ pavisitvā nisinnaṃ vā nipannaṃ vā ekantasukhaṃ vedanaṃ vedayamānaṃ passati, evameva bhagavā aparabhāge taṃ puggalaṃ paṭipadaṃ pūretvā maggaṃ bhāvetvā phalaṃ sacchikatvā nirodhasayanavaragataṃ nibbānārammaṇaṃ phalasaṃpattiṃ appetvā ekantasukhaṃ vedanaṃ vedayamānaṃ passati.

Āsavakkhayavāraṇaṇā niṭṭhitā.

Dukkarakārikādisuddhivaṇaṇā

155. “Abhijānāmi kho panāhaṃ, sārīputta, caturaṅgasamannāgata”nti idaṃ kasmā āraddhaṃ? Pāṭiyekkaṃ anusandhivasena āraddhaṃ. Ayaṃ kira sunakkhatto dukkarakārikāya suddhi hotīti evaṃ laddhiko. Athassa bhagavā mayā ekasmiṃ attabhāve ṭhatvā caturaṅgasamannāgataṃ dukkaraṃ kataṃ, dukkarakāraṇo nāma mayā sadiso natthi. Dukkarakārena suddhiyā sati ahameva suddho bhavyeyyanti dassetuṃ imaṃ desanaṃ ārabhi. Apica ayaṃ sunakkhatto dukkarakārikāya pasanno, so cassa pasannabhāvo, “addasā kho, bhaggava, sunakkhatto licchaviputto acelaṃ korakkhattiyaṃ catukkuṇḍikaṃ chamānikīṇaṃ bhakkhasaṃ mukhena khādantaṃ mukhena bhuñjantaṃ. Disvānassa etadahosi ‘sādhu rūpo vata, bho, ayaṃ samaṇo catukkuṇḍiko chamānikīṇaṃ bhakkhasaṃ mukheneva khādati, mukheneva bhuñjati”ti evamādinā **pāthikasutte** (dī. ni. 3.7) āgatanayena veditabbo.

Atha bhagavā ayaṃ dukkarakārikāya pasanno, mayā ca etasmiṃ attabhāve ṭhatvā caturaṅgasamannāgataṃ dukkaraṃ kataṃ, dukkarakāre pasīdantenāpi anena mayi pasīditabbaṃ siyā, sopissa pasādo mayi natthīti dassento imaṃ desanaṃ ārabhi.

Tatra **brahmācariyanti** dānampi veyyāvaccampi sikkhāpadampi brahmavīhārāpi dhammadeśanāpi

methunaviratipi sadārasantosopi uposathopi ariyamaggopi sakalasāsanampi ajjhāsayopi vīriyampi vuccati.

“Kiṃ te vataṃ kiṃ pana brahmacariyaṃ,
Kissa suciṇṇassa ayaṃ vipāko;
Iddhī jutī balavīriyūpapatti,
Idaṅca te nāga mahāvīmānaṃ.

Ahaṅca bhariyā ca manussaloke,
Saddhā ubho dānapatī ahumhā;
Opānabhūtaṃ me gharaṃ tadāsi,
Santappitā samaṇabrāhmaṇā ca.

Taṃ me vataṃ taṃ pana brahmacariyaṃ,
Tassa suciṇṇassa ayaṃ vipāko;
Iddhī jutī balavīriyūpapatti,
Idaṅca me dhīra mahāvīmāna’’nti. (jā. 2.22.1592, 1593, 1595) –

Imasmiṅhi puṇṇakajātake dānaṃ brahmacariyanti vuttaṃ.

“Kena pāṇi kāmadaḍḍo, kena pāṇi madhussavo;
Kena te brahmacariyena, puṇṇaṃ pāṇimhi ijjhati.

Tena pāṇi kāmadaḍḍo, tena pāṇi madhussavo;
Tena me brahmacariyena, puṇṇaṃ pāṇimhi ijjhatī’’ti. (pe. va. 275) –

Imasmiṃ aṅkurapetavattusmiṃ veyyāvaccamaṃ brahmacariyanti vuttaṃ. “Evaṃ kho taṃ, bhikkhave, tittiriyaṃ nāma brahmacariyaṃ ahoṣī’’ti (cūḷava. 311) imasmiṃ tittirajātake pañcasikkhāpadaṃ brahmacariyanti vuttaṃ. “Taṃ kho pana me pañcasikha brahmacariyaṃ neva nibbidāya na virāgāya na nirodhāya, yāvadeva brahmalokūpapattiyā’’ti (dī. ni. 2.329) imasmiṃ **mahāgovindasutte** brahmavihārā brahmacariyanti vuttaṃ. “Ekasmiṃ brahmacariyasmiṃ, sahassaṃ maccuhāyina’’nti (saṃ. ni. 1.184) ettha dhammadesanā brahmacariyanti vuttā. “Pare abrahmacārī bhavissanti, mayamettha brahmacārī bhavissāmā’’ti (ma. ni. 1.83) sallekhasutte methunavirati brahmacariyanti vuttā.

“Mayaṅca bhariyā nātikkamāma,
Amhe ca bhariyā nātikkamanti;
Aññatra tāhi brahmacariyaṃ carāma,
Tasmā hi amhaṃ daharā na mīyare’’ti. (jā. 1.10.97) –

Mahādhammapālajātake sadārasantoso brahmacariyanti vutto.

“Hīnena brahmacariyena, khattiye upapajjati;
Majjhimena ca devattaṃ, uttamena visujjhatī’’ti. (jā. 1.8.75) –

Evaṃ nimijātake attadamanavasena kato aṭṭhaṅgiko uposatho brahmacariyanti vutto. “Idaṃ kho pana me, pañcasikha, brahmacariyaṃ ekantanibbidāya virāgāya...pe... ayameva ariyo aṭṭhaṅgiko maggo’’ti (dī. ni. 2.329) **mahāgovindasuttasmiṅheva** ariyamaggo brahmacariyanti vutto. “Tayidaṃ brahmacariyaṃ iddhaṅceva phītaṅca vitthārikaṃ bāhujaññaṃ puthubhūtaṃ yāva devamanussehi suppakāsita’’nti (dī. ni. 3.174) pāsādikasutte sikkhattayasāṅgahaṃ sāsanaṃ brahmacariyanti vuttaṃ.

“Apī ataramānānaṃ, phalāsāva samijjhati;
Vipakkabrahmacariyosmi, evaṃ jānāhi gāmaṇī’’ti. (jā. 1.1.8) –

Ettha ajjhāsayo brahmacariyanti vutto. Idha pana vīriyaṃ **brahmacariyanti** adhippetamaṃ. Vīriyabrahmacariyassa hi idameva suttaṃ. Tadevamaṃ ekasmiṃ attabhāve catubbidhassa dukkarassa katattā

caturaṅgasamannāgatanti vuttam.

Tapassī sudam homīti sudanti nipātamattam, tapanissitako homīti attho. **Paramatapassīti** paramo tapassī, tapanissitakānaṃ uttamo. **Lūkho sudam homīti** lūkho homi. **Jegucchīti** pāpajegucchiko. **Pavivitto sudam homīti** pavivitto ahaṃ homi. **Tatrāssu me idaṃ, sārīputtāti** tatra caturaṅge brahmacariye idaṃ mama tapassitāya hoti, tapanissitakabhāve mayhaṃ idaṃ acelakāditapassitakattam hotīti dasseti.

Tattha **acelakoti** niccelo naggo. **Muttācāroti** viṣaṭṭhācāro, uccārakammādīsu lokiyakulaputtācārena virahito, ṭhitakova uccāraṃ karomi, passāvaṃ karomi, khādāmi bhuñjāmi ca. **Hatthāpalekhanoti** hatthe piṇḍamhi ṭhite jivhāya hatthaṃ apalikhāmi, uccāraṃ vā katvā hatthasmiññeva daṇḍakasaññī hutvā hatthena apalikhāmīti dasseti. Te kira daṇḍakaṃ sattoti paññapenti, tasmā tesam paṭipadaṃ pūrento evamakāsi. Bhikkhāgahaṇatthaṃ ehi bhaddanteti vutto na eṭīti **na ehībaddantiko**. Tena hi tiṭṭha bhaddanteti vuttopi na tiṭṭhatīti **na tiṭṭhabhaddantiko**. Tadubhayampi tiṭṭhiyā evaṃ etassa vacanaṃ kataṃ bhavissatīti na karonti. Ahampi evaṃ akāsinti dasseti. **Abhihaṇanti** puretaraṃ gahetvā āhaṭaṃ bhikkhaṃ. **Uddissakatanti** idaṃ tumhe uddissa katanti evaṃ ārocitabhikkhaṃ. **Na nimantananti** asukaṃ nāma kulaṃ vā vīthiṃ vā gāmaṃ vā paviseyyāthāti evaṃ nimantitabhikkhampi na sādīyāmi na gaṇhāmi.

Na kumbhimukhāti kumbhito uddharitvā diyyamānaṃ bhikkhaṃ na gaṇhāmi. **Na kaḷopimukhāti** kaḷopīti ukkhali vā pacchi vā. Tatopi na gaṇhāmi. Kasmā? Kumbhikaḷopiyo maṃ nissāya kaṭacchunā pahāraṃ labhantīti. **Na eḷakamantaranti** ummāraṃ antaraṃ katvā diyyamānaṃ na gaṇhāmi. Kasmā? Ayaṃ maṃ nissāya antarakaraṇaṃ labhatīti. Daṇḍamusalesupi eseva nayo. **Na dvinnanti** dvīsu bhuñjamānesu ekasmiṃ utṭhāya dente na gaṇhāmi. Kasmā? Kabaḷantarāyo hotīti. **Na gabbhiniyāti** adīsu pana gabbhiniyā kucchiyaṃ dārako kilamati, pāyantiyā dārakassa khīrantarāyo hoti, purisantaragatāya ratiantarāyo hotīti na gaṇhāmi. **Na samkittisūti** samkittetvā katabhattesu. Dubbhikkhasamaye kira acelakasāvakā acelakānaṃ atthāya tato tato taṇḍulādāni samādapetvā bhattaṃ pacanti. Ukkaṭṭhācelako tatopi na paṭiggaṇhāti.

Na yattha sāti yattha sunakho piṇḍaṃ labhissāmīti upaṭṭhito hoti, tattha tassa adatvā āhaṭaṃ na gaṇhāmi. Kasmā? Etassa piṇḍantarāyo hotīti. **Sanḍasaṇḍacārīnīti** samūhasamūhacārīnī, sace hi acelakaṃ disvā imassa bhikkhaṃ dassāmāti mānusakā bhattagehaṃ pavisanti. Tesu ca pavisantesu kaḷopimukhādīsu nilīnā makkhikā uppatitvā sanḍasaṇḍā caranti. Tato āhaṭaṃ bhikkhaṃ na gaṇhāmi. Kasmā? Maṃ nissāya makkhikānaṃ gocarantarāyo jātoti, ahampi tathā akāsiṃ. **Na thusodakanti** sabbasassasambhārehi kataṃ loṇasovīrakaṃ. Ettha ca surāpānameva sāvajjaṃ, ayaṃ pana sabbesupi sāvajjasaññī.

Ekāgārikoti yo ekasmiññeva gehe bhikkhaṃ labhītvā nivattati. **Ekālopikoti** yo ekeneva ālopena yāpeti. **Dvāgārikādīsupi** eseva nayo. **Ekissāpi dattiyāti** ekāya dattiyā. **Datti** nāma ekā khuddakapāti hoti, yattha aggabhikkhaṃ pakkhipitvā ṭhapenti. **Ekāhikanti** ekadivasantarikaṃ. **Addhamāsikanti** addhamāsantarikaṃ. **Pariyāyabhattabhojananti** vārabhattabhojanaṃ. Ekāhavārena dvīhavārena sattāhavārena aḍḍhamāsavārenāti evaṃ divasavārena ābhataṃ bhattabhojanaṃ.

Sākabhakkhoti allasākabhakkho. **Sāmākabhakkhoti** sāmākataṇḍulabhakkho. **Nivārādīsu nivārā** nāma tāva araññe sayamjātavīhijāti. **Daddulanti** cammakārehi cammaṃ likhitvā chaḍḍitakasaṭaṃ. **Haṭaṃ** vuccati silesopi sevālopi kaṇikārādirukkhaniyyāsopi. **Kaṇanti** kuṇḍakaṃ. **Ācāmoti** bhattaukhalikāya laggo jhāmaodano, taṃ chaḍḍitaṭṭhāne gahetvā khādati. “Odanakañjiya”ntipi vadanti. **Piññākādayo** pākāṭā eva. **Pavattaphalabhojīti** patitaphalabhojī.

Sānānīti sānavākacoḷāni. **Masānānīti** missakacoḷāni. **Chavadussānīti** matasarīrato chaḍḍitavatthāni. Erakatiṇḍāni vā ganthetvā katanivāsanāni. **Pamsukūlānīti** pathaviyaṃ chaḍḍitanantakāni. **Tiritānīti** rukkhattacavatthāni. **Ajinanti** ajinamigacammaṃ. **Ajinakkhipanti** tadeva majjhe phālitaṃ. Sakhurakantipi vadanti. **Kusacīranti** kusatiṇaṃ ganthetvā katacīraṃ. **Vākacīraphalakacīresupī** eseva nayo. **Kesakambalanti** manussakesehi katakambalaṃ. Yaṃ sandhāya vuttam “yāni kānici, bhikkhave, tantāvutānaṃ vatthānaṃ, kesakambalo tesam paṭikuṭṭho akkhāyati. Kesakambalo, bhikkhave, sīte sīto, uṇhe uṇho, dubbaṇṇo duggandho dukkhasamphaso”ti (a. ni. 3.138). **Vālakambalanti** assavālādīhi katakambalaṃ. **Ulūkapakkhakanti** ulūkapattāni ganthetvā katanivāsaṇaṃ. **Ubbhaṭṭhakoti** uddhaṃ ṭhitako. **Ukkuṭīkappadhānamanuyuttoti** ukkuṭīkavīriyaṃ anuyutto, gacchantopi ukkuṭīkova hutvā uppatitvā uppatitvā gacchati. **Kaṇṭakāpassayikoti**

ayakaṇṭake vā pakatikaṇṭake vā bhūmiyaṃ koṭṭetvā tattha cammaṃ attharivā ṭhānacaṅkamādīni karomīti dasseti. **Seyyanti** sayantopi tattheva seyyaṃ kappemi. Sāyaṃ tatiyamassāti **sāyatatiyakaṃ**. Pāto majjhanhike sāyanti divasassa tikkhattuṃ pāpaṃ pavāhessāmīti udakorohanānuyogaṃ anuyutto viharāmīti dasseti.

156. Nekavassagaṇikanti nekavassagaṇasaṅjātaṃ. **Rajojallanti** rajamalaṃ, idaṃ attano rajojallakavatasamādānakālaṃ sandhāya vadati. **Jegucchisminti** pāpajigucchanabhāve. **Yāva udakabindumhipīti** yāva udakathevakepī mama dayā paccupaṭṭhitā hoti, ko pana vādo aññesu sakkharaḥṭhaladaṇḍakavālikādīsu. Te kira udakabinduṃ ca ete ca sakkharaḥṭhalādayo khuddakapāṇāti paññapenti. Tenāha “yāva udakabindumhipī me dayā paccupaṭṭhitā hoti”ti. Udakabindumpi na hanāmi na vināsemi, kiṃ kāraṇā. **Māhaṃ khuddake pāṇe visamagate saṅghātaṃ āpādesinti**. Ninnathalatiṅgarukkhasākāhādīsu visamaṭṭhāne gate udakabindusaṅkhāte khuddakapāṇe saṅghātaṃ vadhaṃ mā āpādesinti. Etamatthaṃ “satova abhikkamāmī”ti dasseti. Acelakesu kira bhūmiṃ akkantakālato pabhuti sīlavā nāma natthi. Bhikkhācāraṃ gacchantāpi dussīlavā hutvā gacchanti, upaṭṭhākānaṃ gehe bhūñjantāpi dussīlavā hutvā bhūñjanti. Āgacchantāpi dussīlavā hutvā āgacchanti. Yadā pana morapiñchena phalakaṃ sammajjitvā sīlaṃ adhiṭṭhāya nisīdanti, tadā sīlavantā nāma honti.

Vanakammikanti kandaṃūlaphalāphalādīnaṃ atthāya vane vicarantaṃ. **Vanena vananti** vanato vanaṃ, esa nayo sabbattha. **Sampatāmīti** gacchāmi. **Āraññakoti** araṇṇe jātavuddho, idaṃ attano ājīvakaḥṭhalānaṃ sandhāya vadati. Bodhisatto kira pāsāṇḍapariggaṇhaṇatthāya taṃ pabbajjaṃ pabbaji, niratthakabhāvaṃ pana ñatvāpi na uppabbajjito, bodhisattā hi yaṃ yaṃ ṭhānaṃ upenti, tato anivattitadhammā honti, pabbajitvā pana mā maṃ koci addasāti tatova araṇṇaṃ pavīṭṭho. Tenevāha “mā maṃ te addasaṃsu ahañca mā te addasa”nti.

Goṭṭhāti govajā. **Paṭṭhitagāvoti** nikkhantaḥṭhalāvo. **Tattha catukkuṇḍikoti** vananteyeva ṭhito gopālakānaṃ gāvīhi saddhiṃ apagatabhāvaṃ disvā dve hatthe dve ca jaṇṇukāni bhūmiyaṃ ṭhapetvā evaṃ catukkuṇḍiko upasaṅkamitvāti attho. **Tāni sudaṃ āhāremīti** mahallakavacchakānaṃ gomayāni kasaṭāni nirojāni honti, tasmā tāni vajjetvā yāni taruṇavacchakānaṃ khīrapānēneva vaḍḍhantānaṃ saojāni gomayāni tāni kucchipūraṃ khādītva puna vanasaṇḍameva pavisati. Taṃ sandhāyāha “tāni sudaṃ āhāremī”ti. **Yāvakiṅvañca meti** yattakaṃ kālaṃ mama sakaṃ muttakarīsaṃ aparikkhīṇaṃ hoti. Yāva me dvāraṇaḥṭhalājo pavattittha, tāva tadeva āhāremīti attho. Kāle pana gacchante gacchante parikkhīṇamaṃsalohito upacchinnadvāraḥṭhalājo vacchakānaṃ gomayāni āhāremi. **Mahāvikaṭabhojanasminti** mahante vikaṭabhojane, apakatibhojaneti attho.

157. Tatrāsudam, sārīputta, bhīṃsanakassa vanasaṇḍassa bhīṃsanakatasmim hotīti. Tatrāti purimavacanāpekkhanaṃ. **Sudanti** padapūraṇamate nipāto. **Sārīputtāti** ālapanā. Ayaṃ panettha atthayojanā – **tatrāti** yaṃ vuttaṃ aññataraṃ bhīṃsanakaṃ vanasaṇḍanti, tatra yo so bhīṃsanako vanasaṇḍo vutto, tassa bhīṃsanakassa vanasaṇḍassa bhīṃsanakatasmim hoti, bhīṃsanakakiriyāya hotīti attho. Kiṃ hoti? Idaṃ hoti, yo koci avītarāgo...pe... lomāni haṃsantīti.

Atha vā **tatrāti** sāmīatthe bhummaṃ. Su iti nipāto. Kiṃ su nāma te bhonto samaṇabrāhmaṇātiādīsu viya. **Idanti** adhippetamatthaṃ paccakkhaṃ viya katvā dassanavacanaṃ. **Sudanti** su idaṃ, sandhivasena ikāralopo vedītabbo. Cakkhundriyaṃ ithindriyaṃ anaññātāññassāmītindriyaṃ kiṃ sūdhavittantiādīsu viya. Ayaṃ panettha atthayojanā, tassa, sārīputta, bhīṃsanakassa vanasaṇḍassa bhīṃsanakatasmim idaṃsu hotīti. **Bhīṃsanakatasminti** bhīṃsanakabhāveti attho. Ekassa takāraṃ lopo daṭṭhabbo. “Bhīṃsanakattasmi”ntiyeva vā pāṭho, bhīṃsanakatāya iti vā vattabbe līṅgavipallāso kato, nimittatthe cetāṃ bhummavacanaṃ. Tasmā evaṃ sambandho vedītabbo, bhīṃsanakabhāve idaṃsu hoti, bhīṃsanakabhāvanimittaṃ bhīṃsanakabhāvaḥṭhalā, bhīṃsanakabhāvapaccayā idaṃsu hoti. Yo koci avītarāgo taṃ vanasaṇḍaṃ pavisati. Yebhuyyena lomāni haṃsanti bahutarāni lomāni haṃsanti, uddhaṃ mukhāni sūcisadisāni kaṇṭakasadisāni ca hutvā tiṭṭhanti, appāni na haṃsanti, bahutarānaṃ vā sattānaṃ haṃsanti, appakānaṃ atisūrapurisānaṃ na haṃsantīti.

Antaraṭṭhakāti māghamāsassa avasāne catasso, phagguṇamāsassa ādimhi catassoti evaṃ ubhinnaṃ antare aṭṭharatti. **Abbhokāseti** mahāsatto himapātasamaye rattim abbhokāse viharati, athassa lomakūpesu āvutamuttā viya himabindūni tiṭṭhanti, sarīraṃ setadukūlapārutaṃ viya hoti. **Divā vanasaṇḍeti** divā himabindūsu sūriyātapasamphassa vigatesu assāsopi bhavēyya, ayaṃ pana sūriye ugacchanteyeva vanasaṇḍaṃ pavisati, tatrāpissa sūriyātapena paggharantaṃ himaṃ sarīreyeva patati. **Divā abbhokāse viharāmi rattim vanasaṇḍeti** gimhakāle kiresa divā abbhokāse vihāsi, tenassa kacchehi sedadhārā muccimūsu,

rattiṃ assāso bhavēyya, ayaṃ pana sūriye atthaṃ gacchanteyeva vanasaṅgaṃ pavasati. Athassa divā gahitausme vanasaṅge aṅgārakāsuyam pakkhitto viya attabhāvo paridayhittha. **Anacchariyāti** anuacchariyā. **Paṭibhāsīti** upaṭṭhāsī.

Sotattoti divā ātapena rattiṃ vanausmāya sutatto. **Sosinnoti** rattiṃ himena divā himodakena suṭṭhu tinto. **Bhimsanaketi** bhayajanake. **Naggoti** niccelo. Nivāsanapārūpane hi satī sītaṃ vā uṇhaṃ vā na atibādheyya, tampi me natthīti dasseti. **Na caggimāsinoti** aggimpī na upagato. **Esanāpasutoti** suddhiesanattāya pasuto, payutto. **Munīti**, tadā attānaṃ munīti katvā katheti.

Chavaṭṭhikānīti upaḍḍhadadḍhāni aṭṭhīni. **Upadhāyāti** yathā sīsūpadhānañca pādūpadhānañca paññāyati, evaṃ santharivā tattha seyyam kappemīti dasseti. **Gāmaṅgalāti** gopāladārakā. Te kira bodhisattassa santikam gantvā, sumedha, tvaṃ imasmim ṭhāne kasmā nisinno, kathehīti vadanti. Bodhisatto adhomukho nisīdati, na katheti. Atha naṃ te akathetum na dassāmāti parivāretvā **oṭṭhubhanti** sarīre kheḷam pātentī. Bodhisatto evampi na katheti. Atha naṃ tvaṃ na kathesīti **omuttenti** passāvamassa upari vissajjenti. Bodhisatto evampi na kathetiyeva. Tato naṃ kathehi kathehīti paṃsukena okiranti. Bodhisatto evampi na kathetiyeva. Athassa na kathesīti daṅḍakasālākā gahetvā kaṅḡasotesu pavesenti. Bodhisatto dukkhā tibbā kaṭukā vedanā adhivāsento kassaci kiñci na karissāmīti matakō viya acchati. Tenāha ‘‘na kho panāhaṃ, sārīputta, abhijānāmi tesu pāpakam cittam uppādetā’’ti. Na mayā tesu pāpakam cittampi uppāditanti attho. **Upekkhāvihārasmim hotīti** upekkhāvihāro hotī. Vihāro eva hi vihārasminti vutto. Teneva ca ‘‘idaṃsu me’’ti etthāpi ayaṃsu meti evaṃ attho vedītabbo. Iminā nayena aññānipī evarūpāni padāni vedītabbāni. Iminā ito ekanavutikappe pūritam upekkhāvihāram dasseti. Yaṃ sandhāyāha –

‘‘Sukhapatto na rajjāmi, dukkhe na homi dummano;
Sabbattha tulīto homi, eṣā me upekkhāpāramī’’ti.

Dukkarakārikādisuddhivaṇṇanā niṭṭhitā.

Āhārasuddhivaṇṇanā

158. Āhārena suddhīti kolādinā ekaccena parittakāhārena sakkā sujjhītunti evaṃdiṭṭhino honti. **Evamāhamsūti** evaṃ vadanti. **Kolehīti** padarehi. **Kolodakanti** kolāni maddītvā katapānakam. **Kolavikatinti** kolasālavakolapūvakolagulādikolavikāram. **Etaparamoti** etaṃ pamāṇam paramam assāti etaparamo. Tadā ekanavutikappamatthake pana na beluvapakatālapakkapamāṇo kolo hoti, yaṃ etarahi kolassa pamāṇam, ettakova hotīti attho.

159. Adhimattakasimānanti ativiya kisabhāvaṃ. **Āsītikapabbāni vā kālapabbāni vāti** yathā āsītikavalliyā vā kālavalliyā vā sandhiṭṭhānesu milāyivā majjhe unnatunnatāni honti, evaṃ mayham aṅgapaccaṅgāni hontīti dasseti. **Oṭṭhapadanti** yathā oṭṭhassa padaṃ majjhe gambhīram hoti, evamevaṃ bodhisattassa milāte maṃsalohite vaccadvārassa antopaviṭṭhattā ānisadam majjhe gambhīram hoti. Athassa bhūmiyam nisinnatṭhānam sarapōṅkhena akkantaṃ viya majjhe unnatam hoti. **Vaṭṭanāvalīti** yathā rajjuyā āvunitvā katā vaṭṭanāvalī vaṭṭanānam antarantarā ninnā hoti, vaṭṭanattṭhānesu unnatā, evaṃ piṭṭhikaṅṭako unnatāvanato hoti, **jarasālāya gopānasiyoti** jinṇasālāya gopānasiyo, tā vaṃsato muccitvā maṅḍale patiṭṭhahanti, maṅḍalato muccitvā bhūmiyanti; evaṃ ekā upari hoti, ekā heṭṭhāti oluggaviluggā bhavanti. Bodhisattassa pana na evaṃ phāsuḷiyo, tassa hi lohite chinne maṃse milāte phāsuḷantarehi cammāni heṭṭhā otiṇṇāni, taṃ sandhāyetaṃ vuttaṃ.

Okkhāyikāti heṭṭhā anupaviṭṭhā. Tassa kira lohite chinne maṃse milāte akkhīāvāṭakā matthaluṅgam āhacca aṭṭhaṃsu, tenassa evarūpā akkhīārakā ahesum. **Āmakacchinnoti** atitaruṅakāle chinno, so hi vātātapena saṃphusati ceva milāyati ca. **Yāvassu me, sārīputtāti**, sārīputta, mayham udaracchavi yāva piṭṭhikaṅṭakam allīnā hoti. Atha vā yāvassu me, sārīputta, bhāriyabhāriyā ahoṣi dukkarakārikā, mayham udaracchavi yāva piṭṭhikaṅṭakam allīnā ahoṣīti evamettha sambandho vedītabbo. **Piṭṭhikaṅṭakamyeva pariggaṇhāmīti** sahaudaracchaviṃ gaṇhāmi. **Udaracchaviṃyeva pariggaṇhāmīti** sahapīṭṭhikaṅṭakam gaṇhāmi. **Avakujo papatāmīti** tassa hi uccārapassāvattāya nisinnassa passāvo neva nikkhamati, vaccam pana ekaṃ dve kaṭakattṭhimattam nikkhamati. Balavadukkham uppādeti. Sarīrato sedā muccanti, tattheva avakujo bhūmiyam

patati. Tenāha “avakuḅḅo papatāmī”ti. **Tameva kāyanti** taḅ ekanavutikappamatthake kāyaḅ. Mahāsaccakasutte pana pacchimabhavikakāyaḅ sandhāya imameva kāyanti āha. **Pūtimūlānīti** maḅse vā lohite vā sati tiṅṅhanti. Tassa pana abhāve cammakhaḅḅe lomāni viya hattheyeva lagganti, taḅ sandhāyāha “pūtimūlāni lomāni kāyasmā patantī”ti.

Alamariyañāḅadassanavisesanti ariyabhāvaḅ kātuḅ samatthaḅ lokuttaramaggaḅ. **Imissāyeva ariyāya paññāyāti** vipassanāpaññāya anadhigamā. **Yāyaḅ ariyāti** yā ayaḅ maggapaññā adhigatā. Idaḅ vuttaḅ hoti – yathā etarahi vipassanāpaññāya adhigatattā maggapaññā adhigatā, evaḅ ekanavutikappamatthake vipassanāpaññāya anadhigatattā lokuttaramaggapaññāḅ nādhigatosmīti, majjhimbhāḅakatherā panāhu, imissāyevāti vuttapaññāpi yāyaḅ ariyāti vuttapaññāpi maggapaññāyeva. Atha ne bhikkhū āhaḅsu “evaḅ sante maggassa anadhigatattā maggaḅ nādhigatosmīti idaḅ vuttaḅ hoti, bhante”ti. Āvuso, kiñcāpi dīpetuḅ na sakkomi, dvepi pana maggapaññāyevāti, etadeva cettha yuttaḅ. Itarathā hi yā ayanti niddeḅo ananurūpo siyā.

Āhārasuddhivaḅḅanā niṅṅhitā.

Saḅsārasuddhiādivaḅḅanā

160. Saḅsārena suddhīti bahukaḅ saḅsaritvā sujḅhantīti vadanti. **Upapattiyā suddhīti** bahukaḅ upapajjivā sujḅhantīti vadanti. **Āvāsena suddhīti** bahūsu ṅhānesu vasitvā sujḅhantīti vadanti. Tīsupi ṅhānesu saḅsaraḅakavasena **saḅsāro**. Upapajjanakavasena **upapatti**. Vasanakavasena **āvāsoti** khandhāyeva vuttā. **Yaññenāti** bahuyāge yajitvā sujḅhantīti vadanti. **Muddhāvasittenāti** tīhi saḅkhehi khattiyābhisekena muddhani abhisittena. **Aggipāricariyāyāti** bahuaggiparicaraḅena sujḅhantīti vadanti.

161. Daharoti taruḅo. Yuvāti yobbanena samannāgato. **Susukāḅakesoti** sutṅṅhu kāḅakeso. **Bhadrena yobbanena samannāgatoti** imināssa yena yobbanena samannāgato yuvā, taḅ yobbanāḅ bhaddaḅ laddhakanti dasseti. Paṅḅamena vayasāti paṅḅamavayo nāma tettīḅsa vassāni, tena samannāgatoti attho, **paññāveyyattiyenāti** paññāveyyattibhāvena. **Jiḅḅoti** jarājinḅo. **Vuddhoti** vaḅḅḅhitvā ṅḅitaḅḅapaccaḅḅo. **Mahallakoti** jātimahallako. **Addhagatoti** bahuaddhānaḅ gato cirakāḅātikkanto. **Vayo anuppattoti** vassasatassa tatiyakotṅṅhāsaḅ pacchimavayaḅ anuppatto. **Āsītiko me vayo vattatīti** imaḅ kira suttaḅ bhagavā parinibbānaḅvaḅchare kathesi. Tasmā evamaḅha. **Paramāyāti** uttamāya. **Satiyāti**ādīsu padasatampi padasahassampi vadantasseva gahaḅasamatthataḅ **sati** nāma. Tadeva ādhāraḅaupanibandhanasamatthataḅ **gati** nāma. Evaḅ gahitaḅ dhāritaḅ saḅjḅhāyaḅ kātuḅ samatthavāriyaḅ **dhiti** nāma. Tassa atthaḅca kāraḅaḅca dassanasamatthataḅ **paññāveyyattiyāḅ** nāma.

Daḅhadhammā dhanuggahoti daḅḅhaḅ dhanuḅ gahetvā ṅḅito issāso. **Daḅhadhanu** nāma dvisahassathāmaḅ vuccati, dvisahassathāmaḅ nāma yassa āropitassa jiyābaddho lohasīsādīnaḅ bhāro daḅḅe gahetvā yāva kaḅḅappamaḅḅā ukkhittassa pathavito muccati. **Sikkhitoti** dasa dvādasa vassāni ācariyakule ugghatasippo. **Katahatthoti** koci sippameva uggaḅḅhāti. Katahattho na hoti, ayaḅ pana katahattho ciḅḅnavasībḅhāvo. **Katūpāsānoti** rājakulādīsu dassitasippo. **Lahukena asānenāti** anto susiraḅ katvā tūlādīni pūretvā katalākhāparikammaḅa sallahukakaḅḅena. Evaḅ kataḅḅhi ekausabhagāmī dve usabhāni gacchati, aṅṅḅhausabhagāmī soḅasausabhāni gacchati. **Appakasirenāti** nidukkḅhena. **Atipāteyyāti** atikkameyya. **Evaḅ adhimattasatimantoti** yathā so dhanuggaho taḅ vidatthacaturaḅḅulachāyaḅ sīghaḅ eva atikkameti, evaḅ padasatampi padasahassampi ugghetūḅ upadhāretūḅ saḅjḅhāyitūḅ atthakāraḅāni ca upaparikkhitūḅ samatthāti attho. **Aññatra asitapītakhāyitasāyitāti** asitapītādīni hi bhagavatāpi kātabbāni honti, bhikkhūhipi. Tasmā tesāḅ karaḅamattakāḅaḅ ṅḅapetvāti dasseti.

Apariyādinnāyevāti aparikkḅḅhāyeva. Sace hi eko bhikkhu kāyānupassanaḅ pucchati, añḅo vedanānupassanaḅ, añḅo cittānupassanaḅ, ayyo dhammānupassanaḅ. Iminā puṅṅḅhaḅ ahaḅ pucchissāmīti eko ekaḅ na oloketi. Evaḅ santēpi tesāḅ vāro paññāyati. Evaḅ buddhānaḅ pana vāro na paññāyati, vidatthacaturaḅḅulachāyaḅ atikkamato puretaraḅyeva bhagavā cuddasavidhena kāyānupassanaḅ, navavidhena vedanānupassanaḅ, soḅasavidhena cittānupassanaḅ, pañcavidhena dhammānupassanaḅ katheti. Tiṅṅḅhantu vā tāva ete cattāro. Sace hi añḅe cattāro sammappadhānesu, añḅe iddhipādesu, añḅe pañca indriyesu, añḅe pañca balesu, añḅe satta bojḅḅhaḅḅesu, añḅe aṅṅḅha maggaḅḅesu pañḅhaḅ puccheyyūḅ, tampi bhagavā katheyya. Tiṅṅḅhantu vā ete aṅṅḅha. Sace añḅe sattatīḅsa janā bodhipakkḅḅhiyesu pañḅhaḅ puccheyyūḅ, tampi bhagavā

tāvadeva katheyya. Kasmā? Yāvatā hi lokiyamahājanā ekaṃ padaṃ kathenti. Tāva ānandatthero aṭṭha padāni katheti. Ānandatthere pana ekaṃ padaṃ kathenteyeva bhagavā soḷasapadāni katheti. Kasmā? Bhagavato hi jivhā mudukā dantāvaraṇaṃ suphusitaṃ vacanaṃ agalitaṃ bhavaṅgaparivāso lahuko. Tenāha “apariyādinnāyevassa, sārīputta, tathāgatassa dhammadesanā”ti.

Tattha **dhammadasenā**ti tantiṭṭhapanā. **Dhammapadabyañjananti** pāḷiyā padabyañjanaṃ, tassa tassa atthassa byañjanakaṃ akkharaṃ. **Pañhapaṭibhānanti** pañhabyākaraṇaṃ. Iminā kiṃ dasseti? Tathāgato pubbe daharakāle akkharāni sampiṇḍetvā padaṃ vattuṃ sakkoti, padāni sampiṇḍetvā gāthaṃ vattuṃ sakkoti, catuakkharehi vā aṭṭhaakkharehi vā soḷasaakkharehi vā padehi yuttāya gāthāya atthaṃ vattuṃ sakkoti. Idāni pana mahallakakāle akkharāni sampiṇḍetvā padaṃ vā, padāni sampiṇḍetvā gāthaṃ vā, gāthāya atthaṃ vā vattuṃ na sakkotīti evaṃ natthi. Daharakāle ca mahallakakāle ca sabbametaṃ tathāgatassa apariyādinnaevāti imaṃ dasseti. **Mañcakena cepi manti** idaṃ buddhabaladīpanatthameva parikappetvā āha. Dasabalaṃ pana mañcake āropetvā gāmanigamarājadhāniyo pariharaṇakālo nāma natthi. Tathāgatā hi pañcame āyukotṭhāse khaṇḍiccādīhi anabhibhūtā suvaṇṇavaṇṇasarīrassa vevaṇṇiye ananuppatte devamanussānaṃ piyamanāpakāleyeva parinibbāyanti.

162. Nāgasamāloti tassa therassa nāmaṃ. Paṭhamabodhiyañhi vīsativassabbhantare upavānanāgitameghiyattherā viya ayampi bhagavato upaṭṭhāko ahosi. **Bijayamānoti** mandamandena tālavaṇṭavātena bhagavato utusukhaṃ samuṭṭhāpayamāno. **Etadvocāti** sakalasuttantaṃ sutvā bhagavato pubbacaritaṃ dukkarakāraṃ āgamma pasanno etaṃ “acchariyaṃ bhante”tiādivacanaṃ avoca. Tattha accharaṃ paharitaṃ yuttanti **acchariyaṃ**. Abhūtapubbaṃ bhūtanti **abbhutaṃ**. Ubhayenapi attano vimhayameva dīpeti. **Ko nāmo ayaṃ bhanteti** idaṃ bhaddako vatāyaṃ dhammapariyāyo, handassa bhagavantaṃ āyācivā nāmaṃ gaṇhāpemiṭi adhippāyena āha. Athassa bhagavā nāmaṃ gaṇhanto **tasmā tiha tvantiādimāha**. Tassattho, yasmā idaṃ suttaṃ sutvā tava lomāni haṭṭhāni, tasmā tiha tvam, nāgasamāla, imaṃ dhammapariyāyaṃ “lomahaṃsana pariyaṃ”tveva naṃ dhārehīti.

Saṃsārasuddhiādivaṇṇanā niṭṭhitā.

Papañcasūdaniyā majjhimanikāyaṭṭhakathāya

Mahāsīhanādasuttavaṇṇanā niṭṭhitā.

3. Mahādukkhakkhandhasuttavaṇṇanā

163. Evaṃ me sutanti mahādukkhakkhandhasuttaṃ. Tattha vinayapariyāyena tayo janā sambahulāti vuccanti, tato paraṃ saṅgho. Suttantapariyāyena tayo tayo eva, tato uddhaṃ sambahulāti vuccanti. Idha suttantapariyāyena sambahulāti veditabbā. **Piṇḍāya pavisimsūti** pavitṭhā, te pana na tāva pavitṭhā, pavisissāmāti nikkhantattā pana pavisimsūti vuttā. Yathā gāmaṃ gamissāmāti nikkhantapuriso taṃ gāmaṃ appattopi “kuhiṃ itthannāmo”ti vutte “gāmaṃ gato”ti vuccati, evaṃ. **Paribbājakānaṃ āramoti** jetavanato avidūre aññatitthiyānaṃ paribbājakānaṃ āramo atthi, taṃ sandhāya evamāhaṃsu. **Samaṇo, āvusoti**, āvuso, tumhākaṃ satthā samaṇo gotamo. **Kāmānaṃ pariññanti** kāmānaṃ pahānaṃ samatikkamaṃ paññapeti. Rūpavedanāsupi eseva nayo.

Tattha titthiyā sakasamayaṃ jānantā kāmānaṃ pariññānaṃ paññapeyyuṃ paṭhamajjhānaṃ vadamānā, rūpānaṃ pariññānaṃ paññapeyyuṃ arūpabhavaṃ vadamānā, vedanānaṃ pariññānaṃ paññapeyyuṃ asaññabhavaṃ vadamānā. Te pana “idaṃ nāma paṭhamajjhānaṃ ayaṃ rūpabhavo ayaṃ arūpabhavo”tipi na jānanti. Te paññapetuṃ asakkontāpi kevalaṃ “paññapema paññapemā”ti vadanti. Tathāgato kāmānaṃ pariññānaṃ anāgāmimaggena paññapeti, rūpavedanānaṃ arahattamaggena. Te evaṃ mahante visese vijjamānepi **idha no, āvuso, ko vivesotiādimāhaṃsu**.

Tattha **idhāti** imasmim paññāpane. **Dhammadesanāya vā dhammadesananti** yadidaṃ samaṇassa vā gotamassa dhammadesanāya saddhiṃ amhākaṃ dhammadesanaṃ, amhākaṃ vā dhammadesanāya saddhiṃ samaṇassa gotamassa dhammadesanaṃ ārabha nānākaraṇaṃ vuccetha, taṃ kinnāmāti vadanti. Dutiyapadepi eseva nayo. Iti vemajjhe bhinnasuvaṇṇaṃ viya sāsanaena saddhiṃ attano laddhivacanamattena samadhuraṃ

thapayimsu. **Neva abhinandimsūti** evametanti na sampatichimsu. **Nappaṭikkosimsūti** nayidaṃ evanti nappaṭisedhesuṃ. Kasmā? Te kira titthiyā nāma andhasadisā, jānitvā vā ajānitvā vā katheyyunti nābhinandimsu, pariññanti vacanena īsakam sāsanaṅgandho atthīti nappaṭikkosimsu. Janapadavāsino vā te sakasamayaparasamayesu na suṭṭhu kusalātipi ubhayaṃ nākaṃsu.

165. Na ceva sampāyissantīti sampādetvā kathetuṃ na sakkhissanti. **Uttariṇca vighātanti** asampāyanato uttarimpi dukkhaṃ āpajjissanti. Sampādetvā kathetuṃ asakkontānaṃ nāma hi dukkhaṃ uppajjati. **Yathā taṃ, bhikkhave, avisayasminti** ettha **yathāti** kāraṇavacanaṃ, **tanti** nipātamattaṃ. Yasmā avisaye pañho pucchito hotīti attho. **Sadevaketi** saha devehi sadevake. **Samārakādīsupi** eseva nayo. Evaṃ tñi thānāni loke pakkhipitvā dve pajyāti pañcahipi sattalokameva pariyādiyitvā etasmiṃ sadevakādibhede loke taṃ devaṃ vā manussaṃ vā na passāmīti dīpeti. **Ito vā pana sutvāti** ito vā pana mama sāsanaṅgato sutvā atathāgatopi atathāgatasāvakopi ārādheyya paritoseyya. Aññathā ārādhanāṃ nāma natthīti dasseti.

166. Idāni attano tesam pañhānaṃ veyyākaraṇena cittārādhanāṃ dassento **ko ca, bhikkhavi**tiādīmāha. **Kāmaguṇāti** kāmayitabbaṭṭhena **kāmā**. Bandhanaṭṭhena **guṇā**. “Anujānāmi, bhikkhave, ahatānaṃ vatthānaṃ dviguṇaṃ saṅghāti”nti (mahāva. 348) ettha hi paṭalaṭṭho guṇaṭṭho. “Accenti kālā tarayanti rattiyo, vayoguṇā anupubbam jāhanti”ti (sam. ni. 1.4) ettha rāsaṭṭho guṇaṭṭho. “Sataguṇā dakkhiṇā pāṭikaṅkhitabbā”ti (ma. ni. 3.379) ettha ānisamsaṭṭho guṇaṭṭho. “Antam antaguṇam (khu. pā. 3 dvattiṃsākāre; dī. ni. 2.377) kayirā mālaguṇe bahū”ti (dha. pa. 53) ettha bandhanaṭṭho guṇaṭṭho. Idhāpi eseva adhippeto, tena vuttaṃ “bandhanaṭṭhena guṇā”ti. **Cakkhuvīññeyyāti** cakkhuvīññāṇena passitabbā. Etenupāyena **sotaviññeyyā**dīsupi attho veditabbo. **Iṭṭhāti** pariyiṭṭhā vā hontu mā vā, iṭṭhārammaṇabhūtāti attho. **Kantāti** kamaṇiyā. **Manāpāti** manavaḍḍhanakā. **Piyarūpāti** piyajātikā. **Kāmūpasamhitāti** ārammaṇam katvā uppajjamānena kāmena upasamhitā. **Rajanīyāti** rajjanīyā, rāgupattikāraṇabhūtāti attho.

167. Yadi muddāyātiādīsū **muddāti** aṅgulipabbesu saññaṃ thapetvā hatthamuddā. **Gaṇanāti** acchiddagaṇanā. **Saṅkhānanti** piṇḍagaṇanā. Yāya khettaṃ oloketvā idha ettakā vīhī bhavissanti, rukkhaṃ oloketvā idha ettakāni phalāni bhavissanti, ākāsaṃ oloketvā ime ākāse sakuṇā ettakā nāma bhavissantīti jānanti.

Kasīti kasikammaṃ. **Vañijjāti** jaṅghavaṇijjathalavaṇijjādivaṇippatho. **Gorakkhanti** attano vā paresam vā gāvo rakkhitvā pañcagorasavikkayena jīvanakammaṃ. **Issattho** vuccati āvudhaṃ gahetvā upaṭṭhānakammaṃ. **Rājaporisanti** āvudhena rājakammaṃ katvā upaṭṭhānaṃ. **Sippaññataranti** gahitāvasesam hatthiassasippādi. **Sītassa purakkhatoti** lakkhaṃ viya sarassa sītassa purato, sītēna bādhiyamānoti attho. Uṇhepi eseva nayo. **Ḍamsā**dīsū **ḍamsāti** piṅgalamakkhikā. **Makasāti** sabbamakkhikā, **sarīsapāti** ye keci saritvā gacchanti. **Rissamānoti** ruppamāno, ghaṭṭiyamāno. **Miyamānoti** maramāno. **Ayam, bhikkhave,** ayam muddādīhi jīvikakappaṇaṃ āgamma sītādipaccayo ābādho. **Kāmānaṃ ādīnavoti** kāmesu upaddavo, upassaggoti attho. **Sandīṭṭhikoti** paccakkho sāmam passitabbo. **Dukkhakkhandhoti** dukkharāsi. **Kāmahetū**tiādīsū paccayaṭṭhena kāmā assa hetūti kāmahetu. Mūlaṭṭhena kāmā nidānamassāti **kāmanidāno**. Liṅgavipallāsena pana kāmanidānanti vutto. Kāraṇaṭṭhena kāmā adhikaraṇam assāti **kāmādhikaraṇo**. Liṅgavipallāseneva pana kāmādhikaraṇanti vutto. **Kāmānameva hetūti** idaṃ niyamavacanaṃ, kāmappaccayā uppajjatiyevāti attho.

Uṭṭhahatoti ajīvasamuṭṭhāpakavīriyena uṭṭhahantassa. **Ghaṭatoti** taṃ vīriyaṃ pubbenāparaṃ ghaṭentassa. **Vāyamatoti** vāyāmaṃ parakkamaṃ payogaṃ karontassa. **Nābhini**pphajjantīti na nipphajjanti, hatthaṃ nābhīruhanti. **Socatīti** citte uppannabalavasokena socati. **Kilamatīti** kāye uppannadukkhena kilamati. **Paridevatīti** vācāya paridevati. **Urattā**ḷinti uram tāletvā. **Kandatīti** rodati. **Sammohaṃ āpajjati**ti visaññī viya sammūḷho hoti. **Moghanti** tuccham. **Aphaloti** nipphalo. **Ārakkhādhikaraṇanti** ārakkhākāraṇā. **Kintīti** kena nu kho upāyena. **Yampi meti** yampi mayham kasikammādīni katvā uppāditaṃ dhanam ahoṣi. **Tampi no natthīti** tampi amhākaṃ idāni natthi.

168. Puna caparaṃ, bhikkhave, kāmahetūtiādīnāpi kāraṇam dassetvāva ādīnavam dīpeti. Tattha **kāmahetūti** kāmappaccayā rājānopi rājūhi vivadanti. **Kāmanidānanti** bhāvanapumsakaṃ, kāmē nidānam katvā vivadantīti attho. **Kāmādhikaraṇanti**pi bhāvanapumsakameva, kāmē adhikaraṇam katvā vivadantīti attho. **Kāmānameva hetūti** gāmanigamanagarasenāpatiurohitaṭṭhānantarādīnaṃ kāmānameva hetu vivadantīti

attho. **Upakkamantī** pahaṇanti. **Asicammanti** asiñceva khetakaphalakādīni ca. **Dhanukalāpaṃ sannayhitvā**ti dhanuṃ gahetvā sarakalāpaṃ sannayhitvā. **Ubhatobyūḷanti** ubhato rāsibhūtaṃ. **Pakkhandantī** pavisanti. **Usūsūti** kaṇḍesu. **Vijjotalantesūti** viparivattantesu. **Te tatthāti** te tasmim̐ saṅgāme.

Addāvalepanā upakāriyoti cettha manussā pākārapādaṃ assakhurasañṭhānena iṭṭhakāhi cinitvā upari sudhāya limpanti. Evaṃ katā pākārapādā upakāriyoti vuccanti. Tā tintena kalalena sittā addāvalepanā nāma hontī. **Pakkhandantī**ti tāsam̐ heṭṭhā tikhīṇaayasulādīhi vijjhīyamānāpi pākārassa picchilabhāvena ārohituṃ asakkontāpi upadhāvantiyeva. **Chakanaḥāyāti** kuthitagomayena. **Abhivaggenāti** satadantena. Taṃ aṭṭhadantākārena katvā “nagaradvāraṃ bhinditvā pavisissāmā”ti āgate uparidvāre ṭhitā tassa bandhanayottāni chinditvā tena abhivaggena omaddanti.

169. Sandhimpī chindantī gharasandhimpī chindanti. **Nillopanti** gāme pahaṇitvā mahāvilopaṃ karonti. **Ekāgarīkanti** paṇṇāsamatāpi saṭṭhimattāpi parivāretvā jīvaggāhaṃ gahetvā āharāpentī. **Paripanthepī tiṭṭhantī** panthadūhanakammaṃ karonti. **Aḍḍhadanḍakehīti** muggarehi pahārasādhanatthaṃ vā catuhatthadanḍaṃ dvedhā chetvā gahitadanḍakehi. **Bilaṅgathālikanti** kañjiyaukkhalikammakāraṇaṃ, taṃ karontā sīsakapālaṃ uppāṭetvā tattaṃ ayogulaṃ saṅḍāsena gahetvā tattha pakkhipanti, tena matthaluṅgaṃ pakkuthitvā upari uttarati. **Saṅkhamuṇḍikanti** saṅkhamuṇḍakammakāraṇaṃ, taṃ karontā uttarotṭhaubhatokaṇṇacūlikagaḷavāṭaparicchedena cammaṃ chinditvā sabbakese ekato gaṅṭhiṃ katvā danḍakena vallitvā uppāṭenti, saha kesehi cammaṃ utṭhahati. Tato sīsakaṭāhaṃ thūlasakkharāhi ghaṃsitvā dhovantā saṅkhavaṇṇaṃ karonti.

Rāhumukhanti rāhumukhakammakāraṇaṃ, taṃ karontā saṅkunā mukhaṃ vivaritvā antomukhe dīpaṃ jālenti. Kaṇṇacūlikāhi vā paṭṭhāya mukhaṃ nikhādanena khaṇanti. Lohitaṃ paggharitvā mukhaṃ pūreti. **Jotimālikanti** sakalasarīraṃ telapilotikāya veṭhetvā ālīmpanti. **Hatthapajjotikanti** hatthe telapilotikāya veṭhetvā dīpaṃ viya jālenti. **Erakavattikanti** erakavattakammakāraṇaṃ, taṃ karontā gīvato paṭṭhāya cammabaddhe kantitvā goppake ṭhapenti. Atha naṃ yottehi bandhitvā kaḍḍhanti. So attano cammabaddhe akkamitvā akkamitvā patati. **Cīrakavāsikanti** cīrakavāsikakammakāraṇaṃ, taṃ karontā tatheva cammabaddhe kantitvā kaṭiyaṃ ṭhapenti. Kaṭito paṭṭhāya kantitvā goppakesu ṭhapenti. Uparimehi heṭṭhīmasarīraṃ cīrakanivāsananivatthaṃ viya hoti. **Eṇeyyakanti** eṇeyyakakammakāraṇaṃ. Taṃ karontā ubhosu kappareesu ca jāṇūsu ca ayavalayāni datvā ayasūlāni koṭṭenti. So catūhi ayasūlehi bhūmiyaṃ patiṭṭhahati. Atha naṃ parivāretvā aggim̐ karonti. “Eṇeyyako jotipariggaho yathā”ti āgataṭṭhānēpi idameva vuttaṃ. Taṃ kālena kālaṃ sūlāni apanetvā catūhi aṭṭhikoṭṭhiyeva ṭhapenti. Evarūpā kāraṇā nāma natthi.

Baḷisamaṃsikanti ubhatomukhehi baḷisehi pahaṇitvā cammamamaṃsanhārūni uppāṭenti. **Kahāpaṇikanti** sakalasarīraṃ tiṇhāhi vāsīhi koṭṭito paṭṭhāya kahāpaṇamattaṃ kahāpaṇamattaṃ pātentā koṭṭenti. **Khārāpatacchikanti** sarīraṃ tattha tattha āvudhehi pahaṇitvā kocchehi khāraṃ ghaṃsanti. Cammasamaṃsanhārūni paggharitvā savanti. Aṭṭhikasāṅkhalikāya tiṭṭhati. **Palighaparivattikanti** ekena passena nipajjāpetvā kaṇṇacchidde ayasūlaṃ koṭṭetvā pathaviyā ekābaddhaṃ karonti. Atha naṃ pāde gahetvā āvijjhanti. **Palālapīṭhakanti** cheko kāraṇiko chavicammaṃ acchinditvā nisadapotehi aṭṭhīni bhinditvā kesesu gahetvā ukkipanti. Maṃsarāsiyeva hoti, atha naṃ keseheva pariyanandhitvā gaṇhanti. Palālavaṭṭim̐ viya katvā pana veṭhenti. **Sunakhehipīti** katipayāni divasāni āhāraṃ adatvā chātakehi sunakhehi khādāpentī. Te muhuttēna aṭṭhisāṅkhalikameva karonti. **Samparāyikoti** samparāye dutiyattabhāve vipākoti attho.

170. Chandarāgavinayo chandarāgappahānanti nibbānaṃ. Nibbānañhi āgamma kāmesu chandarāgo vinīyati ceva pahīyati ca, tasmā nibbānaṃ chandarāgavinayo chandarāgappahānanti ca vuttaṃ. **Sāmaṃ vā kāme pariḷānissantīti** sayam̐ vā te kāme tīhi pariḷānīhi pariḷānissanti. **Tathattāyāti** tathabhāvāya. **Yathāpaṭipannoti** yāya paṭipadāya paṭipanno.

171. Khattiyakaṇṇā vātiādi aparittēna vipulena kusalena gahitapaṭisandhikaṃ vatthālanākārādīni labhanatṭhāne nibbattaṃ dassetuṃ vuttaṃ. **Pannarasavassuddesikāti** pannarasavassavayā. Dutiyapadēpi eseva nayo. Vayapadesaṃ kasmā gaṇhāti? Vaṇṇasampattidassanatthaṃ. Mātugāmassa hi duggatakule nibbattassāpi etasmim̐ kāle thokaṃ thokaṃ vaṇṇāyatanaṃ pasīdati. Purisānaṃ pana vīsativassakāle pañcavīsativassakāle pasannaṃ hoti. **Nātidighātī** chadosavirahitaṃ sarīrasampattim̐ dīpeti. **Vaṇṇanibhāti** vaṇṇoyeva.

Jiṇṇanti jarājiṇṇaṃ. **Gopānasivaṅkanti** gopānasī viya vaṅkaṃ. **Bhogganti** bhaggaṃ, imināpissa vaṅkabhāvameva dīpeti. **Daṇḍaparāyaṇanti** daṇḍapaṭisaraṇaṃ daṇḍadutiyaṃ. **Pavedhamānanti** kampamānaṃ. **Āturanti** jarāturaṃ. **Khaṇḍadantanti** jiṇṇabhāvena khaṇḍitadantaṃ. **Palitakesanti** paṇḍarakesaṃ. **Vilūnanti** luṅcivā gahitakesaṃ viya khallātaṃ. **Khalitasiranti** mahākhallātasīsaṃ. **Valinanti** sañjātavalīṃ. **Tilakāhatagattanti** setakāḷatilakehi vikiṇṇasarīraṃ. **Ābādhikanti** byādhikaṃ. **Dukkhanti** dukkhapattaṃ.

Bālhagilānanti adhimattagilānaṃ. **Sivathikāya chaḍḍitanti** āmakasusāne pātitaṃ. Sesametta satipaṭṭhāne vuttameva. Idhāpi nibbānaṃyeva chandarāgavinayo.

173. Neva tasmim samaye attabyābādhāyāti tasmim samaye attanopi dukkhatthāya na ceteti. **Abyābajjhaṃyevāti** niddukkhameva.

174. Yaṃ, bhikkhave, vedanā aniccāti, bhikkhave, yasmā vedanā aniccā, tasmā ayaṃ aniccādiākārova vedanāya ādīnavoti attho, nissaraṇaṃ vuttappakāramevāti.

Papañcasūdaniyā majjhimanikāyaṭṭhakathāya

Mahādukkhakkhandhasuttavaṇṇanā niṭṭhitā.

4. Cūḷadukkhakkhandhasuttavaṇṇanā

175. Evaṃ me sutanti cūḷadukkhakkhandhasuttaṃ. Tattha **sakkesūti** evaṃnāmake janapade. So hi janapado sakyānaṃ rājakumārānaṃ vasanaṭṭhānattā sakyātveva saṅkhyāṃ gato. Sakyānaṃ pana uppatti ambaṭṭhasutte āgatāva. **Kapilavatthusminti** evaṃnāmake nagare. Tañhi kapilassa isino nivāsaṭṭhāne katattā kapilavatthūti vuttaṃ, taṃ gocaragāmaṃ katvā. **Nigrodhārāmeti nigrodho** nāma sakko, so nātisamāgamakāle kapilavatthum āgate bhagavati attano ārāme vihāraṃ kāretvā bhagavato niyyātesī, tasmim viharatīti attho. **Mahānāmoti** anuruddhattherassa bhātā bhagavato cuḷapituputto. Suddhodano sukkodano sakkodano dhotodano amitodanoti ime pañca janā bhātaro. **Amitā** nāma devī tesam bhaginī. Tissatthero tassā putto. Tathāgato ca nandatthero ca suddhodanassa puttā, mahānāmo ca anuruddhatthero ca sukkodanassa. Ānandatthero amitodanassa, so bhagavato kaniṭṭho. Mahānāmo mahallakataro sakadāgāmī ariyasāvako.

Dīgharattanti mayhaṃ sakadāgāmiphalluppattito paṭṭhāya cirarattaṃ jānāmīti dasseti. **Lobhadhammāti** lobhasaṅkhātā dhammā, nānappakāraṃ lobhaṃyeva sandhāya vadati. Itaresupi dvīsu eseva nayo. **Pariyādāya tiṭṭhantīti** khepetvā tiṭṭhanti. Idañhi pariyādānaṃ nāma “sabbam hatthikāyaṃ pariyādiyivā sabbam assakāyaṃ sabbam rathakāyaṃ sabbam pattikāyaṃ pariyādiyivā jīvantaṃyeva naṃ osajjeyya”nti (saṃ. ni. 1.126) ettha gahaṇe āgataṃ. “Aniccasaññā, bhikkhave, bhāvitā bahulīkatā sabbam kāmarāgaṃ pariyādiyātī”ti (saṃ. ni. 3.102) ettha khepane. Idhāpi khepane adhippetam. Tena vuttaṃ “pariyādiyivāti khepetvā”ti.

Yena me ekadā lobhadhammāpīti yena mayhaṃ ekekasmim kāle lobhadhammāpi cittaṃ pariyādāya tiṭṭhantīti pucchati. Ayaṃ kira rājā “sakadāgāmimaggena lobhadosaṃmohā niravasesā pahīyanti”ti saññī ahoṣi, ayaṃ “appahīnaṃ me atthī”tipi jānāti, appahīnaṃ upādāya pahīnakampi puna pacchatovāvattatīti saññī hoti. Ariyasāvakassa evaṃ sandeho uppajjatīti? Āma uppajjati. Kasmā? Paṇṇattiyā akovidattā. “Ayaṃ kilesa asukamaggavajjho”ti imissā paṇṇattiyā akovidassa hi ariyasāvakassapi evaṃ hoti. Kim tassa paccavekkhaṇā natthīti? Atthī. Sā pana na sabbesaṃ paripuṇṇā hoti. Eko hi pahīnakilesameva paccavekkhati. Eko avasiṭṭhakilesameva, eko maggameva, eko phalameva, eko nibbānameva. Imāsu pana pañcasu paccavekkhaṇāsu ekaṃ vā dve vā no laddhum na vaṭṭati. Iti yassa paccavekkhaṇā na paripuṇṇā, tassa maggavajjhakilesapaṇṇattiyam akovidattā evaṃ hoti.

176. So eva kho teti soyeva lobho doso moho ca tava santāne appahīno, tvaṃ pana pahīnasaññī ahoṣīti dasseti. **So ca hi teti** so tuyhaṃ lobhadosaṃmohadhammo. **Kāmeti** duvidhe kāme. **Na paribhuñjeyyāsīti** mayam viya pabbajeyyāsīti dasseti.

177. **Appassādāti** parittasukhā. **Bahudukkhāti** diṭṭhadhammikasamparāyikadukkhamvettha bahukaṃ. **Bahupāyāsāti** diṭṭhadhammikasamparāyiko upāyāsakilesoyevettha bahu. **Ādīnavoti** diṭṭhadhammikasamparāyiko upaddavo. **Ettha bhīyyoti** etesu kāmesu ayaṃ ādīnavoyeva bahu. Assādo pana himavantaṃ upanidhāya sāsapo viya appo, parittako. **Iti cepi mahānāmāti** mahānāma evaṃ cepi ariyasāvakaassa. **Yathābhūtaṃ** yathāsabhāvaṃ. Sammā nayena kāraṇena paññāya suṭṭhu diṭṭhaṃ hotīti dasseti. Tattha **paññāyāti** vipassanāpaññāya, heṭṭhāmaggadavayaññānenāti attho. **So cāti** so eva maggadavayena diṭṭhakāmādīnavo ariyasāvako. **Pīṭisukhanti** iminā sappītikāni dve jhānāni dasseti. **Aññaṃ vā tato santataranti** tato jhānadvayato santataraṃ aññaṃ uparijhānadvayañceva maggadavayañca. **Neva tāva anāvaṭṭi kāmesu hotīti** atha kho so dve magge paṭivijjhivā ṭhitopi ariyasāvako upari jhānānaṃ vā maggānaṃ vā anadhigatattā neva tāva kāmesu anāvaṭṭi hoti, anāvaṭṭino anābhogo na hoti. Āvaṭṭino sābhogoyeva hoti. Kasmā? Catūhi jhānehi vikkhambhanappahānassa, dvīhi maggehi samucchadappahānassa abhāvā.

Mayhampi khoti na kevalaṃ tuyheva, atha kho mayhampi. **Pubbeva sambodhāti** maggasambodhito paṭhamatarameva. **Paññāya sudiṭṭhaṃ hotīti** ettha orodhanāṭakā pajāhanapaññā adhippetā. **Pīṭisukhaṃ nājjhagamanti** sappītikāni dve jhānāni na paṭilabhiṃ. **Aññaṃ vā tato santataranti** idha upari jhānadvayaṃ ceva cattāro ca maggā adhippetā. **Paccaññāsinti** paṭiaññāsiṃ.

179. **Ekamidāhaṃ mahānāma samayanti** kasmā āraddhaṃ? Ayaṃ pāṭiyekko anusandhi. Heṭṭhā kāmānaṃ assādopi ādīnavopi kathito, nissaraṇaṃ na kathitaṃ, taṃ kathetuṃ ayaṃ desanā āraddhā. Kāmasukhallikānuyogo hi eko anto attakīlamathānuyogo ekoti imehi antehi muttaṃ mama sāsānanti upari phalasaṃpattisīsenā sakalāsānaṃ dassetumpi ayaṃ desanā āraddhā.

Gijjhakūṭe pabbateti tassa pabbatassa gijjhasadisam kūṭaṃ atthi, tasmā **gijjhakūṭoti** vuccati. Gijjhā vā tassa kūṭesu nivasantītipi gijjhakūṭoti vuccati. **Isigilipasseti** isigilipabbatassa passe. **Kālasilāyanti** kālavaṇṇe piṭṭhipāsāṇe. **Ubbhaṭṭhakā hontīti** uddhamyeva ṭhitakā honti anisinnā. **Opakkamikāti** ubbhaṭṭhakādīnā attano upakkamena nibbattitā. **Nigaṇṭho, āvusoti** aññaṃ kāraṇaṃ vattum asakkontā nigaṇṭhassa upari pakkhipiṃsu. **Sabbaññū sabbadassāvīti** so amhākaṃ satthā atītanāgatapaccuppannaṃ sabbaṃ jānāti passatīti dasseti. **Aparisesaṃ nānadassanaṃ paṭijānātīti** so amhākaṃ satthā aparisesaṃ dhammaṃ jānanto aparisesasañkhātaṃ nānadassanaṃ paṭijānāti, paṭijānanto ca evaṃ paṭijānāti “carato ca me tiṭṭhato ca...pe... paccupaṭṭhita”nti. Tattha **satatanti** niccaṃ. **Samitanti** tasseva vevacanaṃ.

180. **Kiṃ pana tumhe, āvuso, nigaṇṭhā jānātha ettakaṃ vā dukkhaṃ nijjiṇṇanti** idaṃ bhagavā puriso nāma yaṃ karoti, taṃ jānāti. Vīsatikahāpaṇe iṇaṃ gahetvā dasa datvā “dasa me dinnā dasa avasiṭṭhā”ti jānāti, tepi datvā “sabbaṃ dinna”nti jānāti. Khetṭassa tatiyabhāgaṃ lāyitvā “eko bhāgo lāyito, dve avasiṭṭhā”ti jānāti. Puna ekaṃ lāyitvā “dve lāyitā, eko avasiṭṭho”ti jānāti. Tasmimpi lāyite “sabbaṃ niṭṭhita”nti jānāti, evaṃ sabbakiccesu katañca akatañca jānāti, tumhehi tathā nītabbaṃ siyāti dasseti. **Akusalānaṃ dhammānaṃ pahānanti** iminā akusalaṃ pahāya kusalaṃ bhāvetvā suddhantaṃ patto nigaṇṭho nāma tumhākaṃ sāsane atthīti pucchati.

Evaṃ santeti tumhākaṃ evaṃ ajānanabhāve sati. **Luddāti** luddācārā. **Lohitapaṇinoti** pāṇe jīvītā voropentā lohiteṇa makkhitapaṇino. Pāṇaṃ hi hanantassapi yassa lohiteṇa pāṇi na makkhiyati, sopi lohitapaṇīteva vuccati. **Kurūrakammantāti** dāruṇakammā. Mātari pitari dhammikasamaṇabrāhmaṇādīsu ca katāparādhā. Māgavikādayo vā kakkhaḷakammā.

Na kho, āvuso, gotamāti idaṃ nigaṇṭhā “ayaṃ amhākaṃ vāde dosaṃ deti, mayampissa dosaṃ āropemā”ti maññamānā ārabhiṃsu. Tassattho, “āvuso, gotama yathā tumhe paṇītaṭīvarāni dhārentā sālīmaṃsodanaṃ bhuñjantā devavimānavaṇṇāya gandhakuṭiyā vasamānā sukkena sukhaṃ adhigacchatha, na evaṃ sukkena sukhaṃ adhigantabbaṃ. Yathā pana mayaṃ ukkuṭīkappadhānādīhi nānappakāraṇaṃ dukkhaṃ anubhavāma, evaṃ dukkhena sukhaṃ adhigantabba”nti. **Sukkena ca hāvusoti** idaṃ sace sukkena ca sukhaṃ adhigantabbaṃ siyā. Rājā adhigaccheyyāti dassanattaṃ vuttaṃ. Tattha **māgadhoti** magadharatṭhassa issaro. **Seniyoti** tassa nāmaṃ. **Bimbīti** attabhāvassa nāmaṃ. So tassa sārabhūto dassaniyo pāsādiko attabhāvasamidhiyā **bimbisāroti** vuccati. **Sukhavihāritaroti** idaṃ te nigaṇṭhā rañño tīsu pāsādesu tividhavayehi nātakehi saddhiṃ sampattianubhavanaṃ sandhāya vadanti. **Addhāti** ekaṃsena. **Sahasā appaṭisañkhāti** sāhasaṃ katvā, appaccavekkhitvā yathā ratto rāgavasena duṭṭho dosavasena mūlho

mohavasena bhāsati, evamevaṃ vācā bhāsītāti dasseti.

Tattha paṭipucchissāmīti tasmīṃ atthe pucchissāmi. **Yathā vo khameyyāti** yathā tumhākaṃ ruceyya. **Pahotīti** sakkoti.

Aniñjamānoti acalamāno. **Ekantasukhaṃ paṭisaṃvedīti** nirantarasukhaṃ paṭisaṃvedī. “Ahaṃ kho, āvuso, niṅaṇṭhā pahomi...pe... ekantasukhaṃ paṭisaṃvedī”ti idaṃ attano phalasaṃpattisukhaṃ dassento āha. Ettha ca kathāpaṭiṭṭhāpanatthaṃ rājavāre satta ādiṃ katvā pucchā katā. Satta rattindivāni nappahotīti hi vutte cha pañca cattārīti sukhaṃ pucchituṃ hoti. Suddhavāre pana sattāti vutte puna cha pañca cattārīti vuccamānaṃ anacchariyaṃ hoti, tasmā ekaṃ ādiṃ katvā desanā katā. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Cūḷadukkhakkhandhasuttavaṇṇanā niṭṭhitā.

5. Anumānasuttavaṇṇanā

181. Evaṃ me sutanti anumānasuttaṃ. Tattha **bhaggesūti** evaṃnāmake janapade, vacanattho panettha vuttānūsārenea vedītabbo. **Susumāragireti** evaṃnāmake nagare. Tassa kira nagarassa vatthupariggahadivase avidūre udakarahade suṃsumāro saddamakāsi, giram nicchāresi. Atha nagare niṭṭhite **suṃsumāragiram** tvevassa nāmaṃ akaṃsu. **Bhesakaḷāvaneti** bhesakaḷānāmake vane. “Bhesakaḷāvane”tipi pāṭho. **Migadāyoti** taṃ vanaṃ migapakkhīnaṃ abhayadinnatṭhāne jātaṃ, tasmā **migadāyoti** vuccati.

Pavāretīti icchāpeti. **Vadantūti** ovādānusāsānivasena vadantu, anusāsantūti attho. **Vacaniyomhīti** ahaṃ tumhehi vattabbo, anusāsītabbo ovaditabboti attho. **So ca hoti dubbacoti** so ca dukkhena vattabbo hoti, vutto na sahati. **Dovacassakaraṇehīti** dubbacabhāvākārakehi upari āgatehi soḷasahi dhammehi. **Appadakkhiṇaggāhī anusāsaninti** yo hi vuccamāno tumhe maṃ kasmā vadatha, ahaṃ attano kappiyākappiyaṃ sāvajjānavajjaṃ atthānatthaṃ jānāmīti vadati. Ayaṃ anusāsaniṃ padakkhiṇato na gaṇhāti, vāmato gaṇhāti, tasmā **appadakkhiṇaggāhīti** vuccati.

Pāpikānaṃ icchānanti lāmakānaṃ asantasambhavanapatthanānaṃ. **Paṭippharatīti** paṭiviruddho, paccanīko hutvā tiṭṭhati, **apasādetīti** kiṃ nu kho tuyhaṃ bālassa abyattassa bhaṇitena, tvampi nāma bhaṇitabbaṃ maññissasīti evaṃ ghaṭṭeti. **Paccāropetīti**, tvampi khosi itthannāmaṃ āpattim āpanno, taṃ tāva paṭikarohīti evaṃ paṭiāropeti.

Aññenaññaṃ paṭicaratīti aññena kāraṇena vacanena vā aññaṃ kāraṇaṃ vacanaṃ vā paṭicchādeti. “Āpattim āpannosī”ti vutte “ko āpanno, kiṃ āpanno, kismiṃ āpanno, kaṃ bhaṇatha, kiṃ bhaṇathā”ti vā vadati. “Evarūpaṃ kiñci tayā diṭṭha”nti vutte “na suṇāmī”ti sotaṃ vā upaneti. **Bahiddhā kathaṃ apanāmetīti** “itthannāmaṃ āpattim āpannosī”ti puṭṭho “pāḷaliputtaṃ gatomhī”ti vatvā puna “na tava pāḷaliputtagamanam pucchāma, āpattim pucchāmā”ti vutte “tato rājagehaṃ gatomhī”ti, rājagehaṃ vā yāhi brāhmaṇagehaṃ vā, āpattim āpannosīti. Tattha me sūkaramaṃsaṃ laddhantiādīni vadanto kathaṃ bahiddhā vikkhipati.

Apadāneti attano cariyāya. **Na sampāyatīti**, āvuso, tvam kuhiṃ vasasi, kaṃ nissāya vasasīti vā, yaṃ tvam vadesi “mayā esa āpattim āpajjanno diṭṭho”ti. Tvam tasmīṃ samaye kiṃ karosī, ayaṃ kiṃ karotī, kattha vā tvam acchasi kattha vā ayantiādīnā nayena cariyaṃ puṭṭho sampādetvā kathetuṃ na sakkoti.

183. Tatrāvusoti, āvuso, tesu soḷasasu dhammesu. **Attanāva attānaṃ evaṃ anuminitabbanti** evaṃ attanāva attā anumetabbo tuletabbo tīretabbo.

184. Paccavekkhitabbanti paccavekkhitabbo. **Ahorattānusikkhināti** divāpi rattimpi sikkhantena, ratiñca divā ca kusalesu dhammesu sikkhantena pītipāmojjameva uppādetabbanti attho.

Acche vā udakapatteti pasanne vā udakabhājane. **Mukhanimittanti** mukhapaṭibimbaṃ. **Rajanti**

āgantukarajaṃ. **Aṅgaṇanti** tattha jātaṃ tilakaṃ vā piḷakaṃ vā. **Sabbepime pāpake akusale dhamme pahī**neti iminā sabbappahānaṃ kathesi. Kathaṃ? Ettakā akusalā dhammā pabbajitassa nānucchavikāti paṭisaṅkhānaṃ uppādayato hi **paṭisaṅkhānappahānaṃ** kathitaṃ hoti. Sīlaṃ padaṭṭhānaṃ katvā kasiṇaparikkamaṃ ārabhitvā aṭṭha samāpattiyo nibbattentassa **vikkhambhanappahānaṃ** kathitaṃ. Samāpattiṃ padaṭṭhānaṃ katvā vipassanaṃ vaḍḍhentassa **tadaṅgappahānaṃ** kathitaṃ. Vipassanaṃ vaḍḍhetvā maggaṃ bhāventassa **samucchedappahānaṃ** kathitaṃ. Phale āgate **paṭippassaddhippahānaṃ**, nibbāne āgate **nissaraṇappahānaṃ** evaṃ imasmiṃ sutte sabbappahānaṃ kathitaṃva hoti.

Idaṃhi suttaṃ **bhikkhupātimokkhaṃ** nāmāti porāṇā vadanti. Idaṃ divasassa tikkhattuṃ paccavekkhitabbaṃ. Pāto eva vasanaṭṭhānaṃ pavisitvā nisinnena “ime ettakā kilesā atthi nu kho mayhaṃ natthi”’ti paccavekkhitabbā. Sace atthīti passati, tesam pahānāya vāyamiṭabbaṃ. No ce passati, supabbajitosmīti attamanena bhavitabbaṃ. Bhattakiccaṃ katvā rattitṭhāne vā divāṭṭhāne vā nisīditvāpi paccavekkhitabbaṃ. Sāyaṃ vasanaṭṭhāne nisīditvāpi paccavekkhitabbaṃ. Tikkhattuṃ asakkontena dve vāre paccavekkhitabbaṃ. Dve vāre asakkontena pana avassaṃ ekavāraṃ paccavekkhitabbaṃ, appaccavekkhituṃ na vaṭṭatīti vadanti. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Anumānasuttavaṇṇanā niṭṭhitā.

6. Cetokhilasuttavaṇṇanā

185. Evaṃ me sutanti cetokhilasuttaṃ. Tattha **cetokhilā**ti cittaṃ thaddhabhāvā kacavarabhāvā khāṇukabhāvā. **Cetaso vinibandhā**ti cittaṃ bandhitvā muṭṭhiyaṃ katvā viya gaṇhantīti cetaso vinibandhā. **Vuddhintiādī**su sīlena vuddhiṃ, maggena viruḷhiṃ, nibbānena vepullaṃ. Sīlasamādhīhi vā vuddhiṃ, vipassanāmaggehi viruḷhiṃ, phalanibbānehi vepullaṃ. **Satthari kaṅkhatī**ti satthu sarīre vā guṇe vā kaṅkhati. Sarīre kaṅkhamāno dvattiṃsavaralakkaṇappaṭiṃṇaṃ nāma sarīraṃ atthi nu kho natthīti kaṅkhati, guṇe kaṅkhamāno atīṭānāgatapaccuppannājananasamatthaṃ sabbaññutaññānaṃ atthi nu kho natthīti kaṅkhati. **Vicikicchati**ti vicinanto kicchati, dukkhaṃ āpajjati, vicicchetuṃ na sakkoti. **Nādhimuccati**ti evametanti adhimokkhaṃ na paṭilabhati. **Na sampasīdatī**ti guṇesu otarivā nibbicikicchabhāvena pasīdituṃ, anāvilo bhavituṃ na sakkoti. **Ātappāyati** kilesasantāpakavīriyakaraṇatthāya. **Anuyogāyati** punappunaṃ yogāya. **Sātaccāyati** satatakiriyāya **padhānāyati** padahanatthāya. **Ayaṃ paṭhamo cetokhiloti** ayaṃ satthari vicikicchāsāṅkhāto paṭhamo cittaṃ thaddhabhāvo, evametassa bhikkhuno appahīno hoti. **Dhammeti** pariyaṭṭidhamme ca paṭivedhadhamme ca. Pariyaṭṭidhamme kaṅkhamāno, teṭṭhakaṃ buddhavacanaṃ caturāsīti dhammakhandhasahassānīti vadanti, atthi nu kho etaṃ natthīti kaṅkhati. Paṭivedhadhamme kaṅkhamāno vipassanānissando maggo nāma, magganissando phalaṃ nāma, sabbasaṅkhārappaṭinissaggo nibbānaṃ nāmāti vadanti. Taṃ atthi nu kho natthīti kaṅkhati. **Saṅghe kaṅkhatī**ti suppaṭipannotiādīnaṃ padānaṃ vasena evarūpaṃ paṭipadaṃ paṭipannā cattāro maggaṭṭhā cattāro phalaṭṭhāti aṭṭhannaṃ puggalānaṃ samūhahūto **saṅgho** nāma, so atthi nu kho natthīti kaṅkhati. **Sikkhāya kaṅkhamāno** adhisīlasikkhā nāma adhicittasikkhā nāma adhipaññāsikkhā nāmāti vadanti. Sā atthi nu kho natthīti kaṅkhati. **Ayaṃ pañcamoti** ayaṃ sabrahmacārīsu kopasaṅkhāto pañcamo cittaṃ thaddhabhāvo kacavarabhāvo khāṇukabhāvo.

186. Vinibandhesu **kāmeti** vatthukāmepe kilesakāmepe. **Kāyeti** attano kāye. **Rūpeti** bahiddhā rūpe. **Yāvadatthanti** yattakaṃ icchati, tattakaṃ. **Udarāvadehakanti** udarapūraṃ. Tañhi udaraṃ avadehanato udarāvadehakanti vuccati. **Seyyasukhanti** mañcapīṭhasukhaṃ, utusukhaṃ vā. **Passasukhanti** yathā samparivattakaṃ sayantassa dakkhiṇapassavāmapassānaṃ sukhaṃ hoti, evaṃ uppannasukhaṃ. **Middhasukhanti** niddāsukhaṃ. **Anuyuttoti** yuttapayutto viharati.

Pañidhāyati pathayitvā. **Sīlenātiādī**su sīlanti catupārisuddhisīlaṃ. **Vatanti** vatasamādānaṃ. **Tapoti** tapacaraṇaṃ. **Brahmacariyanti** methunavirati. **Devo vā bhavissāmīti** mahesakkhadevo vā bhavissāmi. **Devaññātaro** vāpi appesakkhadevesu vā aññātaro.

189. Iddhipādesu chandaṃ nissāya pavatto samādhi **chandasaṃmādhī**. Padhānabhūtā saṅkhārā **padhānasaṅkhārā**. **Samannāgatanti** tehi dhammehi upetaṃ. Iddhiyā pādaṃ, iddhibhūtaṃ vā pādanti

iddhipādam. Sesesupi eseva nayo, ayamettha saṅkhepo. Vitthāro pana iddhipādavibhaṅge āgato yeva. **Visuddhimagge**pissa attho dīpito. Iti imehi catūhi iddhipādehi vikkhambhanappahānaṃ kathitaṃ. **Ussolhīyeva pañcamīti** ettha **ussolhīti** sabbattha kattabbavīriyaṃ dasseti. **Ussolhīpannarasaṅgasamannāgatoti** pañca cetokhilappahānāni pañca vinibandhappahānāni cattāro iddhipādā ussolhīti evaṃ ussolhīyā saddhiṃ pannarasahi aṅgehi samannāgato. **Bhabboti** anurūpo, anucchaviko. **Abhinibbhidāyāti** ñāṇena kilesabhedāya. **Sambodhāyāti** catumaggasambodhāya. **Anuttarassāti** seṭṭhassa. **Yogakkhemassāti** catūhi yogehi khemassa arahattassa. **Adhigamāyāti** paṭilābhāya. **Seyyathāti** opammatthe nipāto. **Pīti** sambhāvanatthe. Ubhayenapi seyyathāpi nāma, bhikkhaveti dasseti.

Kukkuṭiyā aṇḍāni aṭṭha vā dasa vā dvādasa vāti ettha pana kiñcāpi kukkuṭiyā vuttappakāro ūnādhikānīpi aṇḍāni honti, vacanasiliṭṭhatāya pana evaṃ vuttaṃ. Evañhi loke siliṭṭhaṃ vacanaṃ hoti. **Tānassūti** tāni assu, bhavēyyunti attho. **Kukkuṭiyā sammā adhisayitānīti** tāya janettiyā kukkuṭiyā pakkhe pasāretvā tesam upari sayantiyā sammā adhisayitāni. **Sammā pariseditānīti** kālena kālaṃ utuṃ gāhāpentiyā suṭṭhu samantato seditāni usmīkatāni. **Sammā paribhāvitānīti** kālena kālaṃ suṭṭhu samantato bhāvitāni, kukkuṭagandhaṃ gāhāpitānīti attho. **Kiñcāpi tassā kukkuṭiyāti** tassā kukkuṭiyā imaṃ tividhakiriyākaraṇena appamādaṃ katvā kiñcāpi na evaṃ icchā uppajjēyya. **Atha kho bhābbāva teti** atha kho te kukkuṭapotakā vuttanayena sotthinā abhinibbhijjituṃ bhābbāva. Te hi yasmā tāya kukkuṭiyā evaṃ tīhākārehi tāni aṇḍāni paripālīyamānāni na pūṭīni hontī. Yopi nesam allasineho, sopi pariyādānaṃ gacchati, kapālaṃ tanukaṃ hoti, pādānakhasikhā ca mukhatuṇḍakañca kharaṃ hoti, sayam paripākam gacchati, kapālassa tanuttā bahi āloko anto paññāyati, tasmā “ciraṃ vata mayaṃ saṅkuṭītatathapādā sambādhe sayimhā, ayañca bahi āloko dissati, ettha dāni no sukhavihāro bhavissati”ti nikkhamitukāmā hutvā kapālaṃ pādēna paharanti, gīvaṃ pasārenti, tato taṃ kapālaṃ dvedhā bhijjati. Atha te pakkhe vidhunantā taṅkhañānurūpaṃ viravantā nikkhamantiyeva, nikkhamitvā ca gāmakkhetaṃ upasobhayamānā vicaranti.

Evameva khoti idaṃ opammasampañipādanaṃ. Taṃ evaṃ atthēna saṃsandetvā vedītabbaṃ – tassā kukkuṭiyā aṇḍesu tividhakiriyākaraṇaṃ viya hi imassa bhikkhuno ussolhīpannarasehi aṅgehi samannāgatabhāvo. Kukkuṭiyā tividhakiriyāsampādanena aṇḍānaṃ apūtibhāvo viya pannarasaṅgasamannāgatassa bhikkhuno tividhānupassanāsampādanena vipassanāññāssa aparīhāni. Tassā tividhakiriyākaraṇena aṇḍānaṃ allasinehapariyādānaṃ viya tassa bhikkhuno tividhānupassanāsampādanena bhavattayānugatanikantisinehapariyādānaṃ. Aṇḍakālāpānaṃ tanubhāvo viya bhikkhuno avijjaṇḍakosassa tanubhāvo. Kukkuṭapotakānaṃ pādānakhamutuṇḍakānaṃ thaddhakharabhāvo viya bhikkhuno vipassanāññāssa tikkhakharavippasannasūrabhāvo. Kukkuṭapotakānaṃ pariṇāmakālo viya bhikkhuno vipassanāññāssa pariṇāmakālo vaḍḍhitakālo gabbhaggahaṇakālo. Kukkuṭapotakānaṃ pādānakhasikhāya vā mukhatuṇḍakena vā aṇḍakosaṃ padāletvā pakkhe papphoṭevā sotthinā abhinikkhamaṇakālo viya tassa bhikkhuno vipassanāññāgabbhaṃ gaṇhāpetvā vicarantassa tajjātikaṃ utusappāyaṃ vā bhojanasappāyaṃ vā puggalasappāyaṃ vā dhammasavanasappāyaṃ vā labhitvā ekāsane nisinnasseva vipassanaṃ vaḍḍhentassa anupubbādhiगतena arahattamaggena avijjaṇḍakosaṃ padāletvā abhiññāpakkhe papphoṭevā sotthinā arahattappattakālo vedītabbo. Yathā pana kukkuṭapotakānaṃ pariṇatabhāvaṃ ñatvā mātāpi aṇḍakosaṃ bhindati, evaṃ tathārūpassa bhikkhuno ñāṇaparipākam ñatvā satthāpi –

“Ucchinda sinehamattano, kumudaṃ sārādikaṃva pāṇinā;
Santimaggameva brūhaya, nibbānaṃ sugatena desita”nti. (dha. pa. 285) –

Ādinā nayena obhāsam pharivā gāthāya avijjaṇḍakosaṃ paharati, so gāthāpariyosāne avijjaṇḍakosaṃ bhinditvā arahattaṃ pāpuṇāti. Tato paṭṭhāya yathā te kukkuṭapotakā gāmakkhetaṃ upasobhayamānā tattha tattha vicaranti, evaṃ ayampi mahākhīñāsavo nibbānarammaṇaṃ phalasaṃpattiṃ appētvā saṅghārāmaṃ upasobhayamāno vicarati.

Iti imasmīṃ sutte cattāri pahānāni kathitāni. Kathaṃ? Cetokhilānañhi cetovinibandhānaṃ pahānena **paṭisaṅkhānappahānaṃ** kathitaṃ, iddhipādehi **vikkhambhanappahānaṃ** kathita, magge āgate **samucchedappahānaṃ** kathitaṃ, phale āgate **paṭippassaddhippahānaṃ** kathitaṃ. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Cetokhilasuttavaṇṇanā niṭṭhitā.

7. Vanapatthapariyāyasuttavaṇṇanā

190. Evaṃ me sutanti vanapatthapariyāyaṃ. Tattha **vanapatthapariyāyanti** vanapatthakāraṇaṃ, vanapatthadesanaṃ vā.

191. Vanapattham upanissāya viharatīti manussūpacārātikantaṃ vanasaṇḍasenāsaṇaṃ nissāya samaṇadhammaṃ karonto viharati. **Anupaṭṭhitā**tiādīsu pubbe anupaṭṭhitā sati taṃ upanissāya viharatopi na upaṭṭhātī, pubbe asamāhitaṃ cittaṃ na samādhiyati, pubbe aparikkhīṇā āsavā na parikkhayaṃ gacchanti, pubbe ananuppattaṃ anuttaraṃ yogakkhemasaṅkhātāṃ arahattañca na pāpuṇātīti attho. **Jīvitaparikkhārātī** jīvitasambhārā. **Samudānetabbātī** samāharitabbā. **Kasirena samudāgacchantīti** dukkhena uppajjanti. **Rattibhāgaṃ vā divasabhāgaṃ vāti** rattikoṭṭhāse vā divakoṭṭhāse vā. Ettha ca rattibhāge paṭisañcikkhamānena ñatvā rattimyeva pakkamitabbāṃ, rattim caṇḍavāḷādīnaṃ paribandhe sati aruṇuggamaṇaṃ āgametabbāṃ. Divasabhāge ñatvā divāva pakkamitabbāṃ, divā paribandhe sati sūriyatthaṅgamaṇaṃ āgametabbāṃ.

192. Saṅkhāpīti evaṃ samaṇadhammassa anipphajjanabhāvaṃ jānitvā. Anantaravāre pana saṅkhāpīti evaṃ samaṇadhammassa nipphajjanabhāvaṃ jānitvā.

194. Yāvajīvanti yāva jīvitaṃ pavattati, tāva vatthabbameva.

195. So puggaloti padassa nānubandhitabboti iminā sambandho. **Anāpucchātī** idha pana taṃ puggalaṃ anāpucchā pakkamitabbanti attho.

197. Saṅkhāpīti evaṃ samaṇadhammassa anipphajjanabhāvaṃ ñatvā so puggalo nānubandhitabbo, taṃ āpucchā pakkamitabbāṃ.

198. Api panujjamānenāpīti api nikkadḍhīyamānenāpi. Evarūpo hi puggalo sacepi dārukālāpasataṃ vā udakaghaṭasataṃ vā vālikambaṇasataṃ vā daṇḍaṃ āharāpeti, mā idha vasīti nikkadḍhāpeti vā, taṃ taṃ khamāpetvā yāvajīvaṃ vatthabbamevātī.

Papañcasūdaniyā majjhimanikāyaṭṭhakathāya

Vanapatthapariyāyasuttavaṇṇanā niṭṭhitā.

8. Madhupiṇḍikasuttavaṇṇanā

199. Evaṃ me sutanti madhupiṇḍikasuttaṃ. Tattha **mahāvananti** himavantena saddhiṃ ekābaddhaṃ aropimaṃ jātivanaṃ, na yathā vesāliyaṃ ropitāropitamissakaṃ. **Divāvihārāyātī** divā paṭisallānatthāya. **Beluvalaṭṭhikāyātī** taruṇabeluvarukkhassa. **Daṇḍapāṇītī** na jarādubbalatāya daṇḍahattho. Ayañhi taruṇo paṭhamavaye ṭhito, daṇḍacittatāya pana suvaṇṇadaṇḍaṃ gahetvā vicarati, tasmā **daṇḍapāṇītī** vutto. **Jaṅghāvihāranti** jaṅghākilamathavinodanattaṃ jaṅghācāraṃ. **Anucaṅkamamāno anuvicaramānoti** āramadassana-vanadassana-pabbatadassanādīnaṃ atthāya ito cito ca vicaramāno. Adhiccanikkhamano kiresa kadāci deva nikkhamitvā evaṃ vicarati. **Daṇḍamolubbhātī** daṇḍaṃ olumbhitvā gopālakadārako viya daṇḍaṃ purato ṭhapetvā daṇḍamatthake dve hatthe paṭiṭṭhāpetvā piṭṭhipāṇiṃ hanukena uppīletvā ekamantaṃ aṭṭhāsī.

200. Kimvādīti kiṃdiṭṭhiko. **Kimakkhāyīti** kiṃ katheti. Ayaṃ rājā bhagavantaṃ avanditvā paṭisanthāramattakameva katvā pañhaṃ pucchati. Tampi na aññātukāmatāya, acittikārena pucchati. Kasmā? Devadattassa pakkhiko kiresa. Devadatto attano santikaṃ āgacchamāne tathāgate bhindati. So kira evaṃ vadeti “samaṇo gotamo amhākaṃ kulena saddhiṃ verī, na no kulassa vuddhiṃ icchati. Bhaginīpi me cakkavattiparibhogā, taṃ pahāya ‘nassatesā’ ti nikkhamitvā pabbaji. Bhāgineyyopi me cakkavattibjanti ñatvā amhākaṃ kulassa vaḍḍhiyā atussanto ‘nassateta’nti tampi daharakāleyeva pabbājesi. Ahaṃ pana tena vinā vattituṃ asakkonto anupabbajito. Evaṃ pabbajitampi maṃ pabbajitadivasato paṭṭhāya na ujukehi akkhīhi

oloketi. Parisamajjhe bhāsantopi mahāpharasunā paharanto viya āpāyiko devadattotiādīni bhāsati’ ti. Evaṃ ayampi rājā devadattena bhinno, tasmā evamakāsi.

Atha bhagavā yathā ayaṃ rājā mayā pañhe pucchite na kathetīti vattuṃ na labhati, yathā ca bhāsitassa atthaṃ na jānāti, evamassa kathessāmīti tassānucchavikaṃ kathento **yathāvādī khoti**ādīmāha.

Tattha **na kenaci loke viggayha tiṭṭhatīti** loke kenaci saddhiṃ viggāhikakathaṃ na karotī na vivadati. Tathāgato hi lokena saddhiṃ na vivadati; loko pana tathāgatena saddhiṃ aniccanti vutte niccanti vadamāno, dukkhaṃ, anattā, asubhanti vutte subhanti vadamāno vivadati. Tenevāha “nāhaṃ, bhikkhave, lokena vivadāmi, lokova kho, bhikkhave, mayā vivadati, tathā na, bhikkhave, dhammavādī kenaci lokasmiṃ vivadati, adhammavādīva kho, bhikkhave, vivadati’ ti (saṃ. ni. 3.94). **Yathāti** yena kāraṇena. **Kāmehi**ti vatthukāmehipi kilesakāmehipi. **Taṃ brāhmaṇanti** taṃ khīṇāsavaṃ brāhmaṇaṃ. **Akathaṃkathinti** nibbicikicchaṃ. **Chinnakukkuccanti** vippañisārakukkuccassa ceva hatthapādakukkuccassa ca chinnatā chinnakukkuccaṃ. **Bhavābhaveti** punappunabbhave, hīnapañite vā bhave, pañito hi bhavo vuddhippatto abhavoti vuccati. **Saññāti** kilesasaññā. Kilesāyeva vā idha saññānāmena vuttā, tasmā yena kāraṇena kāmehi viṣayuttaṃ viharantaṃ taṃ loke ninnāvādiṃ khīṇāsavabrāhmaṇaṃ kilesasaññā nānuseti, tañca kāraṇaṃ ahaṃ vadāmīti ayamettha attho. Iti bhagavā attano khīṇāsavabhāvaṃ dīpeti. **Nillāletvāti** nīharitvā kīlāpetvā. **Tivisākhanti** tisākhāṃ. **Nalāṭikanti** valibhaṅgaṃ nalāte tisso rājiyo dassento valibhaṅgaṃ vuṭṭhāpetvāti attho. **Daṇḍamolubbhāti** daṇḍaṃ uppīletvā. “Daṇḍamālubbhā”tipi pāṭho, gahetvā pakkāmīti attho.

201. Aññataroti nāmena apākaṭo eko bhikkhu. So kira anusandhikusalo, bhagavatā yathā daṇḍapāṇī na jānāti, tathā mayā kathitanti vutte kinti nu kho bhagavatā aviññeyyaṃ katvā pañho kathitoti anusandhiṃ gahetvā dasabalaṃ yācivā imaṃ pañhaṃ bhikkhusaṅghassa pākaṭaṃ karissāmīti uṭṭhāyāsanaṃ ekamsaṃ uttarāsaṅgaṃ karitvā dasanakhasamujjalaṃ añjaliṃ paggayha **kimvādī pana, bhante bhagavāti**ādīmāha.

Yatonidānanti bhāvanapumsakaṃ etaṃ, yena kāraṇena yasmiṃ kāraṇe satīti attho. **Papañcasaññāsaṅkhāti** ettha **saṅkhāti** koṭṭhāso. **Papañcasaññāti** taṇhāmānadiṭṭhipapañcasampayuttā saññā, saññānāmena vā papañcāyeva vuttā. Tasmā papañcakoṭṭhāsāti ayamettha attho. **Samudācarantīti** pavattanti. **Ettha ce natthi abhinanditabbanti** yasmiṃ dvādasāyatanaṃsaṅkhāte kāraṇe sati papañcasaññāsaṅkhā samudācaranti, ettha ekāyatanaṃpi ce abhinanditabbāṃ abhivaditabbāṃ ajjhositabbāṃ natthīti attho. Tattha **abhinanditabbanti** ahaṃ mamanti abhinanditabbāṃ. **Abhivaditabbanti** ahaṃ mamāti vattabbāṃ. **Ajjhositabbanti** ajjhositvā gilitvā pariniṭṭhapetvā gahetabbayuttaṃ. Etenettha taṇhādīnaṃyeva appavattim katheti. **Esevantoti** ayaṃ abhinandanādīnaṃ natthibhāvova rāgānusayādīnaṃ anto. Eseva nayo sabbattha.

Daṇḍādānādīsu pana yāya cetanāya daṇḍaṃ ādiyati, sā **daṇḍādānaṃ**. Yāya satthaṃ ādiyati parāmasati, sā **satthādānaṃ**. Matthakappattaṃ **kalahaṃ**. Nānāgāhamattaṃ **viggahaṃ**. Nānāvādamattaṃ **vivādaṃ**. **Tuvaṃ** tuvanti evaṃ pavattaṃ tuvaṃ tuvaṃ. Piyasuññakaraṇaṃ **pesuññaṃ**. Ayathāsabhāvaṃ musāvādaṃ karoti, sā **musāvādōti** veditabbā. **Ettheteti** ettha dvādasasu āyatanesu ete kilesā. Kilesā hi uppajjamānāpi dvādasāyatanaṃni nissāya uppajjanti, nirujjhamānāpi dvādasasu āyatanesuyeva nirujjhanti. Evaṃ yatthuppanā, tattheva niruddhā hontī. Svāyamattho samudayasaccapañhena dīpetabbo –

“Sā kho panesā taṇhā kattha uppajjamānā uppajjati, kattha nivisaṃānā nivisati’ ti vatvā – “yaṃ loke piyarūpaṃ sātārūpaṃ, etthesā taṇhā uppajjamānā uppajjati, ettha nivisaṃānā nivisati. Kiñca loke piyarūpaṃ sātārūpaṃ? Cakkhu loke piyarūpaṃ sātārūpa’ntiādīnā (vibha. 203) nayena dvādasasuyeva āyatanesu tassā uppatti ca nirodho ca vutto. Yattheva ca taṇhā dvādasasu āyatanesu uppajjitvā nibbānaṃ āgamma niruddhāpi āyatanesu puna samudācarassa abhāvato āyatanesuyeva niruddhāti vuttā, evamimepi pāpakā akusalā dhammā āyatanesu nirujjhantīti veditabbā. Atha vā yvāyaṃ abhinandanādīnaṃ abhāvova rāgānusayādīnaṃ antoti vutto. Etthete rāgānusayādīnaṃ antoti laddhavohāre nibbāne pāpakā akusalā dhammā aparisesā nirujjhanti. Yañhi yattha natthi, taṃ tattha niruddhaṃ nāma hoti, svāyamattho nirodhapañhena dīpetabbo. Vuttañhettaṃ “dutiyaṃ jhānaṃ samāpannassa vitakkavicārā vacīsaṅkhārā paṭippassaddhā hontī’ tiādī (paṭi. ma. 1.83).

202. Satthu ceva samvaṇṇitoti satthārā ca pasamsito. **Viññūnanti** idampi karaṇatthe sāmivacanaṃ, paṇḍitehi sabrahmacārīhi ca sambhāvitoti attho. **Pahotīti** sakkoti.

203. Atikkammeva mūlaṃ atikkamma khandhanti sāro nāma mūle vā khandhe vā bhaveyya, tampi atikkamitvāti attho. **Evamsampadanti** evamsampattikaṃ, īdisanti attho. **Atisitvāti** atikkamitvā. **Jānaṃ jānātīti** jānitabbameva jānāti. **Passaṃ passatīti** passitabbameva passati. Yathā vā ekacco viparītaṃ gaṇhanto jānantopi na jānāti, passantopi na passati, na evaṃ bhagavā. Bhagavā pana jānanto jānātiyeva, passanto passatiyeva. Svāyaṃ dassanaparīṇāyakaṭṭhena **cakkhubhūto**. Viditakaraṇaṭṭhena **ñāṇabhūto**. Aviparītasabhāvaṭṭhena pariyaṭṭidhammappavattanato vā hadayena cintetvā vācāya nicchāritadhammamayoti **dhammabhūto**. Seṭṭhaṭṭhena **brahmabhūto**. Atha vā cakkhu viya bhūtoti **cakkhubhūtoti** evametesu padesu attho veditabbo. Svāyaṃ dhammassa vattanato **vattā**. Pavattāpanato **pavattā**. Atthaṃ nīharitvā dassanasamatthāya **atthassa ninnetā**. Amatādhiḡamāya paṭipattiṃ dadātīti **amatassa dātā**. **Agaruṃ katvāti** punappunaṃ āyācāpentopi hi garuṃ karotī nāma, attano sāvakaḡpāramīṇāṇe ṭhatvā sinerūpādato vālukaṃ uddharamāno viya dubbhīṇeyyaṃ katvā kathentopi garuṃ karotiyeva nāma. Evaṃ akatvā amhe punappunaṃ āyācāpetvā suviṇṇeyyampi no katvā kathehīti vuttaṃ hoti.

204. Yaṃ kho no āvusoti ettha kiṇcāpi “yaṃ kho vo”ti vattabbaṃ siyā, te pana bhikkhū attanā saddhiṃ saṅgaṇhanto “yaṃ kho no”ti āha. Yasmā vā uddesova tesam uddiṭṭhova. Bhagavā pana therassāpi tesampi bhagavāva. Tasmā bhagavāti padaṃ sandhāyapi evamāha, yaṃ kho amhākaṃ bhagavā tumhākaṃ saṃkhittena uddesaṃ uddisitvāti attho.

Cakkuhuṅcāvusotiādīsu ayamattho, āvuso, nissayabhāvena cakkhupasādaṅca ārammaṇabhāvena catusamuṭṭhānikarūpe ca paṭicca cakkhuviṇṇāṇaṃ nāma uppajjati. **Tiṇṇaṃ saṅgati phassoti** tesam tiṇṇaṃ saṅgatiyā phasso nāma uppajjati. Taṃ phassaṃ paṭicca saḡajātādivasena phassapaccayā vedanā uppajjati. Tāya vedanāya yaṃ ārammaṇaṃ vedeti, tadeva saṅṅā saṅṅānāti, yaṃ saṅṅā saṅṅānāti, tadeva ārammaṇaṃ vitakko vitakketi. Yaṃ vitakko vitakketi, tadevārammaṇaṃ papaṅco papaṅceti. **Tatonidānanti** etehi cakkhurūpādīhi kāraṇehi. **Purisaṃ papaṅcasaṅṅāsaṅkhā samudācarantīti** taṃ apariṇṇātakāraṇaṃ purisaṃ papaṅcakoṭṭhāsā abhibhavanti, tassa pavattantīti attho. Tattha phassavedanāsaṅṅā cakkhuviṇṇāṇena saḡajātā honti. Vitakko cakkhuviṇṇāṇānantarādīsu savitakkacittesu daṭṭhabbo. Papaṅcasaṅkhā javanena saḡajātā honti. Yadi evaṃ kasmā atītānāgataggaṇaṃ katanti? Tathā uppajjanato. Yatheva hi etarahi cakkhudvāriko papaṅco cakkuhuṅca rūpe ca phassavedanāsaṅṅāvitakke ca paṭicca uppanno, evamevaṃ atītānāgatesupi cakkhuviṇṇeyyesu rūpesu tassupattim dassento evamāha.

Sotaṅcāvusotiādīsupi eseva nayo. Chaṭṭhadvāre pana **mananti** bhavaṅgacittaṃ. **Dhammeti** tebhūmakadhammārammaṇaṃ. **Manoviṇṇāṇanti** āvajjanaṃ vā javanaṃ vā. Āvajjane gahite phassavedanāsaṅṅāvitakkā āvajjanasahajātā honti. Papaṅco javanasahajāto. Javane gahite saḡavajjanakaṃ bhavaṅga mano nāma hoti, tato phassādayo sabbepi javanena saḡajātāva. Manodvāre pana yasmā atītādībhedaṃ sabbampi ārammaṇaṃ hoti, tasmā **atītānāgatapaccuppannesūti** idaṃ yuttameva.

Idāni vaṭṭaṃ dassento **so vatāvusoti** desanaṃ ārabhi. **Phassapaṅṅattim paṅṅapessatīti** phasso nāma eko dhammo uppajjatīti evaṃ phassapaṅṅattim paṅṅapessati, dassessatīti attho. Esa nayo sabbattha. Evaṃ imasmiṃ sati idaṃ hotīti dvādasāyatanavasena sakalaṃ vaṭṭaṃ dassetvā idāni dvādasāyatanapaṭikkhepavasena vivaṭṭaṃ dassento **so vatāvuso cakkhusmiṃ asatīti** desanaṃ ārabhi. Tattha vuttanayeneva attho veditabbo.

Evaṃ paṅṅhaṃ vissajjetvā idāni sāvakena paṅṅo kathitoti mā nikkāṅkhā ahuvattha, ayam bhagavā sabbāṅṅutaṅṅatulaṃ gahetvā nisinnō, icchamānā tameva upasaṅkamitvā nikkāṅkhā hothāti uyyojento **ākaṅkhamānā ca panāti**ādīmāha.

205. Imehi ākārehīti imehi kāraṇehi papaṅcuppattiyā paṭiyekkaḡkāraṇehi ceva vaṭṭavivaṭṭakāraṇehi ca. **Imehi padehīti** imehi akkharasampiṇḡanehi. **Byaṅṅanehīti** paṭiyekkaakkharehi. **Paṅḡitoti** paṅḡiccena samannāgato. Catūhi vā kāraṇehi paṅḡito dhātukusalo āyatanakusalo paccayākārakusalo kāraṅākāraṅakusaloti. **Mahāpaṅṅoti** mahante atthe mahante dhamme mahantā niruttiyo mahantāni paṭibhānāni pariggahaṇasamatthāya mahāpaṅṅāya samannāgato. **Yathā taṃ mahākaccānenāti** yathā mahākaccānena byākatam, taṃ sandhāya **tanti** vuttaṃ. Yathā mahākaccānena byākatam, ahampi taṃ evamevaṃ byākareyyenti attho.

Madhupiṇḡikanti mahantaṃ guḡapūvaṃ baddhasattugūḡakaṃ vā. **Asecanakanti** asecitabbakaṃ.

Sappiphāṇitamadhusakkarādīsu idaṃ nāmettha maṇḍaṃ idaṃ bahukanti na vattabbaṃ samayojetarasam. **Cetasoti** cintakajātiko. **Dabbajātikoti** paṇḍitasabhāvo. **Ko nāmo ayanti** idaṃ thero atibhaddako ayaṃ dhammapariyāyo, dasabalassa sabbaññutaññānevassa nāmaṃ gaṇhāpessāmīti cintetvā āha. **Tasmāti** yasmā madhupiṇḍiko viya madhuro, tasmā madhupiṇḍikapariyāyotveva naṃ dhārehīti vadati. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Madhupiṇḍikasuttavaṇṇanā niṭṭhitā.

9. Dvedhāvitakkasuttavaṇṇanā

206. Me sutanti dvedhāvitakkasuttaṃ. Tattha **dvidhā katvā dvidhā katvāti** dve dve bhāge katvā. **Kāmavitakkoti** kāmapaṭisaṃyutto vitakko. **Byāpādavitakkoti** byāpādapaṭisaṃyutto vitakko. **Vihimsāvitakkoti** vihiṃsāpaṭisaṃyutto vitakko. **Ekaṃ bhāganti** ajjhattaṃ vā bahiddhā vā oḷāriko vā sukhumo vā sabbo pāyaṃ vitakko akusalapakkhikoyevāti tayopi kāmabyāpādavihiṃsāvitakke ekaṃ koṭṭhāsamakāsiṃ. Kāmehi nissaṭṭo nekkhammapaṭisaṃyutto vitakko **nekkhammavitakko** nāma, so yāva paṭhamajjhānā vaṭṭati. Abyāpādapaṭisaṃyutto vitakko **abyāpādavitakko**, so mettāpubbabhāgato paṭṭhāya yāva paṭhamajjhānā vaṭṭati. Avihimsāpaṭisaṃyutto vitakko **avihimsāvitakko**, so karuṇāpubbabhāgato paṭṭhāya yāva paṭhamajjhānā vaṭṭati. **Dutiyam bhāganti** sabbopāyaṃ kusalapakkhikoyevāti dutiyam koṭṭhāsamakāsiṃ. Iminā bodhisattassa vitakkaniggahaṇakālo kathito.

Bodhisattassa hi chabbassāni padhānaṃ padahantassa nekkhammavitakkādayo puñjapuñjā mahānadiyaṃ oghā viya pavattiṃsu. Satisammosena pana sahasā kāmavitakkādayo uppajjitvā kusalavāraṃ pacchinditvā sayam akusalajavanavārā hutvā tiṭṭhanti. Tato bodhisatto cintesi – “mayhaṃ ime kāmavitakkādayo kusalavāraṃ pacchinditvā tiṭṭhanti, handāhaṃ ime vitakke dve bhāge katvā viharāmī”ti kāmavitakkādayo akusalapakkhikāti ekaṃ bhāgaṃ karoti nekkhammavitakkādayo kusalapakkhikāti ekaṃ. Atha puna cintesi – “akusalapakkhato āgataṃ vitakkaṃ mantena kaṇhasappaṃ uppīletvā gaṇhanto viya amittaṃ gīvāya akkamanto viya ca niggahessāmi, nāssa vaḍḍhituṃ dassāmi. Kusalapakkhato āgataṃ vitakkaṃ meghasamaye meghaṃ viya sukhetta sālakalyāṇipotakaṃ viya ca sīghaṃ vaḍḍhessāmi”ti. So tathā katvā akusalavitakke niggāṇhi, kusalavitakke vaḍḍhesi. Evaṃ iminā bodhisattassa vitakkaniggahaṇanakālo kathitoti veditabbo.

207. Idāni yathāssa te vitakkā uppajjiṃsu, yathā ca ne niggahesi, taṃ dassento **tassa mayhaṃ, bhikkhavi**tiādīmāha. Tattha **appamattassāti** satiyā avippavāse ṭhitassa. **Ātāpinoti** ātāpavīriyavantassa. **Pahitattassāti** pesitacittassa. **Uppajjati kāmavitakkoti** bodhisattassa chabbassāni padhānaṃ padahato rajjasukhaṃ vā ārabba, pāsāde vā nātakāni vā orodhe vā kiñcideva vā sampattiṃ ārabba kāmavitakko nāma na uppannapubbo. Dukkarakārikāya panassa āhārūpacchedena adhimattakasimānaṃ pattassa etadahosi – “na sakkā āhārūpacchedena visesaṃ nibbattetuṃ, yaṃnūnāhaṃ oḷārikaṃ āhāraṃ āhāreyya”nti. So uruvelaṃ piṇḍāya pāvīsi. Manussā – “mahāpuriso pubbe āharitvā dinnampi na gaṇhi, addhāssa idāni manoratho matthakaṃ patto, tasmā sayameva āgato”ti paṇṭitapaṇṭitaṃ āhāraṃ upaharīsu. Bodhisattassa attabhāvo nacirasseva pākatiko ahosi. Jarājiṇṇattabhāvo hi sappāyabhojanaṃ labhitvāpi pākatiko na hoti. Bodhisatto pana daharo. Tenassa sappāyabhojanaṃ bhūñjato attabhāvo na cirasseva pākatiko jāto, vipprasannāni indriyāni, parisuddho chavivaṇṇo, samuggatatārāgaṇaṃ viya nabhaṃ paripuṇṇadvattiṃsamahāpurisalakkhaṇappaṭiṃsaṃvāsaṃ ahosi. So taṃ oloketvā “tāva kilanto nāma attabhāvo evaṃ paṭipākatiko jāto”ti cintetvā attano paññāmahantaṭāya evaṃ parittakampi vitakkaṃ gahetvā kāmavitakkoti akāsi.

Pañnasālāya purato nisinna camarapasadagavayarohitamigādike magagaṇe manuññasaddaravane moravanakukkuṭādike pakkhigaṇe nīluppalakumudakamalādisañchannāni pallalāni nānākusumasañchannaṇiṭṭhāni vanarājiyo mañikkhandhanimmalajalapavāhañca nadīṃ nerañjaraṃ passati. Tassa evaṃ hoti “sobhanā vatime migajātā pakkhigaṇā pallalāni vanarājiyo nadī nerañjarā”ti. So tampi evaṃ parittakaṃ vitakkaṃ gahetvā kāmavitakkamakāsi, tenāha “uppajjati kāmavitakko”ti.

Attabyābādhaṇiti attadukkhāyapi. Esevanayo sabbattha. Kiṃ pana mahāsattassa ubhayadukkhāya

saṃvattanakavitakko nāma atthīti? Natthi. Apariññāyaṃ t̥hitassa pana vitakko yāva ubhayabyābādhāya saṃvattatīti etāni tīṇi nāmāni labhati, tasmā evamāha. **Paññānirodhikoti** anuppannāya lokiyalokuttarāya paññāya uppajjituṃ na deti, lokiyapaññāṃ pana aṭṭhasamāpattipaṇḍitaññāvasena uppannampi samucchinditvā khipatīti **paññānirodhiko**. **Vighātapakkhikoti** dukkhakoṭṭhāsiko. Asaṅkhatam nibbānam nāma, tam paccakkham kātuṃ na detīti **anibbānasamvattaniko**. **Abbattham gacchatīti** khayam natthibhāvam gacchati. Udakapupphulako viya nirujjhati. **Pajahamevāti** pajahimeva. **Vinodamevāti** nīharimeva. **Byantameva nam akāsinti** vīgatantaṃ nissesam parivaṭumaṃ paricchinnameva nam akāsiṃ.

208. Byāpādavittakoti na bodhisattassa parūpaghātaṃ paṭisaṃyutto nāma vitakko citte uppajjati, athassa ativassaaccuṇḥaatisītādīni pana paṭicca cittavipariṇāmahāvo hoti, tam sandhāya ‘‘byāpādavittakko’’ti āha. **Vihimsāvittakoti** na mahāsattassa paresam dukkhuppādanappaṭisaṃyutto vitakko uppajjati, citte pana uddhatākāro anekagatākāro hoti, tam gahetvā vihimsāvittakamakāsi. Paṇṇasālādvāre nisinnō hi sīhabyagghādike vālamige sūkarādayo khuddamige vihimsante passatī. Atha bodhisatto imasmimpi nāma akutobhaye araññe imesam tiracchānagatānam paccatthikā uppajjanti, balavanto dubbale khādanti, balavantakhādītā vattantīti kāruññam uppādeti. Aññepi biḷārādayo kukkuṭamūsikādīni khādante passatī, gāmaṃ piṇḍāya pavittō manusse rājakammikehi upaddute vadhabandhādīni anubhavante attano kasivaṇṇijjādīni kammāni katvā jīvituṃ na labhantīti kāruññam uppādeti, tam sandhāya ‘‘uppajjati vihimsāvittakko’’ti āha. **Tathā tathāti** tena tena ākārena. Idam vuttaṃ hoti – kāmavittakādīsu yaṃ yaṃ vittaketi, yaṃ yaṃ vittakam pavatteti, tena tene cassākārena kāmavittakādībhāvo cetaso na hi hotīti. **Pahāsi nekkhammavittakanti** nekkhammavittakam pajahati. **Bahulamakāsīti** bahulam karoti. **Tassa tam kāmavittakāya cittanti** tassa tam cittam kāmavittakathāya. Yathā kāmavittakasampayuttaṃ hoti, evamevaṃ namatīti attho. Sesapadesupi eseva nayo.

Idāni atthadīpikam upamaṃ dassento **seyyathāpī** tiādīmāha. Tattha **kiṭṭhasambādheti** sassasambādhe. **Ākoṭeyyāti** ujukam piṭṭhiyam pahareyya. **Paṭikoṭeyyāti** tiriyam phāsukāsu pahareyya. **Sannirundheyyāti** āvaritvā tiṭṭheyya. **Sannivāreyyāti** ito cito ca gantum na dadeyya. **Tatonidānanti** tena kāraṇena, evam arakkhitānam gunnam paresam sassakhādanakāraṇenāti attho. Bālo hi gopāloko evam gāvo arakkhamāno ‘‘ayaṃ amhākam bhattavetaṃ khādanti, ujum gāvo rakkhitumpi na sakkoti, kulehi saddhim veram gaṇhāpeti’’ti gosāmikānampi santikā vadhādīni pāpuṇāti, kiṭṭhasāmikānampi. Paṇḍito pana imāni cattāri bhayāni sampassanto gāvo sādhuṃ rakkhati, tam sandhāyetaṃ vuttaṃ. **Ādinavanti** upaddavaṃ. **Okāranti** lāmakam, khandhesu vā otāram. **Samkilesanti** kiliṭṭhabhāvam. **Nekkhammeti** nekkhammamhi. **Ānisaṃsanti** visuddhipakkham. **Vodānapakkhanti** idam tasseva vevacanaṃ, kusalanam dhammanam nekkhammamhi visuddhipakkham addasanti attho.

209. Nekkhammanti ca kāmehi nissaṭam sabbakusalam, ekadhamme saṅgayhamāne nibbānameva. Tatridam opammasaṃsandanaṃ – kiṭṭhasambādham viya hi rūpādīrammaṇam, kūṭagāvo viya kūṭacittam, paṇḍitagopāloko viya bodhisatto, catubbidhabhayam viya attaparūbhayabyābādhāya saṃvattanavitakko, paṇḍitagopālakassa catubbidham bhayam disvā kiṭṭhasambādhe appamādena gorakkhaṇam viya bodhisattassa chabbassāni padhānam padahato attabyābādhdibhayam disvā rūpādīsū ārammaṇesu yathā kāmavittakādayo na uppajjanti, evam cittarakkhaṇam. **Paññāvuddhikoti**ādīsū anuppannāya lokiyalokuttarapaññāya uppādāya, uppannāya ca vuddhiyā saṃvattatīti **paññāvuddhiko**. Na dukkhakoṭṭhāsāya saṃvattatīti **avighātapakkhiko**. Nibbānadhātusacchikiriyāya saṃvattatīti **nibbānasamvattaniko**. **Rattim cepi nam, bhikkhave, anuvittakkeyyanti** sakalarattim cepi tam vittakam pavatteyyam. **Tatonidānanti** tammulakam. **Ohañneyyāti** ugghāṭiyeyya, uddhaccāya saṃvatteyyāti attho. **Ārāti** dūre. **Samādhimhāti** upacārasamādhitopi appanāsamādhitopi. **So kho aham, bhikkhave, ajjhattameva cittanti** so aham, bhikkhave, mā me cittam samādhimhā dūre hotūti ajjhattameva cittam saṅghapemi, gocarajjhatte ṭhapemīti attho. **Sannisādemīti** tattheva ca nam sannisīdāpemi. **Ekodim karomīti** ekaggaṃ karomī. **Samādahāmīti** sammā ādahāmi, suṭṭhu āropemīti attho. **Mā me cittam uhaññīti** mā mayham cittam ugghāṭiyittha, mā uddhaccāya saṃvattatīti attho.

210. Uppajjati abyāpādavittakko...pe... avihimsāvittakoti ettha yo so imāya heṭṭhā vuttataruṇavipassanāya saddhim uppannavitakko kāmapaccanīkaṭṭhena **nekkhammavittakoti** vutto. Soyeva byāpādapaccanīkaṭṭhena **abyāpādavittakoti** ca vihimsāpaccanīkaṭṭhena **avihimsāvittakoti** ca vutto.

Ettavatā bodhisattassa samāpattim nissāya vipassanāpaṭṭhapanakālo kathito. Yassa hi samādhipi taruṇo,

vipassanāpi. Tassa vipassanaṃ paṭṭhapetvā aticiraṃ nisinnassa kāyo kilamati, anto aggi viya uṭṭhahati, kacchehi sedā muccanti, matthakato usumavaṭṭi viya uṭṭhahati, cittaṃ haññati vihaññati vipphandati. So puna samāpattiṃ samāpajjitvā taṃ paridametvā mudukaṃ katvā samassāsetvā puna vipassanaṃ paṭṭhabeti. Tassa puna aticiraṃ nisinnassa tatheva hoti. So puna samāpattiṃ samāpajjitvā tatheva karoti. Vipassanāya hi bahūpakārā samāpatti.

Yathā yodhassa phalakoṭṭhako nāma bahūpakāro hoti, so taṃ nissāya saṅgāmaṃ pavisati, tattha hatthīhipi assehipi yodhehipi saddhiṃ kammaṃ katvā āvudhesu vā khīnesu bhuñjitukāmatādibhāve vā sati nivattivā phalakoṭṭhakaṃ pavisitvā āvudhānīpi gaṇhāti, vissamatīpi, bhuñjatīpi, pānīyampi pivati, sannāhampi paṭisannayhati, taṃ taṃ katvā puna saṅgāmaṃ pavisati, tattha kammaṃ katvā puna uccārādīpīto vā kenacideva vā karaṇīyena phalakoṭṭhakaṃ pavisati. Tattha santhambhitvā puna saṅgāmaṃ pavisati, evaṃ yodhassa phalakoṭṭhako viya vipassanāya bahūpakārā samāpatti.

Samāpattiyā pana saṅgāmanittharaṇakayodhassa phalakoṭṭhakatopi vipassanā bahūpakāratarā. Kiñcāpi hi samāpattiṃ nissāya vipassanaṃ paṭṭhabeti, vipassanā pana thāmajātā samāpattimpi rakkhati. Thāmajātaṃ karoti.

Yathā hi thale nāvampi nāvāya bhaṇḍampi sakaṭabhāraṃ karonti. Udaṃ patvā pana sakaṭampi sakaṭabhaṇḍampi yuttagoṇepi nāvābhāraṃ karonti. Nāvā tiriyaṃ sotaṃ chinditvā sotthinā supaṭṭanaṃ gacchati, evamevaṃ kiñcāpi samāpattiṃ nissāya vipassanaṃ paṭṭhabeti, vipassanā pana thāmajātā samāpattimpi rakkhati, thāmajātaṃ karoti. Thalaṃ patvā sakaṭaṃ viya hi samāpatti. Udaṃ patvā nāvā viya vipassanā. Iti bodhisattassa ettāvātā samāpattiṃ nissāya vipassanāpaṭṭhapanakālo kathitoti veditabbo.

Yaññadevātiādi kaṇhapakkhe vuttānusāreneva veditabbaṃ, idhāpi atthadīpikaṃ upamaṃ dassetuṃ **seyyathāpīti**ādīmāha. Tattha **gāmantasambhatesūti** gāmantaṃ āhaṭesu. **Satikaraṇīyameva hotīti etā gāvoti** satiuppādanamattameva kātabbaṃ hoti. Ito cito ca gantvā ākoṭānādīkiccaṃ natthi. **Ete dhammāti** ete samathavipassanā dhammāti satuppādanamattameva kātabbaṃ hoti. Iminā bodhisattassa samathavipassanānaṃ thāmajātakālo kathito. Tadā kirassa samāpattiṃ appanattāya nisinnassa attha samāpattiyō ekāvajjanena āpāthaṃ āgacchanti, vipassanaṃ paṭṭhapetvā nisinnō satta anupassanā ekappahāreneva āruḷho hoti.

215. Seyyathāpīti idha kiṃ dasseti? Ayaṃ pāṭiyekko anusandhi, sattānañhi hitūpacāraṃ attano satthubhāvasampadañca dassento bhagavā imaṃ desanaṃ ārabhi. Tattha **araññeti** aṭaviyaṃ. **Pavaneti** vanasaṇḍe. Atthato hi idaṃ dvayaṃ ekameva, paṭhamassa pana dutiyaṃ vevacanaṃ. **Ayogakkhemakāmoti** catūhi yogehi khemaṃ nibbhayaṭṭhānaṃ anicchanto bhayameva icchanto. **Sovatthikoti** suvatthibhāvāvaho. **Pītigamanīyoti** tuṭṭhiṃ gamanīyo. “Pītagamanīyo”ti vā pāṭho. **Pidaheyyāti** sākhdāñhi thakeyya. **Vivareyyāti** visadamukhaṃ katvā vivaṭaṃ kareyya. **Kummagganti** udakavanapabbatādīhi sanniruddhaṃ amaggaṃ. **Odaheyya okacaranti** tesam oke caramānaṃ viya ekaṃ dīpakamigaṃ ekasmiṃ thāne ṭhapeyya. **Okacārikanti** dīgharajjuyā bandhitaṃyeva migiṃ.

Migaluddako hi araññaṃ migānaṃ vasaṇṭṭhānaṃ gantvā “idha vasanti, iminā maggena nikkhamanti, ettha caranti, ettha pivanti, iminā maggena pavisanti”ti sallakkhetvā maggaṃ pidhāya kummaggaṃ vivarivā okacarañca okacārikañca ṭhapetvā sayaṃ paṭicchannaṭṭhāne sattiṃ gahetvā tiṭṭhati. Atha sāyanhasamayē migā akutobhaye araññe caritvā pānīyaṃ pivitvā migapotahehi saddhiṃ kīḷamānā vasaṇṭṭhānasantikaṃ āgantvā okacarañca okacārikañca disvā “sahāyakā no āgatā bhavissanti”ti nirāsañkā pavisanti, te maggaṃ pihitaṃ disvā “nāyaṃ maggo, ayaṃ maggo bhavissati”ti kummaggaṃ paṭipajjanti. Migaluddako na tāva kiñci karoti, pavitṭhesu pana sabbapacchimaṃ saṅikaṃ paharati. So uttasati, tato sabbe uttasitvā “bhayaṃ uppanna”nti purato oloketā udakena vā vanena vā pabbatena vā sanniruddhaṃ maggaṃ disvā ubhohi passehi aṅgulisañkhalikaṃ viya gahanavanaṃ pavisitūṃ asakkontā pavitṭhamaggeneva nikkhamitūṃ ārabhanti. Luddako tesam nivattanabhāvaṃ ṇatvā ādīto paṭṭhāya tiṃsampi cattālīsampi mige ghātetī. Idaṃ sandhāya **evañhi so, bhikkhave, mahāmigasaṅgho aparena samayena anayabyasanaṃ āpajjeyyāti** vuttaṃ.

“Nandīrāgassetam adhivacanaṃ, avijjāyetaṃ adhivacana”nti ettha yasmā ime sattā avijjāya aññāṇā hutvā nandīrāgena ābandhitvā rūpārammaṇādīni upanīṭā vaṭṭadukkhasattiyā ghātaṃ labhanti. Tasmā bhagavā okacaraṃ nandīrāgoti, okacārikaṃ avijjāti katvā dassesi.

Migaluddako hi ekadāpi tesam sākḥābhāṅgena sarīraṃ puñchitvā manussagandhaṃ apantvā okacaraṃ ekasmiṃ thāne thapetvā okacārikaṃ saha rajjuyā vissajjetvā attānaṃ paṭicchādetvā sattiṃ ādāya okacarassa santike tiṭṭhati, okacārikā migagaṇassa caraṇaṭṭhānābhimukhī gacchati. Taṃ disvā migā sīsāni ukkhipitvā tiṭṭhanti, sāpi sīsaṃ ukkhipitvā tiṭṭhati, te ‘‘amhākaṃ samajātikā aya’’nti gocaraṃ gaṇhanti. Sāpi tiṇāni khādantī viya saṅikaṃ upagacchati. Ārañṅiko yūthapatimigo tassā vātaṃ labhitvā sakabhariyaṃ vissajjetvā tadabhimukho hoti.

Sattānañhi navanavameva piyaṃ hoti. Okacārikā ārañṅikassa migassa accāsannabhāvaṃ adatvā tadabhimukhīva pacchato paṭikkamitvā okacarassa santikaṃ gacchati, yatha yatthassā rajju laggati, tattha tattha khurena paharivā moceti, ārañṅiko migo okacaraṃ disvā okacārikāya sammatto hutvā okacare usūyaṃ katvā piṭṭhiṃ nāmetvā sīsaṃ kamento tiṭṭhati, tasmīṃ khaṇe sattiṃ jivhāya lehantopi ‘‘kiṃ eta’’nti na jānāti, okacaropi sacassa uparibhāgena taṃ migam paharituṃ sukhaṃ hoti, piṭṭhiṃ nāmeti. Sacassa heṭṭhābhāgena paharituṃ sukhaṃ hoti, hadayaṃ unnāmeti. Atha luddako ārañṅikaṃ migam sattiyaṃ paharivā tattheva ghātetvā maṃsaṃ ādāya gacchati. Evameva yathā so migo okacārikāya sammatto okacare usūyaṃ katvā sattiṃ jivhāya lehantopi kiñci na jānāti, tathā ime sattā avijjāya sammattā andhabhūtā kiñci ajānantā rūpādīsū nandīrāgaṃ upagamma vaṭṭadukkasattiyaṃ vadhaṃ labhantīti bhagavā okacaraṃ nandīrāgoti, okacārikaṃ avijjāti katvā dassesi.

Iti kho, bhikkhave, vivaṇṇo mayā khemo maggoti iti kho, bhikkhave, mayā imesaṃ sattānaṃ hitacaraṇena sammāsambodhiṃ patvā ahaṃ buddhosmīti tuṅhībhūtena anisīditvā dhammacakkappavattanato paṭṭhāya dhammaṃ desentena vivaṇṇo khemo ariyo aṭṭhaṅgiko maggo, pihito kummaggo, aññātakonḍaṇṇādīnaṃ bhābapuggalānaṃ ūhato okacaro nandīrāgo dvedhā chetvā pātito, nāsītā okacārikā avijjā sabbena sabbam samugghātītāti attano hitūpacāraṃ dassesi. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Dvedhāvitakkasuttavaṇṇanā niṭṭhitā.

10. Vitakkasaṅghānasuttavaṇṇanā

216. Evaṃ me sutanti vitakkasaṅghānasuttam. Tattha **adhicittamanuyuttenāti** dasakusalakammapathavasena uppannaṃ cittaṃ cittameva, vipassanāpādakaatṭhasamāpatticittaṃ tato cittato adhikaṃ cittanti **adhicittam.** **Anuyuttenāti** taṃ adhicittam anuyuttana, tattha yuttappayuttenāti attho.

Tatrāyaṃ bhikkhu purebhattam piṇḍāya caritvā pacchābhattam piṇḍapātappaṭikkanto nisīdanaṃ ādāya asukasmīṃ rukkhamūle vā vanasaṅḍe vā pabbatapāde vā pabbhāre vā samaṇadhammaṃ karissāmīti nikkhamantopi, tattha gantvā hatthehi vā pādehi vā nisajjaṭṭhānato tiṇapaṇṇāni apantopi adhicittam anuyuttoyeva. Nisīditvā pana hatthapāde dhovitvā pallaṅkaṃ ābhujitvā mūlakammaṭṭhānaṃ gahetvā viharantopi adhicittam anuyuttoyeva.

Nimittānīti kāraṇāni. **Kālena kālanti** samaye samaye. Na nu ca kammaṭṭhānaṃ nāma muhuttampi achaḍḍetvā nirantaram manasikātabbam, kasmā bhagavā ‘‘kālena kāla’’nti āhāti. Pāḷiyañhi aṭṭhatimsa kammaṭṭhānāni vibhattāni, tesu bhikkhunā attano cittarucitaṃ kammaṭṭhānaṃ gahetvā nisinnena yāva kocideva upakkilesa nuppajjati, tāva imesaṃ nimittānaṃ manasikāraḍḍakkaṃ natthi. Yadā pana uppajjati, tadā imāni gahetvā citte uppannaṃ abbudaṃ nīharitabbanti dassento evamaḥa.

Chandūpasaṃhitāti chandasahagatā rāgasampayuttā. Imesaṃ pana tiṇṇam vitakkānaṃ khettañca ārammaṇaṃ jānitabbam. Tattha chandūpasaṃhitānaṃ aṭṭha lobhasahagatacittāni khettaṃ, dosūpasaṃhitānaṃ dve domanassahagatāni, mohūpasaṃhitānaṃ dvādasapi akusalacittāni. Vicikicchāuddhaccasampayuttacittāni pana dve etesaṃ paṭipuggalikaṃ khettaṃ. Sabbesampi sattā ceva saṅkhārā ca ārammaṇam, iṭṭhāniṭṭhaasamapekkhitesu hi sattesu ca saṅkhāresu ca te uppajjanti. **Aññampi nimittam manasikātabbam kusalūpasaṃhitanti** tato nimittato aññaṃ kusalanissitaṃ nimittam manasikātabbam. Tattha **aññaṃ nimittam** nāma chandūpasaṃhite vitakke sattesu uppanne asubhabhāvanā aññaṃ nimittam nāma. Saṅkhāresu uppanne aniccamanasikāro aññaṃ nimittam nāma. Dosūpasaṃhite sattesu uppanne mettābhāvanā aññaṃ nimittam nāma.

Saṅkhāresu uppanne dhātumanasikāro aññaṃ nimittaṃ nāma. Mohūpasañhite yattha katthaci uppanne pañcadhammūpanissayo aññaṃ nimittaṃ nāma.

Imassa hatthā vā sobhanā pādā vātiādinā nayena hi sattesu lobhe uppanne asubhato upasaṃharitabbam. Kimhi sārattosi? Kesesu sārattosi. Lomesu...pe... muttesu sārattosi. Ayam attabhāvo nāma tīhi aṭṭhisatehi ussāpito, navahi nārusatehi ābaddho, navahi maṃsapesisatehi anulitto, allacamma pariyonaddho, chavirāgena paṭicchanno, navahi vaṇamukhehi navanavutilomakūpasahasseehi ca asuci paggharati, kuṇapapūrito, duggandho, jeguccho, paṭikūlo, dvattiṃsakuṇapasañcayo, natthettha sāraṃ vā varaṃ vāti evaṃ asubhato upasaṃharantassa sattesu uppanno lobho pahīyati, tenassa asubhato upasaṃharaṇaṃ aññaṃ nimittaṃ nāma hoti.

Pattacīvarādīsu saṅkhāresu lobhe uppanne dvīhākārehi saṅkhāramajjhataṃ samuṭṭhāpetī satipaṭṭhānavanāyamaṃ vuttanayena assāmikātāvakālikabhāvavasena manasikaroto so pahīyati. Tenassa aniccato manasikāro aññaṃ nimittaṃ nāma hoti. Sattesu dose uppanne pana āghāvinayakacopamovādādīnaṃ vasena mettā bhāvetabbā, taṃ bhāvayato doso pahīyati, tenassa mettābhāvanā aññaṃ nimittaṃ nāma hoti. Khāṇukaṇṭakatiṇapaṇṇādīsu pana dose uppanne tvaṃ kassa kuppasi, kiṃ pathavīdhātuyā, udāhu āpodhātuyā, ko vā paṇāyamaṃ kuppasi nāma, kiṃ pathavīdhātu udāhu āpodhātūtiādinā nayena dhātumanasikāraṃ karontassa doso pahīyati. Tenassa dhātumanasikāro aññaṃ nimittaṃ nāma hoti.

Mohe pana yattha katthaci uppanne –

“Garūsaṃvāso uddeso, uddiṭṭhaparipucchanam;
Kālena dhammassavanaṃ, ṭhānāṭṭhānavinicchayo;
Pañca dhammūpanissāya, mohadhātu pahīyati”ti. –

Ime pañca dhammā upanissitabbā. Garuṃ upanissāya viharanto hi bhikkhu – “ācariyo gāmapavesanaṃ anāpucchantassa pattakāle vattaṃ akarontassa ghaṭasataudakāharaṇādidaṇḍakammaṃ karoti”ti yattappaṭiyatto hoti, athassa moho pahīyati. Uddesaṃ gaṇhantopi – “ācariyo uddesakāle uddesaṃ aggaṇhantassa asādhukaṃ sajjhāyantassa ca daṇḍakammaṃ karoti”ti yattappaṭiyatto hoti, evampissa moho pahīyati. Garubhāvanīye bhikkhū upasaṃkamitvā “idaṃ bhante kathaṃ imassa ko attho”ti paripucchanto kaṃkhaṃ vinodeti, evampissa moho pahīyati. Kālena dhammasavanaṭṭhānaṃ gantvā sakkaccaṃ dhammaṃ suṇantassāpi tesu tesu ṭhānesu attho pākaṭo hoti. Evampissa moho pahīyati. Idamassa kāraṇaṃ, idaṃ na kāraṇanti ṭhānāṭṭhānavinicchaye cheko hoti, evampissa moho pahīyati. Tenassa pañcadhammūpanissayo aññaṃ nimittaṃ nāma hoti.

Apica aṭṭhatimsāya āramaṇesu yaṃkiñci bhāventassāpi ime vitakkā pahīyanti eva. Imāni pana nimittāni ujuvipaccanīkāni paṭipakkhabhūtāni. Imehi pahīnā rāgādayo suppahīnā honti. Yathā hi aggaṃ allakaṭṭhehipi paṃsūhipi sākhaḍḍhipi pothetvā nibbāpentiyeva, udakaṃ pana aggissa ujuvipaccanīkaṃ, tena nibbuto sunibbuto hoti, evamimehi nimittehi pahīnā rāgādayo suppahīnā honti. Tasmā etāni kathitānīti veditabbāni.

Kusalūpasamhitanti kusalanissitaṃ kusalassa paccayabhūtaṃ. **Ajjhattamevāti** gocarajjhataṃyeva. **Palagaṇḍoti** vaḍḍhakī. **Sukhumāya añiyāti** yaṃ añiṃ nīharitukāmo hoti, tato sukhumatarāya sārādaruāñiyā. **Oḷārikaṃ añinti** candaphalake vā sārāphalake vā ākoṭitaṃ visamañiṃ. **Abhinīhaneyyāti** muggarena ākoṭento haneyya. **Abhinīhareyyāti** evaṃ abhinīhananto phalakato nīhareyya. **Abhinivaseyyāti** idāni bahu nikkhantāti nītvā hatthena cāletvā nikkadḍheyya. Tattha phalakaṃ viya cittaṃ, phalake visamañī viya akusalavitakkā, sukhumāñī viya aññaṃ asubhabhāvanādīkusalanimittaṃ, sukhumāñiyā oḷārikāñinīharaṇaṃ viya asubhabhāvanādīhi kusalanimittehi tesam vitakkānaṃ nīharaṇaṃ.

217. Ahikuṇapenāti atijegucchapaṭikūlakuṇapadassanattaṃ vuttaṃ. **Kaṇṭhe āsattenāti** kenacideva paccatthikena ānetvā kaṇṭhe baddhena paṭimukkena. **Aṭṭiyeyyāti** atṭo dukkhito bhavēyya. **Harāyeyyāti** lajjeyya. **Jiguccheyyāti** sañjātajiguccho bhavēyya.

Pahīyantīti evaṃ imināpi kāraṇena ete akusalā dhammā sāvajjā dukkhavipakāti attano paññābalena

upaparikkhato ahikuṇapādīni viya jigucchantassa pahīyanti. Yo pana attano paññābalena upaparikkhitum na sakkoti, tena ācariyaṃ vā upajjhāyaṃ vā aññataraṃ vā garuṭṭhāniyaṃ sabrahmacāriṃ saṅghattheraṃ vā upasaṅkamitvā ghaṇḍiṃ paharivā bhikkhusaṅghameva vā sannipātetvā ārocetabbaṃ, bahunañhi sannipāte bhavissateva eko paṇḍitamanusso, svāyaṃ evaṃ etesu ādīnavo daṭṭhabboti kathessati, kāyavicchindanīyakathādīhi vā pana te vitakke niggaṇhissatīti.

218. Asatiamanasikāro āpajjitabboti neva so vitakko saritabbo na manasikātabbo, aññavihitakena bhavitabbaṃ. Yathā hi rūpaṃ apassitukāmo puriso akkhīni nimīleyya, evameva mūlakammaṭṭhānaṃ gahetvā nisinnena bhikkhunā cittamhi vitakke uppanne aññavihitakena bhavitabbaṃ. Evamassa so vitakko pahīyati, tasmīṃ pahīne puna kammaṭṭhānaṃ gahetvā nisīditabbaṃ.

Sace na pahīyati, uggahito dhammakathāpabandho hoti, so mahāsaddena sajjhāyitabbo. Evampi ce aññavihitakassa sato so na pahīyati. Thavikāya muṭṭhipotthako hoti, yattha ca buddhavaṇṇāpi dhammavaṇṇāpi likhitā honti, taṃ nīharitvā vācentena aññavihitakena bhavitabbaṃ. Evampi ce na pahīyati, thavikato araṇisahitāni nīharitvā “ayaṃ uttarāraṇī ayaṃ adharāraṇī”ti āvajjentena aññavihitakena bhavitabbaṃ. Evampi ce na pahīyati, sipāṭikaṃ nīharitvā “idaṃ āraṇṭhakaṃ nāma, ayaṃ pipphalako nāma, idaṃ nakhacchedanaṃ nāma, ayaṃ sūci nāmā”ti parikkhāraṃ samannānentena aññavihitakena bhavitabbaṃ. Evampi ce na pahīyati, sūciṃ gahetvā cīvare jīṇaṭṭhānaṃ sibbantena aññavihitakena bhavitabbaṃ. Evam yāva na pahīyati, tāva taṃ taṃ kusalakammaṃ karontena aññavihitakena bhavitabbaṃ. Pahīne puna mūlakammaṭṭhānaṃ gahetvā nisīditabbaṃ, navakammaṃ pana na paṭṭhapetabbaṃ. Kasmā? Vitakke pacchinne kammaṭṭhānamanasikārassa okāso na hoti.

Porāṇakapaṇḍitā pana navakammaṃ katvāpi vitakkaṃ pacchindīmsu. Tatridaṃ vatthu – tissasāmaṇerassa kira upajjhāyo tissamahāvihāre vasati. Tissasāmaṇero “bhante ukkaṇṭhitomhī”ti āha. Atha naṃ thero “imasmīṃ vihāre nhānaudakaṃ dullabhaṃ, maṃ gahetvā cittalapabbataṃ gacchāhī”ti āha. So tathā akāsi. Tattha naṃ thero āha “ayaṃ vihāro accantasāṅghiko, ekaṃ puggalikaṭṭhānaṃ karohī”ti. So sādhu bhanteti ādito paṭṭhāya saṃyuttanikāyaṃ pabbhārasodhanaṃ tejodhātukasīṇaparikkammanti tīṇīpi ekato ārabhitvā kammaṭṭhānaṃ appanaṃ pāpesi, **saṃyuttanikāyaṃ** pariyoṣāpesi, leṇakammaṃ niṭṭhāpesi, sabbam katvā upajjhāyassa saññaṃ adāsi. Upajjhāyo “dukkhena te sāmaṇera kataṃ, ajja tāva tvamyeva vasāhī”ti āha. So taṃ rattim leṇe vasanto utusappāyaṃ labhitvā vipassanaṃ vaḍḍhetvā arahattaṃ patvā tattheva parinibbāyi. Tassa dhātuyo gahetvā cetiyaṃ akaṃsu. Ajjāpi **tissattheracetiyaṃ** paññāyati. Idaṃ pabbam asatipabbaṃ nāma.

219. Imasmīṃ ṭhatvā vitakke niggaṇhitum asakkonto idha ṭhatvā niggaṇhissatīti vitakkamūlabhedam pabbam dassento puna **tassa ce bhikkhavi**tiādīmāha. Tattha **vitakkasaṅkhārasaṅghānaṃ manasikātabbanti** saṅkharotīti **saṅkhāro**, paccayo, kāraṇaṃ mūlanti attho. Santiṭṭhati etthāti **saṅghānaṃ**, vitakkasaṅkhārassa saṅghānaṃ **vitakkasaṅkhārasaṅghānaṃ**, taṃ manasikātabbanti. Idaṃ vuttaṃ hoti, ayaṃ vitakko kiṃ hetu kiṃ paccayā kiṃ kāraṇā uppannoti vitakkānaṃ mūlaṅca mūlamūlaṅca manasikātabbanti. **Kiṃ nu kho ahaṃ siṅhaṃ gacchāmīti** kena nu kho kāraṇena ahaṃ siṅhaṃ gacchāmīti? **Yaṃnūnāhaṃ saṅikaṃ gaccheyyanti** kiṃ me iminā siṅhagamanena, saṅikaṃ gacchissāmīti cintesi. **So saṅikaṃ gaccheyyāti** so evaṃ cintetvā saṅikaṃ gaccheyya. Esa nayo sabbattha.

Tattha tassa purisassa siṅhagamanakālo viya imassa bhikkhuno vitakkasamāruḥhakālo. Tassa saṅikagamanakālo viya imassa vitakkacārapacchedanakālo. Tassa ṭhitakālo viya imassa vitakkacāre pacchinne mūlakammaṭṭhānaṃ cittoraṇakālo. Tassa nisinnakālo viya imassa vipassanaṃ vaḍḍhetvā arahattappattakālo. Tassa nipannakālo viya imassa nibbānārammaṇāya phalasamāpattiyā divasaṃ vītivattanakālo. Tattha ime vitakkā kiṃ hetukā kiṃ paccayāti vitakkānaṃ mūlamūlaṃ gacchantassa vitakkacāro sithilo hoti. Tasmīṃ sithilībhūte matthakaṃ gacchante vitakkā sabbaso nirujjhanti. Ayamatto duddubhajātakenapi dīpetabbo –

Sasakassa kira beluvarukkhamūle niddāyantassa beluvapakkaṃ vaṇṭato chijjivā kaṇṇamūle patitaṃ. So tassa saddena “pathavī bhijjati”ti saññāya uṭṭhahitvā vegena palāyi. Taṃ disvā purato aññepi catuppadā palāyīmsu. Tadā bodhisatto sīho hoti. So cintesi – “ayaṃ pathavī nāma kappavināse bhijjati, antarā pathavībhedo nāma natthi, yaṃnūnāhaṃ mūlamūlaṃ gantvā anuvijjeyya”nti. So hatthināgato paṭṭhāya yāva sasakaṃ pucchi “tāyā, tāta, pathavī bhijjamānā diṭṭhā”ti. Saso “āma devā”ti āha. Sīho “ehi, bho, dassēhī”ti.

Saso “na sakkomi sāmī”ti. “Ehi, re, mā bhāyī”ti saṅhamudukena gahetvā gato saso rukkhassa avidūre thatvā –

“Duddubhāyati bhaddante, yasmim̐ dese vasāmahaṃ;
Ahampetaṃ na jānāmi, kimetaṃ duddubhāyatī”ti. (jā. 1.4.85) –

Gāthamāha. Bodhisatto “tvaṃ ettheva tiṭṭhā”ti rukkhamūlaṃ gantvā sasakassa nipannaṭṭhānaṃ addasa, beluvapakkaṃ addasa, uddhaṃ oleketvā vaṇṭaṃ addasa, disvā “ayaṃ saso ettha nipanno, niddāyamāno imassa kaṇṇamūle patitassa saddena ‘pathavī bhijjati’ti evaṃsaññī hutvā palāyī”ti ñatvā taṃ kāraṇaṃ sasaṃ pucchi. Saso “āma, devā”ti āha. Bodhisatto imaṃ gāthamāha –

“Beluva patitaṃ sutvā, duddubhanti saso javi;
Sasassa vacanaṃ sutvā, santattā migavāhini”ti. (jā. 1.4.86);

Tato bodhisatto “mā bhāyathā”ti migagaṇe assāsesi. Evaṃ vitakkānaṃ mūlamūlaṃ gacchantassa vitakkā pahīyanti.

220. Imasmim̐ vitakkamūlabhedapabbe thatvā vitakke niggaṇhituṃ asakkontena pana evaṃ niggaṇhitabbāti aparaṃpi kāraṇaṃ dassento puna **tassa ce, bhikkhaveliādimāha.**

Dantebhiantamādhāyati heṭṭhādante uparidantaṃ ṭhapetvā. **Cetasā cittanti** kusalacittena akusalacittaṃ abhiniggaṇhitabbaṃ. **Balavā purisoti** yathā thāmasampanno mahābalo puriso dubbalaṃ purisaṃ sīse vā gale vā khandhe vā gahetvā abhiniggaṇheyya abhinippīḷeyya abhisantāpeyya santattaṃ kilantaṃ mucchāparetaṃ viya kareyya, evameva bhikkhunā vitakkehi saddhiṃ paṭimallena hutvā “ke ca tumhe ko cāha”nti abhibhavitvā – “kāmaṃ taco ca nhāru ca aṭṭhi ca avasissatu sarīre upasussatu maṃsalohita”nti (a. ni. 2.5) evaṃ mahāvīriyaṃ paggayha vitakkā niggaṇhitabbāti dassento ima atthaḍḍipikaṃ upamaṃ āhari.

221. Yato kho, bhikkhaveli idaṃ pariyādānabhājanīyaṃ nāma, taṃ uttānatthameva. Yathā pana satthācariyo tiroraṭṭhā āgataṃ rājaputtaṃ pañcāvudhasippaṃ uggaṇhāpetvā “gaccha, attano raṭṭhe rājjaṃ gaṇha. Sace te antarāmagge corā uṭṭhahanti, dhanunā kammaṃ katvā gaccha. Sace te dhanu nassati vā bhijjati vā sattiya asinā”ti evaṃ pañcahipi āvudhehi kattabbaṃ dassetvā uyyojeti. So tathā katvā sakaraṭṭhaṃ gantvā rājjaṃ gahetvā rājjasiriṃ anubhoti. Evamevaṃ bhagavā adhicitamanuyuttaṃ bhikkhuṃ arahattaḡaṇatthāya uyyojento – “sacassa antarā akusalavitakkā uppajjanti, aññanimittapabbe thatvā te niggaṇhitvā vipassanaṃ vaḍḍhetvā arahattaṃ pāpuṇissati. Tattha asakkonto ādinavapabbe thatvā, tatrāpi asakkonto asatipabbe thatvā, tatrāpi asakkonto vitakkamūlabhedapabbe thatvā, tatrāpi asakkonto abhiniggaṇhanapabbe thatvā vitakke niggaṇhitvā vipassanaṃ vaḍḍhetvā arahattaṃ pāpuṇissati”ti imāni pañca pabbāni desesi.

Vasī vitakkapariyāyapathesūti vitakkacārapathesu ciṇṇavasī paguṇavasīti vuccati. **Yaṃ vitakkaṃ ākaṅkhissatīti** idaṃ assa vasībhāvākāradassanattaṃ vuttaṃ. Ayañhi pubbe yaṃ vitakkaṃ vitakketukāmo hoti, taṃ na vitakketi. Yaṃ na vitakketukāmo hoti, taṃ vitakketi. Idāni pana vasībhūtattā yaṃ vitakkaṃ vitakketukāmo hoti, taṃyeva vitakketi. Yaṃ na vitakketukāmo, na taṃ vitakketi. Tena vuttaṃ “yaṃ vitakkaṃ ākaṅkhissati, taṃ vitakkaṃ vitakkesati. Yaṃ vitakkaṃ nākaṅkhissati, na taṃ vitakkaṃ vitakkhesati”ti. **Acchecchi taṇhantiādi sabbāsavasutte** vuttamevāti.

Papañcasūdaniyā majjhimanikāyaṭṭhakathāya

Vitakkasaṇṭhānasuttavaṇṇanā niṭṭhitā.

Dutiyavaggaṇṇanā niṭṭhitā.

Mūlapaṇṇāsaṭṭhakathāya paṭhamo bhāgo niṭṭhito.

Namo tassa bhagavato arahato sammāsambuddhassa

Majjhimanikāye

Mūlapaṇṇāsa-aṭṭhakathā

(Dutiyo bhāgo)

3. Opammavaggo

1. Kakacūpamasuttavaṇṇanā

222. **Evaṃ me sutanti** kakacūpamasuttaṃ. Tattha **moḷiyaphaggunoti moḷīti** cūḷā vuccati. Yathāha –

“Chetvāna moḷiṃ varagandhavāsitaṃ,
Vehāyaṣaṃ ukkhipi sakyapuṅgavo;
Ratanacaṅkoṭavarena vāsavo,
Sahassanetto sirasā paṭiggahī”ti.

Sā tassa gihikāle mahatī ahoṣi, tenassa **moḷiyaphaggunoti** saṅkhā udapādi. Pabbajitampi naṃ teneva nāmena sañjānanti. **Ativelanti** velaṃ atikkamitvā. Tattha kālavelā, sīmavelā, sīlavelāti tividhā velā. “Tāyaṃ velāyaṃ imaṃ udānaṃ udānesī”ti (dhammapade vaggānamuddānaṃ, gāthānamuddānaṃ; mahāva. 1-3) ayaṃ kālavelā nāma. “Ṭhitadhammo velaṃ nātivattatī”ti (cūḷava. 384; udā. 45; a. ni. 8.19) ayaṃ sīmavelā nāma. “Velānatikkamo setughāto”ti (dha. sa. 299-301) ca, “velā cesā avītikkamanaṭṭhenā”ti ca, ayaṃ sīlavelā nāma. Taṃ tividhampi so atikkamiyeva. Bhikkhuniyo hi ovadituṃ kālo nāma atthi, so atthaṅgatepi sūriye ovadanto taṃ kālavelampi atikkami. Bhikkhunīnaṃ ovāde pamāṇaṃ nāma atthi sīmā mariyādā. So uttarichappañcavācāhi ovadanto taṃ sīmavelampi atikkami. Kathento pana davasahagataṃ katvā duṭṭhullāpattipahonakaṃ katheti, evaṃ sīlavelampi atikkami.

Samsaṭṭhoti missībhūto samānasukhadukkho hutvā. **Sammukhāti** purato. **Avanṇaṃ bhāsatīti** tā pana pacanakoṭṭanādīni karontiyo disvā natthi imāsaṃ anāpatti nāma, imā bhikkhuniyo anācārā dubbacā pagabbhāti agunaṃ katheti. **Adhikaraṇampi karotīti** imesaṃ bhikkhūnaṃ imā bhikkhuniyo diṭṭhakālato paṭṭhāya akkhīni dayhanti, imasmiṃ vihāre pupphapūjā vā āsanadhovanaparibhaṇḍakaraṇādīni vā imāsaṃ vasena vattanti. Kuladhītarō etā lajjīniyo, tumhe imā idaṅcīdaṅca vadatha, ayaṃ nāma tumhākaṃ āpatti hoti, vinayadharānaṃ santikaṃ āgantvā vinicchayaṃ me dethāti adhikaraṇaṃ ākaḍḍhati.

Moḷiyaphaggunassa avanṇaṃ bhāsatīti natthi imassa bhikkhuno anāpatti nāma. Niccakālaṃ imassa pariveṇadvāraṃ asuññaṃ bhikkhunīhīti agunaṃ katheti. **Adhikaraṇampi karotīti** imesaṃ bhikkhūnaṃ moḷiyaphaggunattherassa diṭṭhakālato paṭṭhāya akkhīni dayhanti. Imasmiṃ vihāre aññesaṃ vasanaṭṭhānaṃ oloketumpi na sakkā. Vihāraṃ āgatabhikkhuniyo ovādaṃ vā paṭisanthāraṃ vā uddesapadaṃ vā therameva nissāya labhanti, kulaputtako lajjī kukkuccako, evarūpaṃ nāma tumhe idaṅcīdaṅca vadatha, etha vinayadharānaṃ santike vinicchayaṃ dethāti adhikaraṇaṃ ākaḍḍhanti.

So bhikkhu bhagavantaṃ etadavocāti neva piyakamyatāya na bhedādhippāyena, atthakāmatāya avoca. Ekaṃ kirassa ahoṣi – “imassa bhikkhussa evaṃ saṃsaṭṭhassa viharato ayaso uppajjissati. So sāsanassāpi avanṇoyeva. Aññena pana kathito ayaṃ na oramissati, bhagavatā dhammaṃ desetvā ovadito oramissatī”ti tassa atthakāmatāya bhagavantaṃ etaṃ, “āyasmā, bhante”tiādivacanaṃ avoca.

223. **Āmantehīti** jānāpehi. **Āmantetīti** pakkosati.

224. **Saddhāti** saddhāya. **Tasmāti** yasmā tvaṃ kulaputto ceva saddhāpabbajito ca, yasmā vā te etāhi saddhiṃ saṃsaṭṭhassa viharato ye tā akkosissanti vā, paharissanti vā, tesu domanassaṃ uppajjissati, saṃsagge pahīne nuppajjissati, tasmā. **Tatrāti** tasmīṃ avanṇabhāsaṇe. **Gehasitāti** pañcakāmaguṇanissitā. **Chandāti** taṇhāchandāpi paṭighachandāpi. **Vipariṇatanti** rattampi cittaṃ vipariṇataṃ. Duṭṭhampi, mūḷhampi cittaṃ

vipariṇataṃ. Idha pana taṇhāchandasena rattampi vaṭṭati, paṭighachandasena duṭṭhampi vaṭṭati. **Hitānukampī**ti hitena anukampamāno hitena pharamāno. **Na dosantaroti** na dosacitto bhavissāmi.

225. Atha kho bhagavāti kasmā ārabhi? Phaggunassa kira ettakaṃ ovādaṃ sutvāpi, “bhikkhunisaṃsaggato oramissāmi viramissāmi”ti cittampi na uppannaṃ, bhagavatā pana saddhiṃ paṭāṇī viya paṭiviruddho aṭṭhāsi, athassa bhagavato yathā nāma jighacchitassa bhojane, pipāsītassa pāṇīye, sītena phuṭṭhassa uṇhe dukkhītassa sukhe patthanā uppajjati. Evameva imaṃ dubbacaṃ bhikkhuṃ dīsvā paṭhamabodhiyaṃ subbacā bhikkhū āpāthaṃ āgamīṃsu. Atha tesam vaṇṇaṃ kathetukāmo hutvā imaṃ desanaṃ ārabhi.

Tattha **ārādhayīmsūti** gaṇhīṃsu pūrayīṃsu. **Ekam samayanti** ekasmiṃ samaye. **Ekāsanabhojananti** ekam purebhattabhojanaṃ. Sūriyuggamanato hi yāva majjhanhikā sattakkhattuṃ bhuttabhojanampi idha ekāsanabhojananteva adhippetam. **Appābādhatanti** nirābādhatam. **Appātaṅkatanti** niddukkhatam. **Lahuṭṭhānanti** sarīrassa sallahukaṃ uṭṭhānam. **Balanti** kāyabalaṃ. **Phāsuvihāranti** kāyassa sukhavihāraṃ. Iminā kiṃ kathitam? Divā vikālabhojanaṃ pajahāpitakālo kathito. Bhaddālisutte pana rattiṃ vikālabhojanaṃ pajahāpitakālo kathito. Imāni hi dve bhojanāni bhagavā na ekappahārena pajahāpesi. Kasmā? Imāneva hi dve bhojanāni vaṭṭe sattānaṃ āciṇṇāni. Santi kulaputtā sukhumāla, te ekato dvepi bhojanāni pajahantā kilamanti. Tasmā ekato apajahāpetvā ekasmiṃ kāle divā vikālabhojanaṃ, ekasmiṃ rattiṃ vikālabhojananti visuṃ pajahāpesi. Tesu idha divā vikālabhojanaṃ pajahāpitakālo kathito. Tattha yasmā buddhā na bhayaṃ dassetvā tajjetvā pajahāpenti, ānisaṃsaṃ pana dassetvā pajahāpenti, evaṇhi sattā sukkena pajahanti. Tasmā ānisaṃsaṃ dassento ime pañca guṇe dassesi. **Anusāsanī karaṇīyāti** punappunaṃ sāsane kattabbaṃ nāhosi. “Idaṃ karoṭha, idaṃ mā karoṭhā”ti satuppādakaraṇīyamattameva ahoṣi. Tāvattakeneva te kattabbaṃ akaṃsu, pahātābbaṃ pajahīṃsu, paṭhamabodhiyaṃ, bhikkhave, subbacā bhikkhū ahesuṃ assavā ovādapaṭīkarāti.

Idāni nesam subbacabhāvadīpikaṃ upamaṃ āharanto **seyyathāpīti**ādīmāha. Tattha **subhūmiyanti** samabhūmiyaṃ. “Subhūmyaṃ sukhette vihatakhāṇuke bījāni patiṭṭhapeyyā”ti (dī. ni. 2.438) ettha pana maṇḍabhūmi subhūmīti āgatā. **Catumahāpatheti** dvinnaṃ mahāmaggānaṃ vinivijjhivā gataṭṭhāne. **Ājaññarathoti** vinītaassaratho. **Odhastapatodoti** yathā rathaṃ abhiruhitvā ṭhītena sakkā hoti gaṇhituṃ, evaṃ ālambanaṃ nissāya tiriyato ṭhapitapatodo. **Yoggācariyoti** assācariyo. Sveva assadamme sāretīti **assadammasārathi**. **Yenicchakanti** yena yena maggena icchati. **Yadicchakanti** yaṃ yaṃ gatiṃ icchati. **Sāreyyāti** ujukaṃ purato peseyya. **Paccāsāreyyāti** paṭinivatteyya.

Evameva khoti yathā hi so yoggācariyo yena yena maggena gamaṇaṃ icchati, taṃ taṃ assā āruḥhāva honti. Yāya yāya ca gatiyā icchati, sā sā gati gahitāva hoti. Rathaṃ pesetvā assā neva vāretabbā na vijjhatabbā honti. Kevalaṃ tesam same bhūmibhāge khuresu nimittaṃ ṭhapetvā gamaṇameva passitabbaṃ hoti. Evaṃ mayhampi tesu bhikkhūsu punappunaṃ vattabbaṃ nāhosi. Idaṃ karoṭha idaṃ mā karoṭhāti satuppādanamattameva kattabbaṃ hoti. Tehipi tāvadeva kattabbaṃ katameva hoti, akattabbaṃ jahitameva. **Tasmāti** yasmā subbacā yuttayānapaṭibhāgā hutvā satuppādanamatteneva pajahīṃsu, tasmā tumhepi pajahathāti attho. **Elaṇḍehīti** elaṇḍā kira sālādūsanā honti, tasmā evamāha. **Visodheyyāti** elaṇḍe ceva aññā ca valliyo chinditvā bāhi nīharaṇena sodheyya. **Sujātāti** susaṅghitā. **Sammā parihareyyāti** mariyādaṃ bandhitvā udakāsīñcanenapi kālenakālaṃ mūlamūle khaṇanenapi valligumbādicchedanenapi kipillapūṭakaharaṇenapi makkaṭakajālasukkhadaṇḍakaharaṇenapi sammā vaḍḍhetvā poseyya. **Vuddhiādīni** vuttatthāneva.

226. Idāni akkhanṭiyā dosaṃ dassento **bhūtapubbanti**ādīmāha. Tattha **vedehikāti** videharaṭṭhāvāsīkassa dhītā. Atha vā **vedoti** paññā vuccati, vedena ṭhāti iriyatīti **vedehikā**, paṇḍitāti attho. **Gahapatānīti** gharasāminī. **Kittisaddoti** kittighoso. **Soratāti** soraccena samannāgatā. **Nivātāti** nivātavutti. **Upasantāti** nibbutā. **Dakkhāti** bhattapacanasayanattharaṇadīpujjalanādīkammesu chekā. **Analasāti** uṭṭhāhikā, **samaṃvihitakammantāti** suṭṭhu samaṃvihitakammantā. Ekā analasā hoti, yaṃ yaṃ pana bhājanaṃ gaṇhāti, taṃ taṃ bhindati vā chiddaṃ vā karoti, ayaṃ na tādisāti dasseti.

Divā uṭṭhāsīti pātova kattabāni dhenuduhanādīkammani akatvā ussūre uṭṭhitā. **He je kāḷīti** are kāḷī. **Kiṃ je divā uṭṭhāsīti** kiṃ te kiñci aphāsukaṃ atthi, kiṃ divā uṭṭhāsīti? **No vata re kiñcīti** are yadi te na kiñci aphāsukaṃ atthi, neva sīsaṃ rujjhati, na piṭṭhi, atha kasmā pāpi dāsi divā uṭṭhāsīti kupitā anattamaṇā bhākuṭīmakāsi. **Divātarāṃ uṭṭhāsīti** punadivase ussūrataraṃ uṭṭhāsi. **Anattamanavācanti** are pāpi dāsi attano

pamāṇaṃ na jānāsi; kiṃ aggaṃ sītoti maññasi, idāni taṃ sikkhāpessāmītiādīni vadamānā kupitavacaṇaṃ nicchāresi.

Paṭivisaṅkānanti sāmantagehavāsīnaṃ. **Ujjhāpesīti** avajānāpesi. **Caṇḍīti** asoratā kibbisā. Iti yattakā guṇā, tato diguṇā dosā uppajjimsu. Guṇā nāma saṅikaṃ saṅikaṃ āgacchanti; dosā ekadivaseneva patthaṭṭā honti. **Soratasoratoti** ativiya sorato, sotāpanno nu kho, sakadāgāmī anāgāmī arahā nu khoti vattabbaṃ āpajjati. **Phusantīti** phusantā ghaṭṭentā āpāthaṃ āgacchanti.

Atha bhikkhu soratoti veditabboti atha adhvāsanaṃ bhikkhantiyaṃ ṭhito bhikkhu soratoti veditabbo. **Yo cīvara...pe... parikkhārahetūti** yo etāni cīvarādīni paṇītapāṇītāni labhanto pādaparikkhārahetūti parikkhārahetūti ekavacaṇeneva karoti. **Alabhamānoti** yathā pubbe labhati, evaṃ alabhanto. **Dhammaññeva sakkāronototi** dhammaṃyeva sakkāraṃ sukataṅkaṃ karonto. **Garuṃ karontoti** garubhāriyaṃ karonto. **Mānentoti** manena piyaṃ karonto. **Pūjentoti** paccayapūjāya pūjento. **Apacāyamānoti** dhammaṃyeva apacāyamāno apacitīyaṃ nīcavuttīyaṃ dassento.

227. Evaṃ akkhantiyā dosāṃ dassetvā idāni ye adhvāsenti, te evaṃ adhvāsenti pañca vacanapathe dassento **pañcime**, **bhikkhāvetīti** adhvāsenti. Tattha **kālenāti** yuttapattakālena. **Bhūtenāti** satā vijjāmanena. **Saṅhenāti** sammatṭhena. **Atthasaṅghitenāti** atthanissitena kāraṇanissitena. **Akālenāti** adhvāsenti tesaṃyeva paṭipakkhavasena veditabbāni. **Mettacittāti** uppannamettacittā hutvā. **Dosantarāti** dutṭhacittā, abbhantare uppannadosā hutvā. **Tatrāti** tesu vacanapathesu. **Pharivāti** adhvāsenti. **Tadārammaṇācātī** kathaṃ tadārammaṇaṃ sabbāvantaṃ lokaṃ karoti? Pañca vacanapathe gahetvā āgataṃ puggalaṃ mettacittassa ārammaṇaṃ katvā puna tasseeva mettacittassa avasesasatte ārammaṇaṃ karonto sabbāvantaṃ lokaṃ tadārammaṇaṃ karoti nāma. Tatrāyaṃ vacanatto. **Tadārammaṇācātī** tasseeva mettacittassa ārammaṇaṃ katvā. **Sabbāvantaṃ** sabbasattavantaṃ. **Lokanti** sattaṅkaṃ. **Vipulenāti** anekasattārammaṇena. **Mahaggatenāti** mahaggatābhūmikenā. **Appamāṇenāti** subhāvītenā. **Averenāti** niddosena. **Abyābajjenāti** niddukkheṇa. **Pharivā viharissāmāti** evarūpena mettāsahagatena cetasā taṅka puggalaṃ sabbāṅka lokaṃ tassa cittassa ārammaṇaṃ katvā adhvāsenti viharissāma.

228. Idāni tadatthadīpikaṃ upamaṃ āharanto **seyyathāpīti** adhvāsenti. Tattha **apathavinti** nippathaviṃ karissāmīti attho. **Tatra tatrāti** tasmīṃ tasmīṃ ṭhāne. **Vikireyyāti** pacchiyā paṃsum uddharitvā bījāni viya vikireyya. **Oṭṭhubheyyāti** kheḷaṃ pāteyya. **Apathaviṃ kareyyāti** evaṃ kāyena ca vācāya ca payogaṃ katvāpi sakkūneyya apathaviṃ kātūti? **Gambhīrāti** bahalattena dviyojanasatasahassāni cattāri ca nahutāni gambhīrā. **Appameyyāti** tiriyaṃ pana aparicchinnā. **Evameva khoti** ettha idaṃ opammaṃsandanaṃ – pathavī viya hi mettacittāṃ daṭṭhabbaṃ. Kudālapīṭakaṃ gahetvā āgatapuriso viya pañca vacanapathe gahetvā āgatapuggalo. Yathā so kudālapīṭakena mahāpathaviṃ apathaviṃ kātūti na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ kātūti na sakkhissatīti.

229. Duttiyaupamāyaṃ **haliddinti** yaṃkiñci pīṭakavaṇṇaṃ. **Nilanti** kaṃsaṅkaṃ vā palāsaṅkaṃ vā. **Arūpīti** arūpo. Nana ca, dvinnāṃ kaṭṭhānaṃ vā dvinnāṃ rukkhānaṃ vā dvinnāṃ seyyānaṃ vā dvinnāṃ selānaṃ vā antaraṃ paricchinnākāsarūpanti āgataṃ, kasmā idha **arūpīti** vuttoti? Sanidassanabhāvapaṭikkhepatto. Tenevāha “anidassano”ti. Tasmīñhi rūpaṃ likhitūti, rūpapātubhāvaṃ dassetūti na sakkā, tasmā “arūpī”ti vutto. **Anidassanoti** dassanassa cakkhaviññāṇassa anāpātho. Upamāsaṃsandane panettha ākāso viya mettacittāṃ. Tulikapañcamā cattāro raṅgajātā viya pañca vacanapathā, tulikapañcame raṅge gahetvā āgatapuriso viya pañca vacanapathe gahetvā āgatapuggalo. Yathā so tulikapañcamehi raṅgehi ākāse rūpapātubhāvaṃ kātūti na sakkoti, evaṃ vo pañca vacanapathe gahetvā āgatapuggalo mettacittassa aññathattaṃ katvā dosuppattīyaṃ dassetūti na sakkhissatīti.

230. Tatiyaupamāyaṃ **ādittanti** pajjalitaṃ. **Gambhīrā appameyyāti** imissā gaṅgāya gambhīraṭṭhānaṃ gāvutampi atthi, aḍḍhayaṅkaṃ, yojanampi. Puthulaṃ panassā evarūpaṃyeva, dīghato pana pañcayojanasatāni. Sā kathaṃ gambhīrā appameyyāti? Etena payogena parivattetvā uddhane udakaṃ viya tāpetūti asakkūneyyato. Ṭhitodakaṃ pana kenaci upāyena aṅgulamattaṃ vā aḍḍhaṅgulamattaṃ vā evaṃ tāpetūti sakkā bhavēyya, ayaṃ pana na sakkā, tasmā evaṃ vuttaṃ. Upamāsaṃsandane panettha gaṅgā viya mettacittāṃ, tiṅkaṃ ādāya āgatapuriso viya pañca vacanapathe gahetvā āgatapuggalo. Yathā so ādittāya tiṅkākāya gaṅgaṃ tāpetūti na sakkoti, evaṃ vo pañca vacanapathe gahetvā āgatapuggalo mettacittassa

aññathattam katum na sakkhissatī.

231. Catutthaupamāyam **biḷārabhastā**ti biḷāracammapasibbakā. **Sumadditā**ti suṭṭhu madditā. **Suparimadditā** anto ca bahi ca samantato suparimadditā. **Tūlinī**ti simbalitūlalātātūlasamānā. **Chinnasassarā**ti chinnasassarasaddā. **Chinnabhabharā**ti chinnabhabharasaddā. Upamāsaṃsandane panettha biḷārabhastā viya mettacittam, kaṭṭhakaṭṭhalaṃ ādāya āgatapuriso viya pañca vacanapathe gahetvā āgatapuggalo. Yathā so kaṭṭhena vā kaṭṭhalena vā biḷārabhastam sarasaram bharabharam saddam katum na sakkoti, evam vo pañca vacanapathe gahetvā āgatapuggalo mettacittassa aññathattam katvā dosānugatabhāvam katum na sakkhissatī.

232. **Ocarakā**ti avacarakā heṭṭhācarakā, nīcakammakārakāti attho. **Yo mano padūseyyā**ti yo bhikkhu vā bhikkhunī vā mano padūseyya, tam kakacena okantanam nādhivāseyya. **Na me so tena sāsana**karoti so tena anadhivāsanena mayham ovādakaro na hoti. Āpatti panettha natthi.

233. **Aṇum vā thūlam** vāti appasāvajjam vā mahāsāvajjam vā. **Yam tumhe nādhivāseyyā**thāti yo tumhehi adhivāsetabbo na bhaveyyāti attho. **No hetam, bhanteti, bhante,** anadhivāsetabbam nāma vacanapatham na passamāti adhippāyo. **Dīgharattam hitāya sukhāyā**ti iti bhagavā arahattena kūtam gaṇhanto yathānusandhinā desanam niṭṭhapesīti.

Papañcasūdaniyā majjhimanikāyaṭṭhakathāya

Kakacūpamasuttavaṇṇanā niṭṭhitā.

2. Alagaddūpamasuttavaṇṇanā

234. **Evam me sutanti** alagaddūpamasuttam. Tattha gaddhe bādhayimsūti gaddhabādhino, gaddhabādhino pubbapurisā assāti gaddhabādhipubbo, tassa **gaddhabādhipubbassa**, gijjhaghātakakulappasutassāti attho. Saggamokkhānam antarāyam karontīti **antarāyikā**. Te kammakilesavipākaupavādañāvītikamavasena pañcavidhā. Tattha pañcānantariyadhammā kammantarāyikā nāma. Tathā bhikkhunīdūsakammaṃ, tam pana mokkhasseva antarāyam karoti, na saggassa. Niyatamicchādīṭṭhidhammā kilesantarāyikā nāma. Paṇḍakataracchānagataubhatobyañjanakānam paṭisandhidhammā vipākantarāyikā nāma. Ariyūpavādadhammā upavādantarāyikā nāma, te pana yāva ariye na khamāpentī, tāvadeva, na tato param. Sañcicca vītikantā satta āpattikkhandhā āñāvītikamantarāyikā nāma. Tepi yāva bhikkhubhāvam vā paṭijānāti, na vuṭṭhāti vā, na deseti vā, tāvadeva, na tato param.

Tatrāyam bhikkhu bahussuto dhammakathiko sesantarāyike jānāti, vinaye pana akovidattā paṇṇattivītikamantarāyike na jānāti, tasmā rahogato evam cintesi – ime āgārikā pañca kāmaguṇe paribhuñjantā sotāpannāpi sakadāgāminopi anāgāminopi hontī. Bhikkhūpi manāpikāni cakkhuvīññeyyāni rūpāni passanti...pe... kāyavīññeyye phoṭṭhabbe phusanti, mudukāni attharaṇapāvuraṇādīni paribhuñjanti, etam sabbam vaṭṭati. Kasmā itthīnamyeva rūpasaddagandharasaphoṭṭhabbā na vaṭṭanti? Etepi vaṭṭantīti. Evam rasena rasam saṃsandetvā sacchandarāgaparibhogañca nicchandarāgaparibhogañca ekam katvā thūlavākehi saddhim atisukhumasuttam upanento viya, sāsapena saddhim sinerum upasaṃharanto viya, pāpakam dīṭṭhigatam uppādetvā, ‘kiṃ bhagavatā mahāsamuddam bandhantena viya mahatā ussāhena paṭhamapārājikam paññattam, natthi ettha doso’ ti sabbaññutaññānena saddhim paṭivirujjhanto vesārajjaññam paṭibāhanto ariyamagge khānukaṇṭakādīni pakkhipanto methunadhamme doso natthīti jinassa āñacakke pahāram adāsī. Tenāha – ‘tathāham bhagavatā dhammam desitam ājānāmī’ tiādi.

Evam byā khoti evam viya kho. **Samanuyuñjantī**tiādīsu kiṃ laddhiko tvam, laddhim vadehīti pucchamānā samanuyuñjanti nāma. Dīṭṭhim paṭiṭṭhāpentā samanuggāhanti nāma. Kena kāraṇena evam vadasīti kāraṇam pucchantā samanubhāsanti nāma. **Aṭṭhikaṅkalūpamā**tiādīsu (ma. ni. 2.42-48) **aṭṭhikaṅkalūpamā** appassādaṭṭhena. **Māsaṃsāpamā** bhusādhāraṇaṭṭhena. **Tiṇṇakūpamā** anudhanaṭṭhena. **Āṅgārakāsūpamā** mahābhīṭāpanaṭṭhena. **Supinakūpamā** ittarapaccupaṭṭhānaṭṭhena. **Yācitakūpamā** tāvakālikāṭṭhena. **Rukkhaphalūpamā** sabbaṅgapaccaṅgalibhañjanaṭṭhena. **Asisūnūpamā** adhikuṭṭanaṭṭhena. **Sattisūlūpamā** vinivijjanaṭṭhena. **Sappasirūpamā** sāsāṅkasappaṭibhayaṭṭhena. **Thāmasā**ti dīṭṭhithāmena.

Parāmāsāti diṭṭhiparāmāsena. **Abhinivissa voharatīti** adhiṭṭhahitvā voharati dīpeti vā.

235. Yato kho te bhikkhūti yadā te bhikkhū. **Evam byā kho aham, bhante, bhagavatāti** idaṃ esa attano ajjhāsayena natthīti vattukāmopi bhagavato ānubhāvena sampatiṅcchati, buddhānaṃ kira sammukhā dve kathā kathetuṃ samattho nāma natthi.

236. Kassa kho nāma tvam moghapurisāti tvam moghapurisa kassa khattiyassa vā brāhmaṇassa vā vessassa vā suddassa vā gahaṭṭhassa vā pabbajitassa vā devassa vā manussassa vā mayā evaṃ dhammaṃ desitaṃ ājānāsi. **Atha kho bhagavā bhikkhū āmantesīti** ayaṃ pāṭiyekko anusandhi. Ariṭṭho kira cintesi – “bhagavā maṃ moghapurisoti vadati, na kho pana moghapurisāti vuttamattakena maggaphalānaṃ upanissayo na hoti. Upasenampi hi vaṅgantaputtam, ‘atilahuṃ kho tvam, moghapurisa, bāhullāya āvatto’ ti (mahāva. 75) bhagavā moghapurisa vādena ovadi. Thero aparabhāge ghaṭento vāyamanto cha abhiññā sacchākāsi. Ahampi tathārūpaṃ vīriyaṃ paggaṇhitvā maggaphalāni nibbattessāmī’ ti. Athassa bhagavā bandhanā pavuttassa paṇḍupalāsassa viya avirulhibhāvaṃ dassento imaṃ desanaṃ ārabhi.

Usmīkatopīti, bhikkhave, tumhe kinti maññatha, ayaṃ ariṭṭho evaṃladdhiko sabbaññutaññāpēna paṭivirujjhivā vesārajjāñānaṃ paṭibāhitvā tathāgatassa āñacakke pahāraṃ dadamāno api nu imasmiṃ dhammavinaye usmīkatopi? Yathā nibbutepi mahante aggikkhandhe khajjupanakamattāpi aggipapaṭikā hotiyeva, yaṃ nissāya puna mahāaggikkhandho bhaveyya. Kiṃ nu kho evaṃ imassa appamattikāpi ñāṇusmā atthi, yaṃ nissāya vāyamanto maggaphalāni nibbatteyyāti? **No hetam, bhanteti**, bhante, evaṃladdhikassa kuto evarūpā ñāṇusmāti? Maggaphalānaṃ paccayasamatthāya ñāṇusmāya usmīkatabhāvaṃ paṭikkhipantā vadanti. **Maṅkubhūtoti** nittejabhūto. **Pattakkhandhoti** patitakkhandho. **Appaṭibhānoti** kiñci paṭibhānaṃ apassanto bhinnapaṭibhāno evarūpampi nāma niyyānikasāsaṇaṃ labhitvā avirulhidhammo kiramhi samugghātipaccayo jātoti attano abhabbatam paccavekkhanto pādaṅguṭṭhakena bhūmiṃ khaṇamāno nisīdi.

Paññāyissasi khoti ayampi pāṭiyekko anusandhi. Ariṭṭho kira cintesi – “bhagavā mayham maggaphalānaṃ upanissayo pacchinnoti vadati, na kho pana buddhā saupanissayānaṃyeva dhammaṃ desenti, anupanissayānampi desenti, aham satthu santikā sugatovādaṃ labhitvā attano sampattūpagaṃ kusalaṃ karissāmī’ ti. Athassa bhagavā ovādaṃ paṭipassambhento “paññāyissasī’ tiādīmāha. Tassattho, tvamyeva, moghapurisa, iminā pāpakena diṭṭhigatena nirayādīsu paññāyissasi, mama santikā tuyhaṃ sugatovādo nāma natthi, na me tayā attho, idhāham bhikkhū paṭipucchissāmīti.

237. Atha kho bhagavāti ayampi pāṭiyekko anusandhi. Imasmiñhi thāne bhagavā parisam sodheti, ariṭṭhaṃ gaṇato nissāreti. Sace hi parisagātānaṃ kassaci evaṃ bhaveyya – “ayaṃ ariṭṭho bhagavatā akathitaṃ kathetuṃ kiṃ sakkhissati, kacci nu kho parisamajjhe bhagavatā kathāya samāraddhāya sahasā kathita’ nti. Evaṃ kathitaṃ pana na ariṭṭhova suṇāti, aññenapi sutam bhavissati. Athāpissa siyā “yathā satthā ariṭṭhaṃ niggaṇhāti, mampi evaṃ niggaṇheyyāti sutvāpi tuṇhībhāvaṃ āpajjeyyā’ ti. “Taṃ sabbaṃ na karissanti’ ti. Mayāpi na kathitaṃ, aññena sutampi natthīti “tumhepime, bhikkhave” tiādīnā parisāya laddhiṃ sodheti. Parisāya pana laddhisodhaneneva ariṭṭho gaṇato nissārito nāma hoti.

Idāni ariṭṭhassa laddhiṃ pakāsento **so vata, bhikkhavi** tiādīmāha. Tattha **aññatreva kāmehī** tiādīsu yo so, bhikkhave, bhikkhu “te paṭisevato nālam antarāyāyā’ ti evaṃladdhiko, so vata kilesakāmehi ceva kilesakāmasampayuttehi saññāvitakkehi ca aññatra, ete dhamme pahāya, vinā etehi dhammehi, vatthukāme paṭisevissati, methunasamācāraṃ samācarissatīti netaṃ thānaṃ vijjati. Idaṃ kāraṇaṃ nāma natthi, atthānametaṃ anavakāsoti.

238. Evaṃ bhagavā ayaṃ ariṭṭho yathā nāma rajako sugandhānipi duggandhānipi jīṇṇānipi navānipi suddhānipi asuddhānipi vatthāni ekato bhaṇḍikaṃ karoti, evameva bhikkhūnaṃ nicchandarāgapaṇītacīvarādīparibhogaṇca anibaddhasīlānaṃ gahaṭṭhānaṃ antarāyakaraṃ sacchandarāgaparibhogaṇca nibaddhasīlānaṃ bhikkhūnaṃ āvaraṇakaraṃ sacchandarāgaparibhogaṇca sabbaṃ ekasadisam karotīti ariṭṭhassa laddhiṃ pakāsetvā idāni duggahitāya pariyattiyā dosaṃ dassento **idha, bhikkhave, ekacceti** tiādīmāha. Tattha **pariyāpuṇantīti** uggaṇhanti. **Suttanti** tiādīsu ubhatovibhaṅganiddesakhandhakaparivārā, suttanipāte maṅgalasuttaratanasuttanālakasuātuvaṭṭakasuttāni, aññampi ca suttanāmaṃ tathāgatavacanaṃ **suttanti** veditabbaṃ. Sabbampi sagāthakaṃ suttaṃ **geyyanti**

veditabbam, visesena samyuttake sakalopi sagāthāvaggo. Sakalam abhidhammapīṭakam, niggāthakam suttam, yañca aññampi aṭṭhahi aṅgehi asaṅgahitam buddhavacanam, tam **veyyākaraṇanti** veditabbam. Dhammapadam, theragāthā, therīgāthā, suttanipāte nosuttanāmikā suddhikagāthā ca **gāthāti** veditabbā. Somanassañānamayikagāthāpaṭisaṃyuttā dveasītisuttantā **udānanti** veditabbā. “Vuttañhetam bhagavatā” tiādinayappavattā (itivu. 1,2) dasuttarasatasuttantā **itivuttakanti** veditabbā. Apaṇṇakajātakādīni paṇṇāsādhikāni pañcajātakasatāni **jātakanti** veditabbāni. “Cattārome, bhikkhave, acchariyā abbhutā dhammā ānande” tiādinayappavattā (a. ni. 4.129) sabbepi acchariyaabbhutadhammapaṭisaṃyuttā suttantā **abbhutadhammanti** veditabbā. Cūḷavedallamahāvedallasammādiṭṭhisakkapañhasaṅkhārabhājanīyamahāpuṇṇamasuttādayo sabbepi vedañca tuṭṭhiñca laddhā laddhā pucchitasuttantā **vedallanti** veditabbā.

Attham na upaparikkhantīti atthattham kāraṇattham na passanti na pariggaṇhanti. **Anupaparikkhatanti** anupaparikkhantānam. **Na nijjhānam khamantīti** na upaṭṭhahanti na āpātham āgacchanti, imasmiṃ ṭhāne sīlam samādhi vipassanā maggo phalam vaṭṭam vivaṭṭam kathitanti evaṃ jānituṃ na sakkā hontīti attho. **Te upārambhānisamsā cevāti** te paresam vāde dosāropanānisamsā hutvā pariyāpuṇantīti attho. **Itivādappamokkhānisamsā cāti** evaṃ vādapamokkhānisamsā, parehi sakavāde dose āropite tam dosam evaṃ mocessāmāti imināva kāraṇena pariyāpuṇantīti attho. **Tañcassa attham nānubhontīti** yassa ca maggassa vā phalassa vā atthāya kulaputtā dhammam pariyāpuṇanti, tañcassa dhammassa attham ete duggahitaggāhino nānubhonti. Apica parassa vāde upārambham āropetuṃ attano vādam mocetuṃ asakkontāpi tañca attham nānubhontiyeva.

239. Alagaddatthikoti āsivisaatthiko. **Gadoti** hi visassa nāmam, tam tassa alam paripuṇṇam atthīti **alagaddo**. **Bhogeti** sarīre. **Idha pana, bhikkhave, ekacce kulaputtā dhammam pariyāpuṇantīti** nittharaṇapariyattivasena uggaṇhanti. Tisso hi pariyattiyo alagaddapariyatti nittharaṇapariyatti bhaṇḍāgārikapariyattīti.

Tattha yo buddhavacanam uggaṇhetvā evaṃ cīvarādīni vā labhissāmi, catuparisamajjhe vā mam jānissantīti lābhasakkārahetu pariyāpuṇāti, tassa sā pariyatti **alagaddapariyatti** nāma. Evaṃ pariyāpuṇato hi buddhavacanam apariyāpuṇitvā niddokkamanam varataram.

Yo pana buddhavacanam uggaṇhitvā sīlassa āgataṭṭhāne sīlam pūretvā samādhissa āgataṭṭhāne samādhigabbham gaṇhāpetvā vipassanāya āgataṭṭhāne vipassanam paṭṭhapetvā maggaphalānam āgataṭṭhāne maggam bhāvessāmi phalam sacchikarissāmīti uggaṇhāti, tassa sā pariyatti **nittharaṇapariyatti** nāma hoti.

Khīṇāsavassa pana pariyatti **bhaṇḍāgārikapariyatti** nāma. Tassa hi apariññātam appahīnam abhāvitaṃ asacchikataṃ vā natthi. So hi pariññātakhandho pahīnakilesa bhāvitaṃ maggo sacchikataphalo, tasmā buddhavacanam pariyāpuṇanto tantidhārako pavenipālako vaṃsānurakkhako hutvā uggaṇhāti. Itissa sā pariyatti bhaṇḍāgārikapariyatti nāma hoti.

Yo pana puthujjano chātabhayādīsu ganthadharesu ekasmiṃ ṭhāne vasituṃ asakkontesu sayam bhikkhācārena akilamamāno atimadhuraṃ buddhavacanam mā nassatu, tantim dhāressāmi, vaṃsam ṭhapessāmi, pavenim pālessāmīti pariyāpuṇāti, tassa pariyatti bhaṇḍāgārikapariyatti hoti, na hotīti? Na hoti. Kasmā? Na attano ṭhāne thatvā pariyāputattā. Puthujjanassa hi pariyatti nāma alagaddā vā hoti nittharaṇā vā, sattanam sekkhānam nittharaṇāva, khīṇāsavassa bhaṇḍāgārikapariyattiyeva. Imasmiṃ pana ṭhāne nittharaṇapariyatti adhippetā.

Nijjhānam khamantīti sīlādīnam āgataṭṭhānesu idha sīlam kathitam, idha samādhi, idha vipassanā, idha maggo, idha phalam, idha vaṭṭam, idha vivaṭṭanti āpātham āgacchanti. **Tañcassa attham anubhontīti** yesam maggaphalānam atthāya pariyāpuṇanti. Suggahitapariyattim nissāya maggam bhāvetvā phalam sacchikarontā tañcassa dhammassa attham anubhavanti. Paravāde upārambham āropetuṃ sakkontāpi sakavāde āropitam dosam icchiticchitaṭṭhānam gahetvā mocetuṃ sakkontāpi anubhontiyeva. **Dīgharattam hitāya sukhāya samvattantīti** sīlādīnam āgataṭṭhāne sīlādīni pūrentānampi, paresam vāde sahadhammena upārambham āropentānampi, sakavādato dosam harantānampi, arahattam patvā parisamajjhe dhammam desetvā dhammadesanāya pasannehi upanīte cattāro paccaye paribhuñjantānampi dīgharattam hitāya sukhāya

saṃvattanti.

Evam sugghahite buddhavacane ānisaṃsaṃ dassetvā idāni tattheva niyojento **tasmā tiha, bhikkhavetiādīmāha**. Tattha **tasmāti** yasmā duggahitapariyatti duggahitaalagaddo viya dīgharattaṃ ahitāya dukkhāya saṃvattati, sugghahitapariyatti sugghahitaalagaddo viya dīgharattaṃ hitāya sukhāya saṃvattati, tasmāti attho. **Tathā naṃ dhāreyyāthāti** tattheva naṃ dhāreyyātha, teneva atthena gaṇheyyātha. **Ye vā panāssu viyattā bhikkhūti** ye vā pana aññe sārīputtamoggallānamahākassapamahākaccānādikā byattā paṇḍitā bhikkhū assu, te pucchitabbā. Ariṭṭhena viya pana mama sāsane na kalalaṃ vā kacavaraṃ vā pakkhipitabbam.

240. Kullūpamanti kullasadisaṃ. **Nittharaṇatthāyāti** caturōghaniṭtharaṇatthāya. **Udakaṇṇavanti** yañhi udakaṃ gambhīraṃ na puthulaṃ. Puthulaṃ vā pana na gambhīraṃ, na taṃ aṇṇavoti vuccati. Yaṃ pana gambhīrañceva puthulañca, taṃ aṇṇavoti vuccati. Tasmā **mahantaṃ udakaṇṇavanti** mahantaṃ puthulaṃ gambhīraṃ udakanti ayamettha attho. **Sāsaṅkaṃ** nāma yattha corānaṃ nivutthokāso dissati. Ṭhitokāso, nisinnokāso, nipannokāso dissati. **Sappaṭibhayaṃ** nāma yattha corehi manussā hatā dissanti, viluttā dissanti, ākoṭitā dissanti. **Uttarasetūti** udakaṇṇavassa uparī baddho setu. **Kullaṃ bandhitvāti kullo** nāma taraṇatthāya kalāpaṃ katvā baddho. Pattharivā baddhā pana padaracāṭīdayo uḷumpoti vuccanti. **Uccāretvāti** ṭhapetvā. **Kiccakārīti** pattakārī yuttakārī, patirūpakārīti attho. **Dhammāpi vo pahātabbāti** ettha **dhammāti** samathavipassanā. Bhagavā hi samathepi chandarāgaṃ pajahāpesi, vipassanāyapi. Samathe chandarāgaṃ kattha pajahāpesi? “Iti kho, udāyi, nevasaññānāsaññāyanassapi pahānaṃ vadāmi, passasi no tvaṃ, udāyi, taṃ saṃyojanaṃ aṇuṃ vā thūlaṃ vā, yassāhaṃ no pahānaṃ vadāmi”ti (ma. ni. 2.156) ettha samathe chandarāgaṃ pajahāpesi. “Imaṃ ce tumhe, bhikkhave, diṭṭhiṃ evaṃ parisuddhaṃ evaṃ pariyodātaṃ na allīyetha na kelāyetha na dhanāyethā”ti (ma. ni. 1.401) ettha vipassanāya chandarāgaṃ pajahāpesi. Idha pana ubhayattha pajahāpento “dhammāpi vo pahātabbā, pageva adhammā”ti āha.

Tatrāyaṃ adhippāyo – bhikkhave, ahaṃ evarūpesu santappañitesu dhammesu chandarāgappahānaṃ vadāmi, kiṃ pana imasmiṃ asaddhamme gāmadhamme vasaladhamme duṭṭhulle odakantike, yattha ayaṃ ariṭṭho moghapuriso niddosasaññī pañcasu kāmagaṇesu chandarāgaṃ nālaṃ antarāyāyāti vadati. Ariṭṭhena viya na tumhehi mayhaṃ sāsane kalalaṃ vā kacavaraṃ vā pakkhipitabbanti evaṃ bhagavā imināpi ovādena ariṭṭhamyeva niggaṇhāti.

241. Idāni yo pañcasu khandhesu tividhaggāhavasena ahaṃ mamanti gaṇhāti, so mayhaṃ sāsane ayaṃ ariṭṭho viya kalalaṃ kacavaraṃ pakkhipatīti dassento **chayimāni, bhikkhavetiādīmāha**. Tattha **diṭṭhiṭṭhānānti** diṭṭhipi diṭṭhiṭṭhānaṃ, diṭṭhiyā ārammaṇampi diṭṭhiṭṭhānaṃ, diṭṭhiyā paccayopi. **Rūpaṃ etaṃ mamātiādīsu etaṃ mamāti** taṇhāggāho. **Esohamasmīti** mānaggāho. **Eso me attāti** diṭṭhiggāho. Evaṃ rūpārammaṇā taṇhāmānadiṭṭhiyo kathitā honti. Rūpaṃ pana attāti na vattabbam. Vedanādisupi eseva nayo. **Diṭṭhaṃ** rūpāyatanam, **sutaṃ** saddāyatanam, **mutaṃ** gandhāyatanam rasāyatanam phoṭṭhabbāyatanam, tañhi patvā gahetabbato **mutanti** vuttaṃ. Avasesāni sattāyatanāni **viññātaṃ** nāma. **Pattanti** pariyesitvā vā apariyesitvā vā pattam. **Pariyesitanti** pattam vā appattam vā pariyesitam. **Anuvaritāṃ manasāti** cittena anusañcaritam. Lokasmīhi pariyesitvā pattampi atthi, pariyesitvā nopattampi. Apariyesitvā pattampi atthi, apariyesitvā nopattampi. Tattha pariyesitvā pattam pattam nāma. Pariyesitvā nopattam pariyesitam nāma. Apariyesitvā pattañca, apariyesitvā nopattañca manasānuvaritāṃ nāma.

Atha vā pariyesitvā pattampi apariyesitvā pattampi pattaṭṭhena pattam nāma. Pariyesitvā nopattam pariyesitam nāma. Apariyesitvā nopattam manasānuvaritāṃ nāma. Sabbam vā etaṃ manasā anuvaritattā manasānuvaritāṃ nāma. Iminā viññānārammaṇā taṇhāmānadiṭṭhiyo kathitā, desanāvilāsena heṭṭhā diṭṭhādiārammaṇavasena viññānaṃ dassitam. **Yampi taṃ diṭṭhiṭṭhānanti** yampi etaṃ so lokotiādīnā nayena pavattam diṭṭhiṭṭhānaṃ.

So loko so attāti yā esā “rūpaṃ attato samanupassati”tiādīnā nayena pavattā diṭṭhi loko ca attā cāti gaṇhāti, taṃ sandhāya vuttaṃ. **So pecca bhavissāmīti** so ahaṃ paralokaṃ gantvā nicco bhavissāmi, dhuvo sassato avipariṇāmadhammo bhavissāmi, sinerumahāpathavīmahāsamuddādīhi sassatīhi samaṃ tattheva ṭhassāmi. **Tampi etaṃ mamāti** tampi dassanaṃ etaṃ mama, esohamasmi, eso me attāti samanupassati. Iminā diṭṭhārammaṇā taṇhāmānadiṭṭhiyo kathitā. Vipassanāya paṭivipassanākāle viya pacchimadiṭṭhiyā purimadiṭṭhigahaṇākāle evaṃ hoti.

Sukkapakkhe **rūpaṃ netam mamāti** rūpe taṇhāmānadiṭṭhiggāhā paṭikkhittā. Vedanādīsupi eseva nayo. **Samanupassatīti** imassa pana padassa taṇhāsamanupassanā mānasamanupassanā diṭṭhisamanupassanā ñāṇasamanupassanāti catasso samanupassanāti attho. Tā kaṇhapakkhe tissannaṃ samanupassanānaṃ, sukkapakkhe ñāṇasamanupassanāya vasena veditabbā. **Asati na paritassatīti** avijjamāne bhayaparitassanāya taṇhāparitassanāya vā na paritassati. Iminā bhagavā ajjhatakkhandhavināse aparitassamānaṃ khīṇāsavaṃ dassento desanaṃ matthakaṃ pāpesi.

242. Evaṃ vutte aññataro bhikkhūti evaṃ bhagavatā vutte aññataro anusandhikusalo bhikkhu – “bhagavatā ajjhatakkhandhavināse aparitassantaṃ khīṇāsavaṃ dassetvā desanā niṭṭhāpitā, ajjhataṃ aparitassante kho pana sati ajjhataṃ paritassakena bahiddhā parikkhāraṇāse paritassakena aparitassakena cāpi bhavitabbaṃ. Iti imehi catūhi kāraṇehi ayaṃ pañho pucchitabbo”ti cintetvā ekaṃsaṃ cīvaraṃ katvā añjalim paggayha bhagavantaṃ etadavoca. **Bahiddhā asatīti** bahiddhā parikkhāraṇāse. **Ahu vata meti** ahoṣi vata me bhaddakaṃ yānaṃ vāhanaṃ hiraññaṃ suvaṇṇanti attho. **Taṃ vata me natthīti** taṃ vata idāni mayhaṃ natthi, rājūhi vā corehi vā haṭaṃ, agginā vā daḍḍhaṃ, udakena vā vuḷhaṃ, paribhogena vā jīṇṇaṃ. **Siyā vata meti** bhavye vata mayhaṃ yānaṃ vāhanaṃ hiraññaṃ suvaṇṇaṃ sālī vīhi yavo godhumo. **Taṃ vatāhaṃ na labhāmīti** tamahaṃ alabhamāno tadanucchavikaṃ kammaṃ akatvā nisinnattā idāni na labhāmīti socati, ayaṃ agāriyasocanā, anagāriyassa pattacīvarādīnaṃ vasena veditabbā.

Aparitassanāvāre **na evaṃ hotīti** yehi kilesehi evaṃ bhavye, tesam pahīnattā na evaṃ hoti. **Diṭṭhiṭṭhānādiṭṭhānapariyutṭhānābhinivesānusayānanti** diṭṭhīnañca diṭṭhiṭṭhānānañca diṭṭhādiṭṭhānānañca diṭṭhipariyutṭhānānañca abhinivesānusayānañca. **Sabbasaṅkhārasamathāyāti** nibbānatthāya. Nibbānañhi āgamma sabbasaṅkhārāññitāni, sabbasaṅkhāracalanāni sabbasaṅkhāravipphanditāni sammanti vūpasammanti, tasmā taṃ, “sabbasaṅkhārasamatho”ti vuccati. Tadeva ca āgamma khandhūpadhi kilesūpadhi abhisāṅkhārūpadhi, pañcakāmaguṇūpadhīti ime upadhayo paṭinissajjiyanti, taṇhā khīyati virajjati nirujjhati, tasmā taṃ, “sabbūpadhipaṭinissaggo taṇhākkhāyo virāgo nirodho”ti vuccati. **Nibbānāyāti** ayaṃ panassa sarūpaniddeso, iti sabbeheva imehi padehi nibbānassa sacchikiriyatthāya dhammaṃ desentassāti ayamatto dīpito. **Tassevaṃ hotīti** tassa diṭṭhigatikassa **ucchijjissāmi nāmassu, vinassissāmi nāmassu, nāssu nāma bhavissāmīti** evaṃ hoti. Diṭṭhigatikassa hi tilakkhaṇaṃ āropetvā suññatāpaṭisaṃyuttaṃ katvā desiyamānaṃ dhammaṃ suñantassa tāsso uppajjati. Vuttañhetam – “tāsso heso, bhikkhave, asutavato puthujjanassa no cassaṃ, no ca me siyā”ti (saṃ. ni. 3.55).

243. Ettāvatā bahiddhāparikkhāraṇāse tassanakassa ca notassanakassa ca ajjhatakkhandhavināse tassanakassa ca notassanakassa cāti imesaṃ vasena catukkoṭikā suññatā kathitā. Idāni bahiddhā parikkhāraṃ pariggahaṃ nāma katvā, vīsativatthukaṃ sakkāyadiṭṭhiṃ attavādudupādānaṃ nāma katvā, sakkāyadiṭṭhipamukhā dvāsaṭṭhi diṭṭhiyo diṭṭhinissayaṃ nāma katvā tikoṭikaṃ suññataṃ dassetuṃ **taṃ, bhikkhave, pariggahanti**ādīmāha. Tattha **pariggahanti** bahiddhā parikkhāraṃ. **Pariggaṇḥeyyāthāti** yathā viññū manusso pariggaṇḥeyya. **Ahampi kho taṃ, bhikkhave,** bhikkhave, tumhepi na passatha, ahampi na passāmi, iti evarūpo pariggaho natthīti dasseti. Evaṃ sabbattha attho veditabbo.

244. Evaṃ tikoṭikaṃ suññataṃ dassetvā idāni ajjhatakkhandhe attāti bahiddhā parikkhāre attaniyanti katvā dvikoṭikaṃ dassento **attani vā, bhikkhave, satīti**ādīmāha. Tattha ayaṃ saṅkhepattho, bhikkhave, attani vā sati idaṃ me parikkhārajātaṃ attaniyanti assa, attaniyeva vā parikkhāre sati ayaṃ me attā imassa parikkhāraṃ sāmīti, evaṃ ahanti. Sati mamāti, mamāti sati ahanti yuttaṃ bhavye. **Saccatoti** bhūtato, **thetatoti** tathato thirato vā.

Idāni ime pañcakkhandhe aniccaṃ dukkhaṃ anattāti evaṃ tiparivaṭṭavasena aggaṇhanto ayaṃ ariṭṭho viya mayhaṃ sāsane kalalaṃ kacavaraṃ pakkhipatīti dassento **taṃ kiṃ maññatha, bhikkhave, rūpaṃ niccaṃ vāti**ādīmāha. Tattha **aniccaṃ, bhanteti,** bhante, yasmā hutvā na hoti, tasmā aniccaṃ. Uppādavayavattito vipariṇāmatāvakālikaniccapaṭikkhepaṭṭhena vāti catūhi kāraṇehi aniccaṃ. **Dukkhaṃ, bhanteti,** bhante, paṭipīlanākārena dukkhaṃ, santāpadukkhamaḍḍhāvattukasukhapaṭikkhepaṭṭhena vāti catūhi kāraṇehi dukkhaṃ. **Vipariṇāmadhammanti** bhavasaṅkantiupagamanasabhāvaṃ pakatibhāvavijjahanasabhāvaṃ. **Kallaṃ nu taṃ samanupassituṃ etaṃ mama, esohamasmi, eso me attāti** yuttaṃ nu kho taṃ imesaṃ tiṇṇaṃ taṇhāmānadiṭṭhiggāhānaṃ vasena ahaṃ mamāti evaṃ gahetuṃ. **No hetam, bhanteti** iminā te bhikkhū avasavattanākārena rūpaṃ, bhante, anattāti paṭijānanti. Suññāassāmikaanissaraattapaṭikkhepaṭṭhena vāti catūhi

kāraṇehi anattā.

Bhagavā hi katthaci aniccavasena anattattaṃ dasseti, katthaci dukkhavasena, katthaci ubhayavasena. “Cakkhu attāti yo vadeyya, taṃ na upapajjati, cakkhussa uppādopi vayopi paññāyati. Yassa kho pana uppādopi vayopi paññāyati, attā me uppajjati ca veti cāti iccassa evamāgataṃ hoti, tasmā taṃ na upapajjati cakkhu attāti yo vadeyya, iti cakkhu anattā”ti (ma. ni. 3.422) imasmiñhi **chachakkasutte** aniccavasena anattattaṃ dasseti. “Rūpañca hidaṃ, bhikkhave, attā abhaviṣṣa, nayidaṃ rūpaṃ ābādhāya saṃvatteyya, labbhettha ca rūpe ‘evaṃ me rūpaṃ hotu, evaṃ me rūpaṃ mā ahoṣī’ti. Yasmā ca kho, bhikkhave, rūpaṃ anattā, tasmā rūpaṃ ābādhāya saṃvattati, na ca labbhati rūpe ‘evaṃ me rūpaṃ hotu, evaṃ me rūpaṃ mā ahoṣī’”ti (mahāva. 20; saṃ. ni. 3.59) imasmiṃ **anattalakkhaṇasutte** dukkhavasena anattattaṃ dasseti. “Rūpaṃ, bhikkhave, aniccaṃ, yadaniccaṃ taṃ dukkhaṃ, yaṃ dukkhaṃ tadanattā, yadanattā taṃ ‘nettaṃ mama, nesohamasmi, na meso attā’ti evametam yathābhūtaṃ sammappaññāya daṭṭhabba’”ti (saṃ. ni. 3.76) imasmiṃ **arahattasutte** ubhayavasena anattattaṃ dasseti. Kasmā? Aniccaṃ dukkhañca pākaṃ. Anattāti na pākaṃ.

Paribhogabhājanādīsu hi bhinnesu aho aniccanti vadanti, aho anattāti vattā nāma natthi. Sarīre gaṇḍapīḷakādīsu vā uṭṭhitāsu kaṇṭakena vā viddhā aho dukkhanti vadanti, aho anattāti pana vattā nāma natthi. Kasmā? Idañhi anattalakkhaṇaṃ nāma avibhūtaṃ duddasaṃ duppaññāpanaṃ. Tena taṃ bhagavā aniccavasena vā dukkhavasena vā ubhayavasena vā dasseti. Tayidaṃ imasmimpi te parivaṭṭe aniccadukkhavaseneva dassitaṃ. Vedanādīsupi ese va nayo.

Tasmā tiha, bhikkhaveli, bhikkhave, yasmā etarahi aññadāpi rūpaṃ aniccaṃ dukkhaṃ anattā, tasmāti attho. **Yaṃkiñci rūpantiādini visuddhimagge** khandhaniddese vitthāritāneva.

245. Nibbindatīti ukkaṇṭhati. Ettha ca **nibbidāti** vuṭṭhānagāminīvipassanā adhippetā. Vuṭṭhānagāminīvipassanāya hi bahūni nāmāni. Esā hi katthaci saññagganti vuttā. Katthaci dhammaṭṭhitiñānanti. Katthaci pārisuddhipadhāniyaṅganti. Katthaci paṭipadāññadassanavisuddhīti. Katthaci tammayatāpariyādānanti. Katthaci tīhi nāmehi. Katthaci dvīhīti.

Tattha **poṭṭhapādasutte** tāva “saññā kho, poṭṭhapāda, paṭhamam upajjati, pacchā ñāṇa”nti (dī. ni. 1.416) evaṃ **saññagganti** vuttā. **Susimasutte** “pubbe kho, susīma, dhammaṭṭhitiñāṇam, pacchā nibbāne ñāṇa”nti (saṃ. ni. 2.70) evaṃ **dhammaṭṭhitiñānanti** vuttā. **Dasuttarasutte** “paṭipadāññadassanavisuddhipadhāniyaṅga”nti (dī. ni. 3.359) evaṃ **pārisuddhipadāniyaṅganti** vuttā. **Rathavinīte** “kiṃ nu kho, āvuso, paṭipadāññadassanavisuddhattham bhagavati brahmacariyam vussati”ti (ma. ni. 1.257) evaṃ **paṭipadāññadassanavisuddhīti** vuttā. **Saḷāyatanavibhaṅge** “atammayatam, bhikkhave, nissāya atammayatam āgamma yāyam upekkhā nānattā nānattasitā, taṃ abhinivajjetvā yāyam upekkhā ekattā ekattasitā, taṃ nissāya taṃ āgamma evametissā pahānam hoti, evametissā samatikkamo hoti”ti (dī. ni. 3.310) evaṃ **tammayatāpariyādānanti** vuttā. **Paṭisambhidāmagge** “yā ca muñcitukamyatā, yā ca paṭisañkhānupassanā, yā ca sañkhārupekkhā, ime dhammā ekatthā byañjanaṃ nāna”nti (paṭi. ma. 1.54) evaṃ tīhi nāmehi vuttā. **Paṭṭhāne** “anulomaṃ gotrabhussa anantarapaccayena paccayo, anulomaṃ vodānassa anantarapaccayena paccayo”ti (paṭṭhā. 1.1.417) evaṃ dvīhi nāmehi vuttā. Imasmiṃ pana alagaddasutte nibbindatīti nibbidānāmena āgatā.

Nibbidā virajjatīti ettha **virāgoti** maggo **virāgā vimuccatīti** ettha virāgena maggena vimuccatīti phalaṃ kathitaṃ. **Vimuttasmiṃ vimuttamīti ñāṇam hotīti** idha paccavekkhaṇā kathitā.

Evaṃ vimuttacittam mahākhīṇāsavaṃ dassetvā idāni tassa yathābhūtehi pañcahi kāraṇehi nāmaṃ gaṇhanto **ayam vuccati, bhikkhaveli**ādīmāha. **Avijjāti** vaṭṭamūlikā avijjā. Ayañhi durukkipanattāthena **palighoti** vuccati. Tenesa tassa ukkhittattā **ukkhittapalighoti** vutto. **Tālāvattukattāti** sīsacchinnatālo viya katā, samūlam vā tālam uddharitvā tālassa vatthu viya katā, yathā tasmim vatthusmim puna so tālo na paññāyati, evaṃ puna apaññattibhāvaṃ nītati attho. **Ponobbhavikoti** punabbhavādāyako. **Jāṭisamsāroti**ādīsu jāyanavasena ceva saṃsāraṇavasena ca evaṃ laddhanāmānaṃ punabbhavakhandhānaṃ paccayo kammābhisañkhāro. So hi punappunaṃ uppattikaraṇavasena parikkhipitvā ṭhitattā **parikkhāti** vuccati, tenesa tassā saṃkiṇṇattā vikiṇṇattā **saṃkiṇṇaparikkhoti** vutto. **Tañhāti** vaṭṭamūlikā tañhā. Ayañhi gambhīrānugataṭṭhena **esikāti** vuccati. Tenesa tassā abbūhattā luñcitvā chaḍḍitattā **abbūhesikoti** vutto.

Orambhāgiyānīti oram bhajanakāni kāmabhavē upapattipaccayāni. Etāni hi kavāṭaṃ viya nagaradvāraṃ cittam pidaḥitvā ṭhitattā **aggalāti** vuccanti. Tenesa tesam nirākatattā bhinnattā **niraggaloti** vutto. **Ariyoti** nikkilesa parisuddho. **Pannaddhajoti** patitamānaddhajo. **Pannabhāroti** khandhabhārakilesabhāraabhisankhārabhārapañcāmaguṇabhārā pannā orohitā assāti **pannabhāro**. Apica idha mānabhārasseva oropitattā pannabhāroti adhippeto. **Visaṃyuttoti** catūhi yogehi sabbakilesehi ca visaṃyutto. Idha pana mānasam yogeneva visaṃyuttattā visaṃyuttoti adhippeto. **Asmimānoti** rūpe asmīti māno, vedanāya... saññāya... saṅkhāresu... viññāṇe asmīti māno.

Ettāvata bhagavatā maggena kilese khepetvā nirodhasayanavaragatassa nibbānārammaṇaṃ phalasaṃpattim appētvā viharato khīṇāsavassa kālo dassito. Yathā hi dve nagarāni ekaṃ coranagaraṃ, ekaṃ khemanagaraṃ. Atha ekassa mahāyodhassa evaṃ bhavēyya – “yāvimaṃ coranagaraṃ tiṭṭhati, tāva khemanagaraṃ bhayato na muccati, coranagaraṃ anagaraṃ karissāmī”ti sannāhaṃ katvā khaggaṃ gahetvā coranagaraṃ upasaṅkamitvā nagaradvāre ussāpīte esikatthambhe khaggena chinditvā sadvārabāhakaṃ kavāṭaṃ chinditvā palighaṃ ukkhipitvā pākāraṃ bhindanto parikkhaṃ saṃkiritvā nagarasobhanatthāya ussīte dhaje pātetvā nagaraṃ agginā jhāpetvā khemanagaraṃ pavisitvā pāsādaṃ abhiruyha nātigaṇaparivuto surasabhojanaṃ bhūñjēyya, evaṃ coranagaraṃ viya sakkāyo, khemanagaraṃ viya nibbānaṃ, mahāyodho viya yogāvācaro. Tassevaṃ hoti, “yāva sakkāyavaṭṭaṃ vattati, tāva dvattimsakammakāraṇaātṭhanavutirogapañcavīsatisamahābhayehi parimuccanaṃ natthī”ti. So mahāyodho viya sannāhaṃ silasannāhaṃ katvā, paññākhaggaṃ gahetvā khaggena esikatthambhe viya arahattamaggena taṇhesikaṃ luñcitvā, so yodho sadvārabāhakaṃ nagarakavāṭaṃ viya pañcorambhāgiyasamyojanaggaḷaṃ ugghātetvā, so yodho palighaṃ viya, avijjāpalighaṃ ukkhipitvā, so yodho pākāraṃ bhindanto parikkhaṃ viya kammābhisaṅkhāraṃ bhindanto jātisamsāraparikkhaṃ saṃkiritvā, so yodho nagarasobhanatthāya ussāpīte dhaje viya mānaddhaje pātetvā sakkāyanagaraṃ jhāpetvā, so yodho khemanagare uparipāsāde surasabhojanaṃ viya kilesanibbānaṃ nagaraṃ pavisitvā amatanirodhārammaṇaṃ phalasaṃpattisukhaṃ anubhavamāno kālaṃ vāṭināmeti.

246. Idāni evaṃ vimuttacittassa khīṇāsavassa parehi anadhigamanīyaviññāṇataṃ dassento **evaṃ vimuttacittam khoti**ādīmāha. Tattha **anvesanti** anvesantā gavesantā. **Idam nissitanti** idaṃ nāma nissitam. **Tathāgatassāti** ettha sattopi **tathāgatoti** adhippeto, uttamaṃpuggalo khīṇāsavopi. **Ananuvijjoti** asaṃvijjamāno vā avindeyyo vā. Tathāgatoti hi satte gahite asaṃvijjamānoti attho vaṭṭati, khīṇāsave gahite avindeyyoti attho vaṭṭati.

Tattha purimanaye ayamadhippāyo – bhikkhave, ahaṃ diṭṭheva dhamme dharamānakaṃyeva khīṇāsavaṃ tathāgato satto puggaloti na paññapemi. Appaṭisandhikaṃ pana parinibbutaṃ khīṇāsavaṃ sattoti vā puggaloti vā kiṃ paññapessāmī? Ananuvijjo tathāgato. Na hi paramatthato satto nāma koci atthi, tassa avijjamānassa idaṃ nissitam viññāṇanti anvesantāpi kiṃ adhigacchissanti? Kathaṃ paṭilabhissanti attho. Dutīyanaye ayamadhippāyo – bhikkhave, ahaṃ diṭṭheva dhamme dharamānakaṃyeva khīṇāsavaṃ viññāṇavasena indādīhi avindiyam vadāmi. Na hi saindā devā sabrahmakā sapajāpatikā anvesantāpi khīṇāsavassa vipassanācittam vā maggacittam vā phalacittam vā, idaṃ nāma ārammaṇaṃ nissāya vattatīti jānituṃ sakkonti. Te appaṭisandhikassa parinibbutassa kiṃ jānissanti?

Asatāti asantena. **Tucchāti** tucchakena. **Musāti** musāvādena. **Abhūtenāti** yaṃ natthi, tena. **Abbhācikkhantīti** abhiācikkhanti, abhibhavitvā vadanti. **Venayikoti** vinayati vināsetīti **vinayo**, so eva **venayiko**, sattavināsakoti adhippāyo. **Yathā cāhaṃ na, bhikkhaveti**, bhikkhave, yena vākārena ahaṃ na sattavināsako. **Yathā cāhaṃ na vadāmīti** yena vā kāraṇena ahaṃ sattavināsaṃ na paññapemi. Idaṃ vuttaṃ hoti – yathāhaṃ na sattavināsako, yathā ca na sattavināsaṃ paññapemi, tathā maṃ te bhonto samaṇabrāhmaṇā “venayiko samaṇo gotamo”ti vadantā sattavināsako samaṇo gotamoti ca, “sato sattassa ucchedaṃ vināsaṃ vibhavaṃ paññapetī”ti vadantā sattavināsaṃ paññapetīti ca asatā tucchā musā abhūtena abbhācikkhantīti.

Pubbe cāti pubbe mahābodhimaṇḍamhiyeva ca. **Etarahi cāti** etarahi dhammadesanāyaṇca. **Dukkhañceva paññapemi, dukkhassa ca nirodhanti** dhammacakkaṃ appavattētvā bodhimaṇḍe viharantopi dhammacakkappavattanato paṭṭhāya dhammaṃ desentopi catusaccameva paññapemīti attho. Ettha hi dukkhaggaṇena tassa mūlabhūto samudayo, nirodhaggaṇena taṃsappāpako maggo gahitova hotīti veditabbo. **Tatra ceti** tasmim catusaccappakāsane. **Pareti** saccāni ājānituṃ paṭivijjhituṃ asamatthapuggalā.

Akkosantīti dasahi akkosavattūhi akkosanti. **Paribhāsantīti** vācāya paribhāsanti. **Rosenti vihesentīti** rosessāma vihesessāmāti adhippāyena ghaṭṭenti dukkhāpenti. **Tatrāti** tesu akkosādīsu, tesu vā parapuggalesu. **Āghātoti** kopo. **Appaccayoti** domanassam. **Anabhiraddhīti** atuṭṭhi.

Tatra ceti catusaccappakāsaneveva. **Pareti** catusaccappakāsanaṃ ājānituṃ paṭivijjhituṃ samatthapuggalā. **Ānandoti** ānandapīti. **Uppilāvittanti** uppilāpanapīti. **Tatra ceti** catusaccappakāsanaṃhiyeva. **Tatrāti** sakkārādīsu. **Yaṃ kho idaṃ pubbe pariññātanti** idaṃ khandhapañcakaṃ pubbe bodhimaṇḍe tīhi pariññāhi pariññātaṃ. **Tatthameti** tasmim khandhapañcake ime. **Kiṃ vuttaṃ hoti?** Tatrāpi tathāgatassa ime sakkārā mayi karīyantīti vā ahaṃ ete anubhavāmīti vā na hoti. **Pubbe pariññātakhandhapañcakaṃyeva** ete sakkāre anubhotīti ettakameva hotīti. **Tasmāti** yasmā saccāni paṭivijjhituṃ asamattā tathāgatampi akkosanti, tasmā. **Sesaṃ vuttanayeneva** veditabbaṃ.

247. Tasmā tiha, bhikkhave, yaṃ na tumhākanti yasmā attaniyepi chandarāgappahānaṃ dīgharattaṃ hitāya sukhāya saṃvattati, tasmā yaṃ na tumhākaṃ, taṃ pajahathāti attho. **Yathāpaccayaṃ vā kareyyāti** yathā yathā iccheyya tathā tathā kareyya. **Na hi no etaṃ, bhante, attā vāti, bhante, etaṃ** tiṇakaṭṭhasākhāpalāsaṃ amhākaṃ neva attā na amhākaṃ rūpaṃ na viññānanti vadanti. **Attaniyaṃ vāti** amhākaṃ cīvarādīparikkhāropi na hotīti attho. **Evameva kho, bhikkhave, yaṃ na tumhākaṃ taṃ pajahathāti** bhagavā, khandhapañcakaṃyeva na tumhākanti dassetvā pajahāpeti, tañca kho na uppāṭetvā, luñcītvā vā. **Chandarāgavinayena** panetaṃ pajahāpeti.

248. Evaṃ svākkhātoti ettha tiparivaṭṭato paṭṭhāya yāva imaṃ thānaṃ āharitumpi vaṭṭati, paṭilomena pemamattakena saggaparāyaṇato paṭṭhāya yāva imaṃ thānaṃ āharitumpi vaṭṭati. **Svākkhātoti** sukathito. **Sukathitattā** eva uttāno vivaṭo pakāsīto. **Chinnapilotikoti** pilotikā vuccati chinnaṃ bhinnaṃ tattha tattha sibbitaṃ gaṇṭhikataṃ jīṇṇaṃ vatthaṃ, taṃ yassa natthi, aṭṭhahatthaṃ vā navahatthaṃ vā ahatasāṭakaṃ nivattho, so chinnapilotiko nāma. **Ayampi dhammo tādīso**, na hettha kohaññādivasena chinnabhinnasibbitagaṇṭhikatabhāvo atthi. **Apica kacavaro pilotikoti** vuccati. **Imasmiñca sāsane samaṇakacavaraṃ nāma** patiṭṭhātuṃ na labhati. **Tenevāha** –

“Kāraṇḍavaṃ niddhamatha, kasambuñcāpakassatha;
Tato palāpe vāhetha, assamaṇe samaṇamānīne.

Niddhamitvāna pāpicche, pāpaācāragocare;
Suddhā suddhehi saṃvāsaṃ, kappayavho patissatā;
Tato samaggā nipakā, dukkhassantaṃ karissathā”ti. (su. ni. 283-285);

Iti samaṇakacavarassa chinnattāpi ayaṃ dhammo **chinnapilotiko nāma** hoti. **Vaṭṭaṃ tesam natthi paññāpanāyāti** tesam vaṭṭaṃ apaññattibhāvaṃ gataṃ nippaññattikaṃ jātaṃ. **Evarūpo mahākhīṇāsavo** evaṃ svākkhāte sāsaneveva uppajjati. **Yathā** ca khīṇāsavo, evaṃ anāgāmiādayopi.

Tattha **dhammānusārino saddhānusārīnoti** ime dve sotāpattimaggaṭṭhā hontī. **Yathāha** – “katamo ca puggalo dhammānusārī? **Yassa puggalassa** sotāpattīphalāsacchikiriyāya paṭipannassa paññindriyaṃ adhimattaṃ hoti, paññāvāhiṃ paññāpubbaṅgamaṃ ariyamaggaṃ bhāveti. **Ayaṃ vuccati puggalo dhammānusārī.** **Sotāpattīphalāsacchikiriyāya** paṭipanno puggalo dhammānusārī, phale ṭhito diṭṭhippatto. **Katamo ca puggalo saddhānusārī?** **Yassa puggalassa** sotāpattīphalāsacchikiriyāya paṭipannassa saddhindriyaṃ adhimattaṃ hoti, saddhāvāhiṃ saddhāpubbaṅgamaṃ ariyamaggaṃ bhāveti. **Ayaṃ vuccati puggalo saddhānusārī.** **Sotāpattīphalāsacchikiriyāya** paṭipanno puggalo saddhānusārī, phale ṭhito saddhāvimutto”ti (pu. pa. 30). **Yesam mayi saddhāmattaṃ pemamattanti** iminā yesam añño ariyadhammo natthi, tathāgate pana saddhāmattaṃ pemamattameva hoti. **Te vipassakapuggalā** adhippetā. **Vipassakabhikkhūnañhi** evaṃ vipassanaṃ paṭṭhapetvā nisinnānaṃ dasabale ekā saddhā ekaṃ pemaṃ uppajjati. **Tāya saddhāya** tena pemena hatthe gahetvā sagge ṭhapitā viya hontī, niyatagatikā kira ete. **Porāṇakattherā** pana evarūpaṃ bhikkhuṃ cūlasotāpannoti vadanti. **Sesaṃ sabbattha** uttānatthamevāti.

Papañcasūdaniyā majjhimanikāyaṭṭhakathāya

Alagaddūpamasuttavaṇṇanā niṭṭhitā.

3. Vammikasuttavaṇṇanā

249. Evaṃ me sutanti vammikasuttaṃ. Tattha āyasmāti piyavacanametam. **Kumārakassapoti** tassa nāmaṃ. Kumārakāle pabbajitattā pana bhagavatā, “kassapaṃ pakkosatha, idaṃ phalaṃ vā khādanīyaṃ vā kassapassa dethā”ti vutte, katarassa kassapassāti kumārakassapassāti evaṃ gahitanāmattā tato paṭṭhāya vuḍḍhakālepi “kumārakassapo” tveva vuccati. Apica raññā posāvanikaputtattāpi taṃ “kumārakassapo”ti sañjāniṃsu. Ayaṃ panassa pubbayogato paṭṭhāya āvibhāvakaṭṭhā –

Thero kira padumuttarassa bhagavato kāle seṭṭhiputto ahoṣi. Athekadivasam bhagavantaṃ citrakathim ekaṃ attano sāvakaṃ ṭhānantare ṭhapentaṃ disvā bhagavato sattāhaṃ dānaṃ datvā, “ahampi bhagavā anāgate ekassa buddhassa ayaṃ thero viya citrakathī sāvako bhaveyya”nti patthanaṃ katvā puññāni karonto kassapassa bhagavato sāsane pabbajitvā visesaṃ nibbattetuṃ nāsakkhi.

Tadā kira parinibbutassa bhagavato sāsane osakkante pañca bhikkhū nisseṇiṃ bandhitvā pabbataṃ abhiruyha samaṇadhammaṃ akaṃsu. Saṅghatthero tatiyadivase arahattaṃ patto. Anuthero catutthadivase anāgāmī ahoṣi. Itare tayo visesaṃ nibbattetuṃ asakkontā devaloke nibbattiṃsu. Tesam ekaṃ buddhantaṃ devesu ca manussesu ca sampattiṃ anubhontānaṃ eko takkasīlāyaṃ rājakule nibbattitvā pukkusāti nāma rājā hutvā bhagavantaṃ uddissa pabbajitvā rājagahaṃ gacchanta kumbhakārasālāyaṃ bhagavato dhammadesanaṃ sutvā anāgāmīphalaṃ patto. Eko ekasmiṃ samuddapaṭṭane kulaghare nibbattitvā nāvaṃ āruyha bhinnanāvo dārucīrāni nivāsetvā lābhasampattiṃ patto, “ahaṃ arahā”ti cittaṃ uppādetvā, “na tvaṃ arahā, gaccha satthāraṃ pañhaṃ pucchā”ti atthakāmāya devatāya codito tathā katvā arahattaphalaṃ patto.

Eko rājagahe ekissā kuladārikāya kucchimhi uppanno. Sā ca paṭhamaṃ mātāpitaro yācitvā pabbajjā alabhamānā kulagharaṃ gatā gabbhasaṅghitampi aṅānantī sāmikaṃ ārādheta tena anuññatā bhikkhunīsu pabbajitā. Tassā gabbhinimittaṃ disvā bhikkhuniyo devadattaṃ pucchimṃsu, so “assamaṇī”ti āha. Dasabalaṃ pucchimṃsu, satthā upālittheraṃ paṭichāpesi. Thero sāvattinagaravāsīni kulāni visākhañca upāsikaṃ pakkosāpetvā sodhento, – “pure laddho gabbho, pabbajjā aroga”ti āha. Satthā “suvinicchitaṃ adhikaraṇa”nti therassa sādhukāraṃ adāsi. Sā bhikkhunī suvaṇṇabimbasisaṃ puttaṃ vijāyī, taṃ gahetvā rājā pasenadī kosalo posāpesi. “Kassapo”ti cassa nāmaṃ katvā aparabhāge alaṅkaritvā satthu santikaṃ netvā pabbājesi. Iti raññā posāvanikaputtattāpi taṃ “kumārakassapo”ti sañjāniṃsūti.

Andhavaneti evaṃnāmake vane. Taṃ kira vanaṃ dvinnam buddhānaṃ kāle avijahitaṇaṃ andhavanaṃtveva paññāyati. Tatrāyaṃ paññattivibhāvanā – appāyukabuddhānañhi sarīradhātu na ekagghanā hoti. Adhiṭṭhānānubhāvena vippakiriyati. Teneva amhākampi bhagavā, – “ahaṃ na ciraṭṭhitiko, appakehi sattehi ahaṃ diṭṭho, yehi na diṭṭho, teva bahutarā, te me dhātuyo ādāya tattha tattha pūjentā saggaparāyaṇā bhavissanti”ti parinibbānakāle, “attano sarīraṃ vippakiriyatū”ti adhiṭṭhāsi. Dīghāyukabuddhānaṃ pana suvaṇṇakkhandho viya ekagghanam dhātusarīraṃ tiṭṭhati.

Kassapassāpi bhagavato tatheva aṭṭhāsi. Tato mahājanā sannipatitvā, “dhātuyo ekagghanā na sakkā viyojetuṃ, kiṃ karissāma”ti sammantayitvā ekagghanameva cetiyaṃ karissāma, kittakaṃ pana hotu tanti āhaṃsu. Eke sattayojaniyanti āhaṃsu. Etaṃ atimahantaṃ, anāgate jaggituṃ na sakkā, chayojanaṃ hotu, pañcayojanaṃ... catuyojanaṃ... tiyojanaṃ... dviyojanaṃ... ekayojanaṃ hotūti sannitṭhānaṃ katvā iṭṭhakā kīdisā hontūti bāhirante iṭṭhakā rattasuvaṇṇamayā ekagghanā satahassagghanikā hontu, abhantarimante paññāsahasagghanikā. Haritālamānosilāhi mattikākiccaṃ kayiratu, telena udakakiccanti niṭṭhaṃ gantvā cattārī mukhāni catudhā vibhajiṃsu. Rājā ekaṃ mukhaṃ gaṇhi, rājaputto pathavindarakumāro ekaṃ, amaccānaṃ jeṭṭhako hutvā senāpati ekaṃ, janapadānaṃ jeṭṭhako hutvā seṭṭhi ekaṃ.

Tattha dhanasampannatāya rājāpi suvaṇṇam nīharāpetvā attanā gahitamukhe kammaṃ ārabhi, uparājāpi, senāpatipi. Seṭṭhinā gahitamukhe pana kammaṃ olīyati. Tato yasorato nāma eko upāsako tepiṭako bhāṇako anāgāmī ariyasāvako, so kammaṃ olīyatīti ṇatvā pañca sakaṭasatāni yojāpetvā janapadaṃ gantvā “kassapasammāsambuddho vīsativassasahassāni ṭhatvā parinibbuto. Tassa yojanikaṃ ratanacetiyaṃ kayirati, yo yaṃ dātuṃ ussahati suvaṇṇam vā hiraññaṃ vā sattaratanaṃ vā haritālam vā manosilaṃ vā, so taṃ detū”ti

samādapesi. Manussā attano attano thāmena hiraññasuvaṇṇādīni adamsu. Asakkontā telataṇḍulādīni dentiyeva. Upāsako telataṇḍulādīni kammakārānaṃ bhattavetanatthaṃ pahiṇāti, avasesehi suvaṇṇaṃ cetāpetvā pahiṇāti, evaṃ sakalajambudīpaṃ acari.

Cetiye kammaṃ niṭṭhitanti cetiyatṭhānato paṇṇaṃ pahiṇiṃsu – “niṭṭhitam kammaṃ ācariyo āgantvā cetiyam vandatū”ti. Sopi paṇṇaṃ pahiṇi – “mayā sakalajambudīpo samādapito, yaṃ atthi, taṃ gahetvā kammaṃ niṭṭhāpentū”ti. Dvepi paṇṇāni antarāmagge samāgamimṃsu. Ācariyassa paṇṇato pana cetiyatṭhānato paṇṇaṃ paṭhamataraṃ ācariyassa hatthaṃ agamāsi. So paṇṇaṃ vācetvā cetiyam vandissāmīti ekakova nikkhami. Antarāmagge aṭaviyaṃ pañca corasatāni utṭhahimṃsu. Tatrekacce taṃ disvā iminā sakalajambudīpato hiraññasuvaṇṇaṃ sampiṇḍitaṃ, nidhikumbhī no pavaṭṭamānā āgatāti avasesānaṃ ārocetvā taṃ aggahesum. Kasmā tātā, maṃ gaṇhathāti? Tayā sakalajambudīpato sabbaṃ hiraññasuvaṇṇaṃ sampiṇḍitaṃ, amhākampi thokaṃ thokaṃ dehīti. Kiṃ tumhe na jānātha, kassapo bhagavā parinibbuto, tassa yojanikaṃ ratanacetiyam kayirati, tadatthāya mayā samādapitaṃ, no attano atthāya. Taṃ taṃ laddhaladdhatṭhānato tattheva pesitaṃ, mayhaṃ pana nivatthasāṭakamattaṃ ṭhapetvā aññaṃ vittaṃ kākaṇikampi natthīti.

Eke, “evametaṃ vissajetha ācariya”nti āhamsu. Eke, “ayaṃ rājavūjito amaccapūjito, amhesu kañcideva nagaravīthiyaṃ disvā rājarājamahāmattādīnaṃ ārocetvā anayavyasanaṃ pāpuṇāpeyyā”ti āhamsu. Upāsako, “tātā, nāhaṃ evaṃ karissāmī”ti āha. Tañca kho tesu kāruññaena, na attano jīvitānikantiyā. Atha tesu gahetabbo vissajjetabboti vivadantesu gahetabboti laddhikā eva bahutarā hutvā jīvitā voropayimṃsu.

Tesaṃ balavaguṇe ariyasāvake aparādheṇa nibbutadīpasikhā viya akkhīni antaradhāyimṃsu. Te, “kahaṃ bho cakkhu, kahaṃ bho cakkhū”ti vipalapanā ekacce nītakehi gehaṃ nītā. Ekacce noñatakā anāthāti tattheva aṭaviyaṃ rukkhamaṇe paṇṇasālāyaṃ vasiṃsu. Aṭaviṃ āgatamanussā kāruññaena tesaṃ taṇḍulaṃ vā puṭabhataṃ vā paribbayaṃ vā denti. Dārūpaṇṇādīnaṃ atthāya gantvā āgatā manussā kuhiṃ gatathāti vutte andhavanaṃ gatamhāti vadanti. Evaṃ dvinnampi buddhānaṃ kāle taṃ vanaṃ andhavanaṃtveva paññāyati. Kassapabuddhakāle panetaṃ chaḍḍitajanapade aṭavi ahoṣi. Amhākaṃ bhagavato kāle sāvattihīya avidūre jetavanassa piṭṭhibhāge pavivekakāmānaṃ kulaputtānaṃ vasanaṭṭhānaṃ padhānagharaṃ ahoṣi, tattha āyasmā kumārakassapo tena samayena sekhapāṭipadaṃ pūrayamāno viharati. Tena vuttaṃ “andhavane viharatī”ti.

Aññatarā devatāti nāmagottavasena apākaṭā ekā devatāti attho. “Abhijānāti no, bhante, bhagavā ahuññātaññatarassa mahesakkhassa saṃkhittena taṇhāsāṅkhayavimuttiṃ bhāsītā”ti (ma. ni. 1.365) ettha pana abhiññāto sakkopi devarājā aññataroti vutto. **Devatāti** ca idaṃ devānampi devadhītānampi sādharāṇavacanaṃ. Imasmim panatthe devo adhippeto. **Abhikkantāya rattiyāti** ettha abhikkantasaddo khayasundarābhirūpaabbhanumodanādīsu dissati. Tattha – “abhikkantā, bhante, ratti, nikkhanto paṭhamo yāmo, ciranisīno bhikkhusaṅgho, uddisatu, bhante, bhagavā bhikkhūnaṃ pātimokkha”nti evamādīsu (a. ni. 8.20) khaye dissati. “Ayaṃ imesaṃ catunnaṃ puggalānaṃ abhikkantataro ca paṇītataro cā”ti (a. ni. 4.100) evamādīsu sundare.

“Ko me vandati pādāni, iddhiyā yasasā jalaṃ;
Abhikkantena vaṇṇena, sabbā obhāsayaṃ disā”ti. (vi. va. 857) –

Evamādīsu abhirūpe. “Abhikkantaṃ, bho gotamā”ti evamādīsu (pārā. 15) abbhanumodane. Idha pana khaye. Tena **abhikkantāya rattiyāti** parikkhīṇāya rattiyāti vuttaṃ hoti. Tatthāyaṃ devaputto majjhimayāmasamanantare āgatoti veditabbo. **Abhikkantavaṇṇāti** idha abhikkantasaddo abhirūpe. Vaṇṇasaddo pana chavi-thuti-kulavaggakāraṇa-saṅghānapamāṇarūpāyatanādīsu dissati. Tattha, “suvaṇṇavaṇṇosi bhagavā”ti evamādīsu chaviyā. “Kadā saññūḷhā pana te gahapati samaṇassa gotamassa vaṇṇā”ti (ma. ni. 2.77) evamādīsu thutiyā. “Cattārome, bho gotama, vaṇṇā”ti evamādīsu (dī. ni. 3.115) kulavagge. “Atha kena nu vaṇṇena, gandhathenoti vuccatī”ti evamādīsu (saṃ. ni. 1.234) kāraṇe. “Mahantaṃ hatthirājavaṇṇaṃ abhinimminivā”ti evamādīsu (saṃ. ni. 1.138) saṅghāne. “Tayo pattassa vaṇṇā”ti evamādīsu (pārā. 602) pamāṇe. “Vaṇṇo gandho raso oḷā”ti evamādīsu rūpāyatane. So idha chaviyaṃ daṭṭhabbo. Tena **abhikkantavaṇṇāti** abhirūpachaviyāṭṭhavaṇṇā, manāpavaṇṇāti vuttaṃ hoti. Devatā hi manussalokaṃ āgacchamānā pakativaṇṇaṃ pakatiiddhiṃ pajahitvā oḷārikaṃ attabhāvaṃ katvā atirekavaṇṇaṃ atirekaiddhiṃ māpetvā naṭasamajjādīni gacchantā manussā viya abhisāṅkhatena kāyena āgacchanti. Ayampi devaputto tattheva āgato. Tena vuttaṃ “abhikkantavaṇṇā”ti.

Kevalakappanti ettha kevalasaddo anavasesa-yebhūyya-abyāmissānati rekadaḷhattha-visaṃyogādi anekattho. Tathā hissa, “kevalaparipuṇṇaṃ parisuddhaṃ brahmacariya”nti (pārā. 1) evamādīsu anavasesattamattho. “Kevalakappā ca aṅgamagadhā pahūtaṃ khādanīyaṃ bhojanīyaṃ ādāya upasaṅkamissanti”ti evamādīsu yebhuyyatā. “Kevalassa dukkhakkhandhassa samudayo hotī”ti (vibha. 225) evamādīsu abyāmissatā. “Kevalaṃ saddhāmattakaṃ nūna ayamāyasmā”ti (mahāva. 244) evamādīsu anati rekātā. “Āyasmato anuruddhassa bāhiyo nāma saddhivihāriko kevalakappaṃ saṅghabhedāya ṭhito”ti (a. ni. 4.243) evamādīsu daḷhatthātā. “Kevalī vusitavā uttamapurisoti vuccati”ti (saṃ. ni. 3.57) evamādīsu visaṃyogo. Idha panassa anavasesattamatthoti adhippeto.

Kappasaddo panāyaṃ abhisaddahana-vohāra-kāla-paññatti-chedana-vikappa-lesa-samantabhāvādi anekattho. Tathā hissa, “okappaniyametaṃ bhoto gotamassa, yathā taṃ arahato sammāsambuddhassā”ti (ma. ni. 1.387) evamādīsu abhisaddahanamattho. “Anujānāmi, bhikkhave, pañcahi samaṇakappehi phalaṃ paribhuñjitu”nti (cūḷava. 250) evamādīsu vohāro. “Yena sudaṃ niccakappaṃ viharāmī”ti evamādīsu (ma. ni. 1.387) kālo. “Iccāyasmā kappo”ti (saṃ. ni. 3.124) evamādīsu paññatti. “Alaṅkatā kappitakesamassū”ti (saṃ. ni. 4.365) evamādīsu chedanaṃ. “Kappati dvaṅgulakappo”ti (cūḷava. 446) evamādīsu vikappo. “Atthi kappo nipajjitu”nti (a. ni. 8.80) evamādīsu lesa. “Kevalakappaṃ veḷuvanaṃ obhāsetvā”ti (saṃ. ni. 1.94) evamādīsu samantabhāvo. Idha panassa samantabhāvo attho adhippeto. Tasmā **kevalakappaṃ andhavananti** ettha anavasesaṃ samantato andhavananti evamattho daṭṭhabbo.

Obhāsetvāti vatthālanākārasarīrasamuṭṭhitāya ābhāya pharivā, candimā viya ca sūriyo viya ca ekobhāsaṃ ekapajjotaṃ karitvāti attho. **Ekamantaṃ aṭṭhāsīti** ekasmiṃ ante, ekasmiṃ okāse aṭṭhāsī. **Etadavocāti** etaṃ “bhikkhu bhikkhū”ti ādivacanamavoca. Kasmā panāyaṃ avanditvā samaṇavohāreneva kathetīti? Samaṇasaññāsamudācāreneva. Evaṃ kirassa ahoṣi – “ayaṃ antarā kāmāvacare vasi. Ahaṃ pana asmi tato kālato paṭṭhāya brahmacārī”ti samaṇasaññāvassa samudācarati, tasmā avanditvā samaṇavohāreneva katheti. Pubbasahāyo kireso devaputto therassa. Kuto paṭṭhāyāti? Kassapasammāsambuddhakālato paṭṭhāya. Yo hi pubbayoge āgatesu pañcasu sahāyesu anuthero catutthadvise anāgāmī ahoṣīti vutto, ayaṃ so. Tadā kira tesu saṅghattherassa arahatteneva saddhiṃ abhiññā āgamīsu. So, “mayhaṃ kiccaṃ matthakaṃ patta”nti vehāsaṃ uppattivā anottattadahe mukhaṃ dhovivā uttarakuruto piṇḍapātaṃ ādāya āgantvā, “imaṃ, āvuso, piṇḍapātaṃ bhūñjitvā appamattā samaṇadhammaṃ karoṭhā”ti āha. Itare āhaṃsu – “na, āvuso, amhākaṃ evaṃ katikā atthi – ‘yo paṭṭhamāṃ visesaṃ nibbattetvā piṇḍapātaṃ āharati, tenābhatāṃ bhūñjitvā sesehi samaṇadhammo kātabbo”ti. Tumhe attano upanissayena kiccaṃ matthakaṃ pāpayittha. Mayampi sace no upanissayo bhavissati, kiccaṃ matthakaṃ pāpessāma. Papañco esa amhākaṃ, gacchatha tumhe”ti. So yathāphāsukaṃ gantvā āyupariyosāne parinibbāyi.

Punadvise anuthero anāgāmiphalaṃ sacchakāsi, tassa abhiññāyo āgamīsu. Sopi tatheva piṇḍapātaṃ āharitvā tehi paṭikkhitto yathāphāsukaṃ gantvā āyupariyosāne suddhāvāse nibbatti. So suddhāvāse ṭhatvā te sahāye olokento, eko tadāva parinibbuto, eko adhunā bhagavato santike ariyabhūmiṃ patto, eko lābhasakkāraṃ nissāya, “ahaṃ arahā”ti cittaṃ uppādetvā supparakapaṭṭane vasatīti disvā taṃ upasaṅkamitvā, “na tvam arahā, na arahattamaggaṃ paṭipanno, gaccha bhagavantaṃ upasaṅkamitvā dhammaṃ suñāhī”ti uyyojesi. Sopi antaraghare bhagavantaṃ ovādaṃ yācitvā, “tasmā tiha te bāhiya evaṃ sikkhitabbaṃ diṭṭhe diṭṭhamattaṃ hotū”ti (udā. 10) bhagavatā saṃkhittena ovadito ariyabhūmiṃ sampāpuṇi.

Tato añño eko atthi, so kuhinti olokento andhavane sekkhapaṭipadaṃ pūrayamāno viharatīti disvā cintesi – “sahāyakassa santike gamissāmīti, gacchantena pana tucchahatthena agantvā kiñci paṇṇākāraṃ gahetvā gantuṃ vaṭṭati, sahāyo kho pana me nirāmisso pabbatamatthake vasanto mayā ākāse ṭhatvā dinnāṃ piṇḍapātampi aparibhuñjitvā samaṇadhammaṃ akāsi, idāni āmisapaṇṇākāraṃ kiṃ gaṇhissati? Dhammapaṇṇākāraṃ gahetvā gamissāmī”ti brahmaloke ṭhitova ratanāvaḷiṃ ganthento viya pannarasa pañhe vibhajitvā taṃ dhammapaṇṇākāraṃ ādāya āgantvā sahāyassa avidūre ṭhatvā attano samaṇasaññāsamudācāravasena taṃ anabhivādetvā, “bhikkhu bhikkhū”ti ālapitvā **ayaṃ vammikoti** ādimāha. Tattha turitālanavasena bhikkhu bhikkhūti āmedītaṃ vedītabbaṃ. Yathā vā ekaneva tilakena nalātaṃ na sobhati, taṃ parivāretvā aññesuṃ dīnesu phullitamaṇḍitaṃ viya sobhati, evaṃ ekaneva padena vacanaṃ na sobhati, parivārikapadena saddhiṃ phullitamaṇḍitaṃ viya sobhatīti taṃ parivārikapadavasena vacanaṃ phullitamaṇḍitaṃ viya karontopi evamāha.

Ayaṃ vammikoti purato ʘhito vammiko nāma natthi, desanāvasena pana purato ʘhitaṃ dassento viya **ayaṃti** āha. **Laṅginti** satthaṃ ādāya khaṇanto palighaṃ addasa. **Ukkhipa laṅgiṃ abhikkhaṇa sumedhāti** tāta, paṇḍita, laṅgī nāma rattiṃ dhūmayati divā pajjalati. Ukkhipeta paraṃ parato khaṇāti. Evaṃ sabbapadesu attho daṭṭhabbo. **Uddhumāyikanti** maṇḍūkama. **Caṅkavāraṃti** khāraparissāvanaṃ. **Kummanti** kacchapaṃ. **Asisūnanti** maṃsacchedakaṃ asiñceva adhikuṭṭanañca. **Maṃsapesinti** nisadapotappamāṇaṃ allamaṃsapinḍaṃ. **Nāganti** sumanapupphakalāpasadisama mahāphaṇaṃ tividhasovatthikaparikkhitaṃ ahināgaṃ addasa. **Mā nāgaṃ ghaṭṭesīti** daṇḍakakoṭiyā vā vallikoṭiyā vā paṃsucunṇaṃ vā pana khipamāno mā nāgaṃ ghaṭṭayī. **Namo karohi nāgassāti** uparivātato apagama suddhavatthaṃ nivāsetvā nāgassa namakkāraṃ karohi. Nāgena adhisayitaṃ dhaṇaṃ nāma yāva sattamā kulaparivaṭṭā khādato na khīyati, nāgo te adhisayitaṃ dhaṇaṃ dassati, tasmā namo karohi nāgassāti. **Iti vā pana sutvāti** yathā dukkhakkhandhe itoti sāsane nissakaṃ, na tathā idha. Idha pana devaputte nissakkaṃ, tasmā **iti vā panāti** mama vā pana santikā sutvāti ayamettha attho.

251. Cātumahābhūtikassāti catumahābhūtamayassa. **Kāyassetama** adhivacananti sarīrassa nāmaṃ. Yatheva hi bāhirako vammiko, vamatīti vantakoti vantussayoti vantasinehasambandhoti catūhi kāraṇehi **vammikoti** vuccati. So hi ahimaṅgusaundūragharagoḷikādayo nānappaḱāre pāṇake vamatīti vammiko. Upacikāhi vantakoti vammiko. Upacikāhi vamtivā mukhatuṇḍakena ukkhittapaṃsucunṇena kaṭippamāṇenapi porisappamāṇenapi ussitoti vammiko. Upacikāhi vantakheḷasinehena ābaddhatāya sattasattāhaṃ deve vassantepi na vippakiriyati, nidāghepi tato paṃsumuṭṭhiṃ gahetvā tasmīṃ muṭṭhinā pīliyamāne sineho nikkhamati, evaṃ vantasinehena sambaddhoti vammiko. Evamayama kāyopi, “akkhimhā akkhigūṭhako”tiādinaṃ nayena nānappaḱāraḱaṃ asucikalimalama vamatīti vammiko. Buddhapaccekaḱabuddhakhīṇāsavā imasmiṃ attabhāve nikantipariyādānena attabhāvaṃ chaḱḱetvā gatāti ariyehi vantakoti vammiko. Yehi cāyama tīhi aṭṭhisatehi ussito nhārusambaddho maṃsāvālepano allacammaḱariyonaddho chavirañjito satte vañceti, taṃ sabbaṃ ariyehi vantamevāti vantussayoti vammiko. “Taṇhā janeti purisama, cittamassa vidhāvati”ti (saṃ. ni. 1.55) evaṃ taṇhāya janitattā ariyehi vanteneva taṇhāsinehena sambaddho ayanti vantasinehena sambaddhotipi vammiko. Yathā ca vammikassa anto nānappaḱāraḱā pāṇakā tattheva jāyanti, uccārapassāvaṃ karonti, gilānā sayanti, matā patanti. Iti so tesama sūtiḱharaṃ vaccakuṭi gilānasālā susānañca hoti. Evaṃ khattiyamahāsālādīnampi kāyo ayama gopitarakkhito maṇḱitappasādhitō mahānubhāvānaṃ kāyoti acintetvā chavinissitā pāṇā cammanissitā pāṇā maṃsanissitā pāṇā nhārunissitā pāṇā aṭṭhinissitā pāṇā aṭṭhimīṇjanissitā pāṇāti evaṃ kulagaṇānāya asītimattāni kimikulasahassāni antokāyasmīyeva jāyanti, uccārapassāvaṃ karonti, gelaññena āturitāni sayanti, matāni patanti, iti ayampi tesama pāṇānaṃ sūtiḱharaṃ vaccakuṭi gilānasālā susānañca hotīti “vammiko” tveva saṅkhaṃ gato. Tenāha bhagavā – “vammikoti kho, bhikkhu, imassa cātumahābhūtikassa kāyassetama adhivacana”nti.

Mātāpettikasambhavassāti mātito ca pitito ca nibbattena mātāpettikena sukkasoṇitena sambhūtaṃ. **Odanakummāsūpacayassāti** odanena ceva kummāsena ca upacitassa vaḱḱhitassa. **Aniccucchādanaparimaddanabhedanavidhamaṃsanadhammassāti** ettha ayama kāyo hutvā abhāvattḱhena **aniccadhammo**. Duggandhaviḱhātthāya tanuvilepanena **ucchādanadhammo**. Aṅgapaccāṅgābhādhavinodanattḱhāya khuddakasambāhanena **parimaddanadhammo**. Daharakāle vā ūrūsu sayāpetvā gabbhavāsena dussaṅṭhitānaṃ tesama tesama aṅgānaṃ saṅṭhānasampādanattḱhama aṅchanapīḱanādivasena parimaddanadhammo. Evaṃ pariharatopi ca bhedanavidhamaṃsanadhammo bhijjati ceva vikirati ca, evaṃ sabhāvoti attho. Tattha mātāpettikasambhavaodanakummāsūpacayaucchādanaparimaddanapadehi samudayo kathito, aniccabhedavidhamaṃsanapadehi atthaṅgamo. Evaṃ sattahipi padehi cātumahābhūtikassa kāyassa uccāvacaḱbhāvo vaḱḱhiparihāni samudayatthaṅgamo kathitoti veditabbo.

Divā kammanteti divā kattabakammante. **Dhūmayanāti** ettha ayama dhūmasaddo kodhe taṇhāya vitakke pañcasu kāmaguṇesu dhammadesanāya pakatidhūmeti imesu atthesu vattati. “Kodho dhūmo bhasmanimosavajja”nti (saṃ. ni. 1.165) ettha hi kodhe vattati. “Iccādhūmayitā sattā”ti ettha taṇhāya. “Tena kho pana samayena aññataro bhikkhu bhagavato avidūre dhūmayanto nisinna hotī”ti ettha vitakke.

“Paṅko ca kāmā palipo ca kāmā,
Bhayañca metama timūlama pavuttaṃ;
Rajo ca dhūmo ca mayā pakāsītā;

Hitvā tuvaṃ pabbaja brahmadattā”ti. (jā. 1.6.14) –

Ettha pañcakāmaguṇesu. “Dhūmaṃ kattā hoti”ti (ma. ni. 1.349) ettha dhammadesanāya. “Dhajo rathassa paññāṇaṃ, dhūmo paññāṇamaggino”ti (saṃ. ni. 1.72) ettha pakatidhūme. Idha panāyaṃ vitakke adhippeto. Tenāha “ayaṃ rattiṃ dhūmayanā”ti.

Tathāgatassetam adhivacananti tathāgato hi sattannaṃ dhammānaṃ bāhitattā **brāhmaṇo** nāma.

Yathāha – “sattannaṃ kho, bhikkhu, dhammānaṃ bāhitattā brāhmaṇo. Katamesaṃ sattannaṃ? Rāgo bāhito hoti, doso... moho... māno... sakkāyadiṭṭhi... vicikicchā... sīlabbataparāmāso bāhito hoti. Imesaṃ bhikkhu sattannaṃ dhammānaṃ bāhitattā brāhmaṇo”ti (cūḷani. mettagūmaṇavapucchāniddeśa 28). **Sumedhoti** sundarapañño. **Sekkhassāti** ettha sikkhatīti sekkho. Yathāha – “sikkhatīti kho, bhikkhu, tasmā sekkhoti vuccati. Kiñca sikkhati? Adhisīlampi sikkhati, adhicitampi sikkhati, adhipaññampi sikkhatī”ti (a. ni. 3.86).

Paññāya adhivacananti lokiyalokuttarāya paññāya etaṃ adhivacanaṃ, na āvudhasatthassa.

Vīriyārambhassāti kāyikacetasikavīriyassa. Taṃ paññāgatikameva hoti. Lokiyāya paññāya lokiyaṃ, lokuttarāya paññāya lokuttaraṃ. Ettha panāyaṃ atthadīpanā –

Eko kira jānapado brāhmaṇo pātova māṇavakehi saddhiṃ gāmato nikkhamma divasaṃ araññe mante vācetvā sāyaṃ gāmaṃ āgacchati. Antarāmagge ca eko vammiko atthi. So rattiṃ dhūmayati, divā pajjalati. Brāhmaṇo antevāsiṃ sumedhaṃ māṇavaṃ āha – “tāta, ayaṃ vammiko rattiṃ dhūmayati, divā pajjalati, vikāramassa passissāma, bhindivā naṃ cattāro koṭṭhāse katvā khipāhī”ti. So sādhiṭi kudālaṃ gahetvā samehi pādehi pathaviyaṃ patiṭṭhāya tathā akāsi. Tatra ācariyabrāhmaṇo viya bhagavā. Sumedhamāṇavako viya sekkho bhikkhu. Vammiko viya kāyo. “Tāta, ayaṃ vammiko rattiṃ dhūmayati, divā pajjalati, vikāramassa passissāma, bhindivā naṃ cattāro koṭṭhāse katvā khipāhī”ti brāhmaṇena vuttakālo viya, “bhikkhu cātumahābhūtikāṃ kāyaṃ cattāro koṭṭhāse katvā pariggaṇhāhī”ti bhagavatā vuttakālo. Tassa sādhiṭi kudālaṃ gahetvā tathākaraṇaṃ viya sekkhassa bhikkhuno, “yo vīsatiyā koṭṭhāsesu thaddhabhāvo, ayaṃ pathavīdhātu. Yo dvādasasu koṭṭhāsesu ābandhanabhāvo, ayaṃ āpodhātu. Yo catūsu koṭṭhāsesu paripācanabhāvo, ayaṃ tejodhātu. Yo chasu koṭṭhāsesu vitthambhanabhāvo, ayaṃ vāyodhātu”ti evaṃ catudhātuvavatthānavasena kāyapariggaho veditabbo.

Laṅgīti kho, bhikkhūti kasmā bhagavā avijjaṃ laṅgīti katvā dassesīti? Yathā hi nagarassa dvāraṃ pidhāya palighe yojite mahājanassa gamanaṃ pacchijjati, ye nagarassa anto, te antoyeva honti. Ye bahi, te bahiyeva. Evameva yassa ñāṇamukhe avijjālaṅgī patati, tassa nibbānasampāpakaṃ ñāṇagamanāṃ pacchijjati, tasmā avijjaṃ laṅgīti katvā dassesī. **Pajaha avijjanti** ettha kammaṭṭhānauggahaparipucchāvasena avijjāpahānaṃ kathitaṃ.

Uddhumāyikāti kho, bhikkhūti ettha **uddhumāyikamaṇḍūko** nāma no mahanto, nakhapiṭṭhippamāṇo hoti, purāṇapaṇṇantare vā gacchantare vā valliantare vā vasati. So daṇḍakoṭiyā vā vallikoṭiyā vā paṃsucunṇakena vā ghaṭṭito āyāmitvā mahanto parimaṇḍalo beluvapakappamāṇo hutvā cattāro pāde ākāśagate katvā pacchinnagamano hutvā amittavaṣaṃ yāti, kākakulādibhattameva hoti. Evameva ayaṃ kodho paṭhamaṃ uppajjanto cittāvilamattakova hoti. Tasmīṃ khaṇe aniggahito vaḍḍhitvā mukhavikulaṇaṃ pāpeti. Tadā aniggahito hanusañcopanaṃ pāpeti. Tadā aniggahito pharusavācānicchāraṇaṃ pāpeti. Tadā aniggahito disāvīlokanāṃ pāpeti. Tadā aniggahito ākaḍḍhanaparikaḍḍhanaṃ pāpeti. Tadā aniggahito paṇiṇā leḍḍudaṇḍasatthaparāmasanaṃ pāpeti. Tadā aniggahito daṇḍasatthābhiniṇipātaṃ pāpeti. Tadā aniggahito paraghātanampi attaghātanampi pāpeti. Vuttampi hetam – “yato ayaṃ kodho paraṃ ghātetvā attānaṃ ghātetī, ettāvatāyaṃ kodho paramussadagato hoti paramavepullappatto”ti. Tattha yathā uddhumāyikāya catūsu pādesu ākāśagatesu gamanaṃ pacchijjati, uddhumāyikā amittavaṣaṃ gantvā kākātibhattaṃ hoti, evameva kodhasamaṅgīpuggalo kammaṭṭhānaṃ gahetvā vaḍḍhetuṃ na sakkoti, amittavaṣaṃ yāti, sabbesaṃ mārānaṃ yathākāmakaraṇīyo hoti. Tenāha bhagavā – “uddhumāyikāti kho, bhikkhu, kodhūpāyāsassetam adhivacana”nti. Tattha balavappatto kodhova kodhūpāyāso. **Pajaha kodhūpāyāsanti** ettha paṭisaṅkhānappahānaṃ kathitaṃ.

Dvidhāpathoti ettha, yathā puriso sadhana sabhogo kantāraddhānamaggappaṭipanno dvedhāpathaṃ patvā, “iminā nu kho gantabbaṃ, iminā gantabba”nti nicchetuṃ asakkonto tattheva tiṭṭhati, atha naṃ corā

uṭṭhahitvā anayabyasanaṃ pāpenti, evameva kho mūlakammaṭṭhānaṃ gahetvā nisinno bhikkhu buddhādīsu kaṅkhāya uppannāya kammaṭṭhānaṃ vaḍḍhetuṃ na sakkoti, atha naṃ kilesamārādayo sabbe mārā anayabyasanaṃ pāpenti, iti vicikicchā dvedhāpathasamā hoti. Tenāha bhagavā – “dvidhāpathoti kho, bhikkhu, vicikicchāyetaṃ adhivacana”nti. **Pajaha vicikicchanti** ettha kammaṭṭhānaugghaparipucchāvasena vicikicchāpahānaṃ kathitaṃ.

Caṅgavāranti ettha, yathā rajakehi khāraparissāvanamhi uduke pakkhite eko udakaghaṭṭo dvepi dasapi vīsatiṃ ghaṭṭasatampi paggharatiyeva, pasaṭamattampi udakaṃ na tiṭṭhati, evameva nīvaraṇasamaṅgino puggalassa abbhantare kusaladhammo na tiṭṭhati. Tenāha bhagavā – “caṅgavāranti kho, bhikkhu, pañcannetaṃ nīvaraṇānaṃ adhivacana”nti. **Pajaha pañcanīvaraṇeti** ettha vikkhambhanatadaṅgavasena nīvaraṇappahānaṃ kathitaṃ.

Kummoti ettha, yathā kacchapassa cattāro pādā sīsanti pañceva aṅgāni honti, evameva sabbepi saṅkhatā dhammā gayhamānā pañceva khandhā bhavanti. Tenāha bhagavā – “kummoti kho, bhikkhu, pañcannetaṃ upādānakkhandhānaṃ adhivacana”nti. **Pajaha pañcupādānakkhandheti** ettha pañcasu khandhesu chandarāgappahānaṃ kathitaṃ.

Asisūnāti ettha, yathā sūnāya upari maṃsaṃ ṭhapetvā asinā koṭṭenti, evamime sattā vatthukāmatthāya kilesakāmehi ghātayamānā vatthukāmānaṃ upari katvā kilesakāmehi kantitā koṭṭitā ca honti. Tenāha bhagavā – “asisūnāti kho, bhikkhu, pañcannetaṃ kāmaguṇānaṃ adhivacana”nti. **Pajaha pañca kāmaguṇeti** ettha pañcasu kāmaguṇesu chandarāgappahānaṃ kathitaṃ.

Maṃsapesīti kho, bhikkhūti ettha ayaṃ maṃsapesi nāma bahujanapatthitā khattiyādayo manussāpi naṃ patthenti kākādayo tiracchānāpi. Ime hi sattā avijjāya sammattā nandirāgaṃ upagamma vaṭṭaṃ vaḍḍhenti. Yathā vā maṃsapesi ṭhapitaṭṭhapitaṭṭhāne laggati, evamime sattā nandirāgabaddhā vaṭṭe lagganti, dukkhaṃ patvāpi na ukkaṇṭhanti, iti nandirāgo maṃsapesisadisō hoti. Tenāha bhagavā – “maṃsapesīti kho, bhikkhu, nandirāgassetāṃ adhivacana”nti. **Pajaha nandirāganti** ettha catutthamaggena nandirāgappahānaṃ kathitaṃ.

Nāgoti kho, bhikkhu, khīṇāsavassetāṃ bhikkhuno adhivacananti ettha yenatthena khīṇāsavo nāgoti vuccati, so anaṅgaṇasutte (ma. ni. aṭṭha. 1.63) pakāsito eva. **Namo karohi nāgassāti** khīṇāsavassa buddhanāgassa, “buddho so bhagavā bodhāya dhammaṃ deseti, danto so bhagavā damathāya dhammaṃ deseti, santo so bhagavā samathāya dhammaṃ deseti, tiṇṇo so bhagavā taraṇāya dhammaṃ deseti, parinibbuto so bhagavā parinibbānāya dhammaṃ deseti”ti (ma. ni. 1.361) evaṃ namakkāraṃ karohīti ayamettha attho. Iti idaṃ suttaṃ therassa kammaṭṭhānaṃ ahoṣi. Theropi idameva suttaṃ kammaṭṭhānaṃ katvā vipassanaṃ vaḍḍhetvā arahattaṃ patto. **Ayametassa atthoti** ayaṃ etassa pañhassa attho. Iti bhagavā ratanarāsīmhi maṅkūṭaṃ gaṇhanto viya yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Vammikasuttavaṇṇanā niṭṭhitā.

4. Rathavinītasuttavaṇṇanā

252. Evaṃ me sutanti rathavinītasuttaṃ. Tattha **rājagaheti** evaṃnāmake nagare, tañhi mandhātumahāgovindādīhi pariggahitattā **rājagahanti** vuccati. Aññepettha pakāre vaṇṇayanti. Kiṃ tehi? Nāmametāṃ tassa nagarassa. Taṃ panetaṃ buddhakāle ca cakkavattikāle ca nagaraṃ hoti, sesakāle suññaṃ hoti yakkhapariggahitaṃ, tesāṃ vasantavanaṃ hutvā tiṭṭhati. **Veḷuvane kalandakanivāpeti veḷuvananti** tassa uyyānassa nāmaṃ, taṃ kira veḷūhi parikkhittaṃ ahoṣi aṭṭhārasahatthena ca pakārena, gopuraṭṭhalakayuttaṃ nīlobhāsaṃ manoramaṃ, tena **veḷuvananti** vuccati. Kalandakānañcetta nivāpaṃ adamsu, tena **kalandakanivāpoti** vuccati.

Pubbe kira aññataro rājā tattha uyyānakīḷanattaṃ āgato surāmadena matto divāseyyaṃ upagato supi. Parijanopissa, “sutto rājā”ti pupphaphalādīhi palobhiyamāno ito cito ca pakkāmi, atha surāgandhena aññatarasmā susirarukkā kaṅhasappo nikkhamitvā raññābhimukho āgacchati. Taṃ disvā rukkhadavatā,

“rañño jīvitam dammī”ti kālakavesena āgantvā kaṇṇamūle saddamakāsi. Rājā paṭibujjhi, kaṇhasappo nivatto. So taṃ disvā, “imāya mama jīvitam dinna”nti kālakanam tatha nivāpaṃ paṭṭhapesi, abhayaghosanañca ghosāpesi. Tasmā taṃ tato pabhuti **kalandakanivāpanti** saṅkhyam gatam. **Kalandakāti** kālakanam nāmaṃ.

Jātibhūmikāti jātibhūmivāsino. Tatha **jātibhūmīti** jātaṭṭhānaṃ. Taṃ kho panetaṃ neva kosalamahārājādīnaṃ na caṅkībrāhamaṇādīnaṃ na sakkasuyāmasantusitādīnaṃ na asīmahāsāvakaḍḍīnaṃ na aññesaṃ sattānaṃ jātaṭṭhānaṃ “jātibhūmī”ti vuccati. Yassa pana jātaḍḍivase dasasahassilokadhātu ekaddhajamālāvippakiṇṇakusumavāsacunṇagandhasugandhā sabbapāliphullamiva nandanavanam virocamaṇā paduminipaṇṇe udakabindu viya akampittha, jaccandhādīnañca rūpadassanādīni anekāni paṭihāriyāni pavattiṃsu, tassa sabbaññubodhisattassa jātaṭṭhānasākiyajanapado kapilavatthāhāro, sā “jātibhūmī”ti vuccati.

Dhammagarubhāvavaṇṇanā

Vassaṃvuṭṭhāti temāsaṃ vassaṃvuṭṭhā pavāritapavāraṇā hutvā. **Bhagavā etadavocāti** “kacci, bhikkhave, khamanīya”ntiādihi vacanehi āgantukapaṭisanthāraṃ katvā etaṃ, “ko nu kho, bhikkhave”tiādivacanavoca. Te kira bhikkhu, – “kacci, bhikkhave, khamanīyaṃ kacci yāpanīyaṃ, kaccittha appakilamathena addhānaṃ āgatā, na ca piṇḍakena kilamittha, kuto ca tumhe, bhikkhave, āgacchathā”ti paṭisanthāravasena pucchitā – “bhagavā sākiyajanapade kapilavatthāhārato jātibhūmito āgacchāmā”ti āhaṃsu. Atha bhagavā neva suddhodanamahārājassa, na sakkodanassa, na sukkodanassa, na dhotodanassa, na amitodanassa, na amittāya deviyā, na mahāpajāpatiyā, na sakalassa sākiyamaṇḍalassa ārogyaṃ pucchi. Atha kho attanā ca dasakathāvattulābhīṃ parañca tatha samādapetarāṃ paṭipattisampannaṃ bhikkhuṃ pucchanto idaṃ – “ko nu kho, bhikkhave”tiādivacanaṃ avoca.

Kasmā pana bhagavā suddhodanādīnaṃ ārogyaṃ apucchitvā evarūpaṃ bhikkhumeva pucchati? Piyatāya. Buddhānañhi paṭipannaḍḍā bhikkhū bhikkhuniyo upāsakā upāsikāyo ca piyā honti manāpā. Kiṃ kārāṇā? Dhammagarutāya. Dhammagaruno hi tathāgatā, so ca nesaṃ dhammagarubhāvo, “dukkhaṃ kho agāro viharati, appatisso”ti (a. ni. 4.21) iminā ajapālanigrodhamūle uppannajjhāsayaena veditabbo. Dhammagarutāyeva hi bhagavā mahākassapattherassa abhinikkhamanadivase paccuggamaṃ karonto tigāvutaṃ maggaṃ agamāsi. Atirekatiyojanasataṃ maggaṃ gantvā gaṅgātīre dhammaṃ desetvā mahākappinaṃ sapaṇisaṃ arahatte paṭiṭṭhapesi. Ekasmiṃ pacchābhatte pañcacattālīsajojanaṃ maggaṃ gantvā kumbhakarassa nivesane tiyāmarattiṃ dhammakathaṃ katvā pukkusātikulaputtaṃ anāgāmiphale paṭiṭṭhapesi. Vīsayojanasataṃ gantvā vanavāsīsamaṇerassa anuggahaṃ akāsi. Saṭṭhiyojanamaggaṃ gantvā khadiravanīyatttherassa dhammaṃ desesi. Anuruddhatthero pācīnavaṃsadāye nisīno mahāpurisavitakkaṃ vitakketīti ñatvā tatha ākāseṇa gantvā therassa purato oruyha sādhuḍḍāmadāsi. Koṭṭikāṇṇasoṇatttherassa ekagandhakuṭiyāṃ senāsanaṃ paññāpāpetvā paccūsakāle dhammadesanaṃ ajjhessitvā sarabhaññāpariyosāne sādhuḍḍāmadāsi. Tigāvutaṃ maggaṃ gantvā tiṇṇaṃ kulaputtānaṃ vasanaṭṭhāne gosīṅgasālavane sāmaggirasānisamaṃ kathesi. Kassapopi bhagavā – “anāgāmiphale paṭiṭṭhito ariyasāvako aya”nti vissāsaṃ uppādetvā ghaṭikārassa kumbhakarassa nivesanaṃ gantvā sahatthā āmisam gahetvā paribhuñji.

Amhākaṃyeva bhagavā upakaṭṭhāya vassūpanāyikāya jetavanato bhikkhusaṅghaparivuto cārikaṃ nikkhami. Kosalamahārājaanāthapiṇḍikādayo nivattetuṃ nāsakkhiṃsu. Anāthapiṇḍiko gharaṃ āgantvā domanassappatto nisīdi. Atha naṃ puṇṇā nāma dāsī domanassappattosi sāmīti āha. “Āma je, sathhāraṃ nivattetuṃ nāsakkhiṃ, atha me imaṃ temāsaṃ dhammaṃ vā sotuṃ, yathādhīpāyaṃ vā dānaṃ dātuṃ na labhissāmī”ti cintā uppannāti. Ahampi sāmī sathhāraṃ nivattessāmīti. Sace nivattetuṃ sakkosi, bhujissāyeva tvanti. Sā gantvā dasabalassa pādāmūle nipajjitvā “nivattatha bhagavā”ti āha. Puṇṇe tvam parapaṭibaddhājivikā kiṃ me karissasīti. Bhagavā mayhaṃ deyyadhammo natthīti tumhepi jānātha, tumhākaṃ nivattanapaccayā panāhaṃ tīsu saraṇesu pañcasu sīlesu paṭiṭṭhahissāmīti. Bhagavā sādhu sādhu puṇṇeti sādhuḍḍāmadāsi katvā nivattetvā jetavanameva pavattho. Ayaṃ kathā pākāṭā ahoṣi. Seṭṭhi sutvā puṇṇāya kira bhagavā nivattitoti taṃ bhujissaṃ katvā dhītuṭṭhāne ṭhapesi. Sā pabbajjaṃ yācitvā pabbaji, pabbajitvā vipassanaṃ ārabhi. Athassā sathhā āradhaviPASSAKabhāvaṃ ñatvā imaṃ obhāsagāthaṃ vissajjesi –

“Puṇṇe pūresi saddhammaṃ, cando pannaraso yathā;
Paripuṇṇāya paññāya, dukkhassantaṃ karissasī”ti. (therīgā. 3);

Gāthāpariyosāne arahattaṃ patvā abhiññātā sāvīkā ahoṣīti. Evaṃ dhammagaruno tathāgatā.

Nandakatthere upaṭṭhānasālāyaṃ dhammaṃ desentepe bhagavā anahātova gantvā tiyāmarattiṃ ʘhitakova dhammakathaṃ sutvā desanāpariyosāne sādhuḱāramadāsī. Thero āgantvā vanditvā, “kāya velāya, bhante, āgatattā”ti pucchi. Tayā suttante āradhamatteti. Dukkaṃ karittha, bhante, buddhasukhumālā tumheti. Sace tvam, nanda, kappam desetuṃ sakkuṇeyyāsī, kappamattampāham ʘhitakova suṇeyyanti bhagavā avoca. Evaṃ dhammagaruno tathāgatā. Tesam dhammagarutāya paṭipannakā piyā honti, tasmā paṭipannake pucchi. Paṭipannako ca nāma attahitāya paṭipanno no parahitāya, parahitāya paṭipanno no attahitāya, no attahitāya ca paṭipanno no parahitāya ca, attahitāya ca paṭipanno parahitāya cāti catubbidho hoti.

Tattha yo sayam dasannaṃ kathāvatthūnaṃ lābhī hoti, param tattha na ovadati na anusāsati āyasmā bākulo viya. Ayam attahitāya paṭipanno nāma no parahitāya paṭipanno, evarūpaṃ bhikkhuṃ bhagavā na pucchati. Kasmā? Na mayham sāsanaṃ vadḍhipakkhe ʘhitoti.

Yo pana dasannaṃ kathāvatthūnaṃ alābhī, param tehi ovadati tena katavattasādiyanattham upanando sakyaputto viya, ayam parahitāya paṭipanno nāma no attahitāya, evarūpampi na pucchati. Kasmā? Assa taṇhā mahāpacchi viya appahīnāti.

Yo attanāpi dasannaṃ kathāvatthūnaṃ alābhī, parampi tehi na ovadati, lāḷudāyī viya, ayam neva attahitāya paṭipanno na parahitāya, evarūpampi na pucchati. Kasmā? Assa anto kilesā pharasucchejjā viya mahantāti.

Yo pana sayam dasannaṃ kathāvatthūnaṃ lābhī, parampi tehi ovadati, ayam attahitāya ceva parahitāya ca paṭipanno nāma sārīputtamoggallānamahākassapādayo asītimahātherā viya, evarūpaṃ bhikkhuṃ pucchati. Kasmā? Mayham sāsanaṃ vadḍhipakkhe ʘhitoti. Idhāpi evarūpameva pucchanto – “ko nu kho, bhikkhave”tiādimāha.

Evaṃ bhagavatā puṭṭhānaṃ pana tesam bhikkhūnaṃ bhagavā attano jātibhūmiyam ubhayahitāya paṭipannaṃ dasakathāvatthulābhim bhikkhuṃ pucchati, ko nu kho tattha evarūpoti na aññamaññaṃ cintanā vā samantanā vā ahoṣī. Kasmā? Āyasmā hi mantāṇiputto tasmim janapade ākāsamajje ʘhito cando viya sūriyo viya ca pākaṭo paññāto. Tasmā te bhikkhū meghasaddam sutvā ekajjham sannipatītamoraghaṭā viya ghanasajjhāyam kātuṃ, āradhabhikkhū viya ca attano ācariyam puṇṇattheram bhagavato ārocentā therassa ca guṇam bhāsituṃ appahontehi mukhehi ekappahāreneva **puṇṇo nāma, bhante, āyasmātiādimāhaṃsu**. Tattha **puṇṇoti** tassa therassa nāmaṃ. Mantāṇiyā pana so putto, tasmā **mantāṇiputtoti** vuccati. **Sambhāvitoti** guṇasambhāvanāya sambhāvito.

Appicchatādivaṇṇanā

Appicchoti icchāvirahito niiccho nittaṇho. Ettha hi byañjanaṃ sāvasesam viya, attho pana niravaseso. Na hi tassa anto aṇumattāpi pāpikā icchā nāma atthi. Khīṇāsavo hesa sabbaso pahīnataṇho. Apicettha atricchatā pāpicchatā mahicchatā appicchatāti ayam bhedo veditabbo.

Tattha sakalābhe atittassa paralābhe patthanā **atricchatā** nāma. Tāya samannāgatassa ekabhājena pakkapūvopi attano patte patito na supakko viya khuddako viya ca khāyati. Sveva parassa patte pakkhitto supakko viya mahanto viya ca khāyati. Asantaguṇasambhāvanatā pana paṭiggahaṇe ca amattaññūtā **pāpicchatā** nāma, sā, “idhekacco assaddho samāno saddhoti maṃ jano jānātū”tiādinā nayena abhidhamme āgatāyeva, tāya samannāgato puggalo kohaṇṇe patiṭṭhāti. Santaguṇasambhāvanā pana paṭiggahaṇe ca amattaññūtā **mahicchatā** nāma. Sāpi, “idhekacco saddho samāno saddhoti maṃ jano jānātūti icchati, silavā samāno silavāti maṃ jano jānātū”ti (vibha. 851) iminā nayena āgatāyeva, tāya samannāgato puggalo dussantappayo hoti, vijātamātipissa cittam ghetuṃ na sakkoti. Tenetaṃ vuccati –

“Aggikkhandho samuddo ca, mahiccho cāpi puggalo;
Sakaṭena paccayam detu, tayopete atappayā”ti.

Santagūṇanigūhanatā pana paṭiggahaṇe ca mattaññūtā **appicchatā** nāma, tāya samannāgato puggalo attani vijjamānampi guṇaṃ paṭicchādetukāmatāya, “saddho samāno saddhoti maṃ jano jānātūti na icchati. Sīlavā, pavivitto, bahussuto, āradhaviṛiyo, samādhisampanno, paññavā, khīṇāsavo samāno khīṇāsavoti maṃ jano jānātū”ti na icchati, seyyathāpi majjhantikathero.

Thero kira mahākhīṇāsavo ahosi, pattacīvaraṃ panassa pādamattameva agghati, so asokassa dhammarañño vihāramahadivase saṅghatthero ahosi. Athassa atilūkhabhāvaṃ disvā manussā, “bhante, thokaṃ bahi hothā”ti āhaṃsu. Thero, “mādise khīṇāsave rañño saṅghaṃ akaronte añño ko karissatī”ti pathaviyaṃ nimujjitvā saṅghattherassa ukkhittapiṇḍaṃ gaṇhantoyeva ummuji. Evaṃ khīṇāsavo samāno, “khīṇāsavoti maṃ jano jānātū”ti na icchati. Evaṃ appiccho pana bhikkhu anuppannaṃ lābhaṃ uppādeti, uppannaṃ lābhaṃ thāvaram karoti, dāyakānaṃ cittaṃ āradhēti, yathā yathā hi so attano appicchatāya appaṃ gaṇhāti, tathā tathā tassa vatte pasannā manussā bahū denti.

Aparopi catubbidho appiccho – paccayaappiccho dhutaṅgaappiccho pariyattiappiccho adhigamaappicchoti. Tattha catūsu paccayesu appiccho **paccayaappiccho** nāma, so dāyakassa vasaṃ jānāti, deyyadhammassa vasaṃ jānāti, attano thāmaṃ jānāti. Yadi hi deyyadhammo bahu hoti, dāyako appaṃ dātukāmo, dāyakassa vasena appaṃ gaṇhāti. Deyyadhammo appo, dāyako bahuṃ dātukāmo, deyyadhammassa vasena appaṃ gaṇhāti. Deyyadhammopi bahu, dāyakopi bahuṃ dātukāmo, attano thāmaṃ ñatvā pamāṇeneva gaṇhāti.

Dhutaṅgasamādānassa attani atthibhāvaṃ najānāpetukāmo **dhutaṅgaappiccho** nāma. Tassa vibhāvanatthaṃ imāni vatthūni – sosānikamahāsumanathero kira saṭṭhi vassāni susāne vasi, añño ekabhikkhupi na aññāsi, tenevāha –

“Susāne saṭṭhi vassāni, abbokiṇṇaṃ vasāmaṃ;
Dutiyo maṃ na jāneyya, aho sosānikuttamo”ti.

Cetiyaḥabbate dvebhātiyattherā vasiṃsu. Tesu kaniṭṭho upaṭṭhākena pesitā ucchukhaṇḍikā gahetvā jeṭṭhassa santikaṃ agamāsi. Paribhogaṃ, bhante, karothāti. Therassa ca bhattakiccaṃ katvā mukhaṃ vikkhālanakālo ahosi. So alaṃ, āvusoti āha. Kacci, bhante, ekāsanikatthāti. Āharāvuso, ucchukhaṇḍikāti paññāsa vassāni ekāsaniko samānopi dhutaṅgaṃ nigūhamāno paribhogaṃ katvā mukhaṃ vikkhāletvā puna dhutaṅgaṃ adhiṭṭhāya gato.

Yo pana saketakatissatthero viya bahussutabhāvaṃ jānāpetuṃ na icchati, ayaṃ **pariyattiappiccho** nāma. Thero kira khaṇo natthīti uddesaparipucchāsu okāsaṃ akaronto maraṇakkhayaṃ, bhante, labhissathāti codito gaṇaṃ vissajjetvā kaṇikāravālikasamuddavīhāraṃ gato. Tattha antovassaṃ theranavamaññimānaṃ upakāro hutvā mahāpavāraṇāya uposathadivase dhammakathāya janataṃ khobhetvā gato.

Yo pana sotāpannādīsu aññataro hutvā sotāpannādibhāvaṃ jānāpetuṃ na icchati, ayaṃ **adhigamaappiccho** nāma, tayo kulaputtā viya ghaṭikārakumbhakāro viya ca.

Āyasmā pana puṇṇo atricchatāṃ pāpicchatāṃ mahicchatañca pahāya sabbaso icchāpaṭipakkabhūtāya alobhasaṅkhātāya parisuddhāya appicchatāya samannāgatattā appiccho nāma ahosi. Bhikkhūnampi, “āvuso, atricchatā pāpicchatā mahicchatāti ime dhammā pahātabbā”ti tesu ādīnaṃ dassetvā evarūpaṃ appicchatāṃ samādāya vattitabbanti appicchakathaṃ kathesi. Tena vuttaṃ “attanā ca appiccho appicchakathañca bhikkhūnaṃ kattā”ti.

Dvādasavidhasantosavaṇṇanā

Idāni **attanā ca santuṭṭhoti**ādīsu visesatthameva dīpayissāma. Yojanā pana vuttanayeneva veditabbā. **Santuṭṭhoti** itarītarapaccayasantoseṇa samannāgato. So panesa santoso dvādasavidho hoti. Seyyathidaṃ, cīvare yathālabhasantoso yathābalasantoso yathasārappasantosoti tivīdho, evaṃ piṇḍapātādīsu. Tassāyaṃ pabhedasaṃvaṇṇanā.

Idha bhikkhu cīvaraṃ labhati sundaraṃ vā asundaraṃ vā. So teneva yāpeti aññaṃ na pattheti, labhantopi na gaṇhāti, ayamassa cīvare **yathālābhasantoso**. Atha yo pakatidubbalo vā hoti ābādhajarābhībhūto vā, garucīvaraṃ pārupanto kilamati, so sabhāgena bhikkhunā saddhiṃ taṃ parivattetvā lahukena yāpentopi santuṭṭhova hoti, ayamassa cīvare **yathābalasantoso**. Aparo paṇītapaccayaalābhī hoti, so paṭṭacīvarādīnaṃ aññataraṃ mahagghacīvaraṃ bahūni vā pana cīvarāni labhitvā idaṃ therānaṃ cirapabbajitānaṃ idaṃ bahussutānaṃ anurūpaṃ, idaṃ gilānānaṃ idaṃ appalābhānaṃ hotūti datvā tesam purāṇacīvaraṃ vā saṅkārakūṭāditto vā nantakāni uccinitvā tehi saṅghāṭiṃ katvā dhārentopi santuṭṭhova hoti, ayamassa cīvare **yathāsāruppasantoso**.

Idha pana bhikkhu piṇḍapātaṃ labhati lūkhaṃ vā paṇītaṃ vā, so teneva yāpeti, aññaṃ na pattheti, labhantopi na gaṇhāti, ayamassa piṇḍapāte **yathālābhasantoso**. Yo pana attano pakativiruddhaṃ vā byādhiviruddhaṃ vā piṇḍapātaṃ labhati, yenassa paribhuttena aphāsu hoti, so sabhāgassa bhikkhuno taṃ datvā tassa hatthato sappāyabhōjanaṃ bhuñjitvā samaṇadhammaṃ karontopi santuṭṭhova hoti, ayamassa piṇḍapāte **yathābalasantoso**. Aparo bahuṃ paṇītaṃ piṇḍapātaṃ labhati, so taṃ cīvaraṃ viya cirapabbajitabahussutaappalābhigilānānaṃ datvā tesam vā sesakaṃ piṇḍāya vā caritvā missakāhāraṃ bhuñjantopi santuṭṭhova hoti, ayamassa piṇḍapāte **yathāsāruppasantoso**.

Idha pana bhikkhu senāsanaṃ labhati manāpaṃ vā amanāpaṃ vā, so tena neva somanassaṃ na paṭighaṃ uppādeti, antamaso tiṇṣasanthārakenāpi yathālāddheneva tussati, ayamassa senāsane **yathālābhasantoso**. Yo pana attano pakativiruddhaṃ vā byādhiviruddhaṃ vā senāsanaṃ labhati, yathassa vasato aphāsu hoti, so taṃ sabhāgassa bhikkhuno datvā tassa santake sappāyaseṇāsane vasantopi santuṭṭhova hoti, ayamassa senāsane **yathābalasantoso**. Aparo mahāpuñño leṇamaṇḍapakūṭāgārādīni bahūni paṇītasenāsanaṃ labhati, so tāni cīvarādīni viya cirapabbajitabahussutaappalābhigilānānaṃ datvā yattha katthaci vasantopi santuṭṭhova hoti, ayamassa senāsane **yathāsāruppasantoso**. Yopi, “uttamasenāsanaṃ nāma pamādatṭhānaṃ, tattha nisinnassa thinamiddhaṃ okkamati, niddābhībhūtassa puna paṭibujjhato pāpavitakkā pātubhavanti”’ti paṭisañcikkhitvā tādisaṃ senāsanaṃ pattampi na sampaṭicchati, so taṃ paṭikkhipitvā abbhokāsarukkhamaṇḍādisu vasantopi santuṭṭhova hoti, ayampissa senāsane **yathāsāruppasantoso**.

Idha pana bhikkhu bhesajjaṃ labhati lūkhaṃ vā paṇītaṃ vā, so yaṃ labhati, teneva santussati, aññaṃ na pattheti, labhantopi na gaṇhāti, ayamassa gilānapaccaye **yathālābhasantoso**. Yo pana telena atthiko phāṇitaṃ labhati, so taṃ sabhāgassa bhikkhuno datvā tassa hatthato telam gahetvā aññadeva vā pariyesitvā tehi bhesajjaṃ karontopi santuṭṭhova hoti, ayamassa gilānapaccaye **yathābalasantoso**. Aparo mahāpuñño bahuṃ telamadhuphāṇitādipaṇītabhesajjaṃ labhati, so taṃ cīvaraṃ viya cirapabbajitabahussutaappalābhigilānānaṃ datvā tesam ābhatakena yena kenaci yāpentopi santuṭṭhova hoti. Yo pana ekasmim bhājane muttahaṛitakaṃ ṭhapetvā ekasmim catumadhuraṃ, “gaṇha, bhante, yadicchasi”’ti vuccamāno sacassa tesu aññatarenāpi rogo vūpasammati, atha muttahaṛitakaṃ nāma buddhādīhi vaṇṇitanti catumadhuraṃ paṭikkhipitvā muttahaṛitakeneva bhesajjaṃ karonto paramasantuṭṭhova hoti, ayamassa gilānapaccaye **yathāsāruppasantoso**.

Imesaṃ pana paccakaṃ paccayesu tiṇṇaṃ tiṇṇaṃ santosānaṃ yathāsāruppasantosova aggo. Āyasmā puṇṇo ekekasmim paccaye imehi tīhi santosehi santuṭṭho ahoṣi. **Santuṭṭhikathañcāti** bhikkhūnampi ca imaṃ santuṭṭhikathaṃ kattāva ahoṣi.

Tividhapavivekavaṇṇanā

Pavivittoti kāyapaviveko cittapaviveko upadhipavivekoti imehi tīhi pavivekehi samannāgato. Tattha eko gacchati, eko tiṭṭhati, eko nisīdati, eko seyyaṃ kappeti, eko gāmaṃ piṇḍāya pavisati, eko paṭikkamati, eko caṅkamamadhiṭṭhāti, eko carati, eko viharatīti ayaṃ **kāyapaviveko** nāma. Aṭṭha samāpattiyo pana **cittapaviveko** nāma. Nibbānaṃ **upadhipaviveko** nāma. Vuttampi hetam – “kāyapaviveko ca vivekatṭhakāyānaṃ nekkhammābhiraṇānaṃ. Cittapaviveko ca parisuddhacittānaṃ paramavodānappattānaṃ. Upadhipaviveko ca nirupadhīnaṃ puggalānaṃ visankhāragatāna”’nti (mahāni. 57). **Pavivekakathanti** bhikkhūnampi ca imaṃ pavivekakathaṃ kattā.

Pañcavidhasaṃsaggavaṇṇanā

Asamsaṭṭhoti pañcavidhena saṃsaggena virahito. Savanasaṃsaggo dassanasaṃsaggo samullapanasaṃsaggo sambhogasaṃsaggo kāyasaṃsaggoti pañcavidho saṃsaggo. Tesu idha bhikkhu suṇāti, “asukasmiṃ gāme vā nigame vā itthī vā kumārīkā vā abhirūpā dassanīyā pāsādikā paramāya vaṇṇapokkharatāya samannāgatā”ti. So taṃ sutvā saṃsīdati visīdati na sakkoti brahmacariyaṃ sandhāretuṃ, sikkhādubbalyaṃ anāvikatvā hīnāyāvattatīti evaṃ parehi vā kathīyamānaṃ rūpādisampattiṃ attanā vā hasitalapitagītasaddaṃ suṇantassa sotaviññāṇavīthivasena uppanno rāgo **savanasaṃsaggo** nāma. So anitthigandhapaccekabodhisattassa ca pañcaggaḷaṇavāsītissadahaṛassa ca vasena veditabbo –

Daharo kira ākāseṇa gacchanto girigāmaṃvāsikammāradhītāya pañcahi kumārīhi saddhiṃ padumasaraṃ gantvā nhatvā padumāni ca pilandhitvā madhurassareṇa gāyantīyā saddaṃ sutvā kāmarāgeṇa viddho visesā pariḥāyītvā anayabyasanaṃ pāpuṇi. Idha bhikkhu na heva kho suṇāti, apica kho sāmaṃ passati itthiṃ vā kumārīṃ vā abhirūpaṃ dassanīyaṃ pāsādiḥkaṃ paramāya vaṇṇapokkharatāya samannāgataṃ. So taṃ disvā saṃsīdati visīdati na sakkoti brahmacariyaṃ sandhāretuṃ, sikkhādubbalyaṃ anāvikatvā hīnāyāvattatīti evaṃ visabhāgarūpaṃ oloketassa pana cakkhuvīññāṇavīthivasena uppannarāgo **dassanasaṃsaggo** nāma. So evaṃ veditabbo –

Eko kira daharo kāladīghavāpidvāravīhāraṃ uddesatthāya gato. Ācariyo tassa antarāyaṃ disvā okāsaṃ na karoti. So punappunnaṃ anubandhati. Ācariyo sace antogāme na carissasi. Dassāmi te uddesanti āha. So sādhiṃ sampaticchitvā uddese niṭṭhite ācariyaṃ vanditvā gacchanto ācariyo me imasmiṃ gāme carituṃ na deti, kiṃ nu kho kāraṇanti cīvaraṃ pārupitvā gāmaṃ pāvīsi, ekā kuladhītā pītakavattaṃ nivāsetvā gehe ṭhitā daharaṃ disvā sañjātarāgā uḷūkena yāguṃ āharitvā tassa patte pakkhipitvā nivattitvā mañcake nipaḷḷi. Atha naṃ mātāpitaro kiṃ ammāti pucchīmsu, dvāreṇa gataṃ daharaṃ labhamānā jīvissāmi, alabhamānā marissāmi. Mātāpitaro vegena gantvā gāmadvāre daharaṃ patvā vanditvā, “nivattatha, bhante, bhikkhaṃ gaṇhāhi”ti āhaṃsu. Daharo alaṃ gacchāmi. Te, “idaṃ nāma, bhante, kāraṇa”nti yācītvā – “amhākaṃ, bhante, gehe ettakaṃ nāma dhaṇaṃ atthi, ekāyeva no dhītā, tvaṃ no jeṭṭhaputtaṭṭhāne ṭhasasi, sukkena sakkā jīvitu”nti āhaṃsu. Daharo, “na mayhaṃ iminā palibodhena attho”ti anādiyitvāva pakkanto.

Mātāpitaro gantvā, “amma, nāsakkhimhā daharaṃ nivattetuṃ, yaṃ aññaṃ sāmikaṃ icchasi, taṃ labhissasi, utṭhehi khāda ca piva cā”ti āhaṃsu. Sā anicchantī sattāhaṃ nirāhārā hutvā kālamakāsi. Mātāpitaro tassā sarīrakiccaṃ katvā taṃ pītakavattaṃ dhuravīhāre bhikkhusaṅghassa adāmsu, bhikkhū vatthaṃ khaṇḍākhaṇḍaṃ katvā bhājayīmsu. Eko mahallako attano koṭṭhāsaṃ gahetvā kalyāṇīvīhāraṃ āgato. Sopi daharo cetiyaṃ vandissāmiṃti tattheva gantvā divāṭṭhāne nisīdi. Mahallako taṃ vatthakhaṇḍaṃ gahetvā, “iminā me parissāvanaṃ vicārethā”ti daharaṃ avoca. Daharo mahāthera “kuhiṃ laddha”nti āha. So sabbhaṃ pavattiṃ kathesi. So taṃ sutvāva, “evarūpāya nāma saddhiṃ saṃvāsaṃ nālattha”nti rāgaggīnā daḍḍho tattheva kālamakāsi.

Aññaṃaññaṃ ālāpasallāpavasena uppannarāgo pana **samullapanasaṃsaggo** nāma. Bhikkhuno bhikkhuniyā santakaṃ, bhikkhuniyā vā bhikkhussa santakaṃ gahetvā paribhogakaraṇavasena uppannarāgo **sambhogasaṃsaggo** nāma. So evaṃ veditabbo – maricavaṭṭivīhāramahe kira bhikkhūnaṃ satahassaṃ bhikkhunīnaṃ navutisahaṇṇāni eva ahesuṃ. Eko sāmaṇero uṇhayāguṃ gahetvā gacchanto sakīṃ cīvarakaṇṇe ṭhapesi, sakīṃ bhūmiyaṃ. Ekā sāmaṇerī disvā ettha pattaṃ ṭhapetvā yāhīti thālakakaṃ adāsi. Te aparabhāge ekasmiṃ bhaye uppanne parasamuddaṃ agamaṃsu. Tesu bhikkhunī puretaraṃ agamaṃsi. Sā, “eko kira sīhaḷabhikkhu āgato”ti sutvā therassa santikaṃ gantvā paṭisanthāraṃ katvā nisinnā, – “bhante, maricavaṭṭivīhāramahakāle tumhe kativassā”ti pucchi. Tadāhaṃ sattavassikasāmaṇero. Tvaṃ pana kativassāti? Ahaṃ sattavassikasāmaṇerīyeva ekassa sāmaṇerassa uṇhayāguṃ gahetvā gacchantassa pattaṭṭhapanatthaṃ thālakamadāsīti. Thero, “ahaṃ so”ti vatvā thālakakaṃ nīharitvā dassesi. Te ettakeneva saṃsaggena brahmacariyaṃ sandhāretuṃ asakkontā dvepi saṭṭhivassakāle vibbhamīmsu.

Hatthagāhādivasena pana uppannarāgo **kāyasaṃsaggo** nāma. Tatridaṃ vatthu – mahācetiyaṅgaṇe kira daharabhikkhū sajjhāyaṃ gaṇhanti. Tesāṃ piṭṭhipasse daharabhikkhuniyo dhammaṃ suṇanti. Tatreko daharo hatthaṃ pasārento ekissā daharabhikkhuniyā kāyaṃ chupi. Sā taṃ hatthaṃ gahetvā attano urasmiṃ ṭhapesi, ettakena saṃsaggena dvepi vibbhamitvā gihibhāvaṃ pattā.

Gāhagāhakādivaṇṇanā

Imesu pana pañcasu saṃsaggesu bhikkhuno bhikkhūhi saddhiṃ savanadassanasamullapanasambhogakāyaparāmāsā nīccampi hontiyeva, bhikkhunīhi saddhiṃ tḥapetvā kāyasamaggam sesā kālena kālam honti; tathā upāsakaupāsikāhi saddhiṃ sabbepi kālena kālam honti. Tesu hi kilesupattito cittaṃ rakkhitabbaṃ. Eko hi bhikkhu gāhagāhako hoti, eko gāhamuttako, eko muttagāhako, eko muttamuttako.

Tattha yaṃ bhikkhuṃ manussāpi āmisena upalāpetvā gahaṇavasena upasaṅkamanti, bhikkhupi pupphaphalādīhi upalāpetvā gahaṇavasena upasaṅkamati, ayaṃ **gāhagāhako** nāma. Yaṃ pana manussā vuttanayena upasaṅkamanti, bhikkhu dakkhiṇeyyavasena upasaṅkamati, ayaṃ **gāhamuttako** nāma. Yassa manussā dakkhiṇeyyavasena cattāro paccaye denti, bhikkhu pupphaphalādīhi upalāpetvā gahaṇavasena upasaṅkamati, ayaṃ **muttagāhako** nāma. Yassa manussāpi dakkhiṇeyyavasena cattāro paccaye denti, bhikkhupi cūḷapiṇḍapātiyatissatthero viya dakkhiṇeyyavasena paribhuñjati, ayaṃ **muttamuttako** nāma.

Theraṃ kira ekā upāsikā dvādasa vassāni upatṭhahi. Ekadivasam tasmim gāme aggi utṭhahitvā gehāni jhāpesi. Aññesaṃ kulūpakabhikkhū āgantvā – ‘kiṃ upāsike, api kiñci bhaṇḍakaṃ arogaṃ kātuṃ asakkhitthā’ ti paṭisanthāraṃ akaṃsu. Manussā, ‘amhākaṃ mātu kulūpakatthero bhuñjanavelāyameva āgamissati’ ti āhaṃsu. Theropi punadvise bhikkhācāraṇaṃ sallakkhetvā āgato. Upāsikā koṭṭhacchāyāya nisīdāpetvā bhikkhaṃ sampādetvā adāsi. There bhattakiccaṃ katvā pakkante manussā āhaṃsu – ‘amhākaṃ mātu kulūpakatthero bhuñjanavelāyameva āgato’ ti. Upāsikā, ‘tumhākaṃ kulūpakā tumhākaṃyeva anucchavikā, mayhaṃ thero mayheva anucchaviko’ ti āha. Āyasmā pana mantāṇiputto imehi pañcāhi saṃsaggehi catūhipi parisāhi saddhiṃ asaṃsaṭṭho gāhamuttako ceva muttamuttako ca ahoṣi. Yathā ca sayam asaṃsaṭṭho, evaṃ bhikkhūnampi taṃ asaṃsaggaṃ kattā ahoṣi.

Āraddhavīriyoti paggahitavīriyo, paripuṇṇakāyikacetasikavīriyoti attho. Yo hi bhikkhu gamane uppannakilesaṃ tḥānaṃ pāpuṇiṭṭhaṃ na deti, tḥāne uppannakilesaṃ nisajjaṃ, nisajjāya uppannakilesaṃ sayanaṃ pāpuṇiṭṭhaṃ na deti, mantena kaṇhasappaṃ uppīletvā gaṇhanto viya, amittaṃ gīvāya akkamanto viya ca vicarati, ayaṃ **āraddhavīriyo** nāma. Thero ca tādiso ahoṣi. Bhikkhūnampi tatheva vīriyārambhakathaṃ kattā ahoṣi.

Silasampannotiādīsu **sīlanti** catupārisuddhisīlaṃ. **Samādhīti** vipassanāpādakā aṭṭha samāpattiyo. **Paññāti** lokiyalokuttaraññaṃ. **Vimuttīti** ariyaphalaṃ. **Vimuttiñānadassananti** ekūnavīsatividhaṃ paccavekkhaṇaṃ. Thero sayampi sīlādīhi sampanno ahoṣi bhikkhūnampi sīlādikaṃ kattā. Svāyaṃ dasahi kathāvatthūhi ovadatīti **ovādako**. Yathā pana eko ovadatiyeva, sukhamaṃ atthaṃ parivattetvā jānāpetuṃ na sakkoti. Na evaṃ thero. Thero pana tāni dasa kathāvatthūni viññāpetīti **viññāpako**. Eko viññāpetuṃ sakkoti, kāraṇaṃ dassetuṃ na sakkoti. Thero kāraṇampi sandassetīti **sandassako**. Eko vijjamānaṃ kāraṇaṃ dasseti, gāhetuṃ pana na sakkoti. Thero gāhetumpi sakkotīti **samādapako**. Evaṃ samādapetvā pana tesu kathāvatthūsu ussāhajanavasena bhikkhū samuttejetīti **samuttejako**. Ussāhajāte vaṇṇaṃ vatvā sampahaṃsetīti **sampahaṃsako**.

Pañcalābhavaṇṇanā

253. Suladdhalābhāti aññesaṃpi manussatṭabhāvaṇṇapabbajjādiguṇalābhā nāma honti. Āyasmato pana puṇṇassa suladdhalābhā ete, yassa satthu sammukhā evaṃ vaṇṇo abbhuggatoti attho. Apica apaṇḍitehi vaṇṇakathanaṃ nāma na tathā lābho, paṇḍitehi vaṇṇakathanaṃ pana lābho. Gihī hi vā vaṇṇakathanaṃ na tathā lābho, gihī hi ‘vaṇṇaṃ kathessāmi’ ti, ‘amhākaṃ ayyo saṅho sakhilo sukhasambhāso, vihāraṃ āgatānaṃ yāgubhattaphāṇitādīhi saṅghaṃ karoti’ ti kathento avaṇṇameva katheti. ‘Avaṇṇaṃ kathessāmi’ ti ‘ayaṃ thero mandamando viya abalabalo viya bhākuṭikabhākuṭiko viya natthi iminā saddhiṃ viṃsāso’ ti kathento vaṇṇameva katheti. Sabrahmacārīhipi satthu parammukhā vaṇṇakathanaṃ na tathā lābho, satthu sammukhā pana atilābhoti imampi atthavasam paṭicca ‘suladdhalābhā’ ti āha. **Anumassa anumassāti** dasa kathāvatthūni anupavisitvā anupavisitvā. **Taṅca satthā abbhānumodati** taṅcassa vaṇṇaṃ evametaṃ appiccho ca so bhikkhu santuṭṭho ca so bhikkhūti anumodati. Iti viññūhi vaṇṇabhāsanam eko lābho, sabrahmacārīhi eko, satthu sammukhā eko, anumassa anumassa eko, satthārā abbhānumodanaṃ ekoti ime pañca lābhe sandhāya ‘suladdhalābhā’ ti āha. **Kadācīti** kismiñcīdeva kāle. **Karahacīti** tasseva vevacanaṃ. **Appeva nāma siyā kocīdeva kathāsallāpoti** api nāma koci kathāsamudācāropi bhavēyya. Theraṃ kira āyasmā puṇṇo neva

diṭṭhapubbo, nassa dhammakathā sutapubbā. Iti so tassa dassanampi dhammakathampi patthayamāno evamāha.

Cārikādivaṇṇanā

254. Yathābhirantanti yathāajjhāsayaṃ viharitvā. Buddhānañhi ekasmiṃ ṭhāne vasantānaṃ chāyūdakādivipattiṃ vā apphāsukasenāsanāṃ vā, manussānaṃ assaddhādibhāvaṃ vā āgamma anabhirati nāma natthi. Tesāṃ sampattiya “idha phāsu viharāmā”ti abhiramitvā ciravīhāropi natthi. Yattha pana tathāgate viharante sattā saraṇesu vā patiṭṭhahanti, sīlāni vā samādiyanti, pabbajanti vā, tato sotāpattimaggādīnaṃ vā pana tesāṃ upanissayo hoti. Tattha buddhā satte tāsu sampattīsu patiṭṭhāpanaajjhāsayena vasanti; tāsaṃ abhāve pakkamanti. Tena vuttaṃ – “yathāajjhāsayaṃ viharitvā”ti. **Cārikāṃ caramānoti** addhānagamaṇaṃ gacchanto. Cārikā ca nāmesā bhagavato duvidhā hoti turitacārikā ca, aturitacārikā ca.

Tattha dūrepi bodhaneyyapuggalaṃ disvā tassa bodhanatthāya sahasā gamaṇaṃ **turitacārikā** nāma. Sā mahākassapapaccuggamaṇādīsu daṭṭhabbā. Bhagavā hi mahākassapaṃ paccuggacchanto muhuttēna tigāvutaṃ maggaṃ agamāsi, ālavakassatthāya tiṃsayojanaṃ, tathā aṅgulimālassa. Pukkāsātissa pana pañcaccattālīsayaṇaṃ, mahākappinassa vīsayaṇasataṃ, khadiravaniyassatthāya satta yojanasatāni agamāsi; dhammasenāpatino saddhivīhārikassa vanavāsītissasāmaṇerassa tigāvutādhikaṃ vīsayaṇasataṃ.

Ekadivasaṃ kira thero, “tissasāmaṇerassa santikaṃ, bhante, gacchāmī”ti āha. Bhagavā, “ahampi gamissāmī”ti vatvā āyasmantaṃ ānandaṃ āmantesi – “ānanda, vīsatisahassānaṃ chaḷabhiññānaṃ ārocehi – ‘bhagavā vanavāsītissasāmaṇerassa santikaṃ gamissatī’”ti. Tato dutiyadivase vīsatisahassakhīṇāsavaparivuto ākāse uppatitvā vīsayaṇasatamatthake tassa gocaragāmadvāre otarivā cīvaraṃ pārupi. Kammantaṃ gacchamānā manussā disvā, “satthā, bho, āgato, mā kammantaṃ agamitthā”ti vatvā āsanāni pañṇapetvā yāguṃ datvā pānavattaṃ karontā, “kuhiṃ, bhante, bhagavā gacchatī”ti daharabhikkhū pucchimsu. Upāsakā, na bhagavā aññattha gacchatī, idheva tissasāmaṇerassa dassanattāya āgatoti. Te “amhākaṃ kira kulūpakattherassa dassanattāya satthā āgato, no vata no thero oramattako”ti somanassajātā ahesuṃ.

Atha bhagavato bhattakiccapariyosāne sāmaṇero gāmaṃ piṇḍāya caritvā “upāsakā mahā bhikkhusaṅgho”ti pucchi. Athassa te, “satthā, bhante, āgato”ti ārocesuṃ, so bhagavantaṃ upasaṅkamitvā piṇḍapātena āpucchi. Satthā tassa pattaṃ hatthēna gahetvā, “alaṃ, tissa, niṭṭhitaṃ bhattakicca”nti āha. Tato upajjhāyaṃ āpucchitvā attano pattāsane nisīditvā bhattakiccamakāsi. Athassa bhattakiccapariyosāne satthā maṅgalaṃ vatvā nikkhamitvā gāmadvāre ṭhatvā, “kataro te, tissa, vasanaṭṭhānaṃ gamaṇamaggo”ti āha. “Ayaṃ bhagavā”ti. Maggaṃ desayamāno purato yāhi tissatī. Bhagavā kira sadevakassa lokassa maggadesako samānopi “sakalatigāvute magge sāmaṇeraṃ daṭṭhuṃ lacchāmī”ti taṃ maggadesakamakāsi.

So attano vasanaṭṭhānaṃ gantvā bhagavato vattamakāsi. Atha naṃ bhagavā, “kataro te, tissa, caṅkamo”ti pucchitvā tattha gantvā sāmaṇerassa nisīdanapāsāṇe nisīditvā, “tissa, imasmiṃ ṭhāne sukhaṃ vasasī”ti pucchi. So āha – “āma, bhante, imasmiṃ me ṭhāne vasantassa sīhabyagghahatthimigamorādīnaṃ saddaṃ suṇato arañṇasaññā uppajjati, tāya sukhaṃ vasāmī”ti. Atha naṃ bhagavā, “tissa, bhikkhusaṅghaṃ sannipātehi, buddhadāyajjaṃ te dassāmī”ti vatvā sannipatite bhikkhusaṅghe upasampādetvā attano vasanaṭṭhānameva agamāsīti. Ayaṃ **turitacārikā** nāma.

Yaṃ pana gāmanigamaṇapāṭiyā devasikaṃ yojanaḍḍhayaṇavasena piṇḍapātacariyādīhi lokaṃ anuggaṇhantassa gamaṇaṃ, ayaṃ **aturitacārikā** nāma. Imaṃ pana cārikaṃ caranto bhagavā mahāmaṅḍalaṃ majjhimaṅḍalaṃ antimamaṅḍalanti imesaṃ tiṇṇaṃ maṅḍalānaṃ aññatarasmiṃ carati. Tattha mahāmaṅḍalaṃ navayaṇasatikaṃ, majjhimaṅḍalaṃ chayaṇasatikaṃ, antimamaṅḍalaṃ tiyojanasatikaṃ. Yadā mahāmaṅḍale cārikaṃ caritukāmo hoti, mahāpavāraṇāya pavāretvā pāṭipadadivase mahābhikkhusaṅghaparivāro nikkhamati. Samantā yojanasataṃ ekakolāhalaṃ ahoṣi, purimaṃ purimaṃ āgatā nimantetuṃ labhanti; itaresu dvīsu maṅḍalesu sakkāro mahāmaṅḍale osarati. Tatra bhagavā tesu tesu gāmanigamesu ekāhaṃ dvīhaṃ vasanto mahājanaṃ āmisapaṭiggahena anuggaṇhanto dhammādānena cassa vivatṭṭupānissitaṃ kusalaṃ vaḍḍhento navahi māsehi cārikaṃ pariyosāpeti.

Sace pana antovasse bhikkhūnaṃ samathavipassanā taruṇā hoti, mahāpavāraṇāya apavāretvā

pavāraṇāsaṅgahaṃ datvā kattikapuṇṇamāya pavāretvā migasirassa paṭhamadivase mahābhikkhusaṅghaparivāro nikkhamitvā majjhimaṇḍalaṃ osarati. Aññenapi kāraṇena majjhimaṇḍale cārikaṃ caritukāmo catumāsam vasiṭvāva nikkhamati. Vuttanayeneva itaresu dvīsu maṇḍalesu sakkāro majjhimaṇḍale osarati. Bhagavā purimanayeneva lokaṃ anuggaṇhanto aṭṭhahi māsehi cārikaṃ pariyosāpeti.

Sace pana catumāsam vuṭṭhavassassāpi bhagavato veneyyasattā aparipakkindriyā honti, tesam indriyaparipākaṃ āgamayamāno aparampī ekaṃ māsam vā dviticatumāsam vā tattheva vasiṭvā mahābhikkhusaṅghaparivāro nikkhamati. Vuttanayeneva itaresu dvīsu maṇḍalesu sakkāro antomaṇḍale osarati. Bhagavā purimanayeneva lokaṃ anuggaṇhanto sattahi vā chahi vā pañcahi vā catūhi vā māsehi cārikaṃ pariyosāpeti. Iti imesu tīsu maṇḍalesu yattha katthaci cārikaṃ caranto na cīvarādihetu carati. Atha kho ye duggatā bālā jīṇṇā byādhitā, te kadā tathāgataṃ āgantvā passissanti? Mayi pana cārikaṃ carante mahājano tathāgataḍḍanaṃ labhissati, tattha keci cittāni pasādessanti, keci mālādīhi pūjessanti, keci kaṭacchubhikkhaṃ dassanti, keci micchāḍḍanaṃ pahāya sammādiṭṭhikā bhavissanti, taṃ tesam bhavissati dīgharattaṃ hitāya sukhāyāti evaṃ lokānukampāya cārikaṃ carati.

Apica catūhi kāraṇehi buddhā bhagavanto cārikaṃ caranti – jaṅghāvihāravasena sarīrāphāsukatthāya, atthupattikālaṃ abhikaṅkhanatthāya, bhikkhūnaṃ sikkhāpadaṃ paññāpanatthāya, tattha tattha paripākagatindriye bodhaneyyasatte bodhanatthāyāti. Aparehipi catūhi kāraṇehi buddhā bhagavanto cārikaṃ caranti – buddhaṃ saraṇaṃ gacchissantīti vā, dhammaṃ saraṇaṃ gacchissantīti vā, saṅghaṃ saraṇaṃ gacchissantīti vā, mahatā dhammavassena catasso parisā santappessāmīti vāti. Aparehi pañcahi kāraṇehi buddhā bhagavanto cārikaṃ caranti – pāṇātipātā viramissantīti vā, adinnādānā... kāmesumicchācārā... musāvādā... surāmerayamajjapamādaṭṭhānā viramissantīti vāti. Aparehi aṭṭhahi kāraṇehi buddhā bhagavanto cārikaṃ caranti – paṭhamajjhānaṃ paṭilabhissantīti vā, dutiyaṃ...pe... nevasaññānāsaññāyatanaṃ samāpattim paṭilabhissantīti vāti. Aparehi aṭṭhahi kāraṇehi buddhā bhagavanto cārikaṃ caranti – sotāpattimaggaṃ adhiḡamissantīti vā, sotāpattiphalaṃ...pe... arahattaphalaṃ sacchikarissantīti vāti. Ayaṃ **aturitacārikā**, sā idha adhippetā. Sā panesā duvidhā hoti nibaddhacārikā, anibaddhacārikā ca. Tattha yaṃ ekasseva bodhaneyyasattassa atthāya gacchati, ayaṃ nibaddhacārikā nāma. Yaṃ pana gāmanigamanagarapaṭipāṭivasena carati, ayaṃ anibaddhacārikā nāma. Esā idha adhippetā.

Senāsanam saṃsāmetvāti senāsanam paṭisāmetvā. Taṃ pana paṭisāmento thero na cūḷapattamahāpattacūḷathālakamahāthālakapaṭṭuṇṇacīvara-dukūlacīvarādīnaṃ bhaṇḍikaṃ katvā sappitelādīnaṃ vā pana ghaṭe pūrāpetvā gabbhe nidahitvā dvāraṃ pidhāya kuṅcikaṃ uddikādīni yojāpesi. “Sace na hoti bhikkhu vā sāmaṇero vā āramiko vā upāsako vā, catūsu pāsānesu mañce mañcaṃ āropetvā pīthe pīṭhaṃ āropetvā cīvaravaṃse vā cīvararajjuyā vā upari puñjaṃ katvā dvāravatāpanaṃ thaketvā pakkamitabba”nti (cūḷava. 361) vacanato pana nevāsikaṃ bhikkhuṃ āpucchanaṃ mattakeneva paṭisāmesi.

Yena sāvatthi tena cārikaṃ pakkāmīti satthu dassanakāmo hutvā yena disābhāgena sāvatthi tena pakkāmi. Pakkamanto ca na suddhodanamahārājassa ārocāpetvā sappitelamadhuphāṇitādīni gāhāpetvā pakkanto. Yūthaṃ pahāya nikkhanto pana mattahatthī viya, asahāyakkicco sīho viya, pattacīvaramattaṃ ādāya ekakova pakkāmi. Kasmā panesa pañcasatehi attano antevāsikehi saddhiṃ rājagahaṃ agantvā idāni nikkhantoti? Rājagahaṃ kapilavatthuto dūraṃ saṭṭhiyojanāni, sāvatthi pana pañcadasa. Satthā rājagahato pañcacattālīsajojanaṃ āgantvā sāvatthiyaṃ viharati, idāni āsanno jātoti sutvā nikkhamīti akāraṇametaṃ. Buddhānaṃ santikaṃ gacchanto hi esa yojanasahassampi gaccheyya, tadā pana kāyaviveko na sakkā laddhanti. Bahūhi saddhiṃ gamanakāle hi ekasmiṃ gacchāmāti vadante eko idheva vasāmāti vadati. Ekasmiṃ vasāmāti vadante eko gacchāmāti vadati. Tasmā icchiticchitakkhaṇe samāpattim appetvā nisīdituṃ vā phāsukasena kāyavivekaṃ laddhuṃ vā na sakkā hoti, ekakassa pana taṃ sabbaṃ sulabhaṃ hotīti tadā agantvā idāni pakkāmi.

Cārikaṃ caramānoti ettha kiñcāpi ayaṃ cārikā nāma mahājanasaṅgahattaṃ buddhānaṃ yeva labbhati, buddhe upādāya pana ruḷhīsaddena sāvakānampi vuccati kilañjādīhi kataṃ bījanampi tālavaṇṇaṃ viya. **Yena bhagavāti** sāvatthiyā avidūre ekasmiṃ gāmake piṇḍāya caritvā katabhattakicco jetavanaṃ pavasiṭvā sārīputtattherassa vā mahāmogallānattherassa vā vasanaṭṭhānaṃ gantvā pāde dhovitvā makkhetvā pānīyaṃ vā pānakaṃ vā pivitvā thokaṃ vissamitvā sathāraṃ passissāmīti cittampi anuppādetvā ujukaṃ gandhakuṭipariveṇameva āgamāsi. Therassa hi sathāraṃ daṭṭhukāmassa aññena bhikkhūnā kiccaṃ natthi.

Tasmā rāhulaṃ vā ānandaṃ vā gahetvā okāsaṃ kāretvā satthāraṃ passissāmīti evampi cittaṃ na uppādesi.

Thero hi sayameva buddhasāsane vallabho rañño saṅgānavijayamahāyodho viya. Yathā hi tādisassa yodhassa rājānaṃ daṭṭhukāmassa aññaṃ sevitvā dassanakammaṃ nāma natthi; vallabhatāya sayameva passati. Evaṃ theropi buddhasāsane vallabho, tassa aññaṃ sevitvā satthudassanakiccaṃ natthīti pāde dhovivā pādapuñchanamhi puñchitvā yena bhagavā tenupasaṅkami. Bhagavāpi “paccūsakāleyeva mantāniputto āgamissatī”ti addasa. Tasmā gandhakuṭiṃ pavisitvā sūciḡhaṭikaṃ adavvā darathaṃ paṭippassambhetvā utthāya nisīdi. Thero kavāṭaṃ paṇāmetvā gandhakuṭiṃ pavisitvā bhagavantaṃ abhivādetvā ekamantaṃ nisīdi. **Dhammiyā kathāyāti** bhagavā dhammiṃ kathaṃ kathento cūlagosiṅgasutte (ma. ni. 1.325 ādayo) tiṇṇaṃ kulaputtānaṃ sāmaggirasānisamsaṃ kathesi; sekkhasutte (ma. ni. 2.22 ādayo) āvasathānisamsaṃ, ḡhaṭikārasutte (ma. ni. 2.282 ādayo) satipaṭilābhikaṃ pubbenivāsappaṭisaṃyuttakathaṃ; raṭṭhapālasutte (ma. ni. 2.304) cattāro dhammudese, selasutte (ma. ni. 2.396 ādayo) pānakānisamsakathaṃ, upakkilesasutte (ma. ni. 3.236 ādayo) bhaguttherassa dhammakathaṃ kathento ekībhāve ānisamsaṃ kathesi. Imasmiṃ pana rathavinīte āyasmato puṇṇassa kathento dasakathāvathunissayaṃ anantanayaṃ nāma dassesi puṇṇa, ayampi appicchakathāyeva santosakathāyevāti. Paṭisambhidāpattassa sāvakassa velante ṭhatvā mahāsamudde hatthappasāraṇaṃ viya ahoṣi.

Yena andhavananti tadā kira pacchābhatte jetavanaṃ ākiṇṇaṃ hoti, bahū khattiyabrāhmaṇādayo jetavanaṃ osaranti; rañño cakkavattissa khandhāvāraṭṭhānaṃ viya hoti, na sakkā pavivekaṃ labhituṃ. Andhavanaṃ pana padhānagharasadiṣaṃ pavivittaṃ, tasmā yenandhavanaṃ tenupasaṅkami. Kasmā pana mahāthere na addasa? Evaṃ kirassa ahoṣi – “sāyanhasamaye āgantvā mahāthere disvā puna dasabalaṃ passissāmi, evaṃ mahātherānaṃ ekaṃ upaṭṭhānaṃ bhavissati, satthu dve bhavissanti, tato satthāraṃ vanditvā mama vasaṇaṭṭhānameva gamissāmī”ti.

Sattavisuddhipaṇhavaṇṇanā

256. Abhiṇṇaṃ kittayamāno ahoṣīti punappunaṃ vaṇṇaṃ kittayamāno vihāsi. Thero kira tato paṭṭhāya divase divase saṅghamajjhe “puṇṇo kira nāma mantāniputto catūhi parisāhi saddhiṃ asaṃsattho, so dasabalassa dassanattāya āgamissati; kacci nu kho maṃ adisvāva gamissati”ti theranavamajjhimānaṃ satikaraṇatthaṃ āyasmato puṇṇassa guṇaṃ bhāsati. Evaṃ kirassa ahoṣi – “mahallakabhikkhū nāma na sabbakālaṃ antovihāre honti; guṇakathāya panassa kathitāya yo ca naṃ bhikkhuṃ passissati; so āgantvā āroccasati”ti. Athāyaṃ therasseva saddhivihāriko taṃ āyasmantaṃ mantāniputtaṃ pattacīvaramādāya gandhakuṭiṃ pavisaṇtaṃ addasa. Kathaṃ pana naṃ esa aññāsīti? Puṇṇa, puṇṇāti vatvā kathentassa bhagavato dhammakathāya aññāsī – “ayaṃ so thero, yassa me upajjhāyo abhiṇṇaṃ kittayamāno hotī”ti. Iti so āgantvā therassa āroccesi. **Nisīdanaṃ ādayāti nisīdanaṃ** nāma sadasaṃ vuccati avāyimaṃ. Thero pana cammakhaṇḍaṃ gahetvā agamāsi. **Piṭṭhito piṭṭhitoti** pacchato pacchato. **Sīsānulokīti** yo unnataṭṭhāne piṭṭhiṃ passanto ninnaṭṭhāne sīsaṃ passanto gacchati, ayampi sīsānulokīti vuccati. Tādiso hutvā anubandhi. Thero hi kiñcāpi saṃyatapadasaddatāya accāsanno hutvā gacchantopi padasaddena na bādhati, “nāyaṃ sammodanakālo”ti ñatvā pana na accāsanno, andhavanaṃ nāma mahantaṃ, ekasmiṃ thāne nilīnaṃ apassantena, āvuso puṇṇa, puṇṇāti aphāsukasaddo kātabbo hotīti nisinnaṭṭhānājananattaṃ nātidūre hutvā sīsānulokī agamāsi. **Divāvihāraṃ nisīdīti** divāvihāratthāya nisīdi.

Tattha āyasmāpi puṇṇo udiccabrāhmaṇajacco, sārīputtattheropi. Puṇṇattheropi suvaṇṇavaṇṇo, sārīputtattheropi. Puṇṇattheropi arahattaphalasaṃpattisaṃpānaṃ, sārīputtattheropi. Puṇṇattheropi kappasatasahassaṃ abhinīhārasampannaṃ, sārīputtattheropi kappasatasahassādhikaṃ ekamasāṅkhyeyaṃ. Puṇṇattheropi paṭisambhidāpatta mahākhiṇṇāsavo, sārīputtattheropi. Iti ekaṃ kanakaguhaṃ pavitṭhā dve sīhā viya, ekaṃ vijambhanabhūmiṃ oṭiṇṇā dve byagghā viya, ekaṃ supupphitasālavanaṃ pavitṭhā dve chaddantanāgarājāno viya, ekaṃ simbalivanaṃ pavitṭhā dve supaṇṇarājāno viya, ekaṃ naravāhanayānaṃ abhiruḷhā dve vessavaṇā viya, ekaṃ paṇḍukambalasilaṃ abhinisinnā dve sakkā viya, ekavimānabbhantaragatā dve hāritamahābrahmāno viya ca te dvepi brāhmaṇajaccā dvepi suvaṇṇavaṇṇā dvepi samāpattilābhino dvepi abhinīhārasampannā dvepi paṭisambhidāpattā mahākhiṇṇāsavā ekaṃ vasaṇḍaṃ anupavitṭhā taṃ vanaṭṭhānaṃ sobhayiṃsu.

Bhagavati no, āvuso, brahmacariyaṃ vussatīti, āvuso, kiṃ amhākaṃ bhagavato santike āyasmatā brahmacariyaṃ vussatīti? Idaṃ āyasmā sārīputto tassa bhagavati brahmacariyavāsaṃ jānantopi kathāsamuttāpanatthaṃ pucchi. Purimakathāya hi appatīṭṭhitāya pacchimakathā na jāyati, tasmā evaṃ pucchi. Thero anujānanto “evamāvuso”ti āha. Athassa pañhavissajjanaṃ sotukāmo āyasmā sārīputto “kiṃ nu kho āvuso sīlavisuddhatthaṃ bhagavati brahmacariyaṃ vussatī”ti paṭipāṭiyā satta visuddhiyo pucchi. Tāsaṃ vitthārakathā **visuddhimagge** vuttā. Āyasmā pana puṇṇo yasmā catupārisuddhisīlādīsu ṭhitassāpi brahmacariyavāso matthakaṃ na pāpuṇāti, tasmā, “no hidaṃ, āvuso”ti sabbaṃ paṭikkhipi.

Kimatthaṃ carahāvusoti yadi sīlavisuddhiādīnaṃ atthāya brahmacariyaṃ na vussati, atha kimatthaṃ vussatīti pucchi. **Anupādāparinibbānatthaṃ kho, āvusoti** ettha **anupādāparinibbānaṃ** nāma appaccayaparinibbānaṃ. Dvedhā upādānāni gahaṇūpādānaṃ paccayūpādānaṃ. **Gahaṇūpādānaṃ** nāma kāmupādānādīkaṃ catubbidhaṃ, **paccayūpādānaṃ** nāma avijjāpaccayā saṅkhārāti evaṃ vuttapaccayā. Tattha gahaṇūpādānavādīno ācariyā anupādāparinibbānanti catūsu upādānesu aññatārenāpi kañci dhammaṃ aggahetvā pavattaṃ arahattaphalaṃ anupādāparinibbānanti kathenti. Tañhi na ca upādānasampayuttaṃ hutvā kañci dhammaṃ upādiyati, kilesānaṃ parinibbutante jātattā parinibbānanti vuccati. Paccayūpādānavādīno pana anupādāparinibbānanti appaccayaparinibbānaṃ. Paccayavasena anuppannaṃ asaṅkhataṃ amatadhātumeva anupādāparinibbānanti kathenti. Ayaṃ anto, ayaṃ koṭi, ayaṃ niṭṭhā. Appaccayaparinibbānaṃ pattassa hi brahmacariyavāso matthakaṃ patto nāma hoti, tasmā thero “anupādāparinibbānattha”nti āha. Atha naṃ anuyūñjanto āyasmā sārīputto “kiṃ nu kho, āvuso, sīlavisuddhi anupādāparinibbāna”nti puna pucchāṃ ārabhi.

258. Theropi sabbaparivattesu tatheva paṭikkhipitvā pariyosāne dosaṃ dassento **sīlavisuddhiṃ ce, āvusoti**ādīmāha. Tattha **paññapeyyāti** yadi paññapeyya. **Saupādānaṃyeva samānaṃ anupādāparinibbānaṃ paññapeyyāti** saṅgahaṇadhammameva niggahaṇadhammaṃ sappaccayadhammameva appaccayadhammaṃ saṅkhatadhammameva asaṅkhatadhammanti paññapeyyāti attho. Nānadassanavisuddhiyaṃ pana sappaccayadhammameva appaccayadhammaṃ saṅkhatadhammameva asaṅkhatadhammanti paññapeyyāti ayameva attho gahetabbo. **Puthujjano hi, āvusoti** ettha vaṭṭānugato lokiyabālaputhujjano daṭṭhabbo. So hi catupārisuddhisīlamattassāpi abhāvato sabbaso aññatra imehi dhammehi. **Tena hīti** yena kāraṇena ekacce paṇḍitā upamāya atthaṃ jānanti, tena kāraṇena upamaṃ te karissāmīti attho.

Sattarathavinītavāṇṇanā

259. Satta rathavinītanīti vinītaassajāniyayutte satta rathe. **Yāvadeva, cittavisuddhatthāti,** āvuso, ayaṃ sīlavisuddhi nāma, yāvadeva, cittavisuddhatthā. **Cittavisuddhatthāti** nissakkavacanametam. Ayaṃ panettha attho, yāvadeva, cittavisuddhisāṅkhātā atthā, tāva ayaṃ sīlavisuddhi nāma icchitabbā. Yā pana ayaṃ cittavisuddhi, eṣā sīlavisuddhiyā attho, ayaṃ koṭi, idaṃ pariyosānaṃ, cittavisuddhiyaṃ ṭhitassa hi sīlavisuddhikiccaṃ kataṃ nāma hotīti. Esa nayo sabbapadesu.

Idaṃ panettha opammasaṃsandanaṃ – rājā pasenadi kosalo viya hi jarāmarañabhīruko yogāvacarō daṭṭhabbo. Sāvattinagaraṃ viya sakkāyanagaraṃ, sāketanagaraṃ viya nibbānanagaraṃ, rañño sākete vaḍḍhīāvahassa sīghaṃ gantvā pāpuṇitabbassa accāyikassa kiccassa uppādakālo viya yogino anabhisametānaṃ catunnaṃ ariyasaccānaṃ abhisamayakiccassa uppādakālo. Satta rathavinītanī viya satta visuddhiyo, paṭhamaṃ rathavinītaṃ āruḷhakālo viya sīlavisuddhiyaṃ ṭhitakālo, paṭhamarathavinītādīhi dutiyādīni āruḷhakālo viya sīlavisuddhiādīhi cittavisuddhiādīsu ṭhitakālo. Sattamena rathavinītena sākete antepuradvāre oruyha uparipāsāde nātimittagaṇaparivutassa surasabhojanaparibhogakālo viya yogino nānadassanavisuddhiyā sabbakilese khepetvā dhammavarapāsādaṃ āruya paropaññāsakusaladhammaparivārassa nibbānārammaṇaṃ phalasaṃpattimāṃ appētvā nirodhasayane nisinnassa lokuttarasukhānubhavanakālo daṭṭhabbo.

Iti āyasmantaṃ puṇṇaṃ dasakathāvattulābhim dhammasenāpatīsārīputtatthero satta visuddhiyo pucchi. Āyasmā puṇṇo dasa kathāvattūni vissajjesi. Evaṃ pucchanto pana dhammasenāpati kiṃ jānitvā pucchi, udāhu ajānitvā? Titthakusalo vā pana hutvā visayasmim pucchi, udāhu atitthakusalo hutvā avisayasmim? Puṇṇattheropi ca kiṃ jānitvā vissajjesi, udāhu ajānitvā? Titthakusalo vā pana hutvā visayasmim vissajjesi, udāhu atitthakusalo hutvā avisayeti? Jānitvā titthakusalo hutvā visaye pucchīti hi vadamāno dhammasenāpatimyeva vadeyya. Jānitvā titthakusalo hutvā visaye vissajjesīti vadamāno puṇṇattherameva

vadeyya. Yañhi visuddhīsu saṃkhittam, taṃ kathāvatthūsu vitthiṇṇam. Yaṃ kathāvatthūsu saṃkhittam, taṃ visuddhīsu vitthiṇṇam. Tadamīnā nayena veditabbam.

Visuddhīsu hi ekā sīlavissuddhi cattāri kathāvatthūni hutvā āgatā appicchakathā santuṭṭhikathā asaṃsaggakathā, sīlakathāti. Ekā cittavisuddhi tīni kathāvatthūni hutvā āgatā – pavivekakathā, vīriyārambhakathā, samādhikathāti, evaṃ tāva yaṃ visuddhīsu saṃkhittam, taṃ kathāvatthūsu vitthiṇṇam. Kathāvatthūsu pana ekā paññākathā pañca visuddhiyo hutvā āgatā – dīṭṭhivissuddhi, kaṅkhāvitaraṇavisuddhi, maggāmaggañāṇadassanavisuddhi, paṭipadañāṇadassanavisuddhi, ñāṇadassanavisuddhīti, evaṃ yaṃ kathāvatthūsu saṃkhittam, taṃ visuddhīsu vitthiṇṇam. Tasmā sārīputtathero satta visuddhiyo pucchanto na aññaṃ pucchi, dasa kathāvatthūniyeva pucchi. Puṇṇattheropi satta visuddhiyo vissajjento na aññaṃ vissajjesi, dasa kathāvatthūniyeva vissajjesīti. Iti ubhopete jānitvā titthakusalā hutvā visayeva pañhaṃ pucchimsu ceva vissajjesuṃ cāti veditabbo.

260. Ko nāmo āyasmāti na thero tassa nāmaṃ na jānāti. Jānantoyeva pana sammodituṃ labhissāmīti pucchi. **Kathañca panāyasmantanti** idaṃ pana thero sammodamāno āha. **Mantāniputtoti** mantāniyā brāhmaṇiyā putto. **Yathā tanti** ettha tanti nipātamattaṃ, yathā sutavatā sāvakena byākātabbā, evameva byākatāti ayamettha saṅkhepattho. **Anumassa anumassāti** dasa kathāvatthūni ogāhetvā anupavisitvā. **Celaṇḍupakenāti** ettha **celaṃ** vuccati vatthaṃ, **aṇḍupakaṃ** cumbaṭakaṃ. Vatthacumbaṭakaṃ sīse katvā āyasmantaṃ tattha nisīdāpetvā pariharantāpi sabrahmacārī dassanāya labheyyuṃ, evaṃ laddhadassanampi tesam lābhāyevāti aṭṭhānaparikappena abhiñhadassanassa upāyaṃ dassesi. Evaṃ apariharantena hi pañhaṃ vā pucchitukāmena dhammaṃ vā sotukāmena “thero kattha ṭhito kattha nisinno”ti pariyesantena caritabbam hoti. Evaṃ pariharantā pana icchicchitakkhaṇeyeva sīsato oropetvā mahārahe āsane nisīdāpetvā sakkā honti pañhaṃ vā pucchitūṃ dhammaṃ vā sotuṃ. Iti aṭṭhānaparikappena abhiñhadassanassa upāyaṃ dassesi.

Sārīputtoti ca pana manti sārīyā brāhmaṇiyā puttoti ca pana evaṃ maṃ sabrahmacārī jānanti. **Satthukappenāti** satthusadisena. Iti ekapadeneva āyasmā puṇṇo sārīputtatheraṃ candamaṇḍalaṃ āhacca ṭhapento viya ukkhipi. Therassa hi imasmiṃ ṭhāne ekantadhammakathikabhāvo pākaṭo ahosi. Amaccañhi purohitaṃ mahantoti vadamāno rājasadisoti vadeyya, goṇaṃ hatthippamaṇoti, vāpiṃ samuddappamaṇoti, ālokaṃ candimasūriyālokappamaṇoti, ito paraṃ etesaṃ mahantabhāvakathā nāma natthi. Sāvakampi mahāti vadanto satthupaṭibhāgoti vadeyya, ito paraṃ tassa mahantabhāvakathā nāma natthi. Iccāyasmā puṇṇo ekapadeneva theraṃ candamaṇḍalaṃ āhacca ṭhapento viya ukkhipi.

Ettakampi no nappaṭibhāseyyāti paṭisambhidāpattassa appaṭibhānaṃ nāma natthi. Yā panāyaṃ upamā āhaṭā, taṃ na āhareyyāma, atthameva katheyyāma. Upamā hi ajānantānaṃ āhariyatīti ayamettha adhippāyo. Aṭṭhakathāyaṃ pana idampi paṭikkhipitvā upamā nāma buddhānampi santike āhariyati, theraṃ panesa apacāyamāno evamāhāti.

Anumassa anumassa pucchitāti dasa kathāvatthūni ogāhetvā ogāhetvā pucchitā. Kiṃ pana pañhassa pucchanaṃ bhāriyaṃ, udāhu vissajjananti? Uggahetvā pucchanaṃ no bhāriyaṃ, vissajjanaṃ pana bhāriyaṃ. Sahetukaṃ vā sakāraṇaṃ katvā pucchanaṃpi vissajjanaṃpi bhāriyameva. **Samanumodimsūti** samacittā hutvā anumodimsu. Iti yathānusandhināva desanā niṭṭhitāti.

Papañcasūdaniyā majjhimanikāyaṭṭhakathāya

Rathavinītasuttavaṇṇanā niṭṭhitā.

5. Nivāpasuttavaṇṇanā

261. Evaṃ me sutanti nivāpasuttaṃ. Tattha **nevāpikoti** yo migānaṃ gahaṇatthāya araññe tiṇabījāni vapati “idaṃ tiṇaṃ khādituṃ āgate mige sukhaṃ gaṇhissāmī”ti. **Nivāpanti** vappaṃ. **Nivuttanti** vapitaṃ. **Migajātāti** migaghaṭā. **Anupakhajjāti** anupavisitvā. **Mucchitāti** taṇhāmucchanāya mucchitā, taṇhāya hadayaṃ pavisitvā mucchanākāraṃ pāpitāti attho. **Madam āpajjissanti** mānamadaṃ āpajjissanti. **Pamādanti** viṣṭhasatibhāvaṃ. **Yathākāmakaraṇiyā bhavissanti** yathā icchissāma, tathā kātabbā bhavissanti. **Imasmiṃ nivāpeti** imasmiṃ nivāpaṭṭhāne. Ekaṃ kira nivāpatiṇaṃ nāma atthi nidāghabhaddakaṃ, taṃ yathā

yathā nidāgho hoti, tathā tathā nīvāraṇaṃ viya meghamālā viya ca ekagghanaṃ hoti, taṃ luddakā ekasmiṃ udakaphāsukatṭhāne kasitvā vapitvā vatim katvā dvāraṃ yojetvā rakkhanti. Atha yadā mahānidāghe sabbatiṇāni sukkhāni honti, jivhātemanamattampi udakaṃ dullabhaṃ hoti, tadā migajātā sukkhatiṇāni ceva purāṇapaṇṇāni ca khādantā kampamānā viya vicarantā nivāpatiṇassa gandhaṃ ghāyitvā vadhabandhanādīni agaṇayitvā vatim ajjhottharantā pavisanti. Tesāhi nivāpatiṇaṃ ativiya piyaṃ hoti manāpaṃ. Nevāpiko te disvā dve tīni divasāni pamatto viya hoti, dvāraṃ vivaritvā tiṭṭhati. Antonivāpaṭṭhāne taḥim taḥim udakaāvāṭakāpi honti, migā vivaṭadvārena pavisitvā khāditamattakaṃ pivitamattakameva katvā pakkamanti, punadivase kiñci na karontīti kaṇṇe cālayamānā khādītā pivitvā ataramānā gacchanti, punadivase koci kiñci kattā natthīti yāvadatthaṃ khādītā pivitvā maṇḍalagumbaṃ pavisitvā nipajjanti. Luddakā tesam pamattabhāvaṃ jānitvā dvāraṃ pidhāya samparivāretvā koṭito paṭṭhāya koṭṭetvā gacchanti, evaṃ te tasmim nivāpe nevāpikassa yathākāmakaraṇīyā bhavanti.

262. Tatra, bhikkhavi, bhikkhave, tesu migajātesu. Paṭhamā migajātāti, migajātā paṭhamadutiya nāma natthi. Bhagavā pana āgatapaṭipāṭivasena kappetvā paṭhamā, dutiyā, tatiyā, catutthāti nāmaṃ āropetvā dassesi. **Iddhānubhāvāti** yathākāmaṃ kattabbabhāvato; vasībhāvoyeva hi ettha iddhīti ca ānubhāvoti ca adhippeto.

263. Bhayabhogāti bhayena bhogato. **Balavīriyanti** aparāparaṃ sañcaraṇavāyodhātu, sā parihāyīti attho.

264. Upanissāya āsayam kappeyyāmāti anto nipajjitvā khādantānampi bhayameva, bāhirato āgantvā khādantānampi bhayameva, mayaṃ pana amuṃ nivāpaṭṭhānaṃ nissāya ekamante āsayam kappeyyāmāti cintayimsu. **Upanissāya āsayam kappayimsūti** luddakā nāma na sabbakālaṃ appamattā honti. Mayaṃ tattha tattha maṇḍalagumbesu ceva vatipādesu ca nipajjitvā etesu mukhadhovanatthaṃ vā āhārikiccarāṇatthaṃ vā pakkantesu nivāpavatthum pavisitvā khāditamattam katvā amhākaṃ vasanaṭṭhānaṃ pavisissāmāti nivāpavatthum upanissāya gahanesu gumbavatipādādisu āsayam kappayimsu. **Bhuñjimsūti** vuttanayena luddakānaṃ pamādakālaṃ ṇatvā sīghaṃ sīghaṃ pavisitvā bhuñjimsu. **Ketabinoti** sikkhitakerāṭikā. **Iddhimantāti** iddhimanto viya. **Parajanāti** yakkhā. Ime na migajātāti. **Āgatiṃ vā gatiṃ vāti** iminā nāma ṭhānena āgacchanti, amutra gacchantīti idaṃ nesam na jānāma. **Daṇḍavākarāhīti** daṇḍavākarajālehi. **Samantā sappadesam anuparivāresunti** atimāyāvino ete, na dūraṃ gamissanti, santikeyeva nipannā bhavissantīti nivāpakkhattassa samantā sappadesam mahantaṃ okāsam anuparivāresum. **Addasaṃsūti** evaṃ parivāretvā vākarajālaṃ samantato cāletvā oloketā addasaṃsu. **Yattha teti** yasmim ṭhāne te gāhaṃ agamaṃsu, taṃ ṭhānaṃ addasaṃsūti attho.

265. Yaṃnūna mayaṃ yattha agatīti te kira evaṃ cintayimsu – “anto nipajjitvā anto khādantānampi bhayameva, bāhirato āgantvā khādantānampi santike vasitvā khādantānampi bhayameva, tepi hi vākarajālena parikkhipitvā gahitāyevā”ti, tena tesam etadahosi – “yaṃnūna mayaṃ yattha nevāpikassa ca nevāpikaparissāya ca agati avisayo, tattha tattha seyyam kappeyyāmā”ti. **Aññe ghaṭṭessanti** tato tato dūrataravāsino aññe ghaṭṭessanti. **Te ghaṭṭitā aññeti** tepi ghaṭṭitā aññe tato dūrataravāsino ghaṭṭessanti. **Evaṃ imaṃ nivāpaṃ nivuttaṃ sabbaso migajātā parimuccissantīti** evaṃ imaṃ amhehi nivuttaṃ nivāpaṃ sabbe migaghaṭṭā migasaṅghā vissajjessanti pariccajjessanti. **Ajjhupekkheyāmāti** tesam gahaṇe abyāvaṭṭā bhaveyyāmāti; yathā tathā āgacchantesu hi taruṇapotako vā mahallako vā dubbalo vā yūthaparihīno vā sakkā honti laddhum, anāgacchantesu kiñci natthi. **Ajjhupekkhimsu kho, bhikkhavi** evaṃ cintetvā abyāvaṭṭāva ahesum.

267. Amuṃ nivāpaṃ nivuttaṃ mārassa amūni ca lokāmisānīti ettha nivāpoti vā lokāmisānīti vā vaṭṭāmisabhūtānaṃ pañcannaṃ kāmaguṇānametaṃ adhivacanaṃ. Māro na ca bījāni viya kāmaguṇe vapento āhīṇḍati, kāmaguṇagiddhānaṃ pana upari vasaṃ vatteti, tasmā kāmaguṇā mārassa nivāpā nāma honti. Tena vuttaṃ – “amuṃ nivāpaṃ nivuttaṃ mārassa”ti. **Na parimuccimsu mārassa iddhānubhāvāti** mārassa vasaṃ gatā ahesum, yathākāmakaraṇīyā. Ayaṃ saputtabhariyapabbajjāya āgataupamā.

268. Cetovimutti parihāyīti ettha cetovimutti nāma araṇṇe vasissāmāti uppannaajjhāsayo; so parihāyīti attho. **Tathūpame ahaṃ ime dutiyeti** ayaṃ brāhmaṇadhammikapabbajjāya upamā. Brāhmaṇā hi atṭhacattālīsavassāni komārabrahmacariyaṃ caritvā vaṭṭupacchedabhayena pavēniṃ ghaṭṭayissāmāti dhanam pariyesitvā bhariyaṃ gahetvā agāramajjhe vasantā ekasmiṃ putte jāte “amhākaṃ putto jāto vaṭṭam na ucchinnaṃ pavēni ghaṭṭitā”ti puna nikkhamitvā pabbajanti vā tameva vā sa’kalattavāsaṃ vasanti.

269. Evañhi te, bhikkhave, tatiyāpi samaṇabrāhmaṇā na parimuccimsūti purimā viya tepi mārassa iddhānubhāvā na muccimsu; yathākāmakaraṇīyāva ahesuṃ. Kiṃ pana te akaṃsūti? Gāmanigamarājadhāniyo osarivā tesu tesu āramaūyānaṭṭhānesu assamaṃ māpetvā nivasantā kuladārake hatthiassarathasippādīni nānappakārāni sippāni sikkhāpesuṃ. Iti te vākarajālena tatiyā migajātā viya mārassa pāpimato ditṭhijālena parikkhipitvā yathākāmakaraṇīyā ahesuṃ.

270. Tathūpame ahaṃ ime catuttheti ayaṃ imassa sāsanassa upamā āhaṭā.

271. Andhamakāsi māranti na mārassa akkhīni bhindi. Vipassanāpādakajjhānaṃ samāpannassa pana bhikkhuno imaṃ nāma ārammaṇaṃ nissāya cittaṃ vattatīti māro passituṃ na sakkoti. Tena vuttaṃ – “andhamakāsi māra”nti. **Apadaṃ vadhitvā māraccakkhanti** teneva pariyāyena yathā mārassa cakkhu apadaṃ hoti nippadaṃ, appatitṭhaṃ, nirārammaṇaṃ, evaṃ vadhitvāti attho. **Adassanaṃ gato pāpimatoti** teneva pariyāyena mārassa pāpimato adassanaṃ gato. Na hi so attano maṃsacakkhunā tassa vipassanāpādakajjhānaṃ samāpannassa bhikkhuno ñāṇasarīraṃ daṭṭhuṃ sakkoti. **Paññāya cassa disvā āsavā parikkhīṇā hontīti** maggapaññāya cattāri ariyasaccāni disvā cattāro āsavā parikkhīṇā honti. **Tiṇṇo loke visattikanti** loke sattavisattabhāvena visattikāti evaṃ saṅkhaṃ gataṃ. Atha vā “visattikāti kenaṭṭhena visattikā? Visatīti visattikā visaṭīti visattikā, vipulīti visattikā, visālīti visattikā, visamāti visattikā, visakkaṭīti visattikā, viṣaṃ haratīti visattikā, viṣaṃvādikāti visattikā, viṣamūlīti visattikā, viṣaphalīti visattikā, viṣaparibhogāti visattikā, visālā vā pana sā taṇhā rūpe sadde gandhe rase phoṭṭhabbe”ti (mahāni. 3; cūḷani. mettagūmaṇāvapucchāniddeśa 22, khaggaviśāṇasuttaniddeśa 124) visattikā. Evaṃ visattikāti saṅkhaṃ gataṃ taṇhaṃ tiṇṇo nittiṇṇo uttiṇṇo. Tena vuccati – “tiṇṇo loke visattika”nti.

Papañcasūdaniyā majjhimanikāyaṭṭhakathāya

Nivāpasuttavaṇṇanā niṭṭhitā.

6. Pāsarāsisuttavaṇṇanā

272. Evaṃ me sutanti pāsarāsisuttaṃ. Tattha **sādhu mayaṃ, āvusoti** āyācantā bhaṇanti. Ete kira pañcasatā bhikkhū janapadavāsīno “dasabalaṃ passissāmā”ti sāvatthiṃ anuppattā. Satthudassanaṃ pana etehi laddhaṃ, dhammiṃ kathaṃ na tāva suṇanti. Te satthugāravena “amhākaṃ, bhante, dhammakathaṃ kathethā”ti vattuṃ na sakkonti. Buddhā hi garū honti, ekacāriko sīho migarājā viya, pabhinnakuñjaro viya, phaṇakataāsīviso viya, mahāaggikkhandho viya ca durāsadā vuttampi cetam –

“Āsīviso yathā ghero, migarājāva kesarī;
Nāgova kuñjaro dantī, evaṃ buddhā durāsadā”ti.

Evaṃ durāsadaṃ satthāraṃ te bhikkhū sayam yācituṃ asakkontā āyasmantaṃ ānandaṃ yācamānā “sādhu mayaṃ, āvuso”ti āhaṃsu.

Appeva nāmāti api nāma labheyyātha. Kasmā pana thero te bhikkhū “rammakassa brāhmaṇassa assamaṃ upasaṅkameyyāthā”ti āha? Pākaṭakiriyaṭṭhāya. Dasabalassa hi kiriyaṃ therassa pākaṭā hoti; jānāti thero, “ajja satthā jetavane vasitvā pubbārāme divāvihāraṃ karissati; ajja pubbārāme vasitvā jetavane divāvihāraṃ karissati; ajja ekakova piṇḍāya pavissati; ajja bhikkhusaṅghaparivuto imasmim kāle janapadacārikaṃ nikkhamissati”ti. Kiṃ panassa evaṃ jānanatthaṃ cetopariyañānaṃ atthīti? Natthi. Anumānabuddhiyā pana katakiriyaṭṭhāya nayaggāhena jānāti. Yañhi divasaṃ bhagavā jetavane vasitvā pubbārāme divāvihāraṃ kātukāmo hoti, tadā senāsanaparikkhārabhaṇḍānaṃ paṭisāmanākāraṃ dasseti, thero sammajjanisaṅkārachaḍḍanakādīni paṭisāmeti. Pubbārāme vasitvā jetavanaṃ divāvihāraṃ āgamanakālepi eseva nayo.

Yadā pana ekako piṇḍāya pavisitukāmo hoti, tadā pātova sarīrapaṭiṭṭhānaṃ katvā gandhakuṭṭhiṃ pavisitvā dvāraṃ pidhāya phalasaṃpattim appetvā nisīdati. Thero “ajja bhagavā bodhaneyyabandhavaṃ disvā nisīno”ti tāya saññāya ñatvā “ajja, āvuso, bhagavā ekako pavisitukāmo, tumhe bhikkhācārasajjā hothā”ti bhikkhūnaṃ saññaṃ deti. Yadā pana bhikkhusaṅghaparivāro pavisitukāmo hoti, tadā gandhakuṭṭhidvāraṃ upaḍḍhapidahitaṃ katvā phalasaṃpattim appetvā nisīdati, thero tāya saññāya ñatvā pattacīvaraggahaṇatthāya

bhikkhūnaṃ saññaṃ deti. Yadā janapadacārikaṃ nikkhamitukāmo hoti, tadā ekaṃ dve ālope atirekaṃ bhūñjati, sabbakālaṃ caṅkamaṇācāruya aparāparaṃ caṅkamati, thero tāya saññāya ñatvā “bhagavā, āvuso, janapadacārikaṃ caritukāmo, tumhākaṃ kattabbaṃ karothā”ti bhikkhūnaṃ saññaṃ deti.

Bhagavā paṭhamabodhiyaṃ vīsati vassāni anibaddhavāso ahoṣi, pacchā pañcavīsati vassāni abbokiṇṇaṃ sāvattiyaṃ upanissāya vasanto ekadivase dve ṭhānāni paribhuñjati. Jetavane rattiyaṃ vasitvā punadivase bhikkhusaṅghaparivuto dakkhiṇadvārena sāvattiyaṃ piṇḍāya pavisitvā pācīnadvārena nikkhamitvā pubbārāme divāvihāraṃ karoti. Pubbārāme rattiyaṃ vasitvā punadivase pācīnadvārena sāvattiyaṃ piṇḍāya pavisitvā dakkhiṇadvārena nikkhamitvā jetavane divāvihāraṃ karoti. Kasmā? Dvinnāṃ kulānaṃ anukampāya. Manussattaḥbhāve ṭhitena hi anāthapiṇḍikena viya aññaṇa kenaci, mātugāmatṭabhāve ṭhitāya ca visākhāya viya aññaṇā itthiyā tathāgataṃ uddissa dhanapariccāgo kato nāma natthi, tasmā bhagavā tesāṃ anukampāya ekadivase imāni dve ṭhānāni paribhuñjati. Tasmiyaṃ pana divase jetavane vasi, tasmā thero – “ajja bhagavā sāvattiyaṃ piṇḍāya caritvā sāyanhakāle gattāni parisiñcanatthāya pubbakoṭṭhakaṃ gamissati; athāhaṃ gattāni parisiñcivā ṭhitaṃ bhagavantaṃ yācivā rammakassa brāhmaṇassa assamaṃ gahetvā gamissāmi. Evamime bhikkhū bhagavato sammukhā labhissanti dhammakathaṃ savanāyā”ti cintevā te bhikkhū evamāha.

Migāramātupāsādoti visākhāya pāsādo. Sā hi migārena seṭṭhinā mātutṭhāne ṭhapitattā **migāramātāti** vuccati. **Paṭisallānā vuṭṭhitoti** tasmiyaṃ kira pāsāde dvinnāṃ mahāsāvakaṇaṃ sirigabbhānaṃ majjhe bhagavato sirigabbho ahoṣi. Thero dvāraṃ vivaritvā antogabbhaṃ sammajjivā mālākacavaraṃ nīharitvā mañcapīṭhaṃ paññapetvā satthu saññaṃ adāsi. Satthā sirigabbhaṃ pavisitvā dakkhiṇena passena sato sampajāno sīhaseyyaṃ upagamma darathaṃ paṭippassambhetvā utṭhāya phalasaṃpattiyaṃ appetvā nisīditvā sāyanhasamaye tato vuṭṭhāsi. Taṃ sandhāya vuttaṃ “paṭisallānā vuṭṭhito”ti.

Parisiñcivā yo hi cuṇṇamattikādīhi gattāni ubbaṭṭento mallakamuṭṭhādīhi vā ghaṃsanto nhāyati, so **nhāyatīti** vuccati. Yo tathā akatvā pakatiyāva nhāyati, so **parisiñcatīti** vuccati. Bhagavatopi sarīre tathā haritabbaṃ rajojallaṃ nāma na upalimpati, utuggahaṇatthaṃ pana bhagavā kevalaṃ udakaṃ otarati. Tenāha – “gattāni parisiñcivā”nti. **Pubbakoṭṭhako**ti pācīnakoṭṭhako.

Sāvattiyaṃ kira vihāro kadāci mahā hoti kadāci khuddako. Tathā hi so vipassissa bhagavato kāle yojaniko ahoṣi, sikhissa tigāvuto, vessabhussa aḍḍhayanjaniko, kakusandhassa gāvutappamaṇo, koṇāgamaṇassa aḍḍhagāvutappamaṇo, kassapassa vīsatiyabhappamaṇo, amhākaṃ bhagavato kāle aṭṭhakarīsappamaṇo jāto. Tampi nagaraṃ tassa vihārasa kadāci pācīnato hoti, kadāci dakkhiṇato, kadāci pacchimoto, kadāci uttarato. Jetavane gandhakuṭiyaṃ pana catunnaṃ mañcapādānaṃ patiṭṭhitaṭṭhānaṃ acalameva.

Cattāri hi **acalacetiyaṭṭhānāni** nāma mahābodhipallaṅkatṭhānaṃ isipātane dhammacakkappavattanaṭṭhānaṃ saṅkassanagaradvāre devorohaṇakāle sopānassa patiṭṭhitaṭṭhānaṃ mañcapādāṭṭhānanti. Ayaṃ pana pubbakoṭṭhako kassapadasabalassa vīsatiyabhavivihāraṅkāle pācīnadvāre koṭṭhako ahoṣi. So idānipi pubbakoṭṭhakovēva paññāyati. Kassapadasabalassa kāle aciravatī nagaraṃ parikkhipitvā sandamānā pubbakoṭṭhakaṃ patvā udakena bhinditvā mahantaṃ udakarahadaṃ māpesi samatitthaṃ anupubbagaṃbhīraṃ. Tattha ekaṃ rañño nhānatitthaṃ, ekaṃ nāgarānaṃ, ekaṃ bhikkhusaṅghassa, ekaṃ buddhānanti evaṃ pāṭiyekkāni nhānatitthāni honti ramaṇīyāni vippakiṇṇarajatapaṭṭasadisavālikāni. Iti bhagavā āyasmatā ānandena saddhiṃ yena ayaṃ evarūpo pubbakoṭṭhako tenupasaṅkami gattāni parisiñcivā. Athāyasmā ānando udakasāṭikaṃ upanesi. Bhagavā rattadupaṭṭaṃ apanetvā udakasāṭikaṃ nivāsesi. Thero dupaṭṭena saddhiṃ mahācīvaraṃ attano hatthagatamakāsi. Bhagavā udakaṃ otari. Sahotaraṇenevassa udake macchakacchapā sabbe suvaṇṇavaṇṇā ahesuṃ. Yantanālikāhi suvaṇṇarasadhārānisīcamānakālo viya suvaṇṇapaṭapāsāraṇakālo viya ca ahoṣi. Atha bhagavato nhānavattaṃ dassetvā natvā paccuttiṇṇassa thero rattadupaṭṭaṃ upanesi. Bhagavā taṃ nivāsetvā vijjulatāsadisāṃ kāyabandhanaṃ bandhitvā mahācīvaraṃ antantena saṃharitvā padumagabbhasadisāṃ katvā upanītaṃ dvīsu kaṇṇesu gahetvā aṭṭhāsi. Tena vuttaṃ – “pubbakoṭṭhake gattāni parisiñcivā paccuttarivā ekacīvaro aṭṭhāsi”ti.

Evaṃ ṭhitassa pana bhagavato sarīraṃ vikasitakamaluppasāraṃ sabbapāliphullaṃ pāricchattaṃ tārāmarīcivikasitaṃ ca gaganatalaṃ siriyā avahasamānaṃ viya virocittha. Byāmapabhāparikkhepavilāsīni cassa dvattiṃsavaralakkhaṇamālā ganthetvā ṭhapitā dvattiṃsacandamālā viya, dvattiṃsasūriyamālā viya,

paṭipāṭiyā ṭhapitā dvattiṃsacakkavatti dvattiṃsadevarājā dvattiṃsamahābrahmāno viya ca ativiya virocittha, vaṇṇabhūmināmesā. Evarūpesu ṭhānesu buddhānaṃ sarīravaṇṇaṃ vā guṇavaṇṇaṃ vā cuṇṇiyapadehi vā gāthāhi vā atthañca upamāyo ca kāraṇāni ca āharitvā paṭibalena dhammakathikena pūretvā kathetum vaṭṭatīti evarūpesu ṭhānesu dhammakathikassa thāmo veditabbo.

273. Gattāni pubbāpayamānoti pakatibhāvaṃ gamayamāno nirudakāni kurumāno, sukkhāpayamānoti attho. Sodakena gattena cīvaraṃ pārupantassa hi cīvare kaṇṇikā uṭṭhahanti, parikkhārabhaṇḍaṃ dussati. Buddhānaṃ pana sarīre rajojallaṃ na upalimpati; padumapatte pakkhittaudakabindu viya udakaṃ vinivattetvā gacchati, evaṃ santepi sikkhāgāravatāya bhagavā, “pabbajitavattaṃ nāmeta”nti mahācīvaraṃ ubhosu kaṇṇesu gahetvā purato kāyaṃ paṭicchādetvā aṭṭhāsi. Tasmim̄ khaṇe thero cintesi – “bhagavā mahācīvaraṃ pārupitvā migāramātupāsādaṃ ārabha gamanābhīharato paṭṭhāya dunnivattiyo bhavissati; buddhānañhi adhippāyakopanaṃ nāma ekacārikasīhassa gahaṇatthaṃ hatthappasāraṇaṃ viya; pabhinnavaravāraṇassa soṇḍāya parāmasanaṃ viya; uggatejassa āsīvisassa gīvāya gahaṇaṃ viya ca bhāriyaṃ hoti. Idheva rammaḥassa brāhmaṇassa assamassa vaṇṇaṃ kathetvā tattha gamanatthāya bhagavantaṃ yācissāmī”ti. So tathā akāsi. Tena vuttaṃ – “atha kho āyasmā ānando...pe... anukampaṃ upādāyā”ti.

Tattha **anukampaṃ upādāyāti** bhagavato sammukhā dhammiṃ kathaṃ sossāmāti taṃ assamaṃ gatānaṃ pañcannaṃ bhikkhusatānaṃ anukampaṃ paṭicca, tesu kāruṇīyaṃ katvāti attho. **Dhammiyā kathāyāti** dasasu pāramitāsu aññatarāya pāramiyā ceva mahābhīnikkhamanassa ca vaṇṇaṃ kathayamānā sannisinnā honti. **Āgamayamānoti** olokayamāno. Ahaṃ buddhoti sahasā appavisitvā yāva sā kathā niṭṭhāti, tāva aṭṭhāsīti attho. **Aggaḷaṃ ākoṭesīti** agganakhena kavāṭe saññaṃ adāsi. **Vivarimsūti** sotaṃ odahitvāva nisinnattā taṅkhaṇaṃyeva āgantvā vivarimsu.

Paññatte āsaneti buddhakāle kira yattha yattha ekopi bhikkhu viharati, sabbattha buddhānaṃ paññattameva hoti. Kasmā? Bhagavā kira attano santike kammaṭṭhānaṃ gahetvā phāsukaṭṭhāne viharante manasi karoti “asuko mayhaṃ santike kammaṭṭhānaṃ gahetvā gato, sakkhissati nu kho visesaṃ nibbattetum no vā”ti. Atha naṃ passati kammaṭṭhānaṃ vissajjetvā akusalavitakke vitakkayamānaṃ, tato “kathañhi nāma mādisassa satthu santike kammaṭṭhānaṃ gahetvā viharantaṃ imaṃ kulaputtaṃ akusalavitakkā abhibhavitvā anamatagge vaṭṭadukkhe saṃsāressanti”ti tassa anuggahatthaṃ tattheva attānaṃ dassetvā taṃ kulaputtaṃ ovaditvā ākāsaṃ uppatitvā puna attano vasanaṭṭhānameva gacchati. Athevaṃ ovadiyamānā te bhikkhū cintayimsu – “satthā amhākaṃ manaṃ jānitvā āgantvā amhākaṃ samīpe ṭhitamyeva attānaṃ dasseti; tasmim̄ khaṇe, ‘bhante, idha nisīdatha, idha nisīdatha’ti āsanapariyesanaṃ nāma bhāro”ti. Te āsanaṃ paññapetvā viharanti. Yassa pīṭhaṃ atthi, so taṃ paññapeti. Yassa natthi, so mañcaṃ vā phalakaṃ vā kaṭṭhaṃ vā pāsānaṃ vā vālikapuñjaṃ vā paññapeti. Taṃ alabhamānā purāṇapaṇṇānipi saṅkaḍḍhitvā tattha paṃsukūlaṃ pattharitvā ṭhapenti. Idha pana pakatipaññattameva āsanaṃ ahoṣi, taṃ sandhāya vuttaṃ – “paññatte āsane nisīdī”ti.

Kāya nutthāti katamāya nu kathāya sannisinnā bhavathāti attho. “Kāya netthā”tipi pāli, tassā katamāya nu etthāti attho. “Kāya notthā”tipi pāli, tassāpi purimoyeva attho. **Antarā kathāti** kammaṭṭhānaṃmanasikārauddesaparipucchādīnaṃ antarā aññā ekā kathā. **Vippakatāti** mama āgamanapaccayā apariniṭṭhitā sikkhaṃ appattā. **Atha bhagavā anuppattoti** atha etasmim̄ kāle bhagavā āgato. **Dhammī vā kathāti** dasakathāvattunissitā vā dhammī kathā. **Ariyo vā tuṇhībhāvoti** ettha pana dutiyajjhānampi ariyo tuṇhībhāvo mūlakammaṭṭhānampi. Tasmā taṃ jhānaṃ appetvā nisinnopi, mūlakammaṭṭhānaṃ gahetvā nisinnopi bhikkhu ariyena tuṇhībhāvena nisinnoti veditabbo.

274. Dvemā, bhikkhave, pariyesanāti ko anusandhi? Te bhikkhū sammukhā dhammiṃ kathaṃ sossāmāti therassa bhāraṃ akaṃsu, thero tesam̄ assamaganamakāsi. Te tattha nisīditvā atiracchānakathikā hutvā dhammiyā kathāya nisīdīmsu. Atha bhagavā “ayaṃ tumhākaṃ pariyesanā ariyapariyesanā nāmā”ti dassetum imaṃ desanaṃ ārabhi. Tattha **katamā ca, bhikkhave, anariyapariyesanāti** ettha yathā maggakusalo puriso paṭhamaṃ vajjetabbaṃ apāyamaḡgaṃ dassento “vāmaṃ muñcitvā dakkhiṇaṃ gaṇhā”ti vadati. Evaṃ bhagavā desanākusalatāya paṭhamaṃ vajjetabbaṃ anariyapariyesanaṃ ācikkhitvā pacchā itaraṃ ācikkhissāmīti uddesaṇukkamaṃ bhinditvā evamāha. **Jātidhammoti** jāyanasabhāvo. **Jarādhammoti** jīraṇasabhāvo. **Byādhidhammoti** byādhisabhāvo. **Maraṇadhammoti** maraṇasabhāvo. **Sokadhammoti** socanakasabhāvo. **Samkilesadhammoti** samkilissanasabhāvo.

Puttabhariyanti puttā ca bhariyā ca. Esa nayo sabbattha. **Jātarūparajatanti** ettha pana **jātarūpanti** suvaṇṇaṃ. **Rajatanti** yaṃkiñci vohārūpagaṃ lohamāsakādi. **Jātidhammā hete, bhikkhave, upadhayoti** ete pañcakāmaguṇūpadhaya nāma honti, te sabbepi jātidhammāti dasseti. Byādhidhammavārādīsu jātarūparajataṃ na gahitaṃ, na hetassa sīsarogādayo byādhayo nāma honti, na sattānaṃ viya cutisaṅkhātāṃ maraṇaṃ, na soko uppajjati. Ayādīhi pana saṃkilesehi saṃkilissatīti saṃkilesadhammavāre gahitaṃ. Tathā utusamuṭṭhānattā jātidhammavāre. Malaṃ gahetvā jīraṇato jarādhammavāre ca.

275. Ayaṃ , bhikkhave, ariyā pariyesanāti, bhikkhave, ayaṃ niddosatāyapi ariyehi pariyesitabbatāyapi ariyapariyesanāti vedītabbā.

276. Ahampi sudam, bhikkhaveli kasmā ārabhi? Mūlato paṭṭhāya mahābhinnikkhamaṇaṃ dassetuṃ. Evaṃ kirassa ahoṣi – “bhikkhave, ahampi pubbe anariyapariyesanaṃ pariyesim. Svāhaṃ taṃ pahāya ariyapariyesanaṃ pariyesitvā sabbaññutaṃ patto. Pañcavaggiyāpi anariyapariyesanaṃ pariyesimsu. Te taṃ pahāya ariyapariyesanaṃ pariyesitvā khīṇāsavabhūmiṃ patṭā. Tumhepi mama ceva pañcavaggiyānañca maggaṃ āruḷhā. Ariyapariyesanā tumhākaṃ pariyesanā”ti mūlato paṭṭhāya attano mahābhinnikkhamaṇaṃ dassetuṃ imaṃ desanaṃ ārabhi.

277. Tatha **daharova samānoti** taruṇova samāno. **Susukāḷakesoti** suṭṭhu kāḷakeso, añjanavaṇṇakesova hutvāti attho. **Bhadrenāti** bhaddakena. **Paṭhamena vayasāti** tiṇṇaṃ vayanāṃ paṭhamavayena. **Akāmakanānti** anicchamānānaṃ, anādaratthe sāmivacanaṃ. Assūni mukhe etesanti assumukhā; tesaṃ **assumukhānaṃ**, assukilinnamukhānanti attho. **Rudantānanti** kantiṭvā rodamaṇānaṃ. **Kim kusalagavesīti** kiṃ kusalanti gavesamaṇo. **Anuttaraṃ santivarapadanti** uttamaṃ santisaṅkhātāṃ varapadaṃ, nibbānaṃ pariyesamaṇoti attho. **Yena āḷāro kālāmoti** ettha **āḷāroti** tassa nāmaṃ, dīghapiṅgalo kireso. Tenassa **āḷāroti** nāmaṃ ahoṣi. **Kālāmoti** gottāṃ. **Viharatāyasmāti** viharatu āyasmā. **Yattha viññū purisoti** yasmim dhamme paṇḍito puriso. **Sakaṃ ācariyakanti** attano ācariyasamayaṃ. **Upasampajja vihareyyāti** paṭilabhivā vihareyya. Ettāvata tena okāso kato hoti. **Taṃ dhammanti** taṃ tesaṃ samayaṃ tantim. **Pariyāpuṇinti** sutvāva uggaṇhim.

Oṭṭhapahatamattenāti tena vuttassa paṭiggahaṇatthaṃ oṭṭhapaharaṇamattena; aparāparaṃ katvā oṭṭhasañcaraṇamattakenāti attho. **Lapitalāpanamattenāti** tena lapitassa paṭilāpanamattakena. **Ñāṇavadanti** jānāmīti vadaṃ. **Theravadanti** thirabhāvavadaṃ, thero ahametthāti etaṃ vacanaṃ. **Ahañceva aññe cāti** na kevalaṃ ahaṃ, aññepi bahū evaṃ vadanti. **Kevalaṃ saddhāmattakenāti** paññāya asacchikatvā suddhena saddhāmattakeneva. Bodhisatto kira vācāya dhammaṃ uggaṇhantoyeva, “na kālāmassa vācāya pariyaṭṭimattameva asmiṃ dhamme, addhā esa sattannaṃ samāpattīnaṃ lābhī”ti aññāsi, tenassa etadahosi.

Ākiñcaññāyatanaṃ pavedesīti ākiñcaññāyatanapariyosānā satta samāpattiyo maṃ jānāpesi. **Saddhāti** imāsaṃ sattannaṃ samāpattīnaṃ nibbattanattāya saddhā. **Vīriyādīsipi** eseva nayo. **Padaheyyanti** payogaṃ kareyyaṃ. **Nacirasseva taṃ dhammaṃ sayam abhiññā sacchikatvā upasampajja vihasīti** bodhisatto kira vīriyaṃ paggahetvā katipāhaññeva satta suvaṇṇanisseṇiyo pasārento viya satta samāpattiyo nibbattesi; tasmā evamāha.

Lābhā no, avusoti anusūyako kiresa kālāmo. Tasmā “ayaṃ adhunāgato, kinti katvā imaṃ dhammaṃ nibbattesi”ti usūyaṃ akatvā pasanno pasādaṃ pavedento evamāha. **Ubhova santā imaṃ gaṇaṃ pariharāmāti** “mahā ayaṃ gaṇo, dvepi janā pariharāmā”ti vatvā gaṇassa saññaṃ adāsi, “ahampi sattannaṃ samāpattīnaṃ lābhī, mahāpurisopi sattannaṃeva, ettakā janā mahāpurisassa santike parikkammaṃ uggaṇhatha, ettakā mayha”nti majjhe bhinditvā adāsi. **Uḷārāyāti** uttamāya. **Pūjāyāti** kālāmassa kira upaṭṭhākā itthiyopi purisāpi gandhamālādīni gahetvā āgacchanti. Kālāmo – “gacchatha, mahāpurisaṃ pūjethā”ti vadati. Te taṃ pūjetvā yaṃ avasiṭṭhaṃ hoti, tena kālāmaṃ pūjenti. Mahagghāni mañcapīṭhāni āharanti; tānipi mahāpurisassa dāpetvā yadi avasiṭṭhaṃ hoti, attanā gaṇhāti. Gatagataṭṭhāne varasenāsaṇaṃ bodhisattassa jaggāpetvā sesakaṃ attanā gaṇhāti. Evaṃ uḷārāya pūjāya pūjesi. **Nāyaṃ dhammo nibbidāyāti**ādīsū ayaṃ satta samāpattidhammo neva vaṭṭe nibbindanattāya, na virajjanattāya, na rāgādinirodhattāya, na upasamattāya, na abhiññeyyadhammaṃ abhijānanattāya, na catumaggasambodhāya, na nibbānasacchikiriyāya saṃvattatīti attho.

Yāvadeva ākiñcaññāyatanūpapattiyāti yāva saṭṭhikappasahassāyuparimāṇe ākiñcaññāyatanabhava

upapatti, tāvadeva samvattati, na tato uddham. Evamayam punarāvattanadhammoyeva; yañca thānam pāpeti, tam jātijarāmarañehi aparimuttameva maccupāsaparikkhittamevāti. Tato paṭṭhāya ca pana mahāsatto yathā nāma chātajjhappuriso manuññabhojanam labhivā sampiyāyamānopi bhujjivā pittavasena vā semhavasena vā makkhikāvasena vā chaḍḍetvā puna ekam piṇḍampi bhujjissāmīti manam na uppādeti; evameva imā satta samāpattiyō mahantena ussāhena nibbattetvāpi, tāsū imam punarāvattikādibhedam ādinavam disvā, puna imam dhammam āvajjissāmi vā samāpajjissāmi vā adhiṭṭhahissāmi vā vutṭhahissāmi vā paccavekkhissāmi vāti cittameva na uppādesi. **Analañkaritvāti** alam iminā, alam imināti punappunam alaṅkaritvā. **Nibbijjāti** nibbinditvā. **Apakkaminti** agamāsiṃ.

278. Na kho rāmo imam dhammanti idhāpi bodhisatto tam dhammam uggaṇhantoyeva aññāsī – “nāyam aṭṭhasamāpattidhammo udakassa vācāya uggahitamattova, addhā panesa aṭṭhasamāpattilābhī”ti. Tenassa etadahosi – “na kho rāmo...pe... jānam passam vihāsī”ti. Sesamettha purimavāre vuttanayeneva veditabbam.

279. Yena uruvelā senānigamoti ettha **uruvelāti** mahāvelā, mahāvālikarāsīti attho. Atha vā **urūti** vālikā vuccati; **velāti** mariyādā, velātikkanahetu āhaṭā uru **uruvelāti** evamettha attho daṭṭhabbo. Atīte kira anuppanne buddhe dasasahassā kulaputtā tāpasapabbajjam pabbajitvā tasmim padese viharantā ekadivasam sannipatitvā katikavattam akamsu – “kāyakammavacīkammāni nāma paresampi pākāṭāni honti, manokammam pana apākāṭam. Tasmā yo kāmavitakkaṃ vā byāpādavitakkaṃ vā vihiṃsāvitakkaṃ vā vitakketi, tassa añño codako nāma natthi; so attanāva attānam codetvā pattapuṭena vālikam āharitvā imasmim thāne ākiratu, idamassa daṇḍakamma”nti. Tato paṭṭhāya yo tādisam vitakkaṃ vitakketi, so tatha pattapuṭena vālikam ākirati, evam tatha anukkamena mahāvālikarāsī jāto. Tato tam pacchimā janatā parikkhipitvā cetiyatṭhānamakāsi; tam sandhāya vuttam – “**uruvelāti** mahāvelā, mahāvālikarāsīti attho”ti. Tameva sandhāya vuttam – “**atha vā urūti** vālikā vuccati, **velāti** mariyādā. Velātikkanahetu āhaṭā uru uruvelāti evamettha attho daṭṭhabbo”ti.

Senānigamoti senāya nigamo. Paṭhamakappikānam kira tasmim thāne senāniveso ahosi; tasmā so padeso **senānigamoti** vuccati. “Senāni-gāmo”tipi pātho. **Senāni** nāma sujātāya pitā, tassa gāmoti attho. **Tadavasarinti** tatha osariṃ. **Ramaṇīyam bhūmibhāganti** supupphitanānappakārajalajathalajapupphavicittam manoramam bhūmibhāgam. **Pāsādikañca vanasaṇḍanti** morapiñchakalāpasadisam pasādajanavanasaṇḍañca addasam. **Nadiñca sandantinti** sandamānañca mañikkhandhasadisam vimalanīlasītalasalilam nerañjaram nadiṃ addasam. **Setakanti** parisuddham nikkaddamam. **Supatitthanti** anupubbagamabhīrehi sundarehi titthehi upetaṃ. **Ramaṇīyanti** rajatapattasadisam vipakāṇavālikam pahūtamacchakacchapaṃ abhirāmadassanam. **Samantā ca gocaragāmanti** tassa padesassa samantā avidūre gamanāgamanasampannaṃ sampattapabbajitānam sulabhapiṇḍam gocaragāmañca addasam. **Alam vatāti** samattham vata. **Tattheva nisidinti** bodhipallañke nisajjam sandhāyāha. Uparisuttasmīñhi **tatthevāti** dukkarakārikatṭhānam adhippetam, idha pana bodhipallaṅko. Tenāha – “tattheva nisīdi”nti. **Alamidam padhānāyāti** idam thānam padhānatthāya samatthanti evam cintetvā nisidinti attho.

280. Ajjhagamanti adhigacchiṃ paṭilabhiṃ. **Nāṇaṅca pana me dassananti** sabbadhammadassanasamatthañca me sabbaññutaññānam udapādi. **Akuppā me vimuttīti** mayham arahattaphalavimutti akuppatāya ca akuppārammaṇatāya ca akuppā, sā hi rāgādīhi na kuppatīti akuppatāyapi akuppā, akuppaṃ nibbānamassārammaṇantipi akuppā. **Ayamantimā jātīti** ayam sabbapacchimā jāti. **Natthi dāni punabbhavoti** idāni me puna paṭisandhi nāma natthīti evam paccavekkhañāñampī me uppannanti dasseti.

281. Adhigatoti paṭividdho. **Dhammoti** catusaccadhammo. **Gambhīroti** uttānabhāvapaṭikkhepavacanametam. **Duddasoti** gambhīratāvā duddaso dukkhena daṭṭhabbo, na sakkā sukhena daṭṭham. **Duddasattāva duranubodho**, dukkhena avabujjhatabbo, na sakkā sukhena avabujjhitaṃ. **Santoti** nibbuto. **Paṇītoti** atappako. Idam dvayam lokuttarameva sandhāya vuttam. **Atakkāvacaroti** takkena avacaritabbo ogāhitabbo na hoti, nāṇeneva avacaritabbo. **Nipuṇoti** saṅho. **Paṇḍitavedanīyoti** sammāpaṭipadam paṭipannehi paṇḍitehi veditabbo. **Ālayarāmāti** sattā pañcasu kāmaguṇesu allīyanti. Tasmā te **ālayāti** vuccanti. Aṭṭhasatatanhāvicarītāni ālayanti, tasmā ālayāti vuccanti. Tehi ālayehi ramanīti **ālayarāmā**. Ālayesu ratāti **ālayaratā**. Ālayesu suṭṭhu muditāti **ālayasammuditā**. Yatheva hi susajjitam pupphaphalabharitarukkhādisampannaṃ uyyānam pavitṭho rājā tāya tāya sampattiyā ramati, sammudito

āmoditapamodito hoti, na ukkaṅṭhati, sāyampi nikkhamituṃ na icchati; evamimehipi kāmālayatanhālayehi sattā ramanti, saṃsāraṇṭe sammudītā anukkaṅṭhitā vasanti. Tena nesam bhagavā duvidhampi ālayam uyyānabhūmiṃ viya dassento “ālayarāmā”tiādimāha.

Yadidanti nipāto, tassa ṭhānaṃ sandhāya “yaṃ ida”nti, paṭiccasamuppādaṃ sandhāya “yo aya”nti evamattho daṭṭhabbo. **Idappaccayatāpaṭiccasamuppādoti** imesaṃ paccayā idappaccayā; idappaccayā eva idappaccayatā; idappaccayatā ca sā paṭiccasamuppādo cāti **idappaccayatāpaṭiccasamuppādo**. Saṅkhārādipaccayānametaṃ adhvācānaṃ. **Sabbasaṅkhārasamathoti**ādi sabbam nibbānameva. Yasmā hi taṃ āgamma sabbasaṅkhāravipphanditāni sammanti vūpasammanti, tasmā **sabbasaṅkhārasamathoti** vuccati. Yasmā ca taṃ āgamma sabbe upadhayo paṭinissatṭhā honti, sabbā taṇhā khīyanti, sabbe kilesarāgā virajjanti, sabbam dukkhaṃ nirujjhati; tasmā **sabbūpadhipaṭinissaggo taṇhākkhāyo virāgo nirodhoti** vuccati. Sā panesā taṇhā bhavena bhavaṃ, phalena vā saddhiṃ kammaṃ vinati saṃsibbatīti katvā **vānanti** vuccati, tato nikkhantaṃ vānatoti **nibbānaṃ**. **So mamassa kilamathoti** yā ajānantānaṃ desanā nāma, so mama kilamatho assa, sā mama vihesā assāti attho. Kāyakilamatho ceva kāyavihesā ca assāti vuttaṃ hoti. Citte pana ubhayampetaṃ buddhānaṃ natthi. **Apissūti** anubrūhanatthe nipāto, so “na kevalam etadahosi, imāpi gāthā paṭibhamsū”ti dīpeti. **Manti** mama. **Anacchariyāti** anuacchariyā. **Paṭibhamsūti** paṭibhānasāṅkhātassa ñāṇassa gocarā ahesuṃ; parivittakayitabbataṃ pāpuṇiṃsu.

Kicchenati dukkhena, na dukkhāya paṭipadāya. Buddhānañhi cattāropi maggā sukhappaṭipadāva honti. Pāramīpūraṇakāle pana sarāgasadosasamohasseva sato āgatāgatānaṃ yācakānaṃ, alaṅkatappaṭiyattaṃ sīsaṃ kantivā, galalohitaṃ nīharitvā, suañjitāni akkhīni uppātetvā, kulavaṃsappadīpaṃ puttaṃ manāpacāriṇiṃ bhariyanti evamādīni dentassa, aññāni ca khantivādisadisesevā attabhāvesu chejjabhejjādīni pāpuṇantassa āgamaniyappaṭipadaṃ sandhāyetaṃ vuttaṃ. **Halanti** ettha **ha**-kāro nipātamaṃ, **alanti** attho. **Pakāsītuntī** desituṃ, evaṃ kicchena adhigatassa dhammassa alaṃ desituṃ, pariyaṭtaṃ desituṃ, ko attho desitenāti vuttaṃ hoti. **Rāgadosaparetehi**ti rāgadosapariphuṭṭhehi rāgadosānugatehi vā.

Paṭisotagāminti niccādīnaṃ paṭisotaṃ aniccaṃ dukkhamanattā asubhanti evaṃ gataṃ catusaccadhammaṃ. **Rāgarattā**ti kāmarāgena bhavarāgena dīṭṭhirāgena ca rattā. **Na dakkhantī**ti aniccaṃ dukkhamanattā asubhanti iminā sabhāvena na passissanti, te apassante ko sakkhissati evaṃ gāhāpetuṃ. **Tamokhandhena āvuṭṭā**ti avijjārāsinaṃ ajjhotthata.

282. Appossukkatāyāti nirussukkabhāvena, adesetukāmatāyāti attho. Kasmā panassa evaṃ cittaṃ nami, nanu esa mutto mocessāmi, tiṇṇo tāressāmi.

“Kiṃ me aññāta vesena, dhammaṃ sacchikatenidha;
Sabbaññutaṃ pāpuṇitvā, tārayissaṃ sadevaka”nti. (bu. vaṃ. 2.56) –

Patthanaṃ katvā pāramiyo pūretvā sabbaññutaṃ pattoti. Saccametaṃ, tadevaṃ paccavekkhaṇānubhāvena panassa evaṃ cittaṃ nami. Tassa hi sabbaññutaṃ patvā sattānaṃ kilesagahanataṃ, dhammassa ca gambhīrataṃ paccavekkhantassa sattānaṃ kilesagahanatā ca dhammagambhīratā ca sabbākārena pākaṭā jātā. Athassa “ime sattā kañjikapuṇṇā lābu viya, takkabharitā cāṭi viya, vasātelapītapilotikā viya, añjanamakkhitahattho viya ca kilesabharitā atisaṃkiliṭṭhā rāgarattā dosaduṭṭhā mohamūlā, te kiṃ nāma paṭivijjhissantī”ti cintayato kilesagahanapaccavekkhaṇānubhāvenāpi evaṃ cittaṃ nami.

“Ayañca dhammo pathavīsandhārakaudakakkhandho viya gambhīro, pabbatena paṭicchādetvā ṭhapito sāsapo viya duddaso, satadhā bhinnassa vālassa koṭiyā koṭipapaṭipādanam viya duranubodho. Nanu mayā hi imaṃ dhammaṃ paṭivijjhitaṃ vāyamantena adinnaṃ dānaṃ nāma natthi, arakkhitaṃ sīlaṃ nāma natthi, aparipūrītā kāci pāramī nāma natthi? Tassa me nirussāhaṃ viya mārabalaṃ vidhamantassāpi pathavī na kampittha, paṭhamayāme pubbenivāsaṃ anussarantassāpi na kampittha, majjhimayāme dibbacakkhūṃ sodhentassāpi na kampittha, pacchimayāme pana paṭiccasamuppādaṃ paṭivijjhantasseva me dasasahasilokadhātu kampittha. Iti mādisenāpi tikkhaññena kicchenevāyaṃ dhammo paṭividdho, taṃ lokiyamahājanā kathaṃ paṭivijjhissantī”ti dhammagambhīratāpaccavekkhaṇānubhāvenāpi evaṃ cittaṃ namīti veditabbam.

Apica brahmunā yācite desetukāmatāyapissa evaṃ cittaṃ nami. Jānāti hi bhagavā – “mama appossukkatāya citte namamāne maṃ mahābrahmā dhammadesanaṃ yācissati, ime ca sattā brahmagarukā, te ‘sattā kira dhammaṃ na desetukāmo ahosi, atha maṃ mahābrahmā yācitvā desāpesi, santo vata, bho, dhammo paṇīto vata, bho, dhammo’ ti maññamānā sussūsissanti” ti. Idampissa kāraṇaṃ paṭicca appossukkatāya cittaṃ nami, no dhammadesanāyāti veditabbaṃ.

Sahampatissāti so kira kassapassa bhagavato sāsane sahako nāma thero paṭhamajjhānaṃ nibbattvā paṭhamajjhānabhūmiyaṃ kappāyukabrahmā hutvā nibbatto. Tatra maṃ sahampatibrahmāti paṭisañjananti, taṃ sandhāyāha – “brahmuno sahampatissā” ti. **Nassati vata, bhoti** so kira imaṃ saddaṃ tathā nicchāresi, yathā dasasahasilokadhātubrahmāno sutvā sabbe sannipatiṃsu. **Yatra hi nāmāti** yasmiṃ nāma loke. **Purato pāturahosī** tehi dasahi brahmasahashehi saddhiṃ pāturahosī. **Apparajakkhajātikā**ti paññāmaye akkhiṃhi appaṃ parittaṃ rāgadosamoharajaṃ etesaṃ, evaṃsabhāvāti **apparajakkhajātikā**. **Assavanatāti** assavanatāya. **Bhavissantīti** purimabuddhesu dasapuññakiriyavasena katādhikārā paripākagatapadumāni viya sūriyasmisamphassaṃ, dhammadesanaṃyeva ākaṅkhamānā catuppadikagāthāvasāne ariyabhūmiṃ okkamanārahā na eko, na dve, anekasatasahassā dhammassa aññātāro bhavissantīti dasseti.

Pāturahosīti pātubhavi. **Samalehi cintitoti** samalehi chahi sattārehi cintito. Te hi puretaraṃ uppajjitvā sakalajambudīpe kaṅtake pattharamānā viya, viṣaṃ siñcamānā viya ca samalaṃ micchādīṭṭhidhammaṃ desayīṃsu. **Apāpuretanti** vivara etaṃ. **Amatassa dvāranti** amatassa nibbānassa dvārabhūtaṃ ariyamaggaṃ. **Suṇantu dhammaṃ vimalenānubuddhanti** ime sattā rāgādimalānaṃ abhāvato vimalena sammāsambuddhena anubuddhaṃ catusaccadhammaṃ suṇantu tāva bhagavāti yācati.

Sele yathā pabbatamuddhaniṭṭhitoti selamaye ekagghane pabbatamuddhani yathā ṭhitova. Na hi tassa ṭhitassa dassanattaṃ gīvukkhipanapasāraṇādīkiccaṃ atthi. **Tathūpamanti** tappaṭibhāgaṃ selapabbatūpamaṃ. Ayaṃ panettha saṅkhepattho – yathā selapabbatamuddhani ṭhitova cakkhumā puriso samantato janataṃ passeyya, tathā tvampi, sumedha, sundarapañña-sabbaññutaññānaṃ samantacakkhu bhagavā dhammamayaṃ pāsādamāruya sayā apetasoko sokāvatiṇṇaṃ jātijarābhibhūtaṃ janataṃ avekkhassu upadhāraya upaparikkha. Ayaṃ panettha adhippāyo – yathā hi pabbatapāde samantā mahantaṃ khettaṃ katvā tattha kedārapāḷisu kuṭikāyo katvā rattiṃ aggim jāleyyuṃ. Caturaṅgasamannāgatañca andhakāraṃ assa, atha tassa pabbatassa matthake ṭhatvā cakkhumato purisassa bhūmiṃ olokayato neva khettaṃ, na kedārapāḷiyo, na kuṭiyo, na tattha sayitamanussā paññāyeyyuṃ. Kuṭikāsu pana aggijālāmatkameva paññāyeyya. Evaṃ dhammapāsādaṃ āruya sattanikāyaṃ olokayato tathāgatassa, ye te akatakalyāṇā sattā, te ekavīhāre dakkhiṇajāṇupasse nisinnāpi buddhacakkhussa āpāthaṃ nāgacchanti, rattiṃ khittā sarā viya honti. Ye pana katakalyāṇā veneyyapuggalā, te evassa dūrepi ṭhitā āpāthaṃ āgacchanti, so aggi viya himavantapabbato viya ca. Vuttampi cetam –

“Dūre santo pakāsenti, himavantova pabbato;
Asantettha na dissanti, rattiṃ khittā yathā sarā” ti. (dha. pa. 304);

Uṭṭhehīti bhagavato dhammadesanattaṃ cārikacaraṇaṃ yācanto bhaṇāti. **Vīrāti**ādīsu bhagavā vīriyavantaṭāya **vīro**. Devaputtamaccukilesamārānaṃ vijitattā **vijitasāṅgāmo**. Jātikantārādinitharaṇatthāya veneyyasatthavāhanasamatthāya **satthavāho**. Kāmacchandaiṇassa abhāvato **aṇaṇoti** veditabbo.

283. Ajjhesananti yācanaṃ. **Buddhacakkhunāti** indriyaparopariyattañānaṃ ca āsayānusayañānaṃ ca. Imesañhi dvinnaṃ ñāṇānaṃ buddhacakkhūti nāmaṃ, sabbaññutaññānaṃ samantacakkhūti, tiṇṇaṃ maggañāṇānaṃ dhammacakkhūti. **Apparajakkheti**ādīsu yesaṃ vuttanayeneva paññācakkhumhi rāgādirajaṃ appaṃ, te **apparajakkhā**. Yesaṃ taṃ mahantaṃ, te **mahārajakkhā**. Yesaṃ saddhādīni indriyāni tikkhāni, te **tikkhindriyā**. Yesaṃ tāni mudūni, te **mudindriyā**. Yesaṃ teyeva saddhādayo ākāraṃ suṇarā, te **svākārā**. Ye kathitakāraṇaṃ sallakkhenti, sukkena sakkā honti viññāpetuṃ, te **suviññāpayā**. Ye paralokañceva vājjañca bhayato passanti, te **paralokavajjabhayadassāvino** nāma.

Ayaṃ panettha pāḷi – “saddho puggalo apparajakkho, assaddho puggalo mahārajakkho. Āraddhavīriyo..., kusito..., upaṭṭhitassati..., muṭṭhassati..., samāhito..., asamāhito..., paññāvā..., duppañño puggalo mahārajakkho. Tathā saddho puggalo tikkhindriyo...pe... paññāvā puggalo paralokavajjabhayadassāvī,

duppañño puggalo na paralokavajjabhayadassāvī. **Lokoti** khandhaloko, āyatanaloko, dhātuloko, sampattibhavaloko, sampattisambhavaloko, vipattibhavaloko, vipattisambhavaloko, eko loko sabbe sattā āharaṭṭhitikā. Dve lokā – nāmañca rūpañca. Tayo lokā – tisso vedanā. Cattāro lokā – cattāro āhārā. Pañca lokā – pañcupādānakkhandhā. Cha lokā – cha ajjhattikāni āyatanāni. Satta lokā – satta viññāṇaṭṭhitiyo. Aṭṭha lokā – aṭṭha lokadhammā. Nava lokā – nava sattāvāsā. Dasa lokā – dasāyatanāni. Dvādasa lokā – dvādasāyatanāni. Aṭṭhārasa lokā – aṭṭhārasa dhātuyo. Vajjanti sabbe kilesā vajjā, sabbe duccharitā vajjā, sabbe abhisankhārā vajjā, sabbe bhavagāmikammā vajjā. Iti imasmiñca loke imasmiñca vajje tībā bhayasaññā paccupaṭṭhitā hoti, seyyathāpi ukkhittāsike vadhake. Imehi paññāsāya ākārehi imāni pañcindriyāni jānāti passati aññāsi paṭivijjhi. Idaṃ tathāgatassa indriyaparopariyatte nāṇa’nti (paṭi. ma. 1.112).

Uppaliniyanti uppalavane. Itaresupi eseva nayo. **Antonimuggaposinīti** yāni anto nimuggāneva posiyanti. **Udakaṃ accuggamma ṭhitānīti** udakaṃ atikkamitvā ṭhitāni. Tattha yāni accuggamma ṭhitāni, tāni sūriyasmisamphassaṃ āgamayamānāni ṭhitāni ajja pupphanakāni. Yāni samodakaṃ ṭhitāni, tāni sve pupphanakāni. Yāni udakānuggatāni antonimuggaposīni, tāni tatiyadivase pupphanakāni. Udakā pana anuggatāni aññānīpi sarogauppalādīni nāma atthi, yāni neva pupphissanti, macchakacchapabhakkhāneva bhavissanti. Tāni pāḷiṃ naruḷhāni. Āharitvā pana dīpetabbānīti dīpitāni.

Yatheva hi tāni catubbidhāni pupphāni, evameva ugghaṭitaññū vipañcitaññū neyyo padaparamoti cattāro puggalā. Tattha “yassa puggalassa saha udāhaṭṭavelāya dhammābhisamayo hoti, ayaṃ vuccatī puggalo **ugghaṭitaññū**. Yassa puggalassa saṃkhittena bhāsītassa vitthārena atthe vibhajiyaṃāne dhammābhisamayo hoti, ayaṃ vuccatī puggalo **vipañcitaññū**. Yassa puggalassa uddesato paripucchato yoniso manasikaroto kalyāṇamitte sevato bhajato payirupāsato anupubbena dhammābhisamayo hoti, ayaṃ vuccatī puggalo **neyyo**. Yassa puggalassa bahumpi suṇato bahumpi bhaṇato bahumpi dhārayato bahumpi vācayato na tāya jātiyā dhammābhisamayo hoti, ayaṃ vuccatī puggalo **padaparamo**” (pu. pa. 151). Tattha bhagavā uppalavanādisadisam dasasahasilokadhātum olokento “ajja pupphanakāni viya ugghaṭitaññū, sve pupphanakāni viya vipañcitaññū, tatiyadivase pupphanakāni viya neyyo, macchakacchapabhakkhāni pupphāni viya padaparamo”ti addasa. Passanto ca “ettakā apparajakkhā, ettakā mahārajakkhā, tatrāpi ettakā ugghaṭitaññū”ti evaṃ sabbākāratova addasa.

Tattha tiṇṇaṃ puggalānaṃ imasmiṃyeva attabhāve bhagavato dhammadesanā atthaṃ sādheti. Padaparamānaṃ anāgate vāsanatthāya hoti. Atha bhagavā imesaṃ catunnaṃ puggalānaṃ atthāvahaṃ dhammadesanaṃ viditvā desetukamyataṃ uppādetvā puna sabbepi tīsu bhavesu satte bhabbābhavavasena dve koṭṭhāse akāsi. Ye sandhāya vuttaṃ – “katame te sattā abhabbā, ye te sattā kammāvaraṇena samannāgatā kilesāvaraṇena samannāgatā vipākāvaraṇena samannāgatā assaddhā acchandikā duppaññā abhabbā niyāmaṃ okkamitum kusalesu dhammesu sammattaṃ, ime te sattā abhabbā. Katame te sattā bhabbā? Ye te sattā na kammāvaraṇena...pe... ime te sattā bhabbā”ti (vibha. 827; paṭi. ma. 1.115). Tattha sabbepi abhabbapuggale pahāya bhabbapuggaleyeva nāṇena pariggahetvā “ettakā rāgacaritā, ettakā dosamohacaritā vitakkasaddhābuddhacaritā”ti cha koṭṭhāse akāsi; evaṃ katvā dhammaṃ desissāmīti cintesi.

Paccabhāsinti patiabhāsiṃ. **Apārutāti** vivaṭā. **Amatassa dvārāti** ariyamaggo. So hi amatasankhātassa nibbānassa dvāraṃ, so mayā vivaritvā ṭhapitoti dasseti. **Pamuñcantu saddhanti** sabbe attano saddhaṃ pamuñcantu, vissajjentu. Pacchimapadadvaye ayamatto, ahañhi attano paguṇaṃ suppvattitampi imaṃ paṇītaṃ uttamaṃ dhammaṃ kāyavācākīlamathasaññī hutvā na bhāsiṃ. Idāni pana sabbo jano saddhābhājanaṃ upanetu, pūressāmi nesaṃ saṅkappanti.

284. Tassa mayhaṃ, bhikkhave, etadahosīti etaṃ ahosi – **kassa nu kho ahaṃ paṭhamaṃ dhammaṃ deseyyanti** ayaṃ dhammadesanāpaṭisaṃyutto vitakko udapādīti attho. Kadā pana udapādīti? Buddhabhūtaṃ aṭṭhame sattāhe.

Tatrāyaṃ anupubbikathā – bodhisatto kira mahābhinnikkhāmanadivase vivaṭaṃ itthāgāraṃ disvā saṃviggahadayo, “kaṇḍakaṃ āharā”ti channaṃ āmantetvā channasahāyo assarājapitṭhigato nagarato nikkhamitvā kaṇḍakanivattanacetiyatṭhānaṃ nāma dassetvā tīṇi rajjāni atikkamma anomānadīre pabbajitvā anupubbena cārikaṃ caramāno rājagahe piṇḍāya caritvā paṇḍavapabbate nisinnō magadhissarena raññā nāmagottaṃ pucchitvā, “imaṃ rajjaṃ sampatīcchāhī”ti vutto, “alaṃ mahārāja, na mayhaṃ rajjena attho,

ahaṃ rajjaṃ pahāya lokahitathāya padhānaṃ anuyuñjivā loke vivaṭacchado bhavissāmīti nikkhanto’’ti vatvā, ‘‘tena hi buddho hutvā paṭhamam mayhaṃ vijitam osareyyāsī’’ti paṭiññaṃ gahito kālāmañca udakañca upasaṅkamitvā tesam dhammadesanāya sāraṃ avindanto tato pakkamitvā uruvelāya chabbassāni dukkarakārikam karontopi amataṃ paṭivijjhituṃ asakkonto oḷārikāhārapaṭisevanena kāyaṃ santappesi.

Tadā ca uruvelagāme **sujātā** nāma kuṭumbiyadhītā ekasmiṃ nigrodharukkhe patthanamakāsi – ‘‘sacāhaṃ samānajātikaṃ kulagharaṃ gantvā paṭhamagabbhe puttaṃ labhissāmi, balikammaṃ karissāmī’’ti. Tassā sā patthanā samijjhi. Sā visākhapuñṇamadivase pātova balikammaṃ karissāmīti rattiyā paccūsasamaye eva pāyasam paṭiyādesi. Tasmim pāyase paccamāne mahantamahantā pupphuḷā utṭhahitvā dakkhiṇavaṭṭā hutvā sañcaranti. Ekaphusitampi bahi na gacchati. Mahābrahmā chaṭṭaṃ dhāresi. Cattāro lokapālā khaggahatthā ārakkhaṃ gaṇhimsu. Sakko alātāni samānento aggim jālesi. Devatā catūsu dīpesu ojaṃ saṃharitvā tattha pakkhipimsu. Bodhisatto bhikkhācārakālam āgamayamāno pātova gantvā rukkhamūle nisīdi. Rukkhamūle sodhanatthāya gatā dhātī āgantvā sujātāya ārocesi – ‘‘devatā rukkhamūle nisinnā’’ti. Sujātā, sabbaṃ pasādhanam pasādhetvā satasahassagghanike suvaṇṇathāle pāyasam vaḍḍhetvā aparāya suvaṇṇapāṭiyā pidahitvā ukkhipitvā gatā mahāpurisam disvā saheva pāṭiyā hatthe ṭhapetvā vanditvā ‘‘yathā mayhaṃ manoratho nipphanno, evaṃ tumhākampi nipphajjatū’’ti vatvā pakkāmi.

Bodhisatto nerañjarāya tīraṃ gantvā suvaṇṇathālam tīre ṭhapetvā nhatvā paccuttaritvā ekūnapaṇṇāsapiṇḍe karonto pāyasam paribhuñjivā ‘‘sacāhaṃ ajja buddho bhavāmi, thālam paṭisotaṃ gacchatū’’ti khipi. Thālam paṭisotaṃ gantvā thokaṃ ṭhatvā kālanāgarājassa bhavanaṃ pavisitvā tiṇṇam buddhānam thālāni ukkhipitvā aṭṭhāsi.

Mahāsatto vanasaṇḍe divāvihāraṃ katvā sāyanhasamaye **sottiyena** dinnā aṭṭha tiṇamuṭṭhiyo gahetvā bodhimaṇḍam āruya dakkhiṇadisābhāge aṭṭhāsi. So padeso paduminipatte udakabindu viya akampittha. Mahāsatto, ‘‘ayaṃ mama guṇam dhāretuṃ na sakkoti’’ti pacchimadisābhāgam āgamāsi, sopi tatheva akampittha. Uttaradisābhāgam āgamāsi, sopi tatheva akampittha. Puratthimadisābhāgam āgamāsi, tattha pallaṅkappamāṇam ṭhānam sunikhātaindakhilo viya niccalamahosi. Mahāsatto ‘‘idaṃ ṭhānam sabbabuddhānam kilesabhañjanaviddhamṣanaṭṭhāna’’nti tāni tiṇāni agge gahetvā cālesi. Tāni cittakārena tūlikaggena paricchinnāni viya ahesuṃ. Bodhisatto, ‘‘bodhim appatvā imaṃ pallaṅkam na bhindissāmī’’ti caturaṅgavīriyaṃ adhiṭṭhahitvā pallaṅkam ābhujitvā nisīdi.

Taṅkhaṇaṇṇeva māro bāhusahassam māpetvā diyaḍḍhayanajanasatikaṃ girimekhalam nāma hatthim āruya navayojanam mārabalam gahetvā addhakkhikena olokayamāno pabbato viya ajjhottharanto upasaṅkamī. Mahāsatto, ‘‘mayhaṃ dasa pāramiyo pūrentassa añño samaṇo vā brāhmaṇo vā devo vā māro vā brahmā vā sakkhi natthi, vessantarattabhāve pana mayhaṃ sattasu vāresu mahāpathavī sakkhi ahoṣi; idānipi me ayameva acetanā kaṭṭhakaliṅgarūpamā mahāpathavī sakkhi’’ti hatthaṃ pasāreti. Mahāpathavī tāvadeva ayadaṇḍena pahataṃ kaṃsathālam viya ravasataṃ ravasahassam muñcamānā viravitvā parivattamānā mārabalam cakkavāḷamukhavaṭṭiyaṃ muñcanamakāsi. Mahāsatto sūriye dharamāneyeva mārabalam vidhamitvā paṭhamayāme pubbenivāsañāṇam, majjhimayāme dibbacakkhum visodhetvā pacchimayāme paṭiccasamuppāde ñāṇam otāretvā vaṭṭavivaṭṭam sammāsivā aruṇodaye buddho hutvā, ‘‘mayā anekakappakoṭisatasahassam addhānam imassa pallaṅkassa atthāya vāyāmo kato’’ti sattāham ekapallaṅkena nisīdi. Atheakcānam devatānam, ‘‘kiṃ nu kho aññepi buddhattakarā dhammā atthī’’ti kaṅkhā udapādi.

Atha bhagavā aṭṭhame divase samāpattito vuṭṭhāya devatānam kaṅkham ñatvā kaṅkhāvidhamanattam ākāse uppatitvā yamakapāṭihāriyaṃ dassetvā tāsam kaṅkham vidhamitvā pallaṅkato īsakaṃ pācīnanissite uttaradisābhāge ṭhatvā cattāri asankhyeyāni kappasatasahassañca pūritānam pāramīnam phalādhigamaṭṭhānam pallaṅkañceva bodhirukkhañca animisehi akkhīhi olokayamāno sattāham vītināmesi, taṃ ṭhānam **animisacetiyaṃ** nāma jātaṃ.

Atha pallaṅkassa ca ṭhitatṭhānassa ca antarā puratthimacchimoto āyate ratanacaṅkame caṅkamanto sattāham vītināmesi, taṃ ṭhānam **ratanacaṅkamacetiyaṃ** nāma jātaṃ. Tato pacchimadisābhāge devatā ratanagharam māpayimsu, tattha pallaṅkena nisīditvā **abhidhammapiṭakam** visesato cettha anantanayasamantapaṭṭhānam vicinanto sattāham vītināmesi, taṃ ṭhānam **ratanagharmacetiyaṃ** nāma jātaṃ. Evaṃ bodhisamīpeyeva cattāri sattāhāni vītināmetvā pañcame sattāhe bodhirukkhamulā yena ajapālanigrodho

tenupasaṅkami, tatrāpi dhammaṃ vicinantoyeva vimuttisukhañca paṭisaṃvedento nisīdi, dhammaṃ vicinanto cetha evaṃ abhidhamme nayamaggaṃ sammāsī – paṭhammaṃ dhammasaṅgaṇīpakaraṇaṃ nāma, tato vibhaṅgapakaraṇaṃ, dhātukathāpakaraṇaṃ, puggalapaññātipakaraṇaṃ, kathāvatthu nāma pakaraṇaṃ, yamakaṃ nāma pakaraṇaṃ, tato mahāpakaraṇaṃ paṭṭhānaṃ nāmāti.

Tatthassa saṅhasukhumapaṭṭhānamhi citte otiṇṇe pīti uppajji; pītiyā uppannāya lohitaṃ pasīdi, lohite pasanne chavi pasīdi. Chaviyā pasannāya puratthimakāyato kūṭāgārādippamaṇā rasmiyo uṭṭhahitvā ākāse pakkhandachaddantanāgakuḷaṃ viya pācīnadisāya anantāni cakkavāḷāni pakkhandā, pacchimakāyato uṭṭhahitvā pacchimidisāya, dakkhiṇaṃsakūṭato uṭṭhahitvā dakkhiṇadisāya, vāmaṃsakūṭato uṭṭhahitvā uttaradisāya anantāni cakkavāḷāni pakkhandā, pādālehi pavāḷaṅkuravaṇṇā rasmiyo nikkhamitvā mahāpathaviṃ vinivijjhivā udakaṃ dvidhā bhinditvā vātakkhandhaṃ padāletvā ajaṭākāsaṃ pakkhandā, sīsato samparivattiyamānaṃ maṇidāmaṃ viya nīlavaṇṇā rasmivaṭṭi uṭṭhahitvā cha devaloke vinivijjhivā nava brahmaloke vehapphale pañca suddhāvāse ca vinivijjhivā cattāro āruppe atikkamma ajaṭākāsaṃ pakkhandā. Tasmīṃ divase aparimāṇesu cakkavāḷesu aparimāṇā sattā sabbe suvaṇṇavaṇṇāva ahesuṃ. Taṃ divasañca pana bhagavato sarīrā nikkhantā yāvajjadivasāpi tā rasmiyo anantā lokadhātuyo gacchantiyeva.

Evaṃ bhagavā ajapālanigrodhe sattāhaṃ vītināmetvā tato aparaṃ sattāhaṃ mucalinde nisīdi, nisinnamattasseva cassa sakalaṃ cakkavāḷagabbhaṃ pūrento mahāakālamegho udapādi. Evarūpo kira mahāmegho dvīsuyeva kālesu vassati cakkavattimhi vā uppanne buddhe vā. Idha buddhakāle udapādi. Tasmīṃ pana uppanne mucalindo nāgarājā cintesi – “ayaṃ megho satthari mayhaṃ bhavanaṃ pavīṭṭhamatteva uppanno, vāsāgāramassa laddhuṃ vaṭṭati”ti. So sattaratanamayaṃ pāsādaṃ nimminituṃ sakkontopi evaṃ kate mayhaṃ mahapphalaṃ na bhavissati, dasabalassa kāyaveyyāvaccam karissāmīti mahantaṃ attabhāvaṃ katvā satthāraṃ sattakkhattuṃ bhogehi parikkhipitvā upari phaṇaṃ dhāresi. Parikkhepassa anto okāso heṭṭhā lohapāsādappamaṇo ahoṣi. Icchicchitena iriyāpathena satthā viharissatīti nāgarājassa ajjhāsayo ahoṣi. Tasmā evaṃ mahantaṃ okāsaṃ parikkhipi. Majjihe ratanapallaṅko paññatto hoti, upari suvaṇṇatāraṅkaviccittam samosaritagandhadāmakusumadāmacelavitānaṃ ahoṣi. Catūsu koṇesu gandhatelena dīpā jalitā, catūsu disāsu vivaritvā candanakaṇḍakā ṭhapitā. Evaṃ bhagavā taṃ sattāhaṃ tattha vītināmetvā tato aparaṃ sattāhaṃ rājāyatane nisīdi.

Aṭṭhame sattāhe sakkena devānamindena ābhaṭaṃ dantakaṭṭhañca osadhaharītakañca khāditvā mukhaṃ dhovitvā catūhi lokapālehi upanīte paccagghe selamaye patte **tapussabhallikānaṃ** piṇḍapātaṃ paribhuñjitvā puna paccāgantvā ajapālanigrodhe nisinnassa sabbabuddhānaṃ āciṇṇo ayaṃ vitakko udapādi.

Tattha **paṇḍitoti** paṇḍiccena samannāgato. **Viyattoti** veyyattiyena samannāgato. **Medhāvīti** ṭhānuppattiyā paññāya samannāgato. **Apparajakkhajātikoti** samāpattiyā vikkhambhitattā nikkilesajātiko visuddhasatto. **Ājānissatīti** sallakkhessati paṭivijjhissati. **Ñāṇaṇca pana meti** mayhampi sabbaññūtaññānaṃ uppajji. Bhagavā kira devatāya kathiteneva niṭṭhaṃ agantvā sayampi sabbaññūtaññānaṃ olokento ito sattamadivasamatthake kālaṃ katvā ākiṇcaññāyatane nibbattoti addasa. Taṃ sandhāyāha – “ñāṇaṇca pana me dassanaṃ udapādi”ti. **Mahājāniyoti** sattadivasabbhantare pattabbamaggaphalato parihīnattā mahatī jāni assāti **mahājāniyo**. Akkhaṇe nibbattattā gantvā desiyamānaṃ dhammampissa sotuṃ sotappasādo natthi, idha dhammadesanaṭṭhānaṃ āgamanapādāpi natthi, evaṃ mahājāniyo jātoti dasseti. **Abhidosakālaṅkatoti** aḍḍharatte kālaṅkato. **Ñāṇaṇca pana meti** mayhampi sabbaññūtaññānaṃ udapādi. Idhāpi kira bhagavā devatāya vacanena sannīṭṭhānaṃ akatvā sabbaññūtaññānaṃ olokento “hiyyo aḍḍharatte kālaṅkatvā udako rāmaputto nevasaññānāsaññāyatane nibbato”ti addasa. Tasmā evamāha. Sesam purimanayasadisameva. **Bahukārāti** bahūpakārā. **Padhānapahitattaṃ upaṭṭhahimsūti** padhānatthāya pesitattabhāvaṃ vasanaṭṭhāne pariveṇasammajjanena pattacīvaraṃ gahetvā anubandhanena mukhodakadantakaṭṭhadānādīnā ca upaṭṭhahimsu. Ke pana te **pañcavaggiyā** nāma? Yete –

Rāmo dhajo lakkhaṇo jotimanti,
Yañño subhojo suyāmo sudatto;
Ete tadā aṭṭha ahesuṃ brāhmaṇā,
Chalaṅgavā mantam viyākariṃsūti.

Bodhisattassa jātakāle supinapaṭiggāhakā ceva lakkhaṇapaṭiggāhakā ca aṭṭha brāhmaṇā. Tesu tayo dvedhā

byākarimṣu – “imehi lakkhaṇehi samannāgato agāraṃ ajjhāvasamāno rājā hoti cakkavattī, pabbajamāno buddho”ti. Pañca brāhmaṇā ekamsabyākaraṇā ahesuṃ – “imehi lakkhaṇehi samannāgato agāre na tiṭṭhati, buddhova hoti”ti. Tesu purimā tayo yathāmantapadaṃ gatā, ime pana pañca mantapadaṃ atikkantā. Te attanā laddhaṃ puṇṇapattaṃ nītakānaṃ vissajjetvā “ayaṃ mahāpuriso agāraṃ na ajjhāvasissati, ekantena buddho bhavissati”ti nibbitakkā bodhisattaṃ uddissa samaṇapabbajjaṃ pabbajitā. Tesam puttāti pi vadanti. Taṃ aṭṭhakathāya paṭikkhittaṃ.

Ete kira daharakāleyeva bahū mante jāniṃsu, tasmā te brāhmaṇā ācariyaṭṭhāne ṭhapayiṃsu. Te pacchā amhehi puttadārajaṭṭhaṃ chaḍḍetvā na sakkā bhavissati pabbajitunti daharakāleyeva pabbajitvā ramaṇīyāni senāsanāni paribhuñjantā vicariṃsu. Kālena kālaṃ pana “kiṃ, bho, mahāpuriso mahābhinnikkhamaṇaṃ nikkhanto”ti pucchanti. Manussā, “kuhiṃ tumhe mahāpurisaṃ passissatha, tīsu pāsādesu tividhanāṭakamajjhe devo viya sampattiṃ anubhoti”ti vadanti. Te sutvā, “na tāva mahāpurisassa nāṇaṃ paripākaṃ gacchatī”ti apposukkā vihariṃsuyeva. Kasmā panettha bhagavā, “bahukārā kho ime pañcavaggiyā”ti āha? Kiṃ upakārakānaṃyeva esa dhammaṃ deseti, anupakārakānaṃ na desetīti? No na deseti. Paricayavasena hesa ālāraṇceva kālāmaṃ udakaṇca rāmaputtaṃ olokesi. Etasmiṃ pana buddhakkhette ṭhapetvā aññāsikoṇḍaññaṃ paṭhamam dhammaṃ sacchikātuṃ samattho nāma natthi. Kasmā? Tathāvidhaupanissayattā.

Pubbe kira puññakaraṇakāle dve bhātaro ahesuṃ. Te ekatova sassam akaṃsu. Tattha jeṭṭhakassa “ekasmiṃ sasse navavāre aggasassadānaṃ mayā dātabba”nti ahosi. So vappakāle bījaggaṃ nāma datvā gabbhakāle kaniṭṭhena saddhiṃ mantesi – “gabbhakāle gabbhaṃ phāletvā dassāmā”ti. Kaniṭṭho “taruṇasassaṃ nāsetukāmosī”ti āha. Jeṭṭho kaniṭṭhassa ananuvattanabhāvaṃ nītvā khettaṃ vibhajitvā attano koṭṭhāsato gabbhaṃ phāletvā khīraṃ nīharitvā sappiphāṇitehi yojetvā adāsi, puthukakāle puthukaṃ kāretvā adāsi, lāyane lāyanaggaṃ veṇikaraṇe veṇaggam kalāpādīsu kalāpaggam khalaggam bhaṇḍaggam koṭṭhagganti evam ekasasse navavāre aggadānaṃ adāsi. Kaniṭṭho panassa uddharitvā adāsi, tesu jeṭṭho aññāsikoṇḍaññatthero jāto, kaniṭṭho subhaddaparibbājako. Iti ekasmiṃ sasse navannaṃ aggadānaṃ dinnattā ṭhapetvā theram añño paṭhamam dhammaṃ sacchikātuṃ samattho nāma natthi. “Bahukārā kho ime pañcavaggiyā”ti idaṃ pana upakārānussaraṇamattakeneva vuttaṃ.

Isipatane migadāyete tasmim kira padese anuppanne buddhe paccekasambuddhā gandhamādanapabbate sattāhaṃ nirodhasamāpattiyā vītināmetvā nirodhā vuṭṭhāya nāgalatādantakattam khādītva anotattadahe mukhaṃ dhovītva pattacīvaramādāya ākāseṇa āgantvā nipatanti. Tattha cīvaram pārupitvā nagare piṇḍāya caritvā katabhattakiccā gamanakālepi tatoyeva uppatitvā gacchanti. Iti isayo ettha nipatanti uppatanti cāti taṃ ṭhānaṃ **isipatananti** saṅkhaṃ gataṃ. Migānaṃ pana abhayatthāya dinnattā **migadāyoti** vuccati. Tena vuttaṃ “isipatane migadāye”ti.

285. Antarā ca gayam antarā ca bodhinti gayāya ca bodhissa ca vivare tigāvutantare ṭhāne. Bodhimaṇḍato hi gayā tīṇi gāvutāni. Bārāṇasī aṭṭhārasa yojanāni. Upako bodhimaṇḍassa ca gayāya ca antare bhagavantaṃ addasa. Antarāsaddena pana yuttattā upayogavacanaṃ kataṃ. Īdisesu ca ṭhānesu akkharacintakā “antarā gāmaṇca nadiṇca yāti”ti evam ekameva antarāsaddaṃ payujjanti. So dutiyapadenapi yojetabbo hoti. Ayojiyamāne upayogavacanaṃ na pāpuṇāti. Idha pana yojetvā eva vuttoti. **Addhānamaggapaṭipannanti** addhānasāṅkhātaṃ maggaṃ paṭipannaṃ, dīghamaggapaṭipannanti attho. Addhānamaggagamanasamayassa hi vibhaṅge “addhayojanaṃ gacchissāmīti bhūñjitabba”ntiādivacanaṭo (pāci. 218) addhayojanampi addhānamaggo hoti. Bodhimaṇḍato pana gayā tigāvutaṃ.

Sabbābhībhūti sabbam tebhūmakadhammaṃ abhibhavitvā ṭhito. **Sabbavidūti** sabbam catubhūmakadhammaṃ avediṃ aññāsiṃ. **Sabbesu dhammesu anupalittoti** sabbesu tebhūmakadhammesu kilesalepanena anupalitto. **Sabbam jahoti** sabbam tebhūmakadhammaṃ jahitvā ṭhito. **Tañhākkhaye vimuttoti** tañhākkhaye nibbāne ārammaṇato vimutto. **Sayam abhiññāyāti** sabbam catubhūmakadhammaṃ attanāva jānitvā. **Kamuddiseyyanti** kaṃ aññaṃ “ayaṃ me ācariyo”ti uddiseyyam.

Na me ācariyo atthīti lokuttaradhamme mayhaṃ ācariyo nāma natthi. **Natthi me paṭipuggaloti** mayhaṃ paṭibhāgapuggalo nāma natthi. **Sammāsambuddhoti** sahetunā nayena cattāri saccāni sayam buddho. **Sītībhūtoti** sabbakilesagginibbāpanena sītībhūto. Kilesānaṃyeva nibbutattā **nibbuto**. **Kāsinam puranti** kāsiraṭṭhe nagaraṃ. **Āhañchaṃ amatadundubhinti** dhammacakkapaṭilābhāya amatābherim paharissāmīti

gacchāmi. **Arahasi anantajinoti** anantajinoti bhavitum yutto. **Hupeyya pāvusoti**, āvuso, evampi nāma bhaveyya. **Pakkāmīti** vaṅkahārajanapadaṃ nāma agamāsi.

Tatthekaṃ migaluddakagāmakam nissāya vāsaṃ kappesi. Jeṭṭhakaluddako taṃ upaṭṭhāsi. Tasmīṅca janapade caṇḍā makkhikā honti. Atha naṃ ekāya cāṭiyā vasāpesuṃ, migaluddako dūre migavaṃ gacchanto “amhākaṃ arahante mā pamajjī”ti **chāvaṃ** nāma dhītaraṃ āṇāpetvā agamāsi saddhiṃ puttabhātukehi. Sā cassa dhītā dassaniyā hoti koṭṭhāsasampannā. Dutiyadivase **upako** gharaṃ āgato taṃ dārikaṃ sabbaṃ upacāraṃ katvā parivisitum upagataṃ disvā rāgena abhibhūto bhuñjitumpi asakkonto bhājanena bhattaṃ ādāya vasanaṭṭhānaṃ gantvā bhattaṃ ekamante nikkhipitvā sace chāvaṃ labhāmi, jīvāmi, no ce, marāmīti nirāhāro sayi. Sattame divase māgaviko āgantvā dhītaraṃ upakassa pavattiṃ pucchi. Sā “ekadivasameva āgantvā puna nāgatapubbo”ti āha. Māgaviko āgataveseneva naṃ upasaṅkamitvā pucchissāmīti taṃkhaṇaṃyeva gantvā “kiṃ, bhante, apphāsuka”nti pāde parāmasanto pucchi. Upako nitthunanto parivattatiyeva. So “vadatha bhante, yaṃ mayā sakkā kātum, taṃ sabbaṃ karissāmī”ti āha. Upako, “sace chāvaṃ labhāmi, jīvāmi, no ce, idheva maraṇaṃ seyyo”ti āha. Jānāsi pana, bhante, kiñci sippanti. Na jānāmīti. Na, bhante, kiñci sippaṃ aṅānantaṃ sakkā gharāvāsaṃ adhiṭṭhātunti.

So āha – “nāhaṃ kiñci sippaṃ jānāmi, apica tumhākaṃ maṃsahārako bhavissāmi, maṃsaṅca vikkṭhissāmī”ti. Māgaviko, “amhākaṃ etadeva ruccati”ti uttarasāṭakaṃ datvā gharaṃ ānetvā dhītaraṃ adāsi. Tesam saṃvāsamanvāya putto vijāyi. **Subhaddotissa** nāmaṃ akaṃsu. Chāvā tassa rodanakāle “maṃsahārakassa putta, migaluddakassa putta mā rodī”tiādīni vadamānā puttatosanagītena upakaṃ uppaṇḍesi. Bhadde tvaṃ maṃ anāthoti maññasi. Atthi me **anantajino** nāma sahāyo. Tassāhaṃ santike gamissāmīti āha. Chāvā evamayam aṭṭiyatīti ṇatvā punappunaṃ katheti. So ekadivasam anārocetvāva majjhimadesābhimukho pakkāmi.

Bhagavā ca tena samayena sāvattthiyaṃ viharati jetavane mahāvihāre. Atha kho bhagavā paṭikacceva bhikkhū āṇāpesi – “yo, bhikkhave, ‘anantajino’ti pucchamāno āgacchati, tassa maṃ dasseyyāthā”ti. Upakopi kho “kuhiṃ anantajino vasatī”ti pucchanto anupubbena sāvattthiṃ āgantvā vihāramajjhe ṭhatvā kuhiṃ anantajinoti pucchi. Taṃ bhikkhū bhagavato santikaṃ nayiṃsu. So bhagavantaṃ disvā – “sañjānātha maṃ bhagavā”ti āha. Āma, upaka, sañjānāmi, kuhiṃ pana tvaṃ vasitthāti. Vaṅkahārajanapade, bhanteti. Upaka, mahallakosi jāto pabbajitum sakkhissasīti. Pabbajissāmi, bhanteti. Bhagavā pabbājetvā tassa kammaṭṭhānaṃ adāsi. So kammaṭṭhāne kammaṃ karonto anāgāmiphale patiṭṭhāya kālaṃ katvā avihesu nibbato. Nibbattakkhaṇeyeva arahattaṃ pāpuṇīti. Avihesu nibbattamattā hi satta jānā arahattaṃ pāpuṇiṃsu, tesam so aññataro.

Vuttañhetam –

“Avihaṃ upapannāse, vimuttā satta bhikkhavo;
Rāgadosaparikkhīṇā, tiṇṇā loke visattikaṃ.

Upako palagaṇḍo ca, pukkusāti ca te tayo;
Bhaddiyo khaṇḍadevo ca, bahuraggi ca saṅgiyo;
Te hitvā mānusaṃ dehaṃ, dibbayogaṃ upajjhagu”nti. (saṃ. ni. 1.105);

286. Saṅṭhapesunti katikaṃ akaṃsu. **Bāhullikoti** cīvarabāhullādīnaṃ atthāya paṭipanno. **Padhānavibbhantoti** padhānato vibbhanto bhaṭṭho parihīno. **Āvatto bāhullāyāti** cīvarādīnaṃ bahulabhāvattthāya āvatto. **Apica kho āsanam ṭhapetabbanti** apica kho panassa uccakule nibbattassa āsanamattaṃ ṭhapetabbanti vadiṃsu. **Nāsakkhiṃsūti** buddhānubhāvena buddhatejasā abhibhūtā attano katikāya ṭhatum nāsakkhiṃsu. **Nāmena ca āvusovādena ca samudācarantīti** gotamāti, āvusoti ca vadanti. Āvuso gotama, mayaṃ uruvelāyaṃ padhānakāle tuyhaṃ pattacīvaraṃ gahetvā vicarimhā, mukhodakaṃ dantakaṭṭhaṃ adamhā, vutthapariveṇaṃ sammajjimhā, pacchā ko te vattappaṭipattimakāsi, kacci amhesu pakkantesu na cintayitthāti evarūpiṃ kathaṃ kathentīti attho. **Iriyāyāti** dukkarairiyāya. **Paṭipadāyāti** dukkarapaṭipattiyā. **Dukkarakārikāyāti** pasatapapasa-muggayūsādiāharakaraṇādīnā dukkarakaraṇena. **Abhijānātha me noti** abhijānātha nu mama. **Evarūpaṃ pabhāvitametanti** etaṃ evarūpaṃ vākyabhedanti attho. Api nu ahaṃ uruvelāya padhāne tumhākaṃ saṅgaṇhanatthaṃ anukkaṇṭhanatthaṃ rattim vā divā vā

āgantvā, – “āvuso, mā vitakkayittha, mayhaṃ obhāso vā nimittam vā paññāyatī”ti evarūpaṃ kañci vacanabhedam akāsinti adhippāyo. Te ekapadeneva satim labhitvā uppannagāravā, “handa addhā esa buddho jāto”ti saddahitvā **no hetam, bhanteti āhaṃsu. Asakkhiṃ kho aham, bhikkhave, pañcavaggiye bhikkhū saññāpetunti aham, bhikkhave, pañcavaggiye bhikkhū buddho ahanti jānāpetum asakkhiṃ.** Tadā pana bhagavā uposathadvaseyeva āgacchi. Attano buddhabhāvam jānāpetvā koṇḍaññatheram kāyasakkhiṃ katvā dhammacakkappavattanasuttam kathesi. Suttapariyosāne thero aṭṭhārasahi brahmakotṭhi saddhiṃ sotāpattiphale patiṭṭhāsi. Sūriye dharamāneyeva desanā niṭṭhāsi. Bhagavā tattheva vassam upagacchi.

Dvepi sudam, bhikkhave, bhikkhū ovaḍāmitiādi pāṭipadadivasato paṭṭhāya piṇḍapātathāyapi gāmaṃ appavisanadīpanattham vuttam. Tesañhi bhikkhūnam kammaṭṭhānesu uppannamalavisodhanattham bhagavā antovihāreyeva ahosi. Uppanne upanne kammaṭṭhānamale tepi bhikkhū bhagavato santikam gantvā pucchanti. Bhagavāpi tesam nisinnaṭṭhānam gantvā malaṃ vinodeti. Atha nesam bhagavatā evam nīhaṭabhattena ovadiyamānānam vappatthero pāṭipadadvase sotāpanno ahosi. Bhaddiyatthero dutiyāyam, mahānāmatthero tatiyāyam, assajitthero catutthiyam. Pakkhassa pana pañcamiyam sabbeva te ekato sannipātetvā anattalakkhaṇasuttam kathesi, suttapariyosāne sabbepi arahattaphale patiṭṭhahimsu. Tenāha – “atha kho, bhikkhave, pañcavaggiyā bhikkhū mayā evam ovadiyamānā...pe... anuttaram yogakkhemam nibbānam ajjhagamamsu...pe... natthi dāni punabbhavo”ti. Ettakam kathāmaggam bhagavā yam pubbe avaca – “tumhepi mamañceva pañcavaggiyānañca maggam āruḷhā, ariyapariyesanā tumhākam pariyesanā”ti imam ekameva anusandhiṃ dassento āhari.

287. Idāni yasmā na agāriyānaṃyeva pañcakāmaguṇapariyesanā hoti, anagāriyānampi cattāro paccaye appaccavekkhitvā paribhuñjantānam pañcakāmaguṇavasena anariyapariyesanā hoti, tasmā tam dassetum **pañcime, bhikkhave, kāmaguṇā**tiādimāha. Tattha navarattesu pattacīvarādīsū cakkhuvīññeyyā rūpātiādayo cattāro kāmaguṇā labbhanti. Raso panettha paribhogaraso hoti. Manuññe piṇḍapāte bhesajje ca pañcapi labbhanti. Senāsanamhi cīvare viya cattāro. Raso pana ethāpi paribhogaraso. **Ye hi keci, bhikkhveti** kasmā ārabhi? Evam pañca kāmaguṇe dassetvā idāni ye evam vadeyyum, “pabbajitakālate paṭṭhāya anariyapariyesanā nāma kuto, ariyapariyesanāva pabbajitāna”nti, tesam paṭisedhanatthāya “pabbajitānampi catūsū paccayesu appaccavekkhaṇaparibhogo anariyapariyesanā evā”ti dassetum imam desanam ārabhi. Tattha **gadhītā**ti tañhāgedhena gadhitā. **Mucchītā**ti tañhāmucchāya mucchitā. **Ajjhopannā**ti tañhāya ajjhogāḷhā. **Anādīnavadassāvīnoti** ādīnavam apassantā. **Anissaraṇapaññā**ti nissaraṇam vuccati paccavekkhaṇaññam. Te tena virahitā.

Idāni tassatthassa sādhamam upamam dassento **seyyathāpi, bhikkhveti**ādimāha. Tatrevam opammasamsandanam vedītabbam – āraññakamago viya hi samaṇabrāhmaṇā, luddakena araññe ṭhapitapāso viya cattāro paccayā, tassa luddassa pāsarāsīm ajjhottharivā sayanakālo viya tesam cattāro paccaye appaccavekkhitvā paribhogakālo. Luddake āgacchante magassa yena kāmam agamanakālo viya samaṇabrāhmaṇānam mārassa yathākāmakaraṇīyakālo, māravasam upagatabhāvoti attho. Magassa pana abaddhassa pāsarāsīm adhisayitakālo viya samaṇabrāhmaṇānam catūsū paccayesu paccavekkhaṇaparibhogo, luddake āgacchante magassa yena kāmam gamanam viya samaṇabrāhmaṇānam māravasam anupagamanam vedītabbam. **Vissatthoti** nibbhayo nirāsanko. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Pāsarāsīsuttavaṇṇanā niṭṭhitā.

Ariyapariyesanātipi etasseva nāmam.

7. Cūḷahatthipadopamasuttavaṇṇanā

288. **Evam me sutanti** cūḷahatthipadopamasuttam. Tattha **sabbasetena vaḷavābhiraṭṭhā**ti, “setā sudam assā yuttā hontī setālaṅkāra. Seto ratho setālaṅkāro setaparivāro, setā rasmiyo, setā patodalatṭhi, setam chattam, setam uñhīsam, setāni vatthāni, setā upāhanā, setāya sudam vālabījanīyā bijiyatī”ti (sam. ni. 5.4) evam vuttena sakalasetena catūhi vaḷavāhi yuttarathena.

Ratho ca nāmeso duvidho hoti – yodharatho, alaṅkārathoti. Tattha yodharatho caturassasaṅṭhāno hoti nātimahā, dvinnam tiṅṅam vā janānam gahaṇasamattho. Alaṅkāratho mahā hoti, dīghato dīgho, puthulato puthulo. Tattha chattaḅḅāhako vālabhijaniggāhako tālavaṇṭṭāhako evaṃ aṭṭha vā dasa vā sukkena ṭhātum vā nisīditum vā nipajjitum vā sakkonti, ayampi alaṅkārathoyeva. So sabbo sacakkapañjarakubbaro rajataparikkhito ahoṣi. Vaḷavā pakatiyā setavaṇṇāva. Pasādhanampi tādisaṃ rajatamayaṃ ahoṣi. Rasmiyopi rajatapanāli suparikkhittā. Patodalaṭṭhipi rajataparikkhittā. Brāhmaṇopi setavattamaṃ nivāsetvā setamaṃyeva uttarāsaṅgamakāsi, setavilepanaṃ vilimpi, setamālaṃ pilandhi, dasasu aṅgulīsu aṅgulimuddikā, kaṇṇesu kuṇḍalānīti evamādiālaṅkāropissa rajatamayaṃ ahoṣi. Parivārabrāhmaṇāpissa dasasahassamattā tatheva setavattavilepanamālālaṅkāraṃ ahesuṃ. Tena vuttamaṃ “sabbasetena vaḷavābhiraṭṭhena”ti.

Sāvattiyā niyyātīti so kira channaṃ channaṃ māsānaṃ ekavāraṃ nagaraṃ padakkhiṇaṃ karoti. Ito ettakehi divasehi nagaraṃ padakkhiṇaṃ karissatīti puretameva ghoṣanā karīyati; taṃ sutvā ye nagarato na pakkantā, te na pakkamanti. Ye pakkantā, tepi, “puñṇavato sirisampattim passissāmā”ti āgacchanti. Yaṃ divasaṃ brāhmaṇo nagaraṃ anuvarati, tadā pātova nagaravīthiyo sammajjitvā vālikaṃ okiritvā lājapañcamehi pupphehi abhippakiritvā puṇṇaghaṭe ṭhapetvā kadaliyo ca dhaje ca ussāpetvā sakalanagaraṃ dhūpitavāsitaṃ karonti. Brāhmaṇo pātova sīsaṃ nhāyitvā purebhattaṃ bhujjitvā vuttanayeneva setavattadhīhi attānaṃ alaṅkaritvā pāsādā oruyha rathaṃ abhiruhati. Atha naṃ te brāhmaṇā sabbasetavattavilepanamālālaṅkāraṃ setacchattāni gahetvā parivārenti; tato mahājanassa sannipātanatthaṃ paṭhamamaṃyeva taruṇadāraṅkaṇaṃ phalāphalāni vikiritvā tadanantaraṃ māsakarūpāni; tadanantaraṃ kahāpaṇe vikiranti; mahājanā sannipatanti. Ukkuṭṭhiyo ceva celukkhepā ca pavattanti. Atha brāhmaṇo maṅgalikasovattikādīsu maṅgalāni ceva savattiyā ca karontesu mahāsampattiyā nagaraṃ anuvarati. Puñṇavantaṃ manussaṃ ekabhūmakādīpāsāde āruyha sukappasādisāni vātapānakavāṭāni vivaritvā olokeṃti. Brāhmaṇopi attano yasasirisampattiyā nagaraṃ ajjhottharanto viya dakkhiṇadvārābhimukho hoti. Tena vuttamaṃ “sāvattiyā niyyātīti”ti.

Divā divassatī divasassa divā, majjhanakāletī attho. **Pilotikaṃ paribbājakanti pilotikāti** evaṃ itthilīṅgavohārasena laddhanāmaṃ paribbājakaṃ. So kira paribbājako daharo paṭhamavaye ṭhito suvaṇṇavaṇṇo buddhupaṭṭhāko, pātova tathāgatassa ceva mahātherānaṃ upaṭṭhānaṃ katvā tīdaṅḍakuṇḍikāparikkhāraṃ ādāya jetavanā nikkhamitvā nagarābhimukho pāyāsi. Taṃ esa dūratova āgacchantamaṃ addasa. **Etadvocātī** anukkamena santikaṃ āgataṃ sañjānitvā etaṃ, “handā kuto nu bhavaṃ vacchāyano āgacchati”ti gottamaṃ kittento vacanaṃ avoca. **Paṇḍito maññeti** bhavaṃ vacchāyano samaṇaṃ gotamaṃ paṇḍitoti maññati, udāhu notī ayamettha attho.

Ko cāhaṃ, bhoti, bho, samaṇassa gotamassa pañṇāveyyattiyāṃ jānane ahaṃ ko nāma? **Ko ca samaṇassa gotamassa pañṇāveyyattiyāṃ jānissāmīti** kuto cāhaṃ samaṇassa gotamassa pañṇāveyyattiyāṃ jānissāmi, kena kāraṇena jānissāmīti? Evaṃ sabbathāpi attano ajānanabhāvaṃ dīpeti. **Sopi nūnassa tādisovātī** yo samaṇassa gotamassa pañṇāveyyattiyāṃ jāneyya, sopi nūna dasa pāramiyo puretvā sabbaññutaṃ patto tādiso buddhoyeva bhavye. Sineruṃ vā himavantaṃ vā pathaviṃ vā ākāsaṃ vā pametukāmena tappamāṇova daṅḍo vā rajju vā laddhuṃ vaṭṭati. Samaṇassa gotamassa pañṇāṃ jānantenapi tassa ṇānasadisameva sabbaññutaññānaṃ laddhuṃ vaṭṭatīti dīpeti. Ādaravasena panettha āmedītaṃ kataṃ. **Uḷārāyātī** uttarāya seṭṭhāya. **Ko cāhaṃ, bhoti**, bho, ahaṃ samaṇassa gotamassa pasamsane ko nāma? **Ko ca samaṇaṃ gotamaṃ pasamsissāmīti** kena kāraṇena pasamsissāmi? **Pasatthapasatthoti** sabbaguṇānaṃ uttaritārehi sabbalokapasatthehi attano guṇeṃyeva pasattho, na tassa aññehi pasamsanakiccaṃ atthi. Yathā hi campakapupphaṃ vā nīluppalaṃ vā padumaṃ vā lohītacandanaṃ vā attano vaṇṇagandhasiriyāva pāsādikaṃceva sugandhaṃ, na tassa āgantukehi vaṇṇagandhehi thomanakiccaṃ atthi. Yathā ca maṇiratanaṃ vā candamaṅḍalaṃ vā attano ālokeneva obhāsati, na tassa aññena obhāsanakiccaṃ atthi. Evaṃ samaṇo gotamo sabbalokapasatthehi attano guṇeṃyeva pasattho thomito sabbalokassa seṭṭhataṃ pāpito, na tassa aññena pasamsanakiccaṃ atthi. Pasatthehi vā pasatthotipi pasatthapasattho.

Ke pasatthā nāma? Rājā pasenadī kosalo kāsikosalavāsikehi pasattho, bimbisāro aṅgamagadhavāsīhi. Vesālīkā licchavī vajjiraṭṭhavāsīhi pasatthā. Pāveyyakā mallā, kosinārakā mallā, aññepi te te khattiyā tehi tehi jānapadehi pasatthā. Caṅkīdāyo brāhmaṇā brāhmaṇagaṇehi, anāthapiṇḍikādayo upāsakā anekasatehi upāsakagaṇehi, visākhādayo upāsikā anekasatāhi upāsikāhi, sakuludāyīdayo paribbājakā anekehi paribbājakasatehi, uppalaṇṇātheriādīkā mahāsāvīkā anekehi bhikkhunīsatehi, sārīputtatheriādāyo mahāsāvīkā anekasatehi bhikkhūhi, sakkādayo devā anekasahasseehi devehi, mahābrahmādayo brahmāno

anekasahashehi brahmehi pasatthā. Te sabbehi dasabalaṃ thomentī vaṇṇenti, pasamsantīti bhagavā “pasatthapasattho”ti vuccati.

Atthavasanti atthānisamsaṃ. Athassa paribbājako attano pasādakāraṇaṃ ācikkhanto **seyyathāpi, bho, kusalo nāgavanikoti**ādimāha. Tattha **nāgavanikoti** nāgavanavāsiko anuggahitasippo puriso. Parato pana uggahitasippo puriso nāgavanikoti āgato. **Cattāri padānīti** cattāri nāṇapadāni nāṇavalañjāni, nāṇena akkantaṭṭhānānīti attho.

289. Khattiyapaṇḍitetiādīsu **paṇḍiteti** paṇḍiccena samannāgate. **Nipuṇeti** saṅhe sukhumabuddhino, sukhumaatthantarapaṭivijjhanasamatthe. **Kataparappavādeti** viññātaparappavāde ceva parehi saddhiṃ katavādaparicaye ca. **Vāavedhirūpeti** vāavedhidhanuggahasadise. **Te bhindantā maññe carantīti** vāavedhi viya vālaṃ sukhumānīpi paresaṃ diṭṭhigatāni attano paññāgatena bhindantā viya carantīti attho. **Pañhaṃ abhisankharontīti** dupadampi tipadampi catuppadampi pañhaṃ karonti. **Vādaṃ āropessāmāti** dosaṃ āropessāma. **Na ceva samaṇaṃ gotamaṃ pañhaṃ pucchantīti**; kasmā na pucchanti? Bhagavā kira parisamajje dhammaṃ desento parisāya ajjhāsayaṃ oloketi, tato passati – “ime khattiyapaṇḍitā gulhaṃ rahassaṃ pañhaṃ ovaṭṭikasāraṃ katvā āgatā”ti. So tehi apuṭṭhoyeva evarūpe pañhe pucchāya ettakā dosā, vissajjane ettakā, atthe pade akkhare ettakāti ime pañhe pucchanto evaṃ puccheyya, vissajjento evaṃ vissajjeyyāti, iti ovaṭṭikasāraṃ katvā ānīte pañhe dhammakathāya antare pakkhipitvā viddhamseti. Khattiyapaṇḍitā “seyyo vata no, ye mayaṃ ime pañhe na pucchimhā, sace hi mayaṃ puccheyyāma, appatiṭṭheva no katvā samaṇo gotamo khipeyyā”ti attamaṇā bhavanti.

Apica buddhā nāma dhammaṃ desentā parisāya mettāya pharanti, mettāpharaṇena dasabale mahājanassa cittaṃ pasīdati, buddhā ca nāma rūpagappattā hontī dassanasampannā madhurassarā mudujivhā suphusitadantāvaraṇā amatena hadayaṃ siñcantā viya dhammaṃ kathenti. Tatra nesaṃ mettāpharaṇena pasannacittānaṃ evaṃ hoti – “evarūpaṃ advejjhakathaṃ amoghakathaṃ niyyānikakathaṃ kathentena bhagavatā saddhiṃ na sakkhissāma paccaṇṅakaggāhaṃ gaṇḍhitu”nti attano pasannabhāveneva na pucchanti.

Aññadatthūti ekaṃsena. **Sāvakā sampajantīti** saraṇagamanavasena sāvakā hontī. **Tadanuttaranti** taṃ anuttaraṃ. **Brahmacariyapariyosānanti** maggabrahmacariyassa pariyosānabhūtaṃ arahattaphalaṃ, tadatthāya hi te pabbajanti. **Manāṃ vata, bho, anassāmāti**, bho, sace mayaṃ na upasaṅkameyyāma, iminā thokena anupasaṅkamanamattena apayirupāsanaṃmatteneva naṭṭhā bhavēyyāma. Upasaṅkamanamattakena panamhā na naṭṭhāti attho. Dutiyapadaṃ purimasseva vevacanaṃ. **Assamaṇāva samānāti**ādīsu pāpānaṃ asamitattā **assamaṇāva**. Abāhitattā ca pana **abrāhmaṇāva**. Kilesārīnaṃ ahataṭṭā **anarahantoyeva** samānāti attho.

290. Udānaṃ udānesīti udāhāraṃ udāhari. Yathā hi yaṃ telaṃ mānaṃ gahetuṃ na sakkoti, vissanditvā gacchati, taṃ avasekoti vuccati, yañca jalaṃ taḷakaṃ gahetuṃ na sakkoti, ajjhottharivitvā gacchati, taṃ oghoti vuccati. Evameva yaṃ pītimayaṃ vacanaṃ hadayaṃ gahetuṃ na sakkoti, adhikaṃ hutvā anto asaṅṭṭhahitvā bahi nikkhamati, taṃ **udānanti** vuccati. Evarūpaṃ pītimayaṃ vacanaṃ nicchāresīti attho. **Hatthipadopamoti** hatthipadaṃ upamā assa dhammassāti hatthipadopamo. So na ettāvata vitthārena paripūro hotīti dasseti. **Nāgavanikoti** uggahitahattisippo hatthivanacāriko. Atha kasmā idha kusaloti na vuttoti? Parato “yo hoti kusalo”ti vibhāgadassanato. Yo hi koci pavisati, yo pana kusalo hoti, so neva tāva niṭṭhaṃ gacchati. Tasmā idha kusaloti avatvā parato vutto.

291. Vāmanikāti rassā āyāmatopi na dīghā mahākucchiatthiniyo. **Uccā ca nisevanti** sattaṭṭharatanubbedhe vaṭarukkadhānaṃ khandhappadese ghaṃsitaṭṭhānaṃ. **Uccā kāḷārikāti** uccā ca yaṭṭhisadisapādā hutvā, kāḷārikā ca dantānaṃ kaḷāratāya. Tāsaṃ kira eko danto unnato hoti, eko onato. Ubhopi ca virālā hontī, na āsannā. **Uccā ca dantehi ārañjītānīti** sattaṭṭharatanubbedhe vaṭarukkadhānaṃ khandhappadese pharasunā pahataṭṭhānaṃ viya dāṭṭhāni chinnaṭṭhānaṃ. **Uccā kaṇerukā nāmāti** uccā ca yaṭṭhisadisadīghapādā hutvā, kaṇerukā ca dantānaṃ kaṇerutāya, tā kira makuḷadāṭṭhā hontī. Tasmā kaṇerukāti vuccanti. **So niṭṭhaṃ gacchatīti** so nāgavaniko yassa vatāhaṃ nāgassa anupadaṃ āgato, ayameva so, na añño. Yañhi ahaṃ paṭhamaṃ padaṃ disvā vāmanikānaṃ padaṃ idaṃ bhavissatīti niṭṭhaṃ na gato, yampi tato orabhāge disvā kāḷārikānaṃ bhavissati, kaṇerukānaṃ bhavissatīti niṭṭhaṃ na gato, sabbaṃ taṃ imasseva mahāhatthino padanti mahāhatthiṃ disvāva niṭṭhaṃ gacchati.

Evameva khoti ettha idaṃ opammasaṃsandanaṃ – nāgavanaṃ viya hi ādito paṭṭhāya yāva nīvaraṇappahānā dhammadesanā veditabbā. Kusalo nāgavaniko viya yogāvacaro; mahānāgo viya sammāsambuddho; mahantaṃ hatthipadaṃ viya jhānābhīññā. Nāgavanikassa tattha tattha hatthipadaṃ disvāpi vāmanikānaṃ padaṃ bhavissati, kālārikānaṃ kaṇerukānaṃ padaṃ bhavissatīti anīṭṭhaṅgatabhāvo viya yogino, imā jhānābhīññā nāma bāhirakaparibbājānāmpī santīti anīṭṭhaṅgatabhāvo. Nāgavanikassa, tattha tattha mayā diṭṭhaṃ padaṃ imasseva mahāhatthino, na aññassatī mahāhatthim disvā niṭṭhaṅgamaṇaṃ viya ariyasāvakaṃ arahattaṃ patvāva niṭṭhaṅgamaṇaṃ. Idañca pana opammasaṃsandanaṃ matthake ṭhatvāpi kātuṃ vaṭṭati. Imasmimpī ṭhāne vaṭṭatiyeva. Anukkamaṅgataṃ pana pālipadaṃ gahetvā idheva kataṃ. Tattha **idhāti** desāpadese nipāto. Svāyaṃ katthaci lokaṃ upādāya vuccati. Yathāha – “idha tathāgato loka uppajjati”ti (dī. ni. 1.279). Katthaci sāsaṇaṃ. Yathāha – “idheva, bhikkhave, samaṇo, idha dutiyo samaṇo”ti (a. ni. 4.241). Katthaci okāsaṃ. Yathāha –

“Idheva tiṭṭhamānassa, devabhūtaṃ me sato;
Punarāyu ca me laddho, evaṃ jānāhi mārisā”ti. (dī. ni. 2.369; dī. ni. aṭṭha. 1.190);

Katthaci padapūraṇamattameva. Yathāha – “idhāhaṃ, bhikkhave, bhuttāvī assaṃ pavārito”ti (ma. ni. 1.30). Idha pana lokaṃ upādāya vuttoti veditabbo. Idaṃ vuttaṃ hoti “brāhmaṇa imasmim loka tathāgato uppajjati arahamaṃ...pe... buddho bhagavā”ti.

Tattha **tathāgatasaddo** mūlapariyāye, arahantiādayo visuddhimagge vitthāritā. **Loka uppajjati**ti ettha pana **lokoti** okāsaloko sattaloko saṅkhāralokoti tividho. Idha pana sattaloko adhippeto. Sattaloka uppajjamānopi ca tathāgato na devaloka, na brahmaloka, manussalokeyeva uppajjati. Manussalokepi na aññasmim cakkavāḷe, imasmimyeva cakkavāḷe. Tatrāpi na sabbaṭṭhānesu, “puratthimāya disāya **gajaṅgalaṃ** nāma nigamo. Tassāparena mahāsālo, tato parā paccantimā janapadā, orato majjhe. Puratthimadakkhiṇāya disāya **sallavatī** nāma nadī, tato parā paccantimā janapadā, orato majjhe. Dakkhiṇāya disāya **setakaṇṇikaṃ** nāma nigamo, tato parā paccantimā janapadā, orato majjhe. Pacchimāya disāya thūṇaṃ nāma brāhmaṇagāmo, tato parā paccantimā janapadā, orato majjhe. Uttarāya disāya **usiraddhajo** nāma pabbato, tato parā paccantimā janapadā, orato majjhe”ti (mahāva. 259) evaṃ paricchinne āyāmato tiyojanasate vitthāro adḍhateyyayojanasate parikkhepato navayojanasate majjhimapadese uppajjati. Na kevalaṅca tathāgato, paccekabuddhā aggasāvaka asīti mahātherā buddhamātā buddhapitā cakkavattī rājā aññe ca sārappattā brāhmaṇagahapatikā etheva uppajjanti. Tattha tathāgato sujātāya dinnamadhupāyasabhojanato paṭṭhāya yāva arahattamaggo, tāva uppajjati nāma. Arahattaphale uppanno nāma. Mahābhinnikkhamaṇato vā yāva arahattamaggo. Tusitabhavanato vā yāva arahattamaggo. Dīpaṅkarapādāmūlato vā yāva arahattamaggo, tāva uppajjati nāma. Arahattaphale uppanno nāma. Idha sabbaṭṭhaṃ uppannabhāvaṃ sandhāya uppajjati vuttaṃ, tathāgato loka uppanno hotīti ayañhettha attho.

So imaṃ lokanti so bhagavā imaṃ lokaṃ, idāni vattabbaṃ nidasseti. **Sadevakanti** saha devehi sadevakaṃ. Evaṃ saha mārena **samārakaṃ**. Saha brahmunā **sabrahmaṃ**. Saha samaṇabrāhmaṇehi **sassamaṇabrāhmaṇim**. Pajātattā pajā, taṃ **pajamaṃ**. Saha devamanussehi **sadevamanussaṃ**. Tattha sadevakavacanena pañcakāmāvacaradevaggahaṇaṃ veditabbaṃ. Samārakavacanena chaṭṭhakāmāvacaradevaggahaṇaṃ. Sabrahmakavacanena brahmakāyikā dibrahmaggaṇaṃ. Sassamaṇabrāhmaṇivacanena sāsaṇassa paccatthipaccāmittasamaṇabrāhmaṇaggahaṇaṃ samitapāpabāhitapāpasamaṇabrāhmaṇaggahaṇaṃ. Pajāvacanena sattalokaggahaṇaṃ. Sadevamanussavacanena sammutidevaavasesamanussaggahaṇaṃ. Evamettha tīhi padehi okāsalokena saddhim sattaloko, dvīhi pajāvasena sattalokova gahitoti veditabbo.

Aparo nayo – sadevakaggahaṇena arūpāvacaradevaloko gahito. Samārakaggahaṇena chakāmāvacaradevaloko. Sabrahmakaggahaṇena rūpī brahmaloko. Sassamaṇabrāhmaṇādiggahaṇena catuparisavasena sammutidevehi vā saha manussaloko avasesasabbasattaloko vā.

Apicettha sadevakavacanena ukkaṭṭhaparicchato sabbassa lokassa sacchikatabhāvamāha. Tato yesaṃ ahosi – “māro mahānubhāvo chakāmāvacarissaro vasavattī. Kim sopi etena sacchikato”ti? Tesam vimatiṃ vidhamanto **samārakanti** āha. Yesam pana ahosi – “brahmā mahānubhāvo, ekaṅguliyā ekasmim cakkavāḷasahasā ālokaṃ pharati, dvīhi...pe... dasahi aṅgulīhi dasasu cakkavāḷasahasā ālokaṃ pharati,

anuttarañca jhānasamāpattisukhaṃ paṭisaṃvedeti. Kiṃ sopi sacchikato’’ti? Tesam vimatiṃ vidhamanto **sabrahmakanti** āha. Tato ye cintesum – ‘‘puthū samaṇabrāhmaṇā sāsanaṃ paccatthikā, kiṃ tepi sacchikatā’’ti? Tesam vimatiṃ vidhamanto **sassamaṇabrāhmaṇiṃ pajanti** āha. Evaṃ ukkaṭṭhukkaṭṭhānaṃ sacchikatabhāvaṃ pakāsetvā atha sammutideve avasesamanusse ca upādāya ukkaṭṭhaparicchedavasena sesasattalokassa sacchikatabhāvaṃ pakāseto **sadevamanussanti** āha. Ayamettha bhāvānukkamo. Porāṇā panāhu – **sadevakanti** devatāhi saddhiṃ avasesalokaṃ. **Samārakanti** mārena saddhiṃ avasesalokaṃ. **Sabrahmakanti** brahmehi saddhiṃ avasesalokaṃ. Evaṃ sabbepe tibhavūpage satte tihākārehi tisu padesu pakkipetvā puna dvīhi padehi pariyādiyanto ‘‘sassamaṇabrāhmaṇiṃ pajam sadevamanussa’’nti āha. Evaṃ pañcahi padehi tena tenākārena tedhātukameva pariyādinnanti.

Sayaṃ abhiññā sacchikatvā pavedetīti sayanti sāmaṃ aparaneyyo hutvā. **Abhiññāti** abhiññāya, adhikena ñāṇena ñatvāti attho. **Sacchikatvāti** paccakkhaṃ katvā. Etena anumānādipaṭikkhepo kato hoti. **Pavedetīti** bodheti viññāpeti pakāseti. **So dhammaṃ deseti ādikalyāṇaṃ...pe... pariyosānakalyāṇanti** so bhagavā sattesu kāruññataṃ paṭicca hitvāpi anuttaraṃ vivekasukhaṃ dhammaṃ deseti. Tañca kho appaṃ vā bahuṃ vā desento ādikalyāṇādippakārameva deseti. Ādimhipi kalyāṇaṃ bhaddakaṃ anavajjameva katvā deseti. Majjhepi... pariyosānepi kalyāṇaṃ bhaddakaṃ anavajjameva katvā desetīti vuttaṃ hoti.

Tattha atthi desanāya ādimajjhapiyosānaṃ, atthi sāsanaṃ. **Desanāya** tāva catuppadikāyapi gāthāya paṭhamapādo ādi nāma, tato dve majjhaṃ nāma, ante eko pariyosānaṃ nāma. Ekānusandhikassa suttassa nidānamādi, idamavocāti pariyosānaṃ, ubhinnaṃ antarā majjhaṃ. Anekānusandhikassa suttassa paṭhamānusandhi ādi, ante anusandhi pariyosānaṃ, majjhe eko vā dve vā bahū vā majjhameva. **Sāsanaṃ** pana silasamādhivipassanā ādi nāma. Vuttampi cetam – ‘‘ko cādi kusalānaṃ dhammānaṃ, sīlañca suvisuddhaṃ, diṭṭhi ca ujukā’’ti (saṃ. ni. 5.369). ‘‘Atthi, bhikkhave, majjhimā paṭipadā tathāgatena abhisambuddhā’’ti evaṃ vutto pana ariyamaggo majjhaṃ nāma, phalañceva nibbānañca pariyosānaṃ nāma. ‘‘Etadatthamidaṃ, brāhmaṇa, brahmacariyametaṃ sāraṃ, etaṃ pariyosāna’’nti (ma. ni. 1.324) hi ettha phalaṃ pariyosānanti vuttaṃ. ‘‘Nibbānogadhañhi, āvuso visākha, brahmacariyaṃ vussati nibbānaparāyaṇaṃ nibbānapariyosāna’’nti (ma. ni. 1.466) ettha nibbānaṃ pariyosānanti vuttaṃ. Idha desanāya ādimajjhapiyosānaṃ adhippetam. Bhagavā hi dhammaṃ desento ādimhi sīlaṃ dassetvā majjhe maggaṃ pariyosāne nibbānaṃ dasseti. Tena vuttaṃ – ‘‘so dhammaṃ deseti ādikalyāṇaṃ majjhekalyāṇaṃ pariyosānakalyāṇa’’nti. Tasmā aññopi dhammakathiko dhammaṃ kathento –

‘‘Ādimhi sīlaṃ dasseyya, majjhe maggaṃ vibhāvaye;
Pariyosānamhi nibbānaṃ, esā kathikasaññhitī’’ti. (dī. ni. aṭṭha. 1.190);

Sātthaṃ sabyañjananti yassa hi yāgubhattaitthipurisādivaṇṇanā nissitā desanā hoti, na so sātthaṃ deseti. Bhagavā pana tathārūpaṃ desanaṃ pahāya catusatipaṭṭhānādinissitaṃ desanaṃ deseti. Tasmā ‘‘sātthaṃ deseti’’ti vuccati. Yassa pana desanā ekabyañjanādiyuttā vā sabbaniroṭṭhabyañjanā vā sabbavissatṭhasabbaniggahītabyañjanā vā, tassa damiḷakirāsavarādimalakkhūnaṃ bhāsā viya byañjanapāripūriyā abhāvato abyañjanā nāma desanā hoti. Bhagavā pana –

‘‘Sithilaṃ dhanitañca dīgharassaṃ, garukaṃ lahukañca niggahītaṃ;
Sambandhaṃ vavatthitaṃ vimuttaṃ, dasadhā byañjanabuddhiyā pabhedo’’ti. (dī. ni. aṭṭha. 1.190) –

Evaṃ vuttaṃ dasavidhaṃ byañjanaṃ amakkhetvā paripuṇṇabyañjanameva katvā dhammaṃ deseti. Tasmā ‘‘sabyañjanaṃ dhammaṃ deseti’’ti vuccati.

Kevalaparipuṇṇanti ettha **kevalanti** sakalādhivacanaṃ. **Paripuṇṇanti** anūnādhikavacanaṃ. Idaṃ vuttaṃ hoti – ‘‘sakalaparipuṇṇameva deseti, ekadesanāpi aparipuṇṇā natthī’’ti. **Parisuddhanti** nirupakkilesaṃ. Yo hi idaṃ dhammadesanaṃ nissāya lābhaṃ vā sakkāraṃ vā labhissāmīti deseti, tassa aparisuddhā desanā hoti. Bhagavā pana lokāmisānirapekkho hitapharaṇena mettābhāvanāya muduhadayo ullumpanasabhāvasaṅghitena cittena deseti. Tasmā ‘‘parisuddhaṃ dhammaṃ deseti’’ti vuccati. **Brahmacariyaṃ pakāsetīti** ettha **brahmacariyanti** sikkhattayaṅgahaṃ sakalāsānaṃ. Tasmā brahmacariyaṃ pakāsetīti so dhammaṃ deseti ādikalyāṇaṃ...pe... parisuddhaṃ, evaṃ desento ca sikkhattayaṅgahitaṃ sakalāsānaṃ brahmacariyaṃ pakāsetīti evamettha attho daṭṭhabbo. **Brahmacariyanti** seṭṭhatṭhena brahmabhūtaṃ cariyaṃ.

Brahmabhūtaṇaṃ vā buddhādānaṃ cariyanti vuttaṃ hoti.

Taṃ dhammanti taṃ vuttappakārasampadaṃ dhammaṃ. **Suṇāti gahapati vāti** kasmā paṭhamam gahapatiṃ niddisaṭṭi? Nihatamānattā ussannattā ca. Yebhuyyena hi khattiyakulato pabbajitā jātiṃ nissāya mānaṃ karonti. Brāhmaṇakulā pabbajitā mante nissāya mānaṃ karonti. Hīnajaccakulā pabbajitā attano vijātitāya paṭiṭṭhātuṃ na sakkonti. Gahapatidārakā pana kacchehi sedaṃ muṇcantehi piṭṭhiyā loṇaṃ pupphamānāya bhūmiṃ kasitvā nihatamānadappā honti. Te pabbajitvā mānaṃ vā dappaṃ vā akatvā yathābalaṃ buddhavacanaṃ uggahetvā vipassanāya kammaṃ karontā sakkonti arahatte paṭiṭṭhātuṃ. Itarehi ca kulehi nikkhamitvā pabbajitā nāma na bahukā, gahapatikāva bahukā, iti nihatamānattā ussannattā ca paṭhamam gahapatiṃ niddisaṭṭi.

Aññatarasmim vāti itaresaṃ vā kulānaṃ aññatarasmim. **Paccājātoti** patijāto. **Tathāgate saddham paṭilabhatīti** parisuddham dhammaṃ sutvā dhammassāmimhi tathāgate “sammāsambuddho vata bhagavā”ti saddham paṭilabhati. **Iti paṭisañcikkhatīti** evaṃ paccavekkhati. **Sambādho gharāvāsoti** sacepi saṭṭhihatthe ghare yojanasatantarepi vā dve jāyampatikā vasanti, tathāpi nesaṃ sakiñcanasapalibodhaṭṭhena gharāvāso sambādhoeva. **Rajopathoti** rāgarajādānaṃ utṭhānaṭṭhānanti mahāaṭṭhakathāyaṃ vuttaṃ. Āgamanapathotipi vaṭṭati. Alagganaṭṭhena abbhokāso viyāti **abbhokāso**. Pabbajito hi kūtāgāraratanapāsādadevavimānādisu pihitadvāravātapānesu paṭicchanesu vasantopi neva laggatī na sajjati na bajjhati. Tena vuttaṃ – “abbhokāso pabbajjā”ti. Apica sambādho gharāvāso kusalakiriyāya okāsābhāvato. Rajopatho asaṃvutasañkāraṭṭhānaṃ viya rajānaṃ kilesarajānaṃ sannipātaṭṭhānato. Abbhokāso pabbajjā kusalakiriyāya yathāsukhaṃ okāsasabbhāvato.

Nayidaṃ sukaraṃ...pe... pabbajeyyanti ettha ayaṃ sañkhepakathā – yadetaṃ sikkhattayabrahmacariyaṃ ekampi divasaṃ akhaṇḍaṃ katvā carimakacittaṃ pāpetabbatāya ekantaparipuṇṇaṃ. Ekadivasaṃ ca kilesamalena amalinaṃ katvā carimakacittaṃ pāpetabbatāya ekantaparissuddham, sañkhalikhitaṃ likhitasañkhasadisam dhotasañkhasappaṭibhāgaṃ caritabbaṃ, idaṃ na sukaraṃ agāraṃ ajjhāvasatā agāramajjhe vasantena ekantaparipuṇṇaṃ...pe... caritum. Yaṃnūnāhaṃ kese ca massuñca ohāretvā kāsāyarasapītātāya kāsāyāni brahmacariyaṃ carantānaṃ anucchavikāni vatthāni acchādetvā paridahitvā agārasmā nikkhamitvā anagāriyaṃ pabbajeyyanti. Ettha ca yasmā agārassa hitaṃ kasivāññijjādikkammaṃ **agāriyanti** vuccati, tañca pabbajjāya natthi. Tasmā pabbajjā anagāriyāti nātābbā, taṃ **anagāriyaṃ**. **Pabbajeyyanti** paṭipajjeyyaṃ. **Appaṃ vāti** sahassato heṭṭhā bhogakkhandho appo nāma hoti, sahassato paṭṭhāya mahā. Ābandhanaṭṭhena nāti eva parivaṭṭo **nātiparivaṭṭo**. So vīsatiyā heṭṭhā appo hoti, vīsatiyā paṭṭhāya mahā.

292. Bhikkhūnaṃ sikkhāsājīvasamāpannoti yā bhikkhūnaṃ adhisīlasaṅkhātā sikkhā, tañca, yattha cete saha jīvanti ekajīvikā sabhāgavuttino honti, taṃ bhagavatā paññattasikkhāpadasaṅkhātāṃ sājīvañca tattha sikkhanabhāvena samāpannoti bhikkhūnaṃ sikkhāsājīvasamāpanno. **Samāpannoti** sikkhaṃ paripūrento, sājīvañca avītikkamanto hutvā tadubhayaṃ upagatoti attho. **Pāṇātipātaṃ pahāyāti**ādisu pāṇātipātādikathā heṭṭhā vitthāritā eva. **Pahāyāti** imaṃ pāṇātipātacetanāsaṅkhātāṃ dussīlyam pajahitvā. **Paṭivirato hotīti** pahīnakālato paṭṭhāya tato dussīlyato orato viratova hoti. **Nihitadaṇḍo nihitasatthoti** parūpaghātathāya daṇḍaṃ vā satthaṃ vā ādāya avattanato nikkhittadaṇḍo ceva nikkhittasattho cāti attho. Ettha ca ṭhapetvā daṇḍaṃ sabbampi avasesaṃ upakaraṇaṃ sattānaṃ vihiṃsanabhāvato satthanti veditabbaṃ. Yaṃ pana bhikkhū kattaradaṇḍaṃ vā dantakaṭṭhavāsiṃ vā pipphalakaṃ vā gahetvā vicaranti, na taṃ parūpaghātathāya. Tasmā nihitadaṇḍo nihitasatthotveva sañkhaṃ gacchati. **Lajjīti** pāpajjucchanalakkhaṇāya lajjāya samannāgato. **Dayāpannoti** dayam mettacittataṃ āpanno. **Sabbapāṇabhūtāhitānukampīti** sabbe pāṇabhūte hitena anukampako. Tāya dayāpannatāya sabbesaṃ pāṇabhūtānaṃ hitacittakoti attho. **Viharatīti** iriyati pāleti.

Dinnameva ādiyatīti **dinnādāyī**. Cittenapi dinnameva paṭikaṅkhatīti **dinnapāṭikaṅkhi**. Thenetīti theno. Na thenena **athenena**. Athenattāyeva **sucibhūtena**. **Attanāti** attabhāvena, athenaṃ sucibhūtaṃ attabhāvaṃ katvā viharatīti vuttaṃ hoti.

Abrahmacariyanti aseṭṭhacariyaṃ. Brahmaṃ seṭṭhaṃ ācāraṃ caratīti **brahmacārī**. **Ārācārīti** abrahmacariyato dūracārī. **Methunāti** rāgapariyutṭhānavasena sadisattā methunakāti laddhavohārehi paṭisevitabbato methunāti sañkhaṃ gatā asaddhammā. **Gāmadhammāti** gāmaṃvāsīnaṃ dhammā.

Saccam vadatīti **saccavādī**. Saccena saccam sandahati ghaṭetīti **saccasandho**, na antarantarā musā vadatīti attho. Yo hi puriso kadāci musā vadati, kadāci saccam, tassa musāvādena antaritattā saccam saccena na ghaṭiyati. Tasmā na so saccasandho, ayam pana na tādiso, jīvitahetupi musāvādam avatvā saccena saccam sandahatiyevāti **saccasandho**. **Thetoti** thiro, thirakathoti attho. Eko hi puggalo haliddirāgo viya, thusarāsimsi nikhātakhāṇu viya, assapiṭṭhe ṭhapitakumbhaṇḍamiva ca na thirakatho hoti. Eko pāsāṇalekhā viya indakhilo viya ca thirakatho hoti; asinā sīse chijjantepi dve kathā na katheti; ayam vuccati theto. **Paccayikoti** pattiyāyitabbako, saddhāyikoti attho. Ekacco hi puggalo na paccayiko hoti, “idaṃ kena vuttam, asukenā”ti vutte “mā tassa vacanam saddahathā”ti vattabbatam āpajjati. Eko paccayiko hoti, “idaṃ kena vuttam, asukenā”ti vutte, “yadi tena vuttam, idameva pamāṇam, idāni upaparikkhitabbam natthi, evameva ida”nti vattabbatam āpajjati, ayam vuccati paccayiko. **Avisaṃvādako lokassāti** tāya saccavādītāya lokam na visaṃvādetīti attho.

Imesaṃ bhedāyāti yesam ito sutvāti vuttānam santike sutam, tesam bhedāya. **Bhinnānam vā sandhātāti** dvinnampi mittānam vā samānupajjhāyakādīnam vā kenacideva kāraṇena bhinnānam ekamekam upasaṅkamitvā “tumahākam īdise kule jātānam evam bahussutānam idaṃ na yutta”ntiādīni vatvā sandhānam kattā. **Anuppadātāti** sandhānānuppadātā, dve jane samagge disvā, “tumahākam evarūpe kule jātānam evarūpehi guṇehi samannāgatānam anucchavikameta”ntiādīni vatvā dalhīkammaṃ kattāti attho. Samaggo āramo assāti **samaggārāmo**. Yattha samaggā natthi, tattha vasitumpi na icchatīti attho. “Samaggarāmo”tipi pālī, ayamevettha attho. **Samaggaratoti** samaggesu rato, te pahāya aññatra gantumpi na icchatīti attho. Samagge disvāpi sutvāpi nandatīti **samagganandī**. **Samaggakaraṇiṃ vācam bhāsītāti** yā vācā satte samaggeyeva karoti, tam sāmaggiguṇaparidīpakameva vācam bhāsati, na itaranti.

Nelāti elam vuccati doso, nāssā elanti nelā, niddosāti attho. “Nelaṅgo setapacchādo”ti ettha vuttanelam viya. **Kaṇṇasukhāti** byañjanamadhuratāya kaṇṇānam sukhā, sūcivijjhanam viya kaṇṇasūlam na janeti. Atthamadhuratāya sakalasarīre kopam ajanetvā pemaṃ janetīti **pemaṇīyā**. Hadayam gacchati, apaṭihaññamānā sukhena cittaṃ pavasatīti **hadayaṅgamā**. Guṇaparipuṇṇatāya pure bhavāti **porī**, pure saṃvaddhanārī viya sukumārātipi porī, purassa esātipi porī, nagaravāsīnam kathāti attho. Nagaravāsīno hi yuttakathā honti, pitimattam pitāti, mātimmattam mātāti, bhātimattam bhātāti vadanti. Evarūpī kathā bahuno janassa kantā hotīti **bahujanakantā**. Kantabhāveneva bahuno janassa manāpā cittavuddhikarāti **bahujanamanāpā**.

Kālena vadatīti **kālavādī**, vattabbayuttakālam sallakkhetvā vadatīti attho. Bhūtam taccham sabhāvameva vadatīti **bhūtavādī**. Diṭṭhadhammikasamparāyikatthasannissīameva katvā vadatīti **atthavādī**. Navalokuttaradhammasannissitam katvā vadatīti **dhammavādī**. Saṃvaravinayapahānavinayasannissitam katvā vadatīti **vinayavādī**. Nidhānam vuccati ṭhapanokāso, nidhānamassā atthīti **nidhānavatī**, hadaye nidhātabba yuttavācam bhāsītāti attho. **Kālenāti** evarūpiṃ bhāsamānopi ca “ahaṃ nidhānavatiṃ vācam bhāsissāmī”ti na akālena bhāsati, yuttakālam pana avekkhitvā bhāsātīti attho. **Sāpadesanti** saupamaṃ, sakāraṇanti attho. **Pariyantavatinti** paricchedam dassetvā yathāssā paricchedo paññāyati, evam bhāsātīti attho. **Atthasamhitanti** anekhipi nayehi vibhajantena pariyādātum asakkuṇeyyatāya atthasampannam, yaṃ vā so atthavādī attham vadati, tena atthena samhitattā atthasamhitam vācam bhāsati, na aññam nikkhipitvā aññam bhāsātīti vuttam hoti.

293. Bijagāmbhūtagāmasamārambhāti mūlabhījam khandhabhījam phaḷubhījam aggabhījam bhījabhījanti pañcavidhassa bhījagāmassa ceva yassa kassaci nīlatiṇarukkhādikassa bhūtagāmassa ca samārambhā, chedanabhedanapacanādībhāvena vikopānā paṭiviratoti attho. **Ekabhāttikoti** pātarāsabhāttam sāyamāsabhāttanti dve bhāttāni. Tesu pātarāsabhāttam antomajjhanhikena paricchinnam, itaram majjhanhikato uddham antoaruṇena. Tasmā antomajjhanhike dasakkhattum bhuñjamānopi ekabhāttikova hoti, tam sandhāya vuttam “ekabhāttiko”ti. Rattiyā bhojanam ratti, tato uparatoti **rattūparato**. Atikkante majjhanhike yāva sūriyatthamgamanā bhojanam **vikālabhojanam** nāma. Tato viratattā **virato vikālabhojanā**. Sāsanaṃ ananulomattā visūkam paṭāṇībhūtam dassananti **visūkadassanam**. Attanā naccananaccāpanādivasena naccā ca gītā ca vādītā ca, antamaso mayūranaccādivasenāpi pavattānam naccādīnam visūkabhūtā dassanā cāti **naccagītavādīvisūkadassanā**. Naccādīni hi attanā payojetum vā parehi payojāpetum vā payuttāni passitum vā neva bhikkhūnam na bhikkhūnānam vaṭṭanti. **Mālādīso mālati** yaṃkiñci puppham. **Gandhanti** yaṃkiñci gandhajātam. **Vilepananti** chavirāgakaraṇam. Tattha piḷandhanto **dhāreti** nāma. Ūnatthānam pūrento **maṇḍeti** nāma. Gandhavasena chavirāgavasena ca sādīyanto **vibhūseti** nāma. Ṭhānam vuccati kāraṇam. Tasmā yāya

dussīlyacetanāya tāni mālādhāraṇādīni mahājano karoti, tato paṭiviratoti attho.

Uccāsayanam vuccati pamāṇātikkaṇṭam. **Mahāsayanam** akappiyattharaṇam. Tato paṭiviratoti attho. **Jātarūpanti** suvaṇṇam. **Rajatanti** kahāpaṇo lohamāsako jatumāsako dārumāsakoti ye vohāraṇ gacchanti, tassa ubhayassapi paṭiggahaṇā paṭivirato, neva naṃ uggaṇhāti, na uggaṇhāpeti, na upanikkhattam sādīyatīti attho. **Āmakadhañṇapaṭiggahaṇāti** sālivīhiyavagodhūmakaṅguvarakakudrūsakasaṅkhātassa sattavidhassāpi āmakadhañṇassa paṭiggahaṇā. Na kevalaṅca etesaṃ paṭiggahaṇameva, āmasanampi bhikkhūnaṃ na vaṭṭatiyeva. **Āmakamaṃsapaṭiggahaṇāti** ettha aññatra odissa anuññātā āmakamaṃsamacchānaṃ paṭiggahaṇameva bhikkhūnaṃ na vaṭṭati, no āmasanaṃ.

Itthikumārikapaṭiggahaṇāti ettha **itthīti** purisantaragatā, itarā **kumārikā** nāma. Tāsaṃ paṭiggahaṇampi āmasanampi akappiyameva. **Dāsīdāsapaṭiggahaṇāti** ettha dāsīdāsavaseneva tesam paṭiggahaṇam na vaṭṭati, “kappiyākāraṇam dammi, ārāmikaṃ dammi”ti evaṃ vutte pana vaṭṭati. **Ajelakādīsu** khettavatthupariyosānesu kappiyākappiyanayo vinayavasena upaparikkhitabbo. Tattha **khettam** nāma yasmim pubbaṇṇam ruhati. **Vatthu** nāma yasmim aparāṇṇam ruhati. Yattha vā ubhayampi ruhati, taṃ **khettam**. Tadatthāya akatabhūmibhāgo **vatthu**. Khettavatthusīsenā cettha vāpīṭalākādīnīpi saṅgahitāneva. **Dūteyyam** vuccati dūtakammaṃ, gihīnaṃ paṇṇam vā sāsanaṃ vā gahetvā tattha tattha gamaṇam. **Pahiṇagamaṇam** vuccati gharā gharāṃ pesitassa khuddakagamaṇam. **Anuyogo** nāma tadubhayakaraṇam, tasmā dūteyyapahiṇagamaṇānaṃ anuyogāti evamettha attho vedītabbo.

Kayavikkayāti kayā ca vikkayā ca. **Tulākūṭādīsu** **kūṭanti** vañcanaṃ. Tattha tulākūṭam tāva rūpakūṭam aṅgakūṭam gahaṇakūṭam paṭicchannakūṭanti catubbidham hoti. Tattha **rūpakūṭam** nāma dve tulā sarūpā katvā gaṇhanto mahatīyā gaṇhāti, dadanto khuddikāya deti. **Aṅgakūṭam** nāma gaṇhanto pacchābhāge hatthena tulaṃ akkamati, dadanto pubbābhāge. **Gahaṇakūṭam** nāma gaṇhanto mūle rajjuṃ gaṇhāti, dadanto agge. **Paṭicchannakūṭam** nāma tulaṃ susiraṃ katvā anto ayacuṇṇam pakkhipitvā gaṇhanto taṃ pacchābhāge karoti, dadanto aggabhāge. **Kaṃso** vuccati suvaṇṇapāti, tāya vañcanaṃ **kaṃsakūṭam**. Kathaṃ? Ekaṃ suvaṇṇapātiṃ katvā aññā dve tisso lohapātiyo suvaṇṇavaṇṇā karoti, tato janapadaṃ gantvā kiñcīdeva addhakulaṃ pavisitvā, “suvaṇṇabhājanāni kiṇṭhā”ti vatvā agghe pucchite samagghataṃ dātukāmaṃ honti. Tato tehi “kathaṃ imesaṃ suvaṇṇabhāvo jānitabbo”ti vutte – “vīmaṃsitvā gaṇhathā”ti suvaṇṇapātiṃ pāsāṇe ghaṃsitvā sabbā pātiyo datvā gacchati.

Mānakūṭam nāma hadayabhedasikhābhedarajjubhedavasena tividdham hoti. Tattha **hadayabhedo** sappitelādiminānakāle labbhati. Tāni hi gaṇhanto heṭṭhā chiddena mānena, “saṅikaṃ āsīncā”ti vatvā antobhājane bahuṃ paggharāpetvā gaṇhāti; dadanto chiddam pidhāya sīgham pūretvā deti. **Sikhābhedo** tilaṇḍulādiminānakāle labbhati. Tāni hi gaṇhanto saṅikaṃ sikhāṃ ussāpetvā gaṇhāti, dadanto vegena pūretvā sikhāṃ chindanto deti. **Rajjubhedo** khettavatthuminānakāle labbhati. Lañjam alabhantā hi khettam amahantampi mahantaṃ katvā minanti.

Ukkoṭanādīsu **ukkoṭananti** sāmike assāmike kātuṃ lañjaggaṇam. **Vañcananti** tehi tehi upāyehi paresam vañcanaṃ. Tatridamekaṃ vatthu – eko kira luddako migaṅca migapotakaṅca gahetvā āgacchati. Tameko dhutto, “kiṃ, bho, migo agghati, kiṃ migapotako”ti āha. “Migo dve kahāpaṇe migapotako eka”nti ca vutte kahāpaṇam datvā migapotakaṃ gahetvā thokaṃ gantvā nivatto, “na me, bho, migapotakena attho, migaṃ me dehī”ti āha. Tena hi “dve kahāpaṇe dehī”ti. So āha – “nanu te, bho, mayā paṭhamam eko kahāpaṇo dinno”ti. Āma dinnoti. “Imampi migapotakaṃ gaṇha, evaṃ so ca kahāpaṇo ayaṅca kahāpaṇagghanaṃ migapotakoti dve kahāpaṇā bhavissanti”ti. So kāraṇam vadatīti sallakkhetvā migapotakaṃ gahetvā migaṃ adāsīti.

Nikatīti yogavasena vā māyāvasena vā apāmaṅgam pāmaṅganti, amaṇim maṇinti, asuvaṇṇam suvaṇṇanti katvā paṭirūpakena vañcanaṃ. **Sāciyogoti** kuṭīlayogo, etesaṃyeva ukkoṭanādīnametaṃ nāmaṃ, tasmā ukkoṭanasāciyogo vañcanasāciyogo nikatisāciyogoti evamettha attho daṭṭhabbo. Keci aññam dassetvā aññassa parivattanaṃ sāciyogoti vadanti. Taṃ pana vañcaneneva saṅgahitaṃ. **Chedanādīsu** **chedananti** hatthacchedanādi. **Vadhoti** māraṇam. **Bandhoti** rajjubandhanādīhi bandhanaṃ. **Viparāmosoti** himaviparāmoso gumbaviparāmosoti duvidho. Yaṃ himapātasamaye himena paṭicchannā hutvā maggapaṭipannaṃ janaṃ musanti, ayaṃ **himaviparāmoso**. Yaṃ gumbādīhi paṭicchannā musanti, ayaṃ

gumbaviparāmoso. Ālopo vuccati gāmanigamādīnaṃ vilopakaraṇaṃ. **Sahasākāro**ti sāhasikakiriya, gehaṃ pavisitvā manussānaṃ ure satthaṃ ṭhapetvā icchitabhaṇḍaggahaṇaṃ. Evametasmā chedana...pe... sahasākārā paṭivirato hoti.

294. So santuṭṭho hotīti svāyaṃ bhikkhu heṭṭhā vuttena catūsu paccayesu dvādasavidhena itarītarapaccayasantosena samannāgato hoti. Iminā pana dvādasavidhena itarītarapaccayasantosena samannāgatassa bhikkhuno aṭṭha parikkhārā vaṭṭanti tīṇi cīvaraṇi patto dantakaṭṭhacchedanavāsi ekā sūci kāyabandhanaṃ parissāvananti. Vuttampi cetam –

“Ticīvaraṇca patto ca, vāsi sūci ca bandhanaṃ;
Parissāvanena aṭṭhete, yuttayogassa bhikkhuno”ti.

Te sabbepi kāyaparihārikāpi honti kucchiparihārikāpi. Kathaṃ? Ticīvaraṃ tāva nivāsetvā pārūpitvā ca vicaraṇakāle kāyaṃ pariharati posetīti **kāyaparihārikaṃ** hoti, cīvarakaṇṇena udakaṃ parissāvetvā pivanakāle khāditabbaphalāphalaggahaṇakāle ca kucchiṃ pariharati posetīti **kucchiparihārikaṃ** hoti. Pattopi tena udakaṃ uddharitvā nahānakāle kuṭiparibhaṇḍakaraṇakāle ca kāyaparihāriko hoti, āhāraṃ gahetvā bhuñjanakāle kucchiparihāriko hoti. Vāsi pi tāya dantakaṭṭhacchedanakāle mañcapīṭhānaṃ aṅgapādacīvarakuṭidaṇḍakasajjanakāle ca kāyaparihārikā hoti, ucchucchedananāḷikerāditacchanakāle kucchiparihārikā. Sūcipi cīvarasibbanakāle kāyaparihārikā hoti, pūvaṃ vā phalaṃ vā vijjhītvā khādanakāle kucchiparihārikā. Kāyabandhanaṃ bandhitvā vicaraṇakāle kāyaparihārikaṃ, ucchuādīni bandhitvā gahaṇakāle kucchiparihārikaṃ. Parissāvanaṃ tena udakaṃ parissāvetvā nahānakāle, senāsanaparibhaṇḍakaraṇakāle ca kāyaparihārikaṃ, pāṇīyaparissāvanakāle teneva tilataṇḍulaputhukādīni gahetvā khādanakāle ca kucchiparihārikaṃ. Ayaṃ tāva aṭṭhaparikkhārikassa parikkhāramattā.

Navaparikkhārikassa pana seyyaṃ pavisantassa tatraṭṭhakapaccattharaṇaṃ vā kuñcīkā vā vaṭṭati. Dasaparikkhārikassa nisīdanaṃ vā cammakhaṇḍaṃ vā vaṭṭati. Ekādasaparikkhārikassa kattarayaṭṭhi vā telanāḷikā vā vaṭṭati. Dvādasaparikkhārikassa chattaṃ vā upāhanā vā vaṭṭati. Etesu ca aṭṭhaparikkhārikova santuṭṭho, itare asantuṭṭhā, mahicchā mahābhārāti na vattabbā. Etepi hi appicchāva santuṭṭhāva subharāva sallahukavuttinova. Bhagavā pana nayimaṃ suttaṃ tesam vasena kathesi, aṭṭhaparikkhārikassa vasena kathesi. So hi khuddakavāsiṇca sūciṇca parissāvane pakkhipitvā pattassa anto ṭhapetvā pattam aṃsakūṭe laggetvā ticīvaraṃ kāyapaṭibaddhaṃ katvā yenicchakaṃ sukhaṃ pakkamati. Paṭinivattetvā gahetabbaṃ nāmassa na hoti, iti imassa bhikkhuno sallahukavuttitaṃ dassento bhagavā, **santuṭṭho hoti kāyaparihārikena cīvarenā**tiādīmāha.

Tattha **kāyaparihārikenā**ti kāyapariharaṇamattakena. **Kucchiparihārikenā**ti kucchipariharaṇamattakena. **Samādāyeva pakkamatī**ti taṃ aṭṭhaparikkhāramattakaṃ sabbam gahetvā kāyapaṭibaddhaṃ katvāva gacchati, “mama vihāro pariveṇaṃ upaṭṭhāko”tissa saṅgo vā baddho vā na hoti, so jiyā mutto saro viya, yūthā apakkanto mattahatthī viya icchitcchitaṃ senāsaṇaṃ vanasaṇḍaṃ rukkhamūlaṃ vanapabbhāraṃ paribhuñjanto ekova tiṭṭhati, ekova nisīdati, sabbiriyāpathesu ekova adutiyo.

“Cātuddiso appaṭigho ca hoti,
Santussamāno itarītarena;
Parissayānaṃ sahitā achambhī,
Eko care khaggavisāṇakappo”ti. (su. ni. 42);

Evam vaṇṇitaṃ khaggavisāṇakappataṃ āpajjati.

Idāni tamatthaṃ upamāya sādheṇto **seyyathāpī**tiādīmāha. Tattha **pakkhī sakuṇoti** pakkhayutto sakuṇo. **De**ti uppatati. Ayaṃ panettha saṅkhepattho – sakuṇā nāma “asukasmīṃ padese rukkho paripakkaphalo”ti ṇatvā nānādisāhi āgantvā nakhapakkhatuṇḍādīhi tassa phalāni vijjhantā vidhunantā khādanti. “Idaṃ ajjatanāya idaṃ svātanāya bhavissati”ti nesam na hoti. Phale pana khīṇe neva rukkhasa ārakkhaṃ ṭhapenti, na tattha pattam vā nakhaṃ vā tuṇḍaṃ vā ṭhapenti, atha kho tasmīṃ rukkhe anapekkho hutvā yo yaṃ disābhāgaṃ icchati, so tena sapattabhārova – uppatitvā gacchati. Evameva ayaṃ bhikkhu nissaṅgo nirapekkhoyeva pakkamati. Tena vuttaṃ “samādāyeva pakkamatī”ti. **Ariyenā**ti niddosena. **Ajjhattanti** sake attabhāve.

Anavajjasukhanti niddosasukhaṃ.

295. So cakkhunā rūpaṃ disvāti so iminā ariyena sīlakkhandhena samannāgato bhikkhu cakkhuvīññāna rūpaṃ passivāti attho. Sesapadesu yaṃ vattabbaṃ siyā, taṃ sabbaṃ visuddhimagge vuttaṃ. **Abyāsekasukhanti** kilesehi anavasittasukhaṃ, avikiññasukhanti vuttaṃ. Indriyasamvarasukhañhi diṭṭhādīsu diṭṭhamattādivasena pavattatāya avikiññaṃ hoti. **So abhikkante paṭikkanteti** so manacchaṭṭhānaṃ indriyānaṃ samvarena samannāgato bhikkhu imesu abhikkantapaṭikkantādīsu sattasu thānesu satisampajaññavasena sampajānakārī hoti. Tattha yaṃ vattabbaṃ siyā, taṃ satipaṭṭhāne vuttameva.

296. So iminā cātiadinā kiṃ dasseti? Araññavāsassa paccayasampattiṃ dasseti. Yassa hi ime cattāro paccayā natthi, tassa araññavāso na ijjhati, tiracchānagatehi vā vanacarakehi vā saddhiṃ vattabbaṃ āpajjati, araññe adhivatthā devatā, “kiṃ evarūpassa pāpabhikkhuno araññavāsena”ti bheravasaddaṃ sāventi, hatthehi sīsaṃ paharivā palāyanākāraṃ karonti. “Asuko bhikkhu araññaṃ pavisitvā idañcidañca pāpakammaṃ akāsī”ti ayaso pattharati. Yassa panete cattāro paccayā atthi, tassa araññavāso ijjhati, so hi attano sīlaṃ paccavekkhanto kiñci kālakaṃ vā tilakaṃ vā apassanto pītiṃ uppādetvā taṃ khayato vayato sammasanto ariyabhūmiṃ okkamati, araññe adhivatthā devatā attamanā vaṇṇaṃ bhāsanti, itissa uduke pakkhattatelaṃdu viya yaso vitthāriko hoti.

Tattha **vivittanti** suññaṃ appasaddaṃ, appanigghosanti attho. Etadeva hi sandhāya vibhaṅge, “vivittanti santike cepi senāsanaṃ hoti, tañca anākiññaṃ gahaṭṭhehi pabbajitehi, tena taṃ vivitta”nti (vibha. 526) vuttaṃ. Seti ceva āsati ca etthāti **senāsanaṃ**, mañcapīṭhādīnametaṃ adhivacanaṃ. Tenāha – “senāsanaṃ mañcopi senāsanaṃ, pīṭhampi bhisipi bimbohanampi, vihāropi aḍḍhayogopi, pāsāropi, hammiyampi, guhāpi, aṭṭopi, mālopi, leṇampi, veḷugumbopi, rukkhamaṇampi, maṇḍapopi senāsanaṃ, yattha vā pana bhikkhū paṭikkamanti, sabbametaṃ senāsana”nti. Apica “vihāro aḍḍhayogo pāsāro hammiyaṃ guhā”ti idaṃ vihārasenāsanaṃ nāma. “Mañco pīṭhaṃ, bhisi bimbohana”nti idaṃ mañcapīṭhasenāsanaṃ nāma. “Cimilikā, cammakhaṇḍo, tiṇasanthāro, paṇṇasanthāro”ti idaṃ santhasenaṃ nāma. “Yattha vā pana bhikkhū paṭikkamanti”ti idaṃ okāsasenāsanaṃ nāmāti evaṃ catubbidhaṃ senāsanaṃ hoti, taṃ sabbampi senāsanaṃ gahaṇena gahitameva. Imassa pana sakuṇasadisassa cātuddisassa bhikkhuno anucchavikaṃ dassento **araññaṃ rukkhamaṇanti**tiādīmāha.

Tattha **araññanti** “nikkhamitvā bahi indakhīlā, sabbametaṃ arañña”nti idaṃ bhikkhunīnaṃ vasena āgataṃ araññaṃ. “Araññakaṃ nāma senāsanaṃ pañcadhanusatikaṃ pacchima”nti (pārā. 654) idaṃ pana imassa bhikkhuno anurūpaṃ, tassa lakkhaṇaṃ visuddhimagge dhutaṅganiddese vuttaṃ. **Rukkhamaṇanti** yaṃkiñci sandacchāyaṃ vivittaṃ rakkhamūlaṃ. **Pabbatanti** selaṃ. Tattha hi udakasoḍḍisu udakakiccaṃ katvā sītāya rukkhacchāyāya nisinnassa nānādisāsu khāyamānāsu sītena vātena vījyamānassa cittaṃ ekaggaṃ hoti. **Kandaranti** kaṃ vuccati udakaṃ, tena dāritaṃ, udakena bhinnaṃ pabbatappadesaṃ, yaṃ nadītumbantipi nadīkuñjantipi vadanti. Tattha hi rajatapattasadisā vālikā honti, matthake mañvitānaṃ viya vanagahaṇaṃ, mañikkhandhasadisā udakaṃ sandati. Evarūpaṃ kandaraṃ oruḃha pānīyaṃ pivitvā gattāni sītāni katvā vālikāṃ ussāpetvā paṃsukūlacīvaraṃ paññāpetvā nisinnassa samaṇadhammaṃ karoto cittaṃ ekaggaṃ hoti. **Giriguhanti** dvinnaṃ pabbatānaṃ antarā, ekasmiṃyeva vā umaṅgasadisā mahāvivaraṃ. Susānalakkhaṇaṃ visuddhimagge vuttaṃ. **Vanapatthanti** atikkamitvā manussānaṃ upacāraṭṭhānaṃ, yattha na kasanti na vapanti. Tenevāha – “vanapatthanti dūrānametaṃ senāsanaṃ adhivacana”ntiādi (vibha. 531). **Abbhokāsanti** acchannaṃ, ākaṅkhamāno panettha cīvarakuṭiṃ katvā vasati. **Palālapuñjanti** palālarāsiṃ. Mahāpalālapuñjato hi palālaṃ nikkadḍhitvā pabbhāraṇasadisā ālaye karonti, gacchagumbādīnampi upari palālaṃ pakkhipitvā heṭṭhā nisinnā samaṇadhammaṃ karonti, taṃ sandhāyetaṃ vuttaṃ.

Pacchābhanti bhattassa pacchato. **Piṇḍapātaṭikkantoti** piṇḍapātapariyesanato paṭikkanto. **Pallaṅkanti** samantato ūrubaddhānaṃ. **Ābhujitvāti** bandhitvā. **Ujjaṃ kāyaṃ pañidhāyāti** uparimaṃ sarīraṃ ujjaṃ ṭhapetvā aṭṭhārasa piṭṭhikaṇṭake koṭiyā koṭiṃ paṭipādetvā. Evañhi nisinnassa cammamamaṃsanahārūni na paṇamanti. Athassa yā tesāṃ paṇamanapaccayā khaṇe khaṇe vedanā uppajjeyyumaṃ, tā na uppajjanti. Tāsu anuppajjamānāsu cittaṃ ekaggaṃ hoti, kammaṭṭhānaṃ na paripatati, vuddhiṃ phātiṃ upagacchati. **Parimukhaṃ satim upaṭṭhapetvāti** kammaṭṭhānābhimukhaṃ satim ṭhapayitvā, mukhasamīpe vā katvāti attho. Teneva vibhaṅge vuttaṃ – “ayaṃ sati upaṭṭhitā hoti sūpaṭṭhitā nāsikagge vā mukhanimitte vā, tena vuccati parimukhaṃ satim upaṭṭhapetvā”ti (vibha. 537). Atha vā “**parīti** pariggahaṭṭho, **mukhanti** niyyānatto, **satīti**

upaṭṭhānattho, tena vuccati parimukhaṃ sati’’nti (paṭi. ma. 1.164) evaṃ paṭisambhidāyaṃ vuttanāyenaṇapettha attho daṭṭhabbo. Tatrāyaṃ saṅkhepo ‘‘pariggahitaniyyānasatiṃ katvā’’ti.

Abhijjhaṃ loketi ettha lujjanapalujjanatṭhena pañcupādānakkhandhā loko, tasmā pañcasu upādānakkhandhesu rāgaṃ pahāya kāmacchandaṃ vikkhambhetvāti ayamettha attho. **Vigatābhijjhenāti** vikkhambhanavasena pahīnattā vigatābhijjhena, na cakkhuvīññānasadisenāti attho. **Abhijjhāya cittaṃ parisodhetīti** abhijjhāto cittaṃ parimoceti. Yathā naṃ sā muñcati ceva, muñcivā ca na puna gaṇhāti, evaṃ karotīti attho. **Byāpādapadosaṃ pahāyāti**ādīsipi eseva nayo. Byāpajjati iminā cittaṃ pūtikammāsādayo viya purimapakatiṃ pajahatīti **byāpādo**. Vikārāpattiyā padussati, paraṃ vā padūseti vināsetīti **padoso**. Ubhayametaṃ kodhassevādhivacanaṃ. **Thinam** cittagelaññaṃ. **Middham** cetasikagelaññaṃ. Thinañca middhañca **thinamiddham**. **Ālokasaññīti** rattimpi divā diṭṭhaālokasaññānasamatthātāya vigatanīvaraṇāya parisuddhāya saññāya samannāgato. **Sato sampajānoti** satiṃ ca ñāṇena ca samannāgato. Idaṃ ubhayam ālokasaññāya upakārattā vuttaṃ. Uddhaccañca kukkucchañca **uddhaccakukkucchaṃ**. **Tiṇṇavicikicchoti** vicikiccham taritvā atikkamitvā ṭhito. ‘‘Kathamidaṃ kathamida’’nti evaṃ nappavattatīti **akathamkathī**. **Kusalesu dhammesūti** anavajjesu dhammesu. ‘‘Ime nu kho kusalā, kathamime kusalā’’ti evaṃ na vicikicchati na kaṅkhatīti attho. Ayamettha saṅkhepo, imesu pana nīvaraṇesu vacanattalakkhaṇādibhedato yaṃ vattabbaṃ siyā, taṃ sabbaṃ visuddhimagge vuttaṃ.

297. Paññāya dubbalikaraṇeti ime pañca nīvaraṇā uppajjamānā anuppannāya lokiyalokuttarāya paññāya uppajjitum na denti, uppannā apī aṭṭha samāpattiyō pañca vā abhiññā ucchinditvā pātentī; tasmā ‘‘paññāya dubbalikaraṇā’’ti vuccanti. **Tathāgatapadaṃ itipīti** idampi tathāgatassa ñāṇapadaṃ ñāṇavaḷaṅgaṃ ñāṇena akkantaṭṭhānanti vuccati. **Tathāgatanisevitanti** tathāgatassa ñāṇaphāsukāya nighaṃsitatṭhānaṃ. **Tathāgatārañjīti** tathāgatassa ñāṇadāṭṭhāya ārañjītatṭhānaṃ.

299. Yathābhūtaṃ pajānātīti yathāsabhāvaṃ pajānāti. **Natveva tāva ariyasāvako niṭṭhaṃ gato hotīti** imā jhānābhīññā bāhirakehipi sādharmaṇāti na tāva niṭṭhaṃ gato hoti. Maggakkhaṇepi ariyositaṅgacchātāya na tāva niṭṭhaṃ gato hoti. **Apica kho niṭṭhaṃ gacchatīti** apica kho pana maggakkhaṇe mahāhatthiṃ passanto nāgavaniko viya sammāsambuddho bhagavāti iminā ākārena tīsu ratanesu niṭṭhaṃ gacchati. **Niṭṭhaṃ gato hotīti** evaṃ maggakkhaṇe niṭṭhaṃ gacchanto arahattaphalakkhaṇe pariyoṣitasabbakicchātāya sabbākārena tīsu ratanesu niṭṭhaṃ gato hoti. Sesam uttānatthamevāti.

Papañcasūdaniyā majjhimanikāyaṭṭhakathāya

Cūḷahatthipadopamasuttavaṇṇanā niṭṭhitā.

8. Mahāhatthipadopamasuttavaṇṇanā

300. Evaṃ me sutanti mahāhatthipadopamasuttaṃ. Tattha **jaṅgalānanti** pathavītalacārīnaṃ. **Pāṇānanti** sapādakapāṇānaṃ. **Padajātānīti** padāni. **Samodhānaṃ gacchantīti** odhānaṃ pakkhepaṃ gacchanti. **Aggamakkhāyatīti** seṭṭhaṃ akkhāyati. **Yadidaṃ mahantattenāti** mahantabhāvena aggaṃ akkhāyati, na guṇavasenaṇāti attho. **Ye keci kusalā dhammāti** ye keci lokiyā vā lokuttarā vā kusalā dhammā. **Saṅgahaṃ gacchantīti** ettha catubbidho saṅgaho – sañjātisaṅgaho, sañjātisaṅgaho, kiriyasaṅgaho, gaṇanasāṅgahoti. Tattha ‘‘sabbe khattiyā āgacchantu sabbe brāhmaṇā’’ti evaṃ samānājātivāsena saṅgaho **sañjātisaṅgaho** nāma. ‘‘Sabbe kosalakā sabbe māgadhakā’’ti evaṃ sañjātidēsavasena saṅgaho **sañjātisaṅgaho** nāma. ‘‘Sabbe rathikā sabbe dhanuggahā’’ti evaṃ kiriyavasena saṅgaho **kiriyasaṅgaho** nāma. ‘‘Cakkhāyatanaṃ katamakkhandhagaṇanaṃ gacchatīti? Cakkhāyatanaṃ rūpakkhandhagaṇanaṃ gacchati. Hañci cakkhāyatanaṃ rūpakkhandhagaṇanaṃ gacchati, tena vata re vattabbe cakkhāyatanaṃ rūpakkhandhena saṅgahita’’nti (kathā. 471), ayam **gaṇanasāṅgaho** nāma. Imasmimpi ṭṭhāne ayameva adhippeto.

Nanu ca ‘‘catunnaṃ ariyasaccānaṃ kati kusalā kati akusalā kati abyākatātī pañhassa vissajjane samudayasaccaṃ akusalāṃ, maggasaccaṃ kusalāṃ, nirodhasaccaṃ abyākataṃ, dukkhasaccaṃ siyā kusalāṃ, siyā akusalāṃ, siyā abyākata’’nti (vibha. 216-217) āgatattā catubbhūmakampi kusalāṃ diyaḍḍhameva saccam bhajati. Atha kasmā mahāthero catūsu ariyasaccesu gaṇanaṃ gacchatīti āhāti? Saccānaṃ antogadhattā. Yathā hi ‘‘sādhikamidaṃ, bhikkhave, diyaḍḍhasikkhāpadasataṃ anvaddhamāsaṃ uddesaṃ āgacchati, yattha

attakāmā kulaputtā sikkhanti. Tisso imā, bhikkhave, sikkhā adhisīlasikkhā adhicittasikkhā adhipaññāsikkhā”ti (a. ni. 3.88) ettha sādhammidam diyaḍḍhasikkhāpadasatam ekā adhisīlasikkhāva hoti, tam sikkhantopi tisso sikkhā sikkhatīti dassito, sikkhānam antogadhattā. Yathā ca ekassa hatthipadassa catūsu koṭṭhāsesu ekasmim koṭṭhāse otiṇṇānipi dvīsu tīsu catūsu koṭṭhāsesu otiṇṇānipi siṅgālasasamigādīnam pādāni hatthipade samodhānam gatāneva honti. Hatthipadato amuccitvā tasveva antogadhattā. Evameva ekasmimpi dvīsupi tīsupi catūsupi saccesu gaṇanam gatā dhammā catūsu saccesu gaṇanam gatāva honti; saccānam antogadhattāti diyaḍḍhasaccagaṇanam gatepi kusaladhamme “sabbe te catūsu ariyasaccesu saṅgaham gacchantī”ti āha. “Dukkhe ariyasacce”tiādīsu uddesapadesu ceva jātipi dukkhātīādīsu nidesapadesu ca yam vattabam, tam visuddhimagge vuttameva. Kevalam panettha desanānukkamova veditabbo.

301. Yathā hi cheko vilīvakāro sujātam veḷum labhitvā catudhā chetvā tato tayo koṭṭhāse ṭhapetvā ekaṃ gaṇhitvā pañcadhā bhindeyya, tatopi cattāro ṭhapetvā ekaṃ gaṇhitvā phārento pañca pesiyo kareyya, tato catasso ṭhapetvā ekaṃ gaṇhitvā kucchibhāgaṃ piṭṭhibhāganti dvidhā phāletvā piṭṭhibhāgaṃ ṭhapetvā kucchibhāgaṃ ādāya tato samuggabījānitālavaṇṭādinānappakāraṃ veḷuvikaṭim kareyya, so piṭṭhibhāgaṃ itarā ca catasso pesiyo itare ca cattāro koṭṭhāse itare ca tayo koṭṭhāse kammāya na upanessatīti na vattabbo. Ekappahārena pana upanetum na sakkā, anupubbena upanessati. Evameva ayam mahātheropi vilīvakāro sujātam veḷum labhitvā cattāro koṭṭhāse viya, imam mahantam suttantam ārabhitvā catuariyasaccavasena mātikaṃ ṭhapesi. Vilīvakārassa tayo koṭṭhāse ṭhapetvā ekaṃ gahetvā tassa pañcadhā karaṇam viya therassa tīṇi ariyasaccāni ṭhapetvā ekaṃ dukkhasaccam gahetvā bhājentassa khandhavasena pañcadhā karaṇam. Tato yathā so vilīvakāro cattāro koṭṭhāse ṭhapetvā ekaṃ bhāgaṃ gahetvā pañcadhā phālesi, evam therō cattāro arūpakkhandhe ṭhapetvā rūpakkhandham vibhajanto **cattāri ca mahābhūtāni catunnañca mahābhūtānam upādāya rūpanti** pañcadhā akāsi. Tato yathā so vilīvakāro catasso pesiyo ṭhapetvā ekaṃ gahetvā kucchibhāgaṃ piṭṭhibhāganti dvidhā phālesi, evam therō upādāya rūpañca tisso ca dhātuyo ṭhapetvā ekaṃ pathavīdhātum vibhajanto ajjhattikabāhiravasena dvidhā dassesi. Yathā so vilīvakāro piṭṭhibhāgaṃ ṭhapetvā kucchibhāgaṃ ādāya nānappakāraṃ vilīvavikaṭim akāsi, evam therō bāhiram pathavīdhātum ṭhapetvā ajjhattikaṃ pathavīdhātum vīsatiyā ākārehi vibhajitvā dassetum **katamā cāvuso, ajjhattikā pathavīdhātūti**ādīmāha.

Yathā pana vilīvakāro piṭṭhibhāgaṃ itarā ca catasso pesiyo itare ca cattāro koṭṭhāse itare ca tayo koṭṭhāse anupubbena kammāya upanessati, na hi sakkā ekappahārena upanetum, evam theropi bāhirañca pathavīdhātum itarā ca tisso dhātuyo upādārūpañca itare ca cattāro arūpino khandhe itarāni ca tīṇi ariyasaccāni anupubbena vibhajitvā dassessati, na hi sakkā ekappahārena dassetum. Apica rājaputtūpamāyapi ayam kamo vibhāvetabbo –

Eko kira mahārājā, tassa parosahassam puttā. So tesam piḷandhanaparikkhāraṃ catūsu peḷāsu ṭhapetvā jeṭṭhaputtassa appesi – “idaṃ te, tāta, bhātīkānam piḷandhanabhaṇḍam tathārūpe chaṇe sampatte piḷandhanam no dehīti yācantānam dadeyyāsi”ti. So “sādhu devā”ti sārāgabbhe paṭisāmesi, tathārūpe chaṇadivase rājaputtā rañño santikaṃ gantvā “piḷandhanam no, tāta, detha, nakkhattam kīḷissāmā”ti āhaṃsu. Tātā, jeṭṭhabhātīkassa vo hatthe mayā piḷandhanam ṭhapitam, tam āharāpetvā piḷandhathāti. Te sādhitūti paṭissuṇitvā tassa santikaṃ gantvā, “tumhākaṃ kira no hatthe piḷandhanabhaṇḍam, tam dethā”ti āhaṃsu. So evam karissāmīti gabbham vivarivā, catasso peḷāyo nīharitvā tisso ṭhapetvā ekaṃ vivarivā, tato pañca samugge nīharitvā cattāro ṭhapetvā ekaṃ vivarivā, tato pañcasu karaṇdesu nīharitesu cattāro ṭhapetvā ekaṃ vivarivā pidhānam passe ṭhapetvā tato hatthūpagapādūpagādīni nānappakārāni piḷandhanāni nīharitvā adāsi. So kiñcāpi itarehi catūhi karaṇdehi itarehi catūhi samuggehi itarāhi tīhi peḷāhi na tāva bhājetvā deti, anupubbena pana dassati, na hi sakkā ekappahārena dātum.

Tattha mahārājā viya bhagavā daṭṭhabbo. Vuttampi cetam – “rājāhamasmi selāti bhagavā, dhammarājā anuttaro”ti (su. ni. 559). Jeṭṭhaputto viya sārīputtatthero, vuttampi cetam – “yam kho tam, bhikkhave, sammā vadamāno vadeyya, ‘bhagavato putto oraso mukhato jāto dhammajo dhammanimitto dhammadāyādo, no āmisadāyādo’ti sārīputtameva tam sammā vadamāno vadeyya, bhagavato putto...pe... no āmisadāyādo”ti (ma. ni. 3.97). Parosahassarājaputtā viya bhikkhusaṅgho daṭṭhabbo. Vuttampi cetam –

“Parosahassam bhikkhūnam, sugatam payirupāsati;
Desentam virajam dhammam, nibbānam akutobhaya”nti. (sam. ni. 1.216);

Raṅṅo tesam puttānaṃ piḷandhanaṃ catūsu peḷāsu pakkhipitvā jeṭṭhaputtassa hatthe ṭhapitakālo viya bhagavato dhammasenāpatissa hatthe catusaccappakāsanāya ṭhapitakālo, tenevāha – “sāriputto, bhikkhave, pahoti cattāri ariyasaccāni vitthārena ācikkhituṃ desetū paññāpetuṃ paṭṭhapetuṃ vivarituṃ vibhajituṃ uttānikātu”nti (ma. ni. 3.371). Tathārūpe khaṇe tesam rājaputtānaṃ taṃ rājānaṃ upasaṅkamitvā piḷandhanaṃ yācanakālo viya bhikkhusaṅghassa vassūpanāyikasamaye āgantvā dhammadesanāya yācitakālo. Upakaṭṭhāya kira vassūpanāyikāya idaṃ suttaṃ desitaṃ. Raṅṅo, “tātā, jeṭṭhabhātikassa vo hatthe mayā piḷandhanaṃ ṭhapitaṃ taṃ āharāpetvā piḷandhathā”ti vuttakālo viya sambuddhenāpi, “sevetha, bhikkhave, sāriputtamoggallāne, bhajatha, bhikkhave, sāriputtamoggallāne. Paṇḍitā bhikkhū anuggāhakā sabrahmacārīna”nti evaṃ dhammasenāpatino santike bhikkhūnaṃ pesitakālo.

Rājaputtehi raṅṅo kathaṃ sutvā jeṭṭhabhātikassa santikaṃ gantvā piḷandhanaṃ yācitakālo viya bhikkhūhi satthukathaṃ sutvā dhammasenāpatiṃ upasaṅkamma dhammadesanaṃ āyācitakālo. Jeṭṭhabhātikassa gabbhaṃ vivarivā catasso peḷāyo nīharitvā ṭhapanāṃ viya dhammasenāpatissa imaṃ suttantaṃ ārabhitvā catunnaṃ ariyasaccānaṃ vasena mātikāya ṭhapanāṃ. Tisso peḷāyo ṭhapetvā ekaṃ vivarivā tato pañcasamuggaṇīharaṇaṃ viya tīṇi ariyasaccāni ṭhapetvā dukkhaṃ ariyasaccaṃ vibhajantassa pañcakkhandhadassanaṃ. Cattāro samugge ṭhapetvā ekaṃ vivarivā tato pañcakaṇḍanīharaṇaṃ viya cattāro arūpakkhandhe ṭhapetvā ekaṃ rūpakkhandhaṃ vibhajantassa catumahābhūtaupādārūpavasena pañcakoṭṭhāsadassanaṃ.

302. Cattāro karaṇḍe ṭhapetvā ekaṃ vivarivā pidhānaṃ passe ṭhapetvā hatthūpagapādūpagādiḷandhanadānaṃ viya tīṇi mahābhūtāni upādārūpaṅca ṭhapetvā ekaṃ pathavīdhātuṃ vibhajantassa bāhiraṃ tāva pidhānaṃ viya ṭhapetvā ajjhattikāya pathavīdhātuyā nānāsabhāvato vīsatiyā ākārehi dassanattaṃ “katamā cāvuso ajjhattikā pathavīdhātū”tiādivacanaṃ.

Tassa pana rājaputtassa tehi catūhi karaṇḍehi catūhi samuggehi tīhi ca peḷāhi pacchā anupubbena nīharitvā piḷandhanadānaṃ viya therassāpi itaresaṅca tiṇṇaṃ mahābhūtānaṃ upādārūpānaṅca catunnaṃ arūpakkhandhānaṅca tiṇṇaṃ ariyasaccānaṅca pacchā anupubbena bhājetvā dassanaṃ veditabbaṃ. Yaṃ panetaṃ “katamā cāvuso, ajjhattikā pathavīdhātū”tiādi vuttaṃ. Tattha **ajjhattaṃ paccattanti** ubhayampetaṃ niyākādhivacanaṃ. **Kakkhaḷanti** thaddhaṃ. **Kharigatanti** pharusāṃ. **Upādinnaṃ** na kammasamuṭṭhānameva, avisesena pana sarīraṭṭhakassetāṃ gahaṇaṃ. Sarīraṭṭhakaṅhi upādinnaṃ vā hotu, anupādinnaṃ vā, ādinnagahitaparāmaṭṭhavasena sabbaṃ upādinnaṃ nāma. Seyyathidaṃ – kesā lomā... pe... udariyaṃ karīsanti idaṃ dhātukammaṭṭhānikassa kulaputtassa ajjhattikapathavīdhātuvāsena tāva kammaṭṭhānaṃ vibhattaṃ. Ettha pana manasikāraṃ ārabhitvā vipassanaṃ vaḍḍhetvā arahattaṃ gahetukāmena yaṃ kātabbaṃ, taṃ sabbaṃ visuddhimagge vitthāritameva. Matthalungaṃ pana na idha pāḷiāruḷhaṃ. Tampi āharitvā, visuddhimagge vuttanayeneva vaṇṇasaṅghānādivasena vavattaṭṭhapetvā, “ayampi acetanā abyākātā suññā thaddhā pathavīdhātu evā”ti manasi kātabbaṃ. **Yaṃ vā panaññampīti** idaṃ itaresu tīsu koṭṭhāsesu anugātāya pathavīdhātuyā gahaṇattaṃ vuttaṃ. **Yā ceva kho pana ajjhattikā pathavīdhātūti** yā ca ayaṃ vuttappakāraṃ ajjhattikā pathavīdhātu. **Yā ca bāhirāti** yā ca vibhaṅge, “ayo lohaṃ tīpu sīsa”ntiādinā (vibha. 173) nayena āgatā bāhirā pathavīdhātu.

Ettāvataṃ therena ajjhattikā pathavīdhātu nānāsabhāvato vīsatiyā ākārehi vitthārena dassitā, bāhirā saṅkhepena. Kasmā? Yasmiṅhi ṭhāne sattānaṃ ālayo nikanti patthanā pariyaṭṭhānaṃ gahaṇaṃ parāmāso balavā hoti, tattha tesam ālayādīnaṃ uddharaṇattaṃ buddhā vā buddhasāvaka vā vitthārakathaṃ kathenti. Yattha pana na balavā, tattha kattabbakiccābhāvato saṅkhepena kathenti. Yathā hi kassako khettaṃ kasamāno yattha mūlasantānakānaṃ balavatāya naṅgalaṃ laggati, tattha goṇe ṭhapetvā paṃsum viyūhitvā mūlasantānakāni chetvā chetvā uddharanto bahuṃ vāyāmaṃ karoti. Yattha tāni natthi, tattha balavaṃ payogaṃ katvā goṇe piṭṭhiyaṃ paharamāno kasatiyeva, evaṃsappadamidaṃ veditabbaṃ.

Pathavīdhātūrevesāti duvidhāpesā thaddhaṭṭhena kakkhaḷaṭṭhena pharusatṭhena ekalakkhaṇā pathavīdhātuyeva, āvusoti ajjhattikaṃ bāhirāya saddhiṃ yojetvā dasseti. Yasmiṃ bāhirāya pathavīdhātuyā acetanābhāvo pākaṭo, na ajjhattikāya, tasmā sā bāhirāya saddhiṃ ekasadisā acetanāyevāti gaṇhantassa sukhapariḅgaho hoti. Yathā kiṃ? Yathā dantena goṇena saddhiṃ yojito adanto katipāhameva visūkāyati vipphandati, atha na cirasseva damathaṃ upeti. Evaṃ ajjhattikāpi bāhirāya saddhiṃ ekasadisāti gaṇhantassa katipāhameva acetanābhāvo na upaṭṭhāti, atha na cirenevassā acetanābhāvo pākaṭo hoti. **Taṃ netam mamāti** taṃ ubhayampi na etaṃ mama, na esohamasmi, na eso me attāti evaṃ yathābhūtaṃ sammappaññāya

daṭṭhabbam. **Yathābhūta**nti yathāsabhāvaṃ, tañhi aniccādisabhāvaṃ, tasmā aniccaṃ dukkhamanattāti evaṃ daṭṭhabbanti attho.

Hoti kho so, āvusoti kasmā ārabhi? Bāhiraāpodhātuvasena bāhirāya pathavīdhātuyā vināsaṃ dassetvā tato visesatarena upādināya sarīraṭṭhakapathavīdhātuyā vināsadassanattam. **Pakuppattī** āposamvaṭṭavasena vaḍḍhamānā kuppattī. **Antarahitā tasmim samaye bāhirā pathavīdhātu hotīti** tasmim samaye koṭṭisatasahassacakkavāle khārodakena vilīyamānā udakānugatā hutvā sabbā pabbatādivasena saññhitā pathavīdhātu antarahitā hoti. Vilīyitvā udakameva hoti. **Tāva mahallikāyāti** tāva mahantāya.

Duve satahassāni, cattāri nahutāni ca;
Ettakaṃ bahalattena, sañkhātāyaṃ vasundharāti. –

Evaṃ bahalatteneva mahantāya, vitthārato pana koṭṭisatasahassacakkavāḷappamānāya. **Aniccatāti** hutvā abhāvātā. **Khayadhammatāti** khayam gamanasabhāvātā. **Vayadhammatāti** vayam gamanasabhāvātā. **Vipariṇāmadhammatāti** pakativijahanasabhāvātā, iti sabbehipi imehi padehi aniccalakkhaṇameva vuttam. Yaṃ pana aniccaṃ, taṃ dukkhaṃ. Yaṃ dukkhaṃ, taṃ anattāti tīṇipi lakkhaṇāni āgatāneva hontī. **Mattaṭṭhakassāti** parittaṭṭhitikassa, tattha dvīhākārehi imassa kāyassa parittaṭṭhititā veditabbā ṭhitiparittatāya ca sarasaparittatāya ca. Ayañhi atīte cittakkhaṇe jīvittha, na jīvati, na jīvissati. Anāgate cittakkhaṇe jīvissati, na jīvati, na jīvittha. Paccuppanne cittakkhaṇe jīvati, na jīvittha, na jīvissatīti vuccati.

“Jīvitam attabhāvo ca, sukhadukkha ca kevalā;
Ekacittasamāyuttā, lahu so vattate khaṇo”ti. –

Idaṃ etasseva parittaṭṭhitidassanattam vuttam. Evaṃ **ṭhitiparittatāya** parittaṭṭhititā veditabbā.

Assāsapassāsūpanibaddhādibhāvena panassa **sarasaparittatā** veditabbā. Sattānañhi assāsūpanibaddham jīvitam, passāsūpanibaddham jīvitam, assāsapassāsūpanibaddham jīvitam, mahābhūtūpanibaddham jīvitam, kabalīkārahārūpanibaddham jīvitam, viññānūpanibaddham jīvitanti visuddhimagge vitthāritam.

Taṇhupādinnassāti tañhāya ādinnagahitaparāmaṭṭhassa **ahanti vā mamanti vā asmīti vā. Atha khvāssa notevettha hotīti** atha kho assa bhikkhuno evaṃ tīṇi lakkhaṇāni āropetvā passantassa ettha ajjhattikāya pathavīdhātuyā ahanti vātiādi tividho tañhāmānadiṭṭhiggāho noteva hoti, na hotiyevāti attho. Yathā ca āpodhātuvasena, evaṃ tejodhātuvāyodhātuvasenapi bāhirāya pathavīdhātuyā antaradhānam hoti. Idha pana ekaṃyeva āgataṃ. Itarānīpi atthato veditabbāni.

Tañce, āvusoti idha tassa dhātukammaṭṭhānikassa bhikkhuno sotadvāre pariggahaṃ paṭṭhapento balaṃ dassetī. **Akkosantīti** dasahi akkosavatthūhi akkosanti. **Paribhāsantīti** tayā idañcīdañca kataṃ, evañca evañca taṃ karissāmāti vācāya paribhāsanti. **Rosentīti** ghaṭṭenti. **Vihesentīti** dukkhāpentī, sabbaṃ vācāya ghaṭṭanameva vuttam. **So evanti** so dhātukammaṭṭhāniko evaṃ sampajānāti. **Uppannā kho me ayanti** sampativattamānuppannabhāvena ca samudācārūpannabhāvena ca uppannā. **Sotasamphassajāti** upanissayavasena sotasamphassato jātā sotadvārajavanavedanā, **phasso aniccoti** sotasamphasso hutvā abhāvattāneva aniccoti passati. Vedanādayopi sotasamphassasampayuttāya veditabbā. **Dhātārammaṇamevāti** dhātusañkhātameva ārammaṇam. **Pakkhandatīti** otarati. **Pasīdatīti** tasmim ārammaṇe pasīdati, bhummavacanameva vā etaṃ. Byañjanasandhivasena “dhātārammaṇamevā”ti vuttam, dhātārammaṇeyevāti ayamettha attho. **Adhimuccatīti** dhātuvasena evanti adhimokkham labhati, na rajjati, na dussati. Ayañhi sotadvāramhi ārammaṇe āpāthagate mūlapariññāgantukatāvākālikavasena pariggahaṃ karoti, tassa vitthārakathā satipaṭṭhāne satisampajāññapabbe vuttā. Sā pana tattha cakkhudvāravasena vuttā, idha sotadvāravasena veditabbā.

Evaṃ katapariggahassa hi dhātukammaṭṭhānikassa balavavīpassakassa sacepi cakkhudvārādīsu ārammaṇe āpāthagate ayoniso āvajjanam uppajjati, voṭṭhabbanam patvā ekaṃ dve vāre āsevanam labhitvā cittaṃ bhavaṅgameva otarati, na rāgādivasena uppajjati, ayam koṭṭipatto tikkhavīpassako. Aparassa rāgādivasena ekaṃ vāram javanam javati, javanapariyosāne pana rāgādivasena evaṃ me javanam javitanti āvajjato ārammaṇam pariggahitameva hoti, puna vāram tathā na javati. Aparassa ekavāram evaṃ āvajjato puna

dutiyavāraṃ rāgādivasena javanaṃ javatiyeva, dutiyavārāvasāne pana evaṃ me javanaṃ javitanti āvajjato ārammaṇaṃ pariggahitameva hoti, tatiyavāre tathā na uppajjati. Ettha pana paṭhamo atitikkho, tatiyo atimando, dutiyassa pana vasena imasmiṃ sutte, laṭukikopame, indriyabhāvane ca ayamatto veditabbo.

Evaṃ sotadvāre pariggahitavasena dhātukammaṭṭhānikassa balaṃ dassetvā idāni kāyadvāre dīpento **tañce**, **āvusoti**ādīmāha. Anittārammaṇaṃhi patvā dvīsu vāresu kilamati sotadvāre ca kāyadvāre ca. Tasmā yathā nāma khattassāmī puriso kudālaṃ gahetvā khattaṃ anusañcaranto yattha vā tattha vā mattikapiṇḍaṃ adatvā dubbalaṭṭhānesuyeva kudālena bhūmiṃ bhinditvā satīṇamattikapiṇḍaṃ deti. Evameva mahāthero anāgate sikkhākāmā padhānakammikā kulaputtā imesu dvāresu saṃvaram paṭṭhapetvā khippameva jātijāramaraṇassa antaṃ karissantīti imesuyeva dvīsu dvāresu gāḷhaṃ katvā saṃvaram desento imaṃ desanaṃ ārabhi.

Tattha **samudācarantīti** upakkamanti. **Pāṇisamphassenāti** pāṇippahārena, itaresupi eseve nayo. **Tathābhūtoti** tathāsabhāvo. **Yathābhūtasmiṃti** yathāsabhāve. **Kamantīti** pavattanti. **Evaṃ buddhaṃ anussaratoti**ādīsu itipi so bhagavātiādīnā nayena anussarantopi buddhaṃ anussarati, vuttaṃ kho panetaṃ bhagavatāti anussarantopi anussaratiyeva. Svākkhāto bhagavatā dhammotiādīnā nayena anussarantopi dhammaṃ anussarati, kakacūpamovādaṃ anussarantopi anussaratiyeva. Suppaṭipannotiādīnā nayena anussarantopi saṅghaṃ anussarati, kakacokantaṃ adhiyāsayaṃānassa bhikkhuno guṇaṃ anussaramānopi anussaratiyeva.

Upekkhā kusalanissitā na saṅghātīti idha vipassanupekkhā adhippetā. **Upekkhā kusalanissitā saṅghātīti** idha chaḷaṅgupekkhā, sā panesā kiñcāpi khīṇāsavassa itthāniṭṭhesu ārammaṇesu arajjanādivasena pavattati, ayaṃ pana bhikkhu vīriyabalena bhāvanāsiddhiyā attano vipassanaṃ khīṇāsavassa chaḷaṅgupekkhāṭṭhāne ṭhapetīti vipassanāva chaḷaṅgupekkhā nāma jātā.

303. Āpodhātuniddese **āpogātanti** sabbaāpesu gataṃ allayūsabhāvalakkhaṇaṃ. **Pittaṃ semhanti**ādīsu pana yaṃ vattabbaṃ, taṃ sabbaṃ saddhiṃ bhāvanānāyena visuddhimagge vuttaṃ. **Pakuppattīti** oghavasena vaḍḍhati, samuddato vā udakaṃ uttarati, ayamassa pākatico pakopo, āposamvaṭṭakāle pana koṭīsatasaḥassacakkavāḷaṃ udakapūrameva hoti. **Ogacchantīti** heṭṭhā gacchanti, uddhane āropitaudakaṃ viya khayāṃ vināsaṃ pāpuṇanti. Sesāṃ purimanayeneva veditabbaṃ.

304. Tejodhātuniddese **tejogātanti** sabbatejesu gataṃ uṇhattalakkhaṇaṃ. Tejo eva vā tejobhāvaṃ gātanti **tejogataṃ**. Purime āpogatepi pacchime vāyogatepi eseve nayo. **Yena cāti** yena tejogatepi. Tasmīṃ kuppīte ayaṃ kāyo santappati, ekāhikajarādibhāvena usumajāto hoti. **Yena ca jīriyatīti** yena ayaṃ kāyo jīrati, indriyavekallattaṃ balaparikkhayaṃ valipalitādibhāvaṃca pāpuṇāti. **Yena ca pariḍayhatīti** yena kuppīte ayaṃ kāyo dayhati, so ca puggalo dayhāmi dayhāmīti kandanto satadhotasappigosītacandanādilepaṃca tālavaṇṭavātaṃca paccāsīsatī. **Yena ca asitapītakhāyitasāyitaṃ sammā pariṇāmaṃ gacchatīti** yena taṃ asitaṃ vā odanādi, pītaṃ vā pānakādi, khāyitaṃ vā piṭṭhakhajjakādi, sāyitaṃ vā ambapakkamadhuphāṇitādi sammā paripākaṃ gacchati, rasādibhāvena vivekaṃ gacchatīti attho. Ayamettha saṅkhepo. Vitthārato pana yaṃ vattabbaṃ siyā, taṃ sabbaṃ saddhiṃ bhāvanānāyena visuddhimagge vuttaṃ.

Haritantanti haritameva. Allatiṇḍaḍḍiṃ āgamma nibbāyatīti attho. **Panthantanti** mahāmaggameva. **Selantanti** pabbataṃ. **Udakantanti** udakaṃ. **Ramaṇiyaṃ vā bhūmibhāganti** tiṇagumbādirahitaṃ, vivittaṃ abbhokāsaṃ bhūmibhāgaṃ. **Anāhārāti** nirāhārā nirupādānā, ayampi pakatiyāva tejavikāro vutto, tejosamvaṭṭakāle pana koṭīsatasaḥassacakkavāḷaṃ jhāpetvā chārikāmattampi na tiṭṭhati. **Nhārudaddulenāti** cammanillekhanena. **Aggiṃ gavesantīti** evarūpaṃ sukhumāṃ upādānaṃ gahetvā aggiṃ pariyesanti, yaṃ appamattakampi usumaṃ labhitvā pajjalati, sesamidhāpi purimanayeneva veditabbaṃ.

305. Vāyodhātuniddese **uddhaṅgamā vātāti** uggārahikkārādīpavattakā uddhaṃ ārohanavātā. **Adhogamā vātāti** uccārapassāvādīnāharaṇakā adho orohanavātā. **Kucchisayā vātāti** antānaṃ bahivātā. **Koṭṭhāsaya vātāti** antānaṃ antovātā. **Āṅgamaṅgānusārīnoti** dhamanījālānūsārena sakalasarīre āṅgamaṅgāni anusaṭṭā samīṇjanapasāraṇādīnībhattakavātā. **Assāsoti** antopavisananāsikavāto. **Passāsoti** bahinikkhamananāsikavāto. Ayamettha saṅkhepo. Vitthārato pana yaṃ vattabbaṃ siyā, taṃ sabbaṃ saddhiṃ bhāvanānāyena visuddhimagge vuttaṃ.

Gāmampi vahatīti sakalagāmampi cuṇṇavicuṇṇaṃ kurumānā ādāya gacchati, nigamādīsupi eseva nayo. Idha vāyosaṃvaṭṭakāle koṭisatasahassacakkavālaviddhamaṃsanavasena vāyodhātuvikāro dassito. **Vidhūpanenāti** aggibījanakena. **Ossavaneti** chadanagge, tena hi udakaṃ savati, tasmā taṃ “ossavana”nti vuccati. Sesamidhāpi purimanayeneva yojetabbaṃ.

306. Seyyathāpi, āvusoti idha kiṃ dasseti? Heṭṭhā kathitānaṃ mahābhūtānaṃ nissattabhāvaṃ. **Kaṭṭhanti** dabbasambhāraṃ. **Vallinti** ābandhanavalliṃ. **Tiṇanti** chadanatiṇaṃ. **Mattikanti** anulepamattikaṃ. **Ākāso parivāritoti** etāni kaṭṭhādīni anto ca bahi ca parivāretvā ākāso ṭhitoti attho. **Agāraṃtveva saṅkhaṃ gacchatīti** agāraṃti paṇṇattimattaṃ hoti. Kaṭṭhādīsū pana viṣuṃ viṣuṃ rāsikatesu kaṭṭharāsivallirāsītveva vuccati. **Evameva khoti** evameva aṭṭhiādīni anto ca bahi ca parivāretvā ṭhito ākāso, tāneva aṭṭhiādīni paṭicca rūpaṃtveva saṅkhaṃ gacchati, sarīraṃti vohāraṃ gacchati. Yathā kaṭṭhādīni paṭicca gehanti saṅkhaṃ gataṃ agāraṃ khattiyagehaṃ brāhmaṇagehanti vuccati, evamidampi khattiyasarīraṃ brāhmaṇasarīraṃti vuccati, na hettha koci satto vā jīvo vā vijjati.

Ajjhattikañceva, āvuso, cakkhūti idamaṃ kasmā āradhamaṃ? Heṭṭhā upādārūpaṃ cattāro ca arūpino khandhā tīni ca ariyasaccāni na kathitāni, idāni tāni kathetuṃ ayaṃ desanā āradhātī. Tattha **cakkhuṃ aparibhinnanti** cakkhupasāde niruddhepi upahatepi pittasemhalohitehi palibuddhepi cakkhu cakkhuvīññāssa paccayo bhavituṃ na sakkoti, paribhinnameva hoti, cakkhuvīññāssa pana paccayo bhavituṃ samatthaṃ aparibhinnaṃ nāma. **Bāhirā ca rūpāti** bāhirā catusamuṭṭhānikarūpā. **Tajjo samannāhāroti** taṃ cakkhuñca rūpe ca paṭicca bhavaṅgaṃ āvaṭṭetvā uppajjanamanasikāro, bhavaṅgāvaṭṭanasamatthaṃ cakkhudvāre kiriyamanodhātucittanti attho. Taṃ rūpānaṃ anāpāthagatattāpi aññāvihitassapi na hoti, **tajjassāti** tadanurūpassa. **Viññānabhāgassāti** viññānakoṭṭhāsassa.

Yaṃ tathābhūtassātiādīsū dvāravasena cattāri saccāni dasseti. Tattha **tathābhūtassāti** cakkhuvīññāṇena sahabhūtassa, cakkhuvīññāṇasamaṅginoti attho. **Rūpanti** cakkhuvīññāṇassa na rūpajanakattā cakkhuvīññāṅkhaṇe tisamuṭṭhānarūpaṃ, tadanantaracittakkhaṇe catusamuṭṭhānampi labbhati. **Saṅgahaṃ gacchatīti** gaṇanaṃ gacchati. Vedanādayo cakkhuvīññāṇasampayuttāva. Viññāṇampi cakkhuvīññāṇameva. Ettha ca saṅkhārāti cetanāva vuttā. **Saṅgahoti** ekato saṅgaho. **Sannipātoti** samāgamo. **Samavāyoti** rāsi. **Yo paṭiccasamuppādaṃ passatīti** yo paccaye passatī. **So dhammaṃ passatīti** so paṭiccasamuppānadhāme passatī, **chandoti**ādī sabbamaṃ taṇhāvevacanameva, taṇhā hi chandakaraṇavasena **chando**. Ālayakaraṇavasena **ālayo**. Anunayakaraṇavasena **anunayo**. Ajjhogāhitvā gilitvā gahanavasena **ajjhosānanti** vuccati. **Chandarāgavinayo chandarāgappahānanti** nibbānasseva vevacanaṃ, iti tīni saccāni pāliyaṃ āgatāneva maggasaccaṃ āharitvā gahetabbaṃ, yā imesu tīsu ṭhānesu diṭṭhi saṅkappo vācā kammanto ājīvo vāyāmo sati samādhi bhāvanāpaṭivedho, ayaṃ maggoti. **Bahukataṃ hotīti** ettāvattāpi bahuṃ bhagavato sāsanaṃ kataṃ hoti, **ajjhattikañceva, āvuso, sotanti**ādīvāresupi eseva nayo.

Manodvāre pana ajjhattiko mano nāma bhavaṅgacittaṃ. Taṃ niruddhampi āvajjanacittassa paccayo bhavituṃ asamatthaṃ mandathāmagatameva pavattamānampi **paribhinnaṃ** nāma hoti. Āvajjanassa pana paccayo bhavituṃ samatthaṃ **aparibhinnaṃ** nāma. **Bāhirā ca dhammāti** dhammāraṃmaṇaṃ. **Neva tāva tajjassāti** idamaṃ bhavaṅgasamayeneva kathitaṃ. Dutiyavāro paguṇajjhānapaccavekkhaṇena vā, paguṇakammaṭṭhānāmanasikārena vā, paguṇabuddhavacanasajjhāyākaraṇādinā vā, aññāvihitakaṃ sandhāya vutto. Imasmiṃ vāre **rūpanti** catusamuṭṭhānampi labbhati. Manovīññāṇaṃhi rūpaṃ samuṭṭhāpeti, vedanādayo manovīññāṇasampayuttā, viññāṇaṃ manovīññāṇameva. Saṅkhārā panettha phassacetanāvaseneva gahitā. Sesamaṃ vuttanayeneva veditabbaṃ. Iti mahāthero heṭṭhā ekadesameva sammāsanto āgantvā imasmiṃ ṭhāne ṭhatvā heṭṭhā parihīnadesanaṃ sabbamaṃ taṃtaṃdvāravasena bhājetvā dassento yathānusandhināva suttantaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāhatthipadopamasuttavaṇṇanā niṭṭhitā.

9. Mahāsāropamasuttavaṇṇanā

307. Evaṃ me sutanti mahāsāropamasuttaṃ. Tattha **acirapakkanteti** saṅghaṃ bhinditvā

ruhiruppādakammaṃ katvā nacirapakkante salingeneva pāṭiyekke jāte.

Idha, bhikkhave, ekacco kulaputtoti kiñcāpi asukakulaputtoti na niyāmito, devadattaṃyeva pana sandhāya idaṃ vuttanti vedittabbaṃ. So hi asambhinnāya mahāsammatapaveṇiyā okkākavaṃse jātattā jātikulaputto. **Otiṇṇoti** yassa jāti anto anupaviṭṭhā, so jātiyā otiṇṇo nāma. Jarādīsipi eseva nayo. **Lābhasakkārādīsipi lābhoti** cattāro paccayā. **Sakkāroti** tesamēveva sukatabhāvo. **Silokoti** vaṇṇabhaṇanaṃ. **Abhinibbattetīti** uppādeti. **Apaññātāti** dvinnam janānam ṭhitaṭṭhāne na paññāyanti, ghāsacchādanamattampi na labhanti. **Appesakkhāti** apparivārā, purato vā pacchato vā gacchantam na labhanti.

Sārena sarakaraṇīyanti rukkhasārena kattabbaṃ akkhacakkayuganaṅgalādikaṃ yaṃkiñci. **Sākhāpalāsaṃ aggahesi brahmacariyassāti** maggaphalasārassa sāsanabrahmacariyassa cattāro paccayā sākhāpalāsaṃ nāma, taṃ aggahesi. **Tena ca vosānaṃ āpādīti** teneva ca alamettāvātā sāro me pattoti vosānaṃ āpanno.

310. Nānadassanaṃ ārādhētīti devadatto pañcābhiñño, dibbacakkhu ca pañcannaṃ abhiññānaṃ matthake ṭhitaṃ, taṃ imasmiṃ sutte “nānadassana”nti vuttaṃ. **Ajanaṃ apassaṃ viharantīti** kiñci sukhamaṃ rūpaṃ ajānantā antamaso paṃsupisācakampi apassantā viharanti.

311. Asamayavimokkhaṃ ārādhētīti, “katamo asamayavimokkho? Cattāro ca ariyamaggā cattāri ca sāmāññaphalāni, nibbānañca, ayaṃ asamayavimokkho”ti (paṭi. ma. 1.213) evaṃ vutte navalokuttaradhamme ārādheti sampādeti paṭilabhati. Lokiyasamāpattiyo hi appitappitakkhaṇeyeva paccanīkadhammehi vimuccanti, tasmā, “katamo samayavimokkho? Cattāri ca jhānāni catasso ca arūpāvacarasamāpattiyo, ayaṃ samayavimokkho”ti evaṃ samayavimokkhoti vuttā. Lokuttaradhammā pana kālena kālaṃ vimuccanti, sakiṃ vimuttāni hi maggaphalāni vimuttāneva honti. Nibbānaṃ sabbakilesehi accantaṃ vimuttamevāti ime nava dhammā asamayavimokkhoti vuttā.

Akuppā cetovimuttīti arahattaphalavimutti. Ayamatto etassāti **etadattham**, arahattaphalatthamidaṃ brahmacariyaṃ. Ayaṃ etassa atthoti vuttaṃ hoti. **Etaṃ sāranti** etaṃ arahattaphalaṃ brahmacariyassa sāraṃ. **Etaṃ pariyoṣānanti** etaṃ arahattaphalaṃ brahmacariyassa pariyoṣānaṃ, esā koṭi, na ito paraṃ pattabbaṃ atthīti yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāsāropamasuttavaṇṇanā niṭṭhitā.

10. Cūlasāropamasuttavaṇṇanā

312. Evaṃ me sutanti cūlasāropamasuttaṃ. Tattha **piṅgalakocchoti** so brāhmaṇo piṅgaladhātuko. **Kocchoti** panassa nāmaṃ, tasmā “piṅgalakoccho”ti vuccati. **Saṅghinoti**ādīsū pabbajitasamūhasaṅkhāto saṅgho etesaṃ atthīti **saṅghino**. Sveva gaṇo etesaṃ atthīti **gaṇino**. Ācārasikkhāpanavasena tassa gaṇassa ācariyāti **gaṇācariyā**. **Nātāti** paññātā pākaṭā. “Appicchā santuṭṭhā, appicchatāya vatthampi na nivāseṇti”tiādinaṃ nayena samuggato yaso etesaṃ atthīti **yasassino**. **Titthakarāti** laddhikarā. **Sādhusammatāti** ime sādhu sundarā sappurisāti evaṃ sammatā. **Bahujanassāti** assutavato andhabālaputhujjanassa. Idāni te dassento **seyyathidaṃ pūraṇoti**ādīmāha. Tattha **pūraṇoti** tassa satthupaṭiññaṃ nāmaṃ. **Kassapoti** gottaṃ. So kira aññatarassa kulassa ekūnadāsasataṃ pūrayamāno jāto, tenassa “pūraṇo”ti nāmaṃ akaṃsu. Maṅgaladāsattā cassa “dukkaṭa”nti vattā natthi, akataṃ vā na katanti. “So kimahametta vasāmi”ti palāyi. Athassa corā vatthāni acchindīmsu. So paṇṇena vā tiṇena vā paṭicchādetumpi ajānanto jātārūpeneva ekaṃ gāmaṃ pāvīsi. Manussā taṃ disvā, “ayaṃ samaṇo arahā appiccho, natthi iminā sadiso”ti pūvabhaddāni gahetvā upasaṅkamanti. So “mayhaṃ sātakaṃ anivatthabhāvena idaṃ uppanna”nti tato paṭṭhāya sātakaṃ labhitvāpi na nivāsesi, tadeva pabbajjaṃ aggahesi. Tassa santike aññepi pañcasatā manussā pabbajīmsu, taṃ sandhāyāha “pūraṇo kassapo”ti.

Makkhalīti tassa nāmaṃ. Gosālāya jātattā **gosālōti** dutiyaṃ nāmaṃ. Taṃ kira sakaddamāya bhūmiyā telaghaṭaṃ gahetvā gacchantam, “tāta, mā khali”ti sāmiko āha. So pamādena khalitvā patitvā sāmikassa

bhayena palāyitum āradhho. Sāmiko upadhāvitvā sātākakaṇṇe aggahesi. Sopi sātākam chaḍḍetvā acelako hutvā palāyī, sesam pūraṇasadisameva.

Ajitoti tassa nāmaṃ. Kesakambalaṃ dhāretīti **kesakambalo**. Iti nāmadvayaṃ saṃsanditvā “ajito kesakambalo”ti vuccati. Tattha **kesakambalo** nāma manussakesehi katakambalo, tato paṭikiṭṭhataraṃ vatthaṃ nāma natthi. Yathāha – “seyyathāpi, bhikkhave, yāni kānici tantāvutānaṃ vatthānaṃ, kesakambalo tesam paṭikiṭṭho akkhāyati, kesakambalo, bhikkhave, sīte sīto uṇhe uṇho dubbaṇṇo duggandho dukkhasamphasso”ti (a. ni. 3.138).

Pakudhoti tassa nāmaṃ. **Kaccāyanoti** gottam. Iti nāmagottam saṃsanditvā, “pakudho kaccāyano”ti vuccati. Sītudakapaṭikkhattako esa, vaccaṃ katvāpi udakakiccaṃ na karoti, uṇhodakam vā kaṇṇiyam vā labhitvā karoti, nadim vā maggodakam vā atikkamma, “sīlam me bhinna”nti vālikathūpaṃ katvā sīlam adhiṭṭhāya gacchati, evarūpo nissirikaladdhiko esa.

Sañjayoti tassa nāmaṃ. Belatṭhassa puttoti **belatṭhaputto**. Amhākaṃ gaṇṭhanakilesa palibujjhanakilesa natthi, kilesagaṇṭharahitā mayanti evaṃ vādītāya laddhanāmasena **nigaṇṭho**. Nāṭassa puttoti **nāṭaputto**. **Abbhaññaṃsūti** yathā tesam paṭiññā, tatheva jāniṃsu. Idaṃ vuttaṃ hoti – sace nesam sā paṭiññā niyyānikā sabbe abbhaññaṃsu. No ce, na abbhaññaṃsu. Tasmā kiṃ tesam paṭiññā niyyānikā na niyyānikāti, ayametassa pañhassa attho. Atha bhagavā nesam aniyānikabhāvakathanena atthābhāvato alanti paṭikkhipitvā upamāya atthaṃ pavedento dhamameva desetum, **dhammaṃ, te brāhmaṇa, desessāmīti** āha.

320. Tattha **sacchikiriyāyāti** sacchikaraṇatthaṃ. **Na chandaṃ janetīti** kattukamyatāchandaṃ na janayati. **Na vāyamatīti** vāyāmaṃ parakkamaṃ na karoti. **Olīnavuttiko ca hotīti** līnajjhāsayo hoti. **Sāthalikoti** sithilaggāhī, sāsanam sithilam katvā gaṇhāti, dalham na gaṇhāti.

323. Idha, brāhmaṇa bhikkhu, vīciveva kāmehitī kathaṃ ime paṭhamajjhānādiddhammā ñāṇadassanena uttaritarā jātāti? Nirodhapādakattā. Heṭṭhā paṭhamajjhānādiddhammā hi vipassanāpādakā, idha nirodhapādakā, tasmā uttaritarā jātāti veditabbā. Iti bhagavā idampi suttaṃ yathānusandhināva niṭṭhapesi. Desanāvasāne brāhmaṇo saraṇesu paṭiṭṭhitoti.

Papañcasūdaniyā majjhimanikāyaṭṭhakathāya

Cūlasāropamasuttavaṇṇanā niṭṭhitā.

Tatiyavaggavaṇṇanā niṭṭhitā.

4. Mahāyamakavaggo

1. Cūlagosiṅgasuttavaṇṇanā

325. Evaṃ me sutanti cūlagosiṅgasuttaṃ. Tattha **nāṭike viharatīti nāṭikā** nāma ekaṃ taḷakaṃ nissāya dvinnaṃ cūlapitimahāpitiputtānaṃ dve gāmā, tesu ekasmiṃ gāme. **Giṇjakāvasatheti** iṭṭhakāmaye āvasathe. Ekasmiṃ kira samaye bhagavā mahājanasaṅghaṃ karonto vajjiraṭṭhe cārikaṃ caramāno nāṭikaṃ anuppatto. Nāṭikavāsino manussā bhagavato mahādānaṃ datvā dhammakathaṃ sutvā pasannahadayā, “satthu vasanaṭṭhānaṃ karissāmā”ti mantetvā iṭṭhakāheva bhittisopānatthambhe vāḷarūpādīni dassento pāsādaṃ katvā sudhāya limpivā mālākammalatākammādīni niṭṭhāpetvā bhummattharaṇamañcapīṭhādīni paññāpetvā satthu niyyātesum. Aparāparaṃ panettha manussā bhikkhusaṅghassa rattiṭṭhānadivāṭṭhānaṃapaṇḍapacaṅkamādīni kārayiṃsu. Iti so vihāro mahā ahoṣi. Taṃ sandhāya vuttaṃ “giṇjakāvasathe”ti.

Gosiṅgasālavanadāyeti tattha ekassa jeṭṭhakarukkhassa khandhato gosiṅgasāṇṭhānaṃ hutvā viṭapaṃ utṭhahi, taṃ rukkham upādāya sabbampi taṃ vanam **gosiṅgasālavananti** saṅkham gataṃ. **Dāyoti** avisesena araññassetam nāmaṃ. Tasmā **gosiṅgasālavanadāyeti** gosiṅgasālavanaaraññeti attho. **Viharantīti** sāmaggirasam anubhavamānā viharanti. Imesañhi kulaputtānaṃ uparipaṇṇāsake puthujjanakālo kathito, idha

khīṇāsavakālo. Tadā hi te laddhassādā laddhapatiṭṭhā adhigatapaṭisambhidā khīṇāsavā hutvā sāmaggirasam anubhavamānā tattha viharimsu. Tam sandhāyetam vuttam.

Yena gosiṅgasālavanadāyo tenupasaṅkamīti dhammasenāpatimahāmogallānattheresu vā asītimahāsāvakesu vā, antamaso dhammabhaṅḍāgārikaānandattherampi kañci anāmantetvā sayameva pattacīvaram ādāya anīkā nissaṭṭo hatthī viya, yūthā nissaṭṭo kālasīho viya, vātacchinno valāhako viya ekakova upasaṅkami. Kasmā panettha bhagavā sayam agamāsīti? Tayo kulaputtā sāmaggirasam anubhavantā viharanti, tesam paggaṇhanato, pacchimajanatam anukampanato dhammagarubhāvato ca. Evaṃ kirassa ahosi – “ahaṃ ime kulaputte paggaṇhitvā ukkaṃsitvā paṭisanthāram katvā dhammam nesaṃ desessāmī”ti. Evaṃ tava paggaṇhanato agamāsi. Aparampissa ahosi – “anāgate kulaputtā sammāsambuddho samaggavāsam vasantānam santikaṃ sayam gantvā paṭisanthāram katvā dhammam kathetvā tayo kulaputte paggaṇhi, ko nāma samaggavāsam na vaseyyāti samaggavāsam vasitabbaṃ maññamānā khippameva dukkhassantaṃ karissantī”ti. Evaṃ pacchimajanatam anukampanatopi agamāsi. Buddhā ca nāma dhammagaruno honti, so ca nesaṃ dhammagarubhāvo rathavinīte āvikatova. Iti imasmā dhammagarubhāvatoṇi dhammam paggaṇhissāmīti agamāsi.

Dāyapālōti araṇṇapālo. So tam araṇṇam yathā icchiticchitappadesena manussā pavisitvā tattha pupphaṃ vā phalam vā niyyāsam vā dabbasambhāram vā na haranti, evaṃ vatiyā parikkhittassa tassa araṇṇassa yojite dvāre nisīditvā tam araṇṇam rakkhati, pāleti. Tasmā “dāyapālo”ti vutto. **Attakāmarūpāti** attano hitam kāmayamānasabhāvā hutvā viharanti. Yo hi imasmiṃ sāsane pabbajitvāpi vejjakammadūtakammapahīṇagamanādīnam vasena ekavīsātiesanāhi jīvikaṃ kappeti, ayaṃ na attakāmarūpo nāma. Yo pana imasmiṃ sāsane pabbajitvā ekavīsātiesanaṃ pahāya catupārisuddhisīle patiṭṭhāya buddhavacanaṃ uggaṇhitvā sappāyadhutaṅgaṃ adhiṭṭhāya aṭṭhatimsāya ārammaṇesu cittaruciyaṃ kammaṭṭhānaṃ gahetvā gāmantam pahāya araṇṇam pavisitvā samāpattiyo nibbattetvā vipassanāya kammaṃ kurumāno viharati, ayaṃ attakāmo nāma. Tepi tayo kulaputtā evarūpā ahesuṃ. Tena vuttam – “attakāmarūpā viharantī”ti.

Mā tesam aphāsamakāsīti tesam mā aphāsukaṃ akāsīti bhagavantaṃ vāresi. Evaṃ kirassa ahosi – “ime kulaputtā samaggā viharanti, ekaccassa ca gataṭṭhāne bhaṅḍanakalahavivādā vattanti, tikhiṇasiṅgo caṇḍagoṇo viya ovijjhanto vicarati, athekamaggena dvinnam gamanam na hoti, kadāci ayampi evaṃ karonto imesaṃ kulaputtānam samaggavāsam bhindeyya. Pāsādiko ca panesa suvaṇṇavaṇṇo surasagiddho maññe, gatakālato paṭṭhāya paṇīṭadāyakānam attano upaṭṭhākānañca vaṇṇakathanādīhi imesaṃ kulaputtānam appamādavihāram bhindeyya. Vasanaṭṭhānāni cāpi etesaṃ kulaputtānam nibaddhāni paricchinnāni tisso ca paṇṇasālā tayo caṅkamā tīṇi divāṭṭhānāni tīṇi mañcapīṭhāni. Ayaṃ pana samaṇo mahākāyo vuḍḍhataro maññe bhavissati. So akāle ime kulaputte senāsanaṃ vuttāpessati. Evaṃ sabbathāpi etesaṃ aphāsu bhavissatī”ti. Tam anicchanto, “mā tesam aphāsukamakāsī”ti bhagavantaṃ vāresi.

Kiṃ panesa jānanto vāresi, ajānantoti? Ajānanto. Kiñcāpi hi tathāgatassa paṭisandhiggahaṇato paṭṭhāya dasasahassacakkavāḷakampanādīni pāṭihāriyāni pavattiṃsu, araṇṇavāsino pana dubbalamanussā sakammappasutā tāni sallakkhetuṃ na sakkonti. Sammāsambuddho ca nāma yadā anekabhikkhusahassaparivāro byāmapabhāya asītianubyañjanehi dvattiṃsamahāpurisalakkhaṇasiriya ca buddhānubhāvaṃ dassento vicarati, tadā ko esoti apucchitvāva jānitabbo hoti. Tadā pana bhagavā sabbampi tam buddhānubhāvaṃ cīvaragabbhena paṭicchadetvā valāhakagabbhena paṭicchanno puṇṇacando viya sayameva pattacīvaramādāya aññātakavesena agamāsi. Iti nam ajānantova dāyapālo nivāresi.

Etadavocāti thero kira mā samaṇāti dāyapālassa katham sutvāva cintesi – “mayam tayo janā idha viharāma, aññe pabbajitā nāma natthi, ayañca dāyapālo pabbajitena viya saddhiṃ katheti, ko nu kho bhavissatī”ti divāṭṭhānato vuttāya dvāre ṭhatvā maggaṃ olokeno bhagavantaṃ addasa. Bhagavāpi therassa saha dassaneneva sarīrobhāsam muñci, asītianubyañjanavirājitā byāmapabhā pasāritasuvaṇṇapaṭo viya virocītha. Thero, “ayaṃ dāyapālo phaṇakatam āsivisaṃ gīvāya gahetuṃ hattham pasārento viya loke aggapuggalena saddhiṃ kathentova na jānāti, aññatarabhikkhunā viya saddhiṃ kathetī”ti nivārento etam, “mā, āvuso dāyapālā”tiādivacanaṃ avoca.

Tenupasaṅkamīti kasmā bhagavato paccuggamaṃ akatvā upasaṅkami? Evaṃ kirassa ahosi – “mayam

tayo janā samaggavāsaṃ vasāma, sacāhaṃ ekakova paccuggamaṇaṃ karissāmi, samaggavāso nāma na bhavissatī’ ti piyamitte gahetvāva paccuggamaṇaṃ karissāmi. Yathā ca bhagavā mayhaṃ piyo, evaṃ sahāyānampi me piyoti, tehi saddhiṃ paccuggamaṇaṃ kātukāmo sayāṃ akatvāva upasaṅkami. Keci pana tesāṃ therānaṃ paññasāladvāre caṅkamaṇaṃ bhagavato āgamaṇaṃ maggo hoti, tasmā thero tesāṃ saññaṃ dadamānova gatoti. **Abhikkamathā**ti ito āgacchatha. **Pāde pakkhālesī**ti vikasitapadumasannibhehi jālahatthehi mañvaṇṇaṃ udakaṃ gahetvā suvaṇṇavaṇṇesu piṭṭhipādesu udakamabhisiñcivā pādena pādaṃ ghaṃsanto pakkhālesi. Buddhānaṃ kāye rajojallaṃ nāma na upalimpati, kasmā pakkhālesī? Sarīrassa utuggahaṇatthaṃ, tesāṃ cittaṃ sampahaṃsanatthaṃ. Amhehi abhihaṭṭena udakena bhagavā pāde pakkhālesi, paribhogaṃ akāsīti tesāṃ bhikkhūnaṃ balavasomanassavasena cittaṃ pīṇitaṃ hoti, tasmā pakkhālesi. **Āyasmantaṃ anuruddhaṃ bhagavā etadvocāti** so kira tesāṃ vuḍḍhataro.

326. Tassa saṅgahe kate sesānaṃ katova hotīti theraññaeva etaṃ **kacci vo anuruddhā**tiādivacanaṃ avoca. Tattha **kaccī**ti pucchanatthe nipāto. **Voti** sāmivacanaṃ. Idaṃ vuttaṃ hoti – kacci anuruddhā tumhākaṃ khamanīyaṃ, iriyāpatho vo khamati? Kacci yāpanīyaṃ, kacci vo jīvitaṃ yāpeti ghaṭiyati? Kacci piṇḍakena na kilamatha, kacci tumhākaṃ sulabhapiṇḍaṃ, sampatte vo disvā manussā uḷunkayāguṃ vā kaṭacchubhikkhaṃ vā dātappaṃ maññaṇṇāntīti bhikkhācāravattaṃ pucchati. Kasmā? Paccayena akilamantena hi sakkā samaṇadhammo kātuṃ, vattameva vā etaṃ pabbajitānaṃ. Atha tena paṭivacane dinne, “anuruddhā, tumhe rājapabbajitā mahāpuñña, manussā tumhākaṃ arañña vasantānaṃ adatvā kassa aññaṃ dātappaṃ maññaṇṇānti, tumhe pana etaṃ bhuñjitvā kiṃ nu kho migapotakā viya aññaṃ maññaṇṇānaṃ saṅghaṭṭentā viharatha, udāhu sāmaggibhāvo vo atthī’ ti sāmaggiraṇaṃ pucchanto, **kacci pana vo, anuruddhā, samaggā**tiādimāha.

Tattha **khīrodakābhūtā**ti yathā khīraṇa udakaṇa aññaṃ maññaṇṇānaṃ saṃsandati, viṣuṃ na hoti, ekattaṃ viya upeti, kacci evaṃ sāmaggivasena ekattūpagatacittuppādā viharathāti pucchati. **Piyacakkhūhī**ti mettacittaṃ paccupaṭṭhapetvā olokanacakkhūni piyacakkhūni nāma. Kacci tathārūpehi cakkhūni aññaṃ maññaṇṇānaṃ sampassantā viharathāti pucchati. **Tagghā**ti ekaṃsatthe nipāto. Ekaṃsena mayaṃ, bhanteti vuttaṃ hoti. **Yathā kathaṃ panā**ti ettha **yathā**ti nipātamattaṃ. **Kathanti** kāraṇapucchā. Kathaṃ pana tumhe evaṃ viharatha, kena kāraṇena viharatha, taṃ me kāraṇaṃ brūthāti vuttaṃ hoti. **Mettaṃ kāyakamma**ti mettacittavasena pavattaṃ kāyakammaṃ. **Āvi ceva raho cāti** sammukhā ceva parammukhā ca. Itaresupi ese va nayo.

Tattha sammukhā kāyavacīkammaṇi saḥavāse labbhanti, itarāni vippavāse. Manokammaṃ sabbattha labbhanti. Yañhi saḥavasantesu ekena mañcapīṭhaṃ vā dārubaṇḍaṃ vā mattikābhaṇḍaṃ vā bahi dunnikkhittaṃ hoti, taṃ disvā kenidaṃ vaḷañjitanti avaññaṃ akatvā attanā dunnikkhittaṃ viya gahetvā paṭisaṃsentassa paṭijaggitabbayuttaṃ vā pana ṭhānaṃ paṭijaggantassa sammukhā mettaṃ kāyakammaṃ nāma hoti. Ekasmiṃ pakkante tena dunnikkhittaṃ senāsanaparikkhāraṃ tatheva nikkhipantassa paṭijaggitabbayuttaṭṭhānaṃ vā pana paṭijaggantassa parammukhā mettaṃ kāyakammaṃ nāma hoti. Saḥavasantassa pana tehi saddhiṃ madhuraṃ sammodanīyaṃ kathaṃ paṭisanthārakathaṃ sāraṇīyakathaṃ dhammīkathaṃ sarabhaññaṃ sākacchaṃ pañhapucchanaṃ pañhavissajjananti evamādikaraṇe sammukhā mettaṃ vacīkammaṃ nāma hoti. Theresu pana pakkantesu mayhaṃ piyasahāyo nandiyatthero kimilatthero evaṃ sīlasampanno, evaṃ ācārasampannotiādiguṇakathanāṃ parammukhā mettaṃ vacīkammaṃ nāma hoti. Mayhaṃ piyamitto nandiyatthero kimilatthero avero hotu, abyāpajjo sukhī hotūti evaṃ samannāharato pana sammukhāpi parammukhāpi mettaṃ manokammaṃ hotiyeva.

Nāna hi kho no, bhante, kāyāti kāyāñhi piṭṭhaṃ viya mattikā viya ca omadditvā ekato kātuṃ na sakkā. **Ekaṇa pana mañña**ti cittaṃ pana no hitaṭṭhena niraṇṭarāṭṭhena aviggahaṭṭhena samaggaṭṭhena ekamevāti dasseti. Kathaṃ panetaṃ sakaṃ cittaṃ nikkhipitvā itaresaṃ cittaṃ savasena vattiṃsūti? Ekassa patte malaṃ utṭhahati, ekassa cīvaraṃ kilīṭṭhaṃ hoti, ekassa paribhaṇḍakammaṃ hoti. Tattha yassa patte malaṃ utṭhitaṃ, tena mamāvuso, patte malaṃ utṭhitaṃ pacituṃ vaṭṭatīti vutte itare mayhaṃ cīvaraṃ kilīṭṭhaṃ dhovitaṃ, mayhaṃ paribhaṇḍaṃ kātabbanti avatvā araññaṃ pavisitvā dārūni āharitvā chinditvā pattakaṭṭhe paribhaṇḍaṃ katvā tato paraṃ cīvaraṃ vā dhovanti, paribhaṇḍaṃ vā karonti. Mamāvuso, cīvaraṃ kilīṭṭhaṃ dhovituṃ vaṭṭati, mama paññasālā uklāpā paribhaṇḍaṃ kātuṃ vaṭṭatīti paṭhamataraṃ ārocitepi ese va nayo.

327. Sādhu sādhu, anuruddhāti bhagavā heṭṭhā na ca mayaṃ, bhante, piṇḍakena kilamimhāti vutte na sādhu kāramadāsi. Kasmā? Ayañhi kabalīkāro āhāro nāma imesaṃ sattānaṃ apāyalokepi devamanussalokepi āciññasamāciññaṇa. Ayaṃ pana lokasannivāso yebhuyyena vivādapakkhanda, apāyaloke devamanussalokepi

ime sattā paṭiviruddhā eva, etesaṃ sāmaggikālo dullabho, kadācideva hotīti samaggavāsassa dullabhattā idha bhagavā sādhuḥkāramadāsī. Idāni tesam appamādalakkhaṇaṃ pucchanto **kacci pana vo, anuruddhātī**ādīmāha. Tattha voti nipātamattaṃ paccattavacanaṃ vā, kacci tumheti attho. **Amhākanti** amhesu tīsu janesu. **Piṇḍāya paṭikkamatīti** gāme piṇḍāya caritvā paccāgacchati. **Avakkārapātīti** atirekapiṇḍapātaṃ apanetvā ṭhapanatthāya ekaṃ samuggapātīti dhovitvā ṭhabeti.

Yo pacchāti te kira therā na ekatova bhikkhācāraṃ pavisanti, phalasaṃpattiratā hete. Pātova sarīrapaṭijagganaṃ katvā vattappaṭipattīti pūretvā senāsanaṃ pavisitvā kālaparicchedaṃ katvā phalasaṃpattīti appetvā nisīdanti. Tesu yo paṭhamataraṃ nisinno attano kālaparicchedavasena paṭhamataraṃ utthāti; so piṇḍāya caritvā paṭinivatto bhattakiccaṭṭhānaṃ āgantvā jānāti – “dve bhikkhū pacchā, ahaṃ paṭhamataraṃ āgato”ti. Atha pattaṃ pidahitvā āsanapaññāpanādīni katvā yadi patte paṭivisaṃmattameva hoti, nisīditvā bhujjati. Yadi atirekaṃ hoti, avakkārapātiyaṃ pakkhipitvā pātiṃ pidhāya bhujjati. Katabhattakicco pattaṃ dhovitvā vodakaṃ katvā thavikāya osāpetvā pattacīvaraṃ gahetvā attano vasanaṭṭhānaṃ pavisati. Dutiyaṃ āgantvā jānāti – “eko paṭhamam āgato, eko pacchato”ti. So sace patte bhattaṃ pamāṇameva hoti, bhujjati. Sace mandaṃ, avakkārapātito gahetvā bhujjati. Sace atirekaṃ hoti, avakkārapātiyaṃ pakkhipitvā pamāṇameva bhujjivā purimatthero viya vasanaṭṭhānaṃ pavisati. Tatiyaṃ āgantvā jānāti – “dve paṭhamam āgatā, ahaṃ pacchato”ti. Sopi dutiyatthero viya bhujjivā katabhattakicco pattaṃ dhovitvā vodakaṃ katvā thavikāya osāpetvā āsanāni ukkhipitvā paṭisāmeti; pānīyaghaṭe vā paribhojanīyaghaṭe vā avasesaṃ udakaṃ chaḍḍetvā ghaṭe nikujjivā avakkārapātiyaṃ sace avasesabhattaṃ hoti, taṃ vuttanayena jahitvā pātiṃ dhovitvā paṭisāmeti; bhattagaṃ sammajjati. Tato kacavaraṃ chaḍḍetvā sammajjanaṃ ukkhipitvā upacikāhi muttatthāne ṭhabetvā pattacīvaramādāya vasanaṭṭhānaṃ pavisati. Idaṃ therānaṃ bahivihāre araṇṇe bhattakiccakaraṇaṭṭhāne bhojanasālāyaṃ vattaṃ. Idaṃ sandhāya, “yo pacchā”tiādi vuttaṃ.

Yo passatītiādi pana nesaṃ antovihāre vattanti veditabbaṃ. Tattha **vaccaghaṭanti** ācamaṇakumbhiṃ. **Rittanti** rittakaṃ. **Tucchanti** tasseva vevacanaṃ. **Avisayhanti** ukkhipitum asakkuṇeyyaṃ, atibhāriyaṃ. **Hatthavikārenāti** hatthasaññāya. Te kira pānīyaghaṭādisu yaṃkiñci tucchakaṃ gahetvā pokkharāṇiṃ gantvā anto ca bahi ca dhovitvā udakaṃ parissāvetvā tīre ṭhabetvā aññaṃ bhikkhuṃ hatthavikārena āmantenti, odissa vā anodissa vā saddaṃ na karonti. Kasmā odissa saddaṃ na karonti? Taṃ bhikkhuṃ saddo bādheyyāti. Kasmā anodissa saddaṃ na karonti? Anodissa sadde dinne, “ahaṃ pure, ahaṃ pure”ti dvepi nikkhameyyum, tato dvīhi kattabbakamme tatiyassa kammacchedo bhaveyya. Saṃyatapadasaddo pana hutvā aparassa bhikkhuno divāṭṭhānasantikaṃ gantvā tena diṭṭhabhāvaṃ ṇatvā hatthasaññaṃ karoti, tāya saññāya itaro āgacchati, tato dve janā hatthena hatthaṃ saṃsibbantā dvīsu hatthesu ṭhabetvā upaṭṭhapenti. Taṃ sandhāyāha – “hatthavikārena dutiyaṃ āmantetvā hatthavilaṅghakena upaṭṭhapemā”ti.

Pañcāhikaṃ kho panāti cātuddase pannarase aṭṭhamiyaṃti idaṃ tāva pakatidhammassavanameva, taṃ akhaṇḍaṃ katvā pañcame pañcame divase dve therā nātivikāle nhāyitvā anuruddhattherassa vasanaṭṭhānaṃ gacchanti. Tattha tayopi nisīditvā tiṇṇaṃ piṭakānaṃ aññatarasmimā aññamaññaṃ pañhaṃ pucchanti, aññamaññaṃ vissajjenti, tesam evaṃ karontānaṃyeva aruṇaṃ uggacchati. Taṃ sandhāyetaṃ vuttaṃ. Ettāvata therena bhagavatā appamādalakkhaṇaṃ pucchitena pamādaṭṭhānesuyeva appamādalakkhaṇaṃ vissajjitaṃ hoti. Aññesañhi bhikkhūnaṃ bhikkhācāraṃ pavisaṇakālo, nikkhamanaḥkālo, nivāsanaparivattanaṃ, cīvaraparupanaṃ, antogāme piṇḍāya caraṇaṃ dhammakathanaṃ, anumodanaṃ, gāmato nikkhamitvā bhattakiccakaraṇaṃ, pattadhovanaṃ, pattaosāpanaṃ, pattacīvaraṃ paṭisāmananti papañcākaraṇaṭṭhānāni etāni. Tasmā thero amhākaṃ ettakaṃ ṭhānaṃ muñcitvā pamādaḥkālo nāma natthīti dassento pamādaṭṭhānesuyeva appamādalakkhaṇaṃ vissajjesi.

328. Athassa bhagavā sādhuḥkāraṃ datvā paṭhamajjhānaṃ pucchanto puna **atthi pana** votiādīmāha. Tattha **uttari manussadhammāti** manussadhammato uttari. **Alamariyaññadassanavisesoti** ariyabhāvakarāṇasamattho ññaviseso. **Kiñhi no siyā, bhanteti** kasmā, bhante, nādhigato bhavissati, adhigatoyevāti. **Yāva devāti** yāva eva.

329. Evaṃ paṭhamajjhānādhigame byākate dutiyajjhānādīni pucchanto **etassa pana** votiādīmāha. Tattha **samatikkamāyāti** samatikkamatthāya. **Paṭippassaddhiyāti** paṭippassaddhatthāya. Sesam sabbattha vuttanayeneva veditabbaṃ. Pacchimapañhe pana lokuttaraññadassanavasena adhigataṃ nirodhasaṃpattīti pucchanto **alamariyaññadassanavisesoti** āha. Theropi pucchānurūpeneva byākāsī. Tattha yasmā

vedayitasukhato avedayitasukhaṃ santataraṃ paṇītataraṃ hoti, tasmā **aññaṃ phāsuvihāraṃ uttaritaraṃ vā paṇītataraṃ vā na samanupassāmāti** āha.

330. Dhammiyā kathāyāti sāmaggirasānisamsappaṭisaṃyuttāya dhammiyā kathāya. Sabbepi te catūsu saccesu pariniṭṭhitakiccā, tena tesam paṭivedhatthāya kiñci kathetabbaṃ natthi. Sāmaggirasena pana ayañca ayañca ānisamsoti sāmaggirasānisamsameva nesam bhagavā kathesi. **Bhagavantam anusamyāyitvāti** anugantvā. Te kira bhagavato pattacīvaraṃ gahetvā thokaṃ agamaṃsu, atha bhagavā vihārassa pariveṇapariyantam gatakāle, “āharatha me pattacīvaraṃ, tumhe idheva tiṭṭhathā”ti pakkāmi. **Tato paṭinivattitvāti** tato ṭhitatṭhānato nivattitvā. **Kiṃ nu kho mayam āyasmato**ti bhagavantam nissāya pabbajjādāni adhigantvāpi attano guṇakathāya aṭṭiyamānā adhigamappicchātāya āhaṃsu. **Imāsañca imāsañcāti** paṭhamajjhānādānam lokiyalokuttarānam. **Cetasā ceto paricca viditoti** ajja me āyasmanto lokiyasamāpattiyā vītināmesum, ajja lokuttarāyāti evam cittena cittaṃ paricchinditvā viditam. **Devatāpi meti**, bhante anuruddha, ajja ayyo nandiyatthero, ajja ayyo kimilatthero imāya ca imāya ca samāpattiyā vītināmesīti evamārocesunti attho. **Pañhābhipuṭṭhenāti** tampi mayā sayam viditanti vā devatāhi ārocitanti vā ettakeneva mukhaṃ me sajjanti kathaṃ samuṭṭhāpetvā aputṭheneva me na kathitam. Bhagavatā pana pañhābhipuṭṭhena pañham abhipucchitena satā byākatam, tatra me kiṃ na rocathāti āha.

331. Dīghoti “maṇi māṇivaro dīgho, atho serīsako saha”ti (dī. ni. 3.293) evam āgato aṭṭhavīsatiyā yakkhaseṇāpatānam abbhantaro eko devarājā. **Parajanoti** tasseva yakkhassa nāmaṃ. **Yena bhagavā tenupasaṅkamīti** so kira vessavaṇena pesito etaṃ ṭhānam gacchanto bhagavantam sayam pattacīvaraṃ gahetvā giṇṇakāvasathato gosiṅgasālavanassa antare disvā bhagavā attanā pattacīvaraṃ gahetvā gosiṅgasālavane tiṇṇam kulaputtānam santikaṃ gacchati. Ajja mahatī dhammadesanā bhavissati. Mayāpi tassā desanāya bhāginā bhavitabbanti adissamānena kāyena satthu padānupadiko gantvā avidūre ṭhatvā dhammaṃ sutvā satthari gacchantepi na gato, – “ime therā kiṃ karissantī”ti dassanattam pana tattheva ṭhito. Atha te dve there anuruddhattheram paliveṭhente disvā, – “ime therā bhagavantam nissāya pabbajjādayo sabbaguṇe adhigantvāpi bhagavatova maccharāyanti, na sahanti, ativiya nilīyanti paṭicchādenti, na dāni tesam paṭicchādetum dassāmi, pathavito yāva brahmalokā etesaṃ guṇe pakāsessāmi”ti cintetvā yena bhagavā tenupasaṅkami.

Lābhā vata, bhanteti ye, bhante, vajjiraṭṭhavāsino bhagavantañca ime ca tayo kulaputte passitum labhanti, vanditum labhanti, deyyadhammaṃ dātum labhanti, dhammaṃ sotum labhanti, tesam lābhā, bhante, vajjīnanti attho. **Saddam sutvāti** so kira attano yakkhānubhāvena mahantam saddam katvā sakalam vajjiraṭṭham ajjhottharanto tam vācam nicchāresi. Tena cassa tesu rukkhapabbatādīsū adhivatthā bhumma devatā saddam assosum. Tam sandhāya vuttam – “saddam sutvā”ti. **Anussāvesunti** mahantam saddam sutvā sāvesum. Esa nayo sabbattha. **Yāva brahmalokāti** yāva akaniṭṭhabrahmalokā. **Taṅcepi kulanti**, “amhākaṃ kulato nikkhamitvā ime kulaputtā pabbajitā evam sīlavanto guṇavanto ācārasampannā kalyāṇadhammā”ti evam taṅcepi kulaṃ ete tayo kulaputte pasannacittam anussareyyāti evam sabbattha attho daṭṭhabbo. Iti bhagavā yathānusandhināva desanam niṭṭhapesīti.

Papañcasūdaniyā majjhimanikāyaṭṭhakathāya

Cūḷagosiṅgasuttavaṇṇanā niṭṭhitā.

2. Mahāgosīṅgasuttavaṇṇanā

332. Evaṃ me sutanti mahāgosīṅgasuttam. Tattha **gosīṅgasālavanadāyeti** idam vasanaṭṭhānadassanattam vuttam. Aññesu hi suttesu, “sāvattiyam viharati jetavane anāthapiṇḍikassa ārāme”ti evam paṭhamam gocaragāmaṃ dassetvā pacchā vasanaṭṭhānam dasseti. Imasmim pana mahāgosīṅgasutte bhagavato gocaragāmo anibandho, kocideva gocaragāmo bhavissati. Tasmā vasanaṭṭhānameva paridīpitaṃ. Araññānidānakam nāmetam suttanti. **Sambahulehīti** bahukeyhi. **Abhiññātehi abhiññātehīti** sabbattha vissutehi pākātehi. **Therehi sāvakehi saddhīti** pātimokkhasamvarādīhi thirakārakeheva dhammehi samannāgatattā therehi, savanante jātattā sāvakehi saddhim ekato. Idāni te there sarūpato dassento, **āyasmatā ca sārīputtenāti**ādīmāha. Tatthāyasmā sārīputto attano sīlādīhi guṇehi buddhasāsane abhiññāto. Cakkhumantānam gaganamajjhe ṭhito sūriyo viya cando viya, samuddatīre ṭhitānam

sāgaro viya ca pākaṭo paññāto. Na kevalañcassa imasmiṃ sutte āgataguṇavaseneva mahantatā veditabbā, ito aññesaṃ dhammadāyādasuttaṃ anaṅgaṇasuttaṃ sammādiṭṭhisuttaṃ sīhanādasuttaṃ rathavinītaṃ mahāhatthipadopamaṃ mahāvedallaṃ cātumasuttaṃ dīghanakhaṃ anupadasuttaṃ sevittabbāsevitabbasuttaṃ saccavibhaṅgasuttaṃ piṇḍapātapārisuddhi sampasādanīyaṃ saṅgītisuttaṃ dasuttarasuttaṃ pavāraṇāsuttaṃ (saṃ. ni. 1.215 ādayo) susimasuttaṃ therapañhasuttaṃ mahāniddeso paṭisambhidāmaggo therasīhanādasuttaṃ abhinikkhamaṇaṃ etadagganti imesampi sutānaṃ vasena therassa mahantatā veditabbā. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ mahāpaññaṇaṃ yadidaṃ sārīputto”ti (a. ni. 1.188-189) vuttaṃ.

Mahāmoggallānopi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa anumānasuttaṃ, cūlatanḥsaṅkhayasuttaṃ māratajjaniyasuttaṃ pāsādakampanaṃ sakalaṃ iddhipādasamūyuttaṃ nandopanandadamaṇaṃ yamakapāṭihāriyakāle devalokagamaṇaṃ vimānavatthu petavatthu therassa abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ iddhimantānaṃ yadidaṃ mahāmoggallāno”ti (a. ni. 1.190) vuttaṃ.

Mahākassapopi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa cīvaraparivattanasuttaṃ jīṇacīvarasuttaṃ (saṃ. ni. 2.154 ādayo) candopamaṃ sakalaṃ kassapasamūyuttaṃ mahāriyavaṃsasuttaṃ therassa abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ dhutavādānaṃ yadidaṃ mahākassapo”ti (a. ni. 1.191) vuttaṃ.

Anuruddhattheropi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa cūlagosiṅgasuttaṃ naḷakapānasuttaṃ anuttariyasuttaṃ upakkilesasuttaṃ anuruddhasamūyuttaṃ mahāpurisavitakkasuttaṃ therassa abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ dibbacakkhukānaṃ yadidaṃ anuruddho”ti (a. ni. 1.192) vuttaṃ.

Āyasmatā ca revatenāti ettha pana dve revatā khadiravaniyarevato ca kaṅkhārevato ca. Tattha khadiravaniyarevato dhammasenāpatittherassa kaniṭṭhabhātiko, na so idha adhippeto. “Akappiyo guḷo, akappiyā muggā”ti (mahāva. 272) evaṃ kaṅkhābahulo pana thero idha revatoti adhippeto. Sopi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa abhinikkhamaṇeṇaṃ etadaggenapi mahantabhāvo veditabbo. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ jhāyīnaṃ yadidaṃ kaṅkhārevato”ti (a. ni. 1.204) vuttaṃ.

Ānandattheropi sīlādiguṇehi ceva imasmiṃ sutte āgataguṇehi ca thero viya abhiññāto pākaṭo mahā. Apicassa sekkhasuttaṃ bhāṭikasuttaṃ āneñjasappāyaṃ gopakamoggallānaṃ bahudhātukaṃ cūlasuññataṃ mahāsuññataṃ acchariyabbhūtasuttaṃ bhaddekarattaṃ mahānidānaṃ mahāparinibbānaṃ subhasuttaṃ cūlaniyalokadhātusuttaṃ abhinikkhamaṇaṃ etadagganti imesampi vasena mahantabhāvo veditabbo. Etadaggasmiñhi, “etadaggaṃ, bhikkhave, mama sāvakaṇaṃ bhikkhūnaṃ bahussutānaṃ yadidaṃ ānando”ti (a. ni. 1.219-223) vuttaṃ.

Aññehi ca abhiññātehi abhiññātehiti na kevalañca eteheva, aññehi ca mahāguṇatāya pākaṭehi abhiññātehi bahūhi therehi sāvakehi saddhiṃ bhagavā gosiṅgasālavanadāye viharatīti attho. Āyasmā hi sārīputto sayāṃ mahāpañño aññepi bahū mahāpaññe bhikkhū gahetvā tadā dasabalaṃ parivāretvā vihāsi. Āyasmā mahāmoggallāno sayāṃ iddhiṃ, āyasmā mahākassapo sayāṃ dhutavādo, āyasmā anuruddho sayāṃ dibbacakkhuko, āyasmā revato sayāṃ jhānābhīrato, āyasmā ānando sayāṃ bahussuto aññepi bahū bahussute bhikkhū gahetvā tadā dasabalaṃ parivāretvā vihāsi, evaṃ tadā ete ca aññe ca abhiññātā mahātherā tiṃsasahassamattā bhikkhū dasabalaṃ parivāretvā vihariṃsūti veditabbā.

Paṭisallānā vuṭṭhitoti phalasaṃpattivivekato vuṭṭhito. **Yenāyasmā mahākassapo tenupasaṅkamīti** thero kira paṭisallānā vuṭṭhito pacchimalokadhātuṃ olovento vanante kīlantassa mattakhattiyassa kaṇṇato patamānaṃ kuṇḍalaṃ viya, saṃharitvā samugge pakkhipamānaṃ rattakambalaṃ viya, maṇināgadantato patamānaṃ satasahassaggaṇikaṃ suvaṇṇapāṭiṃ viya ca atthaṃ gacchamānaṃ paripuṇṇapaṇṇāsayojanam

sūriyamaṇḍalam addasa. Tadanantaram pācīnalokadhātuṃ olokeno nemiyaṃ gahetvā parivattayamānaṃ rajatacakkam viya, rajatakūṭato nikkhamantaṃ khīradhārāmaṇḍam viya, sapakkhe papphoṭetvā gaganatale pakkhandamānaṃ setahaṃsaṃ viya ca meghavaṇṇāya samuddakucchito uggantvā pācīnacakkavāḷapabbatamatthake sasalakkhaṇappaṭimaṇḍitaṃ ekūnapaṇṇāsayojanaṃ candamaṇḍalam addasa. Tato sālavanaṃ olokesi. Tasmīhi samaye sālurukkhā mūlato paṭṭhāya yāva aggā sabbapāliphullā dukūlapārutā viya, muttākālāpavinaddhā viya ca virocīṃsu. Bhūmitalaṃ pupphasantharapūjāya paṭimaṇḍitaṃ viya, tattha tattha nipatantena pupphareṇunā lākhārasena siñcamānaṃ viya ca ahosi. Bhamaramadhukaragaṇā kusumareṇumadamattā upagāyamānā viya vanantaresu vicaranti. Tadā ca uposathadivasova hoti. Atha thero, “kāya nu kho ajja ratiyā vītināmessāmī”ti cintesi, ariyasāvaka ca nāma piyadhammassavanā honti. Athassa etadahosi – “ajja mayhaṃ jeṭṭhabhātikassa dhammasenāpatittherassa santikaṃ gantvā dhammaratiyā vītināmessāmī”ti. Gacchanto pana ekakova agantvā “mayhaṃ piyasahāyaṃ mahākassapattheraṃ gahetvā gamissāmī”ti nisinnaṭṭhānato vuṭṭhāya cammakhaṇḍam papphoṭetvā yenāyasmā mahākassapo tenupasaṅkami.

Evamāvusoti kho āyasmā mahākassapoti theropi yasmā piyadhammassavanova ariyasāvako, tasmā tassa vacanaṃ sutvā gacchāvuso, tvaṃ, mayhaṃ sīsaṃ vā rujjati piṭṭhi vāti kiñci lesāpadesaṃ akatvā tuṭṭhahadayova, “evamāvuso”tiādimāha. Paṭissutvā ca nisinnaṭṭhānato vuṭṭhāya cammakhaṇḍam papphoṭetvā mahāmoggallānaṃ anubandhi. Tasmīṃ samaye dve mahātherā paṭipāṭiyā ṭhitāni dve candamaṇḍalāni viya, dve sūriyamaṇḍalāni viya, dve chaddantaṅgarājāno viya, dve sīhā viya, dve byagghā viya ca virocīṃsu. Anuruddhattheropi tasmīṃ samaye divāṭṭhāne nisino dve mahāthere sārīputtattherassa santikaṃ gacchante disvā pacchimalokadhātuṃ olokeno sūriyaṃ vanantaṃ pavisaṃtaṃ viya, pācīnalokadhātuṃ olokeno candamānaṃ vanantato uggacchantam viya, sālavanaṃ olokeno sabbapāliphullameva sālavanañca disvā ajja uposathadivaso, ime ca me jeṭṭhabhātikā dhammasenāpatissa santikaṃ gacchanti, mahantena dhammassavanena bhavitabbaṃ, ahampi dhammassavanassa bhāgī bhavissāmīti nisinnaṭṭhānato vuṭṭhāya cammakhaṇḍam papphoṭetvā mahātherānaṃ padānupadiko hutvā nikkhami. Tena vuttaṃ – “atha kho āyasmā ca mahāmoggallāno āyasmā ca mahākassapo āyasmā ca anuruddho yenāyasmā sārīputto tenupasaṅkamiṃsū”ti. **Upasaṅkamiṃsūti.** Paṭipāṭiyā ṭhitā tayo candā viya, sūriyā viya, sīhā viya ca virocāmānā upasaṅkamiṃsu.

333. Evaṃ upasaṅkamante pana te mahāthere āyasmā ānando attano divāṭṭhāne nisinnoyeva disvā, “ajja mahantaṃ dhammassavanaṃ bhavissati, mayāpi tassa bhāginā bhavitabbaṃ, na kho pana ekakova gamissāmi, mayhaṃ piyasahāyampi revatatttheraṃ gahetvā gamissāmī”ti sabbaṃ mahāmoggallānassa mahākassapassa anuruddhassa upasaṅkamane vuttanayeneva vitthārato veditabbaṃ. Iti te dve janā paṭipāṭiyā ṭhitā dve candā viya, sūriyā viya, sīhā viya ca virocāmānā upasaṅkamiṃsu. Tena vuttaṃ – “addasā kho āyasmā sārīputto”tiādi. **Disvāna āyasmantaṃ ānandaṃ etadavocāti** dūratova disvā anukkamena kathāupacāraṃ sampattametam, “etu kho āyasmā”tiādivacanaṃ avoca. **Ramaṇiyaṃ, āvusoti** ettha duvidham rāmaṇeyyakaṃ vanarāmaṇeyyakaṃ puggalarāmaṇeyyakañca. Tattha vanaṃ nāma nāgasalaḷasālacampakādīhi sañchannaṃ hoti bahalacchāyaṃ pupphaphalūpagam vividharukkham udakasampannaṃ gāmato nissaṭam, idaṃ vanarāmaṇeyyakaṃ nāma. Yaṃ sandhāya vuttaṃ –

“Ramaṇiyāni araṇṇāni, yattha na ramatī jano;
Vītarāgā ramissanti, na te kāmagavesino”ti. (dha. pa. 99);

Vanaṃ pana sacepi ujjāṅgale hoti nirudakaṃ viralacchāyaṃ kaṇṭakasamākiṇṇam, buddhādayopettha ariyā viharanti, idaṃ puggalarāmaṇeyyakaṃ nāma. Yaṃ sandhāya vuttaṃ –

“Gāme vā yadi vāraññe, ninne vā yadi vā thale;
Yattha arahanto viharanti, taṃ bhūmirāmaṇeyyaka”nti. (dha. pa. 98);

Idha pana taṃ duvidhampi labbhati. Tadā hi gosīṅgasālavanaṃ sabbapāliphullaṃ hoti kusumagandhasugandham, sadevake cettha loke aggapuggalo sammāsambuddho tiṃsasahassamattehi abhiññātabhikkhūhi saddhiṃ viharati. Taṃ sandhāya vuttaṃ – “ramaṇiyaṃ, āvusō ānanda, gosīṅgasālavana”nti.

Dosināti dosāpagatā, abbaṃ mahikā dhūmo rajo rāhūti imehi pañcahi upakkilesehi virahitāti vuttaṃ hoti.

Sabbapāliphullāti sabbattha pāliphullā, mūlato paṭṭhāya yāva aggā apupphitaṭṭhānaṃ nāma natthi. **Dibbā maññe gandhā sampavantīti** dibbā mandārapupphakoviḷārapāricchattakacandanacuṇṇagandhā viya samantā pavāyanti, sakkasuyāsantusitanimmānaratiparanimmītamahābrahmānaṃ otiṇṇaṭṭhānaṃ viya vāyantīti vuttam hoti.

Kathamrūpena, āvuso ānandāti ānandatthero tesam pañcannaṃ therānaṃ saṅghanavakova. Kasmā thero taṃyeva paṭṭhamam pucchati? Mamāyitattā. Te hi dve therā aññamaññaṃ mamāyimsu. Sāriputtatthero, “mayā kattabbaṃ satthu upaṭṭhānaṃ karotī”ti ānandattheram mamāyi. Ānandatthero bhagavato sāvakānaṃ aggoti sāriputtattheram mamāyi, kuladārake pabbājetvā sāriputtattherassa santike upajjhaṃ gaṇhāpesi. Sāriputtattheropi tatheva akāsi. Evaṃ ekamekena attano pattacīvaraṃ datvā pabbājetvā upajjhaṃ gaṇhāpitāni pañca bhikkhusatāni ahesuṃ. Āyasmā ānando paṇṭīti cīvarādīnīpi labhitvā therasseva deti.

Eko kira brāhmaṇo cintesi – “buddharatanassa ca saṅgharatanassa ca pūjā paññāyati, katham nu kho dhammaratanaṃ pūjitaṃ nāma hotī”ti? So bhagavantaṃ upasaṅkamitvā etamatthaṃ pucchi. Bhagavā āha – “sacesi, brāhmaṇa, dhammaratanaṃ pūjītukāmo, ekaṃ bahussutaṃ pūjehī”ti bahussutaṃ, bhante, ācikkhathāti bhikkhusaṅghaṃ pucchati. So bhikkhusaṅghaṃ upasaṅkamitvā bahussutaṃ, bhante, ācikkhathāti āha. Ānandatthero brāhmaṇāti. Brāhmaṇo theram saḥassagghanikena cīvarena pūjesi. Thero taṃ gahetvā bhagavato santikaṃ agamāsi. Bhagavā “kuto, ānanda, laddha”nti āha. Ekena, bhante, brāhmaṇena dīnaṃ, idaṃ pañāhaṃ āyasmato sāriputtassa dātukāmoti. Dehi, ānandāti. Cārikaṃ pakkanto, bhanteti. Āgatakāle dehīti. Sikkhāpadaṃ, bhante, paññattanti. Kadā pana sāriputto āgamissatīti? Dasāhamattena, bhanteti. “Anujānāmi, ānanda, dasāhaparamaṃ atirekacīvaraṃ nikkhīpitu”nti (pārā. 461; mahāva. 347) sikkhāpadaṃ paññāpesi. Sāriputtattheropi tatheva yaṃkiñci manāpaṃ labhati, taṃ ānandattherassa deti. Evaṃ te therā aññamaññaṃ mamāyimsu, itī mamāyitattā paṭṭhamam pucchi.

Apica anumati-pucchā nāmesā khuddakato paṭṭhāya pucchitabbā hoti. Tasmā thero cintesi – “ahaṃ paṭṭhamam ānandaṃ pucchissāmi, ānando attano paṭibhānaṃ byākarissati. Tato revataṃ, anuruddhaṃ, mahākassapaṃ, mahāmoggallānaṃ pucchissāmi. Mahāmoggallāno attano paṭibhānaṃ byākarissati. Tato pañcapi therā maṃ pucchissanti, ahampi attano paṭibhānaṃ byākarissāmi”ti. Ettāvataṃpi ayaṃ dhammadesanā sikkhāpattā vepullappattā na bhavissati, atha mayaṃ sabbepi dasabalaṃ upasaṅkamitvā pucchissāma, satthā sabbaññūtaññāṇena byākarissati. Ettāvataṃ ayaṃ dhammadesanā sikkhāpattā vepullappattā bhavissati. Yathā hi janapadamhi uppanno aṭṭo gāmaḥojakaṃ pāpuṇāti, tasmim nicchitum asakkonte janapadabhojakaṃ pāpuṇāti, tasmim asakkonte mahāvinicchayaamaccaṃ, tasmim asakkonte senāpatiṃ, tasmim asakkonte uparājaṃ, tasmim vinicchitum asakkonte rājānaṃ pāpuṇāti, raññaṃ vinicchitakālato paṭṭhāya aṭṭo aparāparaṃ na sañcarati, rājavacaneneva chijjati. Evamevaṃ ahañhi paṭṭhamam ānandaṃ pucchissāmi...pe... atha mayaṃ sabbepi dasabalaṃ upasaṅkamitvā pucchissāma, satthā sabbaññūtaññāṇena byākarissati. Ettāvataṃ ayaṃ dhammadesanā sikkhāpattā vepullappattā bhavissati. Evaṃ anumati-puccham pucchanto thero paṭṭhamam ānandattheram pucchi.

Bahussuto hotīti bahu assa sutam hoti, navaṅgaṃ satthusāsanaṃ pālīanusandhipubbāparavasena uggahitaṃ hotīti attho. **Sutadharoti** sutassa ādhārahūto. Yassa hi ito gahitaṃ ito palāyati, chiddaghaṭe udakaṃ viya na tiṭṭhati, parisamajjhe ekaṃ suttaṃ vā jātaṃ vā kathetum vā vācetaṃ vā na sakkoti, ayaṃ **na sutadharo** nāma. Yassa pana uggahitaṃ buddhavacanaṃ uggahitakālasadisameva hoti, dasapi vīsati vassāni sajjhāyaṃ akarontassa na nassati, ayaṃ **sutadharo** nāma. **Sutasannicayoti** sutassa sannicayabhūto. Yathā hi sutam hadayamañjūsāya sannicitaṃ silāyaṃ lekhā viya, suvaṇṇaghaṭe pakkhittasīhavasā viya ca ajjhosāya tiṭṭhati, ayaṃ **sutasannicayo** nāma. **Dhātāti** ṭhitā paguṇā. Ekaccassa hi uggahitaṃ buddhavacanaṃ dhātam paguṇaṃ niccalitaṃ na hoti, asukasuttaṃ vā jātaṃ vā kathetūti vutte sajjhāyitvā saṃsanditvā samanuggāhitvā jānissāmīti vadati. Ekaccassa dhātam paguṇaṃ bhavaṅgasotasadisam hoti, asukasuttaṃ vā jātaṃ vā kathetūti vutte uddharitvā tameva katheti. Tam sandhāya vuttam “dhātā”ti.

Vacasā paricitāti suttadasaka-vaggadasaka-paññāsadasakānaṃ vasena vācāya sajjhāyitā. **Manasānupekkhitāti** cittena anupekkhitā, yassa vācāya sajjhāyitaṃ buddhavacanaṃ manasā cintentassa tattha tattha pākaṃ hoti. Mahādīpaṃ jāletvā ṭhitassa rūpagataṃ viya paññāyati. Tam sandhāya vuttam – “vacasā paricitā manasānupekkhitā”ti. **Diṭṭhiyā suppaṭividdhāti** atthato ca kāraṇato ca paññāya suppaṭividdhā. **Parimaṇḍalehi padabyañjanhīti** ettha padameva atthassa byañjanato padabyañjanaṃ, tam akkharapāripūriṃ

katvā dasavidhabyañjanabuddhiyo aparihāpetvā vuttam parimaṇḍalam nāma hoti, evarūpehi padabyañjanehīti attho. Apica yo bhikkhu parisati dhammam desento suttam vā jātakam vā nikkhapitvā aññam upārambhakaram suttam āharati, tassa upamam katheti, tadattham ohāreti, evamidam gahetvā ettha khipanto ekapasseneva pariharanto kālam ñatvā vuṭṭhahati. Nikkhittasuttam pana nikkhattamattameva hoti, tassa kathā aparimaṇḍalā nāma hoti. Yo pana suttam vā jātakam vā nikkhipitvā bahi ekapadampi agantvā pāḷiyā anusandhiñca pubbāparañca amakkhento ācariyehi dinnanaye thatvā tulikāya paricchindanto viya, gambhīramātikāya udakam pesento viya, padam koṭṭento sindhavājānīyo viya gacchati, tassa kathā parimaṇḍalā nāma hoti. Evarūpiṃ katham sandhāya – “parimaṇḍalehi padabyañjanehī”ti vuttam.

Anuppabandhehīti ettha yo bhikkhu dhammam kathento suttam vā jātakam vā ārabhitvā āradhakā lato paṭṭhāya turitaturito araṇim manthento viya, uṇhakhādanīyam khādanto viya, pāḷiyā anusandhipubbāparesu gahitam gahitameva aggahitam aggahitameva ca katvā purāṇapaṇṇantaresu caramānam godham uṭṭhapento viya tattha tattha paharanto osāpento ohāya gacchati. Yopi dhammam kathento kālena sīgham kālena dandham kālena mahāsaddam kālena khuddakasaddam karoti. Yathā petaggi kālena jalati, kālena nibbāyati, evameva idha **petaggidhammakathiko** nāma hoti, parisāya uṭṭhātukāmāya punappunam ārabhati. Yopi kathento tattha tattha vitthāyati, nitthunanto kandanto viya katheti, imesam sabbesampi kathā appabandhā nāma hoti. Yo pana suttam ārabhitvā ācariyehi dinnanaye thito acchinnadhāram katvā nadīsotam viya pavatteti, ākāsagaṅgato bhassamānam udakam viya nirantaram katham pavatteti, tassa kathā anuppabandhā hoti. Tam sandhāya vuttam “anuppabandhehī”ti. **Anusayasamugghātāyā**ti sattannam anusayānam samugghātattāya. **Evarūpenā**ti evarūpena bahussutena bhikkhunā tathārūpeneva bhikkhusatena bhikkhusahassena vā saṅghāṭikaṇṇena vā saṅghāṭikaṇṇam, pallāṅkena vā pallāṅkam āhacca nisinnena gosiṅgasālavanam sobheyya. Iminā nayena sabbavāresu attho vedītabbo.

334. Paṭisallānam assa ārāmoti **paṭisallānārāmo**. Paṭisallāne ratoti **paṭisallānarato**.

335. Sahassam lokānanti sahasam lokadhātūnam. Ettakañhi therassa dhuvasevanam āvajjanapaṭibaddham, ākaṅkhamāno pana thero anekānipi cakkavāḷasahasāni voloketiyeva. **Uparipāsādavaragatoti** sattabhūmakassa vā navabhūmakassa vā pāsādavarassa upari gato. **Sahasam nemimaṇḍalānam volokeyyā**ti pāsādapariveṇe nābhīyā patiṭṭhitānam nemivaṭṭiyā nemivaṭṭim āhacca thitānam nemimaṇḍalānam sahasam vātapānam vivarivā olokeyya, tassa nābhīyopi pākāṭā honti, arāpi arantarānipi nemiyo. **Evameva kho, āvusoti**, āvuso, evam ayampi dibbacakkhuko bhikkhu dibbena cakkhunā atikkantamānusakena sahasam lokānam voloketi. Tassa pāsāde thitapurisassa cakkanābhīyo viya cakkavāḷasahasase sinerusahasam pākāṭam hoti. Arā viya dīpā pākāṭā honti. Arantarāni viya dīpaṭṭhitamanussā pākāṭā honti. Nemiyo viya cakkavāḷapabbatā pākāṭā honti.

336. Āraññikoti samādiṇṇaaraññadhutaṅgo. Sesapadesupi eseva nayo.

337. No ca saṃsādentīti na osādentī. Sahetukañhi sakāraṇam katvā pañham pucchitum vissajjitumpi asakkonto saṃsādeti nāma. Evam na karontīti attho. **Pavattinī hotī**ti nadīsotodakam viya pavattati.

338. Yāya vihārasamāpattiyāti yāya lokiyāya vihārasamāpattiyā, yāya lokuttarāya vihārasamāpattiyā.

339. Sādhu sādhu sārīputtāti ayam sādhu kāro ānandattherassa dinno. Sārīputtattherena pana saddhiṃ bhagavā ālapati. Esa nayo sabbattha. **Yathā tam ānandovā**ti yathā ānandova sammā byākaraṇamāno byākareyya, evam byākatam ānandena attano anucchavikameva, ajjhāsayanurūpameva byākatanti attho. Ānandatthero hi attanāpi bahussuto, ajjhāsayopissa evam hoti – “aho vata sāsane sabrahmacārī bahussutā bhavēyyu”nti. Kasmā? Bahussutassa hi kappiyā kappiyam sāvajjānavajjam, garukalahukam satekicchātekkham pākāṭam hoti. Bahussuto uggahitabuddhavadānam āvajjitvā imasmim thāne sīlam kathitam, imasmim samādhi, imasmim vipassanā, imasmim maggaphalanibbānānīti sīlassa āgataṭṭhāne sīlam pūretvā, samādhissa āgataṭṭhāne samādhiṃ pūretvā vipassanāya āgataṭṭhāne vipassanāgabbham gaṇhāpetvā maggam bhāvetvā phalam sacchikaroti. Tasmā therassa evam ajjhāsayo hoti – “aho vata sabrahmacārī ekam vā dve vā tayo vā cattāro vā pañca vā nikāye uggahetvā āvajjantā sīlādīnam āgataṭṭhānesu sīlādīni paripūretvā anukkamena maggaphalanibbānāni sacchikareyyu”nti. Sesavāresupi eseva nayo.

340. Āyasmā hi revato jhānajjhāsayo jhānābhirato, tasmāssa evaṃ hoti – “aho vata sabrahmacārī ekikā nisīditvā kasiṇaparikkammaṃ katvā aṭṭha samāpattiyo nibbattetvā jhānapadaṭṭhānaṃ vipassanaṃ vaḍḍhetvā lokuttaradhammaṃ sacchikareyyu”nti. Tasmā evaṃ byākāsi.

341. Āyasmā anuruddho dibbacakkhuko, tassa evaṃ hoti – “aho vata sabrahmacārī ālokaṃ vaḍḍhetvā dibbena cakkhunā anekesu cakkavālasahassesu cavamāne ca upapajjamāne ca satte disvā vaṭṭabhayena cittaṃ saṃvejetvā vipassanaṃ vaḍḍhetvā lokuttaradhammaṃ sacchikareyyu”nti. Tasmā evaṃ byākāsi.

342. Āyasmā mahākassapo dhutavādo, tassa evaṃ hoti – “aho vata sabrahmacārī dhutavādā hutvā dhutaṅgānubhāvena paccayataṇhaṃ milāpetvā aparepi nānappakāre kilese dhunitvā vipassanaṃ vaḍḍhetvā lokuttaradhammaṃ sacchikareyyu”nti. Tasmā evaṃ byākāsi.

343. Āyasmā mahāmoggallāno samādhipāramiyā matthakaṃ patto, sukhumaṃ pana cittantaṃ khandhantaṃ dhātvaṃtaraṃ āyatanantaṃ jhānokkantaṃ ārammaṇokkantaṃ aṅgavavattānaṃ ārammaṇavavattānaṃ aṅgasaṅkanti ārammaṇasaṅkanti ekatovaḍḍhanaṃ ubhatovaḍḍhananti ābhidhammikadhammakathikasveva pākaṭaṃ. Anābhidhammiko hi dhammaṃ kathento – “ayaṃ sakavādo ayaṃ paravādo”ti na jānāti. Sakavādaṃ dīpessāmīti paravādaṃ dīpeti, paravādaṃ dīpessāmīti sakavādaṃ dīpeti, dhammantaṃ viśaṃvādeti. Ābhidhammiko sakavādaṃ sakavādaniyāmeneva, paravādaṃ paravādaniyāmeneva dīpeti, dhammantaṃ na viśaṃvādeti. Tasmā therassa evaṃ hoti – “aho vata sabrahmacārī ābhidhammikā hutvā sukhumesu ṭhānesu ñāṇaṃ oṭāretvā vipassanaṃ vaḍḍhetvā lokuttaradhammaṃ sacchikareyyu”nti. Tasmā evaṃ byākāsi.

344. Āyasmā sārīputto paññāpāramiyā matthakaṃ patto, paññāvāyeva ca cittaṃ attano vase vattetaṃ sakkoti, na duppañño. Duppañño hi uppannaṃ cittaṃ vase vattetvā ito cito ca vipphanditvāpi katipāheneva gihibhāvaṃ patvā anayabyasanaṃ pāpuṇāti. Tasmā therassa evaṃ hoti – “aho vata sabrahmacārī acittavasikā hutvā cittaṃ attano vase vattetvā sabbānassa visevitavipphanditāni bhañjitvā īsakampi bahi nikkhamitvaṃ adentā vipassanaṃ vaḍḍhetvā lokuttaradhammaṃ sacchikareyyu”nti. Tasmā evaṃ byākāsi.

345. Sabbesaṃ vo, sārīputta, subhāsitaṃ pariyāyenati sārīputta, yasmā saṅghārāmassa nāma bahussutabhikkhūhipi sobhanakāraṇaṃ atthi, jhānābhiratehipi, dibbacakkhukehipi, dhutavādehipi, ābhidhammikehipi, acittavasikehipi sobhanakāraṇaṃ atthi. Tasmā sabbesaṃ vo subhāsitaṃ pariyāyena, tena tena kāraṇena subhāsīteva, no dubbhāsitaṃ. **Apica mamapi suṇāthā**ti apica mamapi vacanaṃ suṇātha. **Na tāvāhaṃ imaṃ pallaṅkaṃ bhindissāmī**ti na tāva ahaṃ imaṃ caturaṅgavīriyaṃ adhiṭṭhāya ābhujitaṃ pallaṅkaṃ bhindissāmi, na mocessāmīti attho. Idaṃ kira bhagavā paripākagate ñāṇe rajjasiriṃ pahāya katābhiniikkhamano anupubbena bodhimaṇḍaṃ āruya caturaṅgavīriyaṃ adhiṭṭhāya aparājītapallaṅkaṃ ābhujitvā daḷhasamādāno hutvā nisinnaṃ tiṇṇaṃ mārānaṃ matthakaṃ bhinditvā paccūsasamaye dasasahasilokadhātavaṃ unnādeto sabbaññūtaññānaṃ paṭivijjhi, taṃ attano mahābodhipallaṅkaṃ sandhāya evamāha. Apica pacchimaṃ janataṃ anukampamānopi paṭipattisāraṃ puthujjanakalyāṇakaṃ dassento evamāha. Passati hi bhagavā – “anāgate evaṃ ajjhāsayaṃ kulaputtā itaṃ paṭisañcikkhissanti, ‘bhagavā mahāgosiṅgasuttaṃ kathento idha, sārīputta, bhikkhu pacchābhattaṃ...pe... evarūpena kho, sārīputta, bhikkhunā gosiṅgasālavanaṃ sobheyyāti āha, mayaṃ bhagavato ajjhāsayaṃ gaṇhissāmā’ti pacchābhattaṃ piṇḍapātaṭṭhikāntā caturaṅgavīriyaṃ adhiṭṭhāya daḷhasamādānā hutvā ‘arahattaṃ appatvā imaṃ pallaṅkaṃ na bhindissāmā’ti samaṇadhammaṃ kātabbaṃ maññissanti, te evaṃ paṭipannā katipāheneva jātijarāmarāṇassa antaṃ karissanti”ti, imaṃ pacchimaṃ janataṃ anukampamāno paṭipattisāraṃ puthujjanakalyāṇakaṃ dassento evamāha. **Evarūpena kho, sārīputta, bhikkhunā gosiṅgasālavanaṃ sobheyyāti**, sārīputta, evarūpena bhikkhunā nipariyāyeneva gosiṅgasālavanaṃ sobheyyāti yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāgosiṅgasuttavaṇṇanā niṭṭhitā.

3. Mahāgopālakasuttavaṇṇanā

346. Evaṃ me sutanti mahāgopālakasuttaṃ. Tattha tisso kathā ekanālikā, caturassā, nisinnavattikāti.

Tattha pāliṃ vatvā ekekapadassa atthakathanam **ekanāḷikā** nāma. Apaṇḍitaṃ gopālakam dassetvā, apaṇḍitaṃ bhikkhum dassetvā, paṇḍitaṃ gopālakam dassetvā, paṇḍitaṃ bhikkhum dassetvāti catukkam bandhitvā kathanam **caturassā** nāma. Apaṇḍitaṃ gopālakam dassetvā pariyoṣānagamanam, apaṇḍitaṃ bhikkhum dassetvā pariyoṣānagamanam, paṇḍitaṃ gopālakam dassetvā pariyoṣānagamanam, paṇḍitaṃ bhikkhum dassetvā pariyoṣānagamananti ayam **nisinnavattikā** nāma. Ayam idha sabbācariyānam āciṇṇā.

Ekādasahi, bhikkhave, aṅgehīti ekādasahi aḡuṇakoṭṭhāsehi. **Gogaṇanti** gomaṇḍalam. **Pariharitunti** pariggahetvā vicarituṃ. **Phātiṃ kātunti** vaḍḍhiṃ āpādetuṃ. **Idhāti** imasmim loke. **Na rūpaññū hotīti** gaṇanato vā vaṇṇato vā rūpaṃ na jānāti. **Gaṇanato** na jānāti nāma attano gunnaṃ satam vā sahasam vāti saṅkhyam na jānāti. So gāvīsu haṭṭāsu vā palātāsu vā gogaṇam gaṇetvā, ajja ettikā na dissantīti dve tīṇi gāmantarāni vā aṭaviṃ vā vicaranto na pariyesati, aññesam gāvīsu attano gogaṇam pavitṭhāsupi gogaṇam gaṇetvā, “imā ettikā gāvo na amhāka”nti yaṭṭhiyā pothetvā na nīharati, tassa naṭṭhā gāvīyo naṭṭhāva honti. Paragāvīyo gahetvā vicarantaṃ gosāmikā disvā, “ayam ettakam kalam amhākam dhenum gaṇhāti”ti tajjetvā attano gāvīyo gahetvā gacchanti. Tassa gogaṇopi parihāyati, pañcagorasaparibhogatopi paribāhiro hoti. **Vaṇṇato** na jānāti nāma – “ettikā gāvo setā, ettikā rattā, ettikā kāḷā, ettikā kabarā ettikā nīlā”ti na jānāti, so gāvīsu haṭṭāsu vā...pe... pañcagorasaparibhogatopi paribāhiro hoti.

Na lakkhaṇakusalo hotīti gāvīnam sarīre kataṃ dhanusattisulādibhedam lakkhaṇam na jānāti, so gāvīsu haṭṭāsu vā palātāsu vā ajja asukalakkhaṇā ca asukalakkhaṇā ca gāvo na dissantīti...pe... pañcagorasaparibhogatopi paribāhiro hoti.

Na āsāṭikam hāretāti gunnaṃ khāṇukaṇṭakādīhi pahaṭṭaṭṭhānesu vaṇo hoti. Tattha nīlamakkhikā aṇḍakāni pātentī, tesam āsāṭikāti nāma. Tāni daṇḍena apanetvā bhesajjam dātammaṃ hoti. Bālo gopālako tathā na karoti, tena vuttam – “na āsāṭikam hāretā hoti”ti. Tassa gunnaṃ vaṇā vaḍḍhanti, gambhīrā honti, pāṇakā kucchim pavisanti, gāvo gelaññābhībhitvā neva yāvadattham tiṇāni khādītuṃ, na pānīyam pātuṃ sakkonti. Tattha gunnaṃ khīram chijjati, goṇānam javo hāyati, ubhayesam jīvitantarāyo hoti. Evamassa gogaṇopi parihāyati, pañcagorasatopi paribāhiro hoti.

Na vaṇam paṭicchādetā hotīti gunnaṃ vuttanayeneva sañjāto vaṇo bhesajjam datvā vākena vā cīrakena vā bandhitvā paṭicchādetabbo hoti. Bālo gopālako tathā na karoti, athassa gunnaṃ vaṇehi yūsā paggharanti, tā aññamaññam nighamsenti, tena aññesampi vaṇā jāyanti. Evam gāvo gelaññābhībhitvā neva yāvadattham tiṇāni khādītuṃ...pe... paribāhiro hoti.

Na dhūmam kattā hotīti antovasse ḍamsamakasādīnam ussannakāle gogaṇe vajam pavitṭhe tattha tattha dhūmo kātabbo hoti, apaṇḍito gopālako tam na karoti. Gogaṇo sabbarattim ḍamsādīhi upadduto niddam alabhitvā punadivase araññe tattha tattha rukkhāmūlādīsu nipajjitvā niddāyati, neva yāvadattham tiṇāni khādītuṃ...pe... pañcagorasaparibhogatopi paribāhiro hoti.

Na tittham jānātīti tittham samanti vā visamanti vā sagāhanti vā niggāhanti vā na jānāti, so atitthena gāvīyo otāreti. Tāsam visamatitthe pāsāṇādīni akkamantīnam pādā bhijjanti, sagāham gambhīram tittham otiṇṇā kumbhīlādayo gāhā gaṇhanti. Ajja ettikā gāvo naṭṭhā, ajja ettikāti vattabbaṃ āpajjati. Evamassa gogaṇopi parihāyati, pañcagorasatopi paribāhiro hoti.

Na pītam jānātīti pītampi apītampi na jānāti. Gopālakena hi “imāya gāvīyā pītam, imāya na pītam, imāya pānīyatitthe okāso laddho, imāya na laddho”ti evam pītāpītam jānitabbaṃ hoti. Ayam pana divasabhāgam araññe gogaṇam rakkhitvā pānīyam pāyessāmīti nadim vā taḷakam vā gahetvā gacchati. Tattha mahāusabhā ca anuusabhā ca balavagāvīyo ca dubbalāni ceva mahallakāni ca gorūpāni siṅgehi vā phāsukāhi vā paharivā attano okāsam katvā ūruppamānam udakam pavisitvā yathākāmam pivanti. Avasesā okāsam alabhamānā tīre ṭhatvā kalalamissakam udakam pivanti, apītā eva vā honti. Atha ne gopālako piṭṭhiyam paharivā puna araññam paveseti, tattha apītāgāvīyo pipāsāya sukkhamānā yāvadattham tiṇāni khādītuṃ na sakkonti, tattha gunnaṃ khīram chijjati, goṇānam javo hāyati...pe... paribāhiro hoti.

Na vīthim jānātīti “ayam maggo samo khemo, ayam visamo sāsaṅko sappāṭibhayo”ti na jānāti. So samam khemam maggam vajjetvā gogaṇam itaram maggam paṭipādeti, tattha gāvo sīhabyagghādīnam

gandhena coraparissayena vā abhibhūtā bhantamigasappaṭibhāgā gīvaṃ ukkhipitvā tiṭṭhanti, neva yāvadatthaṃ tiṇāni khādanti, na pānīyaṃ pivanti, tattha gunnaṃ khīraṃ chijjati...pe... paribāhiro hoti.

Na gocarakusalo hotīti gopālakena hi gocarakusalena bhavitabbaṃ, pañcāhikavāro vā sattāhikavāro vā jānitabbo, ekadisāya gogaṇaṃ cāretvā punadivase tattha na cāretabbo. Mahatā hi gogaṇena ciṇṇatṭhānaṃ bheritalaṃ viya suddhaṃ hoti nittiṇaṃ, udakampi āluṭṭiyati. Tasmā pañcame vā sattame vā divase puna tattha cāretuṃ vaṭṭati, ettakena hi tiṇampi paṭiviruhati, udakampi pasīdati. Ayaṃ pana imaṃ pañcāhikavāraṃ vā sattāhikavāraṃ vā na jānāti, divase divase rakkhitaṭṭhāneyeva rakkhati. Athassa gogaṇo haritattiṇaṃ na labhati, sukkhattiṇaṃ khādanto kalalamissakaṃ udakaṃ pivati, tattha gunnaṃ khīraṃ chijjati...pe... paribāhiro hoti.

Anavasesadohī ca hotīti paṇḍitagopālakena yāva vacchakassa maṃsalohitaṃ saṅṭhāti, tāva ekaṃ dve thane ṭhapetvā sāvasesadohinā bhavitabbaṃ. Ayaṃ vacchakassa kiñci anavasesetvā duhati, khīrapako vaccho khīrapipāsāya sukkhati, saṅṭhātuṃ asakkonto kampamāno mātu purato patitvā kālaṅkaroti. Mātā puttakaṃ disvā, “mayhaṃ puttako attano mātukhīraṃ pātumpi na labhati”ti puttasokena na yāvadatthaṃ tiṇāni khādituṃ, na pānīyaṃ pātum sakkoti, thanesu khīraṃ chijjati. Evamassa gogaṇopi parihāyati, pañcagorasatopi paribāhiro hoti.

Gunnaṃ pituṭṭhānaṃ karontīti **gopitaro**. Gāvo pariṇayanti yathāruciṃ gahetvā gacchantīti **gopariṇāyaka**. **Na atirekapūjāyati** paṇḍito hi gopālako evarūpe usabhe atirekapūjāya pūjeti, paṇītaṃ gobhattaṃ deti, gandhapañcaṅgulikehi maṇḍeti, mālaṃ pilandheti, siṅge suvaṇṇarajatakosake ca dhāreti, rattim dīpaṃ jāletvā celavitānassa heṭṭhā sayāpeti. Ayaṃ pana tato ekasakkāraṃ na karoti, usabhā atirekapūjaṃ alabhamānā gogaṇaṃ na rakkhanti, parissayaṃ na vārenti. Evamassa gogaṇo parihāyati, pañcagorasato paribāhiro hoti.

347. Idhāti imasmiṃ sāsane. Na rūpaññū hotīti, “cattāri mahābhūtāni catunnañca mahābhūtānaṃ upādāyarūpa”nti evaṃ vuttarūpaṃ dvīhākārehi na jānāti gaṇanato vā samuṭṭhānato vā. **Gaṇanato** na jānāti nāma, “cakkhāyatanam, sota-ghāna-jivhā-kāyāyatanam, rūpa-sadda-gandha-rasa-phoṭṭhabbāyatanam, itthindriyaṃ, purisindriyaṃ, jīvitindriyaṃ, kāyaviññatti, vacīviññatti, ākāsadhātu, āpodhātu, rūpassa lahutā, mudutā, kammaññatā, upacayo, santati, jaratā, rūpassa aniccā, kabalīkāro āhāro”ti evaṃ pāliyaṃ āgatā pañcavīsati rūpakotṭhāsāti na jānāti. Seyyathāpi so gopālako gaṇanato gunnaṃ rūpaṃ na jānāti, tathūpamo ayaṃ bhikkhu. So gaṇanato rūpaṃ ajānanto rūpaṃ pariggahetvā arūpaṃ vavatthapetvā rūpārūpaṃ pariggahetvā paccayaṃ sallakkhetvā lakkhaṇaṃ āropetvā kammaṭṭhānaṃ matthakaṃ pāpetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane sīlasamādhivipassanāmaggaḥalanibbānehi na vaḍḍhati, yathā ca so gopālako pañcahi gorasehi paribāhiro hoti, evaṃ asekkhena sīlakkhandhena, asekkhena samādhī, paññā, vimutti, vimuttiñāṇadassanakkhandhenāti pañcahi dhammakkhandhehi paribāhiro hoti.

Samuṭṭhānato na jānāti nāma, “ettakaṃ rūpaṃ ekasamuṭṭhānaṃ, ettakaṃ dvisamuṭṭhānaṃ, ettakaṃ tisamuṭṭhānaṃ, ettakaṃ catusamuṭṭhānaṃ, ettakaṃ na kutocisamuṭṭhāti”ti na jānāti. Seyyathāpi so gopālako vaṇṇato gunnaṃ rūpaṃ na jānāti, tathūpamo ayaṃ bhikkhu. So samuṭṭhānato rūpaṃ ajānanto rūpaṃ pariggahetvā arūpaṃ vavatthapetvā...pe... paribāhiro hoti.

Na lakkhaṇakusalo hotīti kammalakkhaṇo bālo, kammalakkhaṇo paṇḍitoti evaṃ vuttaṃ kusalākusalaṃ kammaṃ paṇḍitabālalakkhaṇanti na jānāti. So evaṃ ajānanto bāle vajjetvā paṇḍite na sevati, bāle vajjetvā paṇḍite asevanto kappiyākkappiyaṃ kusalākusalaṃ sāvajjānavajjaṃ garukalahukaṃ satekicchaatekicchaṃ kāraṇākāraṇaṃ na jānāti; taṃ ajānanto kammaṭṭhānaṃ gahetvā vaḍḍhetuṃ na sakkoti. So yathā tassa gopālakassa gogaṇo na vaḍḍhati, evaṃ imasmiṃ sāsane yathāvutthehi sīlādīhi na vaḍḍhati, gopālako viya ca pañcahi gorasehi pañcahi dhammakkhandhehi paribāhiro hoti.

Na āsāṭikaṃ hāretā hotīti uppannaṃ kāmavitakkanti evaṃ vutte kāmavitakkādike na vinodeti, so imaṃ akusalavitakkaṃ āsāṭikaṃ ahāretvā vitakkavasiko hutvā vicaranto kammaṭṭhānaṃ gahetvā vaḍḍhetuṃ na sakkoti, so yathā tassa gopālakassa...pe... paribāhiro hoti.

Na vaṇaṃ paṭicchādetā hotīti cakkhunā rūpaṃ disvā nimittaggāhī hotītiādinā nayena sabbārammaṇesu nimittaṃ gaṇhanto yathā so gopālako vaṇaṃ na paṭicchādeti, evaṃ saṃvaram na sampādeti. So vivaṭadvāro

vicaranto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na dhūmaṃ kattā hotīti so gopālako dhūmaṃ viya dhammadesanādhūmaṃ na karoti, dhammakathaṃ vā sarabhaññaṃ vā upanisinnakathaṃ vā anumodanaṃ vā na karoti. Tato naṃ manussā bahussuto guṇavāti na jānanti, te guṇaguṇaṃ ajānanta catūhi paccayehi saṅghaṃ na karonti. So paccayehi kilamamāno buddhavacanaṃ sajjhāyaṃ kātuṃ vattapaṭipattiṃ pūretuṃ kammaṭṭhānaṃ gahetvā vaḍḍhetuṃ na sakkoti... pe... paribāhiro hoti.

Na titthaṃ jānātīti titthabhūte bahussutabhikkhū na upasaṅkamati, upasaṅkamanto, “idaṃ, bhante, byañjanaṃ kathaṃ ropetabbaṃ, imassa bhāsītassa ko attho, imasmiṃ ṭhāne pāḷi kiṃ vadeti, imasmiṃ ṭhāne attho kiṃ dīpetī”ti evaṃ na paripucchati na paripaṇhāti, na jānāpetīti attho. Tassa te evaṃ aparipucchato avivaṭaṅgeva na vivaranti, bhājetvā na dassenti, anuttānikataṅga na uttānikaronti, apākaṭaṃ na pākaṭaṃ karonti. **Anekavihitesu ca kaṅkhāṭṭhāniyesu dhammesūti** anekavidhāsu kaṅkhāsu ekaṃ kaṅkhampi na paṭivinodenti. Kaṅkhā eva hi kaṅkhāṭṭhāniyā dhammā nāma. Tattha ekaṃ kaṅkhampi na nīharantīti attho. So evaṃ bahussutatitthaṃ anupasaṅkamitvā sakaṅkho kammaṭṭhānaṃ gahetvā vaḍḍhetuṃ na sakkoti. Yathā ca so gopālako titthaṃ na jānāti, evaṃ ayampi bhikkhu dhammatitthaṃ na jānāti, ajānanto avisaye paṇhaṃ pucchati, abhidhammikaṃ upasaṅkamitvā kappiyākkappiyaṃ pucchati, vinayadhamaṃ upasaṅkamitvā rūpārūpaparicchedaṃ pucchati. Te avisaye puṭṭhā kathetuṃ na sakkonti, so attanā sakaṅkho kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na pītaṃ jānātīti yathā so gopālako pītāpītaṃ na jānāti, evaṃ dhammūpasaṅghitaṃ pāmojjaṃ na jānāti na labhati, savanamayaṃ puññakiriyavatthuṃ nissāya ānisaṃsaṃ na vindati, dhammassavanaggaṃ gantvā sakkaccaṃ na suṇāti, nisinna niddāyati, kathaṃ katheti, aññavihitako hoti, so sakkaccaṃ dhammaṃ asuṇanto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Na vīthiṃ jānātīti so gopālako maggāmaggaṃ viya, – “ayaṃ lokiyo ayaṃ lokuttaro”ti ariyaṃ aṭṭhaṅgikaṃ maggaṃ yathābhūtaṃ na pajānāti. Ajānanto lokiyamagge abhinivisitvā lokuttaraṃ nibbattetuṃ na sakkoti...pe... paribāhiro hoti.

Na gocarakusalo hotīti so gopālako pañcāhikavāre sattāhikavāre viya cattāro satipaṭṭhāne, “ime lokiyā ime lokuttarā”ti yathābhūtaṃ na pajānāti. Ajānanto sukhumatṭhānesu attano ñāṇaṃ carāpetvā lokiyasatipaṭṭhāne abhinivisitvā lokuttaraṃ nibbattetuṃ na sakkoti...pe... paribāhiro hoti.

Anavasesadohī ca hotīti paṭiggahaṇe mattaṃ ajānanto anavasesaṃ duhati. Niddesavāre panassa **abhihaṭṭhuṃ pavārentīti** abhiharitvā pavārenti. Ettha dve abhihārā vācābhīhāro ca paccayābhīhāro ca. **Vācābhīhāro** nāma manussā bhikkhussa santikaṃ gantvā, “vadeyyātha, bhante, yenattho”ti pavārenti. **Paccayābhīhāro** nāma vatthādīni vā telaphāṇitādīni vā gahetvā bhikkhussa santikaṃ gantvā, “gaṇhatha, bhante, yāvatakaṃ attho”ti vadanti. **Tatra bhikkhu mattaṃ na jānātīti** bhikkhu tesu paccayesu pamāṇaṃ na jānāti, – “dāyakassa vaso vedītabbo, deyyadhammassa vaso vedītabbo, attano thāmo vedītabbo”ti rathavinīte vuttanayena pamāṇayuttaṃ aggahetvā yaṃ āharanti, taṃ sabbaṃ gaṇhātīti attho. Manussā vipphaṇṣārīno na puna abhiharitvā pavārenti. So paccayehi kilamanto kammaṭṭhānaṃ gahetvā vaḍḍhetuṃ na sakkoti...pe... paribāhiro hoti.

Te na atirekapūjāya pūjetā hotīti so gopālako mahāusabhe viya te there bhikkhū imāya āvi ceva raho ca mettāya kāyakammādikāya atirekapūjāya na pūjeti. Tato therā, – “ime amhesu garucittikāraṃ na karontī”ti navake bhikkhū dvīhi saṅgahehi na saṅgaṇhanti, na āmisasaṅghaṇa cīvarena vā pattena vā pattapariyāpannena vā vasanaṭṭhānena vā. Kilamante milāyantepi nappaṭijagganti. Pāḷiṃ vā aṭṭhakathaṃ vā dhammakathābandhaṃ vā gūyhaṅgathaṃ vā na sikkhāpentī. Navakā therānaṃ santikā sabbaso ime dve saṅgahe alabhamānā imasmiṃ sāsane paṭiṭṭhātuṃ na sakkonti. Yathā tassa gopālakassa gogaṇo na vaḍḍhati, evaṃ sīlādīni na vaḍḍhanti. Yathā ca so gopālako pañcahi gorasehi paribāhiro hoti, evaṃ pañcahi dhammakhandhehi paribāhirā honti. Sukkapakkho kaṇhapakkhe vuttavipallāsavasena yojetvā vedītabboti.

Papañcasūdaniyā majjhimanikāyaṭṭhakathāya

Mahāgopālakasuttavaṇṇanā niṭṭhitā.

4. Cūlagopālakasuttavaṇṇanā

350. Evaṃ me sutanti cūlagopālakasuttaṃ. Tattha **ukkacelāyanti** evaṃnāmake nagare. Tasmim kira māpiyamāne rattim gaṅgāsotato maccho thalam patto. Manussā celāni telapātiyam temetvā ukkā katvā macchaṃ gaṇhiṃsu. Nagare niṭṭhite tassa nāmaṃ karonte amhehi nagaraṭṭhānassa gahitadivase celukkāhi maccho gahitoti **ukkacelā-tvevassa** nāmaṃ akaṃsu. **Bhikkhū āmantesīti** yasmim ṭhāne nisinnassa sabbā gaṅgā pākāṭā hutvā paññāyati, tādise vālikussade gaṅgātitthe sāyanhasamaye mahābhikkhusaṅghaparivuto nisīditvā mahāgaṅgaṃ paripuṇṇaṃ sandamānaṃ olovento, – “atthi nu kho imaṃ gaṅgaṃ nissāya koci pubbe vaḍḍhiparihāniṃ patto”ti āvajjitvā, pubbe ekaṃ bālagopālakam nissāya anekasatasahassā gogaṇā imissā gaṅgāya āvaṭṭe patitvā samuddameva pavitṭhā, aparaṃ pana paṇḍitagopālakam nissāya anekasatasahassagogaṇassa sotthi jātā vaḍḍhi jātā ārogyaṃ jātanti addasa. Disvā imaṃ kāraṇaṃ nissāya bhikkhūnaṃ dhammaṃ desessāmīti cintetvā bhikkhū āmantesi.

Māgadhakoti magadharatṭhavāsī. **Duppaññajātikoti** nippaññasabhāvo dandho mahājalo. **Asamavekkhitvāti** asallakkhetvā anupadhāretvā. **Patāresīti** tāretuṃ ārabhi. **Uttaraṃ tīraṃ suvidehānanti** gaṅgāya orime tīre magadharatṭhaṃ, pārime tīre videharatṭhaṃ, gāvo magadharatṭhato videharatṭhaṃ netvā rakkhissāmīti uttaraṃ tīraṃ patāresi. Taṃ sandhāya vuttaṃ – “uttaraṃ tīraṃ suvidehāna”nti. **Āmaṇḍalikaṃ karitvāti** maṇḍalikaṃ katvā. **Anayabyasanaṃ āpajjimsūti** avaḍḍhiṃ vināsaṃ pāpuṇiṃsu, mahāsamuddameva pavisiṃsu. Tena hi gopālakena gāvo otārentena gaṅgāya orimatīre samatitthaṇca visamatitthaṇca oloketabbaṃ assa, majjhe gaṅgāya gunnaṃ vissamaṭṭhānatthaṃ dve tīni vālikatthalāni sallakkhetabbāni assu. Tathā pārimatīre tīni cattāri tittāni, imasmā tittā bhaṭṭhā imaṃ tittāṃ gaṇhissanti, imasmā bhaṭṭhā imanti. Ayaṃ pana bālagopālako orimatīre gunnaṃ otaraṇatitthaṃ samaṃ vā visamaṃ vā anoloketvāva majjhe gaṅgāya gunnaṃ vissamaṭṭhānatthaṃ dve tīni vālikatthalānīpi asallakkhetvāva paratīre cattāri pañca uttaraṇatitthāni asamavekkhitvāva atittheneva gāvo otāresi. Athassa mahāusabho javanasampannatāya ceva thāmasampannatāya ca tiriyaṃ gaṅgāya sotaṃ chetvā pārīmaṃ tīraṃ patvā chinnataṭaṇceva kaṇṭakagumbagahanaṇca disvā, “dubbinivittāmetā”nti ṇatvā dhuragga-patitṭhānokāsampi alabhivā paṇinivatti. Gāvo mahāusabho nivatto mayampi nivattissāmīti nivattā. Mahato gogaṇassa nivattaṭṭhāne udakaṃ chijjitvā majjhe gaṅgāya āvaṭṭaṃ utṭhapesi. Gogaṇo āvaṭṭaṃ pavisitvā samuddameva patto. Ekopi goṇo arogo nāma nāhosi. Tenāha – “tattheva anayabyasanaṃ āpajjimsū”ti.

Akusalā imassa lokassāti idha loke khandhadhātāyatanesu akusalā achekā, paralokepi eseva nayo. **Māradheyyaṃ** vuccati tebhūmakadhammā. **Amāradheyyaṃ** nava lokuttaradhammā. **Maccudheyyampi** tebhūmakadhammāva. **Amaccudheyyaṃ** nava lokuttaradhammā. Tattha **akusalā** achekā. Vacanatthato pana mārasa dheyyaṃ **māradheyyaṃ**. **Dheyyanti** thānaṃ vatthu nivāso gocaro. **Maccudheyyepi** eseva nayo. **Tesanti** tesam evarūpānaṃ samaṇabrāhmaṇānaṃ, iminā cha sathāro dassitāti veditabbā.

351. Evaṃ kaṇhapakkhaṃ niṭṭhapetvā sukkapakkhaṃ dassento **bhūtapubbaṃ, bhikkhavetiādimāha**. Tattha **balavagāvoti** dantagoṇe ceva dhenuyo ca. **Dammagāvoti** dametabbagoṇe ceva avijjātagāvo ca. **Vacchatareti** vacchabhāvaṃ taritvā ṭhite balavavacche. **Vacchaketi** dhenupake taruṇavacchake. **Kisābalaketi** appamaṃsalohite mandathāme. **Tāvadeva jātakoti** taṃdivase jātako. **Mātugoravakena vuyhamānoti** mātā purato purato huṃhanti goravaṃ katvā saññaṃ dadamānā urena udakaṃ chindamānā gacchati, vacchako tāya goravasaññāya dhenuyā vā urena chinnodakena gacchamāno “mātugoravakena vuyhamāno”ti vuccati.

352. Mārassa sotaṃ chetvāti arahattamaggena mārasa taṇhāsotaṃ chetvā. **Pāraṃ gatāti** mahāusabhā nadīpāraṃ viya saṃsārapāraṃ nibbānaṃ gatā. **Pāraṃ agamaṃsūti** mahāusabhānaṃ pāraṅgatakkhaṇe gaṅgāya sotassa tayo koṭṭhāse atikkamma ṭhitā mahāusabhe pāraṃ patte disvā tesam gatamaggaṃ paṭipajjitvā pāraṃ agamaṃsu. **Pāraṃ gamissantīti** catumaggavajjhānaṃ kilesānaṃ tayo koṭṭhāse khepetvā ṭhitā idāni arahattamaggena avasesaṃ taṇhāsotaṃ chetvā balavagāvo viya nadīpāraṃ saṃsārapāraṃ nibbānaṃ gamissantīti. Iminā nayena sabbavāresu attho veditabbo. **Dhammānusārino, saddhānusārino**ti ime dve paṭhamamaggasamaṅgino.

Jānatāti sabbadhamme jānantena buddhena. **Suppākāsītōti** sukathito. **Vivaṭanti** vivaritaṃ.

Amatadvāranti ariyamaggo. **Nibbānapattiyāti** tadatthāya vivaṭaṃ. **Vinaḷikatanti** viḡatamānanaḷaṃ kataṃ. **Khemam patthethāti** kattukamyatāchandena arahattaṃ patthetha, kattukāmā nibbattetukāmā hothāti attho. “Patta’tthā”ṭipi pāṭho. Evarūpaṃ satthāraṃ labhivā tumhe pattāyeva nāmāti attho. Sesam sabbattha uttānameva. Bhagavā pana yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Cūḷagopālakasuttavaṇṇanā niṭṭhitā.

5. Cūḷasaccakasuttavaṇṇanā

353. Evaṃ me sutanti cūḷasaccakasuttaṃ. Tattha **mahāvane kūṭāgārasālāyanti** mahāvanaṃ nāma sayamjātaṃ aropimaṃ saporicchedaṃ mahantaṃ vanaṃ. Kapilavatthusāmantaṃ pana mahāvanaṃ himavanta saha ekābaddhaṃ aparicchedaṃ hutvā mahāsamuddaṃ āhacca ṭhitaṃ. Idaṃ tādisaṃ na hoti. Saporicchedaṃ mahantaṃ vananti **mahāvanaṃ. Kūṭāgārasālā** pana mahāvanaṃ nissāya kate ārāme kūṭāgāraṃ antokatvā haṃsavaṭṭakacchannena katā sabbākārasampannā buddhassa bhagavato gandhakuṭi veditabbā.

Saccako nigaṇṭhaputtoti pubbe kira eko nigaṇṭho ca nigaṇṭhī ca pañca pañca vādasatāni uggahetvā, vādaṃ āropessāmāti jambudīpe vicarantā vesāliyaṃ samāgatā. Licchavirājāno disvā, – “tvaṃ ko, tvaṃ kā”ṭi pucchimsu. Nigaṇṭho – “ahaṃ vādaṃ āropessāmāti jambudīpe vicarāmī”ṭi āha. Nigaṇṭhīpi tathā āha. Licchavino, “idheva aññamaññaṃ vādaṃ āropethā”ṭi āhaṃsu. Nigaṇṭhī attanā uggahitāni pañcavādasatāni pucchi, nigaṇṭho kathesi. Nigaṇṭhena pucchitepi nigaṇṭhī kathesiyeva. Ekassapi na jayo, na parājayo, ubho samasamāva ahesuṃ. Licchavino, – “tumhe ubhopi samasamā āhiṇḍitvā kiṃ karissatha, idheva vasathā”ṭi gehaṃ datvā baliṃ paṭṭhapesuṃ. Tesam samvāsamanvāya catasso dhītaro jātā, – ekā saccā nāma, ekā lolā nāma, ekā paṭācārā nāma, ekā ācāravatī nāma. Tāpi paṇḍitāva ahesuṃ, mātāpitūhi uggahitāni pañca pañca vādasatāni uggahesuṃ. Tā vayapattā mātāpitāro avocuṃ – “amhākaṃ ammā kule dārikā nāma hiraññasuvāṇṇādīni datvā kulagharaṃ pesitapubbā nāma natthi. Yo pana agāriko tāsam vādaṃ maddituṃ sakkoti, tassa pādaparicārikā honti. Yo pabbajito tāsam maddituṃ sakkoti, tassa santike pabbajanti. Tumhe kiṃ karissathā”ṭi? Mayampi evameva karissāmāti. Catassopi paribbājikavesam gahetvā, “ayaṃ jambudīpo nāma jambuyā paññāyati”ṭi jambusākhāṃ gahetvā cārikaṃ pakkamimsu. Yaṃ gāmaṃ pāpuṇanti, tassa dvāre paṃsupuṇje vā vālikapuṇje vā jambudhajaṃ ṭhapetvā, – “yo vādaṃ āropetuṃ sakkoti, so imaṃ maddatū”ṭi vatvā gāmaṃ pavisanti. Evaṃ gāmena gāmaṃ vicarantiyo sāvattim pāpuṇitvā tatheva gāmadvāre jambudhajaṃ ṭhapetvā sampattamanussānaṃ ārocetvā antonagaraṃ pavitṭhā.

Tena samayena bhagavā sāvattim nissāya jetavane viharati. Athāyasmā sārīputto gilāne pucchanto ajaggitaṭṭhānaṃ jagganto attano kiccamahantatāya aññehi bhikkhūhi divātaraṃ gāmaṃ piṇḍāya pavisanto gāmadvāre jambudhajaṃ disvā, – “kimida”ṭi dārake pucchi. Te tamatthaṃ ārocesuṃ. Tena hi maddathāti. Na sakkoma, bhante, bhāyāmāti. “Kumārā mā bhāyatha, kena amhākaṃ jambudhajo maddāpito”ṭi vutte, buddhasāvakena sārīputtattherena maddāpito, vādaṃ āropetukāmā jetavane therassa santikaṃ gacchathāti vadeyyāthā”ṭi āha. Te therassa vacanaṃ sutvā jambudhajaṃ madditvā chaḍḍesuṃ. Thero piṇḍāya caritvā vihāraṃ gato. Paribbājikāpi gāmato nikkhamitvā, “amhākaṃ dhajo kena maddāpito”ṭi pucchimsu. Dārikā tamatthaṃ ārocesuṃ. Paribbājikā puna gāmaṃ pavisitvā ekekaṃ vīthim gahetvā, – “buddhasāvako kira sārīputto nāma amhehi saddhim vādaṃ karissatī, sotukāmā nikkhamathā”ṭi ārocesuṃ. Mahājano nikkhami, tena saddhim paribbājikā jetavanaṃ agamimsu.

Thero – “amhākaṃ vasanaṭṭhāne mātugāmassa āgamaṇaṃ nāma aphāsuka”ṭi vihāramajjhe nisīdi. Paribbājikāyo gantvā theram pucchimsu – “tumhehi amhākaṃ dhajo maddāpito”ṭi? Āma, mayā maddāpitoti. Mayaṃ tumhehi saddhim vādaṃ karissāmāti. Sādhu karoṭha, kassa pucchā kassa vissajjanaṃ hotūti? Pucchā nāma amhākaṃ pattā, tumhe pana mātugāmā nāma paṭṭhamaṃ pucchathāti āha. Tā catassopi catūsu disāsu ṭhatvā mātāpitūnaṃ santike uggahitaṃ vādasahassaṃ pucchimsu. Thero khaggena kumudanāḷaṃ chindanto viya pucchitaṃ pucchitaṃ nijjaṭaṃ niggaṇṭhim katvā kathesi, kathetvā puna pucchathāti āha. Ettakameva, bhante, mayaṃ jānāmāti. Thero āha – “tumhehi vādasahassaṃ pucchitaṃ mayā kathitaṃ, ahaṃ pana ekaṃ yeve pañhaṃ pucchissāmi, taṃ tumhe kathethā”ṭi. Tā therassa visayaṃ disvā, “pucchatha, bhante, byākarissāmā”ṭi vattum nāsakkhimsu. “Vada, bhante, jānamānā byākarissāmā”ṭi puna āhaṃsu.

Thero ayam pana kulaputte pabbājetvā paṭhamam sikkhāpetabbapañhoti vatvā, – “ekam nāma ki”nti pucchi. Tā neva antam, na koṭim addasaṃsu. Thero kathethāti āha. Na passāma, bhanteti. Tumhehi vādasahassaṃ pucchitam mayā kathitam, mayham tumhe ekam pañhampi kathetum na sakkotha, evaṃ sante kassa jayo kassa parājayoti? Tumhākaṃ, bhante, jayo, amhākaṃ parājayoti. Idāni kiṃ karissathāti? Tā mātāpitūhi vuttavacanaṃ ārocetvā, “tumhākaṃ santike pabbajissāmā”ti āhaṃsu. Tumhe mātugāmā nāma amhākaṃ santike pabbajitum na vaṭṭati, amhākaṃ pana sāsanam gahetvā bhikkhuniupassayaṃ gantvā pabbajathāti. Tā sādhiṭi therassa sāsanam gahetvā bhikkhunisaṅghassa santikaṃ gantvā pabbajimsu. Pabbajitā ca pana appamattā ātāpiniyo hutvā nacirasseva arahattaṃ pāpuṃimsu.

Ayam saccako tāsam catunnampi kaniṭṭhabhātiko. Tāhi catūhipi uttaritarapañño, mātāpitūnampi santikā vādasahassaṃ, tato bahutarañca bāhiraśamayaṃ uggahetvā katthaci agantvā rājadārake sippaṃ sikkhāpento tattheva vesāliyaṃ vasati, paññāya atipūritattā kucchi me bhijjeyyāti bhīto ayapaṭṭena kucchiṃ parikkhipitvā carati, imaṃ sandhāya vuttaṃ “saccako nigaṇṭhaputto”ti.

Bhassappavādakoti bhassaṃ vuccati kathāmaggo, taṃ pavadati kathetīti bhassappavādako. **Paṇḍitavādoti** ahaṃ paṇḍitoti evaṃ vādo. **Sādhusammato bahujañassāti** yaṃ yaṃ nakkhattacārena ādisati, taṃ taṃ yebhuyyena tattheva hoti, tasmā ayam sādhuḷaddhiko bhaddakoti evaṃ sammato mahājanassa. **Vādena vādam samāradhoti** kathāmaggena dosaṃ āropito. **Āyasmā assajīti** sārīputtattherassa ācariyo assajitthero. **Jaṅghāvihāram anucaṅkamamānoti** tato tato licchavirājagehato taṃ taṃ gehaṃ gamanattāya anucaṅkamamāno. **Yenāyasmā assaji tenupasaṅkamīti** kasmā upasaṅkami? Samayaajānanatthaṃ.

Evaṃ kirassa ahosi – “ahaṃ ‘samaṇassa gotamassa vādam āropessāmī’ti āhiṇḍāmi, ‘samayaṃ panassa na jānāmī’ti na āropesiṃ. Parassa hi samayaṃ ṇatvā āropito vādo svāropito nāma hoti. Ayam pana samaṇassa gotamassa sāvako paññāyati assajitthero; so attano satthu samaye kovido, etāham pucchitvā katham patitṭhāpetvā samaṇassa gotamassa vādam āropessāmī”ti. Tasmā upasaṅkami. **Vinetīti** katham vineti, katham sikkhāpetīti pucchati. Thero pana yasmā dukkhanti vutte upārambhassa okāso hoti, maggaphalānīpi pariyāyena dukkhanti āgatāni, ayañca dukkhanti vutte theram puccheyya – “bho assaji, kimatthaṃ tumhe pabbajitā”ti. Tato “maggaphalattāyā”ti vutte, – “nayidaṃ, bho assaji, tumhākaṃ sāsanam nāma, mahāāghātanam nāmetam, nirayussado nāmesa, natthi tumhākaṃ sukhāsā, utṭhāyutṭhāya dukkhameva jirāpentā āhiṇḍathā”ti dosaṃ āropeyya, tasmā paravādissa pariyāyakatham kātum na vaṭṭati. Yathā esa appatitṭho hoti, evamassa nippariyāyakatham kathessāmīti cintetvā, “rūpaṃ, bhikkhave, anicca”nti imaṃ aniccānattavaseneva katham katheti. **Dussutanti** sotum ayuttaṃ.

354. Santhāgāretī rājakulānam atthānusāsanasanthāgārasālāyam. **Yena te licchavī tenupasaṅkamīti** evaṃ kirassa ahosi – “ahaṃ pubbe samayaṃ ajānanabhāvena samaṇassa gotamassa vādam na āropesiṃ, idāni panassa mahāsāvakena kathitam samayaṃ jānāmi, ime ca mama antevāsikā pañcasatā licchavī sannipatitā. Etehi saddhiṃ gantvā samaṇassa gotamassa vādam āropessāmī”ti tasmā upasaṅkami. **Ñātaññatarenāti** ñātesu abhiññātesu pañcavaggiyattheresu aññatarena. **Patitṭhitanti** yathā tena patitṭhitam. Sace evaṃ patitṭhissati, atha pana aññadeva vakkhati, tatra mayā kiṃ sakkā kātunti idāneva piṭṭhiṃ parivattento āha. **Ākaḍḍheyyāti** attano abhimukhaṃ kaḍḍheyya. **Parikaḍḍheyyāti** purato paṭiṇāmeyya. **Samparikaḍḍheyyāti** kālena ākaḍḍheyya, kālena parikaḍḍheyya. **Soṇḍikākilañjanti** surāghare piṭṭhakilañjam. **Soṇḍikādhuttoti** surādhutto. **Vālam kaṇṇe gahetvāti** surāparissāvanatthavikaṃ dhovitukāmo kasaṭanidhunanatthaṃ ubhosu kaṇṇesu gahetvā. **Odhuneyyāti** adhomukhaṃ katvā dhuneyya. **Niddhuneyyāti** uddhamukhaṃ katvā dhuneyya. **Nipphoṭeyyāti** punappunam papphoṭeyya. **Sāṇadhovikaṃ nāmāti** ettha manussā sāṇasāṭakakaraṇatthaṃ sāṇavāke gahetvā muṭṭhiṃ muṭṭhiṃ bandhitvā udake pakkhipanti. Te tatiyadvase suṭṭhu kilinnā honti. Atha manussā ambilayāgusurādīni ādāya tattha gantvā sāṇamuṭṭhiṃ gahetvā, dakkhiṇato vāmato sammukhā cāti tīsu phalakesu sakim dakkhiṇaphalake, sakim vāmaphalake, sakim sammukhaphalake paharantā ambilayāgusurādīni bhuñjantā pivantā khādantā dhovanti. Mahantā kīlā hoti. Rañño nāgo taṃ kīlam disvā gambhīram udakaṃ anupavisitvā soṇḍāya udakaṃ gahetvā sakim kumbhe sakim piṭṭhiyaṃ sakim ubhosu passesu sakim antarasathiyaṃ pakkhipanto kīlitta. Tadupādāya taṃ kīlitaṇṭam sāṇadhovikaṃ nāma vuccati, taṃ sandhāya vuttaṃ – “sāṇadhovikaṃ nāma kīlitaṇṭam kīlatī”ti. **Kim so bhavamāno saccako nigaṇṭhaputto, yo bhagavato vādam āropessatīti** yo saccako nigaṇṭhaputto bhagavato vādam āropessati, so kiṃ bhavamāno kiṃ yakkho bhavamāno udāhu indo, udāhu brahmā bhavamāno bhagavato vādam āropessati? Na hi sakkā pakatimanussena bhagavato vādam āropetunti ayamettha adhippāyo.

355. Tena kho pana samayenāti yasmim samaye saccako ārāmaṃ pāvīsi, tasmim. Kismim pana samaye pāvīsīti? Mahāmajjhanhikasamaye. Kasmā pana tasmim samaye caṅkamantīti? Paṇṭabhojanapaccayassa thinamiddhassa vinodanattamaṃ. Divāpadhānikā vā te. Tādisānañhi pacchābhattaṃ caṅkamitvā nhatvā sarīraṃ utuṃ gaṇhāpetvā nisajja samaṇadhammaṃ karontānaṃ cittaṃ ekaggaṃ hoti. **Yena te bhikkhūti** so kira kuhiṃ samaṇo gotamoti pariveṇato pariveṇaṃ gantvā pucchitvā pavisissāmīti vilokento araññe hatthī viya caṅkame caṅkamamāne paṃsukūlikabhikkhū disvā tesam santikaṃ agamāsi. Taṃ sandhāya, “yena te bhikkhū”tiādi vuttaṃ. **Kaḥaṃ nu kho, bhoti** katarasmim āvāse vā maṇḍape vāti attho. **Esa, aggivessana, bhagavāti** tadā kira bhagavā paccūsakāle mahākaruṇā samāpattim samāpajjitvā dasasahassacakkavāḷe sabbaññutaññāṇajālaṃ pattharivā bodhaneyyasattaṃ olokeno addasa – “sve saccako nigaṇṭhaputto mahatim licchaviparisam gahetvā mama vādaṃ āropetukāmo āgamissatī”ti. Tasmā pātova sarīrapaṭṭijagganaṃ katvā bhikkhusaṅghaparivāro vesāliyaṃ piṇḍāya caritvā piṇḍapātaṭṭikkanto mahāparisāya nisīdituṃ sukhaṭṭhāne nisīdissāmīti gandhakuṭim apavisitvā mahāvane aññatarasmim rukkhamaṇe divāvihāraṃ nisīdi. Te bhikkhū bhagavato vattaṃ dassetvā āgatā, saccakena puṭṭhā dūre nisinnaṃ bhagavantaṃ dassentā, “esa aggivessana bhagavā”ti āhaṃsu.

Mahatiyā licchaviparisāya saddhinti heṭṭhā pañcamattehi licchavisatehi parivutoti vuttaṃ. Te etassa antevāsikāyeva, antovesāliyaṃ pana saccako pañcamattāni licchavirājasatāni gahetvā, “vādatthiko bhagavantaṃ upasaṅkamanto”ti sutvā dvinnaṃ paṇḍitānaṃ kathāsallāpaṃ sossāmāti yebhuyyena manussā nikkhantā, evaṃ sā parisā mahatī aparicchinnagaṇaṇā ahoṣi. Taṃ sandhāyetaṃ vuttaṃ. **Añjalim paṇāmetvāti** ete ubhatopakkhikā, te evaṃ cintesuṃ – “sace no micchādīṭṭhikā codessanti, ‘kasmā tumhe samaṇaṃ gotamaṃ vanditthā’ti, tesam, ‘kiṃ añjalimattakaraṇe napi vanditaṃ hotī’ti vakkhāma. Sace no sammādīṭṭhikā codessanti, ‘kasmā bhagavantaṃ na vanditthā’ti, ‘kiṃ sīsenā bhūmim paharanteneva vanditaṃ hoti, nanu añjalikammampi vandanā evā’ti vakkhāmā”ti. **Nāma gottanti**, bho gotama, ahaṃ asukassa putto datto nāma mitto nāma idha āgatoti vadantā nāmaṃ sāventi nāma. Bho gotama, ahaṃ vasiṭṭho nāma kaccāno nāma idha āgatoti vadantā gottaṃ sāventi nāma. Ete kira daliddā jīṇṇakulaputtā parisamajjhe nāmagottavasena pākaṭṭha bhavissāmāti evaṃ akāṃsu. Ye pana tuṇhībhūtā nisīdiṃsu, te kerāṭṭikā ceva andhabālā ca. Tattha kerāṭṭikā, “ekaṃ dve kathāsallāpe karonto vissāsiko hoti, atha vissāse satī ekaṃ dve bhikkhā adātuṃ na yutta”nti tato attānaṃ mocentā tuṇhī nisīdanti. Andhabālā aññāṇatāyeva avakkhittamattikāpiṇḍo viya yattha katthaci tuṇhībhūtā nisīdanti.

356. Kiñcīdeva desanti kañci okāsaṃ kiñci kāraṇaṃ, athassa bhagavā pañhapucchane ussāhaṃ janento āha – **puccha, aggivessana, yadākañkhasīti**. Tassattho – “puccha yadi ākañkhasi, na me pañhavissajjane bhāro atthi”. Atha vā “puccha yaṃ ākañkhasi, sabbaṃ te vissajjessāmī”ti sabbaññupavāraṇaṃ pavāresi asādhāraṇaṃ paccekabuddhaaggasāvamaḥāsāvakehi. Te hi yadākañkhasīti na vadanti, sutvā vedissāmāti vadanti. Buddhā pana “pucchāvuso, yadākañkhasī”ti (saṃ. ni. 1.237) vā, “puccha, mahārāja, yadākañkhasī”ti (dī. ni. 1.162) vā,

“Puccha vāsava maṃ pañhaṃ, yaṃ kiñci manasicchasi;
Tassa tasseva pañhassa, ahaṃ antaṃ karomi te” itī. (dī. ni. 2.356) vā,

“Tena hi tvam, bhikkhu, sake āsane nisīditvā puccha yadākañkhasī”ti (ma. ni. 3.85) vā,

“Bāvarissa ca tuyhaṃ vā, sabbesaṃ sabbasaṃsayaṃ;
Katāvakāsā pucchavho, yaṃ kiñci manasicchathā”ti. (su. ni. 1036) vā,

“Puccha maṃ sabhiya pañhaṃ, yaṃ kiñci manasicchasi;
Tassa tasseva pañhassa, ahaṃ antaṃ karomi te” itī. (su. ni. 517) vā –

Tesaṃ tesaṃ yakkhanarindadevasamaṇabrāhmaṇaparibbājānaṃ sabbaññupavāraṇaṃ pavārenti. Anacchariyañcetamaṃ, yaṃ bhagavā buddhabhūmim patvā etaṃ pavāraṇaṃ pavāreyya. Yo bodhisattabhūmiyaṃ padesaññepi ṭhito

“Koṇḍañña pañhāni viyākarohi,
Yācanti taṃ isayo sādhurūpā;
Koṇḍañña eso manujesu dhammo,
Yaṃ vuddhamāgacchati esa bhāro”ti. (jā. 2.17.60) –

Evam sakkādīnaṃ atthāya isīhi yācīto

“Katāvakāsā pucchantu bhonto,
Yaṃ kiñci pañhaṃ manasābhipatthitaṃ;
Ahañhi taṃ taṃ vo viyākarissaṃ,
Ñatvā sayam lokamimaṃ parañcā”ti. (jā. 2.17.61);

Evam sarabhaṅgakāle, sambhavajātake ca sakalajambudīpaṃ tikkhattuṃ vicarivā pañhānaṃ antakaraṃ adisvā suciratenā brāhmaṇena pañhaṃ puṭṭho okāse kārīte, jātiyā sattavasso rathikāyaṃ paṃsuṃ kīlanto pallaṅkaṃ ābhujitvā antaravīthiyaṃ nisinnova –

“Taggha te ahamakkhissaṃ, yathāpi kusalo tathā;
Rājā ca kho taṃ jānāti, yadi kāhati vā na vā”ti. (jā. 1.16.172) –

Sabbaññupavāraṇaṃ pavāresi.

Evam bhagavatā sabbaññupavāraṇāya pavāritāya attamanaṃ pañhaṃ pucchanto, “kathaṃ pana, bho gotamā”tiādīmāha.

Athassa bhagavā, “passatha, bho, aññaṃ sāvakena kathitaṃ, aññaṃ sathā katheti, nanu mayā paṭikacceva vuttaṃ, ‘sace tathā paṭiṭṭhissati, yathāssa sāvakena paṭiṭṭhitaṃ, evāhaṃ vādaṃ āropessāmī’ti. Ayaṃ pana aññaṃeva katheti, tatha kiṃ mayā sakkā kātu’nti evaṃ nigaṇṭhassa vacanokāso mā hotūti heṭṭhā assajittherena kathitaniyāmena kathento, **evaṃ kho ahaṃ, aggivessanā**tiādīmāha. **Upamā maṃ, bho gotama, paṭibhātī**, bho gotama, mayhaṃ ekā upamā upaṭṭhāti, āharāmi taṃ upamanti vadati. **Paṭibhātu taṃ, aggivessanā**ti upaṭṭhātu te, aggivessana, āhara taṃ upamaṃ visatthoti bhagavā avoca. **Balakaraṇiyāti** bāhubalena kattabbā kasivāññijādikā kammantā. **Rūpattāyaṃ purisapuggaloti** rūpaṃ attā assāti **rūpattā**, rūpaṃ attāti gahetvā ṭhitapuggalaṃ dīpeti. **Rūpe paṭiṭṭhāyāti** tasmīṃ attāti gahitarūpe paṭiṭṭhahitvā. **Puññaṃ vā apuññaṃ vā pasavatīti** kusalaṃ vā akusalaṃ vā paṭilabhati. **Vedanattādīsūpi** eseva nayo. Iminā kiṃ dīpeti? Ime pañcakkhandhā imesaṃ sattānaṃ pathavī viya paṭiṭṭhā, te imesu pañcasu khandhesu paṭiṭṭhāya kusalākusalakammaṃ nāma āyūhanti. Tumhe evarūpaṃ vijjamaṇameva attānaṃ paṭisedhento pañcakkhandhā anattāti dīpethāti ativiya sakāraṇaṃ katvā upamaṃ āhari. Iminā ca nigaṇṭhena āhaṭaopammaṃ niyatameva, sabbaññubuddhato añño tassa kathaṃ chinditvā vāde dosaṃ dātuṃ samattho nāma natthi. Duvidhā hi puggalā buddhaveneyyā ca sāvakaveneyyā ca. Sāvakaveneyye sāvakāpi vinenti buddhāpi. Buddhaveneyye pana sāvakā vinetuṃ na sakkonti, buddhāva vinenti. Ayampi nigaṇṭho buddhaveneyyo, tasmā etassa vādaṃ chinditvā añño dosaṃ dātuṃ samattho nāma natthi. Tenassa bhagavā sayameva vāde dosadassanattaṃ **nanu tvaṃ, aggivessanā**tiādīmāha.

Atha nigaṇṭho cintesi – “ativiya samaṇo gotamo mama vādaṃ paṭiṭṭhapeti, sace upari koci doso bhavissati, mamaṃ ekakaṃyeva niggaṇhissati. Handāhaṃ imaṃ vādaṃ mahājanassāpi matthake pakkhipāmī”ti, tasmā evamāha – **ahampi, bho gotama, evaṃ vadāmi rūpaṃ me attā...pe... viññānaṃ me attāti, ayañca mahatī janatāti**. Bhagavā pana nigaṇṭhato satagaṇeṇapi sahasagaṇeṇapi satahasagaṇeṇapi vādīvarataro, tasmā cintesi – “ayaṃ nigaṇṭho attānaṃ mocetvā mahājanassa matthake vādaṃ pakkhipati, nāssa attānaṃ mocetuṃ dassāmi, mahājanato nivattetvā ekakaṃyeva naṃ niggaṇhissāmī”ti. Atha naṃ **kiñhi te, aggivessanā**tiādīmāha. Tassattho – nāyaṃ janatā mama vādaṃ āropetuṃ āgatā, tvaṃyeva sakalaṃ vesālīṃ samvattitvā mama vādaṃ āropetuṃ āgato, tasmā tvaṃ sakameva vādaṃ niveṭhehi, mā mahājanassa matthake pakkhipasīti. So paṭijānanto **ahañhi, bho gotamā**tiādīmāha.

357. Iti bhagavā nigaṇṭhassa vādaṃ paṭiṭṭhapetvā, **tena hi, aggivessanā**ti puccham ārabhi. Tatha **tena hīti** kāraṇatthe nipāto. Yasmā tvaṃ pañcakkhandhe attato paṭijānāsi, tasmāti attho. **Sakasmīṃ vijiteti** attano raṭṭhe. **Ghātetāyaṃ vā ghātetunti** ghātārahaṃ ghātetabbayuttakaṃ ghātetuṃ. **Jāpetāyaṃ vā jāpetunti** dhanajānīrahaṃ jāpetabbayuttaṃ jāpetuṃ jīṇṇadhaṇaṃ kātuṃ. **Pabbājetāyaṃ vā pabbājetunti** sakaraṭṭhato pabbājanārahaṃ pabbājetuṃ, nīharituṃ. **Vattituñca arahatīti** vattati ceva vattituñca arahati. Vattituṃ yuttoti dīpeti. Iti nigaṇṭho attano vādabhedanattaṃ āhaṭakāraṇameva attano māraṇatthāya āvudhaṃ tikhiṇaṃ karonto viya visesetvā dīpeti, yathā taṃ bālo. **Evaṃ me rūpaṃ hotūti** mama rūpaṃ evaṃvidhaṃ hotu, pāsādikaṃ

abhirūpaṃ alaṅkatappaṭiyattaṃ suvaṇṇatoranaṃ viya susajjitacittapaṭo viya ca manāpadassananti. **Evam me rūpaṃ mā ahoṣīti** mama rūpaṃ evaṃvidhaṃ mā hotu, dubbaṇṇaṃ dussaṇṭhitaṃ valitapalitaṃ tilakasamākiṇṇanti.

Tuṇhī ahoṣīti nigaṇṭho imasmiṃ ṭhāne viraddhabhāvaṃ ṇatvā, “samaṇo gotamo mama vādaṃ bhindanattāya kāraṇaṃ āhari, ahaṃ bālatāya tameva visesetvā dīpesiṃ, idāni naṭṭhomhi, sace vattatīti vakkhāmi, ime rājāno uṭṭhahitvā, ‘aggivessana, tvaṃ mama rūpe vaso vattatīti vadasi, yadi te rūpe vaso vattati, kasmā tvaṃ yathā ime licchavirājāno tāvatimsadevasadisehi attabhāvehi virocanti abhirūpā pāsādikā, evaṃ na virocasi’ti. Sace na vattatīti vakkhāmi, samaṇo gotamo uṭṭhahitvā, ‘aggivessana, tvaṃ pubbe vattati me rūpasmim vasoti vatvā idāni paṭikkhipasi’ti vādaṃ āropessati. Iti vattatīti vuttepi eko doso, na vattatīti vuttepi eko doso’ti tuṇhī ahoṣi. Dutiyampi bhagavā pucchi, dutiyampi tuṇhī ahoṣi. Yasmā pana yāvataṭiyam bhagavatā pucchite abyākarontassa sattadhā muddhā phalati, buddhā ca nāma sattānaṃyeva atthāya kappasatasahassādhikāni cattāri asankhyeyyāni pāramīnaṃ pūritattā sattesu balavaanuddayā honti. Tasmā yāvataṭiyam apucchitvā atha kho bhagavā saccakaṃ nigaṇṭhaputtaṃ etadavoca – etaṃ “byākarohī dānī”tiādivacanaṃ avoca.

Tattha **sahadhammikanti** sahetukaṃ sakāraṇaṃ. Vajiraṃ paṇimhi assāti **vajirapāṇi**. **Yakkhoti** na yo vā so vā yakkho, sakko devarājāti veditabbo. **Ādittanti** aggivaṇṇaṃ. **Sampajjalitanti** suṭṭhu pajjalitaṃ. **Sajotibhūṭanti** samantato jotibhūtaṃ, ekaggijālabhūṭanti attho. **Ṭhito hotīti** mahantaṃ sīsaṃ, kandalamakulasadisā dāṭhā, bhayānakāni akkhināsādnīti evaṃ virūparūpaṃ māpetvā ṭhito. Kasmā panesa āgatoti? Dīṭṭhivissajjāpanatthaṃ. Apica, “ahañceva kho pana dhammaṃ deseyyaṃ, pare ca me na ājāneyyu”nti evaṃ dhammadesanāya appossukkabhāvaṃ āpanne bhagavatī sakko mahābrahmunā saddhim āgantvā, “bhagavā dhammaṃ desetha, tumhākaṃ āṇāya avattamāne mayaṃ vattāpessāma, tumhākaṃ dhammacakkaṃ hotu, amhākaṃ āṇācakka”nti paṭiññamakāsi. Tasmā “ajja saccakaṃ tāsetvā pañhaṃ vissajjāpessāmī”ti āgato.

Bhagavā ceva passati, saccako ca nigaṇṭhaputtoti yadi hi taṃ aññepi passeyyuṃ. Taṃ kāraṇaṃ agaru assa, “samaṇo gotamo saccakaṃ attano vāde anotarantaṃ ṇatvā yakkhaṃ āvāhetvā dassesi, tato saccako bhayena kathesi”ti vadeyyuṃ. Tasmā bhagavā ceva passati saccako ca. Tassa taṃ disvāva sakalasarīrato sedā muccimsu, antokucchi viparivattamānā mahāraṇaṃ ravi. So “aññepi nu kho passanti”ti olokeno kassaci lomahaṃsamattampi na addasa. Tato – “idaṃ bhayaṃ mameva uppannaṃ. Sacāhaṃ yakkhoti vakkhāmi, ‘kiṃ tuyhameva akkhīni atthi, tvameva yakkhaṃ passasi, paṭhamaṃ yakkhaṃ adisvā samaṇena gotamena vādasānghāte khittova yakkhaṃ passasi’ti vadeyyu”nti cintetvā – “na dāni me idha aññaṃ paṭisaraṇaṃ atthi, aññatra samaṇā gotamā”ti maññaṃāno, atha kho saccako nigaṇṭhaputto...pe... bhagavantaṃ etadavoca. **Tāṇaṃ gavesīti** tāṇanti gavesamāno. **Leṇaṃ gavesīti** leṇanti gavesamāno. **Saraṇaṃ gavesīti** saraṇanti gavesamāno. Ettha ca tāyati rakkhatīti **tāṇaṃ**. Nilīyanti etthāti **leṇaṃ**. Saraṭīti **saraṇaṃ**, bhayaṃ hiṃsati viddhaṃsetīti attho.

358. Manasi karitvāti manamhi katvā paccavekkhitvā upadhāretvā. **Evam me vedanā hotūti** kusalāva hotu, sukhāva hotu. **Evam me saññā hotūti** kusalāva hotu, sukhāva hotu, somanassasampayuttāva hotūti. **Saṅkhāravīññāpesu**pi eseva nayo. **Mā ahoṣīti** ettha pana vuttavipariyāyena attho veditabbo. **Kallaṃ nūti** yuttaṃ nu. **Samanupassitunti** “etaṃ mama esohamasmi eso me attā”ti evaṃ taṇhāmānadiṭṭhivasena passituṃ. **No hidam, bho gotamāti** na yuttametaṃ, bho gotama. Iti bhagavā yathā nāma cheko ahitūṇḍiko sappadaṭṭhavisamaṃ teneva sappena puna ḍaṃsāpetvā ubbāheyya, evaṃ tassaṃyeva parisati saccakaṃ nigaṇṭhaputtaṃ teneva mukhena pañcakkhandhā aniccā dukkhā anattāti vadāpesi. **Dukkhaṃ allīnoti** imaṃ pañcakkhandhadukkhaṃ taṇhādiṭṭhīhi allīno. **Upagato ajjhositotipi** taṇhādiṭṭhivaseneva veditabbo. **Dukkhaṃ etaṃ mamāti**ādīsu pañcakkhandhadukkhaṃ taṇhāmānadiṭṭhivasena samanupassatīti attho. **Parijāneyyāti** aniccaṃ dukkhaṃ anattāti tīraṇapariññāya parito jāneyya. **Parikkhepetvāti** khayam vayaṃ anuppādaṃ upanetvā.

359. Navanti taruṇaṃ. Akukkukajātanti pupphaggahaṇakāle anto aṅguṭṭhappamaṇo eko ghanadaṇḍako nibbattati, tena virahitanti attho. **Rittoti** suñño antosāravirahito. Rittattāva **tuccho**. **Aparaddhoti** parājito. **Bhāsītā kho pana teti** idaṃ bhagavā tassa mukharabhāvaṃ pakāsetvā niggaṇhanto āha. So kira pubbe pūraṇādayo cha satthāro upasankamitvā pañhaṃ pucchati. Te vissajjetuṃ na sakkonti. Atha nesam

parisamajjhe mahantaṃ vippakāraṃ āropetvā uttāhāya jayaṃ pavedento gacchati. So sammāsambuddhampi tatheva viheṭhessāmīti saññāya upasaṅkamitvā –

“Ambho ko nāma yaṃ rukkho, sinnapatto sakaṅṭako;
Yattha ekappahārena, uttamaṅgaṃ vibhijjita’nti.

Ayaṃ khadiraṃ āhacca asārarukkhaparicito mudutuṅḍasakuṇo viya sabbaññutaññāṇasāraṃ āhacca ñāṇatuṅḍabhedam patto sabbaññutaññāṇassa thaddhabhāvaṃ aññāsī. Tadassa parisamajjhe pakāsento **bhāsītā kho pana tetiādīmāha. Natthi etarahīti** upādinnaṅkarāre sedo nāma natthīti na vattabbaṃ, etarahi pana natthīti vadati. **Suvaṇṇavaṇṇaṃ kāyaṃ vivarīti** na sabbaṃ kāyaṃ vivari. Buddhā nāma gaṅṭhikaṃ paṭimuṅcivā paṭicchannasārīrā parisati dhammaṃ desenti. Atha bhagavā galavāṭakasammukhaṭṭhāne cīvaram gahevā caturaṅgulamattaṃ otāresi. Otāritamatte pana tasmim suvaṇṇavaṇṇā rasmiyo puñjapuñjā hutvā suvaṇṇaghaṭato rattasuvaṇṇarasadhārā viya, rattavaṇṇavalāhakato vijjulātā viya ca nikkhamitvā suvaṇṇamurajasadisam mahākhandham uttamasiram padakkhiṇaṃ kurumānā ākāse pakkhandimsu. Kasmā pana bhagavā evamakāsīti? Mahājanassa kaṅkhāvinodanattaṃ. Mahājano hi samaṇo gotamo mayhaṃ sedo natthīti vadati, saccakassa tāva nigaṅṭhaputtassa yantāruḷhassa viya sedā paggharanti. Samaṇo pana gotamo ghanadupaṭṭacīvaram pārupitvā nisinno, anto sedassa atthitā vā natthitā vā kathaṃ sakkā ñātunti kaṅkhaṃ kareyya, tassa kaṅkhāvinodanattaṃ evamakāsī. **Maṅkubhūtoti nittejabhūto. Pattakkhandhoti** patitakkhandho. **Appaṭibhānoti** uttari appassanto. **Nisīdīti** pādaṅguṭṭhakena bhūmim kasamāno nisīdi.

360. Dummukhoti na virūpamukho, abhirūpo hi so pāsādiko. Nāmaṃ panassa etaṃ. **Abhabbo taṃ pokkharaniṃ puna otaritunti** sabbesaṃ aḷānaṃ bhaggatā pacchinnagamano otarituṃ abhabbo, tattheva kākakulalādīnaṃ bhattaṃ hotīti dasseti. **Visūkāyikanīti** diṭṭhivisūkāni. **Visevitānīti** diṭṭhisāñcaritāni. **Vipphanditānīti** diṭṭhivipphanditāni. **Yadidaṃ vādāhippāyoti** ettha **yadidanti** nipātamattaṃ; vādāhippāyo hutvā vādaṃ āropessāmīti ajjhāsayena upasaṅkamituṃ abhabbo; dhammassavanāya pana upasaṅkameyyāti dasseti. **Dummukhaṃ licchaviputtaṃ etadavocāti** kasmā avoca? Dummukhassa kirassa upamāharaṇakāle sesa licchavikumārāpi cintesuṃ – “iminā nigaṅṭhena amhākaṃ sippuggahaṇaṭṭhāne ciraṃ avamāno kato, ayaṃ dāni amittassa piṭṭhim passituṃ kālo. Mayampi ekekaṃ upamaṃ āharitvā paṇippahārena patitaṃ muggarena pothento viya tathā naṃ karissāma, yathā na puna parisamajjhe sīsaṃ ukkhipituṃ sakkhissatī’nti, te opammāni karitvā dummukhassa kathāpariyosānaṃ āgamayamānā nisīdimsu. Saccako tesam adhippāyaṃ ñatvā, ime sabbeva gīvaṃ ukkhipitvā oṭṭhehi calamānehi ṭhitā; sace paccekā upamā harituṃ labhissanti, puna mayā parisamajjhe sīsaṃ ukkhipituṃ na sakkā bhavissati, handāhaṃ dummukhaṃ apasādetvā yathā aññassa okāso na hotī, evaṃ kathāvāraṃ pacchinditvā samaṇaṃ gotamaṃ pañhaṃ pucchissāmīti tasmā etadavoca. Tattha **āgamehīti** tiṭṭha, mā puna bhañhīti attho.

361. Tiṭṭhatesā, bho gotamāti, bho gotama, esā amhākañceva aññesañca puthusamaṇabrāhmaṇānaṃ vācā tiṭṭhatu. **Vilāpaṃ vilapitaṃ maññeti** etañhi vacanaṃ vilapitaṃ viya hoti, vippalapitamattaṃ hotīti attho. Atha vā **tiṭṭhatesāti** ettha kathāti āharitvā vattabbā. **Vācāvilāpaṃ vilapitaṃ maññeti** ettha panidaṃ vācānicchāraṇaṃ vilapitamattaṃ maññe hotīti attho.

Idāni pañhaṃ pucchanto **kittāvatāti**ādīmāha. Tattha **vesārajapattoti** ñāṇapatto. **Aparappaccayoti** aparappattiyo. Athassa bhagavā pañhaṃ vissajjento **idha, aggivessanāti**ādīmāha, taṃ uttānatthameva. Yasmā panettha passatīti vuttatā sekkhabhūmi dassitā. Tasmā uttari asekkhabhūmim pucchanto dutiyaṃ pañhaṃ pucchi, tampissa bhagavā byākāsī. Tattha **dassanānuttariyenāti**ādīsū **dassanānuttariyanti** lokiyalokuttarā paññā. **Paṭipadānuttariyanti** lokiyalokuttarā paṭipadā. **Vimuttānuttariyanti** lokiyalokuttarā vimutti. Suddhalokuttarameva vā gahetvā **dassanānuttariyanti** arahattamaggasammādiṭṭhi. **Paṭipadānuttariyanti** sesāni maggaṅgāni. **Vimuttānuttariyanti** aggaphalavimutti. Khīṇāsavassa vā nibbānadassanaṃ **dassanānuttariyaṃ** nāma. Maggaṅgāni **paṭipadānuttariyaṃ**. Aggaphalaṃ **vimuttānuttariyanti** veditabbaṃ. **Buddho so bhagavāti** so bhagavā sayampi cattāri saccāni buddho. **Bodhāyāti** paresampi catusaccabodhāya dhammaṃ deseti. **Dantoti**ādīsū **dantoti** nibbisevano. **Damathāyāti** nibbisevanatthāya. **Santoti** sabbakilesavūpasamena santo. **Samathāyāti** kilesavūpasamāya. **Tiṇṇoti** caturoghatiṇṇo. **Taraṇāyāti** caturoghatarāṇāya. **Parinibbutoti** kilesaparinibbānena parinibbuto. **Parinibbānāyāti** kilesaparinibbānatthāya.

362. Dhaṃsīti guṇadhamsakā. **Pagabbāti** vācāpāgabbiyena samannāgatā. **Āsādetabbanti** ghaṭṭetabbaṃ.

Āsajjāti ghaṭṭetvā. **Natveva bhavantam gotamanti** bhavantam gotamam āsajja kassaci attano vādam anupahatam sakalam ādāya pakkamitum thāmo natthīti dasseti. Na hi bhagavā hatthiādayo viya kassaci jīvitantarāyam karoti. Ayam pana nigaṇṭho imā tisso upamā na bhagavato ukkaṃsanattham āhari, attukkaṃsanatthameva āhari. Yathā hi rājā kañci paccatthikam ghātetvā evam nāma sūro evam thāmasampanno puriso bhavissatīti paccatthikam thomentopi attānameva thometi. Evameva sopi **siyā hi, bho gotama, hatthim pabhinnanti**ādīhi bhagavantam ukkaṃsentopi mayameva sūrā mayam paṇḍitā mayam bahussutāyeva evam pabhinnahatthim viya, jalitaaggikkhandham viya, phaṇakataāsīvisam viya ca vādathikā sammāsambuddham upasaṅkamimhāti attānameveva ukkaṃseti. Evam attānam ukkaṃsetvā bhagavantam nimantayamāno **adhivāsetu meti**ādīmāha. Tattha **adhivāsetūti** sampaṭicchatu. **Svātanāyāti** yam me tumhesu kāram karoto sve bhavissati puññañca pītipāmojjañca, tadatthāya. **Adhivāsesi bhagavā tuṇhībhāvenāti** bhagavā kāyaṅgam vā vācaṅgam vā acopetvā abhantareyeva khantim dhārento tuṇhībhāvena adhivāsesi. Saccakassa anuggahakaraṇattham manasāva sampaṭicchīti vuttam hoti.

363. Yamassa patirūpaṃ maññeyyāthāti te kira licchavī tassa pañcathālīpākasatāni niccabhattam āharanti. Tadeva sandhāya esa sve tumhe yam assa samaṇassa gotamassa patirūpaṃ kappiyanti maññeyyātha, tam āhareyyātha; samaṇassa hi gotamassa tumhe paricārakā kappiyā kappiyam yuttāyuttam jānāthāti vadati. **Bhattābhīhāram abhiharimsūti** abhiharitabbaṃ bhattam abhiharimsu. **Pañitenāti** uttamena. **Sahatthāti** sahatthena. **Santappetvāti** suṭṭhu tappetvā, paripuṇṇam suhitam yāvadattham katvā. **Sampavāretvāti** suṭṭhu pavāretvā, alam alanti hatthasaññāya paṭikkhipāpetvā. **Bhuttāvinti** bhuttavantam. **Onītapattapāṇinti** pattato onītapāṇim, apanītahatthanti vuttam hoti. “Onītapattapāṇi” ntipi pāṭho, tassattho, onītam nānābhūtam pattam pāṇito assāti onītapattapāṇī. Tam onītapattapāṇim, hatthe ca pattañca dhovivā ekamante pattam nikkhipivā nisinnanti attho. **Ekamantam nisīdīti** bhagavantam evambhūtam űatvā ekasmiṃ okāse nisīdīti attho. **Puññañcāti** yam imasmiṃ dāne puññaṃ, āyatim vipākakkhandhāti attho. **Puñña mahīti** vipākakkhandhānameveva parivāro. **Tam dāyakānam sukhāya hotūti** tam imesaṃ licchavīnam sukhathāya hotu. Idaṃ kira so aham pabbajito nāma, pabbajitena ca na yuttam attano dānam niyyātetunti tesam niyyātentō evamāha. Atha bhagavā yasmā licchavīhi saccakassa dinnam, na bhagavato. Saccakena pana bhagavato dinnam, tasmā tamattham dīpento **yam kho, aggivessanāti**ādīmāha. Iti bhagavā nigaṇṭhassa matena vināyeva attano dinnam dakkhiṇam nigaṇṭhassa niyyātesī, sā cassa anāgate vāsana bhavissatīti.

Papañcasūdaniyā majjhimanikāyaṭṭhakathāya

Cūlasaccakasuttavaṇṇanā niṭṭhitā.

6. Mahāsaccakasuttavaṇṇanā

364. Evam me sutanti mahāsaccakasuttam. Tattha **ekam samayanti** ca **tena kho pana samayenāti** ca **pubbaṇhasamayanti** ca tīhi padehi ekova samayo vutto. Bhikkhūnañhi vattapaṭipattim katvā mukham dhovivā pattacīvaramādāya cetiyam vandivā kataram gāmaṃ pavisissāmāti vitakkamālake ṭhitakālo nāma hoti. Bhagavā evarūpe samaye rattadupaṭṭam nivāsetvā kāyabandhanam bandhitvā paṃsukūlacīvaram ekaṃsam pārupitvā gandhakuṭito nikkhamma bhikkhusaṅghaparivuto gandhakuṭipamukhe aṭṭhāsī. Tam sandhāya, – “ekam samayanti ca tena kho pana samayenāti ca pubbaṇhasamaya” nti ca vuttam. **Pavisitukāmoti** piṇḍāya pavisissāmīti evam katasanniṭṭhāno. **Tenupasaṅkamīti** kasmā upasaṅkamīti? Vādāropanajjhāsayena. Evam kirassa ahosi – “pubbepāham apaṇḍitatāya sakalam vesālīparisaṃ gahetvā samaṇassa gotamassa santikam gantvā parisamajjhe maṅku jāto. Idāni tathā akatvā ekakova gantvā vadam āropessāmi. Yadi samaṇam gotamam parājetum sakkhissāmi, attano laddhim dīpetvā jayam karissāmi. Yadi samaṇassa gotamassa jayo bhavissati, andhakāre naccam viya na koci jānissatī” ti niddāpañham nāma gahetvā iminā vādajjhāsayena upasaṅkami.

Anukampaṃ upādāyāti saccakassa nigaṇṭhaputtassa anukampaṃ paṭicca. Therassa kirassa evam ahosi – “bhagavati muhuttam nisinne buddhadassanam dhammassavanañca labhissati. Tadassa dīgharattam hitāya sukhāya samvattissatī” ti. Tasmā bhagavantam yācitvā paṃsukūlacīvaram catugguṇam paññāpetvā **nisīdatu bhagavāti** āha. “Kāraṇam ānando vadatī” ti sallakkhetvā nisīdi bhagavā paññatte āsane. **Bhagavantam etadavocāti** yam pana pañham ovaṭṭikasāram katvā ādāya āgato tam ṭhapetvā passena tāva pariharanto etam **santi, bho gotamāti**ādīvacanam avoca.

365. Phusanti hi te, bho gotamāti te samaṇabrāhmaṇā sarīre uppannaṃ sārīrikaṃ dukkhaṃ vedanaṃ phusanti labhanti, anubhavanti attho. **Ūrukkhambhoti** khambhakataūrubhāvo, ūruthaddhatāti attho. Vimhayatthavasena panettha **bhavissatīti** anāgatavacanaṃ kataṃ. **Kāyanvayaṃ hotīti** kāyānugataṃ hoti kāyassa vasavatti. **Kāyabhāvanāti** pana vipassanā vuccati, tāya cittavikkhepaṃ pāpuṇanto nāma natthi, iti nigaṇṭho asantaṃ abhūtaṃ yaṃ natthi, tadevāha. **Cittabhāvanātipi** samatho vuccati, samādhuyuttassa ca puggalassa ūrukkhambhādayo nāma natthi, iti nigaṇṭho idaṃ abhūtaṃ eva āha. Aṭṭhakathāyaṃ pana vuttaṃ – “yatheva ‘bhūtapubbanti vatvā ūrukkhambhopi nāma bhavissatī’ tiādīni vadato anāgatarūpaṃ na sameti, tathā atthopi na sameti, asantaṃ abhūtaṃ yaṃ natthi, taṃ katheti” ti.

No kāyabhāvananti pañcātapatappanādiṃ attakilamathānuyogaṃ sandhāyāha. Ayañhi tesam kāyabhāvanā nāma. Kiṃ pana so disvā evamāha? So kira divādivassa vihāraṃ āgacchati, tasmim kho pana samaye bhikkhū pattacīvaraṃ paṭisāmetvā attano attano rattiṭṭhānadivāṭṭhānesu paṭisallānaṃ upagacchanti. So te paṭisallīne disvā cittabhāvanāmettaṃ ete anuyuñjanti, kāyabhāvanā panetesam natthīti maññamāno evamāha.

366. Atha naṃ bhagavā anuyuñjanto **kinti pana te, aggivessana, kāyabhāvanā sutāti** āha. So taṃ vitthārento **seyyathidaṃ, nando vacchoti** tiādīmāha. Tattha **nandoti** tassa nāmaṃ. **Vacchoti** gottam. **Kisoti** nāmaṃ. **Samkiccoti** gottam. **Makkhaligosa** heṭṭhā āgatova. **Eteti** ete tayo janā, te kira kiliṭṭhatapānaṃ matthakapattā ahesuṃ. **Uḷārāni uḷārānīti** pañṭāni pañṭāni. **Gāhenti nāmāti** balaṃ gaṇḍhāpentī nāma. **Brūhentīti** vaḍḍhenti. **Medentīti** jātamedam karonti. **Purimaṃ pahāyāti** purimaṃ dukkarakāraṃ pahāya. **Pacchā upacinantīti** pacchā uḷārakhādanīyādīhi santappenti, vaḍḍhenti. **Ācayāpacayo hotīti** vaḍḍhi ca avaḍḍhi ca hoti, iti imassa kāyassa kālena vaḍḍhi, kālena parihānīti vaḍḍhiparihānimattameva paññāyati, kāyabhāvanā pana na paññāyati ti dīpetvā cittabhāvanāṃ pucchanto, “kinti pana te, aggivessana, cittabhāvanā sutā” ti āha. **Na sampāyāsīti** sampādetvā kathetuṃ nāsakkhi, yathā taṃ bālaputhujjano.

367. Kuto pana tvanti yo tvaṃ evaṃ oḷārikaṃ dubbalaṃ kāyabhāvanāṃ na jānāsi? So tvaṃ kuto saṅhaṃ sukhumaṃ cittabhāvanāṃ jānissasīti. Imasmim pana ṭhāne codanālayatthero, “abuddhavacanaṃ nāmetam pada” nti bījaniṃ ṭhapetvā pakkamituṃ ārabhi. Atha naṃ mahāsīvatthero āha – “dissati, bhikkhave, imassa cātumahābhūtikassa kāyassa ācayopi apacayopi ādānampi nikkhepanampi” ti (saṃ. ni. 2.62). Taṃ sutvā sallakkhesi – “oḷārikaṃ kāyaṃ parigaṇḍhantassa uppannavipassanā oḷārikāti vattum vaṭṭatī” ti.

368. Sukhasārāgīti sukhasārāgena samannāgato. **Sukhāya vedanāya nirodhā uppajjati dukkhā vedanāti** na anantarāva uppajjati, sukhadukkhānāñhi anantarapaccayatā paṭṭhāne (paṭṭhā. 1.2.45-46) paṭisiddhā. Yasmā pana sukhe aniruddhe dukkhaṃ nuppajjati, tasmā idha evaṃ vuttaṃ. **Pariyādāya tiṭṭhatīti** khetvā gaṇhitvā tiṭṭhati. **Ubhatopakkhanti** sukhaṃ ekaṃ pakkhaṃ dukkhaṃ ekaṃ pakkhanti evaṃ ubhatopakkhaṃ hutvā.

369. Uppannāpi sukhā vedanā cittaṃ na pariyādāya tiṭṭhati, bhāvitattā kāyassa. Uppannāpi dukkhā vedanā cittaṃ na pariyādāya tiṭṭhati, bhāvitattā cittassāti ettha kāyabhāvanā vipassanā, cittabhāvanā samādhī. Vipassanā ca sukhasa paccanīkā, dukkhasa āsannā. Samādhī dukkhasa paccanīko, sukhasa āsanno. Kathaṃ? Vipassanaṃ paṭṭhapetvā nisinnassa hi addhāne gacchante gacchante tattha tattha aggiuṭṭhānaṃ viya hoti, kacchehi sedā muccanti, matthakato usumavaṭṭiṭṭhānaṃ viya hotīti cittaṃ haññati vihaññati vipphandati. Evaṃ tāva vipassanā sukhasa paccanīkā, dukkhasa āsannā. Uppanne pana kāyike vā cetāsike vā dukkhe taṃ dukkhaṃ vikkhambhetvā samāpattim samāpannassa samāpattikkhaṇe dukkhaṃ dūrāpagataṃ hoti, anappakaṃ sukhaṃ okkamati. Evaṃ samādhī dukkhasa paccanīko, sukhasa āsanno. Yathā vipassanā sukhasa paccanīkā, dukkhasa āsannā, na tathā samādhī. Yathā samādhī dukkhasa paccanīko, sukhasa āsanno, na ca tathā vipassanāti. Tena vuttaṃ – “uppannāpi sukhā vedanā cittaṃ na pariyādāya tiṭṭhati, bhāvitattā kāyassa. Uppannāpi dukkhā vedanā cittaṃ na pariyādāya tiṭṭhati, bhāvitattā cittassā” ti.

370. Āsajja upanīyāti guṇe ghaṭṭetvā ceva upanetvā ca. **Taṃ vata meti** taṃ vata mama cittaṃ.

371. Kiñhi no siyā, aggivessanāti, aggivessana, kiṃ na bhavissati, bhavissateva, mā evaṃ saññī hohi, uppajjiyeva me sukhāpi dukkhāpi vedanā, uppannāya panassā ahaṃ cittaṃ pariyādāya ṭhātuṃ na demi. Idānissa tamatthaṃ pakāsetuṃ upari pasādāvaṃ dhammadesanaṃ desetukāmo mūlato paṭṭhāya mahābhinnikkhamaṃ ārabhi. Tattha **idha me, aggivessana, pubbeva sambodhā...pe... tattheva nisīdim,**

alamidaṃ padhānāyāti idaṃ sabbaṃ heṭṭhā pāsārāsīsutte vuttanayeneva veditabbaṃ. Ayaṃ pana viseso, tattha bodhipallaṅke nisajjā, idha dukkarakārikā.

374. Allakaṭṭhanti allāṃ udumbarakaṭṭhaṃ. **Sasnehanti** sakhīraṃ. **Kāmehi** vatthukāmehi. **Avūpakaṭṭhāti** anapaṅgatā. **Kāmacchandoti**ādīsū kilesakāmo chandakaraṇavasena **chando**. Sinehakarāṇavasena **sneho**. Mucchākaraṇavasena **mucchā**. Pipāsākaraṇavasena **pipāsā**. Anudahanavasena **pariḷahoti** veditabbo. **Opakkamikāti** upakkamanibbattā. **Ñāṇāya dassanāya anuttarāya sambodhāyāti** sabbaṃ lokuttaramaggavevacanameva.

Idaṃ panettha opammasaṃsandanaṃ – allāṃ sakhīraṃ udumbarakaṭṭhaṃ viya hi kilesakāmena vatthukāmato anissaṭapuggalā. Udaḷe pakkhittabhāvo viya kilesakāmena tintatā; manthanenāpi aggino anabhinibbattanaṃ viya kilesakāmena vatthukāmato anissaṭānaṃ opakkamikāhi vedanāhi lokuttaramaggassa anadhigamo. Amanthanenāpi aggino anabhinibbattanaṃ viya tesāṃ puggalānaṃ vināpi opakkamikāhi vedanāhi lokuttaramaggassa anadhigamo. Dutīyaupamāpi imināva nayena veditabbā. Ayaṃ pana viseso, purimā saputtabhariyapabbajjāya upamā; pacchimā brāhmaṇadharmikapabbajjāya.

376. Tatiyaupamāya **koḷāpanti** chinnaśinehaṃ nirāpaṃ. **Thale nikkhittanti** pabbatathale vā bhūmithale vā nikkhittāṃ. Etthāpi idaṃ opammasaṃsandanaṃ – sukkakoḷāpakaṭṭhaṃ viya hi kilesakāmena vatthukāmato nissaṭapuggalā, ārakā udakā thale nikkhittabhāvo viya kilesakāmena atintatā. Manthanenāpi aggino abhinibbattanaṃ viya kilesakāmena vatthukāmato nissaṭānaṃ abbhokāsikanesaṃjīkādivasena opakkamikāhipi vedanāhi lokuttaramaggassa adhigamo. Aññassa rukkhasa sukkhasākhāya saddhiṃ ghaṃsanamatteneva aggino abhinibbattanaṃ viya vināpi opakkamikāhi vedanāhi sukhāyeva paṭipadāya lokuttaramaggassa adhigamoti. Ayaṃ upamā bhagavatā attano atthāya āhaṭā.

377. Idāni attano dukkarakārikaṃ dassento, **tassa mayhanti**ādīmāha. Kiṃ pana bhagavā dukkaraṃ akatvā buddho bhavituṃ na samatthoti? Katvāpi akatvāpi samatthova. Atha kasmā akāsīti? Sadevakassa lokassa attano parakkamaṃ dassessāmi. So ca maṃ vīriyanimmathanaguṇo hāsessatīti. Pāsāde nisinnoyeva hi pavēniāgataṃ rajjaṃ labhivāpi khattīyo na tathāpamudito hoti, yathā balakāyaṃ gahetvā saṅgāme dve tayo sampahāre datvā amittamathanāṃ katvā pattarajjo. Evaṃ pattarajjassa hi rajjasiriṃ anubhavantassa pariṣāṃ oloketvā attano parakkamaṃ anussaritvā, “asukaṭṭhāne asukakammaṃ katvā asukañca asukañca amittaṃ evaṃ vijjhivā evaṃ paharivā imaṃ rajjasiriṃ pattosmī”ti cintayato balavasomanassaṃ uppajjati. Evamevaṃ bhagavāpi sadevakassa lokassa parakkamaṃ dassessāmi, so hi maṃ parakkamo ativiya hāsessati, somanassaṃ uppādessatīti dukkaramakāsi.

Apica pacchimaṃ janataṃ anukampamānopi akāsiyeva, pacchimā hi janatā sammāsambuddho kappasatasahassādhikāni cattāri asaṅkheyyāni pāramīyo pūretvāpi padhānaṃ padahitvāva sabbaññutaññānaṃ patto, kimaṅgaṃ pana mayanti padhānavīriyaṃ kattabbaṃ maññissati; evaṃ sante khippameva jātijarāmarāṇassa antaṃ karissatīti pacchimaṃ janataṃ anukampamāno akāsiyeva.

Dantebhīdantaṃadhāyāti heṭṭhādante uparidantaṃ ṭhapetvā. **Cetasā cittanti** kusalacittena akusalacittaṃ. **Abhiniggaṇheyyanti** niggaṇheyyaṃ. **Abhinippīleyyanti** nippīleyyaṃ. **Abhisantāpeyyanti** tāpetvā vīriyanimmathanāṃ kareyyaṃ. **Sāraddhoti** sadaratho. **Padhānābhitunnassāti** padhānena abhitunnassa, viddhassa satotī attho.

378. Appānakanti nirassāsakaṃ. **Kammāragaggariyāti** kammārassa gaggaraṇāliya. **Sīsavedanā hontīti** kutoci nikkhamituṃ alabhamānehi vātehi samuṭṭhāpitā balavatiyo sīsavedanā honti. **Sīsaveṭhaṃ dadeyyāti** sīsaveṭhanaṃ dadeyya. **Devatāti** bodhisattassa caṅkamanakoṭiyaṃ paṇṇasālapariveṇasāmantaṃ ca adhivatthā devatā.

Tadā kira bodhisattassa adhimatte kāyadāhe uppanne mucchā udapādi. So caṅkameva nisinnō hutvā papati. Taṃ disvā devatā evamāhaṃsu – “vihārotveva so arahato”ti, “arahanto nāma evarūpā honti matakasadisā”ti laddhiyā vadanti. Tattha yā devatā “kālaṅkato”ti āhaṃsu, tā gantvā suddhodanamahārājassa ārocesuṃ – “tumhākaṃ putto kālaṅkato”ti. Mama putto buddho hutvā kālaṅkato, no ahutvāti? Buddho bhavituṃ nāsakkhi, padhānabhūmiyaṃyeva patitvā kālaṅkatoti. Nāhaṃ saddahāmi, mama puttassa bodhiṃ

apatvā kālaṅkiriya nāma natthīti.

Aparabhāge sammāsambuddhassa dhammacakkaṃ pavattetvā anupubbena rājagahaṃ gantvā kapilavatthū anuppattassa suddhodanamahārājā pattaṃ gahetvā pāsādaṃ āropetvā yāgukhajjakaṃ datvā antarābhattasamaye etamatthaṃ ārocesi – tumhākaṃ bhagavā padhānakaraṇakāle devatā āgantvā, “putto te, mahārāja, kālaṅkato”ti āhaṃsūti. Kiṃ saddahasi mahārājāti? Na bhagavā saddahinti. Idāni, mahārāja, supinappaṭiggahaṇato paṭṭhāya acchariyāni passanto kiṃ saddahissasi? Ahampi buddho jāto, tvampi buddhapitā jāto, pubbe pana mayhaṃ aparipakke nāṇe bodhicariyaṃ carantassa dhammapālakumārakālepi sippaṃ uggahetuṃ gatassa, “tumhākaṃ putto dhammapālakumāro kālaṅkato, idamassa aṭṭhī”ti eḷakaṭṭhiṃ āharitvā dassesuṃ, tadāpi tumhe, “mama puttassa antarāmarāṇaṃ nāma natthi, nāhaṃ saddahāmi”ti avocuttha, mahārājāti imissā aṭṭhuppattiyā bhagavā mahādhammapālaḷātakāṃ kathesi.

379. Mā kho tvaṃ mārisāti sampiyāyamānā āhaṃsu. Devatānaṃ kirīyaṃ piyamaṇāvohāro, yadidaṃ mārisāti. **Ajajjinti** abhojanaṃ. **Halanti vadāmi**ti alanti vadāmi, alaṃ iminā evaṃ mā karittha, yāpessāmahanti evaṃ paṭisedhemīti attho.

380-1. Maṅguracchavīti maṅguramacchacchavi. **Etāva paramanti** tāsampi vedanānametaṃyeva paramaṃ, uttamaṃ pamāṇaṃ. **Pitu sakkassa kammante...pe... paṭhamaṃ jhānaṃ upasampajja viharitāti** rañño kira vappamaṅgaladivaso nāma hoti, tadā anekappakāraṃ khādanīyaṃ bhojanīyaṃ paṭiyādentī. Nagaravīthiyo sodhāpetvā puṇṇaghaṭe ṭhapāpetvā dhajapaṭākādayo ussāpetvā sakalanagaraṃ devavimānaṃ viya alaṅkarontī. Sabbe dāsakammakarādayo ahatavatthanivatthā gandhamālādipaṭimaṇḍitā rājakule sannipatanti. Rañño kammante naṅgalasatasahassaṃ yojīyati. Tasmīṃ pana divase ekena ūnaṃ aṭṭhasataṃ yojenti. Sabbanāṅgalāni saddhiṃ balibaddarasmīyottehi jāṇussoṇissa ratho viya rajataparikkhittāni honti. Rañño ālambanaṅgalaṃ rattasuvaṇṇaparikkhitaṃ hoti. Balibaddānaṃ siṅgānīpi rasmīpatodāpi suvaṇṇaparikkhittā honti. Rājā mahāparivārena nikkhamanto puttaṃ gahetvā agamāsi.

Kammantaṭṭhāne eko jamburukkho bahalapattapālāso sandacchāyo ahoṣi. Tassa heṭṭhā kumārassa sayanaṃ paññāpetvā upari suvaṇṇatārakakhacitaṃ vitānaṃ bandhāpetvā sāṇipākārena parikkhipāpetvā ārakkhaṃ ṭhapetvā rājā sabbālaṅkāraṃ alaṅkaritvā amaccagaṇaparivuto naṅgalakaraṇaṭṭhānaṃ agamāsi. Tattha rājā suvaṇṇanaṅgalaṃ gaṇhāti. Amaccā ekenūnaaṭṭhasatarajatanāṅgalāni gahetvā ito cito ca kasanti. Rājā pana orato pāraṃ gacchati, pārato vā oraṃ gacchati. Etasmīṃ ṭhāne mahāsampatti hoti, bodhisattaṃ parivāretvā nisinnā dhātiyo rañño sampattiṃ passissāmāti antosāṇito bahi nikkhantā. Bodhisatto ito cito ca olokeno kañci adisvā vegena utṭhāya pallaṅkaṃ ābhujitvā ānāpāne pariggahetvā paṭhamajjhānaṃ nibbattesi. Dhātiyo khajjabhojjantare vicaramānā thokaṃ cirāyīṃsu, sesarukkānaṃ chāyā nivattā, tassa pana rukkhassa parimaṇḍalā hutvā aṭṭhāsi. Dhātiyo ayyaputto ekakoti vegena sāṇiṃ ukkhipitvā anto pavisaṃmānā bodhisattaṃ sayane pallaṅkena nisinnaṃ taṅca pāṭihāriyaṃ disvā gantvā rañño ārocayīṃsu – “kumāro deva, evaṃ nisinnā aññesaṃ rukkhānaṃ chāyā nivattā, jamburukkassa parimaṇḍalā ṭhitā”ti. Rājā vegenāgantvā pāṭihāriyaṃ disvā, “idaṃ te, tāta, dutiyaṃ vandana”nti puttaṃ vandi. Idametaṃ sandhāya vuttaṃ – “pitu sakkassa kammante...pe... paṭhamajjhānaṃ upasampajja viharitāti”ti. **Siya nu kho eso maggo bodhāyāti** bhavēyya nu kho etaṃ ānāpānassatipaṭhamajjhānaṃ bujjhanatthāya maggoti. **Satānusāriviññānanti** nayidaṃ bodhāya maggo bhavissati, ānāpānassatipaṭhamajjhānaṃ pana bhavissatīti evaṃ ekaṃ dve vāre uppannasatiyā anantaraṃ uppannaviññānaṃ satānusāriviññānaṃ nāma. **Yaṃ taṃ sukhanti** yaṃ taṃ ānāpānassatipaṭhamajjhānasukhaṃ.

382. Paccupaṭṭhitā hontīti paṇṇasālapariveṇasammajjanādivattakaraṇena upaṭṭhitā hontī. **Bāhullikoti** paccayabāhulliko. **Āvatto bāhullāyāti** rasagiddho hutvā paṇṇitapaṇḍapātādīnaṃ atthāya āvatto. **Nibbijja pakkamiṃsūti** ukkaṇṭhitvā dhammaniyaṃmēva pakkantā bodhisattassa sambodhiṃ pattakāle kāyavivekassa okāsādānatthaṃ dhammatāya gatā. Gacchantā ca aññāṭṭhānaṃ agantvā bārāṇasimeva agamaṃsu. Bodhisatto tesu gatesu addhamāsaṃ kāyavivekaṃ labhitvā bodhimaṇḍe aparājītapallaṅke nisīditvā sabbaññūtaññānaṃ paṭivijjhi.

383. Vivicceva kāmehitiādi bhayaḥherave vuttanayeneva veditabbaṃ.

387. Abhijānāmi kho panāhanti ayaṃ paṭīyekko anusandhi. Nigaṇṭho kira cintesi – “ahaṃ samaṇaṃ

gotamaṃ ekaṃ pañhaṃ pucchim. Samaṇo gotamo ‘aparāpi maṃ, aggivessana, aparāpi maṃ, aggivessana’ti pariyosānaṃ adassento kathetiyeva. Kupito nu kho’ti? Atha bhagavā, aggivessana, tathāgate anekasatāya parisāya dhammaṃ desente kupito samaṇo gotamoti ekopi vattā natthi, paresaṃ bodhanatthāya paṭivijjanatthāya eva tathāgato dhammaṃ desetīti dassento imaṃ dhammadesanaṃ ārabhi. Tattha **ārabbhāti** sandhāya. **Yāvadevāti** payojanavidhi paricchedaniyamaṇaṃ. Idaṃ vuttaṃ hoti – paresaṃ viññāpanameva tathāgatassa dhammadesanaṃ payojanaṃ, tasmā na ekasseva deseti, yattakā viññātāro atthi, sabbesaṃ desetīti. **Tasmiṃyeva purimasminti** iminā kiṃ dassetīti? Saccako kira cintesi – “samaṇo gotamo abhirūpo pāsādiko suphusitaṃ dantāvaraṇaṃ, jivhā mudukā, madhuraṃ vākkaraṇaṃ, parisāṃ rañjento maññe vicarati, anto panassa cित्तेkaggatā natthi’ti. Atha bhagavā, aggivessana, na tathāgato parisāṃ rañjento vicarati, cakkavālapariyantāyapī parisāya tathāgato dhammaṃ deseti, asallīno anupalitto ettakaṃ ekavihārī, suññataphalasaṃpattim anuyuttoti dassetuṃ evamāha.

Ajjhattamevāti gocarajjhattameva. **Sannisādemīti** sannisīdāpemi, tathāgato hi yasmiṃ khaṇe parisā sādhuḥkāraṃ deti, tasmiṃ khaṇe pubbābhogena paricchinditvā phalasaṃpattim samāpajjati, sādhuḥkārasaddassa nigghose avicchinnēyeva samāpattito vuṭṭhāya t̥hitat̥thānato paṭṭhāya dhammaṃ deseti, buddhānañhi bhavaṅgaparivāso lahuḥko hotīti assāsavāre passāsavāre samāpattim samāpajjanti. **Yena sudaṃ niccakappanti** yena suññena phalasaṃpattim niccakālaṃ viharāmi, tasmiṃ samādhinimitte cittaṃ saññhapemi samādahāmīti dasseti.

Okappaniyametanti saddahaniyametaṃ. Evaṃ bhagavato ekaggacittataṃ sampaṭicchitvā idāni attano ovaṭṭikasāraṃ katvā ānītapañhaṃ pucchanto **abhijānāti kho pana bhavaṃ gotamo divā supitāti** āha. Yathā hi sunakho nāma asambhinnakhīrapakkapāyasaṃ sappinā yojetvā udarapūraṃ bhojitopi gūthaṃ disvā akhādītva gantuṃ na sakkā, akhādamaṇo ghāyitvāpi gacchati, aghāyitvāva gatassa kirassa sīsaṃ rujjati; evamevaṃ imassapi sathā asambhinnakhīrapakkapāyasaṃ abhinikkhamaṇato paṭṭhāya yāva āsavakkhayaṃ pasādanīyaṃ dhammadesanaṃ deseti. Etassa pana evarūpaṃ dhammadesanaṃ sutvā sathhari pasādamattampi na uppannaṃ, tasmā ovaṭṭikasāraṃ katvā ānītapañhaṃ apucchitvā gantuṃ asakko evamāha. Tattha yasmā thinamiddhaṃ sabbakhīṇāsavānaṃ arahattamaggeneva pahīyati, kāyadaratho pana upādinnakepi hoti anupādinnakepi. Tathā hi kamaluppālādīni ekasmiṃ kāle vīkasanti, ekasmiṃ makulāni honti, sāyaṃ kesañci rukkhānampi pattāni patilīyanti, pāto vipphārikāni honti. Evaṃ upādinnakassa kāyassa darathoyeva darathavasena bhavaṅgasotañca idha niddāti adhippetamaṃ, taṃ khīṇāsavānampi hoti. Taṃ sandhāya, “abhijānāmaha”ntiādimāha. **Sammohavīhārasmiṃ vadantīti** sammohavīhāro vadanti.

389. Āsajja āsajjāti ghaṭṭetvā ghaṭṭetvā. **Upanītehīti** upanetvā kathitehi. **Vacanappathehīti** vacanehi. **Abhinanditvā anumoditvāti** alanti cittaṃ sampācchanto abhinanditvā vācāyapī pasamsanto anumoditvā. Bhagavatā imassa nigaṇṭhassa dve suttāni kathitāni. Purimasuttaṃ eko bhāṇavāro, idaṃ diyaḍḍho, iti aḍḍhatiye bhāṇavāre sutvāpi ayaṃ nigaṇṭho neva abhisamayaṃ patto, na pabbajito, na saraṇesu paṭiṭṭhito. Kasmā etassa bhagavā dhammaṃ desetīti? Anāgate vāsanatthāya. Passati hi bhagavā, “imassa idāni upanissayo natthi, mayhaṃ pana parinibbānato samadhikānaṃ dvinnaṃ vassasatānaṃ accayena tambapaṇṇidīpe sāsanaṃ paṭiṭṭhahissati. Tatrāyaṃ kulaghare nibbattitvā sampatte kāle pabbajitvā tīṇi piṭakāni uggahetvā vipassanaṃ vaḍḍhetvā saha paṭisambhidāhi arahattaṃ patvā kāḷabuddharakkhito nāma mahākhīṇāsavo bhavissati”ti. Idaṃ disvā anāgate vāsanatthāya dhammaṃ desesi.

Sopi tattheva tambapaṇṇidīpamhi sāsane paṭiṭṭhite devalokato cavitvā dakkhiṇagirivīhārasa bhikkhācāragāme ekasmiṃ amaccakule nibbato pabbajjāsamatthayobbane pabbajitvā tepīṭakaṃ buddhavacanaṃ uggahetvā gaṇaṃ pariharanto mahābhikkhusaṅghaparivuto upajjhāyaṃ passituṃ agamāsi. Athassa upajjhāyo saddhivīhārikaṃ codessāmīti tepīṭakaṃ buddhavacanaṃ uggahetvā āgatena tena saddhiṃ mukhaṃ datvā kathāmatampi na akāsi. So paccūsasamaye vuṭṭhāya therassa santikaṃ gantvā, – “tumhe, bhante, mayi ganthakammaṃ katvā tumhākaṃ santikaṃ āgate mukhaṃ datvā kathāmatampi na karittha, ko mayhaṃ doso”ti pucchi. Thero āha – “tvamaṃ, āvuso, buddharakkhita ettakeneva ‘pabbajjākkiccam me matthakaṃ patta’nti saññaṃ karosī”ti. Kiṃ karomi, bhanteti? Gaṇaṃ vinodetvā tvamaṃ papañcaṃ chinditvā cetiyapabbatavīhāraṃ gantvā samaṇadhammaṃ karohīti. So upajjhāyassa ovāde t̥hatvā saha paṭisambhidāhi arahattaṃ patvā puññavā rājapūjito hutvā mahābhikkhusaṅghaparivāro cetiyapabbatavīhāre vasi.

Tasmiñhi kāle tissamahārājā uposathakammaṃ karonto cetiyapabbate rājalēṇe vasati. So therassa

upaṭṭhākabhikkhuno saññaṃ adāsi – “yadā mayhaṃ ayyo pañhaṃ vissajjeti, dhammaṃ vā katheti, tadā me saññaṃ dadeyyāthā”ti. Theropi ekasmiṃ dhammassavanadivase bhikkhusaṅghaparivāro kaṇṭhakacetiyaṅgaṇaṃ āruya cetiyaṃ vanditvā kālatimbarurukkhamūle aṭṭhāsi. Atha naṃ eko piṇḍapātikatthero kālakārāmasuttante pañhaṃ pucchi. Thero nanu, āvuso, ajja dhammassavanadivasoti āha. Āma, bhante, dhammassavanadivasoti. Tena hi piṭhakaṃ ānetha, idheva nisinnā dhammassavanaṃ karissāmāti. Athassa rukkhamūle āsanaṃ paññapetvā adamsu. Thero pubbagāthā vatvā kālakārāmasuttaṃ ārabhi. Sopissa upaṭṭhākadaharo rañño saññaṃ dāpesi. Rājā pubbagāthāsu anitṭhitāsuyeva pāpuṇi. Patvā ca aññatakaveseneva parisante ṭhatvā tiyāmarattiṃ ṭhitakova dhammaṃ sutvā therassa, idamavoca bhagavāti vacanakāle sādhuḥkāraṃ adāsi. Thero ñatvā, kadā āgatosi, mahārājāti pucchi. Pubbagāthā osāraṇakāleyeva, bhanteti. Dukkaraṃ te mahārāja, katanti. Nayidaṃ, bhante, dukkaraṃ, yadi pana me ayyassa dhammakathaṃ āradhakālato paṭṭhāya ekapadepi aññavihitabhāvo ahoṣi, tambapaṇṇidīpassa patodayaṭṭhinitudanamattepi ṭhāne sāmibhāvo nāma me mā hotūti sapatthamakāsi.

Tasmiṃ pana sutte buddhaguṇā paridīpitā, tasmā rājā pucchi – “ettakāva, bhante, buddhaguṇā, udāhu aññepi atthī”ti. Mayā kathitato, mahārāja, akathitameva bahu appamāṇanti. Upamaṃ, bhante, karoṭhāti. Yathā, mahārāja, karīsasahassamatte sālīkkhette ekasālīsīsatō avasesasālīyeva bahū, evaṃ mayā kathitaguṇā appā, avasesā bahūti. Aparampi, bhante, upamaṃ karoṭhāti. Yathā, mahārāja, mahāgaṅgāya oghapuṇṇāya sūcipāsaṃ sammukhaṃ kareyya, sūcipāseṇa gataudakaṃ appaṃ, sesaṃ bahu, evameva mayā kathitaguṇā appā, avasesā bahūti. Aparampi, bhante, upamaṃ karoṭhāti. Idha, mahārāja, cātakasakuṇā nāma ākāse kīlantā vicaranti. Khuddakā sā sakuṇajāti, kiṃ nu kho tassa sakuṇassa ākāse pakkhapaṣāraṇaṭṭhānaṃ bahu, avaseso ākāso appoti? Kiṃ, bhante, vadatha, appo tassa pakkhapaṣāraṇokāso, avasesova bahūti. Evameva, mahārāja, appakā mayā buddhaguṇā kathitā, avasesā bahū anantā appameyyāti. Sukathitaṃ, bhante, anantā buddhaguṇā ananteneva ākāseṇa upamitā. Pasannā mayaṃ ayyassa, anucchavikaṃ pana kātuṃ na sakkoma. Ayaṃ me duggatapaṇṇākāro imasmiṃ tambapaṇṇidīpe imaṃ tiyojanasatikaṃ rajjaṃ ayyassa demāti. Tumhehi, mahārāja, attano pasannākāro kato, mayaṃ pana amhākaṃ dinnaṃ rajjaṃ tumhākaṃyeva dema, dhammena samena rajjaṃ kārehi mahārājāti.

Papañcasūdaniyā majjhimanikāyaṭṭhakathāya

Mahāsaccakasuttavaṇṇanā niṭṭhitā.

7. Cūḷataṇhāsāṅkhayasuttavaṇṇanā

390. Evaṃ me sutanti cūḷataṇhāsāṅkhayasuttaṃ. Tattha **pubbārāme migāramātupāsādeti** pubbārāmasaṅkhāte vihāre migāramātuyā pāsāde. Tatrāyaṃ anupubbīkathāatīte satasahassakappamatthake ekā upāsīkā padumuttaraṃ bhagavantaṃ nimantetvā buddhappamukhassa bhikkhusaṅghassa satasahassaṃ dānaṃ datvā bhagavato pādamaṃ nipajjitvā, “anāgate tumhādisassa buddhassa aggupaṭṭhāyikā homī”ti patthanamakāsi. Sā kappasatasahassaṃ devesu ceva manussesu ca saṃsaritvā amhākaṃ bhagavato kāle bhaddiyanagare meṇḍakasetṭhiputtassa dhanañjayassa setṭhino gahe sumanadeviyā kucchimhi paṭisandhiṃ gaṇhi. Jātakāle cassā **visākhā**ti nāmaṃ akamsu. Sā yadā bhagavā bhaddiyanagaraṃ agamāsi, tadā pañcahi dārikāsatehi saddhiṃ bhagavato paccuggamaṇaṃ katvā paṭhamadassanaṃhiyeva sotāpannā ahoṣi. Aparabhāge sāvattiyaṃ migārasettṭhiputtassa puṇṇavaḍḍhanakumārassa gehaṃ gatā, tattha naṃ migārasettṭhi mātiṭṭhāne ṭhapesi, tasmā **migāramātā**ti vuccati.

Patikulaṃ gacchantiyā cassā pitā **mahālatāpīlandhanaṃ** nāma kārapesi. Tasmiṃ piḷandhane catasso vajjiraṇāliyo upayogaṃ agamaṃsu, muttānaṃ ekādaśa nāliyo, pavāḷānaṃ dvāvīsati nāliyo, mañīnaṃ tettiṃsa nāliyo, iti etehi ca aññehi ca sattavaṇṇehi ratanehi niṭṭhānaṃ agamāsi. Taṃ sīse paṭimukkaṃ yāva pādapiṭṭhiyā bhassati, pañcannaṃ hatthīnaṃ balaṃ dhārayamānāva naṃ itthi dhāretuṃ sakkoti. Sā aparabhāge dasabalassa aggupaṭṭhāyikā hutvā taṃ pasādhanāṃ vissajjetvā navahi koṭṭhi bhagavato vihāraṃ kārayamānā karīsamatte bhūmibhāge pāsādaṃ kāresi. Tassa uparibhūmiyaṃ pañca gabbhasatāni honti, heṭṭhābhūmiyaṃ pañcāti gabbhasahassappaṭimaṇḍito ahoṣi. Sā “suddhapāsādova na sobhatī”ti taṃ parivāretvā pañca dvikūṭagehasatāni, pañca cūḷapāsādasatāni, pañca dīghasālasatāni ca kārapesi. Vihāramaho catūhi māsehi niṭṭhānaṃ agamāsi.

Mātugāmattabhāve t̥hitāya visākhāya viya aññissā buddhasāsane dhanapariccāgo nāma natthi, purisattabhāve t̥hitassa ca anāthapaṇḍikassa viya aññassa buddhasāsane dhanapariccāgo nāma natthi. So hi catupaññāsakoṭiyo vissajjtvā sāvattiyā dakkhiṇabhāge anurādhapurassa mahāvihārasadise t̥hāne jetavanamahāvihāraṃ nāma kāresi. Visākhā, sāvattiyā pācīnabhāge uttamadevīvihārasadise t̥hāne **pubbārāmaṃ** nāma kāresi. Bhagavā imesaṃ dvinnaṃ kulānaṃ anukampāya sāvattiṃ nissāya viharanto imesu dvīsu vihāresu nibaddhavāsaṃ vasi. Ekaṃ antovassaṃ jetavane vasati, ekaṃ pubbārāme, etasmiṃ pana samaye bhagavā pubbārāme viharati. Tena vuttaṃ – “pubbārāme migāramātupāsāde”ti.

Kittāvatā nu kho, bhanteti kittakena nu kho, bhante. **Samkhittena taṇhāsāṅkhayavimutto hotī** taṇhāsāṅkhaye nibbāne taṃ ārammaṇaṃ katvā vimuttacittatāya taṇhāsāṅkhayavimutto nāma samkhittena kittāvatā hoti? Yāya paṭipattiyā taṇhāsāṅkhayavimutto hoti, taṃ me khīṇāsavassa bhikkhuno pubbabhāgapaṭipadaṃ samkhittena desethāti pucchati. **Accantaniṭṭhoti** khayavayasaṅkhātāṃ antaṃ atītāti accantā. Accantā niṭṭhā assāti **accantaniṭṭho**, ekantaniṭṭho satataniṭṭhoti attho. Accantaṃ yogakkhemīti **accantayogakkhemī**, niccayogakkhemīti attho. Accantaṃ brahmacārīti **accantabrahmacārī**, niccabrahmacārīti attho. Accantaṃ pariyośanamassāti purimanayeneva **accantapariyośāno**. **Seṭṭho devamanussānanti** devānañca manussānañca seṭṭho uttamo. Evarūpo bhikkhu kittāvatā hoti, khippametassa saṅkhepeneva paṭipattiṃ kathethāti bhagavantaṃ yācati. Kasmā panesa evaṃ vegāyatīti? Kīlaṃ anubhavitukāmatāya.

Ayaṃ kira uyyānakīlaṃ āṇāpetvā catūhi mahārājūhi catūsu disāsu ārakkhaṃ gāhāpetvā dvīsu devalokesu devasaṅghena parivuto aḍḍhatiyāhi nāṭakakoṭihi saddhiṃ erāvaṇaṃ āruya uyyānadvāre t̥hito imaṃ pañhaṃ sallakkhesi – “kittakena nu kho taṇhāsāṅkhayavimuttassa khīṇāsavassa saṅkhepato āgamaniyapubbabhāgapaṭipadā hotī”ti. Athassa etadahosi – “ayaṃ pañho ativiya sassiriko, sacāhaṃ imaṃ pañhaṃ anuggaṇhitvā uyyānaṃ pavisissāmi, chadvārikehi ārammaṇehi nimmathito na puna imaṃ pañhaṃ sallakkhessāmi, tiṭṭhatu tāva uyyānakīlā, satthu santikaṃ gantvā imaṃ pañhaṃ pucchitvā uggahitapañho uyyāne kīlissāmi”ti hatthikkhandhe antarahito bhagavato santike pāturahosi. Tepi cattāro mahārājāno ārakkhaṃ gahetvā t̥hitaṭṭhāneyeva t̥hitā, paricārikadevasaṅghāpi nāṭakānīpi erāvaṇopi nāgarājā tattheva uyyānadvāre at̥ṭhāsi, evamesa kīlaṃ anubhavitukāmatāya vegāyanto evamāha.

Sabbe dhammā nālaṃ abhinivesāyāti ettha sabbe dhammā nāma pañcakkhandhā dvādasāyatanāni at̥ṭhārasa dhātuyo. Te sabbe pi taṇhādiṭṭhivasena abhinivesāya nālaṃ na pariyattā na samatthā na yuttā, kasmā? Gahitākārena atītṭhanato. Te hi niccāti gahitāpi aniccāva sampajjanti, sukhāti gahitāpi dukkhāva sampajjanti, attāti gahitāpi anattāva sampajjanti, tasmā nālaṃ abhinivesāya. **Abhijānātīti** aniccaṃ dukkhaṃ anattāti nātapariññāya abhijānāti. **Parijānātīti** tatheva tīraṇapariññāya parijānāti. **Yaṃkiñci vedananti** antamaso pañcaviññānasampayuttampi yaṃkiñci appamattakampi vedanaṃ anubhavatī. Iminā bhagavā sakkassa devānamindassa vedanāvasena nibbatttvā arūpariggahaṃ dasseti. Sace pana vedanākammat̥ṭhānaṃ heṭṭhā na kathitaṃ bhavēya, imasmiṃ t̥hāne kathetabbaṃ siyā. Heṭṭhā pana kathitaṃ, tasmā satipaṭṭhāne vuttanayeneva veditabbaṃ. **Aniccānupassīti** ettha aniccaṃ veditabbaṃ, aniccānupassanā veditabbā, aniccānupassī veditabbo. Tattha **aniccanti** pañcakkhandhā, te hi uppādavayaṭṭhena aniccā. **Aniccānupassanāti** pañcakkhandhānaṃ khayato vayato dassanaññaṃ. **Aniccānupassīti** tena ñāṇena samannāgato puggalo. Tasmā “aniccānupassī viharatī”ti aniccato anupassanto viharatīti ayamettha attho.

Virāgānupassīti ettha dve virāgā khayavirāgo ca accantavirāgo ca. Tattha saṅkhārānaṃ khayavayato anupassanāpi, accantavirāgaṃ nibbānaṃ virāgato dassanamaggaññaṃampi **virāgānupassanā**. Tadubhayasamaṅgīpuggalo virāgānupassī nāma, taṃ sandhāya vuttaṃ “virāgānupassī”ti, virāgato anupassantoti attho. **Nirodhānupassī**hipi eseva nayo, nirodhopi hi khayanirodho ca accantanirodho cāti duvidhoyeva. **Paṭinissaggānupassīti** ettha **paṭinissaggo** vuccatī vossaggo, so ca pariccāgavossaggo pakkhandanavossaggoti duvidho hoti. Tattha **pariccāgavossaggoti** vipassanā, sā hi tadaṅgavasena kilese ca khandhe ca vossajjati. **Pakkhandanavossaggoti** maggo, so hi nibbānaṃ ārammaṇaṃ ārammaṇato pakkhandati. Dvīhipi vā kāraṇehi vossaggoyeva, samucchavedasena khandhānaṃ kilesānañca vossajjanato, nibbānañca pakkhandanato. Tasmā kilese ca khandhe ca paricajjati pariccāgavossaggo, nirodhe nibbānadhātuyā cittaṃ pakkhandatīti pakkhandanavossaggoti ubhayampetaṃ magge sameti. Tadubhayasamaṅgīpuggalo imāya paṭinissaggānupassanāya samannāgatattā paṭinissaggānupassī nāma hoti. Taṃ sandhāya vuttaṃ “paṭinissaggānupassī”ti. **Na kiñci loke upādiyatīti** kiñci ekampi saṅkhāragataṃ taṇhāvasena na upādiyati na

gañhāti na parāmasati. **Anupādiyaṃ na paritassatīti** aggañhanto tañhāparitassanāya na paritassati. **Paccattaññeva parinibbāyatīti** sayameva kilesaparinibbānena parinibbāyati. **Khīṇā jātīti**adinā panassa paccavekkhaṇāva dassitā. Iti bhagavā sakkassa devānamindassa saṃkhittena khīṇāsavassa pubbhāgappaṭipadaṃ pucchito sallahukaṃ katvā saṃkhitteneva khippaṃ kathesi.

391. Avidūre nisinno hotīti anantare kūṭāgāre nisinno hoti. **Abhisameccāti** ñāṇena abhisamāgantvā, jānitvāti attho. Idaṃ vuttaṃ hoti – kiṃ nu kho esa jānitvā anumodi, udāhu ajānitvā vāti. Kasmā panassa evamahosīti? Thero kira na bhagavato pañhavissajjanasaddaṃ assosi, sakkassa pana devarañño, “evametaṃ bhagavā evametaṃ sugatā”ti anumodanasaddaṃ assosi. Sakko kira devarājā mahatā saddena anumodi. Atha kasmā na bhagavato saddaṃ assosīti? Yathāparisaviññāpakattā. Buddhānañhi dhammaṃ kathentānaṃ ekābaddhāya cakkavālapariyantāyapi parisāya saddo suyayati, pariyantaṃ pana muñcitvā aṅgulimattampi bahiddhā na niccharati. Kasmā? Evarūpā madhurakathā mā niratthakā agamāsīti. Tadā bhagavā migāramātupāsāde sattaratanamaye kūṭāgāre sirigabbhamhi nisinno hoti, tassa dakkhiṇapasse sārīputtattherassa vasanakūṭāgāraṃ, vāmapasse mahāmoggallānassa, antare chiddavivarokāso natthi, tasmā thero na bhagavato saddaṃ assosi, sakkasseva assosīti.

Pañcahi tūriyasatehīti pañcaṅgikānaṃ tūriyānaṃ pañcahi satehi. Pañcaṅgikaṃ tūriyaṃ nāma ātataṃ vitataṃ ātatavitataṃ susiraṃ ghananti imehi pañcahi aṅgehi samannāgataṃ. Tattha **ātataṃ** nāma cammapariyonaddhesu bheriādīsu ekatalatūriyaṃ. **Vitataṃ** nāma ubhayatalaṃ. **Ātatavitataṃ** nāma tantibaddhapaṇavādi. **Susiraṃ** vaṃsādi. **Ghanaṃ** sammādi. **Samappitoti** upagato. **Samaṅgibhūtoti** tasseva vevacanaṃ. **Paricāretīti** taṃ sampattim anubhavanto tato tato indriyāni cāreti. Idaṃ vuttaṃ hoti – parivāretvā vajjamānehi pañcahi tūriyasatehi samannāgato hutvā dibbasampattim anubhavaṭī. **Paṭipañāmetvāti** apantvā, nissaddāni kārapetvāti attho. Yatheva hi idāni saddhā rājāno garubhāvaniyaṃ bhikkhuṃ disvā – “asuko nāma ayyo āgacchati, mā, tātā, gāyatha, mā vādetha, mā naccathā”ti nāṭakāni paṭivinenti, sakkopi therāṃ disvā evamakāsi. **Cirassaṃ kho, mārisa moggallāna, imaṃ pariyaṃmakāsīti** evarūpaṃ loke pakatiyā piyasamudāhāravacanaṃ hoti, lokiyā hi cirassaṃ āgatampi anāgatapubbampi manāpajātiyaṃ āgataṃ disvā, – “kuto bhavaṃ āgato, cirassaṃ bhavaṃ āgato, kathaṃ te idhāgamanamaggo ñāto maggamūlhosī”tiādīni vadanti. Ayaṃ pana āgatapubbattāyeva evamāha. Thero hi kālena kālaṃ devacārikaṃ gacchatiyeva. Tattha **pariyaṃmakāsīti** vāramakāsi. **Yadidaṃ idhāgamanāyāti** yo ayaṃ idhāgamanāya vāro, taṃ, bhante, cirassamakāsīti vuttaṃ hoti. **Idamāsanāṃ paññattanti** yojanikaṃ mañipallānaṃ paññāpāpetvā evamāha.

392. Bahukiccā bahukaraṇīyāti ettha yesaṃ bahūni kiccāni, te bahukiccā. **Bahukaraṇīyāti** tasseva vevacanaṃ. **Appeva sakena karaṇīyenāti** sakaraṇīyameva appaṃ mandaṃ, na bahu, devānaṃ karaṇīyaṃ pana bahu, pathavito paṭṭhāya hi kapparukkkhamātugāmādīnaṃ atthāya aṭṭā sakkassa santike chijjanti, tasmā niyamento āha – **apica devānaṃyeva tāvatimsānaṃ karaṇīyenāti**. Devānañhi dhītā ca puttā ca aṅke nibbattanti, pādapariacārikā itthiyo sayane nibbattanti, tāsāṃ maṇḍanapasādhanakārikā devadhītā sayanaṃ parivāretvā nibbattanti, veyyāvaccakarā antovimāne nibbattanti, etesaṃ atthāya aṭṭakaraṇaṃ natthi. Ye pana sīmantare nibbattanti, te “mama santakā tava santakā”ti nicchetuṃ asakkontā aṭṭaṃ karonti, sakkāṃ devarājānaṃ pucchanti, so yassa vimānaṃ āsannataraṃ, tassa santakoti vadati. Sace dvepi samaṭṭhāne honti, yassa vimānaṃ olokento ṭhito, tassa santakoti vadati. Sace ekampi na oloketi, taṃ ubhinnaṃ kalahupacchedanattaṃ attano santakaṃ karoti. Taṃ sandhāya, “devānaṃyeva tāvatimsānaṃ karaṇīyenā”ti āha. Apicassa evarūpaṃ kīlākiccampi karaṇīyameva.

Yaṃ no khippameva antaradhāyatīti yaṃ amhākaṃ sīghameva andhakāre rūpagataṃ viya na dissati. Iminā – “ahaṃ, bhante, taṃ pañhavissajjanaṃ na sallakkhemī”ti dīpeti. Thero – “kasmā nu kho ayaṃ yakkho asallakkhaṇabhāvaṃ dīpeti, passena pariharatī”ti āvajjanto – “devā nāma mahāmūlā honti. Chadvārikehi ārammaṇehi nimmathīyamānā attano bhuttābhuttabhāvampi pītāpītābhāvampi na jānanti, idha katamettha pamussanti”ti aññāsī. Keci panāhu – “thero etassa garu bhāvāniyo, tasmā ‘idāneva loke aggapuggalassa santike pañhaṃ uggahetvā āgato, idāneva nāṭakānaṃ antaraṃ pavīṭṭhoti evaṃ maṃ thero tajjeyyā”ti bhayena evamāhā”ti. Etaṃ pana kohaṇṇaṃ nāma hoti, na ariyasāvakaṃ evarūpaṃ kohaṇṇaṃ nāma hoti, tasmā mūlābhāveneva na sallakkhesīti veditabbaṃ. Upari kasmā sallakkhesīti? Thero tassa somanassasaṃvegaṃ janayitvā tamaṃ nīhari, tasmā sallakkhesīti.

Idāni sakko pubbe attano evaṃ bhūtakāraṇaṃ therassa ārocetuṃ **bhūtapubbanti**ādīmāha. Tattha

samupabyūḥhoti sannipatito rāsibhūto. **Asurā parājiniṃsūti** asurā parājayaṃ pāpuṇiṃsu. Kadā panete parājītāti? Sakkassa nibbattakāle. Sakko kira anantare attabhāve magadharatṭhe macalagāme **magho** nāma māṇavo ahoṣi, paṇḍito byatto, bodhisattacariyā viyassa cariyā ahoṣi. So tettiṃsa purise gahetvā kalyāṇamakāsi. Ekadivasam attanova paññāya upaparikkhitvā gāmamajjhe mahājanassa sannipatitattṭhāne kacavaram bhayato apabbahitvā taṃ thānaṃ atiramaṇīyamakāsi, puna tattheva maṇḍapaṃ kāresi, puna gacchante kāle sālāṃ kāresi. Gāmato ca nikkhamitvā gāvutampi aḍḍhajojanampi tigāvutampi yojanampi vicaritvā tehi sahāyehi saddhiṃ visamaṃ samaṃ akāsi. Te sabbepe ekacchandā tattha tattha setuyuttattṭhānesu setuṃ, maṇḍapasālāpokkharāṇimālāgaccharopanādīnaṃ yuttattṭhānesu maṇḍapādīni karontā bahuṃ puññamakāṃsu. Magho satta vatapadāni pūretvā kāyassa bhedaṃ saddhiṃ sahāyehi tāvatimsabhavane nibbatti.

Tasmiṃ kāle asuragaṇā tāvatimsadevaloke paṭivasanti. Sabbe te devānaṃ samānāyukā samānavañṇā ca honti, te sakkam sapariṣam disvā adhunā nibbattā navakadevaputtā āgatāti mahāpānaṃ sajjayiṃsu. Sakko devaputtānaṃ saññaṃ adāsi – “amhehi kusalaṃ karontehi na parehi saddhiṃ sādharmaṃ kataṃ, tumhe gaṇḍapānaṃ mā pivittha pītamattameva karothā”ti. Te tathā akāṃsu. Bālaasurā gaṇḍapānaṃ pivitvā mattā niddaṃ okkamiṃsu. Sakko devānaṃ saññaṃ datvā te pādesu gāhāpetvā sinerupāde khīpāpesi, sinerussa heṭṭhimatale **asurabhavanaṃ** nāma atthi, tāvatimsadevalokappamāṇameva. Tattha asurā vasanti. Tesampi **cittapāṭali** nāma rukkho atthi. Te tassa pupphanakāle jānanti – “nāyaṃ tāvatimsā, sakkena vañcitā maya”nti. Te gaṇhatha nanti vatvā sineruṃ pariharamānā deve vuṭṭhe vammikapādato vammikamakkhikā viya abhiruhiṃsu. Tattha kālena devā jinanti, kālena asurā. Yadā devānaṃ jayo hoti, asure yāva samuddapitṭhā anubandhanti. Yadā asurānaṃ jayo hoti, deve yāva vedikapādā anubandhanti. Tasmiṃ pana saṅgāme devānaṃ jayo ahoṣi, devā asure yāva samuddapitṭhā anubandhiṃsu. Sakko asure palāpetvā pañcasu thānesu ārakkhaṃ thāpesi. Evaṃ ārakkhaṃ datvā vedikapāde vajirahatthā indapaṭimāyo thāpesi. Asurā kālena kālaṃ utṭhahitvā tā paṭimāyo disvā, “sakko appamatto tiṭṭhatī”ti tatova nivattanti. **Tato paṭinivattitvāti** vijitattṭhānato nivattitvā. **Paricārikāyoti** mālāgandhādikkammakārikāyo.

393. Vessavaṇo ca mahārājāti so kira sakkassa vallabho, balavavissāsiko, tasmā sakkena saddhiṃ agamāsi. **Purakkhatvāti** purato katvā. **Pavisimsūti** pavisitvā pana upaḍḍhapihitāni dvārāni katvā olokayamānā atṭhaṃsu. **Idampi, mārīsa moggallāna, passa vejyantassa pāsādassa rāmaṇeyyakanti**, mārīsa moggallāna, idampi vejyantassa pāsādassa rāmaṇeyyakam passa, suvaṇṇatthambhe passa, rajatatthambhe maṇitthambhe pavālatthambhe lohitaṅgatthambhe masāragallatthambhe muttatthambhe sattaratanatthambhe, tesamyeva suvaṇṇādīmāye ghaṭake vālarūpakāni ca passāti evaṃ thambhapantiyo ādiṃ katvā rāmaṇeyyakam dassento evamāha. **Yathā taṃ pubbekatapuññassāti** yathā pubbe katapuññassa upabhogaṭṭhānena sobhitabbaṃ, evamevaṃ sobhatīti attho. **Atibālhaṃ kho ayaṃ yakkho pamatto viharatīti** attano pāsāde nāṭakaparivārena sampattiyā vasena ativiya matto.

Iddhābhisaṅkhāraṃ abhisaṅkhāsīti iddhimakāsi. Āpokasiṇaṃ samāpajjitvā pāsādapatiṭṭhitokāsaṃ udakaṃ hotūti iddhiṃ adhiṭṭhāya pāsādakaṇṇike pādaṅguṭṭhakena pahari. So pāsādo yathā nāma udakapitṭhe thapitapattaṃ mukhavaṭṭiyam āṅguliyā pahaṭṭam aparāparaṃ kampaṭi calati na santiṭṭhati. Evamevaṃ saṃkampi sampakampi sampavedhi, thambhapitṭhasaṅghāṭakāṇṇikagopānāsīdīni karakarāti saddaṃ muñcantāni patituṃ viya āraddhāni. Tena vuttaṃ – “saṅkampi sampakampi sampavedhesī”ti. **Acchariyabbhutacittajātāti** aho acchariyam, aho abbhutanti evaṃ sañjātaacchariyaabbhutā ceva sañjātatuṭṭhino ca ahesuṃ uppannabalavasomanassā. **Samvigganti** ubbiggaṃ. **Lomahaṭṭhajātanti** jātalomahaṃsaṃ, kañcanabhittiyam thapitamaṇināgadantehi viya uddhaggehi lomehi ākiṇṇasarīranti attho. Lomahaṃso ca nāmesa somanassenapi hoti domanassenapi, idha pana somanassena jāto. Thero hi sakkassa somanassavegena saṃvejetuṃ taṃ pāṭihāriyamakāsi. Tasmā somanassavegena saṃviggalomahaṭṭhaṃ viditvāti attho.

394. Idhāhaṃ, mārīsāti idānissa yasmā therena somanassasaṃvegaṃ janayitvā tamaṃ vinoditaṃ, tasmā sallakkhetvā evamāha. **Eso nu te, mārīsa, so bhagavā satthāti**, mārīsa, tvaṃ kuhiṃ gatosīti vutte mayhaṃ satthu santikanti vadesi, imasmiṃ devaloke ekapādakena viya tiṭṭhasi, yaṃ tvaṃ evaṃ vadesi, eso nu te, mārīsa, so bhagavā satthāti pucchiṃsu. **Sabrahmacārī me esoti** ettha kiñcāpi thero anagāriyo abhinīhārasampanno aggasāvako, sakko agāriyo, maggabrahmacariyavasena panete sabrahmacārino honti, tasmā evamāha. **Aho nūna te so bhagavā satthāti** sabrahmacārī tāva te evaṃmahiddhiko, so pana te bhagavā satthā aho nūna mahiddhikoti satthu iddhipāṭihāriyadassane jātābhilāpā hutvā evamāhaṃsu.

395. **Ñātaññatarassāti** paññātaññatarassa, sakko hi paññātānaṃ aññataro. Sesam sabbattha pākaṭameva, desanaṃ pana bhagavā yathānusandhināva niṭṭhāpesīti.

Papañcasūdaniyā majjhimanikāyaṭṭhakathāya

Cūḷataṇhāsāṅkhayasuttavaṇṇanā niṭṭhitā.

8. Mahātaṇhāsāṅkhayasuttavaṇṇanā

396. **Evam me sutanti** mahātaṇhāsāṅkhayasuttaṃ. Tattha **diṭṭhigatanti** alagaddūpamasutte laddhimattaṃ diṭṭhigatanti vuttaṃ, idha sassatadiṭṭhi. So ca bhikkhu bahussuto, ayaṃ appassuto, jātakabhāṇako bhagavantaṃ jātakaṃ kathetvā, “ahaṃ, bhikkhave, tena samayena vessantaro ahoṣiṃ, mahosadho, vidhuraṇḍito, senakaṇḍito, mahājanako rājā ahoṣi”nti samodhānentaṃ suṇāti. Athassa etadahosi – “ime rūpavedanāsaññāsāṅkhārā tattha tattheva nirujjhanti, viññānaṃ pana idhalokato paralokaṃ, paralokato imaṃ lokaṃ sandhāvati saṃsarati”ti sassatadassanaṃ uppannaṃ. Tenāha – “tadevidaṃ viññānaṃ sandhāvati saṃsarati anañña”nti.

Sammāsambuddhena pana, “viññānaṃ paccayasambhavaṃ, sati paccaye uppajjati, vinā paccayaṃ natthi viññānaṃ sambhavo”ti vuttaṃ. Tasmā ayaṃ bhikkhu buddhena akathitaṃ katheti, jinacakke pahāraṃ deti, vesārajaññaṃ paṭibāhati, sotukāmaṃ janaṃ viṣaṃvādeti, ariyapathe tiriyaṃ nipatitvā mahājanassa ahitāya dukkhāya paṭipanno. Yathā nāma rañño rajje mahācoro uppajjamāno mahājanassa ahitāya dukkhāya uppajjati, evaṃ jinasāsane coro hutvā mahājanassa ahitāya dukkhāya uppannoti vedītabbo. **Sambahulā bhikkhūti** janapadavāsino piṇḍapātikabhikkhū. **Tenupasaṅkamimsūti** ayaṃ parisam labhitvā sāsanampi antaradhāpeyya, yāva pakkhaṃ na labhati, tāvadeva naṃ diṭṭhigatā vivecemāti sutasutaṭṭhānatoyeva aṭṭhatvā anisīditvā upasaṅkamimsu.

398. **Katamaṃ taṃ sāti viññānanti** sāti yaṃ tvaṃ viññānaṃ sandhāya vadesi, katamaṃ taṃ viññānanti? **Vyāyaṃ, bhante, vado vedeyyo tatra tatra kalyāṇapāpakānaṃ kammānaṃ vipākaṃ paṭisaṃvedetīti**, bhante, yo ayaṃ vadati vedayati, yo cāyaṃ tahiṃ tahiṃ kusalākusalakammānaṃ vipākaṃ paccanubhoti. Imaṃ, bhante, viññānaṃ, yamaṃ sandhāya vademīti. **Kassa nu kho nāmāti** kassa khattiyassa vā brāhmaṇassa vā vessasuddagahaṭṭhapabbajitadevamanussānaṃ vā aññatarassa.

399. **Atha kho bhagavā bhikkhū āmantesīti** kasmā āmantesi? Sātissa kira evaṃ ahoṣi – “satthā maṃ ‘moghapuriso’ti vadati, na ca moghapurisoti vuttamatteneva maggaphalānaṃ upanissayo na hoti. Upasenampi hi vaṅgantaputtaṃ, ‘atilaṃ kho tvaṃ moghapurisa bāhullāya āvatto’ti (mahāva. 75) bhagavā moghapurisaṃvādena ovadi. Thero aparabhāge ghaṭento vāyamanto cha abhiññā sacchākāsi. Ahampi tathārūpaṃ vīriyaṃ paggaṇhitvā maggaphalāni nibbattessāmi”ti. Athassa bhagavā chinnapaccayo ayaṃ sāsane avirūhadhammoti dassento bhikkhū āmantesi. **Usmīkatotiādi** heṭṭhā vuttādhippāyameva. **Atha kho bhagavāti** ayampi paṭiyekko anusandhi. Sātissa kira etadahosi – “bhagavā mayhaṃ maggaphalānaṃ upanissayo natthīti vadati, kiṃ sakkā upanissaye asati kātuṃ? Na hi tathāgatā saupanissayasseva dhammaṃ desenti, yassa kassaci desentiyeva. Ahaṃ buddhassa santikā sugatovādaṃ labhitvā saggasampattūpagaṃ kusalaṃ karissāmi”ti. Athassa bhagavā, “nāhaṃ, moghapurisa, tuyhaṃ ovādaṃ vā anusāsaṃ vā demī”ti sugatovādaṃ paṭippassambhento imaṃ desanaṃ ārabhi. Tassattho heṭṭhā vuttanayeneva vedītabbo. Idāni parisāya laddhiṃ sodhento, “idhāhaṃ bhikkhū paṭipucchissāmi”tiādimāha. Taṃ sabbampi heṭṭhā vuttanayeneva vedītabbaṃ.

400. Idāni viññānaṃ sappaccayabhāvaṃ dassetuṃ **yaṃ yadeva, bhikkhavetiādimāha**. Tattha **manañca paṭicca dhamme cāti** sahāvajjanena bhavaṅgamañca tebhūmakadhamme ca paṭicca. **Kaṭṭhañca paṭiccātiādi** opammaṇidassanattaṃ vuttaṃ. Tena kiṃ dīpeti? Dvārasāṅkantiyā abhāvaṃ. Yathā hi kaṭṭhaṃ paṭicca jalamaṇo aggi upādānapaccaye satiyeva jalati, tasmīṃ asati paccayavekallena tattheva vūpasammāti, na sakalikādīni saṅkamitvā sakalikaggītiādisaṅkhiyaṃ gacchati, evameva cakkhuñca paṭicca rūpe ca uppannaṃ viññānaṃ tasmīṃ dvāre cakkhurūpaalokamanasikārasāṅkhāte paccayamhi satiyeva uppajjati, tasmīṃ asati paccayavekallena tattheva nirujjhati, na sotādīni saṅkamitvā sotaviññānantiādisaṅkhiyaṃ gacchati. Esa nayo sabbavāresu. Iti bhagavā nāhaṃ viññāṇappavatte dvārasāṅkantiṃ vadamī, ayaṃ pana sāti moghapuriso bhavaṅkantiṃ vadatīti sātīṃ niggahesi.

401. Evaṃ viññāssa sappaccayabhāvaṃ dassetvā idāni pana pañcannampi khandhānaṃ sappaccayabhāvaṃ dassento, **bhūtamidanti**ādīmāha. Tattha **bhūtamidanti** idaṃ khandhapañcakaṃ jātaṃ bhūtaṃ nibbattaṃ, tumhepi taṃ bhūtamidanti, bhikkhave, passathāti. **Tadāhārasambhavanti** taṃ panetaṃ khandhapañcakaṃ āhārasambhavaṃ paccayasambhavaṃ, sati paccaye uppajjati evaṃ passathāti pucchati. **Tadāhāranirodhāti** tassa paccayassa nirodhā. **Bhūtamidaṃ nossūti** bhūtaṃ nu kho idaṃ, na nu kho bhūtanti. **Tadāhārasambhavaṃ nossūti** taṃ bhūtaṃ khandhapañcakaṃ paccayasambhavaṃ nu kho, na nu khoti. **Tadāhāranirodhāti** tassa paccayassa nirodhā. **Nirodhadhammaṃ nossūti** taṃ dhammaṃ nirodhadhammaṃ nu kho, na nu khoti. **Sammappaññāya passatoti** idaṃ khandhapañcakaṃ jātaṃ bhūtaṃ nibbattanti yāthāvasarasalakkhaṇato vipassanāpaññāya sammā passantassa. **Paññāya sudiṭṭhanti** vuttanayeneva vipassanāpaññāya suṭṭhu diṭṭhaṃ. Evaṃ ye ye taṃ pucchāṃ sallakkhesuṃ, tesāṃ tesāṃ paṭiññaṃ gaṇhanto pañcannaṃ khandhānaṃ sappaccayabhāvaṃ dasseti.

Idāni yāya paññāya tehi taṃ sappaccayaṃ sanirodhaṃ khandhapañcakaṃ sudiṭṭhaṃ, tattha nittaṇhabhāvaṃ pucchanto **imaṃ ce tumheti**ādīmāha. Tattha **diṭṭhinti** vipassanāsammādiṭṭhiṃ. Sabhāvadassanena **parisuddhaṃ**. Paccayadassanena **pariyodātaṃ**. **Allīyethāti** taṇhādiṭṭhīhi allīyitvā vihareyyātha. **Kelāyethāti** taṇhādiṭṭhīhi kīlamānā vihareyyātha. **Dhanāyethāti** dhaṇaṃ viya icchantā gedhaṃ āpajjeyyātha. **Mamāyethāti** taṇhādiṭṭhīhi mamattaṃ uppādeyyātha. **Nittharaṇatthāya no gahaṇatthāyāti** yo so mayā caturghanittharaṇatthāya kullūpamo dhammo desito, no nikantivasena gahaṇatthāya. Api nu taṃ tumhe ājāneyyāthāti. Vipariyāyena sukkapakkho veditabbo.

402. Idāni tesāṃ khandhānaṃ paccayaṃ dassento, **cattārome, bhikkhave, āhārāti**ādīmāha, tampi vuttatthameva. Yathā pana eko imaṃ jānāsīti vutto, “na kevalaṃ imaṃ, mātarampissa jānāmi, mātu mātarampī”ti evaṃ pavenivasena jānanto suṭṭhu jānāti nāma. Evamevaṃ bhagavā na kevalaṃ khandhamattameva jānāti, khandhānaṃ paccayampi tesampi paccayānaṃ paccayanti evaṃ sabbapaccayaparamparaṃ jānāti. So taṃ, buddhabalaṃ dīpento idāni paccayaparamparaṃ dassetuṃ, **ime ca, bhikkhave, cattāro āhārāti**ādīmāha. Taṃ vuttatthameva. **Iti kho, bhikkhave, avijjāpaccayā saṅkhārā... pe... dukkhakkhandhassa samudayo hotīti** ettha pana paṭiccasamuppādakathā vitthāretabbā bhaveyya, sā visuddhimagge vitthāritāva.

404. **Imasmiṃ sati idaṃ hotīti** imasmiṃ avijjādike paccaye sati idaṃ saṅkhārādikaṃ phalaṃ hoti. **Imassuppādā idaṃ uppajjati**ti imassa avijjādikassa paccayassa uppādā idaṃ saṅkhārādikaṃ phalaṃ uppajjati, tenevāha – “yadidaṃ avijjāpaccayā saṅkhārā...pe... samudayo hotī”ti. Evaṃ vaṭṭaṃ dassetvā idāni vivaṭṭaṃ dassento, **avijjāya tveva asesavirāganirodhāti**ādīmāha. Tattha **avijjāya tvevāti** avijjāya eva tu. **Asesavirāganirodhāti** virāgasāṅkhātena maggena asesanirodhā anuppādanirodhā. **Saṅkhāranirodhoti** saṅkhārānaṃ anuppādanirodho hoti, evaṃ niruddhānaṃ pana saṅkhārānaṃ nirodhā viññānanirodho hoti, viññānādīnaṃ nirodhā nāmarūpādīni niruddhāniyeva hotīti dassetuṃ **saṅkhāranirodhā viññānanirodhoti**ādīṃ vatvā **evametassa kevalassa dukkhakkhandhassa nirodho hotīti** vuttaṃ. Tattha **kevalassāti** sakalassa, suddhassa vā, sattavirahitassāti attho. **Dukkhakkhandhassāti** dukkharāsissa. **Nirodho hotīti** anuppādo hoti.

406. **Imasmiṃ asatīti**ādi vuttapaṭipakkhanayena veditabbaṃ.

407. Evaṃ vaṭṭavivaṭṭaṃ kathetvā idāni imaṃ dvādasāṅgapaccayavaṭṭaṃ saha vipassanāya maggena jānantassa yā paṭidhāvanā pahīyati, tassā abhāvaṃ pucchanto **api nu tumhe, bhikkhave**tiādīmāha. Tattha **evaṃ jānantāti** evaṃ sahavipassanāya maggena jānantā. **Evaṃ passantāti** tasseva vevacanaṃ. **Pubbantanti** purimakotṭhāsaṃ, atītakhandhadhātuāyatanānīti attho. **Paṭidhāveyyāthāti** taṇhādiṭṭhivasena paṭidhāveyyātha. Sesāṃ sabbāsavasutte vitthāritameva.

Idāni nesāṃ tattha niccalabhāvaṃ pucchanto, **api nu tumhe, bhikkhave, evaṃ jānantā evaṃ passantā evaṃ vadeyyātha, satthā no garūti**ādīmāha. Tattha **garūti** bhāriko akāmā anuvattitabbo. **Samaṇoti** buddhasamaṇo. **Aññaṃ satthāraṃ uddiseyyāthāti** ayaṃ satthā amhākaṃ kiccaṃ sādhetuṃ na sakkotīti api nu evaṃsaññino hutvā aññaṃ bāhirakaṃ satthāraṃ uddiseyyātha. **Puthusamaṇabrāhmaṇānanti** evaṃsaññino hutvā puthūnaṃ titthiyasamaṇānaṃ ceva brāhmaṇānaṃ. **Vatakotūhalamaṅgalānīti** vatasamādānāni ca diṭṭhikutūhalāni ca diṭṭhasutamutamaṅgalāni ca. **Tāni sārato paccāgaccheyyāthāti** etāni sāranti evaṃsaññino

hutvā paṭiāgaccheyyātha. Evaṃ nissatṭhāni ca puna ganheyyāthāti attho. **Sāmaṃ nātanti** sayaṃ nāṇena nātāṃ. **Sāmaṃ diṭṭhanti** sayaṃ paññācakkhunā diṭṭhāṃ. **Sāmaṃ viditanti** sayaṃ vibhāvitaṃ pākaṭaṃ kataṃ. **Upanīta kho me tumheti** mayā, bhikkhave, tumhe iminā sandiṭṭhikādisabhāvena dhammena nibbānaṃ upanīta, pāpitāti attho. **Sandiṭṭhikoti**ādīnamattho **visuddhimagge** vitthārīto. **Idametāṃ paṭicca vuttanti** etaṃ vacanamidaṃ tumhehi sāmaṃ nātādibhāvaṃ paṭicca vuttaṃ.

408. Tiṇṇaṃ kho pana, bhikkhaveti kasmā ārabhi? Nanu heṭṭhā vaṭṭavivaṭṭavasena desanā matthakaṃ pāpitāti? Āma pāpitā. Ayaṃ pana pāṭiekkō anusandhi, “ayañhi lokasannivāso paṭisandhisammūlho, tassa sammohaṭṭhānaṃ viddhaṃsetvā pākaṭaṃ karissāmī”ti imaṃ desanaṃ ārabhi. Apica vaṭṭamūlaṃ avijjā, vivaṭṭamūlaṃ buddhuppādo, iti vaṭṭamūlaṃ avijjaṃ vivaṭṭamūlañca buddhuppādaṃ dassetvāpi, “puna ekavāraṃ vaṭṭavivaṭṭavasena desanaṃ matthakaṃ pāpessāmī”ti imaṃ desanaṃ ārabhi. Tattha **sannipātāti** samodhānena piṇḍabhāvena. **Gabbhassāti** gabbhe nibbattanakasattassa. **Avakkanti hotīti** nibbatti hoti. Katthaci hi **gabbhoti** mātukucchi vutto. Yathāha –

“Yamekarattim paṭhamam, gabbhe vasati māṇavo;
Abbhutṭhitova so yāti, sa gacchaṃ na nivattati”ti. (jā. 1.15.363);

Katthaci gabbhe nibbattanasatto. Yathāha – “yathā kho, panānanda, aññā itthikā nava vā dasa vā māse gabbhaṃ kucchinā pariharitvā vijāyanti”ti (ma. ni. 3.205). Idha satto adhippeto, taṃ sandhāya vuttaṃ “gabbhassa avakkanti hoti”ti.

Idhāti imasmiṃ sattaloke. **Mātā ca utunī hotīti** idaṃ utusamayaṃ sandhāya vuttaṃ. Mātugāmassa kira yasmiṃ okāse dārako nibbattati, tattha mahatī lohitapīlakā sañṭhahitvā bhijjivā paggharati, vatthu suddhaṃ hoti, suddhe vatthumhi mātāpitūsu ekavāraṃ sannipatitesu yāva satta divasāni khattameva hoti. Tasmīṃ samaye hatthagāhāveniggāhādīnā aṅgaparāmasanenapi dārako nibbattatiyeva. **Gandhabboti** tatrūpagasatto. **Paccupaṭṭhito hotīti** na mātāpitūnaṃ sannipātaṃ olokayamāno samīpe ṭhito paccupaṭṭhito nāma hoti. Kammayantayantito pana eko satto tasmīṃ okāse nibbattanako hotīti ayamettha adhippāyo. **Samsayenāti** “arogo nu kho bhavissāmi ahaṃ vā, putto vā me”ti evaṃ mahantena jīvitasamsayena. **Lohitañhetam, bhikkhave**ti tadā kira mātulohitaṃ taṃ ṭhānaṃ sampattaṃ puttasiñhena paṇḍaraṃ hoti. Tasmā evamāha. **Vaṅkakanti** gāmadārakānaṃ kīlanakaṃ khuddakanaṅgalaṃ. **Ghaṭikā** vuccati dīghadaṇḍena rassadaṇḍakaṃ paharaṇakīlā. **Mokkhaḥcanti** samparivattakakīlā, ākāse vā daṇḍakaṃ gahetvā bhūmiyaṃ vā sīsaṃ ṭhapetvā heṭṭhupariyabhāvena parivattanakīlananti vuttaṃ hoti. **Ciṅgulakam** vuccati tālapaṇṇādīhi kataṃ vātappahārena paribbhamanacakkam. **Pattālhakam** vuccati paṇṇanālikā, tāya vālikādīni minantā kīlanti. **Rathakanti** khuddakaratham. **Dhanukampi** khuddakadhanumeva.

409. Sārajjatīti rāgaṃ uppādeti. **Byāpajjatīti** byāpādaṃ uppādeti. **Anupaṭṭhitakāyasatīti** kāye sati kāyasati, taṃ anupaṭṭhapetvāti attho. **Parittacetasotīti** akusalacitto. **Yatthassa te pāpakāti** yassaṃ phalasaṃpattiyāṃ ete nirujjhanti, taṃ na jānāti nādhigacchatīti attho. **Anurodhavirodhanti** rāgañceva dosañca. **Abhinandatīti** tañhāvasena abhinandati, tañhāvaseneva aho sukhañcādīni vadanto abhivadati. **Ajjhosāya tiṭṭhatīti** tañhāajjhosaṇagahaṇena gilitvā pariniṭṭhapetvā gaṇhāti. Sukhaṃ vā adukkhamasukhaṃ vā abhinandatu, dukkhaṃ kathaṃ abhinandatīti? “Ahaṃ dukkhito mama dukkha”nti gaṇhanto abhinandati nāma. **Uppajjati nandīti** tañhā uppajjati. **Tadupādānanti** sāva tañhā gahaṇaṭṭhena upādānaṃ nāma. Tassa upādānapaccayā bhavo...pe... samudayo hotīti, idañhi bhagavatā puna ekavāraṃ dvisandhi tisaṅkhepaṃ paccayākāravaṭṭaṃ dassitaṃ.

410-4. Idāni vivaṭṭaṃ dassetuṃ **idha, bhikkhave, tathāgato loke uppajjatīti**ādīmāha. Tattha **appamāṇacetasotīti** appamāṇaṃ lokuttaraṃ ceto assāti appamāṇacetaso, maggacittasamaṅgīti attho. **Imaṃ kho me tumhe, bhikkhave, saṃkhittena tañhāsāṅkhayavimuttiṃ dhārethāti**, bhikkhave, imaṃ saṃkhittena desitaṃ mayhaṃ, tañhāsāṅkhayavimuttidesanaṃ tumhe niccakālaṃ dhāreyyātha mā pamajjeyyātha. Desanā hi ettha vimuttiapaṭilābhahetuto **vimuttīti** vuttā. **Mahātañhājālatañhāsāṅghāṭapaṭimukkanti** tañhāva saṃsibbitaṭṭhena mahātañhājālaṃ, saṅghaṭitaṭṭhena saṅghāṭanti vuccati; iti imasmiṃ mahātañhājāle tañhāsāṅghāṭe ca imaṃ sātīṃ bhikkhuṃ kevaṭṭaputtaṃ paṭimukkaṃ dhāretha. Anupaviṭṭho antogadhoti naṃ dhārethāti attho. Sesam sabbatha uttānatthamevāti.

Papañcasūdanīyā majjhimanikāyaṭṭhakathāya

Mahātaṇhāsaṅkhasuttavaṇṇanā niṭṭhitā.

9. Mahāassapurasuttavaṇṇanā

415. Evaṃ me sutanti mahāassapurasuttaṃ. Tattha **aṅgesūti** aṅgā nāma jānāpadino rājakumārā, tesam nivāso ekopi janapado ruḥhīsaddena “aṅgā”ti vuccati, tasmim aṅgesu janapade. **Assapuraṃ nāma aṅgānaṃ nigamoti assapuranti** nagaranāmena laddhāvohāro aṅgānaṃ janapadassa eko nigamo, taṃ gocaragāmaṃ katvā viharatīti attho. **Bhagavā etadvocāti** etaṃ “samaṇā samaṇāti vo, bhikkhave, jano sañjānāti”tiādivacanāvacoca.

Kasmā pana evaṃ avocāti. Tasmim kira nigame manussā saddhā pasannā buddhamāmakā dhammāmakā saṅghamāmakā, tadahupabbajitasāmaṇerampi vassasatikattherasadiṣaṃ katvā pasamsanti; pubbaṅhasamayaṃ bhikkhusaṅghaṃ piṇḍāya pavisaṃtaṃ disvā bījanaṅgalādīni gaheṭvā khettaṃ gacchantāpi, pharasuādīni gaheṭvā araṇṇaṃ pavisaṃtāpi tāni upakaraṇāni nikkhipitvā bhikkhusaṅghassa nisīdanatṭhānaṃ āsanāsālaṃ vā maṇḍapaṃ vā rukkhamaṭṭhaṃ vā sammajjitvā āsanāni pañṇāpetvā arajāpānīyaṃ paccupaṭṭhāpetvā bhikkhusaṅghaṃ nisīdāpetvā yāgukhajjakādīni datvā katabhattakiccaṃ bhikkhusaṅghaṃ uyyojetvā tato tāni upakaraṇāni ādāya khettaṃ vā araṇṇaṃ vā gantvā attano kammāni karonti, kammantaṭṭhānepi nesaṃ aṅgā kathā nāma natthi. Cattāro maggaṭṭhā cattāro phalaṭṭhāti aṭṭha puggalā ariyasaṅgho nāma; te “evarūpena silena, evarūpena ācārena, evarūpāya paṭipattiyā samannāgatā lajjino pesalā uḷāraguṇā”ti bhikkhusaṅghasseva vaṇṇaṃ kathenti. Kammantaṭṭhānato āgantvā bhuttasāyamāsā gharadvāre nisinnāpi, sayanigharaṃ pavisitvā nisinnāpi bhikkhusaṅghasseva vaṇṇaṃ kathenti. Bhagavā tesam manussānaṃ nipaccakāraṃ disvā bhikkhusaṅghaṃ piṇḍapātāpacāyane niyojetvā etadvococa.

Ye dhammā samaṇakaraṇā ca brāhmaṇakaraṇā cāti ye dhammā samādāya paripūritā samitapāpasamaṇaṅca bāhitapāpabrāhmaṇaṅca karontīti attho. “Tṭimāni, bhikkhave, samaṇassa samaṇiyāni samaṇakaraṇiyāni. Katamāni tṭi? Adhisīlasikkhāsamādānaṃ, adhicittasikkhāsamādānaṃ, adhipaññāsikkhāsamādāna”nti (a. ni. 3.82) ettha pana samaṇena kattabbadhammā vuttā. Tepi ca samaṇakaraṇā hontiyeva. Idha pana hirottappādivasena desanā vitthāritā. **Evaṃ no ayaṃ amhākanti** ettha **noti** nipātamattaṃ. Evaṃ ayaṃ amhākanti attho. **Mahapphalā mahānisamsāti** ubhayampi atthato ekameva. **Avañjhāti** amoghā. **Saphalāti** ayaṃ tasseva attho. Yassā hi phalaṃ natthi, sā vañjhā nāma hoti. **Saudrayāti** savaḍḍhi, idaṃ saphalātāya vevacanaṃ. **Evañhi vo, bhikkhave, sikkhitabbanti**, bhikkhave, evaṃ tumhehi sikkhitabbaṃ. Iti bhagavā iminā ettakena ṭhānena hirottappādīnaṃ dhammānaṃ vaṇṇaṃ kathesi. Kasmā? Vacanapathapacchindanatthaṃ. Sace hi koci acirapabbajito bālabhikkhu evaṃ vadeyya – “bhagavā hirottappādīdhamme samādāya vattathāti vadati, ko nu kho tesam samādāya vattane ānisaṃso”ti? Tassa vacanapathapacchindanatthaṃ. Ayaṅca ānisaṃso, ime hi dhammā samādāya paripūritā samitapāpasamaṇaṃ nāma bāhitapāpabrāhmaṇaṃ nāma karonti, catupaccayalābhaṃ uppādentī, paccayādāyakaṇaṃ mahapphalataṃ sampādentī, pabbajjaṃ avañjhaṃ saphalaṃ saudrayaṃ karontīti vaṇṇaṃ abhāsi. Ayamettha saṅkhepo. Vitthārato pana vaṇṇakathā satipaṭṭhāne (dī. ni. aṭṭha. 2.373; ma. ni. aṭṭha. 2.373) vuttanayeneva vedittabbā.

416. Hirottappenāti “yaṃ hiriyati hiriyitabbena, ottappati ottappitabbenā”ti (dha. sa. 1331) evaṃ vitthāritāya hiriyā ceva ottappena ca. Apicettha ajjhattasamuṭṭhānā **hirī**, bahiddhāsamuṭṭhānaṃ **ottappaṃ**. Attādhipateyyā hirī, lokādhipateyyaṃ ottappaṃ. Lajjāsabhāvasaṅgīhitā hirī, bhayasabhāvasaṅgīhitā ottappaṃ, vitthārakathā panettha sabbākārena visuddhimagge vuttā. Apica ime dve dhammā lokaṃ pālanato **lokapāladhammā** nāmāti kathitā. Yathāha – “dveme, bhikkhave, sukkā dhammā lokaṃ pāleṇti. Katame dve? Hirī ca ottappaṅca. Ime kho, bhikkhave, dve sukkā dhammā lokaṃ pāleṇti. Ime ca kho, bhikkhave, dve sukkā dhammā lokaṃ na pāleyyuṃ, nayidha pañṇāyetha, ‘mātā’ti vā, ‘mātucchā’ti vā, ‘mātulāni’ti vā, ‘ācariyabhariyā’ti vā, ‘garūnaṃ dārā’ti vā, sambhedā loko agamissa, yathā ajeḷakā kukkuṭasūkarā soṇasiṅgālā”ti (a. ni. 2.9). Imeyeva jātake “devadhammā”ti kathitā. Yathāha –

“Hiriottappasampannā, sukkadhammasamāhitā;
Santo sappurisā loke, devadhammāti vuccare”ti. (jā. 1.1.6);

Mahācundattherassa pana kilesasallekhanapaṭipadāti katvā dassitā. Yathāha – “pare ahirikā bhavissanti, mayamettha hirimanā bhavissāmāti sallekho karaṇīyo. Pare anottāpī bhavissanti, mayamettha ottāpī bhavissāmāti sallekho karaṇīyo”’ti (ma. ni. 1.83). Imeva mahākassapattherassa ovādūpasampadāti katvā dassitā. Vuttañhetam – “tasmā tiha te, kassapa, evaṃ sikkhitabbaṃ, tibbaṃ me hirottappaṃ paccupaṭṭhitam bhavissati thesuvā navesu majjhimesūti. Evañhi te, kassapa, sikkhitabba”’nti (saṃ. ni. 2.154). Idha panete **samañadhammā nāmāti** dassitā.

Yasmā pana ettāvātā sāmāññattho matthakaṃ patto nāma hoti, tasmā aparepi samañakaraṇadhamme dassetuṃ **siyā kho pana, bhikkhave, tumhākantiādimāha**. Tattha **sāmāññattho** saṃyuttake tāva, “katamañca, bhikkhave, sāmāññaṃ? Ayameva ariyo aṭṭhaṅgiko maggo. Seyyathidaṃ, sammādiṭṭhi...pe... sammāsamādhī, idaṃ vuccati, bhikkhave, sāmāññaṃ. Katamo ca, bhikkhave, sāmāññattho? Yo, bhikkhave, rāgakkhayo dosakkhayo mohakkhayo, ayaṃ vuccati, bhikkhave, sāmāññattho”’ti (saṃ. ni. 5.36) maggo “sāmāñña”’nti, phalanibbānāni “sāmāññattho”’ti vuttāni. Imasmiṃ pana ṭhāne maggampi phalampi ekato katvā sāmāññattho kathitoti veditabbo. **Ārocayāmīti** kathemi. **Paṭivedayāmīti** jānāpemi.

417. Parisuddho no kāyasamācāroti ettha kāyasamācāro parisuddho aparisuddhoti duvidho. Yo hi bhikkhu pāṇaṃ hanati adinnaṃ ādiyati, kāmesu micchā carati, tassa kāyasamācāro aparisuddho nāma, ayaṃ pana kammaṭṭhavaseneva vārito. Yo pana pāṇinā vā leḍḍunā vā daṇḍena vā satthena vā paraṃ potheti viheṭṭeti, tassa kāyasamācāro aparisuddho nāma, ayampi sikkhāpadabaddheneva paṭikkhitto. Imasmiṃ sutte ubhayampetaṃ akathetvā paramasallekho nāma kathito. Yo hi bhikkhu pāṇīyaghaṭe vā pāṇīyaṃ pivantānaṃ, patte vā bhattaṃ bhuñjantānaṃ kākānaṃ nivāraṇavasena hatthaṃ vā daṇḍaṃ vā leḍḍuṃ vā uggirati, tassa kāyasamācāro aparisuddho. Viparīto parisuddho nāma. **Uttānoti** uggato pākaṭo. **Vivaṭoti** anāvaṭo asañchanno. Ubhayenāpi parisuddhatamyeva dīpeti. **Na ca chiddavāti** sadā ekasadiṣo antarantare chiddarahito. **Samvutoti** kilesānaṃ dvāra pidahanena pidahito, na vajjapaṭicchādanatthāya.

418. Vacīsamācārepi yo bhikkhu musā vadati, piṣuṇaṃ katheti, pharusam bhāsati, samphaṃ palapati, tassa vacīsamācāro aparisuddho nāma. Ayaṃ pana kammaṭṭhavasena vārito. Yo pana gahapatikāti vā dāsāti vā pessāti vā ādīhi khumsento vadati, tassa vacīsamācāro aparisuddho nāma. Ayaṃ pana sikkhāpadabaddheneva paṭikkhitto. Imasmiṃ sutte ubhayampetaṃ akathetvā paramasallekho nāma kathito. Yo hi bhikkhu daharena vā sāmañerena vā, “kacci, bhante, amhākaṃ upajjhāyaṃ passathā”’ti vutte, sambahulā, āvuso, bhikkhubhikkhuniyo ekasmiṃ padese vicadimsu, upajjhāyo te vikkāyikasākabhaṇḍikaṃ ukkhipivā gato bhavissati”’tiadinā nayena hasādhippāyopi evarūpaṃ kathaṃ katheti, tassa vacīsamācāro aparisuddho. Viparīto parisuddho nāma.

419. Manosamācāre yo bhikkhu abhijjhālu byāpannacitto micchādiṭṭhiko hoti, tassa manosamācāro aparisuddho nāma. Ayaṃ pana kammaṭṭhavaseneva vārito. Yo pana upanikkhittaṃ jātarūparajataṃ sādiyati, tassa manosamācāro aparisuddho nāma. Ayampi sikkhāpadabaddheneva paṭikkhitto. Imasmiṃ sutte ubhayampetaṃ akathetvā paramasallekho nāma kathito. Yo pana bhikkhu kāmavitakkaṃ vā byāpādavitakkaṃ vā vihiṃsāvitakkaṃ vā vitakketi, tassa manosamācāro aparisuddho. Viparīto parisuddho nāma.

420. Ājīvasmiṃ yo bhikkhu ājīvahetu vejjakammaṃ pañāgamaṇaṃ gaṇḍaphālaṇaṃ karoti, arumakkhanaṃ deti, telaṃ pacatīti ekavīsātiesanāvasena jīvikaṃ kappeti. Yo vā pana viññāpetvā bhuñjati, tassa ājīvo aparisuddho nāma. Ayaṃ pana sikkhāpadabaddheneva paṭikkhitto. Imasmiṃ sutte ubhayampetaṃ akathetvā paramasallekho nāma kathito. Yo hi bhikkhu sappinavanītatelamadhuḥphāṇitādīni labhitvā, “sve vā punadvase vā bhavissati”’ti sannidhikārakaṃ paribhuñjati, yo vā pana nimbaṅkurādīni disvā sāmañere vadati – “amānkure khādathā”’ti, sāmañerā thero khādītukāmoti kappiyaṃ katvā denti, dahare pana sāmañere vā pāṇīyaṃ pivatha, āvusoti vadati, te thero pāṇīyaṃ pivitukāmoti pāṇīyasaṅkhaṃ dhovivā denti, tampi paribhuñjantassa ājīvo aparisuddho nāma hoti. Viparīto parisuddho nāma.

422. Mattaññūti pariyesanapaṭiggahaṇaparibhogesu mattaññū, yuttaññū, pamāṇaññū.

423. Jāgariyamānuyuttāti rattindivaṃ cha koṭṭhāse katvā ekasmiṃ koṭṭhāse niddāya okāsaṃ datvā pañca koṭṭhāse jāgariyamhi yuttā payuttā. **Sīhaseyyanti** ettha kāmabhogiseyyā, petaseyyā, sīhaseyyā, tathāgataseyyāti catasso seyyā. Tattha “yebhuyyena, bhikkhave, kāmabhogī sattā vāmena passena senti”’ti (a. ni. 4.246) ayaṃ

kāmabhogiseyyā, tesu hi yebhuyyena dakkhiṇapassena sayāno nāma natthi.

“Yebhuyyena, bhikkhave, petā uttānā senti”’ti (a. ni. 4.246) ayaṃ **petaseyyā**, petā hi appamaṃsalohittā aṭṭhisanghātajāṭitā ekena passena sayitūṃ na sakkonti, uttānāva senti.

“Yebhuyyena, bhikkhave, sīho migarājā naṅguṭṭhaṃ antarasatthimhi anupakkhipitvā dakkhiṇena passena seti”’ti (a. ni. 4.246) ayaṃ **sihaseyyā**. Tejussadattā hi sīho migarājā dve purimapāde ekasmiṃ ṭhāne pacchimapāde ekasmiṃ ṭhapetvā naṅguṭṭhaṃ antarasatthimhi pakkhipitvā purimapādapacchimapādanaṅguṭṭhānaṃ ṭhitokāsaṃ sallakkhetvā dvinnāṃ purimapādānaṃ matthake sīsaṃ ṭhapetvā sayati. Divasampi sayitvā pabujjhamāno na utrāsanto pabujjhati. Sīsaṃ pana ukkhipitvā purimapādānaṃ ṭhitokāsaṃ sallakkheti. Sace kiñci ṭhānaṃ vijahitvā ṭhitaṃ hoti, “nayidaṃ tuyhaṃ jātiyā, na sūrabhāvassa ca anurūpa”’nti anattamano hutvā tattheva sayati, na gocarāya pakkamati. Avijahitvā ṭhite pana “tuyhaṃ jātiyā sūrabhāvassa ca anurūpamida”’nti haṭṭhatuṭṭho utṭhāya sīhavijambhitaṃ vijambhitvā kesarabhāraṃ vidhunitvā tikkhattuṃ sīhanādaṃ naditvā gocarāya pakkamati. Catutthajjhānaseyyā pana **tathāgataseyyā**ti vuccati. Tāsu idha sīhaseyyā āgatā. Ayañhi tejussadairiyāpathattā uttamaseyyā nāma. **Pāde pādanti** dakkhiṇapāde vāmapādaṃ. **Accādhāyā**ti atīdhāya īsakaṃ atikkamma ṭhapetvā, gopphakena hi gopphake, jāṇunā vā jāṇumhi saṅghaṭṭiyamāne abhiṇhaṃ vedanā uppajjati, cittaṃ ekaggaṃ na hoti, seyyā aphāsukā hoti. Yathā pana na saṅghaṭṭeti, evaṃ atikkamma ṭhapite vedanā nuppajjati, cittaṃ ekaggaṃ hoti, seyyā phāsukā hoti, tasmā evamāha.

425. Abhijjhaṃ loketiādi cūlahatthipade vitthāritaṃ.

426. Yā panāyaṃ **seyyathāpi**, **bhikkhavi**ti upamā vuttā. Tattha **īnaṃ ādāyā**ti vaḍḍhiyā dhaṇaṃ gahetvā. **Byanti kareyyā**ti vigatantāni kareyya. Yathā tesam kākāṇikamattopi pariyaṇto nāma nāvasissati, evaṃ kareyya, sabbaso paṇiniyyāteyyāti attho. **Tatonidānanti** āṇaṇyanidānaṃ. So hi āṇaṇomhīti āvajjanto balavapāmojjaṃ labhati, balavasomanassamadhigacchati. Tena vuttaṃ – “labhetha pāmojjaṃ, adhigaccheyya somanassa”’nti.

Visabhāgavedanuppattiyā kakaceneva catuiriyāpathaṃ chindanto ābādhatīti ābādho, svāssa atthīti **ābādhiko**. Taṃsamutṭhānena dukkhena **dukkhito**. **Adhimattagilānoti** bālḥagilāno. **Nacchādeyyā**ti adhimattabyādhiparetatāya na ruceyya. **Balamattā**ti balameva, balañcassa kāye na bhavēyyāti attho. **Tatonidānanti** ārogyanidānaṃ, tassa hi arogomhīti āvajjayato tadubhayaṃ hoti. Tena vuttaṃ – “labhetha pāmojjaṃ, adhigaccheyya somanassa”’nti. **Na cassa kiñci bhogānaṃ vayoti** kākāṇikamattampi bhogānaṃ vayo na bhavēyya. **Tatonidānanti** bandhanāmokkhanidānaṃ, sesaṃ vuttanayeneva sabbapadesu yojetabbaṃ. **Anattādhīnoti** na attani adhīno, attano ruciyā kiñci kātuṃ na labhati. **Parādhīnoti** paresu adhīno, parasseva ruciyā pavattati. **Na yena kāmam gamoti** yena disābhāgenassa kāmo hoti. Icchā uppajjati gamanāya, tena gantuṃ na labhati. **Dāsabyā**ti dāsabhāvā. **Bhujissoti** attano santako. **Tatonidānanti** bhujissanidānaṃ. **Kantāraddhānamagganti** kantāraṃ addhānamaggaṃ, nirudakaṃ dīghamagganti attho. **Tatonidānanti** khemantabhūminidānaṃ.

Ime pañca nīvaraṇe appahīneti ettha bhagavā appahīnaṃ kāmaccchandanivaraṇaṃ iṇasadisaṃ, sesāni rogādisadisāni katvā dasseti. Tatrāyaṃ sadisatā – yo hi paresaṃ iṇaṃ gahetvā vināseti. So tehi iṇaṃ dehīti vuccamānopi pharusaṃ vuccamānopi bajjhamānopi pahariyamānopi kiñci paṭibāhituṃ na sakkoti, sabbam titikkhati, titikkhakāraṇaṅghissa taṃ iṇaṃ hoti. Evamevaṃ yo yamhi kāmaccchandaṇa rajjati, taṅhāgaṇena taṃ vatthuṃ gaṇhāti, so tena pharusaṃ vuccamānopi bajjhamānopi pahariyamānopi sabbam titikkhati. Titikkhakāraṇaṅghissa so kāmaccchando hoti gharasāmikehi vadhiyamānānaṃ itthīnaṃ viyāti. Evaṃ iṇaṃ viya **kāmaccchando** daṭṭhabbo.

Yathā pana pittarogāturo madhusakkarādīsopi dinnesu pittarogāturatāya tesam rasaṃ na vindati, tittakaṃ tittakanti uggiratiyeva. Evamevaṃ byāpannacitto hitakāmehi ācariyupajjhāyehi appamattakampi ovādiyamāno ovādaṃ na gaṇhāti, “ati viya me tumhe upaddavethā”’tiādīni vatvā vibbhamati. Pittarogāturatāya so puriso madhusakkarādirasaṃ viya, kodhāturatāya jhānasukhādibhedam sāsanasasaṃ na vindatīti. Evaṃ rogo viya **byāpādo** daṭṭhabbo.

Yathā pana nakkhattadivase bandhanāgāre baddho puriso nakkhattassa neva ādiṃ, na majjhaṃ, na pariyoṣānaṃ passati. So dutiyadivase mutto, “aho hiyyo nakkhattaṃ manāpaṃ, aho naccaṃ, aho gīta”ntiādīni sutvāpi paṭivacanaṃ na deti. Kiṃ kārāṇā? Nakkhattassa ananubhūtattā. Evamevaṃ thinamiddhābhībhūto bhikkhu vicittanayepi dhammassavane pavattamāne neva tassa ādiṃ, na majjhaṃ, na pariyoṣānaṃ jānāti. So uttāhite dhammassavane, “aho dhammassavanaṃ, aho kārāṇaṃ, aho upamā”ti dhammassavanassa vaṇṇaṃ bhaṇamānānaṃ sutvāpi paṭivacanaṃ na deti. Kiṃ kārāṇā? Thinamiddhavasena dhammakathāya ananubhūtattāti. Evaṃ bandhanāgāraṃ viya **thinamiddhaṃ** daṭṭhabbaṃ.

Yathā pana nakkhattaṃ kīlantopi dāso, “idaṃ nāma accāyikaṃ karaṇīyaṃ atthi, sīghaṃ, tattha gaccha, no ce gacchasi, hatthapādaṃ vā te chindāmi kaṇṇanāsaṃ vā”ti vutto sīghaṃ gacchatiyeva, nakkhattassa ādimajjhapariyoṣānaṃ anubhaviṃ na labhati. Kasmā? Parādhīnatāya. Evamevaṃ vinaye appakataññunā vivekatthāya araṇṇaṃ pavitthenāpi kismiñcīdeva antamaso kappiyamaṃsepi akappiyamaṃsasaññāya uppannāya vivekaṃ pahāya sīlavisoḍhanatthaṃ vinayadharassa santike gantabbaṃ hoti. Vivekasukhaṃ anubhaviṃ na labhati. Kasmā? Uddhaccakukkuccābhībhūtātāyāti, evaṃ dāsabyaṃ viya **uddhaccakukkuccaṃ** daṭṭhabbaṃ.

Yathā pana kantāraddhānamaggapaṭipanno puriso corehi manussānaṃ viluttokāsaṃ pahatokāsañca disvā daṇḍakasaddenapi sakuṇasaddenapi corā āgatāti ussānkitaparisaṅkito hoti, gacchatipi, tiṭṭhatipi, nivattatipi, gataṭṭhānato āgataṭṭhānameva bahutaraṃ hoti. So kicchena kasirena khemantabhūmiṃ pāpuṇāti vā, na vā pāpuṇāti. Evamevaṃ yassa aṭṭhasu ṭhānesu vicikicchā uppannā hoti. So “buddho nu kho, na nu kho buddho”tiādīnā nayena vicikicchanto adhimuccitvā saddhāya gaṇḍhituṃ na sakkoti. Asakkonto maggaṃ vā phalaṃ vā na pāpuṇāti yathā kantāraddhānamagge “corā atthi natthi”ti punappunaṃ āsappanaparisaṅganaṃ apariyogāhanaṃ chambhitatta cittassa uppādentō khemantapattiyā antarāyaṃ karoti, evaṃ **vicikicchāpi** “buddho nu kho na buddho”tiādīnā nayena punappunaṃ āsappanaparisaṅganaṃ apariyogāhanaṃ chambhitattaṃ cittassa uppādayamānā ariyabhūmippattiyā antarāyaṃ karotīti kantāraddhānamaggo viya daṭṭhabbā.

Idāni **seyyathāpi, bhikkhave, āṇaṇyanti** ettha bhagavā pahīnakāmacchandaniṅvaraṇaṃ āṇaṇyasadisāṃ, sesāni ārogyādisadisāni katvā dasseti. Tatrāyaṃ sadisatā – yathā hi puriso iṇaṃ ādāya kammante payojetvā samiddhakammanto, “idaṃ iṇaṃ nāma palibodhamūla”nti cintetvā savaḍḍhikaṃ iṇaṃ niyyātetvā paṇṇaṃ phālāpeyya. Athassa tato paṭṭhāya neva koci dūtaṃ peseti, na paṇṇaṃ, so iṇasāmike disvāpi sace icchati, āsanā uttāhāti, no ce, na uttāhāti. Kasmā? Tehi saddhiṃ nillepatāya alaggaṭāya. Evameva bhikkhu, “ayaṃ kāmacchando nāma palibodhamūla”nti satipaṭṭhāne vuttanayeneva cha dhamme bhāvetvā kāmacchandaniṅvaraṇaṃ pajahāti. Tassevaṃ pahīnakāmacchandassa yathā iṇamuttassa purisassa iṇasāmike disvā neva bhayaṃ na chambhitattaṃ hoti. Evameva paravatthumhi neva saṅgo na bandho hoti. Dibbānīpi rūpāni passato kilesa na samudācarati. Tasmā bhagavā āṇaṇyamiva kāmacchandappahānamāha.

Yathā pana so pittarogāturo puriso bhesajjakiriyāya taṃ rogaṃ vūpasametvā tato paṭṭhāya madhusakkarādīnaṃ rasaṃ vindati. Evamevaṃ bhikkhu, “ayaṃ byāpādo nāma anattakārako”ti cha dhamme bhāvetvā byāpādaniṅvaraṇaṃ pajahāti. So evaṃ pahīnabyāpādo yathā pittarogavimutto puriso madhusakkarādīni madhurāni sampiyāyamāno paṭisevati. Evamevaṃ ācārapaṇṇattīādīni sikkhāpiyamāno sirasā sampācchitvā sampiyāyamāno sikkhati. Tasmā bhagavā ārogyamiva byāpādappahānamāha.

Yathā so nakkhattadivase bandhanāgāraṃ pavesito puriso aparasmīṃ nakkhattadivase, “pubbepi ahaṃ pamādadōsena baddho taṃ nakkhattaṃ nānubhavāmi, idāni appamatto bhavissāmi”ti yathāssa paccatthikā okāsaṃ na labhanti. Evaṃ appamatto hutvā nakkhattaṃ anubhavitvā – “aho nakkhattaṃ aho nakkhatta”nti udānaṃ udānesi. Evameva bhikkhu, “idaṃ thinamiddhaṃ nāma mahāanattakara”nti cha dhamme bhāvetvā thinamiddhaniṅvaraṇaṃ pajahāti. So evaṃ pahīnathinamiddho yathā bandhanā mutto puriso sattāhampi nakkhattassa ādimajjhapariyoṣānaṃ anubhavati. Evamevaṃ bhikkhu dhammanakkhattassa ādimajjhapariyoṣānaṃ anubhavanto saha paṭisambhidāhi arahattaṃ pāpuṇāti. Tasmā bhagavā bandhanā mokkhamiva thinamiddhappahānamāha.

Yathā pana dāso kañcīdeva mittāṃ upanissāya sāmikānaṃ dhaṇaṃ datvā attānaṃ bhujissaṃ katvā tato paṭṭhāya yaṃ icchati, taṃ kareyya. Evameva bhikkhu, “idaṃ uddhaccakukkuccaṃ nāma mahāanattakara”nti

cha dhamme bhāvetvā uddhaccakukkuccaṃ pajahati. So evaṃ pahīnuddhaccakukkucco yathā bhujisso puriso yaṃ icchati, taṃ karoti. Na taṃ koci balakkārena tato nivatteti. Evamevaṃ bhikkhu yathāsukhaṃ nekkhammapaṭipadaṃ paṭipajjati, na naṃ uddhaccakukkuccaṃ balakkārena tato nivatteti. Tasmā bhagavā bhujissaṃ viya uddhaccakukkuccappahānamāha.

Yathā balavā puriso hatthasāraṃ gahetvā sajjāvudho sapaṇivāro kantāraṃ paṭipajjeyya. Taṃ corā dūratova disvā palāyeyyūṃ. So sotthinā taṃ kantāraṃ nittharivā khemantaṃ patto haṭṭhatuṭṭho assa. Evamevaṃ bhikkhu, “ayaṃ vicikicchā nāma anattakārikā”ti cha dhamme bhāvetvā vicikicchaṃ pajahati. So evaṃ pahīnavicikiccho yathā balavā sajjāvudho sapaṇivāro puriso nibbhayo core tiṇaṃ viya agaṇetvā sotthinā nikkhamitvā khemantabhūmiṃ pāpuṇāti. Evamevaṃ duccharitakantāraṃ nittharivā paramakhemantabhūmiṃ amataṃ nibbānaṃ pāpuṇāti. Tasmā bhagavā khemantabhūmiṃ viya vicikicchāpahānamāha.

427. Imameva kāyanti imaṃ karajakāyaṃ. **Abhisandeti**ti temeti sneheti, sabbattha pavattapītisukhaṃ karoti. **Parisandeti**ti samantato sandeti. **Paripūreti**ti vāyunaṃ bhastaṃ viya pūreti. **Parippharati**ti samantato phusati. **Sabbāvato kāyassāti** assa bhikkhuno sabbakoṭṭhāsavato kāyassa. Kiñci upādinna kasantatipavattitṭhāne chavimamsalohitānugataṃ aṇumattampi ṭhānaṃ paṭhamajjhānasukhena aphuṭṭhaṃ nāma na hoti. **Dakkhoti** cheko paṭibalo nhānīyacuṇṇāni kātuñceva yojetuñca sannetuñca. **Kaṃsathāleti** yena kenaci lohena katabhājane. Mattikabhājanaṃ pana thiraṃ na hoti, sannentassa bhijjati, tasmā taṃ na dasseti. **Paripphosakaṃ paripphosakanti** siñcitvā siñcitvā. **Sanneyyāti** vāmahatthena kaṃsathālaṃ gahetvā dakkhiṇena hatthena pamāṇayuttaṃ udakaṃ siñcitvā siñcitvā parimaddanto piṇḍaṃ kareyya. **Snehānugatāti** udakasinehena anugatā. **Snehaparetāti** udakasinehena parigatā. **Santarabāhirāti** saddhiṃ antopadesena ceva bahipadesena ca, sabbatthakameva udakasinehena phuṭṭāti attho. **Na ca pagghariṇīti** na bindu bindu udakaṃ paggharati, sakkā hoti hatthenapi dvīhipi tīhipi aṅgulīhi gahetuṃ ovaṭṭikampi kātunti attho.

428. Dutiyajjhānasukhaupamāyaṃ **ubbhitodakoti** ubbhinnaudako, na heṭṭhā ubbhijjivā uggacchanaudako, antoyeva pana ubbhijjanaudakoti attho. **Āyamukhanti** āgamanamaggo. **Devoti** megho. **Kālenakālanti** kāle kāle, anvaddhamāsaṃ vā anudasāhaṃ vāti attho. **Dhāranti** vuṭṭhiṃ. **Nānuppaveccheyyāti** na paveseyya, na vasseyyāti attho. **Sītā vāridhārā ubbhijjivāti** sītaṃ vāri taṃ udakarahadaṃ pūrayamānaṃ ubbhijjivā. Heṭṭhā uggacchanaudakañhi uggantvā uggantvā bhijjantaṃ udakaṃ khobheti. Catūhi disāhi pavisanaukamaṃ purāṇapaṇṇatīṇakattāṇḍakādīhi udakaṃ khobheti. Vuṭṭhiudakaṃ dhārānipātapupphulaṃkehi udakaṃ khobheti. Sannisinnameva pana hutvā iddhiṇimmitamiva uppajjamānaṃ udakaṃ imaṃ padesaṃ pharati, imaṃ padesaṃ na pharatīti natthi. Tena aphuṭṭokāso nāma na hotīti. Tattha rahado viya karajakāyo, udakaṃ viya dutiyajjhānasukhaṃ. Sesam purimanayeneva veditabbaṃ.

429. Tatiyajjhānasukhaupamāyaṃ uppalāni ettha santīti **uppalinī**. Sesapadadvayesupi eseva nayo. Ettha ca setarattanīlesu yaṃkiñci uppalaṃ uppalameva, ūnakasatapatthaṃ puṇḍarīkaṃ, satapatthaṃ padumaṃ. Pattaniyamaṃ vā vināpi setaṃ padumaṃ, rattamaṃ puṇḍarīkanti ayamettha vinicchayo. **Udakānugatānīti** udakato na ugatāni. **Antonimuggaposiṇīti** udakatalassa anto nimuggāniyeva hutvā posīni, vaḍḍhīnīti attho. Sesam purimanayeneva veditabbaṃ.

430. Catutthajjhānasukhaupamāyaṃ **parisuddhena cetasā pariyodātenāti** ettha nirupakkilesaṭṭhena parisuddhaṃ. Pabhassaraṭṭhena pariyodātaṃ veditabbaṃ. **Odātena vatthenāti** idaṃ utupharaṇatthaṃ vuttaṃ. Kiliṭṭhavatthena hi utupharaṇaṃ na hoti, taṅkhaṇadhotaparissuddhena utupharaṇaṃ balavaṃ hoti. Imissā hi upamāya vatthaṃ viya karajakāyo. Utupharaṇaṃ viya catutthajjhānasukhaṃ. Tasmā yathā sunhātassa purisassa parisuddhaṃ vatthaṃ sasīsaṃ pārupitvā nisinnassa sarīrato utu sabbameva vatthaṃ pharati, na koci vatthassa aphuṭṭokāso hoti. Evaṃ catutthajjhānasukhena bhikkhuno karajakāyassa na koci okāso aphuṭṭo hotīti evamettha attho daṭṭhabbo. Catutthajjhānacittameva vā vatthaṃ viya, taṃsamuṭṭhānarūpaṃ utupharaṇaṃ viya. Yathā hi katthaci odātavatthe kāyaṃ apphusantepi taṃsamuṭṭhānena utunā sabbatthakameva kāyo phuṭṭho hoti. Evaṃ catutthajjhānasamuṭṭhitena sukhumarūpena sabbatthakameva bhikkhuno karajakāyo phuṭṭo hotīti evamettha attho daṭṭhabbo.

431. Pubbenivāsañāupamāyaṃ **taṃdivasaṃ katakiriyā pākāṭā hotīti** taṃdivasaṃ gatagāmatayameva gahitaṃ. Tattha gāmatayaṃ gatapuriso viya pubbenivāsañāṇalābhī daṭṭhabbo. Tayo gāmā viya tayo bhavā

daṭṭhabbā. Tassa purisassa tīsu gāmesu taṃdivasaṃ katakiriyāya āvibhāvo viya pubbenivāsāya cittaṃ abhinīharitvā nisinnassa bhikkhuno tīsu bhavesu katakiriyāya āvibhāvo daṭṭhabbo.

432. Dibbacakkhuupamāyaṃ **dve agārāti** dve gharā. **Sadvārāti** sammukhadvārā. **Anucaṅkamanteti** aparāparaṃ sañcarante. **Anu vicaranteti** ito cito ca vicarante, ito pana gehā nikkhamitvā etaṃ gehaṃ, etasmā vā nikkhamitvā imaṃ gehaṃ pavisanavasena pi daṭṭhabbā. Tattha dve agārā sadvārā viya cutipatisandhiyo, cakkhumā puriso viya dibbacakkhuññālabhī, cakkhumato purisassa dvinnāṃ gehānaṃ antare ṭhatvā passato dve agāre pavisanakanikkhamanakapurisānaṃ pākatakālo viya dibbacakkhulābhino ālokaṃ vaḍḍhetvā olokaṃ cavanakaupapajjanakasattānaṃ pākatakālo. Kiṃ pana te ñāṇassa pākāṭā, puggalassāti? Ñāṇassa. Tassa pākāṭattā pana puggalassa pākāṭāyevāti.

433. Āsavakkhayañānaupamāyaṃ **pabbatasāṅkhepeti** pabbatamatthake. **Anāviloti** nikkaddamo. Sippiyo ca sambukā ca **sippisambukaṃ**. Sakkharā ca kathaḷā ca **sakkharakathalaṃ**. Macchānaṃ gumbā ghaṭṭāti **macchagumbaṃ**. **Tiṭṭhantampi carantampīti** ettha sakkharakathalaṃ tiṭṭhatiyeva, itarāni carantipi tiṭṭhantipi. Yathā pana antarantarā ṭhitāsupi nisinnāsupi vijjānāsopi, “etā gāvo carantī”ti carantiyo upādāya itarāpi carantīti vuccanti. Evaṃ tiṭṭhantameva sakkharakathalaṃ upādāya itarampi dvayaṃ tiṭṭhantanti vuttaṃ. Itarāñca dvayaṃ carantaṃ upādāya sakkharakathalampi carantanti vuttaṃ. Tattha cakkhumato purisassa tīre ṭhatvā passato sippisambukādīnaṃ vibhūtakālo viya āsavānaṃ khayāya cittaṃ nīharitvā nisinnassa bhikkhuno catunnaṃ saccānaṃ vibhūtakālo daṭṭhabbo.

434. Idāni sattahākārehi salīngato saṅgato khīṇāsavassa nāmaṃ gaṇhanto, **ayaṃ vuccati, bhikkhave, bhikkhu samaṇo itipīti**ādīmāha. Tattha **evaṃ kho, bhikkhave, bhikkhu samaṇo hotīti**ādīsu, bhikkhave, evaṃ bhikkhu samitapāpattā **samaṇo** hoti. Bāhitapāpattā **brāhmaṇo** hoti. Nhātakilesattā **nhātako** hoti, dhotakilesattāti attho. Catumaggañānasāṅkhātehi vedehi akusaladhammaṃ gatattā **vedagū** hoti, viditattāti attho. Teneva **viditāssa hontīti**ādīmāha. Kilesānaṃ sutattā **sottiyo** hoti, nissuttattā apahatattāti attho. Kilesānaṃ ārakattā **ariyo** hoti, hatattāti attho. Tehi ārakattā **arahaṃ** hoti, dūrībhūtattāti attho. Sesāṃ sabattha pākāṭamevāti.

Papañcasūdaniyā majjhimanikāyaṭṭhakathāya

Mahāassapuraṣuttavaṇṇanā niṭṭhitā.

10. Cūḷaassapuraṣuttavaṇṇanā

435. **Evaṃ me sutanti** cūḷaassapuraṣuttaṃ. Tassa desanākāraṇaṃ purimasadisameva. **Samaṇasāmīcippaṭipadāti** samaṇānaṃ anucchavikā samaṇānaṃ anulomappaṭipadā.

436. **Samaṇamalānanti**ādīsu ete dhammā uppajjamānā samaṇe maline karonti malaggahite, tasmā “samaṇamalā”ti vuccanti. Etehi samaṇā dussanti, padussanti, tasmā **samaṇadosāti** vuccanti. Ete uppajjitvā samaṇe kasaṭe niroje karonti milāpentī, tasmā **samaṇakasaṭāti** vuccanti. **Āpāyikānaṃ ṭhānānanti** apāye nibbattāpakānaṃ kāraṇānaṃ. **Duggativedaniyānanti** duggatiyaṃ vipākavedanāya paccayānaṃ. **Matajaṃ nāmāti** manussā tikhiṇaṃ ayaṃ ayena sughaṃsitvā taṃ ayacuṇṇaṃ maṃsena saddhiṃ madditvā koṇcasakuṇe khādāpentī. Te uccāraṃ kātuṃ asakkontā maranti. No ce maranti, paharitvā mārentī. Atha tesāṃ kucchiṃ phāletvā naṃ udakena dhovitvā cuṇṇaṃ gahetvā maṃsena saddhiṃ madditvā puna khādāpentīti evaṃ satta vāre khādāpetvā gahitena ayacuṇṇena āvudhaṃ karonti. Susikkhitā ca naṃ ayakārā bahuhattakammamūlaṃ labhitvā karonti. Taṃ matasakuṇato jātattā “mataja”nti vuccati, atitikhīṇaṃ hoti. **Pītanisitanti** udakapītañceva silāya ca sunighaṃsitāṃ. **Saṅghāṭiyāti** kosiyā. **Sampārutanti** pariyaṇaddhaṃ. **Sampaliveṭhitanti** samantato veṭhitāṃ.

437. **Rajojallikassāti** rajojalladhārino. **Udakorohakassāti** divasassa tikkhattuṃ udakaṃ orohantassa. **Rukkhamūlikassāti** rukkhamūlavāsino. **Abbhokāsikassāti** abbhokāsavāsino. **Ubbhaṭṭhakassāti** uddhaṃ ṭhitakassa. **Pariyāyabhattikassāti** māsavārena vā aḍḍhamāsavārena vā bhūñjantassa. Sabbametaṃ bāhiraṃ samayeneva kathitaṃ. Imasmiñhi sāsane cīvaradharo bhikkhu saṅghāṭikoti na vuccati. Rajojalladhāraṇādivatāni imasmiṃ sāsane natthiyeva. Buddhavacanassa buddhavacanameva nāmaṃ, na

mantāti. Rukkhamūliko, abbhokāsikoti ettakamyeva pana labbhati. Tampi bāhirasamayeneva kathitaṃ. **Jātameva nanti taṃdivase jātamattamyeva naṃ. Saṅghāṭikaṃ kareyyunti saṅghāṭikaṃ vatthaṃ nivāsetvā ca pārupitvā ca saṅghāṭikaṃ kareyyuṃ. Esa nayo sabbattha.**

438. Visuddhamattānaṃ samanupassatīti attānaṃ visujjhantaṃ passati. Visuddhoti pana na tāva vattabbo. **Pāmojjaṃ jāyatīti tuṭṭhākāro jāyati. Pamuditassa pīṭīti tuṭṭhassa sakalasarīraṃ khobhayamānā pīti jāyati. Pīṭīmanassa kāyoti pīṭīsampayuttassa puggalassa nāmakāyo. Passambhatīti vīgatadaratho hoti. Sukhaṃ vedetīti kāyikampi cetasikampi sukhaṃ vediyati. Cittaṃ samādhīyatīti iminā nekkhammasukhena sukhīṭassa cittaṃ samādhīyati, appanāpattaṃ viya hoti. So mettāsahagatena cetasāti heṭṭhā kilesavasena āradhā desanā pabbate vuṭṭhavuṭṭhi viya naḍiṃ yathānusandhinā brahmavīhārahāvanam otiṇṇā. Tattha yaṃ vattabbaṃ siyā, taṃ sabbaṃ visuddhimagge vuttameva. Seyyathāpi, bhikkhave, pokkharāṇīti mahāsīhanādasutte maggo pokkharāṇīyā upamīto, idha sāsanaṃ upamītanti veditabbaṃ. Āsavānaṃ khayā samaṇo hotīti sabbakilesānaṃ samitattā paramatthasamaṇo hotīti. Sesam sabbattha uttānamevāti.**

Papañcasūdaniyā majjhimanikāyaṭṭhakathāya

Cūlaassapurāsuttavaṇṇanā niṭṭhitā.

Catutthavaggavaṇṇanā niṭṭhitā.

5. Cūlayamakavaggo

1. Sāleyyakasuttavaṇṇanā

439. Evaṃ me sutanti sāleyyakasuttaṃ. Tattha **kosalesūti** kosalā nāma jānapadino rājakumārā. Tesam nivāso ekopi janapado ruḥīsaddena kosalāti vuccati, tasmīṃ kosalesu janapade. Porāṇā panāhu – yasmā pubbe mahāpanādaṃ rājakumāraṃ nānānāṭakāni disvā sitamattampi akarontaṃ sutvā rājā āha – “yo mama puttaṃ hasāpeti, sabbālaṅkārena naṃ alaṅkaromī”ti. Tato naṅgalānīpi chaḍḍetvā mahājanakāye sannipatite manussā sātīrekāni sattavassāni nānākīṭikāyo dassetvā naṃ hasāpetuṃ nāsakkhīṃsu. Tato sakko devanaṭṭaṃ pesesi. So dibbanāṭakaṃ dassetvā hasāpesi. Atha te manussā attano attano vasanokāsābhīmuḥkhaṃ pakkamīṃsu. Te paṭipathe mittasuhajjādayo disvā paṭisanthāraṃ karontā, “kacci, bho, kusalaṃ, kacci, bho, kusala”nti āhaṃsu. Tasmā taṃ “kusalaṃ kusala”nti vacanaṃ upādāya so padeso kosalāti vuccatīti.

Cārikaṃ caramānoti aturitaṅkārikaṃ caramāno. **Mahatā bhikkhusaṅghena saddhīnti** sataṃ vā sahasaṃ vā satahasaṃ vāti evaṃ aparicchinnena mahatā bhikkhusaṅghena saddhīṃ. **Brāhmaṇagāmoti** brāhmaṇānaṃ samosaraṇagāmopi brāhmaṇagāmōti vuccati brāhmaṇānaṃ bhogagāmopi. Idha samosaraṇagāmo adhippeto. **Tadavasarīti** taṃ avasari, sampattoti attho. Vihāro panettha aniyāmito; tasmā tassa avidūre buddhānaṃ anucchaviko eko vanasaṅḍo bhavissati, satthā taṃ vanasaṅḍaṃ gatoti veditabbo. **Assosunti** suṇīṃsu upalabhiṃsu. Sotadvārasampattavacanānigghosānusārena jāniṃsu. **Khoti** avadhāraṇatthe padapūraṇamatte vā nipāto. Tattha avadhāraṇatthena assosumyeva, na nesaṃ koci savanantarāyo ahoṣīti ayamattho veditabbo. Padapūraṇena byañjanasiliṭṭhatāmatameva.

Idāni yamatthaṃ assosum, taṃ pakāsetuṃ **samaṇo khalu, bho, gotamoti**ādi vuttaṃ. Tattha samitapāpattā **samaṇoti** veditabbo. **Khalūti** anussavanatthe nipāto. **Bhoti** tesam aññamaññaṃ ālapanamattaṃ. **Gotamoti** bhagavato gottavasena paridīpanaṃ. Tasmā **samaṇo khalu, bho, gotamoti** ettha samaṇo kira, bho, gotamagottoti evamattho daṭṭhabbo. **Sakyaputtoti** idaṃ pana bhagavato uccākulaparidīpanaṃ. **Sakyakulā pabbajitoti** saddhāpabbajitabhāvadīpanaṃ. Kenaci pārījuññaṃ anabhībhūto aparikkhīṇaṃyeva taṃ kulaṃ pahāya saddhāpabbajitoti vuttaṃ hoti. Tato paraṃ vuttatthameva. **Taṃ kho panāti** itthambhūtākhyānatthe upayogavacanaṃ, tassa kho pana bhoto gotamassāti attho. **Kalyāṇoti** kalyāṇaguṇasamānāgato, seṭṭhoti vuttaṃ hoti. **Kittisaddoti** kittiyeva, thutighoso vā. **Abbhuggatoti** sadevakaṃ lokaṃ ajjhottharītvā uggato. Kintī? “Itipi so bhagavā...pe... buddho bhagavā”ti.

Tatrāyaṃ padasambandho – so bhagavā itipi arahaṃ, itipi sammāsambuddho...pe... itipi bhagavāti. Iminā

ca iminā ca kāraṇenāti vuttaṃ hoti. Tattha ārakattā, arīnaṃ arānañca hatattā, paccayādīnaṃ arahattā, pāpakaraṇe rahābhāvāti imehi tāva kāraṇehi so bhagavā arahanti veditabbotiādīnā nayena mātikaṃ nikkhipitvā sabbāneva etāni padāni visuddhimagge buddhānussatiniddese vitthāritānīti tato tesam vitthāro gahetabbo.

Sādhu kho panāti sundaraṃ kho pana; atthāvahaṃ sukhāvahanti vuttaṃ hoti. **Tathārūpānaṃ arahatanti** yathārūpo so bhavaṃ gotamo, evarūpānaṃ anekehipi kappakoṭṭisatasahasseehi dullabhadassanānaṃ byāmapabhāparikkhittehi asītianubyañjanaratanapaṭimaṇḍitehi dvattiṃsmahāpurisalakkhaṇavarehi samākīṇṇamanoramasarīraṇaṃ atappakadassanānaṃ atimadhuradhammanigghosānaṃ, yathābhūtaguṇādhigamena loke arahantoti laddhasaddānaṃ arahataṃ. **Dassanaṃ hotīti** pasādasommāni akkhīni ummīletvā dassanamattampi sādhu hoti. Sace pana aṭṭhaṅgasamannāgatena brahmassarena dhammaṃ desentassa ekaṃ padampi sotuṃ labhissāma, sādhutaraṃyeva bhavissatīti evaṃ ajjhāsayaṃ katvā.

Yena bhagavā tenupasaṅkamisūti sabbakiccāni pahāya tuṭṭhamānasā āgamaṃsu. **Etadavocunti** duvidhā hi pucchā agārikapucchā anagārikapucchā ca. Tattha “kiṃ, bhante, kusalaṃ, kiṃ akusala”nti iminā nayena agārikapucchā āgatā. “Ime kho, bhante, pañcupādānakkhandhā”ti iminā nayena anagārikapucchā. Ime pana attano anurūpaṃ agārikapucchāṃ pucchantā etaṃ, “ko nu kho, bho gotama, hetu ko paccayo”tiādivacanaṃ avocum. Tesam bhagavā yathā na sakkonti sallakkhetuṃ, evaṃ saṃkhitteneva tāva pañhaṃ vissajjento, **adhammacariyāvisamacariyāhetu kho gahapatayoti**ādīmāha. Kasmā pana bhagavā yathā na sallakkhenti, evaṃ vissajjesīti? Paṇḍitamānikā hi te; āditova mātikaṃ aṭṭhapetvā yathā sallakkhenti, evaṃ atthe vitthārite, desanaṃ uttānikāti maññantā avajānanti, mayampi kathentā evameva katheyyāmāti vattāro bhavanti. Tena nesaṃ bhagavā yathā na sakkonti sallakkhetuṃ, evaṃ saṃkhitteneva tāva pañhaṃ vissajjesi. Tato sallakkhetuṃ asakkontehi vitthāradesanaṃ yācito vitthārena desetum, **tena hi gahapatayoti**ādīmāha. Tattha **tena hīti** kāraṇatthe nipāto. Yasmā maṃ tumhe yācatha, tasmāti attho.

440. Tividhanti tīhi koṭṭhāsehi. Kāyenāti kāyadvārena. **Adhammacariyāvisamacariyāti** adhammacariyasaṅkhātā visamacariyā. Ayaṃ panettha padattho, adhammassa cariyā adhammacariyā, adhammakaraṇanti attho. Visamā cariyā, visamassa vā kammassa cariyāti visamacariyā. Adhammacariyā ca sā visamacariyā cāti adhammacariyāvisamacariyā. Etenupāyena sabbesu kaṇhasukkapadesu attho veditabbo. **Luddoti** kakkhaḷo. **Dāruṇoti** sāhasiko. **Lohitapāṇīti** paraṃ jīvītā voropentassa pāṇī lohitena lippanti. Sacepi na lippanti, tathāvidho lohitapāṇīveva vuccati. **Hatappahate nivīṭṭhoti** hate ca parassa pahārādāne, pahate ca paramāraṇe nivīṭṭho. **Adayāpannoti** nikkaruṇataṃ āpanno.

Yaṃ taṃ parassāti yaṃ taṃ parassa santakaṃ. **Paravittūpakaraṇanti** tasseva parassa vittūpakaraṇaṃ tuṭṭhijanaṃ parikkhārabhaṇḍakaṃ. **Gāmagataṃ vāti** antogāme vā ṭhapitaṃ. **Araññagataṃ vāti** araññe rukkhaggapabbatamatthakādīsū vā ṭhapitaṃ. **Adinnanti** tehi parehi kāyena vā vācāya vā adinnaṃ. **Theyyasaṅkhātanti** ettha **thenoti** coro. Thenassa bhāvo theyyaṃ, avaharaṇacittasettaṃ adhivacanaṃ. Saṅkhā saṅkhātanti atthato ekaṃ, koṭṭhāsassettaṃ adhivacanaṃ, “saññānidānā hi papañcasāṅkhā”tiādīsū viya. Theyyañca taṃ saṅkhātañcāti theyyasaṅkhātaṃ, theyyacittasaṅkhāto eko cittakoṭṭhāsoti attho. Karaṇatthe cettaṃ paccattavacanaṃ, tasmā theyyasaṅkhātenāti atthato daṭṭhabbaṃ.

Māturakkhitātiādīsū yaṃ pitari naṭṭhe vā mate vā ghāsacchādanādīhi paṭijaggamānā, vayapattaṃ kulaghare dassāmīti mātā rakkhati, ayaṃ māturakkhitā nāma. Etenupāyena **piturakkhitā**dayopi veditabbā. Sabhāgakulāni pana kucchigatesupī gabbhesu katikaṃ karonti – “sace mayhaṃ putto hoti, tuyhaṃ dhītā, aññattha gantuṃ na labhissati, mayhaṃ puttasseva hoti”ti. Evaṃ gabbhepi pariggahitā **sassāmikā** nāma. “Yo itthannāmaṃ itthiṃ gacchati, tassa ettako daṇḍo”ti evaṃ gāmaṃ vā gehaṃ vā vīthiṃ vā uddissa ṭhapitadaṇḍā, pana **saparidaṇḍā** nāma. **Antamaso mālāguṇaparikkhittāpīti** yā sabbantimena paricchēdena, “esā me bhariyā bhavissatī”ti saññāya tassā upari kenaci mālāguṇaṃ khipantena mālāguṇamattenāpi parikkhittā hoti. **Tathārūpāsu cārittaṃ āpajjitā hotīti** evarūpāsu itthīsū sammādiṭṭhisutte vuttamicchācāralakkhaṇavasena vītikkaṃ kattā hoti.

Sabhāgototi sabhāyaṃ ṭhito. **Parisāgototi** parisāyaṃ ṭhito. **Nātimajjhagatoti** dāyādānaṃ majjhe ṭhito. **Pūgamajjhagatoti** senīnaṃ majjhe ṭhito. **Rājakulamajjhagatoti** rājakulassa majjhe mahāvinicchaye ṭhito. **Abhinītoti** pucchanaṭṭhāya nīto. **Sakkhipuṭṭhoti** sakkhiṃ katvā pucchito. **Ehambho purisāti** ālapanamettaṃ. **Attahetu vā parahetu vāti** attano vā parassa vā hatthapādādihetu vā dhanahetu vā. **Āmisakiñcikkahetu vāti**

ettha **āmisanti** lābho adhippeto. **Kiñcikkhanti** yaṃ vā taṃ vā appamattakaṃ. Antamaso tittiravaṭṭakasappiṇḍanavanītaṇḍādimattakassapi lañjassa hetūti attho. **Sampajānamusā bhāsītā hotīti** jānantoyeva musāvādaṃ kattā hoti.

Imesaṃ bhedāyāti yesaṃ itoti vuttānaṃ santike sutāṃ hoti, tesāṃ bhedāya. **Amūsaṃ bhedāyāti** yesaṃ amutrāti vuttānaṃ santike sutāṃ hoti, tesāṃ bhedāya. **Iti samaggānaṃ vā bhedakāti** evaṃ samaggānaṃ vā dvinnāṃ sahāyakānaṃ bhedaṃ kattā. **Bhinnānaṃ vā anuppadātāti** suṭṭhu kataṃ tayā, taṃ pajahantena katipāheneva te mahantaṃ anattaṃ kareyyāti evaṃ bhinnānaṃ puna asaṃsandānāya anuppadātā upatthambhetā kāraṇaṃ dassatīti attho. Vaggo ārāmo abhiratiṭṭhānamassatīti **vaggārāmo**. **Vaggaratoti** vaggesu rato. Vagge disvā vā sutvā vā nandatīti **vagganandī**. **Vaggakaraṇiṃ vācanti** yā vācā samaggepi satte vagge karoti bhindati, taṃ kalahakāraṇaṃ vācaṃ bhāsītā hoti.

Aṇḍakāti yathā sadose rukkhe aṇḍakāni uṭṭhahanti, evaṃ sadosatāya khuṃsanāvambhanādivacanehi aṇḍakā jātā. **Kakkasāti** pūtīkā. Yathā nāma pūtīkarukkho kakkaso hoti paggharitaṇṇo, evaṃ kakkasā hoti, sotaṃ ghaṃsamānā viya pavisati. Tena vuttaṃ “kakkasā”ti. **Parakaṭukāti** paresaṃ kaṭukā amanāpā dosajananī. **Parābhisajjanīti** kuṭilakaṇṭakasākhā viya mamesu vijjhivā paresaṃ abhisajjanī gantukāmānampi gantaṃ adatvā lagganakārī. **Kodhasāmantāti** kodhassa āsannā. **Asamādhisaṃvattanikāti** appanāsamādhissa vā upacārasamādhissa vā asaṃvattanikā. Iti sabbāneva tāni sadosavācāya vevacanāni.

Akālavadīti akālena vattā. **Abhūtavādīti** yaṃ natthi, tassa vattā. **Anatthavadīti** akāraṇanissitaṃ vattā. **Adhammavadīti** asabhāvaṃ vattā. **Avinayavadīti** asaṃvaravinayapaṭisaṃyuttassa vattā. **Anidhānavatī vācanti** hadayamañjūsāyaṃ nidhetuṃ ayuttaṃ vācaṃ bhāsītā hoti. **Akālenāti** vattabbakālassa pubbe vā pacchā vā ayuttakāle vattā hoti. **Anapadesanti** suttāpadesavirahitaṃ. **Apariyantavatīti** aparicchedaṃ, suttaṃ vā jātaṃ vā nikkhipivā tassa upalabhaṃ vā upamaṃ vā vatthuṃ vā āharitvā bāhirakathaṃyeva katheti. Nikkhittaṃ nikkhittameva hoti. “Suttaṃ nu kho katheti jātaṃ nu kho, nassa antaṃ vā koṭiṃ vā passamā”ti vattabbaṃ āpajjati. Yathā vaṭarukkhasākhānaṃ gatagataṭṭhāne pārohā otaranti, otiṇṇotiṇṇaṭṭhāne sampajjitvā puna vaḍḍhantiyeva. Evaṃ aḍḍhayaṃyeva yojanampi gacchantiyeva, gacchante gacchante pana mūlarukkho vinassatī, pavenijātakāva tiṭṭhanti. Evamayampi nigrodhadhammakathiko nāma hoti; nikkhittaṃ nikkhittamattameva katvā passeneva pariharanto gacchati. Yo pana bahumpi bhaṇanto etadatthamidaṃ vuttanti āharitvā jānāpetuṃ sakkoti, tassa kathetuṃ vaṭṭati. **Anatthasamhitanti** na atthanissitaṃ.

Abhijjhātā hotīti abhijjhāya oloketā hoti. **Aho vatāti** patthanatthe nipāto. Abhijjhāya olokitamattakena cettha kammaṃpathabhedo na hoti. Yadā pana, “aho vatidaṃ mama santakaṃ assa, ahamettha vasaṃ vatteyya”nti attano pariṇāmeti, tadā kammaṃpathabhedo hoti, ayamidha adhippeto.

Byāpannacittoti vipannacitto pūtibhūtacitto. **Paduṭṭhamanasaṅkappoti** dosena duṭṭhacittasaṅkappo. **Haññantūti** ghātiyantū. **Vajjhantūti** vadhāṃ pāpuṇantu. **Mā vā ahesunti** kiñcipi mā ahesuṃ. Idhāpi kopamattakena kammaṃpathabhedo na hoti. Haññantūtiādicintaneneva hoti, tasmā evaṃ vuttaṃ.

Micchādīṭṭhikoti akusaladassano. **Viparīdadassanoti** vipallatthadassano. **Natthi dinnanti** dinnassa phalābhāvaṃ sandhāya vadati. **Yiṭṭhaṃ** vuccati mahāyāgo. **Hutanti** paheṇakasakkāro adhippeto, tampi ubhayaṃ phalābhāvameva sandhāya paṭikkhipati. **Sukatadukkaṭānanti** sukatadukkaṭānaṃ, kusalākusalānanti attho. **Phalaṃ vipākoti** yaṃ phalanti vā vipākoti vā vuccati, taṃ natthīti vadati. **Natthi ayam lokoti** paraloke ṭhitassa ayam loko natthi. **Natthi paro lokoti** idha loko ṭhitassapi paraloko natthi, sabbe tattha tattheva ucchijjantīti dasseti. **Natthi mātā natthi pitāti** tesu sammāpaṭipattimicchāpaṭipattīnaṃ phalābhāvavasena vadati. **Natthi sattā opapātīkāti** cavitvā upapajjanakasattā nāma natthīti vadati. **Sayaṃ abhiññā sacchikatvā pavedentīti** ye imaṅca lokaṃ paraṅca lokaṃ abhivisiṭṭhāya paññāya sayaṃ paccakkhaṃ katvā pavedenti, te natthīti sabbaññubuddhānaṃ abhāvaṃ dīpeti, ettāvataṃ dasavattthukā micchādīṭṭhi kathitā hoti.

441. Pāṇātipātaṃ pahāyātiādayo satta kammaṃpathā cūlahatthipade vitthāritā. Anabhijjhādayo uttānatthāyeva.

442. Sahabyataṃ upapajjeyyanti sahabhāvaṃ upagaccheyyaṃ. **Brahmakāyīkānaṃ devānanti** paṭhamajjhānabhūmidevānaṃ. **Abhānaṃ devānanti** ābhā nāma viṣuṃ natthi,

parittābhaappamānābhaābhassarānametaṃ adhivacaṇaṃ. **Parittābhānantiādi** pana ekato aggahetvā tesamyeva bhedato gahaṇaṃ. **Parittasubhānantiādi**supi eseva nayo. Iti bhagavā āsavakkhayaṃ dassetvā arahattanikūṭena desanaṃ niṭṭhapesi.

Idha ṭhatvā pana devalokā samānetabbā. Tissannaṃ tāva jhānabhūmīnaṃ vasena nava brahmalokā, pañca suddhāvāsā catūhi ārūpehi saddhiṃ navāti aṭṭhārasa, vehapphalehi saddhiṃ ekūnavīsati, te asaṅṅhaṃ pakkhipitvā vīsati brahmalokā honti, evaṃ chahi kāmāvacarehi saddhiṃ chabbīsati devalokā nāma. Tesam sabbesampi bhagavatā dasakusalakammapathehi nibbatti dassitā.

Tattha chasu tāva kāmāvacaresu tiṇṇaṃ sucaritānaṃ vipākeneva nibbatti hoti. Uparidevalokānaṃ pana ime kammāpathā upanissayavasena kathitā. Dasa kusalakammāpathā hi sīlaṃ, sīlavato ca kasiṇaparikkammaṃ ijḅhatīti. Sīle patiṭṭhāya kasiṇaparikkammaṃ katvā paṭhamajjhānaṃ nibbattetvā paṭhamajjhānabhūmiyaṃ nibbattati; dutiyādīni bhāvetvā dutiyajjhānabhūmiādīsū nibbattati; rūpāvacarajjhānaṃ pādakaṃ katvā vipassanaṃ vaḍḍhetvā anāgāmiṃphale patiṭṭhito pañcasu suddhāvāsesu nibbattati; rūpāvacarajjhānaṃ pādakaṃ katvā arūpāvacarasamāpattiṃ nibbattetvā catūsū arūpesu nibbattati; rūpārūpajjhānaṃ pādakaṃ katvā vipassanaṃ vaḍḍhetvā arahattaṃ pāpuṇāti. Asaṅṅabhavo pana bāhirakānaṃ tāpasaparibbājakānaṃ āciṇṇoti idha na niddiṭṭho. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Sāleyyakasuttavaṇṇanā niṭṭhitā.

2. Verañjakasuttavaṇṇanā

444. Evaṃ me sutanti verañjakasuttaṃ. Tattha **verañjakāti** verañjavāsino. **Kenacideva karaṇīyēnāti** kenacideva aniyamitakiccena. Sesam sabbam purimasutte vuttanayeneva veditabbaṃ. Kevalaṅhi idha **adhammacārī visamacārīti** evaṃ puggalādhiṭṭhānā desanā katā. Purimasutte dhammādhiṭṭhānāti ayaṃ viseso. Sesam tādisamevāti.

Papañcasūdaniyā majjhimanikāyaṭṭhakathāya

Verañjakasuttavaṇṇanā niṭṭhitā.

3. Mahāvedallasuttavaṇṇanā

449. Evaṃ me sutanti mahāvedallasuttaṃ. Tattha **āyasmāti** sagāravasappatissavacaṇametaṃ. **Mahākoṭṭhikoti** tassa therassa nāmaṃ. **Paṭisallānā vuṭṭhitoti** phalasaṃpattito vuṭṭhito. **Duppaṅṅo duppaṅṅoti** ettha paṅṅāya duṭṭhaṃ nāma natthi, appaṅṅo nippaṅṅoti attho. **Kittāvatā nu khoti** kāraṇaparicchedapucchā, kittakena nu kho evaṃ vuccatīti attho. Pucchā ca nāmesā adhiṭṭhajotanāpucchā, diṭṭhasaṃsandanāpucchā, vimaticchedanāpucchā, anumatipucchā, kathetukamyatāpucchāti pañcavidhā hoti. Tāsamidaṃ nānakaraṇaṃ –

Katamā **adhiṭṭhajotanāpucchā**? Pakatiyā lakkhaṇaṃ aṅṅātaṃ hoti adhiṭṭhaṃ atulitaṃ atīritaṃ avibhūtaṃ avibhāvitaṃ, tassa ṅāṅāya dassanāya tulanāya tīraṅāya vibhūtāya vibhāvanatthāya paṅṅhaṃ pucchati. Ayaṃ adhiṭṭhajotanāpucchā.

Katamā **diṭṭhasaṃsandanāpucchā**? Pakatiyā lakkhaṇaṃ ṅātaṃ hoti diṭṭhaṃ tulitaṃ tīritaṃ vibhūtaṃ vibhāvitaṃ, aṅṅehi paṅḍitehi saddhiṃ saṃsandanatthāya paṅṅhaṃ pucchati. Ayaṃ diṭṭhasaṃsandanāpucchā.

Katamā **vimaticchedanāpucchā**? Pakatiyā saṃsayapakkhando hoti vimatipakkhando, dvelhakaḅāto, “evaṃ nu kho, na nu kho, kiṃ nu kho, kathaṃ nu kho”’ti, so vimaticchedanatthāya paṅṅhaṃ pucchati. Ayaṃ vimaticchedanāpucchā (mahāni. 150; cūḅani. puṅṅakamaṅṅavapucchāniddeṣa 12).

“Taṃ kiṃ maṅṅātha, bhikkhave, rūpaṃ niccaṃ vā aniccaṃ vāti? Aniccaṃ, bhante”’ti (mahāva. 21)

evarūpā anumatiṃ gahetvā dhammadesanākāle pucchā **anumatipucchā** nāma.

“Cattārome, bhikkhave, satipaṭṭhānā, katame cattāro”ti (saṃ. ni. 5.390) evarūpā bhikkhusaṅghaṃ sayameva pucchitvā sayameva vissajjetukāmassa pucchā **kathetukamyatāpucchā** nāma. Tāsu idha diṭṭhasaṃsandanāpucchā adhippetā.

Thero hi attano divāṭṭhāne nisīditvā sayameva pañhaṃ samuṭṭhapetvā sayam vinicchinto idaṃ suttaṃ ādito paṭṭhāya matthakaṃ pāpesi. Ekacco hi pañhaṃ samuṭṭhāpetumyeva sakkoti na nicchetum; ekacco nicchetum sakkoti na samuṭṭhāpetum; ekacco ubhayampi na sakkoti; ekacco ubhayampi sakkoti. Tesu thero ubhayampi sakkotiyeva. Kasmā? Mahāpaññatāya. Mahāpaññaṃ nissāya hi imasmiṃ sāsane sārīputtatthero, mahākaccānatthero, puñnatthero, kumārakassapatthero, ānandatthero, ayameva āyasmāti sambahulā therā visesaṭṭhānaṃ adhigatā. Na hi sakkā yāya vā tāya vā appamattikāya paññāya samannāgatena bhikkhunā sāvakaṃpāramīñāssa matthakaṃ pāpuṇitum, mahāpaññaṃ pana sakkāti mahāpaññatāya **sārīputtatthero** taṃ ṭhānaṃ adhigato. Paññāya hi therena sadiso natthi. Teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ mahāpaññaṃ yadidaṃ sārīputto”ti (a. ni. 1.189).

Tathā na sakkā yāya vā tāya vā appamattikāya paññāya samannāgatena bhikkhunā bhagavatā saṃkhittena bhāsītassa sabbaññūtaññānaṃ saddhiṃ saṃsantitvā samānetvā vitthārena atthaṃ vibhajetum, mahāpaññaṃ pana sakkāti mahāpaññatāya **mahākaccānatthero** tatha paṭibalo jāto, teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ saṃkhittena bhāsītassa vitthārena atthaṃ vibhajantānaṃ yadidaṃ mahākaccāno”ti (a. ni. 1.197).

Tathā na sakkā yāya vā tāya vā appamattikāya paññāya samannāgatena bhikkhunā dhammakathaṃ kathentena dasa kathāvattūni āharitvā satta visuddhiyo vibhajantena dhammakathaṃ kathetum, mahāpaññaṃ pana sakkāti mahāpaññatāya **puñnatthero** catuparisamajje alaṅkatadhammāsane cittaḃjaniṃ gahetvā nisīno līlāyāto puñnacando viya dhammaṃ kathesi. Teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ dhammakathikānaṃ yadidaṃ puñño mantāṇiputto”ti (a. ni. 1.196).

Tathā yāya vā tāya vā appamattikāya paññāya samannāgato bhikkhu dhammaṃ kathento ito vā etto vā anukkamitvā yaṭṭhikoṭṭiṃ gahetvā andho viya, ekapadikaṃ daṇḍakasetum āruḷho viya ca gacchati. Mahāpañño pana catuppadikaṃ gāthaṃ nikkhipitvā upamā ca kāraṇāni ca āharitvā teṭṭhakaṃ buddhavacanaṃ gahetvā heṭṭhupariyaṃ karonto kathesi. Mahāpaññatāya pana **kumārakassapatthero** catuppadikaṃ gāthaṃ nikkhipitvā upamā ca kāraṇāni ca āharitvā tehi saddhiṃ yojento jātassare pañcavaṇṇāni kusumāni phullāpento viya sinerumatthake vaṭṭisahassaṃ telapadīpaṃ jālento viya teṭṭhakaṃ buddhavacanaṃ heṭṭhupariyaṃ karonto kathesi. Teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ cittakathikānaṃ yadidaṃ kumārakassapo”ti (a. ni. 1.217).

Tathā yāya vā tāya vā appamattikāya paññāya samannāgato bhikkhu catūhi māsehi catuppadikampi gāthaṃ gahetum na sakkoti. Mahāpañño pana ekapade ṭhatvā padasatampi padasahassampi gaṇhāti. **Ānandatthero** pana mahāpaññatāya ekapaduddhāre ṭhatvā sakiṃyeva sutvā puna apucchanto saṭṭhi padasahassāni pannarasa gāthāsahassāni valliyā pupphāni ākaḍḍhitvā gaṇhanto viya ekappahāreneva gaṇhāti. Gahitagahitaṃ pāsāṇe khatalekhā viya, suvaṇṇaghaṭe pakkhittasīhavasā viya ca gahitākāreneva tiṭṭhati. Teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ gatimantānaṃ yadidaṃ ānando, satimantānaṃ, dhitimantānaṃ, bahussutānaṃ, upaṭṭhākānaṃ yadidaṃ ānando”ti (a. ni. 1.219-223).

Na hi sakkā yāya vā tāya vā appamattikāya paññāya samannāgatena bhikkhunā catupaṭisambhidāpabhedassa matthakaṃ pāpuṇitum. Mahāpaññaṃ pana sakkāti mahāpaññatāya **mahākoṭṭhitatthero** adhigamaparipucchāsavanapubbayogānaṃ vasena anantanayussadaṃ paṭisambhidāpabhedam patta. Teneva naṃ bhagavā etadagge ṭhapesi – “etadaggaṃ, bhikkhave, mama sāvakaṃnaṃ bhikkhūnaṃ paṭisambhidāpattānaṃ yadidaṃ mahākoṭṭhito”ti (a. ni. 1.218).

Iti thero mahāpaññatāya pañhaṃ samuṭṭhāpetumpi nicchetumpi ubhayampi sakkoti. So divāṭṭhāne nisīditvā sayameva sabbapañhe samuṭṭhapetvā sayam vinicchinto idaṃ suttaṃ ādito paṭṭhāya matthakaṃ

pāpetvā, “sobhanā vata ayam dhammadesanā, jeṭṭhabhātikena naṃ dhammasenāpatinā saddhiṃ saṃsandissāmi, tato ayam dvinnampi amhākaṃ ekamatiyā ekajjhāsayena ca ṭhapitā atigarukā bhavissati pāsānacchattasadiṣā, caturghanittharaṇatthikānaṃ titthe ṭhapitanāvā viya, maggagamanatthikānaṃ saḥassayuttaājāññaratho viya bahupakārā bhavissatī”’ti diṭṭhasaṃsandanaṭṭhaṃ pañhaṃ pucchi. Tena vuttaṃ – “tāsu idha diṭṭhasaṃsandanaṭṭhā adhippetā”’ti.

Nappajānātī ettha yasmā nappajānāti, tasmā duppaññoti vuccatīti ayamattho. Esa nayo sabbattha. **Idaṃ dukkhanti nappajānātī** idaṃ dukkhaṃ, ettakaṃ dukkhaṃ, ito uddhaṃ natthīti dukkhasaccaṃ yāthāvasarasalakkhaṇato na pajānāti. **Ayam dukkhasamudayoti** ito dukkhaṃ samudetīti pavattidukkhapabhāvikā taṇhā samudayasaccanti yāthāvasarasalakkhaṇato na pajānāti. **Ayam dukkhanirodhoti** idaṃ dukkhaṃ ayam dukkhasamudayo ca idaṃ nāma ṭhānaṃ patvā nirujjhatīti ubhinnaṃ appavatti nibbānaṃ nirodhasaccanti yāthāvasarasalakkhaṇato na pajānāti. **Ayam dukkhanirodhagāmini paṭipadāti** ayam paṭipadā dukkhanirodhaṃ gacchatīti maggasaccaṃ yāthāvasarasalakkhaṇato na pajānātīti. Anantaravārepi imināva nayena attho veditabbo. Saṅkhepatō panettha catusaccakammaṭṭhāniko puggalo kathitoti veditabbo.

Ayañhi ācariyasantike cattāri saccāni savanato uggaṇhāti. Thapetvā taṇhaṃ tebhūmakā dhammā dukkhasaccaṃ, taṇhā samudayasaccaṃ, ubhinnaṃ appavatti nibbānaṃ nirodhasaccaṃ, dukkhasaccaṃ pariṇānanto samudayasaccaṃ pajahanto nirodhapāpano maggo maggasaccanti evaṃ uggaḥetvā abhinivisati. Tattha purimāni dve saccāni vaṭṭaṃ, pacchimāni vivaṭṭaṃ, vaṭṭe abhiniveso hoti, no vivaṭṭe, tasmā ayam abhinivisaṃnāno dukkhasacce abhinivisati.

Dukkhasaccaṃ nāma rūpādayo pañcakkhandhāti vavatthapetvā dhātukammaṭṭhānavasena otaritvā, “cattāri mahābhūtāni catunnañca mahābhūtānaṃ upādāya rūpaṃ rūpa”’nti vavatthapeti. Tadārammaṇā vedanā saññā saṅkhārā viññānaṃ nāmanti evaṃ yamakatālakkhandaṃ bhindanto viya “dveva ime dhammā nāmarūpa”’nti vavatthapeti. Taṃ panetaṃ na ahetukaṃ sahetukaṃ sappaccayaṃ, ko cassa paccayo avijjādayo dhammāti evaṃ paccaye ceva paccayuppannadhamme ca vavatthapetvā “sabbepi dhammā hutvā abhāvattṭhena aniccā”’ti aniccalakkhaṇaṃ āropeti, tato udayavayappaṭipīḷānākārena dukkhā, avasavattanākārena anattāti tilakkhaṇaṃ āropetvā vipassanāpaṭipāṭiyā sammāsanto lokuttaramaggaṃ pāpuṇāti.

Maggakkhaṇe cattāri saccāni ekapaṭivedhena paṭivijjhati, ekābhisamayena abhisameti. Dukkhaṃ pariññāpaṭivedhena paṭivijjhati. Samudayaṃ pahānapaṭivedhena, nirodhaṃ sacchikiriyāpaṭivedhena, maggaṃ bhāvanāpaṭivedhena paṭivijjhati. Dukkhaṃ pariññābhisamayena abhisameti, samudayaṃ pahānābhisamayena, nirodhaṃ sacchikiriyābhisamayena, maggaṃ bhāvanābhisamayena abhisameti. So tīṇi saccāni kiccato paṭivijjhati, nirodhaṃ ārammaṇato. Tasmīncassa khaṇe ahaṃ dukkhaṃ pariṇāmi, samudayaṃ pajahāmi, nirodhaṃ sacchikaromi, maggaṃ bhāvemīti ābhogasaṃannāhāraṃ manasikārapaccavekkhaṇā natthi. Etassa pana pariggaṇhantasseva maggo tīsu saccesu pariññādikiccaṃ sādhetova nirodhaṃ ārammaṇato paṭivijjhatīti.

Tasmā paññavāti vuccatīti ettha heṭṭhimakoṭiyā sotāpanno, uparimakoṭiyā khīṇāsavo paññavāti niddiṭṭho. Yo pana tepīṭakaṃ buddhavaṇanaṃ pālito ca atthato ca anusandhito ca pubbāparato ca uggaḥetvā heṭṭhupariyaṃ karonto vicarati, aniccadukkhaṇattavasena pariggahamattampi natthi, ayam paññavā nāma, duppañño nāmāti? Viññānarito nāmesa, paññavāti na vattabbo. Atha yo tilakkhaṇaṃ āropetvā vipassanāpaṭipāṭiyā sammāsanto ajja ajjeva arahattanti carati, ayam paññavā nāma, duppañño nāmāti? Bhajāpiyamāno paññavāpakkaṃ bhajati. Sutte pana paṭivedhova kathito.

Viññānaṃ viññānanti idha kiṃ pucchati? Yena viññāṇena saṅkhāre sammāsivā esa paññavā nāma jāto, tassa āgamanavipassanā viññānaṃ kammakārakacittaṃ pucchāmīti pucchati. **Sukhantipi vijānātī** sukhavedanaṃ pi vijānāti. Uparipadadvayepi eseṃ nayo. Iminā thero “sukhaṃ vedanaṃ vedayamāno sukhaṃ vedanaṃ vedayāmīti pajānātī”’tiādinā (ma. ni. 1.113; dī. ni. 2.380) nayena āgatavedanāvasena arūpakammaṭṭhānaṃ kathesi. Tassattho satipaṭṭhāne vuttanayeneva veditabbo.

Saṃsatthāti ekuppādādilakkhaṇena saṃyogaṭṭhena saṃsatthā, udāhu visāsaṭṭhāti pucchati. Ettha ca thero maggapaññaṃ vipassanāvīññāṇācīti ime dve lokiyalokuttaradhamme missetvā bhūmantaraṃ bhinditvā samayaṃ aṇānanto viya pucchati na veditabbo. Maggapaññāya pana maggaviññāṇena,

vipassanāpaññāya ca vipassanāvīññāneva saddhiṃ saṃsaṭṭhabhāvaṃ pucchatīti veditabbo. Theropissa tamevatthaṃ vissajjento **ime dhammā saṃsaṭṭhātī**ādīmāha. Tatha **na ca labbhā imesaṃ dhammā**nanti imesaṃ lokiyamaggakkhaṇepi lokuttaramaggakkhaṇepi ekato uppannānaṃ dvinnaṃ dhammānaṃ. **Vinibbhujitvā vinibbhujitvā**ti visuṃ visuṃ katvā vinivaṭṭetvā, ārammaṇato vā vatthuto vā uppādato vā nirodhato vā nānākaṇaṃ dassetuṃ na sakkāti attho. Tesam tesam pana dhammānaṃ visayo nāma atthi. Lokiyadhammaṃ patvā hi cittaṃ jeṭṭhakaṃ hoti pubbaṅgamaṃ, lokuttaraṃ patvā paññā.

Sammāsambuddhōpi hi lokiyadhammaṃ pucchanto, “bhikkhu, tvaṃ katamaṃ paññaṃ adhigato, kiṃ paṭhamamaggapaññaṃ, udāhu dutiya tatiya catuttha maggapañña”nti na evaṃ pucchati. Kiṃ phasso tvaṃ, bhikkhu, kiṃ vedano, kiṃ sañña, kiṃ cetanoti na ca pucchati, cittavasena pana, “kiñcitto tvaṃ, bhikkhū”ti (pārā. 135) pucchati. Kusalākusalaṃ paññapentopi “manopubbaṅgamā dhammā, manoseṭṭhā manomayā”ti (dha. pa. 1, 2) ca, “katame dhammā kusalā? Yasmiṃ samaye kāmāvacaraṃ kusalaṃ cittaṃ uppannaṃ hoti”ti (dha. sa. 1) ca evaṃ cittavaseneva paññāpeti. Lokuttaraṃ pucchanto pana kiṃ phasso tvaṃ bhikkhu, kiṃ vedano, kiṃ sañña, kiṃ cetanoti na pucchati. Katamā te, bhikkhu, paññā adhigatā, kiṃ paṭhamamaggapañña, udāhu dutiyatatiyacatutthamaggapaññāti evaṃ paññāvaseneva pucchati.

Indriyaṃyuttepī “pañcimāni, bhikkhave, indriyāni. Katamāni pañca? Saddhindriyaṃ vīriyindriyaṃ satindriyaṃ samādhindriyaṃ paññindriyaṃ. Kattha ca, bhikkhave, saddhindriyaṃ daṭṭhabbaṃ? Catūsu sotāpattiyaṅgesu ettha saddhindriyaṃ daṭṭhabbaṃ. Kattha ca, bhikkhave, vīriyindriyaṃ daṭṭhabbaṃ? Catūsu sammappadhānesu ettha vīriyindriyaṃ daṭṭhabbaṃ. Kattha ca, bhikkhave, satindriyaṃ daṭṭhabbaṃ? Catūsu satipaṭṭhānesu ettha satindriyaṃ daṭṭhabbaṃ. Kattha ca, bhikkhave, samādhindriyaṃ daṭṭhabbaṃ? Catūsu jhānesu ettha samādhindriyaṃ daṭṭhabbaṃ. Kattha ca, bhikkhave, paññindriyaṃ daṭṭhabbaṃ? Catūsu ariyasaccesu ettha paññindriyaṃ daṭṭhabba”nti (saṃ. nī. 5.478). Evaṃ savisayasmimyeva lokiyalokuttarā dhammā kathitā.

Yathā hi cattāro seṭṭhiputtā rājāti rājapañcamesu sahāyesu nakkhattaṃ kīṭissāmāti vīthiṃ otiṇṇesu ekassa seṭṭhiputtassa gehaṃ gatakāle itare cattāro tuṅhī nisīdanti, gehasāmikova, “imesaṃ khādanīyaṃ bhojanīyaṃ detha, gandhamālālaṅkāradīni dethā”ti gehe vicāreti. Dutiyassa tatiyassa catutthassa gehaṃ gatakāle itare cattāro tuṅhī nisīdanti, gehasāmikova, “imesaṃ khādanīyaṃ bhojanīyaṃ detha, gandhamālālaṅkāradīni dethā”ti gehe vicāreti. Atha sabbapaccā rañña gehaṃ gatakāle kiñcāpi rājā sabbattha issarova, imasmiṃ pana kāle attano geheyeva, “imesaṃ khādanīyaṃ bhojanīyaṃ detha, gandhamālālaṅkāradīni dethā”ti vicāreti. Evamevaṃ kho saddhāpañcamakesu indriyesu tesu sahāyesu ekato vīthiṃ otarantesu viya ekārammaṇe uppajjamānesupi yathā paṭhamassa gehe itare cattāro tuṅhī nisīdanti, gehasāmikova vicāreti, evaṃ sotāpattiyaṅgāni patvā adhimokkhalakkhaṇaṃ saddhindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā dutiyassa gehe itare cattāro tuṅhī nisīdanti, gehasāmikova vicāreti, evaṃ sammappadhānāni patvā paggaṇalakkhaṇaṃ vīriyindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā tatiyassa gehe itare cattāro tuṅhī nisīdanti, gehasāmikova vicāreti, evaṃ satipaṭṭhānāni patvā upaṭṭhānalakkhaṇaṃ satindriyameva jeṭṭhakaṃ hoti pubbaṅgamaṃ, sesāni tadanvayāni honti. Yathā catutthassa gehe itare cattāro tuṅhī nisīdanti, gehasāmikova vicāreti, evaṃ jhānavimokkhe patvā avikkhepalakkhaṇaṃ samādhindriyameva jeṭṭhakaṃ hoti pubbaṅgamaṃ, sesāni tadanvayāni honti. Sabbapaccā rañña gehaṃ gatakāle pana yathā itare cattāro tuṅhī nisīdanti, rājāva gehe vicāreti, evameva ariyasaccāni patvā pajānanalakkhaṇaṃ paññindriyameva jeṭṭhakaṃ hoti pubbaṅgamaṃ, sesāni tadanvayāni honti.

Iti paṭisambhidāpattānaṃ agge ṭhapito mahākoṭṭhitatthero lokiyadhammaṃ pucchanto cittaṃ jeṭṭhakaṃ cittaṃ pubbaṅgamaṃ katvā pucchi; lokuttaradhammaṃ pucchanto paññaṃ jeṭṭhakaṃ paññaṃ pubbaṅgamaṃ katvā pucchi. Dhammasenāpatisāriputtattheropi tatheva vissajjesīti.

Yaṃ hāvuso, pajānātīti yaṃ catusaccadhammamidaṃ dukkhantiādinā nayena maggapaññaṃ pajānāti. **Taṃ vijānātīti** maggaviññānaṃpi tatheva taṃ vijānāti. **Yaṃ vijānātīti** yaṃ saṅkhāragataṃ aniccantiādinā nayena vipassanāvīññānaṃ vijānāti. **Taṃ pajānātīti** vipassanāpaññāpi tatheva taṃ pajānāti. **Tasmā ime dhammā**ti tena kāraṇena ime dhammā. **Saṃsaṭṭhātī** ekuppādaekanirodhaekavatthukaekārammaṇatāya saṃsaṭṭhā.

Paññā bhāvetabbāti idaṃ maggapaññaṃ sandhāya vuttaṃ. Taṃsampayuttaṃ pana viññānaṃ tāya saddhiṃ bhāvetabbameva hoti. **Viññānaṃ pariññeyyanti** idaṃ vipassanāviññānaṃ sandhāya vuttaṃ. Taṃsampayuttā pana paññā tena saddhiṃ parijānitaḥ hoti.

450. Vedanā vedanāti idaṃ kasmā pucchati? Vedanālakkaṇaṃ pucchissāmīti pucchati. Evaṃ santepi tebhūmikasammasanacāravedanāva adhippetāti sallakkhetabbā. **Sukhampi vedetī**ti sukhaṃ ārammaṇaṃ vedeti anubhavati. Parato padadvayepi eseva nayo. “Rūpaṇca hidaṃ, mahāli, ekantadukkhaṃ abhavissa, dukkhānupatitaṃ dukkhāvakkantaṃ anavakkantaṃ sukhena, nayidaṃ sattā rūpasmiṃ sārājeyyūṃ. Yasmā ca kho, mahāli, rūpaṃ sukhaṃ sukhānupatitaṃ sukhāvakkantaṃ anavakkantaṃ dukkhena, tasmā sattā rūpasmiṃ sārājanti, sārāgā saṃyujanti, saṃyogā saṃkilissanti. Vedanā ca hidaṃ... saññā... saṅkhārā... viññānaṇca hidaṃ, mahāli, ekantadukkhaṃ abhavissa...pe... saṃkilissanti”ti (saṃ. ni. 3.70) iminā hi mahālisuttapariyāyena idha ārammaṇaṃ sukhaṃ dukkhaṃ adukkhamasukhanti kathitaṃ. Apica purimaṃ sukhaṃ vedanaṃ ārammaṇaṃ katvā aparā sukhā vedanā vedeti; purimaṃ dukkhaṃ vedanaṃ ārammaṇaṃ katvā aparā dukkhā vedanā vedeti; purimaṃ adukkhamasukhaṃ vedanaṃ ārammaṇaṃ katvā aparā adukkhamasukhā vedanā vedetīti evamettha attho daṭṭhabbo. Vedanāyeva hi vedeti, na añño koci veditā nāma atthīti vuttametam.

Saññā saññāti idha kiṃ pucchati? Sabbasaññāya lakkhaṇaṃ. Kiṃ sabbatthakasaññāyāti? Sabbasaññāya lakkhaṇanti sabbatthakasaññāya lakkhaṇanti ekamevetam, evaṃ santepi tebhūmikasammasanacārasaññāva adhippetāti sallakkhetabbā. **Nīlakampi sañjānā**ti nīlapupphe vā vatthe vā parikammaṃ katvā upacāraṃ vā appanaṃ vā pāpento sañjānāti. Imasmiṃhi atthe parikammasaññāpi upacārasaññāpi appanāsaññāpi vaṭṭati. Nīle nīlanti uppajjanakasaññāpi vaṭṭatiyeva. **Pītakā**dīsupi eseva nayo.

Yā cāvuso, vedanāti ettha vedanā, saññā, viññānanti imāni tīṇi gahetvā paññā kasmā na gahitāti? Asabbaṅgāhikattā. Paññāya hi gahitāya paññāya sampayuttāva vedanādayo labbhanti, no vippayuttā. Taṃ pana aggahetvā imesu gahitesu paññāya sampayuttā ca vippayuttā ca antamaso dve pañcaviññānadharmāpi labbhanti. Yathā hi tayo purisā suttaṃ suttanti vadeyyūṃ, catuttho ratanāvutasuttanti. Tesu purimā tayo takkagatampi paṭṭivaṭṭakādīgatampi yaṃkiñci bahūṃ suttaṃ labhanti antamaso makkaṭakasuttampi. Ratanāvutasuttaṃ pariyesanto mandaṃ labhati, evaṃsampadamidaṃ veditabbaṃ. Heṭṭhato vā paññā viññāṇena saddhiṃ sampayogaṃ labhāpitā vissaṭṭhattāva idha na gahitāti vadanti. **Yaṃ hāvuso, vedetī**ti yaṃ ārammaṇaṃ vedanā vedeti, saññāpi tadeva sañjānāti. **Yaṃ sañjānā**ti yaṃ ārammaṇaṃ saññā sañjānāti, viññānampi tadeva vijānāti attho.

Idāni sañjānāti vijānāti pajānāti ettha viśeso veditabbo. Tattha upasaggamattameva viśeso. Jānāti padamā pana aviseśo. Tassāpi jānanatthe viśeso veditabbo. Saññā hi nīlādivasena ārammaṇaṃ sañjānanamattameva, aniccaṃ dukkhaṃ anattāti lakkhaṇapaṭivedhaṃ pāpetuṃ na sakkoti. Viññānaṃ nīlādivasena ārammaṇaṇceva sañjānāti, aniccādīlakkhaṇapaṭivedhaṇca pāpeti, ussakkivā pana maggapātubhāvaṃ pāpetuṃ na sakkoti. Paññā nīlādivasena ārammaṇampi sañjānāti, aniccādivasena lakkhaṇapaṭivedhampi pāpeti, ussakkivā maggapātubhāvaṃ pāpetumpi sakkoti.

Yathā hi heraññikaphalake kahāpaṇarāsīmhi kate ajātabuddhi dārako gāmikapuriso mahāheraññikoti tīsu janesu oloketvā ṭhitesu ajātabuddhi dārako kahāpaṇānaṃ cittavicittacaturassamaṇḍalabhāvameva jānāti, idaṃ manussānaṃ upabhogaparibhogaṃ ratanasammatanti na jānāti. Gāmikapuriso cittādībhāvaṇceva jānāti, manussānaṃ upabhogaparibhogaratanasammatabhāvaṇca. “Ayaṃ kūṭo ayaṃ cheko ayaṃ karato ayaṃ saṅho”ti pana na jānāti. Mahāheraññiko cittādībhāvampi ratanasammatabhāvampi kūṭādībhāvampi jānāti, jānanto ca pana na rūpaṃ disvāpi jānāti, ākoṭitassa saddaṃ sutvāpi, gandhaṃ ghāyitvāpi, rasaṃ sāyitvāpi, hatthena garukalahukabhāvaṃ upadhāretvāpi asukagāme katotipi jānāti, asukanigame asukanagare asukapabbatacchāyāya asukanadīre katotipi, asukācariyena katotipi jānāti. Evamevaṃ saññā ajātabuddhidārakassa kahāpaṇadassanaṃ viya nīlādivasena ārammaṇamattameva sañjānāti. Viññānaṃ gāmikapurisassa kahāpaṇadassanaṃ viya nīlādivasena ārammaṇampi sañjānāti, aniccādivasena lakkhaṇapaṭivedhampi pāpeti. Paññā mahāheraññikassa kahāpaṇadassanaṃ viya nīlādivasena ārammaṇampi sañjānāti, aniccādivasena lakkhaṇapaṭivedhampi pāpeti, ussakkivā maggapātubhāvampi pāpeti. So pana nesam viśeso duppaṭivijjho.

Tenāha āyasmā nāgaseno – “dukkaraṃ, mahārāja, bhagavatā katanti. Kiṃ, bhante, nāgasena bhagavatā dukkaraṃ katanti? Dukkaraṃ, mahārāja, bhagavatā kataṃ, imesaṃ arūpīnaṃ cittacetasiṅkānaṃ dhammānaṃ ekārammaṇe pavattamānānaṃ vavatthānaṃ akkhātaṃ, ayaṃ phasso, ayaṃ vedanā, ayaṃ saññā, ayaṃ cetanā, idaṃ citta”nti (mi. pa. 2.7.16). Yathā hi tilatelaṃ, sāsapatelaṃ, madhukatelaṃ, eraṇḍakatelaṃ, vasātelanti imāni pañca telāni ekacāṭiyāṃ pakkhipitvā divasaṃ yamakamanthehi manthetvā tato idaṃ tilatelaṃ, idaṃ sāsapatelanti ekekassa pāṭiyekkaṃ uddharaṇaṃ nāma dukkaraṃ, idaṃ tato dukkarataraṃ. Bhagavā pana sabbaññutaññāṇassa suppaṭividdhattā dhammissaro dhammarājā imesaṃ arūpīnaṃ dhammānaṃ ekārammaṇe pavattamānānaṃ vavatthānaṃ akkhāsi. Pañcannaṃ mahānadīnaṃ samuddaṃ pavitṭhatṭhāne, “idaṃ gaṅgāya udakaṃ, idaṃ yamunāyā”ti evaṃ pāṭiyekkaṃ udakauddharaṇeṇāpi ayamatto veditabbo.

451. Nissatṭhenāti nissaṭena pariccattena vā. Tattha **nissatṭhenāti** atthe sati pañcahi indriyehīti nissakkavacanaṃ. **Pariccattēnāti** atthe sati karaṇavacanaṃ veditabbaṃ. Idaṃ vuttaṃ hoti – pañcahi indriyehi nissaritvā manodvāre pavattena pañcahi vā indriyehi tassa vatthubhāvaṃ anupagamanatāya pariccattēnāti. **Parisuddhenāti** nirupakkilesena. **Manoviññāṇenāti** rūpāvacaracattutthajjhānacittena. **Kiṃ neyyanti** kiṃ jānitabbaṃ. “Yaṃkiñci neyyaṃ nāma atthi dhamma”ntiādīsu (mahāni. 69) hi jānitabbaṃ neyyanti vuttaṃ. **Ākāsānañcāyatanaṃ neyyanti** kathaṃ rūpāvacaracattutthajjhānacittena arūpāvacarasamāpatti neyyāti? Rūpāvacaracattutthajjhāne ṭhitena arūpāvacarasamāpattiṃ nibbattetuṃ sakkā hoti. Ettha ṭhitassa hi sā ijjhati. Tasmā “ākāsānañcāyatanaṃ neyya”ntiādīmāha. Atha nevasaññānāsaññāyatanaṃ kasmā na vuttanti? Pāṭiyekkaṃ abhinivesābhāvato. Tattha hi kalāpato nayato sammasanaṃ labbhati, dhammasenāpatisadisassāpi hi bhikkhuno pāṭiyekkaṃ abhiniveso na jāyati. Tasmā theropi, “evaṃ kirame dhammā ahutvā sambhonti, hutvā paṭiventī”ti (ma. ni. 3.94) kalāpato nayato sammāsivā vissajjesīti. Bhagavā pana sabbaññutaññāṇassa hatthagatattā nevasaññānāsaññāyatanaṃ samāpattiyampi paropaññāsa dhamme pāṭiyekkaṃ aṃguddhāreṇeva uddharitvā, “yāvataṃ saññāsamāpattiyo, tāvatā aññāpaṭivedho”ti āha.

Paññācakkhunā pajānāti dassanapariṇāyakaṭṭhena cakkhubhūtāya paññāya pajānāti. Tattha dve paññā samādhipaññā vipassanāpaññā ca. Samādhipaññāya kiccato asammohato ca pajānāti. Vipassanāpaññāya lakkhaṇapaṭivedhena ārammaṇato jānanaṃ kathitaṃ. **Kimatthiyāti** ko etissā attho. **Abhiññatṭhāti**ādīsu abhiññeyye dhamme abhijānāti **abhiññatṭhā**. Pariññeyye dhamme pariñānāti **pariññatṭhā**. Pahātabbe dhamme pajahatīti **pahānatṭhā**. Sā panesā lokiyāpi abhiññatṭhā ca pariññatṭhā ca vikkhambhanaṃ pahānatṭhā. Lokuttarāpi abhiññatṭhā ca pariññatṭhā ca samucchadato pahānatṭhā. Tattha lokiyā kiccato asammohato ca pajānāti, lokuttarā asammohato.

452. Sammādiṭṭhiyā uppādāyāti vipassanāsammādiṭṭhiyā ca maggasammādiṭṭhiyā ca. **Parato ca ghosoti** sappāyadhammassavanaṃ. **Yoniso ca manasikāro**ti attano upāyamanasikāro. Tattha sāvakesu api dhammasenāpatino dve paccayā laddhuṃ vaṭṭantiyeva. Thero hi kappasatasahassādhikaṃ ekaṃ asaṅkhyeyyaṃ pāramiyo pūretvāpi attano dhammatāya aṇumattampi kilesaṃ pajahitūṃ nāsakkhi. “Ye dhammā hetuppabhavā”ti (mahāva. 60) assajittherato imaṃ gāthaṃ sutvāvassa paṭivedho jāto. Paccekabuddhānaṃ pana sabbaññubuddhānaṃca paratoghosakammaṃ natthi, yonisomanasikārasmiṃyeva ṭhatvā paccekabodhiṅca sabbaññutaññāṇaṃca nibbantenti.

Anuggahitāti laddhūpakārā. **Sammādiṭṭhīti** arahattamaggasammādiṭṭhi. Phalakkhaṇe nibbattā cetovimutti phalaṃ assāti **cetovimuttiphalaṃ**. Tadeva cetovimuttisāṅkhātaṃ phalaṃ ānisaṃso assāti cetovimuttiphalaṅnisaṃsā. Dutiyapadepe eseva nayo. Ettha ca catuttaphalapaññā paññāvimutti nāma, avasesā dhammā cetovimuttīti veditabbā. **Silānuggahitāti**ādīsu **silanti** catupārisuddhisīlaṃ. **Sutanti** sappāyadhammassavanaṃ. **Sācchātīti** kammaṭṭhāne khalanapakkhālanacchedanakathā. **Samathoti** vipassanāpādikā aṭṭha samāpattiyo. **Vipassanāti** sattavidhā anupassanā. Catupārisuddhisīlaṃhi pūrentassa, sappāyadhammassavanaṃ suṇantassa, kammaṭṭhāne khalanapakkhālanāṃ chindantassa, vipassanāpādikāsu aṭṭhasamāpattīsu kammaṃ karontassa, sattavidhaṃ anupassanaṃ bhāventassa arahattamaggo uppajjitvā phalaṃ deti.

Yathā hi madhuraṃ ambapakkaṃ paribhuñjitukāmo ambapotakassa samantā udakakoṭṭhakaṃ thiraṃ katvā bandhati. Ghaṭaṃ gahetvā kālena kālaṃ udakaṃ āsiñcati. Udakassa anikkhamaṇatthaṃ mariyādaṃ thiraṃ karoti. Yā hoti samīpe valli vā sukkhandaṇḍako vā kipillikapuṭo vā makkaṭakajālaṃ vā, taṃ apaneti. Khañittim gahetvā kālena kālaṃ mūlāni parikhaṇati. Evamassa appamattassa imāni pañca kāraṇāni karoto so

ambo vaḍḍhitvā phalaṃ deti. Evaṃsampadamidaṃ veditaḅbaṃ. Rukkhasa samantato koṭṭhakabandhanaṃ viya hi sīlaṃ daṭṭhabbaṃ, kālena kālaṃ udakasiñcanaṃ viya dhammassavanaṃ, mariyādāya thirabhāvakarāṇaṃ viya samatho, samīpe valliādīnaṃ haraṇaṃ viya kammaṭṭhāne khalanapakkhalanacchedanaṃ, kālena kālaṃ khañṭiṭṭiṃ gahetvā mūlakhaṇanaṃ viya sattannaṃ anupassanānaṃ bhāvanā. Tehi pañcahi kāraṇehi anuggahitassa ambarukkhasa madhuraphaladānakālo viya imassa bhikkhuno imehi pañcahi dhammehi anuggahitāya sammādiṭṭhiyā arahattaphaladānaṃ veditaḅbaṃ.

453. Kati panāvuso, bhavāti idha kiṃ pucchati? Mūameva gato anusandhi, duppañño yehi bhavehi na uṭṭhāti, te pucchissāmīti pucchati. Tattha **kāma**bhavoti kāma**bhavū**paḅaṃ kammaṃ kammābhini**battā** upādinnakkhandhāpīti ubhayamekato katvā kāma**bhavoti** āha. Rūpārūpa**bhavesu**pi eseva nayo. **Āyatinti** anāgate. Punabbhavassa abhinibbattīti **punabbhavābhini**battī****. Idha vaṭṭaṃ pucchissāmīti pucchati. **Tatrā**tatrābhini**ndanā**tī rūpābhini**ndanā** saddābhini**ndanā**tī evaṃ tahiṃ tahiṃ abhinandanā, karaṇavacane cetam paccattaṃ. Tatrā**tatrā**bhini**ndanā**yā punabbhavābhini**battī** hotīti attho. Ettāvata hi gamaṇaṃ hoti, āgamaṇaṃ hoti, gamaṇāgamaṇaṃ hoti, vaṭṭaṃ vattaṭīti vaṭṭaṃ matthakaṃ pāpetvā dassesi. Idāni vivaṭṭaṃ pucchanto “kathaṃ panāvuso”tiādīmāha. Tassa vissajjane **avijjāviraḅgā**tī avijjāya khayanirodhena. **Vijjuppā**dāti arahattamaggavijjāya uppādena. Kiṃ avijjā pubbe niruddhā, atha vijjā pubbe uppannāti? Ubhayametaṃ na vattaḅbaṃ. Paḍīpujjalanena andhakāravigamo viya vijjuppādena avijjā niruddhāva hoti. **Ṭaṅhā**nirodhāti ṭaṅhāya khayanirodhena. **Punabbhavābhini**battī** na hotīti** evaṃ āyatim punabbhavassa abhinibbattī na hoti, gamaṇaṃ āgamaṇaṃ gamaṇāgamaṇaṃ upacchijjati, vaṭṭaṃ na vattaṭīti vivaṭṭaṃ matthakaṃ pāpetvā dassesi.

454. Katamaṃ panāvusoti idha kiṃ pucchati? Ubhatobhāgavimutto bhikkhu kālena kālaṃ nirodhaṃ samāpajjati. Tassa nirodhapādakaṃ paṭhamajjhānaṃ pucchissāmīti pucchati. **Paṭhamaṃ jhā**nanti idha kiṃ pucchati? Nirodhaṃ samāpajjanakena bhikkhunā aṅgavavattānaṃ koṭṭhāsaparicchedo nāma jānitaḅbo, idaṃ jhānaṃ pañcaṅgikaṃ caturaṅgikaṃ tivaṅgikaṃ duvaṅgikanti aṅgavavattānaṃ koṭṭhāsaparicchedaṃ pucchissāmīti pucchati. **Vitakkoti**ādīsu pana abhiniropanalakkhaṇo vitakko, anumajjanalakkhaṇo vicāro, pharaṇalakkhaṇā pīti, sātalaḅkaṇaṃ sukhaṃ, avikkhepalakkhaṇā cittekkaggaṭāti ime pañca dhammā vattanti. **Kataṅ**gavippahīnanti idha pana kiṃ pucchati? Nirodhaṃ samāpajjanakena bhikkhunā upakārānupakārāni aṅgāni jānitaḅbāni, tāni pucchissāmīti pucchati, vissajjanaṃ panettha pākaṭameva. Iti heṭṭhā nirodhapādakaṃ paṭhamajjhānaṃ gahitaṃ, upari tassa anantarapaccayaṃ nevasaññānāsaññāyatanaṃ samāpattim pucchissati. Antarā pana cha samāpattiyō saṃkhittā, nayaṃ vā dassetvā vissatṭhāti veditaḅbā.

455. Idāni viññānaṇissaye pañca pasāde pucchanto **pañcimāni, āvusoti**ādīmāha. Tattha **gocaravisayanti** gocarabhūtaṃ visayaṃ. **Aññamaññassā**tī cakkhu sotassa sotaṃ vā cakkhussāti evaṃ ekekassa gocaravisayaṃ na paccanubhoti. Sace hi nīlādibhedaṃ rūpārammaṇaṃ samodhānetvā sotindriyassa upaneyya, “iṅgha tāva naṃ vavattapehi vibhāvehi, kiṃ nāmetaṃ ārammaṇa”nti. Cakkhuvīññānañhi vināpi mukhena attano dhammatāya evaṃ vadeyya – “are andhabāla, vassasatampi vassasahassampi paridhāvamaṇo aññatra mayā kuhiṃ etassa jānanakaṃ labhissasi, āhara naṃ cakkhupasāde upanehi, ahametaṃ ārammaṇaṃ jānissāmi, yadi vā nīlaṃ yadi vā pītaḅkaṃ, na hi eso aññassa visayo, mayheveso visayo”ti. Sesadvāresupi eseva nayo. Evametāni aññamaññassa gocaṃ visayaṃ na paccanubhonti nāma. **Kiṃ paṭisaraṇanti** etesaṃ kiṃ paṭisaraṇaṃ, kiṃ etāni paṭisaraṇantīti pucchati. **Mano paṭisaraṇanti** javanamano paṭisaraṇaṃ. **Mano ca nesanti** manodvārikajavanamano vā pañcadvārikajavanamano vā etesaṃ gocaravisayaṃ rajjanādivasena anubhoti. Cakkhuvīññānañhi rūpadassanamattameva, ettha rajjanaṃ vā dussanaṃ vā muyhanaṃ vā natthi. Etasmiṃ pana dvāre javanaṃ rajjati vā dussati vā muyhati vā. Sotaviññānādīsipi eseva nayo.

Tatrāyaṃ upamā – pañca kira dubbalabhojakā rājānaṃ sevitvā kicchena kasirena ekasmiṃ pañcakulike gāme parittakaṃ āyaṃ labhiṃsu. Tesam tattha macchabhāgo maṃsabhāgo yuttikahāpaṇo vā, bandhakahāpaṇo vā, māpahārahāpaṇo vā, aṭṭhakahāpaṇo vā, soḅsakahāpaṇo vā, bāṭṭiṃsakahāpaṇo vā, catusaṭṭhikahāpaṇo vā, daṇḍoti ettakamattameva pāpuṇāti. Satavattukaṃ pañcasatavattukaṃ saḅsavattukaṃ mahābaliṃ rājāva gaṇhāti. Tattha pañcakulikagāmo viya pañca pasādā daṭṭhabbā; pañca dubbalabhojakā viya pañca viññānāni; rājā viya javanaṃ; dubbalabhojakānaṃ parittakaṃ āyapāpuṇanaṃ viya cakkhuvīññānādīnaṃ rūpadassanādimaṭṭaṃ. Rajjanādīni pana etesu natthi. Rañño mahābaliggahaṇaṃ viya tesu dvāresu javanassa rajjanādīni veditaḅbāni.

456. Pañcimāni, āvusoti idha kiṃ pucchati? Antonirodhasmiṃ pañca pasāde. Kiriyamayapavattasmiñhi vattamāne arūpadhammā pasādānaṃ balavapaccayā honti. Yo pana taṃ pavattaṃ nirodhetvā nirodhasamāpattiṃ samāpanno, tassa antonirodhe pañca pasādā kiṃ paṭicca tiṭṭhanti idam pucchissāmīti pucchati. **Āyuṃ paṭiccēti** jīvitindriyaṃ paṭicca tiṭṭhanti. **Usmaṃ paṭiccēti** jīvitindriyaṃ kammajatejaṃ paṭicca tiṭṭhati. Yasmā pana kammajatejopi jīvitindriyena vinā na tiṭṭhati, tasmā “usmā āyuṃ paṭicca tiṭṭhati”ti āha. **Jhāyatoti jalato. Acciṃ paṭiccēti** jālasikhaṃ paṭicca. **Ābhā paññāyatīti** āloko nāma paññāyati. **Ābhaṃ paṭicca accīti** taṃ ālokaṃ paṭicca jālasikhā paññāyati.

Evameva kho, āvuso, āyu usmaṃ paṭicca tiṭṭhatīti ettha jālasikhā viya kammajatejo. Āloko viya jīvitindriyaṃ. Jālasikhā hi uppajjamānā ālokaṃ gahetvāva uppajjati. Sā tena attanā janitaālokeneva sayampi aṇu thūlā dīghā rassāti pākaṭā hoti. Tattha jālapavattiyā janitaālokena tassāyeva jālapavattiyā pākaṭabhāvo viya usmaṃ paṭicca nibbattena kammajamahābhūtasambhavana jīvitindriyena usmāya anupālanam. Jīvitindriyañhi dasapi vassāni...pe... vassasatampi kammajatejapavattaṃ pāleti. Iti mahābhūtāni upādārūpanam nissayapaccayādivasena paccayāni hontīti āyu usmaṃ paṭicca tiṭṭhati. Jīvitindriyaṃ mahābhūtāni pāletīti usmā āyuṃ paṭicca tiṭṭhatīti veditabbā.

457. Āyusañkhārāti āyumeva. Vedaniyā dhammāti vedanā dhammāva. **Vuṭṭhānaṃ paññāyatīti** samāpattito vuṭṭhānaṃ paññāyati. Yo hi bhikkhu arūpapavatte ukkañṭhitvā saññañca vedanañca nirodhetvā nirodham samāpanno, tassa yathāparicchinna kālavasena rūpajīvitindriyapaccayā arūpadhammā uppajjanti. Evaṃ pana rūpārūpapavattaṃ pavattati. Yathā kiṃ? Yathā eko puriso jālapavatte ukkañṭhito udakena paharivā jālam appavattaṃ katvā chārikāya āngāre pidhāya tuñhī nisīdati. Yadā panassa puna jālāya attho hoti, chārikaṃ apanetvā āngāre parivattetvā upādānaṃ datvā mukhavātaṃ vā tālavaṇṭavātaṃ vā dadāti. Atha jālapavattaṃ puna pavattati. Evameva jālapavattaṃ viya arūpadhammā. Purisassa jālapavatte ukkañṭhitvā udakappahārena jālam appavattaṃ katvā chārikāya āngāre pidhāya tuñhībhūtassa nisajjā viya bhikkhuno arūpapavatte ukkañṭhitvā saññañca vedanañca nirodhetvā nirodhasamāpajjanaṃ. Chārikāya pihitaāngārā viya rūpajīvitindriyaṃ. Purisassa puna jālāya atthe sati chārikāpanayanādīni viya bhikkhuno yathāparicchinna kālāpagamaṃ. Aggijālāya pavatti viya puna arūpadhammesu uppannesu rūpārūpapavatti veditabbā.

Āyu usmā ca viññāṇanti rūpajīvitindriyaṃ, kammajatejodhātu, cittanti ime tayo dhammā yadā imaṃ rūpakāyaṃ jahanti, athāyaṃ acetanaṃ kaṭṭhaṃ viya pathaviyaṃ chaḍḍito setīti attho. Vuttañcetam –

“Āyu usmā ca viññāṇam, yadā kāyaṃ jahantimam;
Apaviddho tadā seti, parabhattam acetana”nti. (saṃ. ni. 3.95);

Kāyasañkhārāti assāsapassāsā. **Vacīsañkhārāti** vitakkavicārā. **Cittasañkhārāti** saññāvedanā. **Āyūti** rūpajīvitindriyaṃ. **Paribhinnānīti** upahatāni, vinaṭṭhānīti attho. Tattha keci “nirodhasamāpannessa cittasañkhārāva niruddhā”ti vacanato cittaṃ aniruddham hoti, tasmā sacittakā ayaṃ samāpattīti vadanti. Te vattabbā – “vacīsañkhārāpissa niruddhā”ti vacanato vācā aniruddhā hoti, tasmā nirodham samāpannessa dhammampi kathentena sajjhāyampi karontena nisīditabbaṃ siyā. “Yo cāyaṃ mato kālañkato, tassāpi cittasañkhārā niruddhā”ti vacanato cittaṃ aniruddham bhavēyya, tasmā kālañkate mātāpitaro vā arahante vā jhāpayantena anantariyakammaṃ kataṃ bhavēyya. Iti byañjane abhinivesam akatvā ācariyaṃ naye ṭhatvā attho upaparikkhitabbo. Attho hi paṭisaraṇam, na byañjanaṃ.

Indriyāni vipasannānīti kiriyamayapavattasmiñhi vattamāne bahiddhā ārammaṇesu pasāde ghaṭṭentesu indriyāni kilamantāni upahatāni makkhitāni viya honti, vātādīhi uṭṭhitena rajena catumahāpathe ṭhapitāādāso viya. Yathā pana thavikāyaṃ pakkhipitvā mañjūsādīsū ṭhapito ādāso antoyeva virocāti, evaṃ nirodham samāpannessa bhikkhuno antonirodhe pañca pasādā ativirocanti. Tena vuttaṃ “indriyāni vipasannānī”ti.

458. Kati panāvuso, paccayāti idha kiṃ pucchati? Nirodhassa anantarapaccayaṃ nevasaññānāsaññāyatanam pucchissāmīti pucchati. Vissajjane panassa **sukhassa ca pahānāti** cattāro apagamanapaccayā kathitā. **Animittāyāti** idha kiṃ pucchati? Nirodhato vuṭṭhānakaphalasaṃpattiṃ pucchissāmīti pucchati. Avasesasaṃpattivūṭṭhānañhi bhavaṅgena hoti, nirodhā vuṭṭhānaṃ pana vipassanānissandāya phalasaṃpattiyāti tameva pucchati. **Sabbanimittānanti** rūpādīnaṃ sabbārammaṇaṃ.

Animittāya ca dhātuyā manasikāroti sabbanimittāpagatāya nibbānadhātuyā manasikāro. Phalasaṃpattisaṃhāraṃ manasikāraṃ sandhāyāha. Iti heṭṭhā nirodhapādakaṃ paṭhamajjhānaṃ gahitaṃ, nirodhassa anantarapaccayaṃ nevasaññānāsaññāyatanaṃ gahitaṃ, idha nirodhato vuṭṭhānakaphalasaṃpatti gahitāti.

Imasmiṃ ṭhāne nirodhakathā kathetabbā hoti. Sā, “dvīhi balehi samannāgatattā tayo ca saṅkhārānaṃ paṭippassaddhiyā soḷasahi ñāṇacariyāhi navahi samādhicariyāhi vasībhāvataṭṭhānā nirodhasaṃpattiyā ñāṇa”nti evaṃ paṭisaṃbhidaṃ magge (paṭi. ma. 1.83) āgatā. **Visuddhimagge** panassā sabbākāreṇa vinicchayaṃ kathitā.

Idāni valañjanasaṃpattiṃ pucchanto **kati panāvuso, paccayāti**dimāha. Nirodhato hi vuṭṭhānakaphalasaṃpattiyā ṭhiti nāma na hoti, ekaṃ dve cittavārameva pavattitvā bhavaṅgaṃ otarati. Ayañhi bhikkhu satta divase arūpapavattaṃ nirodhetvā nisinnō nirodhavuṭṭhānakaphalasaṃpattiyā na ciraṃ tiṭṭhati. Valañjanasaṃpattiyā pana addhānaparicchedova pamāṇaṃ. Tasmā sā ṭhiti nāma hoti. Tenāha – “animittāya cetovimuttiyā ṭhitiyā”ti. Tassā ciraṭṭhitatthaṃ kati paccayāti attho. Vissajjane panassā **pubbe ca abhisāṅkhāro**ti addhānaparicchedo vutto. **Vuṭṭhānāyāti** idha bhavaṅgavuṭṭhānaṃ pucchati. Vissajjanepissā **sabbanimittānañca manasikāro**ti rūpādininimittavasena bhavaṅgasahajātamanasikāro vutto.

459. Yā cāyaṃ, āvusoti idha kiṃ pucchati? Idha aññaṃ abhinavaṃ nāma natthi. Heṭṭhā kathitadhammeveva ekato samodhānetvā pucchāmīti pucchati. Kattha pana te kathitā? “Nīlampi sañjānāti pītakampi, lohitaṃ, odātakampi sañjānāti”ti (ma. ni. 1.450) etasmiñhi ṭhāne appamāṇā cetovimutti kathitā. “Natthi kiñcīti ākiñcaññāyatanaṃ neyya”nti (ma. ni. 1.451) ettha ākiñcaññaṃ. “Paññācakkhunā pajānāti”ti (ma. ni. 1.451) ettha suññatā. “Kati panāvuso, paccayā animittāya cetovimuttiyā ṭhitiyā vuṭṭhānāyā”ti ettha animittā. Evaṃ heṭṭhā kathitāva imasmiṃ ṭhāne ekato samodhānetvā pucchati. Taṃ pana paṭikkhipitvā etā tasmim tasmim ṭhāne niddiṭṭhāvāti vatvā aññe cattāro dhammā ekaṇāmakā atthi. Eko dhammo catunāmako atthi, etaṃ pākaṭaṃ katvā kathāpetuṃ idha pucchati atthakathāyaṃ sannitṭhānaṃ kataṃ. Tassā vissajjane **ayaṃ vuccatāvuso, appamāṇā cetovimuttīti** ayaṃ pharaṇaappamāṇatāya appamāṇā nāma. Ayañhi appamāṇe vā satte pharati, ekasmimpi vā satte asesetvā pharati.

Ayaṃ vuccatāvuso, ākiñcaññāti ārammaṇakiñcanassa abhāvato ākiñcaññā. **Attana vāti** atta bhāvavopapuggalādisaṅkhātena attena suññaṃ. **Attaniyena vāti** cīvarādīparikkhārasaṅkhātena attaniyena suññaṃ. **Animittāti** rāganimittādīnaṃ abhāveneva animittā, arahattaphalasaṃpattiṃ sandhāyāha. **Nānatthā ceva nānābyañjanā cāti** byañjanampi nesaṃ nānā atthopi. Tattha byañjanassa nānatā pākaṭāva. Attho pana, appamāṇā cetovimutti bhūmantarato mahaggaṭā eva hoti rūpāvacarā; ārammaṇato satta paññātiārammaṇā. Ākiñcaññā bhūmantarato mahaggaṭā arūpāvacarā; ārammaṇato na vattabbārammaṇā. Suññatā bhūmantarato kāmāvacarā; ārammaṇato saṅkhārārammaṇā. Vipassanā hi ettha suññatāti adhippetā. Animittā bhūmantarato lokuttarā; ārammaṇato nibbānārammaṇā.

Rāgo kho, āvuso, pamāṇakaraṇotiādīsu yathā pabbatapāde pūtipaṇṇarasaudakaṃ nāma hoti kāḷavaṇṇaṃ; oloketānaṃ byāmasatagambhīraṃ viya khāyati. Yaṭṭhiṃ vā rajjuṃ vā gahetvā minantassa piṭṭhipādottharaṇamattampi na hoti. Evamevaṃ yāva rāgādayo nuppajjanti, tāva puggalaṃ sañjānituṃ na sakkā honti, sotāpanno viya, sakadāgāmī viya, anāgāmī viya ca khāyati. Yadā panassa rāgādayo uppajjanti, tadā ratto duṭṭho mūḷhoti paññāyati. Iti ete “ettako aya”nti puggalassa pamāṇaṃ dassento viya uppajjanti pamāṇakaraṇā nāma vuttā. **Yāvatā kho, āvuso, appamāṇā cetovimuttīyoti** yattakā appamāṇā cetovimuttiyo. Kittakā pana tā? Cattāro brahmavihārā, cattāro maggā, cattāri ca phalānīti dvādasā. Tattha brahmavihārā pharaṇaappamāṇatāya appamāṇā. Sesā pamāṇakaraṇānaṃ kilesānaṃ abhāvena appamāṇā. Nibbānampi appamāṇameva, cetovimutti pana na hoti, tasmā na gahitaṃ. **Akuppāti** arahattaphalacetovimutti; sā hi tāsāṃ sabbajetṭhikā, tasmā aggamakkhāyatīti vuttā. **Rāgo kho, āvuso, kiñcanoti** rāgo uppajjitvā puggalaṃ kiñcati maddati palibundhati. Tasmā kiñcanoti vutto. Manussā kira goṇehi khalāṃ maddāpento kiñcehi kapila, kiñcehi kāḷakāti vadanti. Evaṃ maddanatto kiñcanatthoti veditabbo. Dosamohesupi eveda nayo. **Ākiñcaññā cetovimuttiyo** nāma nava dhammā ākiñcaññāyatanañca maggaphalāni ca. Tattha ākiñcaññāyatanaṃ kiñcanaṃ ārammaṇaṃ assa natthīti ākiñcaññaṃ. Maggaphalāni kiñcanānaṃ maddanānaṃ palibundhanakilesānaṃ natthitāya ākiñcaññāni. Nibbānampi ākiñcaññaṃ, cetovimutti pana na hoti, tasmā na gahitaṃ.

Rāgo kho, āvuso, nimittakaraṇotiādīsu yathā nāma dvinnaṃ kulānaṃ sadisā dve vacchakā honti. Yāva tesam lakkhaṇaṃ na kataṃ hoti, tāva “ayaṃ asukakulassa vacchako, ayaṃ asukakulassā”ti na sakkā honti jānituṃ. Yadā pana tesam sattisūlādīsu aññataraṃ lakkhaṇaṃ kataṃ hoti, tadā sakkā honti jānituṃ. Evameva yāva puggalassa rāgo nuppajjati, tāva na sakkā hoti jānituṃ ariyo vā puthujjano vāti. Rāgo panassa uppajjamānova sarāgo nāma ayaṃ puggaloti saññānananimittaṃ karonto viya uppajjati, tasmā “nimittakaraṇo”ti vutto. Dosamohe supi ese va nayo.

Animittā cetovimutti nāma terasa dhammā – vipassanā, cattāro āruppā, cattāro maggā, cattāri ca phalānīti. Tattha vipassanā niccanimittaṃ sukhanimittaṃ attanimittaṃ ugghāṭetīti animittā nāma. Cattāro āruppā rūpanimittassa abhāvena animittā nāma. Maggaphalāni nimittakaraṇānaṃ kilesānaṃ abhāvena animittāni. Nibbānampi animittameva, taṃ pana cetovimutti na hoti, tasmā na gahitaṃ. Atha kasmā suññatā cetovimutti na gahitāti? Sā, “suññā rāgenā”tiādivacanato sabbattha anupaviṭṭhāva, tasmā visuṃ na gahitā. **Ekattā**ti ārammaṇavasena ekattā. Appamāṇaṃ ākiñcaññaṃ suññataṃ animittanti hi sabbānetāni nibbānasseva nāmāni. Iti iminā pariyāyena ekattā. Aññasmiṃ pana ṭhāne appamāṇā honti, aññasmiṃ ākiñcaññaṃ aññasmiṃ suññatā aññasmiṃ animittāti iminā pariyāyena nānābyañjanā. Iti thero yathānusandhināva desanaṃ niṭṭhapesīti.

Papañcasūdaniyā majjhimanikāyaṭṭhakathāya

Mahāvedallasuttavaṇṇanā niṭṭhitā.

4. Cūḷavedallasuttavaṇṇanā

460. Evaṃ me sutanti cūḷavedallasuttaṃ. Tattha **visākho upāsakoti visākhoti** evaṃnāmako upāsako. **Yena dhammadinnāti** yena dhammadinnā nāma bhikkhūni tenupasaṅkami. Ko panāyaṃ visākho? Kā dhammadinnā? Kasmā upasaṅkamīti? Visākho nāma dhammadinnāya gihikāle gharasāmiko. So yadā bhagavā sammāsambodhiṃ abhisambujjhivā pavattavaradhammacakko yasādayo kulaputte vinetvā uruvelaṃ patvā tattha jaṭilasahassaṃ vinetvā purāṇajaṭilehi khīṇāsavabhikkhūhi saddhiṃ rājagahaṃ gantvā buddhadassanattaṃ dvādasanahutāya parisāya saddhiṃ āgatassa bimbisāramahārājassa dhammaṃ desesi. Tadā raññā saddhiṃ āgatesu dvādasanahutesu ekaṃ nahutaṃ upāsakattaṃ paṭivedesi, ekādasa nahutāni sotāpattiphale paṭiṭṭhahimsu saddhiṃ raññā bimbisārena. Ayaṃ upāsako tesam aññataraṃ, tehi saddhiṃ paṭhamadassaneva sotāpattiphale paṭiṭṭhāya, puna ekadivasam dhammaṃ sutvā sakadāgāmiphalaṃ patvā, tato aparabhāgepi ekadivasam dhammaṃ sutvā anāgāmiphale paṭiṭṭhito. So anāgāmī hutvā geḥaṃ āgacchanto yathā aññesu divasesu ito cito ca olokento sitaṃ kurumāno āgacchati, evaṃ anāgantvā santindriyo santamānaso hutvā agamāsi.

Dhammadinnā sīhapañjaraṃ ugghāṭetvā vīthiṃ olokayamānā tassa āgamanākāraṃ disvā, “kiṃ nu kho eta”nti cintetvā tassa paccuggamaṃ kurumānā sopānasīse ṭhatvā olambanattaṃ hatthaṃ pasāresi. Upāsako attano hatthaṃ samīñjesi. Sā “pātarāsabhojanakāle jānissāmī”ti cintesi. Upāsako pubbe tāya saddhiṃ ekato bhuñjati. Taṃ divasaṃ pana taṃ anapaloketvā yogāvacarabhikkhu viya ekakova bhuñji. Sā, “sāyanhakāle jānissāmī”ti cintesi. Upāsako taṃdivasaṃ sirigabbhaṃ na pāvīsi, aññaṃ gabbhaṃ paṭijaggāpetvā kappiyamañcakaṃ paññapāpetvā nipajji. Upāsikā, “kiṃ nu khvassa bahiddhā patthanā atthi, udāhu kenacideva paribhedakena bhīno, udāhu mayheva koci doso atthi”ti balavadomanassā hutvā, “ekaṃ dve divase vasitakāle sakkā ñātu”nti tassa upaṭṭhānaṃ gantvā vanditvā aṭṭhāsi.

Upāsako, “kiṃ dhammadinne akāle āgatāsī”ti pucchi. Āma ayyaputta, āgatāmihi, na tvaṃ yathā purāṇo, kiṃ nu te bahiddhā patthanā atthīti? Natthi dhammadinneti. Añño koci paribhedako atthīti? Ayampi natthīti. Evaṃ sante mayheva koci doso bhavissatīti. Tuyhampi doso natthīti. Atha kasmā mayā saddhiṃ yathā pakatiyā ālāpasallāpamattampi na karothāti? So cintesi – “ayaṃ lokuttaradhammo nāma garu bhāriyo na pakāsetatabbo, sace kho panāhaṃ na kathessāmi, ayaṃ hadayaṃ phāletvā ettheva kālaṃ kareyyā”ti tassānuggahattāya kathesi – “dhammadinne ahaṃ satthu dhammadesanaṃ sutvā lokuttaradhammaṃ nāma adhigato, taṃ adhigatassa evarūpā lokiyakiriyaṃ na vaṭṭati. Yadi tvaṃ icchasi, tava cattālīsa koṭṭiyō mama cattālīsa koṭṭiyoti asītkoṭṭidhanaṃ atthi, ettha issarā hutvā mama mātiṭṭhāne vā bhaginiṭṭhāne vā ṭhatvā vasa. Tayā dinnena bhattapiṇḍamattakena ahaṃ yāpessāmi. Athevaṃ na karosi, ime bhoge gahetvā kulagehaṃ gaccha, athāpi te

bahiddhā patthanā natthi, ahaṃ taṃ bhaginiṭṭhāne vā dhituṭṭhāne vā ṭhapetvā posessāmī’”ti.

Sā cintesi – “pakatipuriso evaṃ vattā nāma natthi. Addhā etena lokuttaravaradhammo paṭividdho. So pana dhammo kiṃ puriseheva paṭibujjhitabbo, udāhu mātugāmopi paṭivijjhituṃ sakkotī’”ti visākhaṃ etadavoca – “kiṃ nu kho eso dhammo puriseheva labhitabbo, mātugāmenapi sakkā laddhu’”nti? Kiṃ vadesi dhammadinne, ye paṭipannakā, te etassa dāyādā, yassa yassa upanissayo atthi, so so etaṃ paṭilabhatīti. Evaṃ sante mayhaṃ pabbajjaṃ anujānāthāti. Sādhu bhadde, ahampi taṃ etasmiṃyeva magge yojetukāmo, manāṃ pana te ajānamāno na kathemīti tāvadeva bimbisārassa rañño santikaṃ gantvā vanditvā aṭṭhāsi.

Rājā, “kiṃ, gahapati, akāle āgatosī’”ti pucchi. Dhammadinnā, “mahārāja, pabbajissāmī’”ti vadatīti. Kiṃ panassa laddhuṃ vaṭṭatīti? Aññaṃ kiñci natthi, sovaṇṇasivikaṃ deva, laddhuṃ vaṭṭati nagarañca paṭijaggāpetuntī. Rājā sovaṇṇasivikaṃ datvā nagaraṃ paṭijaggāpesi. Visākho dhammadinnaṃ gandhodakena nahāpetvā sabbālankārehi alaṅkārapetvā sovaṇṇasivikāya nisīdāpetvā ñātigaṇena parivārāpetvā gandhapupphādīhi pūjayamāno nagaravāsanaṃ karonto viya bhikkhuniupassayaṃ gantvā, “dhammadinnaṃ pabbājethāyye’”ti āha. Bhikkhuniyo “ekaṃ vā dve vā dose sahituṃ vaṭṭati gahapatī’”ti āhaṃsu. Natthayye koci doso, saddhāya pabbajātīti. Atekā byattā therī tacapañcakakammaṭṭhānaṃ ācikkhitvā kese ohāretvā pabbājesi. Visākho, “abhiramayye, svākkhāto dhammo’”ti vanditvā pakkāmi.

Tassā pabbajitadivasato paṭṭhāya lābhasakkāro uppajji. Teneva palibuddhā samaṇadhammaṃ kātuṃ okāsaṃ na labhati. Athācariya-upajjhāyatheriyo gahetvā janapadaṃ gantvā aṭṭhatimsāya ārammaṇesu cīttarucitaṃ kammaṭṭhānaṃ kathāpetvā samaṇadhammaṃ kātuṃ āradhā, abhinīhārasampannatā pana nāticiraṃ kilamittha.

Ito paṭṭhāya hi satasahassakappamatthake padumuttaro nāma sathā loke udapādi. Tadā esā ekasmiṃ kule dāsī hutvā attano kese vikkiṇitvā sujātattherassa nāma aggasāvakassa dānaṃ datvā patthanamakāsi. Sā tāya patthanābhinīhārasampattiya nāticiraṃ kilamittha, katipāheneva arahattaṃ patvā cintesi – “ahaṃ yenatthena sāsane pabbajitā, so matthakaṃ patto, kiṃ me janapadavāsena, mayhaṃ ñātakāpi puññāni karissanti, bhikkhunisaṅghopi paccayehi na kilamissati, rājagahaṃ gacchāmī’”ti bhikkhunisaṅghaṃ gahetvā rājagahameva agamāsi. Visākho, “dhammadinnā kira āgatā’”ti sutvā, “pabbajitvā nacirasseva janapadaṃ gatā, gantvāpi nacirasseva paccāgatā, kiṃ nu kho bhavissati, gantvā jānissāmī’”ti dutiyagamanena bhikkhuniupassayaṃ agamāsi. Tena vuttaṃ – “atha kho visākho upāsako yena dhammadinnā bhikkhunī tenupasaṅkamī’”ti.

Etadavocāti etaṃ sakkāyotiādivacanaṃ avoca. Kasmā avocāti? Evaṃ kirassa ahosi – “abhiramasi nābhiramasi, ayye’”ti evaṃ pucchanaṃ nāma na paṇḍitakiccaṃ, pañcupādānakkhandhe upanetvā pañhaṃ pucchissāmī, pañhabyākaraṇena tassā abhiratiṃ vā anabhiratiṃ vā jānissāmīti, tasmā avoca. Taṃ sutvāva dhammadinnā ahaṃ, āvuso visākha, acirapabbajitā sakāyaṃ vā parakāyaṃ vā kuto jānissāmīti vā, aññattheriyo upasaṅkamitvā pucchāti vā avatvā upanikkhittaṃ sampaṭicchamānā viya, ekapāsakagaṇṭhiṃ mocentī viya gahanaṭṭhāne hatthimaggāṃ nīharamānā viya khaggamukhena samuggāṃ vivaramānā viya ca paṭisambhidāvisaye ṭhatvā pañhaṃ vissajjamānā, **pañca kho ime, āvuso visākha, upādānakkhandhāti**ādīmāha. Tattha **pañcāti** gaṇanaparichedo. **Upādānakkhandhāti** upādānānaṃ paccayabhūtā khandhāti evamādinā nāyenettha upādānakkhandhakathā vitthāretvā kathetabbā. Sā panesā visuddhimagge vitthāritā evāti tattha vittāritanayeneva veditabbā. **Sakkāyasamudayā**dīsipi yaṃ vattabbāṃ, taṃ heṭṭhā tattha tattha vuttameva.

Idaṃ pana catusaccabyākaraṇaṃ sutvā visākho theriyā abhiratabhāvaṃ aññāsi. Yo hi buddhasāsane ukkaṇṭhito hoti anabhirato, so evaṃ pucchitapucchitapañhaṃ saṅḍāsena ekekaṃ palitaṃ gaṇhanto viya, sinerupādato vālukaṃ uddharanto viya vissajjetuṃ na sakkoti. Yasmā pana imāni cattāri saccāni loke candīmasūriyā viya buddhasāsane pākāṭāni, parisamajjhe gato hi bhagavāpi mahātherāpi saccāneva pakāsentī; bhikkhusaṅghopi pabbajitadivasato paṭṭhāya kulaputte cattāri nāma kiṃ, cattāri ariyasaccānīti pañhaṃ uggaṇhāpeti. Ayañca dhammadinnā upāyakosalle ṭhitā paṇḍitā byattā nayaṃ gahetvā sutenapi kathetuṃ samatthā, tasmā “na sakkā etissā ettāvata saccānaṃ paṭividdhabhāvo ñātuṃ, saccavinibbhogapañhabyākaraṇena sakkā ñātu’”nti cintetvā heṭṭhā kathitāni dve saccāni paṭinivattetvā guḷhaṃ katvā gaṇṭhipañhaṃ pucchissāmīti pucchanto **taññeva nu kho, ayyeti**ādīmāha.

Tassa vissajjane **na kho, āvuso visākha, taññeva upādānanti** upādānassa saṅkhārakkhandhekadesabhāvato na taṃyeva upādānaṃ te pañcupādānakkhandhā, nāpi aññatra pañcahi upādānakkhandhehi upādānaṃ. Yadi hi taññeva siyā, rūpādisabhāvampi upādānaṃ siyā. Yadi aññatra siyā, parasamaye cittavippayutto anusayo viya paṇṇatti viya nibbānaṃ viya ca khandhavinimuttaṃ vā siyā, chaṭṭho vā khandho paññapetaḥ bhaveyya, tasmā evaṃ byākāsi. Tassā byākaraṇaṃ sutvā “adhigatapatiṭṭhā aya”nti visākho niṭṭhamagamāsi. Na hi sakkā akhīṇāsavena asambaddhena avitthāyantena padīpasahassaṃ jālentena viya evarūpo gulho paṭicchanno tilakkaṇāhato gambhīro pañho vissajjeto. Niṭṭhaṃ gantvā pana, “ayaṃ dhammadinnā sāsane laddhapatiṭṭhā adhigatapatiṭṭhā vesārajappattā bhavamattake ṭhiṭā mahākhiṇāsavā, samattā mayhaṃ pucchitapañhaṃ kathetuṃ, idāni pana naṃ ovattikasāraṃ pañhaṃ pucchissāmi”ti cintetvā taṃ pucchanto, **kathaṃ panāyeyeti**ādīmāha.

461. Tassa vissajjane **assutavāti**ādi mūlapariyāye vitthāritameva. **Rūpaṃ attato samanupassatīti**, “idhekacco rūpaṃ attato samanupassati. Yaṃ rūpaṃ so ahaṃ, yo ahaṃ taṃ rūpanti rūpañca attañca advayaṃ samanupassati. Seyyathāpi nāma telappadīpassa jhāyato yā acci so vaṇṇo, yo vaṇṇo sā accīti acciñca vaṇṇañca advayaṃ samanupassati. Evameva idhekacco rūpaṃ attato samanupassati...pe... advayaṃ samanupassati”ti (paṭi. ma. 1.131) evaṃ rūpaṃ attāti diṭṭhipassanāya passati. **Rūpavantaṃ vā attānanti** arūpaṃ attāti gahetvā chāyāvantaṃ rukkaṃ viya taṃ attānaṃ rūpavantaṃ samanupassati. **Attani vā rūpanti** arūpameva attāti gahetvā pupphasmiṃ gandhaṃ viya attani rūpaṃ samanupassati. **Rūpasmim vā attānanti** arūpameva attāti gahetvā karaṇḍāya maṇim viya attānaṃ rūpasmim samanupassati. **Vedanaṃ attatoti**ādīsipi eseva nayo.

Tattha, **rūpaṃ attato samanupassatīti** suddharūpameva attāti kathitaṃ. Rūpavantaṃ vā attānaṃ, attani vā rūpaṃ, rūpasmim vā attānaṃ. Vedanaṃ attato... saññaṃ... saṅkhāre... viññānaṃ attato samanupassatīti imesu sattu sattu ṭhānesu arūpaṃ attāti kathitaṃ. Vedanāvantaṃ vā attānaṃ, attani vā vedanaṃ, vedanāya vā attānanti evaṃ catūsu khandhesu tiṇṇaṃ tiṇṇaṃ vasena dvādasasu ṭhānesu rūpārūpamissako attā kathito. Tattha rūpaṃ attato samanupassati... vedanaṃ... saññaṃ... saṅkhāre... viññānaṃ attato samanupassatīti imesu pañcasu ṭhānesu ucchedadiṭṭhi kathitā, avasesesu sassatadiṭṭhīti. Evamettha pannarasa bhavadiṭṭhiyo, pañca vibhavadiṭṭhiyo honti. **Na rūpaṃ attatoti** ettha rūpaṃ attāti na samanupassati. Aniccaṃ dukkhaṃ anattāti pana samanupassati. **Na rūpavantaṃ attānaṃ...pe... na viññānasmim attānanti** ime pañcakkhandhe kenaci pariyaṃyena attato na samanupassati, sabbākārena pana aniccaṃ dukkhā anattāti samanupassati.

Ettāvataṃ theriyā, “evaṃ kho, āvuso visākha, sakkāyadiṭṭhi hoti”ti evaṃ purimapañhaṃ vissajjentiyaṃ ettakena gamanaṃ hoti, āgamaṃ hoti, gamaṇāgamaṃ hoti, vaṭṭaṃ vattatīti vaṭṭaṃ matthakaṃ pāpetvā dassitaṃ. **Evaṃ kho, āvuso visākha, sakkāyadiṭṭhi na hoti**ti pacchimaṃ pañhaṃ vissajjentiyaṃ ettakena gamanaṃ na hoti, āgamaṃ na hoti, gamaṇāgamaṃ na hoti, vaṭṭaṃ nāma na vattatīti vivaṭṭaṃ matthakaṃ pāpetvā dassitaṃ.

462. Katamo panāyeyo, ariyo aṭṭhaṅgiko maggoti ayaṃ pañho theriyā paṭipucchitvā vissajjetabbo bhaveyya – “upāsaka, tayā heṭṭhā maggo pucchito, idha kasmā maggameva pucchasi”ti. Sā pana attano byattatāya paṇḍiccena tassa adhippāyaṃ sallakkhesi – “iminā upāsakena heṭṭhā paṭipattivasena maggo pucchito bhavissati, idha pana taṃ saṅkhatāsaṅkhatalokiyalokuttarasāṅgahitāsaṅgahitavasena pucchitukāmo bhavissati”ti. Tasmā appaṭipucchitvāva yaṃ yaṃ pucchi, taṃ taṃ vissajjesi. Tattha **saṅkhatoti** cetito kappito pakappito āyūhito kato nibbattito samāpajjantena samāpajjitabbo. **Tiḥi ca kho, āvuso visākha, khandhehi ariyo aṭṭhaṅgiko maggo saṅgahitoti** ettha yasmā maggo sappadeso, tayo khandhā nippadesā, tasmā ayaṃ sappadesattā nagaraṃ viya rajjena nippadesehi tiḥi khandhehi saṅgahito. Tattha sammāvācādayo tayo sīlameva, tasmā te sajātito sīlakkhandhena saṅgahitāti. Kiñcāpi hi paḷiyāṃ sīlakkhandheti bhummāna viya niddeho kato, attho pana karaṇavasena veditabbo. Sammāvāyāmadīsū pana tīsū samādhi attano dhammatāya ārammaṇe ekaggabhāvena appetuṃ na sakkoti. Vīriye pana paggahakiccaṃ sādheṇte satiyā ca apilāpanakiccaṃ sādheṇtiyā laddhūpakāro hutvā sakkoti.

Tatrāyaṃ upamā – yathā hi “nakkhattaṃ kīlissāmā”ti uyyānaṃ pavīṭṭhesu tīsū sahāyesu eko supupphitaṃ campakarukkaṃ disvā hatthaṃ ukkhipitvāpi gahetuṃ na sakkuṇeyya. Athassa dutiyo onamitvā piṭṭhiṃ dadeyya, so tassa piṭṭhiyaṃ ṭhatvāpi kampamāno gahetuṃ na sakkuṇeyya. Athassa itaro aṃsakūṭaṃ upanāmeyya, so ekassa piṭṭhiyaṃ ṭhatvā ekassa aṃsakūṭaṃ olubbha yathārucci pupphāni ocinitvā piḷandhitvā

nakkhattaṃ kīḷeyya. Evaṃsāmpadamidaṃ datṭhabbaṃ. Ekato uyyānaṃ pavittḥā tayo sahāyakā viya hi ekato jātā sammāvāyāmādayo tayo dhammā. Supupphitacampako viya ārammaṇaṃ. Hatthaṃ ukkhipitvāpi gahetuṃ asakkonto viya attano dhammatāya ārammaṇe ekaggabhāvena appetuṃ asakkonto samādhi. Piṭṭhiṃ datvā onatasahāyo viya vāyāmo. Aṃsakūṭaṃ datvā ṭhitasahāyo viya sati. Yathā tesu ekassa piṭṭhiyaṃ ṭhatvā ekassa aṃsakūṭaṃ olubbha itaro yathārucci pupphaṃ gahetuṃ sakkoti, evamevaṃ vīriye paggahakiccaṃ sādheṇte, satiyā ca apilāpanakiccaṃ sādheṇtiyā laddhupakāro samādhi sakkoti ārammaṇe ekaggabhāvena appetuṃ. Tasmā samādhiyevettha sajjātito samādhikkhandhena saṅgahito. Vāyāmasatiyo pana kiriyato saṅgahitā honti.

Sammādiṭṭhisammāsaṅkappesupī paññā attano dhammatāya aniccaṃ dukkhaṃ anattāti ārammaṇaṃ nicchetuṃ na sakkoti, vitakke pana ākoṭetvā ākoṭetvā dente sakkoti. Kathaṃ? Yathā hi heraññiko kahāpaṇaṃ hatthe ṭhapetvā sabbabhāgesu oloketukāmo samānopi na cakkhudaleneva parivattetuṃ sakkoti, aṅgulipabbehi pana parivattetvā ito cito ca oloketuṃ sakkoti. Evameva na paññā attano dhammatāya aniccādivasena ārammaṇaṃ nicchetuṃ sakkoti, abhiniropanalakkhaṇena pana āhananapariyāhananarasena vitakkena ākoṭentena viya parivattentena viya ca ādāyā dinnameva vinicchetuṃ sakkoti. Tasmā idhāpi sammādiṭṭhiyeva sajjātito paññākkhandhena saṅgahitā. Sammāsaṅkappo pana kiriyato saṅgahito hoti. Iti imehi tīhi khandhehi maggo saṅgahaṃ gacchati. Tena vuttaṃ – ‘‘tīhi ca kho, āvuso visākha, khandhehi ariyo aṭṭhaṅgiko maggo saṅgahito’’ti.

Idāni ekacittakkhaṇikaṃ maggasaṃmādhīṃ sanimittaṃ saparikkhāraṃ pucchanto, **katamo panāyyetiādimāha**. Tassa vissajjane cattāro satipaṭṭhānā maggakkhaṇe catukiccasāadhanavasena uppannā sati, sā samādhissa paccayatthena nimittaṃ. Cattāro sammappadhānā catukiccasāadhanavaseneva uppannaṃ vīriyaṃ, taṃ parivāraṭṭhena parikkhāro hoti. **Tesaṃyeva dhammānanti** tesaṃ maggasaṃpayuttadhammānaṃ. **Āsevanā**tiādisu ekacittakkhaṇikāyeva āsevanādayo vuttāti.

Vitaṇḍavādī pana, ‘‘ekacittakkhaṇiko nāma maggo natthi, ‘evaṃ bhāveyya satta vassānī’’ti hi vacanato sattapi vassāni maggabhāvanā hoti, kilesā pana lahu chijjantā sattahi ṇāṇehi chijjantī’’ti vadati. So ‘‘suttaṃ āharā’’ti vattabbo. Addhā aññaṃ apassanto, ‘‘yā tesaṃyeva dhammānaṃ āsevanā bhāvanā bahulīkamma’’nti idameva suttaṃ āharitvā, ‘‘aññaṇa cittaṇa āsevati, aññaṇa bhāveti, aññaṇa bahulīkarotī’’ti vakkhati. Tato vattabbo – ‘‘kiṃ panidaṃ, suttaṃ neyyatthaṃ nītattha’’nti. Tato vakkhati – ‘‘nītatthaṃ yathā suttaṃ tatheva attho’’ti. Tassa idaṃ uttaraṃ – evaṃ sante ekaṃ cittaṃ āsevanānaṃ uppannaṃ, aparaṃpi āsevanānaṃ, aparaṃpi āsevanānanti evaṃ divasampi āsevanāva bhavissati, kuto bhāvanā, kuto bahulīkammaṃ? Ekaṃ vā bhāvayamānaṃ uppannaṃ aparaṃpi bhāvayamānaṃ aparaṃpi bhāvayamānanti evaṃ divasampi bhāvanāva bhavissati, kuto āsevanā kuto bahulīkammaṃ? Ekaṃ vā bahulīkarontaṃ uppannaṃ, aparaṃpi bahulīkarontaṃ, aparaṃpi bahulīkarontanti evaṃ divasampi bahulīkammameva bhavissati kuto āsevanā, kuto bhāvanāti.

Atha vā evaṃ vadeyya – ‘‘ekena cittaṇa āsevati, dvīhi bhāveti, tīhi bahulīkaroti. Dvīhi vā āsevati, tīhi bhāveti, ekena bahulīkaroti. Tīhi vā āsevati, ekena bhāveti, dvīhi bahulīkarotī’’ti. So vattabbo – ‘‘mā suttaṃ me laddhanti yaṃ vā taṃ vā avaca. Paññaṃ vissajjentaṇa nāma ācariyassa santike vasitvā buddhavacanaṃ uggaṇhitvā attharasam viditvā vattabbaṃ hoti. Ekacittakkhaṇikāva ayaṃ āsevanā, ekacittakkhaṇikā bhāvanā, ekacittakkhaṇikaṃ bahulīkammaṃ. Khayagāmilokuttaramaggo bahulacittakkhaṇiko nāma natthi, ‘ekacittakkhaṇikoyevā’’ti saññāpetabbo. Sace saññānāti, saññānātu, no ce saññānāti, gaccha pātova vihāraṃ pavisitvā yāgum pivāhī’’ti uyyojetabbo.

463. Kati panāyye saṅkhārāti idha kiṃ pucchati? Ye saṅkhāre nirodhetvā nirodhaṃ samāpajjati, te pucchissāmīti pucchati. Tenevassa adhippāyaṃ ṇatvā therī, puññābhisaṅkhārādīsu anekesu saṅkhāresu vijjamānesupī, kāyasaṅkhārādayova ācikkhantī, **tayome, āvusotiādimāha**. Tattha kāyapaṭibaddhattā kāyena saṅkharīyati kariyati nibbattiyatīti **kāyasaṅkhāro**. Vācaṃ saṅkharotī karotī nibbattetīti vacīsaṅkhāro. Cittapaṭibaddhattā cittaṇa saṅkharīyati kariyati nibbattiyatīti **cittasaṅkhāro**. **Katamo panāyyeti** idha kiṃ pucchati? Ime saṅkhārā aññaṃaññaṃissā āluṭitā avibhūtā duddīpanā. Tathā hi, kāyadvāre ādānagahaṇamuñcanacopanāni pāpetvā uppannā aṭṭha kāmāvacarakusalacetanā dvādasa akusalacetanāti evaṃ kusalākusalā vīsati cetaṇāpi assāsapassāsāpi kāyasaṅkhārātveva vuccanti. Vacīdvāre hanusaṃcopanaṃ vacībhedaṃ pāpetvā uppannā vuttappakārāva vīsati cetaṇāpi vitakkavicārāpi vacīsaṅkhārotveva vuccanti. Kāyavacīdvāresu copanaṃ apattā raho nisinnassa cintayato uppannā kusalākusalā ekūnatimsa cetaṇāpi saññā

ca vedanā cāti ime dve dhammāpi cittasaṅkhārotveva vuccanti. Evaṃ ime saṅkhārā aññamaññamissā āluṭitā avibhūtā duddīpanā. Te pākaṭe vibhūte katvā kathāpessāmīti pucchati.

Kasmā panāyyeti idha kāyasaṅkhārādīnāmassa padatthaṃ pucchati. Tassa vissajjane **kāyappaṭibaddhāti** kāyanissitā, kāye sati honti, asati na honti. **Cittappaṭibaddhāti** cattanissitā, citte sati honti, asati na honti.

464. Idāni kiṃ nu kho eṣā saññāvedayitanirodhaṃ valañjeti, na valañjeti. Ciṅṇavasī vā tattha no ciṅṇavasīti jānanatthaṃ pucchanto, **kathaṃ panāyye, saññāvedayitanirodhasamāpatti hotīti**ādīmāha. Tassa vissajjane **samāpajjissanti vā samāpajjāmīti vā** padadvayena nevasaññānāsaññāyatanasamāpattikālo kathito. **Samāpannoti** padena antonirodho. Tathā purimehi dvīhi padehi sacittakakālo kathito, pacchimena acittakakālo. **Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva, ettakaṃ kālaṃ acittako bhavissāmīti addhānaparicchedacittaṃ bhāvitaṃ hoti. **Yaṃ taṃ tathattāya upanetīti** yaṃ evaṃ bhāvitaṃ cittaṃ, taṃ puggalaṃ tathattāya acittakabhāvāya upaneti.

Paṭhamaṃ nirujjhati vacīsaṅkhāroti sesasaṅkhārehi paṭhamaṃ dutiyajjhāneyeva nirujjhati. **Tato kāyasaṅkhāroti** tato paraṃ kāyasaṅkhāro catutthajjhāne nirujjhati. **Tato cittasaṅkhāroti** tato paraṃ cittasaṅkhāro antonirodhe nirujjhati. **Vuṭṭhahissanti vā vuṭṭhahāmīti vā** padadvayena antonirodhakālo kathito. **Vuṭṭhitoti** padena phalasaṃpattikālo. Tathā purimehi dvīhi padehi acittakakālo kathito, pacchimena sacittakakālo. **Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva ettakaṃ kālaṃ acittako hutvā tato paraṃ sacittako bhavissāmīti addhānaparicchedacittaṃ bhāvitaṃ hoti. **Yaṃ taṃ tathattāya upanetīti** yaṃ evaṃ bhāvitaṃ cittaṃ, taṃ puggalaṃ tathattāya sacittakabhāvāya upaneti. Iti heṭṭhā nirodhasamāpajjanakālo gahito, idha nirodhato vuṭṭhānakālo.

Idāni nirodhakathaṃ kathetuṃ vāroti nirodhakathā kathetabbā siyā, sā panesā, “dvīhi balehi samannāgatattā tayo ca saṅkhārānaṃ paṭippassaddhiyā soḷasahi ñānacariyāhi navahi samādhicariyāhi vasībhāvatāpaññā nirodhasamāpattiyā ñāṇa”nti mātikaṃ ṭhapetvā sabbākārena visuddhimagge kathitā. Tasmā tattha kathitanayeneva gahetabbā. Ko panāyaṃ nirodho nāma? Catunnaṃ khandhānaṃ paṭisaṅkhā appavatti. Atha kimatthametam samāpajjantīti. Saṅkhārānaṃ pavatte ukkaṇṭhitā sattāhaṃ acittakā hutvā sukhaṃ viharissāma, diṭṭhadhammanibbānaṃ nāmetaṃ, yadidaṃ nirodhoti etadatthaṃ samāpajjanti.

Paṭhamaṃ uppajjati cittasaṅkhāroti nirodhā vuṭṭhahantassa hi phalasaṃpatticittaṃ paṭhamaṃ uppajjati. Taṃsampaṃyuttaṃ saññaṇṇa vedanaṇṇa sandhāya, “paṭhamaṃ uppajjati cittasaṅkhāro”ti āha. **Tato kāyasaṅkhāroti** tato paraṃ bhavaṅgasamaye kāyasaṅkhāro uppajjati. Kiṃ pana phalasaṃpatti assāsapassāse na samuṭṭhāpetīti? Samuṭṭhāpeti. Imassa pana catutthajjhānikā phalasaṃpatti, sā na samuṭṭhāpeti. Kiṃ vā etena phalasaṃpatti paṭhamajjhānikā vā hotu, dutiyatīyacatutthajjhānikā vā, santāya samāpattiyā vuṭṭhitassa bhikkhuno assāsapassāsā abbohārikā honti. Tesam abbohārikabhāvo sañjīvattheravatthunā veditabbo. Sañjīvattherassa hi samāpattito vuṭṭhāya kiṃsukapupphasadise vītaccitaṅgāre maddamānassa gacchato cīvare aṃsumattampi na jhāyi, usumākāramattampi nāhosi, samāpattiphalaṃ nāmetanti vadanti. Evamevaṃ santāya samāpattiyā vuṭṭhitassa bhikkhuno assāsapassāsā abbohārikā hontīti bhavaṅgasamayenevetam kathitanti veditabbam.

Tato vacīsaṅkhāroti tato paraṃ kiriyamayapavattavalañjanakāle vacīsaṅkhāro uppajjati. Kiṃ bhavaṅgaṃ vitakkavicāre na samuṭṭhāpetīti? Samuṭṭhāpeti. Taṃsamuṭṭhānā pana vitakkavicārā vācaṃ abhisāṅkhātuṃ na sakkontīti kiriyamayapavattavalañjanakālenevataṃ kathitaṃ. **Suññato phassoti**ādāyo sakuṇenāpi ārammaṇenāpi kathetabbā. Sakuṇena tāva suññatā nāma phalasaṃpatti, tāya sahaṃjātaṃ phassaṃ sandhāya suññato phassoti vuttaṃ. **Animittāpaṇihitesupī**eseva nayo. Ārammaṇena pana nibbānaṃ rāgādīhi suññatā suññaṃ nāma, rāganimittādīnaṃ abhāvā animittaṃ, rāgadosamohappaṇidhīnaṃ abhāvā appaṇihitaṃ. Suññataṃ nibbānaṃ ārammaṇaṃ katvā uppannaphalasaṃpattiyam phasso suññato nāma. **Animittāpaṇihitesupī** eseva nayo.

Aparā āgamanīyakathā nāma hoti, suññatā, animittā, appaṇihitāti hi vipassanāpi vuccati. Tattha yo bhikkhu saṅkhāre aniccato pariggahetvā aniccato disvā aniccato vuṭṭhāti, tassa vuṭṭhānagāminīvipassanā **animittā** nāma hoti. Yo dukkhato pariggahetvā dukkhato disvā dukkhato vuṭṭhāti, tassa **appaṇihitā** nāma. Yo anattato pariggahetvā anattato disvā anattato vuṭṭhāti, tassa **suññatā** nāma. Tattha animittavipassanāya maggo

animitto nāma, animittamaggassa phalaṃ animittaṃ nāma. Animittaphalasaṃpattisahajāte phasse phusante animitto phasso phusatīti vuccati. Appaṇihitasuññatesupi eseva nayo. Āgamaniyena kathite pana suññato vā phasso animitto vā phasso appaṇihito vā phassoti vikappo āpajjeyya, tasmā saguṇena ceva ārammaṇena ca kathetabbaṃ. Evañhi tayo phassā phusantīti sameti.

Vivekaninnantiādīsu nibbānaṃ viveko nāma, tasmim̄ viveke ninnaṃ onatanti vivekaninnaṃ. Aññato āgantvā yena viveko, tena vaṅkaṃ viya hutvā ṭhitanti **vivekappaṇaṃ.** Yena viveko, tena patamaṇaṃ viya ṭhitanti **vivekappaḥhāraṃ.**

465. Idāni yā vedanā nirodhetvā nirodhasaṃpattiṃ saṃpajjati, tā pucchissāmīti pucchanto **kati panāyye, vedanāti āha. Kāyikaṃ vātiādīsu pañcadvārikaṃ sukhaṃ kāyikaṃ nāma, manodvārikaṃ cetasaṃ nāmāti vedītabbaṃ.** Tattha **sukhanti** sabhāvaniddeso. **Sātanti** tasseva madhurabhāvādīpakaṃ vevacanaṃ. **Vedayitanti** vedayitabhāvādīpakaṃ, sabbavedanānaṃ sādharmaṇavacanaṃ. Sesapadesupi eseva nayo. **Ṭhitisukhā vipariṇāmadukkhātiādīsu** sukhāya vedanāya atthibhāvo sukhaṃ, natthibhāvo dukkhaṃ. Dukkāya vedanāya atthibhāvo dukkhaṃ, natthibhāvo sukhaṃ. Adukkhamasukhāya vedanāya jānanabhāvo sukhaṃ, ajānanabhāvo dukkhanti attho.

Kim anusayo anusetīti katamo anusayo anuseti. Appahīnaṭṭhena sayito viya hotīti anusayapucchaṃ pucchati. **Na kho, āvuso visākha, sabbāya sukhāya vedanāya rāgānusayo anusetīti** na sabbāya sukhāya vedanāya rāgānusayo anuseti. Na sabbāya sukhāya vedanāya so appahīno, na sabbāya sukhaṃ vedanaṃ ārabha uppajjati attho. Esa nayo sabbattha. **Kim pahātabbanti** ayaṃ pahānapucchā nāma.

Rāgaṃ tena pajahatīti ettha ekeneva byākaraṇena dve pucchā vissajjesi. Idha bhikkhu rāgānusayaṃ vikkhambhetvā paṭhamajjhānaṃ saṃpajjati, jhānavikkhambhitaṃ rāgānusayaṃ tathā vikkhambhitameva katvā vipassanaṃ vaḍḍhetvā anāgāmiṃmaggena samugghātetī. So anāgāmiṃmaggena pahīnopi tathā vikkhambhitattāva paṭhamajjhāne nānuseti nāma. Tenāha – “na tattha rāgānusayo anuseti”ti. **Tadāyatanaṃ** taṃ āyatanaṃ, paramassāsabhāvena paṭiṭṭhānabhūtaṃ arahattanti attho. **Iti anuttaresūti** evaṃ anuttarā vimokkhāti laddhanāme arahatte. **Pihaṃ upaṭṭhāpayatoti** patthanaṃ paṭṭhapentassa. **Uppajjati pihāpaccayā domanassanti** patthanaṃ paṭṭhapanamūlakaṃ domanassaṃ uppajjati. Taṃ panetaṃ na patthanaṃ paṭṭhapanamūlakaṃ uppajjati, patthetvā alabhantassa pana alābhamūlakaṃ uppajjamānaṃ, “uppajjati pihāpaccayā”ti vuttaṃ. Tattha kiñcāpi domanassaṃ nāma ekantena akusalaṃ, idaṃ pana sevītabbaṃ domanassaṃ vaṭṭatīti vadanti. Yogino hi temāsikaṃ chamāsikaṃ vā navamāsikaṃ vā paṭipadaṃ gaṇhanti. Tesu yo taṃ taṃ paṭipadaṃ gahetvā antokālaparicchedeyeva arahattaṃ pāpuṇissāmīti ghaṭento vāyamanto na sakkoti yathāparicchinakālena pāpuṇitum̄, tassa balavadomanassaṃ uppajjati, āḷindikavāsimahāphussadevattherassa viya assudhārā pavattanti. Thero kira ekūnavīsativassāni gatapaccāgatavattaṃ pūresi. Tassa, “imasmim̄ vāre arahattaṃ gaṇhissāmi, imasmim̄ vāre visuddhipavāraṇaṃ pavāressāmī”ti mānasaṃ bandhitvā samaṇadhammaṃ karontasseva ekūnavīsativassāni atikkantāni. Pavāraṇādivase āgate therassa assupātena muttadivaso nāma nāhosi. Vīsatime pana vasse arahattaṃ pāpuṇi.

Paṭighaṃ tena pajahatīti ettha domanasseneva paṭighaṃ pajahati. Na hi paṭigheneva paṭighappahānaṃ, domanassaṃ vā domanassappahānaṃ nāma atthi. Ayaṃ pana bhikkhu temāsikādīsu aññataraṃ paṭipadaṃ gahetvā itī paṭisañcikkhati – “passa bhikkhu, kiṃ tuyhaṃ sīlena hīnaṭṭhānaṃ atthi, udāhu vīriyena, udāhu paññāya, nanu te sīlaṃ suparisuddhaṃ vīriyaṃ supaggahitaṃ paññā sūrā hutvā vahatī”ti. So evaṃ paṭisañcikkhitvā, “na dāni puna imassa domanassassa uppajjituṃ dassāmī”ti vīriyaṃ dalhaṃ katvā antotemāse vā antochamāse vā antonavamāse vā anāgāmiṃmaggena taṃ samugghātetī. Iminā pariyaṇena paṭigheneva paṭighaṃ, domanasseneva domanassaṃ pajahati nāma.

Na tattha paṭighānusayo anusetīti tattha evarūpe domanasse paṭighānusayo nānuseti. Na taṃ ārabha uppajjati, pahīnova tattha paṭighānusayoti attho. **Avijjaṃ tena pajahatīti** idha bhikkhu avijjānusayaṃ vikkhambhetvā catutthajjhānaṃ saṃpajjati, jhānavikkhambhitaṃ avijjānusayaṃ tathā vikkhambhitameva katvā vipassanaṃ vaḍḍhetvā arahattamaggena samugghātetī. So arahattamaggena pahīnopi tathā vikkhambhitattāva catutthajjhāne nānuseti nāma. Tenāha – “na tattha avijjānusayo anuseti”ti.

466. Idāni paṭibhāgapucchaṃ pucchanto **sukhāya panāyyetiādīmāha.** Tassa vissajjane yasmā sukhasa

dukkhaṃ, dukkhassa ca sukhaṃ paccanīkaṃ, tasmā dvīsu vedanāsu visabhāgapaṭibhāgo kathito. Upekkhā pana andhakārā avibhūtā duddīpanā, avijjāpi tādisāvātī tenettha sabhāgapaṭibhāgo kathito. Yattakesu pana thānesu avijjā tamaṃ karoti, tattakesu vijjā tamaṃ vinodetīti visabhāgapaṭibhāgo kathito. **Avijjāya kho, āvusoti** ettha ubhopete dhammā anāsavā lokuttarāti sabhāgapaṭibhāgo va kathito. **Vimuttiyā kho, āvusoti** ettha anāsavaṭṭhena lokuttaraṭṭhena abyākataṭṭhena ca sabhāgapaṭibhāgo va kathito. **Accayāsīti** ettha pañhaṃ atikkamitvā gatosīti attho. **Nāsakki pañhānaṃ pariyantaṃ gahetunti** pañhānaṃ paricchedapamaṇaṃ gahetuṃ nāsakki, appaṭibhāgadhammassa paṭibhāgaṃ pucchi. Nibbānaṃ nāmetaṃ appaṭibhāgaṃ, na sakkā nīlaṃ vā pītakaṃ vāti kenaci dhammena saddhiṃ paṭibhāgaṃ katvā dassetuṃ. Tañca tvaṃ iminā adhippāyena pucchāsīti attho.

Ettāvata cāyaṃ upāsako yathā nāma sattame ghare salākabhataṃ labhitvā gato bhikkhu satta gharāni atikkamma aṭṭhamassa dvāre thito sabbānīpi satta gehāni viraddhova na aññāsī, evamevaṃ appaṭibhāgadhammassa paṭibhāgaṃ pucchanto sabbāsūpi sattasu sappaṭibhāgapucchāsu viraddhova hotīti vedītabbo. **Nibbānogaḍhanti** nibbānabbhantaṃ nibbānaṃ anupaviṭṭhaṃ. **Nibbānaparāyananti** nibbānaṃ paraṃ ayanamassa parā gati, na tato paraṃ gacchatīti attho. Nibbānaṃ pariyosānaṃ avasānaṃ assāti **nibbānapariyosānaṃ**.

467. Paṇḍitāti paṇḍiccena samannāgatā, dhātukusalā āyatanakusalā paṭiccasamuppādakusalā thānāṭṭhānakusalāti attho. **Mahāpaññāti** mahante atthe mahante dhamme mahantā niruttiyo mahantāni paṭibhānāni pariggaṇhanasamathāya paññāya samannāgatā. **Yathā taṃ dhammadinnāyāti** yathā dhammadinnāya bhikkhuniyā byākataṃ, ahampi taṃ evamevaṃ byākareyyanti. Ettāvata ca pana ayaṃ suttanto jinabhāsito nāma jāto, na sāvaka bhāsito. Yathā hi rājayuttehi likhitaṃ paṇṇaṃ yāva rājamuddikāya na lañchitaṃ hoti, na tāva rājapaṇṇanti saṅkhyāṃ gacchati; lañchitamattaṃ pana rājapaṇṇaṃ nāma hoti, tathā, “ahampi taṃ evameva byākareyya”nti imāya jinavacanamuddikāya lañchitattā ayaṃ suttanto āhaccavacanena jinabhāsito nāma jāto. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Cūḷavedallasuttavaṇṇanā niṭṭhitā.

5. Cūḷadhammasamādānasuttavaṇṇanā

468. Evaṃ me sutanti cūḷadhammasamādānasuttaṃ. Tatha **dhammasamādānānīti** dhammoti gahitagahaṇāni. **Paccuppannasukhanti** paccuppanne sukhaṃ, āyūhanakkhaṇe sukhaṃ sukaraṃ sukkena sakkā pūretuṃ. **Āyatim dukkhavipākanti** anāgate vipākakāle dukkhavipākaṃ. Iminā upāyena sabbapadesu attho vedītabbo.

469. Natthi kāmesu dosoti vatthukāmesu kilesakāmesu doso natthi. **Pātabyataṃ āpajjantīti** te vatthukāmesu kilesakāmena pātabyataṃ pivītabbataṃ, yathārucci paribhuñjītabbataṃ āpajjantīti attho. **Moḷibaddhāhīti** moḷiṃ katvā baddhakesāhi. **Paribbājikāhīti** tāpasaparibbājikāhi. **Eva māhamsūti** evaṃ vadanti. **Pariññaṃ paññapentīti** pahānaṃ samatikkamaṃ paññapenti. **Māluvāsipāṭikāti** dīghasaṅghānaṃ māluvāpakkam. **Phaleyyāti** ātapena sussitvā bhijjeyya. **Sālamūleti** sālarukkassa samīpe. **Santāsaṃ āpajjeyyāti** kasmā āpajjati? Bhavanavināsabhayā. Rukkhamūle patitamāluvābījato hi latā uppajjitvā rukkhaṃ abhiruhati. Sā mahāpattā ceva hoti bahupattā ca, koviḷārapattasādisehi pattehi samannāgatā. Atha taṃ rukkhaṃ mūlato paṭṭhāya vinandhamānā sabbaviṭṭapāni sañchādetvā mahantaṃ bhāraṃ janetvā tiṭṭhati. Sā vāte vā vāyante deve vā vassante oghanaṃ janetvā tassa rukkassa sabbasākhāpasākhaṃ bhañjati, bhūmiyaṃ nipātetī. Tato tasmiṃ rukkhe patiṭṭhitavimānaṃ bhijjati nassati. Iti sā bhavanavināsabhayā santāsaṃ āpajjati.

Ārāmadevatāti tatha tatha pupphārāmaphalārāmesu adhivatthā devatā. **Vanadevatāti** andhavanasubhagavanādīsu vanesu adhivatthā devatā. **Rukkadevatāti** abhilakkhitesu naḷerupucimandādīsu rukkhesu adhivatthā devatā. **Osadhitiṇavanappatisūti** harītakāmalakṭādīsu osadhīsu tālanāḷikerādīsu tiṇesu vanajetṭhakesu ca vanappatirukkhesu adhivatthā devatā. **Vanakammikāti** vane kasanalāyanadāruāharanagorakkhādīsu kenacideva kammena vā vicarakamanussā. **Uddhareyyunti** khādeyyuṃ. **Vilambinīti** vātena pahatapahataṭṭhānesu keḷiṃ karontī viya vilambantī. **Sukho imissāti**

evarūpāya māluvālatāya samphassopi sukho, dassanampi sukhaṃ. Ayaṃ me dāraṇānaṃ āpānamaṇḍalaṃ bhavissati, kīlābhūmi bhavissati, dutiyaṃ me vimānaṃ paṭiladdhanti latāya dassanepi samphassepī somanassajātā evamāha.

Viṭabhiṃ kareyyāti sākāhānaṃ upari chattākārena tiṭṭheyya. **Oghanaṃ janeyyāti** heṭṭhā ghaṇaṃ janeyya. Upari āruyha sakalaṃ rukkhaṃ paliveṭṭhetvā puna heṭṭhā bhassamānā bhūmiṃ gaṇheyyāti attho. **Padāleyyāti** evaṃ oghanaṃ katvā puna tato paṭṭhāya yāva mūlā otiṇṇasākāhāhi abhiruhamānā sabbasākāhā paliveṭṭhetvā matthakaṃ patvā teneva niyāmena puna orohitvā ca abhiruhitvā ca sakalarukkhaṃ saṃsibbitvā ajjhottharantī sabbasākāhā heṭṭhā katvā sayāṃ upari ṭhatvā vāte vā vāyante deve vā vassante padāleyya. Bhideyyāti attho. Khāṇumattameva tiṭṭheyya, tattha yaṃ sākhaṭṭhakavimānaṃ hoti, taṃ sākāhāsu bhijjamānāsu tattha tattheva bhijjivā sabbasākāhāsu bhinnāsu sabbāṃ bhijjati. Rukkhaṭṭhakavimānaṃ pana yāva rukkhaṃ mūlamattampi tiṭṭhati, tāva na nassati. Idaṃ pana vimānaṃ sākhaṭṭhakaṃ, tasmā sabbasākāhāsu saṃbhijjamānāsu bhijjittha. Devatā puttake gahetvā khāṇuke ṭhitā paridevituṃ āradhā.

471. Tibbarāgajātikoti bahalarāgasabhāvo. **Rāgajaṃ dukkhaṃ domanassaṃ paṭisaṃvedetī** tibbarāgajātikattā diṭṭhe diṭṭhe ārammaṇe nimittaṃ gaṇhāti. Athassa ācariyupajjhāyā daṇḍakammaṃ āṇāpentī. So abhikkhaṇaṃ daṇḍakammaṃ karonto dukkhaṃ domanassaṃ paṭisaṃvedeti, natveva vītikkamaṃ karoti. **Tibbadosajātikoti** appamattikeneva kuppati, daharasāmaṇerehi saddhiṃ hatthaparāmāsādīni karontova katheti. Sopi daṇḍakammaṃ paṭisaṃvedeti. Mohajātiko pana idha kataṃ vā katato akataṃ vā akatato na sallakkheti, tāni tāni kiccāni virādheti. Sopi daṇḍakammaṃ paṭisaṃvedeti.

472. Na tibbarāgajātikotiādīni vuttapaṭipakkhanayena veditabbāni. Kasmā panettha koci tibbarāgādijātikoti hoti, koci na tibbarāgādijātikoti? Kammaniyāmena. Yassa hi kammāyūhanakkhaṇe lobho balavā hoti, alobho mando, adosāmoḥā balavanto, dosamoḥā mandā, tassa mando alobho lobhaṃ pariyādātuṃ na sakkoti, adosāmoḥā pana balavanto dosamoḥe pariyādātuṃ sakkonti. Tasmā so tena kammena dinnapaṭisaṃdhiyasena nibbatta luddho hoti, sukhasīlo akkodhano paññavā vajirūpamaññaṃ.

Yassa pana kammāyūhanakkhaṇe lobhadosā balavanto honti, alobhādosā mandā, amoho balavā, moho mando, so purimanayeneva luddho ceva hoti duṭṭho ca, paññavā pana hoti vajirūpamaññaṃ dattābhayaṭṭhero viya.

Yassa pana kammāyūhanakkhaṇe lobhādosamoḥā balavanto honti, itare mandā, so purimanayeneva luddho ceva hoti dandho ca, sukhasīlako pana hoti akkodhano.

Tathā yassa kammāyūhanakkhaṇe tayopi lobhādosamoḥā balavanto honti, alobhādayo mandā, so purimanayeneva luddho ceva hoti duṭṭho ca mūlho ca.

Yassa pana kammāyūhanakkhaṇe alobhādosamoḥā balavanto honti, itare mandā, so purimanayeneva appakilesa hoti, dibbārammaṇampi disvā niccalo, duṭṭho pana hoti dandhapaññaṃ ca.

Yassa pana kammāyūhanakkhaṇe alobhādosamoḥā balavanto honti, itare mandā, so purimanayeneva aluddho ceva hoti sukhasīlako ca, mūlho pana hoti.

Tathā yassa kammāyūhanakkhaṇe alobhādosamoḥā balavanto honti, itare mandā, so purimanayeneva aluddho ceva hoti paññavā ca, duṭṭho pana hoti kodhano.

Yassa pana kammāyūhanakkhaṇe tayopi alobhādayo balavanto honti, lobhādayo mandā, so mahāsaṅgharakkhitatthero viya aluddho aduṭṭho paññavā ca hoti.

Sesaṃ sabbattha uttānatthamevāti.

Papañcasūdaniyā majjhimanikāyaṭṭhakathāya

Cūḷadhammasamādānasuttavaṇṇanā niṭṭhitā.

6. Mahādhammasamādānasuttavaṇṇanā

473. Evaṃ me suttanti mahādhammasamādānasuttaṃ. Tattha **evaṃkāmāti** evaṃicchā. **Evaṃchandāti** evaṃajjhāsaya. **Evaṃadhippāyāti** evaṃladdhikā. **Tatrāti** tasmim̐ anīṭṭhavaḍḍhane ceva iṭṭhparihāne ca. **Bhagavaṃmūlakāti** bhagavā mūlaṃ etesanti bhagavaṃmūlakā. Idaṃ vuttaṃ hoti – ime, bhante, amhākaṃ dhammā pubbe kassapasammāsambuddhena uppāditā, tasmim̐ parinibbute ekaṃ buddhantaraṃ añño samaṇo vā brāhmaṇo vā ime dhamme uppādetuṃ samattho nāma nāhosi, bhagavatā pana no ime dhammā uppāditā. Bhagavantañhi nissāya mayaṃ ime dhamme ājānāma paṭivijjhāmāti evaṃ bhagavaṃmūlakā no, bhante, dhammāti. **Bhagavaṃnettikāti** bhagavā hi dhammānaṃ netā vinetā anunetāti. Yathāsabhāvato paṭiyekkaṃ paṭiyekkaṃ nāmaṃ gahetvā dassitā dhammā bhagavaṃnettikā nāma honti. **Bhagavaṃpaṭisaraṇāti** catubhūmakā dhammā sabbaññutaññāssa āpāthaṃ āgacchamānā bhagavati paṭisaranti nāmāti bhagavaṃpaṭisaraṇā. Paṭisarantīti osaranti samosaranti. Apica mahābodhimaṇḍe nisinnassa bhagavato paṭivedhavasena phasso āgacchati, ahaṃ bhagavā kinnāmoti? Tvaṃ phusanatṭhena phasso nāma. Vedanā, saññā, saṅkhārā, viññāṇaṃ āgacchati. Ahaṃ bhagavā kinnāmantī? Tvaṃ vijānanaṭṭhena viññāṇaṃ nāmāti evaṃ catubhūmakadhammānaṃ yathāsabhāvato paṭiyekkaṃ paṭiyekkaṃ nāmaṃ gaṇhanto bhagavā dhamme paṭisarantīti bhagavaṃpaṭisaraṇā. **Bhagavantaññeva paṭibhātūti** bhagavatoyeva etassa bhāsītassa attho upaṭṭhātu, tumheyyeva no kathetvā dethāti attho.

474. Sevitabbeti nissayitabbe. **Bhajitabbeti** upagantabbe. **Yathā taṃ aviddasunoti** yathā aviduno bālassa andhaputhujjanassa. **Yathā taṃ viddasunoti** yathā viduno medhāvino paṇḍitassa.

475. Atthi, bhikkhave, dhammasamādānanti purimasutte uppaṭipāṭiākārena mātikā ṭhapitā, idha pana yathādhammaraseneva sathā mātikaṃ ṭhapesi. Tattha **dhammasamādānanti** pāṇātipātādīnaṃ dhammānaṃ gahaṇaṃ.

476. Avijjāgatoti avijjāya samannāgato.

477. Vijjāgatoti vijjāya samannāgato paññavā.

478. Sahāpi dukkhenāti ettha micchācāro abhijjhā micchādiṭṭhīti ime tāva tayo pubbacetanāya ca aparacetanāya cāti dvinnāṃ cetanānaṃ vasena dukkhavedanā honti. Sanniṭṭhāpakacetanā pana sukkhasampayuttā vā upekkhāsampayuttā vā hoti. Sesā pāṇātipātādayo satta tissannampi cetanānaṃ vasena dukkhavedanā honti. Idaṃ sandhāya vuttaṃ – “sahāpi dukkhena sahāpi domanassenā”ti. Domanassameva cettha dukkhanti veditabbaṃ. Pariyeṭṭhiṃ vā āpajjantassa pubbabhāgaparabhāgesu kāyikaṃ dukkhampi vaṭṭatiyeva.

479. Sahāpi sukhenāti ettha pāṇātipāto pharusavācā byāpādoti ime tāva tayo pubbacetanāya ca aparacetanāya cāti dvinnāṃ cetanānaṃ vasena sukhavedanā honti. Sanniṭṭhāpakacetanā pana dukkhasampayuttāva hoti. Sesā satta tissannampi cetanānaṃ vasena sukhavedanā hontiyeva. **Sahāpi somanassenāti** somanassameva cettha sukhanti veditabbaṃ. Iṭṭhaphoṭṭhabbasamaṅgino vā pubbabhāgaparabhāgesu kāyikaṃ sukhampi vaṭṭatiyeva.

480. Tatiyadhammasamādāne idhekacco macchabandho vā hoti, māgaviko vā, pāṇupaghātamyeva nissāya jīvikāṃ kappeti. Tassa garuṭṭhāniyo bhikkhu akāmakasseva pāṇātipāte ādīnaṃ, pāṇātipātaviratiyā ca ānisamsaṃ kathetvā sikkhāpadaṃ deti. So gaṇhantopi dukkhito domanassitova hutvā gaṇhāti. Aparabhāge katipāhaṃ vītināmetvā rakkhituṃ asakkontopi dukkhitova hoti, tassa pubbāparacetanā dukkhasahagatāva honti. Sanniṭṭhāpakacetanā pana sukkhasahagatā vā upekkhāsahagatā vāti evaṃ sabbattha attho veditabbo. Iti pubbabhāgaparabhāgacetanāva sandhāya idaṃ vuttaṃ – “sahāpi dukkhena sahāpi domanassenā”ti. Domanassameva cettha dukkhanti veditabbaṃ.

481. Catutthadhammasamādāne dasasupi padesu tissopi pubbabhāgaparabhāgasanniṭṭhāpakacetanā sukkhasampayuttā hontiyeva, taṃ sandhāya idaṃ vuttaṃ – “sahāpi sukkena sahāpi somanassenā”ti.

Somanassameva cettha sukhanti veditabbaṃ.

482. Tittakālābūti tittakarasaalābu. **Visena saṃsaṭṭhoti** halāhalavisena sampayutto missito luḷito. **Nacchādessatīti** na ruccissati na tuṭṭhiṃ karissati. **Nigacchasīti** gamissasi. **Appaṭisaṅkhāya piveyyāti** taṃ appaccavekkhitvā piveyya.

483. Āpānīyakamṣoti āpānīyassa madhurapānakassa bharitakamṣo. **Vaṇṇasampannoti** pānakavaṇṇādīhi sampannavaṇṇo, kamṣe pakkhittapānakavasena pānakakamṣopi evaṃ vutto. **Chādessatīti** tañhi halāhalavisam yattha yattha pakkhittaṃ hoti, tassa tasseva rasam deti. Tena vuttaṃ “chādessatī”ti.

484. Pūtimuttanti muttameva. Yathā hi manussabhāvo suvaṇṇavaṇṇo pūtikāyotveva, tadahujātāpi galocilatā pūtilatātveva vuccati. Evaṃ taṅkhaṇaṃ gahitaṃ taruṇampi muttaṃ pūtimuttameva. **Nānābhesajjehīti** harītakāmalakādīhi nānosadhehi. **Sukhī assāti** arogo suvaṇṇavaṇṇo sukhī bhaveyya.

485. Dadhi ca madhu cāti superisuddhaṃ dadhi ca sumadhuraṃ madhu ca. **Ekajjhaṃ saṃsaṭṭhanti** ekato katvā missitaṃ āluḷitaṃ. **Tassa tanti** tassa taṃ catumadhurabhesajjaṃ pivato ruceyya. Idañca yaṃ bhagandarasaṃsaṭṭhaṃ lohitaṃ pakkhandati, na tassa bhesajjaṃ, āhāraṃ thambhetvā maggaṃ avalaṅgaṃ karoti. Yaṃ pana pittasaṃsaṭṭhaṃ lohitaṃ, tassettaṃ bhesajjaṃ sītalakiriyāya pariyattabhūtaṃ.

486. Viddheti ubbidde. Meghavigamena dūrībhūtetī attho. **Vigatavalāhaketī** apagatameghe, **devetī** ākāse. **Ākāśagataṃ tamagatanti** ākāśagataṃ tamaṃ. **Puthusamaṇabrāhmaṇaparappavādetī** puthūnaṃ samaṇabrāhmaṇasaṅkhātānaṃ paresaṃ vāde. **Abhivihaccāti** abhiantvā. **Bhāsate ca tapate ca virocate cāti** saradakāle majjhanhikasamaye ādiccova obhāsaṃ muñcati tapati vijjotatīti.

Idaṃ pana suttaṃ devatānaṃ ativiya piyaṃ manāpaṃ. Tatridaṃ vatthu – dakkhiṇadisāyaṃ kira hatthibhogajanapade saṅgaravihāro nāma atthi. Tassa bhojanasāladvāre saṅgararukkhe adhivatthā devatā rattibhāge ekassa daharassa sarabhaññavasena idaṃ suttaṃ osārentassa sutvā sādhuakāraṃ adāsī. Daharo kiṃ esotī āha. Ahaṃ, bhante, imasmim rukkhe adhivatthā devatāti. Kasmim devate pasannāsī, kiṃ sadde, udāhu sutteti? Saddo nāma, bhante, yassa kassaci hotiyeva, sutte pasannāmhi. Satthārā jetavane nisīditvā kathitadivase ca ajja ca ekabyañjanepi nānaṃ natthīti. Assosi tvaṃ devate satthārā kathitadivaseti? Āma, bhante. Kattha ṭhitā assosīti? Jetavanaṃ, bhante, gatāmhi, mahesakkhāsu pana devatāsu āgacchantīsu tattha okāsaṃ alabhitvā idheva ṭhatvā assosinti. Ettha ṭhitāya sakkā sutthu saddo sotunti? Tvaṃ pana, bhante, mayhaṃ saddaṃ suṇasīti? Āma devateti. Dakkhiṇakaṇṇapasse nisīditvā kathanakālo viya, bhante, hotīti. Kiṃ pana devate satthu rūpaṃ passasīti? Satthā mameva oloketīti maññamānā saṅṭhātuṃ na sakkomi, bhanteti. Visesaṃ pana nibbattetuṃ asakkhittha devateti. Devatā tattheva antaradhāyi. Taṃ divasaṃ kiresa devaputto sotāpattiphale patiṭṭhito. Evamidaṃ suttaṃ devatānaṃ piyaṃ manāpaṃ. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Mahādhammasamādānasuttavaṇṇanā niṭṭhitā.

7. Vīmaṃsakasuttavaṇṇanā

487. Evaṃ me sutanti vīmaṃsakasuttaṃ. Tattha **vīmaṃsakenāti** tayo vīmaṃsakā – atthavīmaṃsako saṅkhāravīmaṃsako satthuvīmaṃsakoti. Tesu, “paṇḍitā hāvuso, manussā vīmaṃsakā”ti (saṃ. ni. 3.2) ettha atthavīmaṃsako āgato. “Yato kho, ānanda, bhikkhu dhātukusalo ca hoti, āyatanakusalo ca hoti, paṭiccasamuppādakusalo ca hoti, ṭhānāṭṭhānakusalo ca hoti, ettāvataṃ kho, ānanda, paṇḍito bhikkhu vīmaṃsakoti alaṃ vacanāyā”ti (ma. ni. 3.124) ettha saṅkhāravīmaṃsako āgato. Imasmim pana sutte satthuvīmaṃsako adhippeto. **Cetopariyāyanti** cittavāraṃ cittaparicchedaṃ. **Samannesanāti** esanā pariyesanā upaparikkhā. **Iti viññāyāti** evaṃ vijānanatthāya.

488. Dvīsu dhammesu tathāgato samannesitabboti idha kalyāṇamittūpanissayaṃ dasseti. Mahā hi esa kalyāṇamittūpanissayo nāma. Tassa mahantabhāvo evaṃ veditabbo – ekasmim hi samaye āyasmā ānando upaḍḍhaṃ attano ānubhāvena hoti, upaḍḍhaṃ kalyāṇamittānubhāvenāti cintetvā attano dhammatāya nicchetuṃ

asakkonto bhagavantam upasankamitvā pucchi, – “upaḍḍhamidaṃ, bhante, brahmacariyassa, yadidaṃ kalyāṇamittatā kalyāṇasahāyatā kalyāṇasampavaṅkatā”’ti. Bhagavā āha – “mā hevaṃ, ānanda, mā hevaṃ, ānanda, sakalamevidaṃ, ānanda, brahmacariyaṃ yadidaṃ kalyāṇamittatā kalyāṇasahāyatā, kalyāṇasampavaṅkatā. Kalyāṇamittasetaṃ, ānanda, bhikkhuno pāṭikāṅkhaṃ kalyāṇasahāyassa kalyāṇasampavaṅkassa, ariyaṃ aṭṭhaṅgikaṃ maggaṃ bhāvēssati, ariyaṃ aṭṭhaṅgikaṃ maggaṃ bahulīkarissati. Kathañcānanda, bhikkhu kalyāṇamitto...pe... ariyaṃ aṭṭhaṅgikaṃ maggaṃ bhāveti, ariyaṃ aṭṭhaṅgikaṃ maggaṃ bahulīkaroti. Idhānanda, bhikkhu sammādiṭṭhiṃ bhāveti...pe... sammāsamādhīṃ bhāveti vivekanissitaṃ evaṃ kho, ānanda, bhikkhu kalyāṇamitto...pe... bahulīkaroti, tadināpetam, ānanda, pariāyena veditabbaṃ. Yathā sakalamevidaṃ brahmacariyaṃ yadidaṃ kalyāṇamittatā kalyāṇasahāyatā kalyāṇasampavaṅkatā. Mamañhi, ānanda, kalyāṇamittaṃ āgamma jātidhammā sattā jātiyā parimuccanti. Jarādhama...pe... sokaparidevadukkhadomanassupāyāsadhammā sattā sokaparidevadukkhadomanassupāyāsehi parimuccanti”’ti (saṃ. ni. 5.2).

Bhikkhūnaṃ bāhiraṅgasampattiṃ kathentopi āha – “bāhiraṃ, bhikkhave, aṅganti karitvā nāññaṃ ekaṅgampi samanupassāmi, yaṃ evaṃ mahato atthāya saṃvattati, yathayidaṃ, bhikkhave, kalyāṇamittatā. Kalyāṇamittatā, bhikkhave, mahato atthāya saṃvattati”’ti (a. ni. 1.113). Mahācundassa kilesasallekhapaṭipadaṃ kathentopi, “pare pāpamittā bhavissanti, mayamettha kalyāṇamittā bhavissāmāti sallekho karaṇīyo”’ti (ma. ni. 1.83) āha. Meghiyattherassa vimutti-paripācaniyadhamme kathentopi, “aparipakkāya, megghiya, cetovimuttiyā pañca dhammā paripākāya saṃvattanti. Katame pañca? Idha, megghiya, bhikkhu kalyāṇamitto hoti”’ti (udā. 31) kalyāṇamittūpanissayameva visesesi. Piyaputtassa rāhulattherassa abhiṅhovādaṃ dentopi –

‘Mitte bhajassu kalyāṇe, pantañca sayanāsanaṃ;
Vivittaṃ appanigghosaṃ, mattaññū hohi bhojane.

Cīvare piṇḍapāte ca, paccaye sayanāsane;
Etesu taṅhaṃ mākaṣi, mā lokaṃ punarāgami”’ti. (su. ni. 340, 341) –

Kalyāṇamittūpanissayameva sabbapaṭhamam kathesi. Evaṃ mahā esa kalyāṇamittūpanissayo nāma. Idhāpi taṃ dassento bhagavā **dvīsu dhammesu tathāgato samannesitabboti** desanaṃ ārabhi. Paṇḍito bhikkhu dvīsu dhammesu tathāgataṃ esatu gavesatūti attho. Etena bhagavā ayaṃ mahājaccoti vā, lakkhaṇasampannoti vā, abhirūpo dassanīyoti vā, abhiññāto abhilakkhitoti vā, imaṃ nissāyāhaṃ cīvarādayo paccaye labhissāmīti vā, evaṃ cintetvā maṃ nissāya vasanakiccaṃ natthi. Yo pana evaṃ sallakkheti, “pahoti me esa satthā hutvā satthukiccaṃ sādhetu”’nti, so maṃ bhajatūti sīhanādaṃ nadati. Buddhasīhanādo kira nāmesa suttantoti.

Idāni te dve dhamme dassento **cakkhusotaviññeyyēsu**ti āha. Tattha satthu kāyiko samācāro vīmaṃsakassa cakkhaviññeyyo dhammo nāma. Vācasiko samācāro sotaviññeyyo dhammo nāma. Idāni tesu samannesitabbākāraṃ dassento **ye saṃkiliṭṭhā**tiādimāha. Tattha **saṃkiliṭṭhā**ti kilesasampayuttā. Te ca na cakkhusotaviññeyyā. Yathā pana udaye calante vā pupphulake vā muñcante anto maccho atthīti viññāyati, evaṃ pāṇātipātādīni vā karontassa, musāvādādīni vā bhaṅantassa kāyavacīsamācāre disvā ca sutvā ca taṃsamuttāpapakacittaṃ saṃkiliṭṭhanti viññāyati. Tasmā evamāha. Saṃkiliṭṭhacittassa hi kāyavacīsamācārāpi saṃkiliṭṭhāyeva nāma. **Na te tathāgatassa saṃvijjantīti** na te tathāgatassa atthi. Na upalabbhantīti evaṃ jānātīti attho. Natthitāyeva hi te na upalabbhanti na paṭicchannatāya. Tathā hi bhagavā ekadivasaṃ imesu dhammesu bhikkhusaṅghaṃ pavārento āha – “handā dāni, bhikkhave, pavāremi vo, na ca me kiñci garahatha kāyikaṃ vā vācasikaṃ vā”’ti. Evaṃ vutte āyasmā sārīputto utthāyāsanaṃ ekamaṃ uttarāsaṅgaṃ karitvā yena bhagavā tenañjalīṃ paṇāmetvā bhagavantam etadavoca – “na kho mayaṃ, bhante, bhagavato kiñci garahāma kāyikaṃ vā vācasikaṃ vā. Bhagavā hi, bhante, anuppannassa maggassa uppādetā, asaṅgātassa maggassa saṅgānetā, anakkhātassa maggassa akkhātā, maggaññū maggavidū maggakovidō. Maggānugā ca, bhante, etarahi sāvakaṃ viharanti pacchāsamannāgatā”’ti (saṃ. ni. 1.215). Evaṃ parisuddhā tathāgatassa kāyavacīsamācārā. Uttaropi sudaṃ māṇavo tathāgatassa kāyavacīdvāre anārādhanīyaṃ kiñci passissāmīti satta māse anubandhitvā likkhāmatampī na addasa. Manussabhūto vā esa buddhabhūtaṃ kāyavacīdvāre kiṃ anārādhanīyaṃ passissati? Māropi devaputto bodhisattassa sato mahābhinnikkhamanato paṭṭhāya chabbassāni gavesamāno kiñci anārādhanīyaṃ nāddasa, antamaso cetoparivitakkamattampī. Māro kira cintesi – “sacassa vitakkitamattampī akusalaṃ passissāmi, tattheva naṃ muddhani paharitvā pakkamissāmī”’ti. So chabbassāni adisvā buddhabhūtampi ekaṃ vassaṃ anubandhitvā kiñci vajjaṃ apassanto gamanasamaye vanditvā –

“Mahāvīra mahāpuññaṃ, iddhiyā yasasā jalamaṃ;
Sabbaverabhayātītaṃ, pāde vandāmi gotama”nti. (saṃ. ni. 1.159) –

Gāthamaṃ vatvā gato.

Vītimissāti kāle kaṇhā, kāle sukkāti evamaṃ vomissakā. **Vodātāti** parisuddhā nikkilesā. **Samvijjantīti** vodātā dhammā atthi upalabbhanti. Tathāgatassa hi parisuddhā kāyasamācārādayo. Tenāha – “cattārimāni, bhikkhave, tathāgatassa arakkheyyāni. Katamāni cattāri? Parisuddhakāyasamācāro, bhikkhave, tathāgato, natthi tathāgatassa kāyaduccaritaṃ, yaṃ tathāgato rakkheyya, ‘mā me idaṃ paro aññāsī’ti. Parisuddhavacīsamācāro... parisuddhamanosamācāro... parisuddhājīvo, bhikkhave, tathāgato, natthi tathāgatassa micchājīvo, yaṃ tathāgato rakkheyya, mā me idaṃ paro aññāsī’ti (a. ni. 7.58).

Imaṃ kusalaṃ dhammanti imaṃ anavajjamaṃ ājīvaṭṭhamakasīlaṃ. “Ayamāyasmā satthā kiṃ nu kho dīgharattaṃ samāpanno aticirakālato paṭṭhāya iminā samannāgato, udāhu ittarasamāpanno hiyyo vā pare vā parasuve vā divase samāpanno”ti evamaṃ gavesatūti attho. Ekaccena hi ekasmiṃ ṭhāne vasantena bahu micchājīvakammaṃ kataṃ, taṃ tattha kālātikame paññāyati, pākaṭaṃ hoti. So aññataraṃ paccantagāmaṃ vā samuddatīraṃ vā gantvā paṇṇasālaṃ kāretvā āraññako viya hutvā viharati. Manussā sambhāvanaṃ uppādetvā tassa pañṭe paccaye denti. Janapadavāsino bhikkhū tassa parihāraṃ disvā, “atidappito vatāyaṃ āyasmā, ko nu kho eso”ti pariggaṇhanta, “asukaṭṭhāne asukaṃ nāma micchājīvaṃ katvā pakkantabhikkhū”ti ñatvā na sakkā iminā saddhiṃ uposatho vā pavāraṇā vā kātuntī sannipatitvā dhammena samena ukkhepanīyādīsu aññataraṃ kammaṃ karonti. Evarūpāya paṭicchannaṭṭipattiyā atthibhāvaṃ vā natthibhāvaṃ vā vīmaṃsāpetuṃ evamāha.

Evamaṃ jānātīti dīgharattaṃ samāpanno, na ittarasamāpannoti jānāti. Anacchariyaṃ cetamaṃ. Yaṃ tathāgatassa etarahi sabbaññutaṃ pattassa dīgharattaṃ ājīvaṭṭhamakasīlaṃ parisuddhaṃ bhaveyya. Yassa bodhisattakālepi evamaṃ ahoṣi.

Atīte kira gandhārarājā ca vedeharājā ca dvepi sahāyakā hutvā kāmesu ādīnavaṃ disvā rajjāni puttānaṃ niyyātetvā isipabbajjamaṃ pabbajitvā ekasmiṃ araññagāmake piṇḍāya caranti. Paccanto nāma dullabhaloṇo hoti. Tato aloṇaṃ yāguṃ labhitvā ekissāya sālāya nisīditvā pivanti. Antarantare manussā loṇacuṇṇamaṃ āharitvā denti. Ekadivasamaṃ eko vedehisissa paṇṇe pakkhipitvā loṇacuṇṇamaṃ adāsi. Vedehisi gahetvā upaḍḍhaṃ gandhārisissa-santike ṭhapetvā upaḍḍhaṃ attano santike ṭhapesi. Tato thokaṃ paribhuttāvasesamaṃ disvā, “mā idaṃ nassī”ti paṇṇena veṭhetvā tiṇagahane ṭhapesi. Puna ekasmiṃ divase yāgupānakāle satīmaṃ katvā olovento taṃ disvā gandhārisiṃ upasaṅkamitvā, “ito thokaṃ gaṇhatha ācariyā”ti āha. Kuto te laddhaṃ vedehisīti? Tasmīmaṃ divase paribhuttāvasesamaṃ “mā nassī”ti mayā ṭhapitanti. Gandhārisi gahetuṃ na icchati, aloṇakamyeva yāguṃ pivitvā vedehamaṃ isiṃ avoca –

“Hitvā gāmasahassāni, paripuṇṇāni soḷasa;
Koṭṭhāgārāni phītāni, sannidhiṃ dāni kubbasī”ti. (jā. 1.7.76);

Vedehisi avoca – “tumhe rajjamaṃ pahāya pabbajitā, idāni kasmā loṇacuṇṇamattasannidhikāraṇā pabbajjāya anucchavikaṃ na karoṭhā”ti? Kiṃ mayā kataṃ vedehisīti? Atha naṃ āha –

“Hitvā gandhāraṇisayamaṃ, pahūtadhanadhāriyamaṃ;
Pasāsanato nikkhanto, idha dāni pasāsasi”ti. (jā. 1.7.77);

Gandhāro āha –

“Dhammaṃ bhaṇāmi vedeha, adhammo me na ruccati;
Dhammaṃ me bhaṇamānassa, na pāpamupalimpati”ti. (jā. 1.7.78);

Vedeho āha –

“Yena kenaci vaṇṇena, paro labhati ruppanamaṃ;
Mahatthiyampi ce vācaṃ, na taṃ bhāseyya paṇḍito”ti. (jā. 1.7.79);

Gandhāro āha –

“Kāmaṃ ruppatu vā mā vā, bhusaṃva vikirīyatu;
Dhammaṃ me bhaṇamānassa, na pāpamupalimpati”’ti. (jā. 1.7.80);

Tato vedehisi yassa sakāpi buddhi natthi, ācariyasantike vinayaṃ na sikkhati, so andhamahiṃso viya vane caratīti cintetvā āha –

“No ce assa sakā buddhi, vinayo vā susikkhito;
Vane andhamahiṃsova, careyya bahuko jano.

Yasmā ca panidhekacce, āceramhi susikkhitā;
Tasmā vinītavinayā, caranti susamāhitā”’ti. (jā. 1.7.81-82);

Evañca pana vatvā vedehisi aṇānitvā mayā katanti gandhārisiṃ khamāpesi. Te ubhopi tapaṃ caritvā brahmalokaṃ agamaṃsu. Evaṃ tathāgatassa bodhisattakālepi dīgharattaṃ ājīvaṭṭhamakasīlaṃ parisuddhaṃ ahosi.

Uttajjhāpanno ayamāyasmā bhikkhu yasapattoti ayamāyasmā amhākaṃ satthā bhikkhu ñattaṃ paññātabhāvaṃ pākātabhāvaṃ ajjhāpanno nu kho, sayañca parivārasampattiṃ patto nu kho notī. Tena cassa paññātajjhāpannabhāvena yasantissitabhāvena ca kiṃ ekacce ādīnavā sandissanti udāhu notī evaṃ samannesantūti dasseti. **Na tāva, bhikkhaveti**, bhikkhave, yāva bhikkhu na rājarājamahāmatādīsū abhiññātabhāvaṃ vā parivārasampattiṃ vā āpanno hoti, tāva ekacce mānātimānādayo ādīnavā na saṃvijjanti upasantūpasanto viya sotāpanno viya sakadāgāmi viya ca viharati. Ariyo nu kho puthujjano nu khotipi ñātum na sakkā hoti.

Yato ca kho, bhikkhaveti yadā pana idhekacco bhikkhu ñāto hoti parivārasampanno vā, tadā tiñhena siṅgena gogaṇaṃ vijjhanto duṭṭhagoṇo viya, migasaṅghaṃ abhimaddamāno dīpi viya ca aññe bhikkhū tattha tattha vijjhanto agāro asabhāgavutti aggapādena bhūmiṃ phusanto viya carati. Ekacco pana kulaputto yathā yathā ñāto hoti yasassī, tathā tathā phalabhārabharito viya sāli suṭṭharaṃ onamati, rājarājamahāmatādīsū upasaṅkamantesu akiñcanabhāvaṃ paccavekkhitvā samañasaññaṃ upaṭṭhapetvā chinnavisāṇausabho viya, caṇḍaladārako viya ca sorato nivāto nīcacitto hutvā bhikkhusaṅghassa ceva sadevakassa ca lokassa, hitāya sukhāya paṭipajjati. Evarūpaṃ paṭipattiṃ sandhāya “nāssa idhekacce ādīnavā”’ti āha.

Tathāgato pana aṭṭhasu lokadhammesu tādī, so hi lābhēpi tādī, alābhēpi tādī, yasepi tādī, ayasepi tādī, pasamaṃsāyapi tādī, nindāyapi tādī, sukhepi tādī, dukkhepi tādī, tasmā sabbākārena nāssa idhekacce ādīnavā saṃvijjanti. **Abhayūparatoti** abhayo hutvā uparato, accantūparato satatūparatoti attho. Na vā bhayena uparatotipi abhayūparato. Cattāri hi bhayāni kilesabhayaṃ vaṭṭabhayaṃ duggatibhayaṃ upavādabhayanti. Puthujjano catūhipi bhayehi bhāyati. Sekkhā tīhi, tesañhi duggatibhayaṃ pahīnaṃ, iti satta sekkhā bhayūparatā, khīṇāsavo abhayūparato nāma, tassa hi ekampi bhayaṃ natthi. Kiṃ paravādabhayaṃ natthīti? Natthi. Parānuddayaṃ pana paṭicca, “mādisaṃ khīṇāsavaṃ paṭicca sattā mā nassantū”’ti upavādaṃ rakkhati. Mūlupalavāpivihāravāsī yasatthero viya.

Thero kira mūlupalavāpigāmaṃ piṇḍāya pāvīsi. Athassa upaṭṭhākakuladvāraṃ pattassa pattāṃ gahetvā thaṇḍilapīṭhakaṃ nissāya āsanaṃ paññapesuṃ. Amaccadhītāpi taṃyeva pīṭhakaṃ nissāya paratobhāge nīcātaraṃ āsanaṃ paññāpetvā nisīdi. Eko nevāsiko bhikkhu pacchā piṇḍāya pavīṭṭho dvāre thātāvā olokento thero amaccadhītārā saddhiṃ ekamañce nisinnoti sallakkhetvā, “ayaṃ paṃsukūliko vihāreva upasantūpasanto viya viharati, antogāme pana upaṭṭhāyikāhi saddhiṃ ekamañce nisīdatī”’ti cintetvā, “kiṃ nu kho mayā duddiṭṭha”’nti punappunaṃ oloketvā tathāsaññīva hutvā pakkāmi. Theropi bhattakiccaṃ katvā vihāraṃ gantvā vasanaṭṭhānaṃ pavisitvā dvāraṃ pidhāya nisīdi. Nevāsikopi katabhattakicco vihāraṃ gantvā, “taṃ paṃsukūlikaṃ niggaṇhitvā vihārā nikkadḍhissāmi”’ti asaññatanīhārena therassa vasanaṭṭhānaṃ gantvā paribhogaghaṭato ulūkenā udakaṃ gahetvā mahāsaddaṃ karonto pāde dhovi. Thero, “ko nu kho ayaṃ asaññācārīko”’ti āvajjanto sabbaṃ ñatvā, “ayaṃ mayi manāṃ padosetvā apāyūpago mā ahoṣī”’ti vehāsaṃ abhuggantvā kaṇṇikāmaṇḍalasaṃpīe pallaṅkena nisīdi. Nevāsiko duṭṭhākārena ghaṭikaṃ ukkhipitvā dvāraṃ

vivaritvā anto pavitṭho theram apassanto, “hetṭhāmañcam pavitṭho bhavissatī”ti oloketvā tatthāpi apassanto nikkhamitum ārabhi. Thero ukkāsi. Itaro uddham olokeno disvā adhivāsetum asakkonto evamāha – “patirūpaṃ te, āvuso, paṃsukūlika evaṃ ānubhāvasampannassa upaṭṭhāyikāya saddhiṃ ekamañce nisīditu”nti. Pabbajitā nāma, bhante, mātugāmena saddhiṃ na ekamañce nisīdanti, tumhehi pana duddiṭṭhametanti. Evaṃ khīṇāsavā parānuddayāya upavādam rakkhanti.

Khayā rāgassāti rāgassa khayeneva. Vītarāgattā kāme na paṭisevati, na paṭisañkhāya vāretvāti. **Tañceti** evaṃ tathāgatassa kilesappahānaṃ ṇatvā tattha tattha ṭhitanisinnakālādīsopi catuparisamajjhe alaṅkatadhammāsane nisīditvāpi itipi satthā vītarāgo vītadoso vītamoho vantakilesa pahīnamalo abbhā muttapuññacando viya suparisuddhoti evaṃ tathāgatassa kilesappahāne vaṇṇaṃ kathayamānaṃ taṃ vīmaṃsakam bhikkhum pare evaṃ puccheyyum ceti attho.

Ākārāti kāraṇāni. **Anvayāti** anubuddhiyo. **Saṅghe vā viharantoti** appekadā aparicchinnagaṇanaassa bhikkhusaṅghassa majjhe viharanto. **Eko vā viharantoti** icchāmahaṃ, bhikkhave, aḍḍhamāsaṃ paṭisallīyitunti, temāsaṃ paṭisallīyitunti evaṃ paṭisallāne ceva pālīyeyyakavanasanāḍe ca ekako viharanto. **Sugatāti** sutṭhugatā suppaṭipannā kārakā yuttapayuttā. Evarūpāpi hi ekacce bhikkhū atthi. **Duggatāti** duṭṭhugatā duppaṭipannā kāyadaḥhibahulā vissaṭṭhakammaṭṭhānā. Evarūpāpi ekacce atthi. **Gaṇamanusāsantīti** gaṇabandhanena baddhā gaṇārāmā gaṇabahulikā hutvā gaṇaṃ pariharanti. Evarūpāpi ekacce atthi. Tesam paṭipakkhabhūtā gaṇato nissatā viṣaṃsaṭṭhā vipparamuttavīhārinopi atthi.

Āmisesu sandissantīti āmisagiddhā āmisacakkhukā catupaccayaāmisatthameva āhiṇḍamānā āmisesu sandissamānakabhikkhūpi atthi. Āmisena anupalittā catūhi paccayehi vinivattamānasā abbhā muttacandasadisā hutvā viharamānāpi atthi. **Nāyamāyasmā taṃ tena avajānātīti** ayaṃ āyasmā satthā tāya tāya paṭipattiyā taṃ taṃ puggalaṃ nāvajānāti, ayaṃ paṭipanno kārako, ayaṃ gaṇato nissatō viṣaṃsaṭṭho. Ayaṃ āmisena anupalitto paccayehi vinivattamānaso abbhā mutto candimā viyāti evamassa gehasitavasena ussādanāpi natthi. Ayaṃ duppaṭipanno akārako kāyadaḥhibahulō vissaṭṭhakammaṭṭhāno, ayaṃ gaṇabandhanabaddho, ayaṃ āmisagiddho lolo āmisacakkhukoti evamassa gehasitavasena apasādanāpi natthīti attho. Iminā kiṃ kathitaṃ hoti? Tathāgatassa sattesu tādibhāvo kathito hoti. Ayañhi –

“Vadhakassa devadattassa, corassaṅgulimālino;
Dhanapāle rāhule ca, sabbesaṃ samako muntī”ti. (mi. pa. 6.6.5);

489. Tatra, bhikkhveti tesu dvīsū vīmaṃsakesu. Yo, “ke panāyasmato ākārā”ti pucchāyaṃ āgato gaṇṭhivīmaṃsako ca, yo “abhayūparato ayamāyasmā”ti āgato mūlavīmaṃsako ca. Tesu mūlavīmaṃsakena tathāgatova uttari paṭipucchitabbo. So hi pubbe parasseva kathāya niṭṭhaṅgato. Paro ca nāma jānitvāpi katheyya ajānitvāpi. Evamassa kathā bhūtāpi hoti abhūtāpi, tasmā parasseva kathāya niṭṭhaṃ agantvā tato uttari tathāgatova paṭipucchitabboti attho.

Byākaramānoti ettha yasmā tathāgatassa micchābyākaraṇaṃ nāma natthi, tasmā sammā micchāti avatvā byākaramānotveva vuttaṃ. **Etam pathohamasmi etam gocaroti** esa mayhaṃ patho esa gocaroti attho. “Etāpātho”tipi pāṭho, tassattho mayhaṃ ājīvaṭṭhamakasīlaṃ parisuddhaṃ, svāhaṃ tassa parisuddhabhāvena vīmaṃsakassa bhikkhuno ñāṇamukhe etāpātho, evaṃ āpāthaṃ gacchāmīti vuttaṃ hoti. **No ca tena tammayoti** tenapi cāhaṃ parisuddhena sīlena na tammayo, na sataṇho, parisuddhasīlattāva nittaṇhohamasmīti dīpeti.

Uttaruttariṃ paṇītapāṇītanti uttaruttariṃ ceva paṇītarañca katvā deseti. **Kaṇhasukkasappaṭibhāganti** kaṇhaṃ ceva sukkañca, tañca kho sappāṭibhāgaṃ savipakkaṃ katvā, kaṇhaṃ paṭibāhitvā sukkanti sukkaṃ paṭibāhitvā kaṇhanti evaṃ sappāṭibhāgaṃ katvā kaṇhasukkaṃ deseti. Kaṇhaṃ desentopi saussāhaṃ savipākaṃ deseti, sukkaṃ desentopi saussāhaṃ savipākaṃ deseti. **Abhiññāya idhekaccaṃ dhammaṃ dhammesu niṭṭhaṃ gacchatīti** tasmīṃ desite dhamme ekaccaṃ paṭivedhadhammaṃ abhiññāya tena paṭivedhadhammena desanādhamme niṭṭhaṃ gacchati. **Satthari pasīdatīti** evaṃ dhamme niṭṭhaṃ gantvā bhīyyosomattāya sammāsambuddho so bhagavāti satthari pasīdati. Tena pana bhagavatā yo dhammo akkhāto, sopi svākkhāto bhagavatā dhammo niyyānikattā. Yvāssa taṃ dhammaṃ paṭipanno saṅgho, sopi suppaṭipanno vaṅkādidosarahitaṃ paṭipadaṃ paṭipannattāti evaṃ dhamme saṅghepi pasīdati. **Tañceti** taṃ evaṃ pasannaṃ tattha tattha tiṇṇaṃ ratanānaṃ vaṇṇaṃ kathentaṃ bhikkhum.

490. Imehi ākārehīti imehi satthuvīmaṃsanakāraṇehi. **Imehi padehīti** imehi akkharasampiṇḍanapadehi. **Imehi byañjanehīti** imehi idha vuttehi akkharehi. **Saddhā niviṭṭhāti** okappanā patitṭhitā. **Mūlajātāti** sotāpattimaggavasena sañjātāmūlā. Sotāpattimaggio hi saddhāya mūlaṃ nāma. **Ākāravatīti** kāraṇaṃ pariyesitvā gahitattā sakāraṇā. **Dassanamūlikāti** sotāpattimaggamūlikā. So hi dassananti vuccati. **Dalḥāti** thirā. **Asaṃhāriyāti** haritumaṃ na sakkā. **Samaṇena vāti** samitapāpasamaṇena vā. **Brāhmaṇena vāti** bhāhitapāpabrāhmaṇena vā. **Devena vāti** upapattidevena vā. **Mārena vāti** vasavattimārena vā, sotāpanassa hi vasavattimārenāpi saddhā asaṃhāriyā hoti sūrambaṭṭhassa viya.

So kira satthu dhammadesanaṃ sutvā sotāpano hutvā geḥaṃ āgato. Atha māro dvattiṃsavaraḷakkhaṇappaṭimaṇḍitaṃ buddharūpaṃ māpetvā tassa gharadvāre ṭhatvā – ‘satthā āgato’ ti sāsaṇaṃ paṇiṇi. Sūro cintesi, ‘ahaṃ idāneva satthu santikā dhammaṃ sutvā āgato, kiṃ nu kho bhavissati’ ti upasaṅkamitvā satthusaññāya vanditvā aṭṭhāsi. Māro āha – ‘yaṃ te mayā, sūrambaṭṭha, rūpaṃ aniccaṃ...pe... viññāṇaṃ aniccanti kathitaṃ, taṃ anupadhāretvāva sahasā mayā evaṃ vuttaṃ. Tasmā tvaṃ rūpaṃ niccaṃ... pe... viññāṇaṃ niccanti gaṇhāhi’ ti. Sūro cintesi – ‘aṭṭhānametaṃ, yaṃ buddhā anupadhāretvā apaccakkhaṃ katvā kiñci katheyyuṃ, addhā ayaṃ mayhaṃ vibādhanatthaṃ māro āgato’ ti. Tato naṃ tvaṃ māroti āha. So musāvādaṃ kātuṃ nāsakkhi, āma mārosmīti paṭijjāni. Kasmā āgatosīti vutte tava saddhācālanatthanti āha. Kaṇha pāpima, tvaṃ tāva ekako tiṭṭha, tādisānaṃ mārānaṃ satampi sahasampi mama saddhaṃ cāletuṃ asamatthaṃ, maggena āgatā saddhā nāma silāpathaviyaṃ patitṭhitasineru viya acalā hoti, kiṃ tvaṃ etthāti accharaṃ pahari. So ṭhātuṃ asakkonto tatthevantaradhāyi. **Brahmunā vāti** brahmakāyikādīsu aññatarabrahmunā vā. **Kenaci vā lokasminti** ete samaṇādayo ṭhapetvā aññenāpi kenaci vā lokasmiṃ haritumaṃ na sakkā. **Dhammasamannesanāti** sabhāvasamannesanā. **Dhammatāsusamanniṭṭhoti** dhammatāya susamanniṭṭho, sabhāveneva suṭṭhu samannesito hotīti attho. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Vīmaṃsakasuttavaṇṇanā niṭṭhitā.

8. Kosambiyasuttavaṇṇanā

491. Evaṃ me sutanti kosambiyasuttaṃ. Tattha **kosambiyanti** evaṃnāmake nagare. Tassa kira nagarassa āramapokkharāṇādīsu tesu tesu ṭhānesu kosambarukkhāva ussannā ahesuṃ, tasmā kosambīti saṅkhaṃ agamāsi. Kusambassa nāma isino assamato avidūre māpitattātipi eke. **Ghositārāmeti** ghositasetṭhinā kārite ārāme.

Pubbe kira addilaraṭṭhaṃ nāma ahosi. Tato kotūhalako nāma daliddo chātakabhayena saputtadāro kedāraparicchinaṃ subhikkhaṃ raṭṭhaṃ gacchanto puttaṃ vahituṃ asakkonto chaḍḍetvā agamāsi. Mātā nivattitvā taṃ gahetvā gatā. Te ekaṃ gopālakagāmaṃ pavisiṃsu, gopālakānaṃ tadā pahatapāyaso paṭiyatto hoti, tato pāyasaṃ labhitvā bhuñjiṃsu. Atha so puriso pahūtapāyasaṃ bhuñjitvā jirāpetuṃ asakkonto rattibhāge kālaṃ katvā tattheva sunakhiyā kucchimhi paṭisandhiṃ gahetvā kukkuro jāto. So gopālakassa piyo ahosi manāpo, gopālako ca paccekabuddhaṃ upaṭṭhāsi. Paccekabuddhopi bhattakiccāvasāne kukkurassa ekaṃ piṇḍaṃ deti. So paccekabuddhe sinehaṃ uppādetvā gopālakena saddhiṃ paṇṇasālampi gacchati.

So gopālake asannihite bhattavelāya sayameva gantvā kālārocanatthaṃ paṇṇasāladvāre bhussati, antarāmaggepi caṇḍamige disvā bhussitvā palāpeti. So paccekabuddhe mudukena cittaṃ kālaṃ katvā devaloke nibbatti. Tatrassa ghosakadevaputtotveva nāmaṃ ahosi. So devalokato cavitvā kosambiyaṃ ekasmiṃ kulaghare nibbatti. Taṃ aputtako setṭhi tassa mātāpitūnaṃ dhaṇaṃ datvā puttaṃ katvā aggahesi. Atha so attano putte jāte sattakkhattuṃ mārāpetuṃ upakkami. So puññavantatāya sattasupi ṭhānesu maraṇaṃ appatvā avasāne ekāya setṭhidhītāya veyyattiyena laddhājīviko aparabhāge pituaccayena setṭhitṭhānaṃ patvā **ghositasetṭhi** nāma jāto. Aññepi kosambiyaṃ kukkuṭasetṭhi pāvārikasetṭhīti dve setṭhino santi. Imehi saddhiṃ tayo ahesuṃ.

Tena ca samayena tesam saḥāyakānaṃ setṭhīnaṃ kulūpakā pañcasatā isayo pabbatapāde vasiṃsu. Te kālena kālaṃ loṇambilasevanatthāya manussapathaṃ āgacchanti. Athesakasmīṃ vāre gimhasamaye manussapathaṃ āgacchantā nirudakamahākantāraṃ atikkamitvā kantārapariyosāne mahantaṃ nigrodharukkhaṃ disvā cintesuṃ – ‘yādiso ayaṃ rukkho, addhā ettha mahesakkhāya devatāya bhavitabbaṃ,

sādhu vatassa, sace no pānīyaṃ vā bhojanīyaṃ vā dadeyyā’’ti. Devatā isīnaṃ ajjhāsayaṃ viditvā imesaṃ saṅgahaṃ karissāmīti attano ānubhāvena viṭapantarato naṅgalasīsamattaṃ udakadhāraṃ pavattesi. Isigaṇo rajatakkhandhasadisasaṃ udakavaṭṭiṃ disvā attano bhājanehi udakaṃ gahetvā paribhogaṃ katvā cintesi – ‘‘devatāya amhākaṃ paribhogaudakaṃ dinnāṃ, idaṃ pana agāmaṃ mahāraññaṃ, sādhu vatassa, sace no āhāraṃ dadeyyā’’ti. Devatā isīnaṃ upasaṃkappanavasena dibbāni yāgukhajjakādīni datvā santappesi. Isayo cintayīmsu – ‘‘devatāya amhākaṃ paribhogaudakampi bhojanampi sabbāṃ dinnāṃ, sādhu vatassa, sace no attānaṃ dasseyyā’’ti.

Devatā tesāṃ ajjhāsayaṃ viditvā upaḍḍhakāyaṃ dassesi. Te āhaṃsu – ‘‘devate, mahatī te sampattī, kiṃ kammaṃ katvā imaṃ sampattīṃ adhiḡatāsī’’ti? Bhante, nātimahantaṃ parittakaṃ kammaṃ katvāti. Upaḍḍhauposathakammaṃ nissāya hi devatāya sā sampattī laddhā.

Anāthapiṇḍikassa kira gehe ayaṃ devaputto kammakāro ahoṣi. Seṭṭhissa hi gehe uposathadivasesu antamaso dāsakammakāre upādāya sabbo jano uposathiko hoti. Ekadivasaṃ ayaṃ kammakāro ekakova pāto uṭṭhāya kammantaṃ gato. Mahāseṭṭhi nivāpaṃ labhanamanusse sallakkhento etassevekassa araññaṃ gatabhāvaṃ ñatvā assa sāyamāsathāya nivāpaṃ adāsi. Bhattakārikā dāsī ekasseva bhattaṃ pacitvā araññaṃ āgatassa bhattaṃ vaḍḍhetvā adāsi, kammakāro āha – ‘‘aññesu divasesu imasmiṃ kāle geḡaṃ ekasaddaṃ ahoṣi, ajja ativiya sannisinnāṃ, kiṃ nu kho eta’’nti? Tassa sā ācikkhi – ‘‘ajja imasmiṃ gehe sabbe manussā uposathikā, mahāseṭṭhi tuyhevekassa nivāpaṃ adāsī’’ti. Evaṃ ammāti? Āma sāmīti. Imasmiṃ kāle uposathaṃ samādinnaṃ uposathakammaṃ hoti na hotīti mahāseṭṭhiṃ puccha ammāti? Tāya gantvā pucchito mahāseṭṭhi āha – ‘‘sakalauposathakammaṃ na hoti, upaḍḍhakammaṃ pana hoti, uposathiko hotū’’ti. Kammakāro bhattaṃ abhuñjitvā mukhaṃ vikkhāletvā uposathiko hutvā vasanaṭṭhānaṃ gantvā nipajji. Tassa āhāraparikkhīṇakāyassa rattīṃ vāto kuppi. So paccūsasamaye kālaṃ katvā upaḍḍhauposathakammaṃ nissandena mahāvaṭṭāniataviyaṃ nigrodharukkhe devaputto hutvā nibbatti. So taṃ pavattīṃ isīnaṃ ārocesi.

Isayo tumhehi mayaṃ buddho, dhammo, saṅgho asutapubbaṃ sāvītā, uppanno nu kho loke buddhoti? Āma, bhante, uppannoti. Idāni kuhiṃ vasatīti? Sāvattīṃ nissāya jetavane, bhanteti. Isayo tiṭṭhatha tāva tumhe mayaṃ sathāraṃ passissāmīti haṭṭhatuṭṭhā nikkhamitvā anupubbena kosambinagaraṃ sampāpuṇīmsu. Mahāseṭṭhino, ‘‘isayo āgatā’’ti paccuggamaṃ katvā, ‘‘sve amhākaṃ bhikkhaṃ gaṇhatha, bhante’’ti nimantetvā punadivase isigaṇassa mahādānaṃ adaṃsu. Isayo bhūñjitvāva gacchāmāti apucchīmsu. Tumhe, bhante, aññasmiṃ kāle ekampi māsaṃ dvepi tayopi cattāropi māse vasitvā gacchatha. Imasmiṃ pana vāre hiyyo āgantvā ajjeva gacchāmāti vadatha, kimidanti? Āma gahapatayo buddho loke uppanno, na kho pana sakkā jīvitantarāyo viditūṃ, tena mayaṃ turitā gacchāmāti. Tena hi, bhante, mayampi gacchāma, amhehi saddhiṃyeva gacchathāti. Tumhe agāriyā nāma mahājāṭā, tiṭṭhatha tumhe, mayaṃ puretaṃ gamissāmīti nikkhamitvā ekasmiṃ ṭhāne dvepi divasāni avasitvā turitagamaneneva sāvattīṃ patvā jetavanavihāre satthu santikameva agamaṃsu. Satthu madhuradhammakathaṃ sutvā sabbeva pabbajitvā arahattaṃ pāpuṇīmsu.

Tepi tayo seṭṭhino pañcahi pañcahi sakaṭasatehi sappimadhuphāṇitādīni ceva paṭṭunnadukūlādīni ca ādāya kosambito nikkhamitvā anupubbena sāvattīṃ patvā jetavanasāmaṃte khandhāvāraṃ bandhitvā satthu santikaṃ gantvā vanditvā paṭisanthāraṃ katvā ekamantaṃ nisīdīmsu. Satthā tiṇṇampi sahāyakānaṃ madhuradhammakathaṃ kathesi. Te balavasomanassajātā sathāraṃ nimantetvā punadivase mahādānaṃ adaṃsu. Puna nimantetvā punadivaseti evaṃ aḍḍhamāsaṃ dānaṃ datvā, ‘‘amhākaṃ janapadaṃ āgamaṇāya paṭiññaṃ dethā’’ti pādāmūle nipajjiṃsu. Bhagavā, ‘‘suññāgāre kho gahapatayo tathāgatā abhiramantī’’ti āha. Ettāvataṃ paṭiññā dinnā nāma hotīti gahapatayo sallakkhetvā dinnā no bhagavatā paṭiññāti dasabalaṃ vanditvā nikkhamitvā antarāmagge yojane yojane ṭhāne vihāraṃ kāretvā anupubbena kosambiṃ patvā, ‘‘loke buddho uppanno’’ti kathayīmsu. Tayopi janā attano attano ārāme mahantaṃ dhanapariccāgaṃ katvā bhagavato vasanaṭṭhāya vihāre kārapayīmsu. Tattha kukkuṭasetṭhinā kārito **kukkuṭārāmo** nāma ahoṣi. Pāvārikasetṭhinā ambavane kārito **pāvārikambavano** nāma ahoṣi. Ghositena kārito **ghositārāmo** nāma ahoṣi. Taṃ sandhāya vuttaṃ – ‘‘ghositasetṭhinā kārite ārāme’’ti.

Bhaṇḍanaajātītiādīsu kalahassa pubbhāgo bhaṇḍanaṃ nāma, taṃ jātaṃ etesanti **bhaṇḍanaajātā**. Hatthaparāmāsādivasena matthakaṃ patto kalaho jāto etesanti **kalahajātā**. Viruddhabhūtaṃ vādanti vivādaṃ, taṃ āpannāti **vivādāpannā**. **Mukhasattīhīti** vācāsattīhi. **Vitudentīti** vijjhantā. **Te na ceva aññamaññaṃ saññāpentī na ca saññattīṃ upentīti** te atthañca kāraṇaṇca dassetvā neva aññamaññaṃ jānāpentī. Sacepi

saññāpetuṃ ārabhanti, tathāpi saññattiṃ na upenti, jānituṃ na icchantīti attho. Nijjhattiyāpi eseva nayo. Ettha ca **nijjhattīti** saññattivevacanamevetam. Kasmā panete bhaṇḍanaajātā ahesunti? Appamattakena kāraṇena.

Dve kira bhikkhū ekasmiṃ āvāse vasanti vinayadharo ca suttantiko ca. Tesu suttantiko bhikkhu ekadivasam vaccakuṭiṃ pavitṭho ācamanaudakāvasesam bhājane ṭhapetvāva nikkhami. Vinayadharo pacchā pavitṭho taṃ udakaṃ disvā nikkhamitvā taṃ bhikkhuṃ pucchi, āvuso, tayā idaṃ udakaṃ ṭhapitanti? Āma, āvusoti. Tvametta āpattibhāvaṃ na jānāsīti? Āma na jānāmīti. Hoti, āvuso, ettha āpattīti. Sace hoti desessāmīti. Sace pana te, āvuso, asaṅcicca asatiyā kataṃ, natthi te āpattīti. So tassā āpattiyā anāpattidiṭṭhi ahosi.

Vinayadharo attano nissitakānaṃ, “ayaṃ suttantiko āpattiṃ āpajjamānopi na jānāti”ti ārocesi. Te tassa nissitake disvā – “tumahākaṃ upajjhāyo āpattiṃ āpajjitvāpi āpattibhāvaṃ na jānāti”ti āhaṃsu. Te gantvā attano upajjhāyassa ārocesuṃ. So evamāha – “ayaṃ vinayadharo pubbe ‘anāpattī’ti vatvā idāni ‘āpattī’ti vadati, musāvādī eso”ti. Te gantvā, “tumahākaṃ upajjhāyo musāvādī”ti evaṃ aññamaññaṃ kalahaṃ vaḍḍhayiṃsu, taṃ sandhāyetam vuttaṃ.

Bhagavantaṃ etadavocāti etaṃ, “idha, bhante, kosambiyaṃ bhikkhū bhaṇḍanaajātā”tiādivacanam avoca. Tañca kho neva piyakamyatāya na bhedādhippāyena, atha kho atthakāmatāya hitakāmatāya. Sāmaggikārako kiresa bhikkhu, tasmāssa etadahosi – “yathā ime bhikkhū vivādaṃ āradhā, na sakkā mayā, nāpi aññena bhikkhunā samaggā kātuṃ, appeva nāma sadevake loke appaṭipuggalo bhagavā sayam vā gantvā, attano vā santikaṃ pakkosāpetvā etesaṃ bhikkhūnaṃ khantimettpaṭisaṃyuttaṃ saraṇīyadhammadesanaṃ kathetvā sāmaggiṃ kareyyā”ti atthakāmatāya hitakāmatāya gantvā avoca.

492. Chayime, bhikkhave, dhammā saraṇīyāti heṭṭhā kalahabhaṇḍanavasena desanā āradhā. Imasmiṃ ṭhāne cha saraṇīyā dhammā āgatāti evamidaṃ kosambiyasuttaṃ yathānusandhināva gataṃ hoti. Tattha **saraṇīyāti** saritabbayuttā addhāne atikkantepi na pamussitabbā. Yo te dhamme pūreti, taṃ sabrahmacārīnaṃ piyaṃ karontīti **piyakaraṇā**. Garuṃ karontīti **garukaraṇā**. **Saṅgahāyāti** saṅgahaṇatthāya. **Avivādāyāti** avivādanatthāya. **Sāmaggiyāti** samaggabhāvattthāya. **Ekībhāvāyāti** ekībhāvattthāya ninnānākaraṇāya. **Samvattantīti** bhavanti. **Mettaṃ kāyakammaṃ** mettacittena kattabbaṃ kāyakammaṃ. **Vacīkammamanokammesupi** eseva nayo. Imāni bhikkhūnaṃ vasena āgatāni, gihīsupi labbhantiyeva. Bhikkhūnañhi mettacittena ābhisamācārikadhammapūraṇaṃ mettaṃ kāyakammaṃ nāma. Gihīnaṃ cetiyavandanatthāya bodhivandanatthāya saṅghanimantanatthāya gamanaṃ gāmaṃ piṇḍāya pavitṭhe bhikkhū disvā paccuggamaṃ pattapaṭiggahaṇaṃ āsanapaññāpanaṃ anugamaṇanti evamādikaṃ mettaṃ kāyakammaṃ nāma.

Bhikkhūnaṃ mettacittena ācārapaññattisikkhāpadaṃ, kammatṭhānakathanaṃ dhammadesanā tepiṭakampi buddhavacanaṃ **mettaṃ vacīkammaṃ** nāma. Gihīnañca, “cetiyaṇḍanaṃ gacchāma, bodhivandanatthāya gacchāma, dhammassavanaṃ karissāma, padīpamālāpupphapūjaṃ karissāma, tīṇi sucaritāni samādāya vattissāma, salākabhaddāni dassāma, vassāvāsikaṃ dassāma, ajja saṅghassa cattāro paccaye dassāma, saṅghaṃ nimantetvā khādanīyādīni saṃvidahatha, āsanāni paññāpetha, pānīyaṃ upaṭṭhapetha, saṅghaṃ paccuggantvā ānetha, paññattāsane nisīdāpetvā chandajātā ussāhajātā veyyāvaccam karoṭhā”tiādikathanakāle mettaṃ vacīkammaṃ nāma.

Bhikkhūnaṃ pātova utṭhāya sarīrapaṭijagganaṃ cetiyaṇḍanaṃ avatṭadīni ca katvā vivittāsane nisīditvā, “imasmiṃ vihāre bhikkhū sukhī hontu, averā abyāpajjhā”ti cintanaṃ **mettaṃ manokammaṃ** nāma. Gihīnaṃ “ayyā sukhī hontu, averā abyāpajjhā”ti cintanaṃ mettaṃ manokammaṃ nāma.

Āvi ceva raho cāti sammukhā ca parammukhā ca. Tattha navakānaṃ cīvarakammādīsū sahāyabhāvūpagamaṃ sammukhā mettaṃ kāyakammaṃ nāma. Therānaṃ pana pādadhovanavandanabījanadānādibhedampi sabbaṃ sāmīcikkammaṃ sammukhā mettaṃ kāyakammaṃ nāma. Ubhayehipi dunnikkhittānaṃ dārubhaṇḍādīnaṃ tesu avamaññaṃ akatvā attanā dunnikkhittānaṃ viya paṭisāmanaṃ parammukhā mettaṃ kāyakammaṃ nāma. Devatthero tissattheroti evaṃ paggayha vacanaṃ sammukhā mettaṃ vacīkammaṃ nāma. Vihāre asantaṃ pana paripucchantassa, kuhiṃ amhākaṃ devatthero, amhākaṃ tissatthero kadā nu kho āgamissatīti evaṃ mamāyanavacanaṃ parammukhā mettaṃ vacīkammaṃ

nāma. Mettāsinehasiniddhāni pana nayanāni ummīletvā suppasannena mukhena olokanaṃ sammukhā mettaṃ manokammaṃ nāma. Devatthero, tissatthero arogo hotu appābādhoti samannāharaṇaṃ parammukhā mettaṃ manokammaṃ nāma.

Lābhāti cīvarādayo laddhapaccayā. **Dhammikāti** kuhanādibhedam micchājīvaṃ vajjetvā dhammena samena bhikkhācariyavattena uppannā. **Antamaso pattapariyāpannamattampīti** pacchimakotiyaṃ patte pariyāpannaṃ pattassa antogataṃ dvattikaṭacchubhikkhāmattampi. **Appaṭivibhattabhogīti** ettha dve paṭivibhattāni nāma āmisapaṭivibhattaṃ puggalapaṭivibhattaṃ. Tattha, “ettakaṃ dassāmi, ettakaṃ na dassāmi”ti evaṃ cittaena vibhajānaṃ āmisapaṭivibhattaṃ nāma. “Asukassa dassāmi, asukassa na dassāmi”ti evaṃ cittaena vibhajānaṃ pana puggalapaṭivibhattaṃ nāma. Tadubhayampi akatvā yo appaṭivibhattaṃ bhuñjati, ayaṃ **appaṭivibhattabhogī** nāma.

Sīlavantehi sabrahmacārīhi sādharmaṇabhogīti ettha sādharmaṇabhogino idaṃ lakkhaṇaṃ, yaṃ yaṃ paṇītaṃ labbhati, taṃ taṃ neva lābhena lābhaṃ jigīsanāmukhena gihīnaṃ deti, na attanā paribhuñjati; paṭiggaṇhantova saṅghena sādharmaṇaṃ hotūti gahetvā gaṇḍim paharivā paribhuñjitabbaṃ saṅghasantakaṃ viya passati. Idaṃ pana sāraṇīyadhammaṃ ko pūreti, ko na pūretīti? Dussīlo tāva na pūreti. Na hi tassa santakaṃ sīlavantā gaṇhanti. Parisuddhasīlo pana vattaṃ akhaṇḍento pūreti.

Tatridaṃ vattaṃ – yo hi odissakaṃ katvā mātu vā pitu vā ācariyupajjhāyādīnaṃ vā deti, so dātabbaṃ deti, sāraṇīyadhammo panassa na hoti, palibodhajagganaṃ nāma hoti. Sāraṇīyadhammo hi muttapalibodhasseva vaṭṭati, tena pana odissakaṃ dentena gilānagilānupaṭṭhākaāgantukagamikānañceva navapabbajitassa ca saṅghāṭipattaggahaṇaṃ ajānantassa dātabbaṃ. Etesaṃ datvā avasesaṃ therāsanato paṭṭhāya thokaṃ thokaṃ adatvā yo yattakaṃ gaṇhāti, tassa tattakaṃ dātabbaṃ. Avasiṭṭhe asati puna piṇḍāya caritvā therāsanato paṭṭhāya yaṃ yaṃ paṇītaṃ, taṃ taṃ datvā sesaṃ paribhuñjitabbaṃ, “sīlavantehi”ti vacanato dussīlassa adātumpi vaṭṭati.

Ayaṃ pana sāraṇīyadhammo susikkhitāya parisāya supūro hoti, no asikkhitāya parisāya. Susikkhitāya hi parisāya yo aññato labhati, so na gaṇhāti, aññato alabhantopi pamāṇayuttameva gaṇhāti, na atirekaṃ. Ayañca pana sāraṇīyadhammo evaṃ punappunaṃ piṇḍāya caritvā laddhaṃ laddhaṃ dentassāpi dvādasahi vassehi pūrati, na tato oraṃ. Sace hi dvādasamepi vasse sāraṇīyadhammapūraṃ piṇḍapātapūraṃ pattam āsanāsālāyaṃ ṭhapetvā nahāyitum gacchati, saṅghatthero ca kassesu pattoti? Sāraṇīyadhammapūrakassāti vutte – “āharatha na”nti sabbaṃ piṇḍapātaṃ vicāretvā bhuñjitvā ca rittapattaṃ ṭhapeti. Atha so bhikkhu rittapattaṃ disvā, “mayhaṃ asesetvāva paribhuñjimsū”ti domanassaṃ uppādeti, sāraṇīyadhammo bhijjati, puna dvādasā vassāni pūretabbo hoti, tittiyaparivāsasadiṣo hesa. Sakim khaṇḍe jāte puna pūretabbova. Yo pana, “lābhā vata me, suladdhaṃ vata me, yassa me pattagataṃ anāpucchāva sabrahmacārī paribhuñjanti”ti somanassaṃ janeti, tassa puṇṇo nāma hoti.

Evaṃ pūritasāraṇīyadhammassa pana neva issā, na macchariyaṃ hoti, so manussānaṃ piyo hoti, sulabhapaccayo; pattagatamassa dīyamānampi na khīyati, bhājanīyabhaṇḍaṭṭhāne aggabhaṇḍam labhati, bhaye vā chātake vā sampatte devatā ussukkaṃ āpajjanti.

Tatrimāni vatthūni – leṇagirivāsī tissatthero kira mahāgirigāmaṃ upanissāya vasati. Paññāsa mahātherā nāgāḍīpaṃ cetiyavandanatthāya gacchantā girigāme piṇḍāya caritvā kiñci aladdhā nikkhamimsu. Thero pavisanto te disvā pucchi – “laddhaṃ, bhante”ti? Vicarimhā, āvusoti. So aladdhabhāvaṃ ñatvā āha – “yāvāhaṃ, bhante, āgacchāmi, tāva idheva hothā”ti. Mayaṃ, āvuso, paññāsa janā pattatemanamattampi na labhimhāti. Nevāsikā nāma, bhante, paṭibalā honti, alabhantāpi bhikkhācāramaggasabhāvaṃ jānantīti. Therā āgamimsu. Thero gāmaṃ pāvīsi. Dhuraḡeheyeva mahāpāsikā khīrabhattaṃ sajjetvā theram olokayamānā ṭhitā therassa dvāraṃ sampattasseva pattam pūretvā adāsī. So taṃ ādāya therānaṃ santikaṃ gantvā, “gaṇhatha, bhante”ti saṅghattheramāha. Thero, “amhehi ettakehi kiñci na laddhaṃ, ayaṃ sīghameva gahetvā āgato, kim nu kho”ti sesānaṃ mukhaṃ olokesi. Thero olokanākāreneva ñatvā – “dhammena samena laddhapīṇḍapāto, nikkukkuccā gaṇhatha bhante”tiādīto paṭṭhāya sabbesaṃ yāvadatthaṃ datvā attanāpi yāvadatthaṃ bhuñji.

Atha naṃ bhattakiccāvasāne therā pucchimsu – “kadā, āvuso, lokuttaradhammaṃ paṭivijjhī”ti? Natthi me, bhante, lokuttaradhammoti. Jhānalābhīsi, āvusoti? Etampi me, bhante, natthīti. Nanu, āvuso, pāṭihāriyanti?

Sāraṇīyadhammo me, bhante, pūrito, tassa me dhammassa pūritakā lato paṭṭhāya sacepi bhikkhusatasahassaṃ hoti, pattagataṃ na khīyatīti. Sādhu sādhu, sappurisa, anucchavikamidaṃ tuyhanti. Idaṃ tava **pattagataṃ na khīyatīti** ettha vatthu.

Ayameva pana thero cetiyapabbate giribhaṇḍamahāpūjāya dānaṭṭhānaṃ gantvā, “imasmiṃ ṭhāne kiṃ varabhaṇḍa”nti pucchati. Dve sāṭakā, bhanteti. Ete mayhaṃ pāpuṇissantīti. Taṃ sutvā amacco rañño ārocesi – “eko daharo evaṃ vadaṃ”ti. “Daharassevaṃ cittaṃ, mahātherānaṃ pana sukhumasāṭakā vaṭṭantī”ti vatvā, “mahātherānaṃ dassāmī”ti ṭhapesi. Tassa bhikkhusaṅge paṭipāṭiyā ṭhite dentassa matthake ṭhapitāpi te sāṭakā hatthaṃ nārohanti, aññeva ārohanti. Daharassa dānakāle pana hatthaṃ āruḷhā. So tassa hatthe ṭhapetvā amaccassa mukhaṃ oloketvā daharaṃ nisīdāpetvā dānaṃ datvā saṅghaṃ vissajjetvā daharassa santike nisīditvā, “kadā, bhante, imaṃ dhammaṃ paṭivijjhithā”ti āha. So pariyāyēnapi asantaṃ avadanto, “natthi mayhaṃ, mahārāja, lokuttaradhammo”ti āha. Nanu, bhante, pubbeva avacutthāti? Āma, mahārāja, sāraṇīyadhammapūraḷo ahaṃ, tassa me dhammassa pūritakā lato paṭṭhāya bhājanīyabhaṇḍaṭṭhāne aggabhaṇḍaṃ pāpuṇātīti. Sādhu sādhu, bhante, anucchavikamidaṃ tumhākaṃti vanditvā pakkāmi. Idaṃ **bhājanīyabhaṇḍaṭṭhāne aggabhaṇḍaṃ pāpuṇātīti** ettha vatthu.

Brāhmaṇatissabhaye pana bhātaragāma vāsino nāgatttheriyā anārocetvāva palāyimsu. Therī paccūsakāle, “ativiya appanigghoso gāmo, upadhāretha tāvā”ti daharabhikkhuniyo āha. Tā gantvā sabbesaṃ gatabhāvaṃ ṇatvā āgamma theriyā ārocesuṃ. Sā sutvā, “mā tumhe tesāṃ gatabhāvaṃ cintayittha, attano uddesaparipucchāyonisomanasikāresuyeva yogaṃ karoṭhā”ti vatvā bhikkhācāra veyya pārupitvā attadvādasamā gāmadvāre nigrodharukkhamūle aṭṭhāsi. Rukkhe adhivatthā devatā dvādasannampi bhikkhunīnaṃ piṇḍapātaṃ datvā, “ayye, aññattha mā gacchatha, niccaṃ idheva ethā”ti āha. Theriyā pana kaniṭṭhabhātā nāgattthero nāma atthi. So, “mahantaṃ bhayaṃ, na sakkā idha yāpetuṃ, paratīraṃ gamissāmāti attadvādasamova attano vasaṇṭṭhānā nikkhanto theriṃ disvā gamissāmī”ti bhātaragāmaṃ āgato. Therī, “therā āgatā”ti sutvā tesāṃ santikaṃ gantvā, kiṃ ayyāti pucchī. So taṃ pavattim ācikkhi. Sā, “ajja ekadivasaṃ vihāreyeva vasitvā sveva gamissathā”ti āha. Therā vihāraṃ agamaṃsu.

Therī punadivase rukkhamūle piṇḍāya caritvā therāṃ upasankamitvā, “imaṃ piṇḍapātaṃ paribhuṅgathā”ti āha. Thero, “vaṭṭissati therī”ti vatvā tuṅhī aṭṭhāsi. Dhammiko tāṭa piṇḍapāto kukkuccaṃ akatvā paribhuṅgathāti. Vaṭṭissati therīti. Sā pattāṃ gahetvā ākāse khipi, patto ākāse aṭṭhāsi. Thero, “sattatālamatte ṭhitampi bhikkhunībhattameva, therīti vatvā bhayaṃ nāma sabbakālaṃ na hoti, bhaye vūpasante ariyavaṃsaṃ kathayamāno, ‘bho piṇḍapātika bhikkhunībhattaṃ bhūṅjitvā vītināmayitthā’ti cittaṃ anuvadiyamāno santhambhetuṃ na sakkhissāmi, appamattā hotha theriyō”ti maggaṃ āruhi.

Rukkhadavatāpi, “sace thero theriyā hatthato piṇḍapātaṃ paribhuṅgissati, na naṃ nivattessāmi, sace pana na paribhuṅgissati, nivattessāmī”ti cintayamānā ṭhatvā therassa gamanaṃ disvā rukkḥā oruyha pattāṃ, bhante, dethāti pattāṃ gahetvā therāṃ rukkhamūlaṃyeva ānetvā āsanaṃ paññāpetvā piṇḍapātaṃ datvā katabhattakiccaṃ paṭiññaṃ kāretvā dvādasā bhikkhuniyo, dvādasā ca bhikkhū satta vassāni upaṭṭhahi. Idaṃ **devatā ussukkaṃ āpajjantīti** ettha vatthu, tatra hi therī sāraṇīyadhammapūrikā ahoṣi.

Akhaṇḍānītiādīsu yassa sattu āpattikkhandhesu ādimhi vā ante vā sikkhāpadaṃ bhinnaṃ hoti, tassa sīlaṃ pariyaṇṭe chinnaṣāṭako viya **khaṇḍaṃ** nāma. Yassa pana vemajjhe bhinnaṃ, tassa majjhe chiddasāṭako viya **chiddaṃ** nāma hoti. Yassa pana paṭipāṭiyā dve tīṇi bhinnāni, tassa piṭṭhiyaṃ vā kucchiyaṃ vā utṭhitena visabhāgavaṇṇena kāḷarattādīnaṃ aññataravaṇṇā gāvī viya **sabalaṃ** nāma hoti. Yassa pana antarantarā bhinnāni, tassa antarantarā visabhāgabinducitrā gāvī viya **kammāsaṃ** nāma hoti. Yassa pana sabbena sabbāṃ abhinnāni, tassa tāni sīlāni **akhaṇḍāni acchiddāni asabalāni akammāsāni** nāma honti. Tāni panetāni taṇhādāsabyato mocetvā bhujissabhāvakaraṇato **bhujissāni**. Buddhādīhi viññūhi pasatthattā **viññūppasatthāni**. Taṇhādīṭṭhīhi aparāmaṭṭhattā, “idaṃ nāma tvaṃ āpannapubbo”ti kenaci parāmaṭṭhuṃ asakkuṇeyyattā ca **aparāmaṭṭhāni**. Upacārasamādhim vā appanāsamādhim vā saṃvattayantīti **samādhisaṃvattanikānīti** vuccanti. **Sīlasāmaññagato viharatīti** tesu tesu disābhāgesu viharantehi bhikkhūhi saddhim samānabhāvūpagatasīlo viharati. Sotāpannādīnaṃhi sīlaṃ samuddantarepi devalokepi vasantānaṃ aññesaṃ sotāpannādīnaṃ sīlena samānameva hoti, natthi maggasīle nānattaṃ, taṃ sandhāyetaṃ vuttaṃ.

Yāyaṃ dīṭṭhīti maggasampayuttā sammādiṭṭhi. **Ariyāti** niddosā. **Niyyāṭīti niyyānikā**. **Takkarassāti** yo

tathākārī hoti. **Dukkhakkhayāyāti** sabbadukkhakkhayattham. **Diṭṭhisāmaññagatoti** samānadiṭṭhibhāvaṃ upagato hutvā viharati. **Agganti** jeṭṭhakaṃ. Sabbagopānasiyo saṅgaṇhātīti **saṅgāhikaṃ**. Sabbagopānasīnaṃ saṅghāṭaṃ karotīti **saṅghāṭanikaṃ**. Saṅghāṭaniyanti attho. **Yadidaṃ kūṭanti** yametaṃ kūṭāgāraṇṇikāsankhātaṃ kūṭaṃ nāma. Pañcabhūmikādipāsādā hi kūṭabaddhāva tiṭṭhanti. Yasmiṃ patite mattikaṃ ādiṃ katvā sabbe patanti. Tasmā evamaḥa. **Evameva khoti** yathā kūṭaṃ kūṭāgārassa, evaṃ imesampi saraṇīyadhammaṃ yā ayaṃ ariyā diṭṭhi, sā aggā ca saṅgāhikā ca saṅghāṭaniyā cāti daṭṭhabbā.

493. Kathaṅca, bhikkhave, yāyaṃ diṭṭhīti ettha, bhikkhave, yāyaṃ sotāpattimaggaḍḍhi ariyā niyyānikā niyyāti takkarassa sammā dukkhakkhayāyāti vuttā, sā kathaṃ kena kāraṇena niyyātīti attho.

Pariyuṭṭhitacittova hotīti ettāvataṃ pariyuṭṭhitacittoyeva nāma hotīti attho. Esa nayo sabbattha.

Suppaṇihitaṃ me mānasanti mayhaṃ cittaṃ suṭṭhu ṭhapitaṃ. **Saccānaṃ bodhāyāti** catunnaṃ saccānaṃ bodhatthāya. **Ariyantiādisu taṃ ṇāṇaṃ yasmā ariyānaṃ hoti**, na puthujjanānaṃ, tasmā **ariyanti** vuttaṃ. Yesaṃ pana lokuttaradhammopi atthi, tesameva hoti, na aññesaṃ, tasmā **lokuttaranti** vuttaṃ. Puthujjanānaṃ pana abhāvato **asādhāraṇaṃ puthujjanehīti** vuttaṃ. Esa nayo sabbavāresu.

494. Labhāmi paccattaṃ samathanti attano citte samathaṃ labhāmīti attho. **Nibbutiyampi** eseva nayo. Ettha ca **samathoti** ekaggatā. **Nibbutīti** kilesavūpasamo.

495. Tathārūpāya diṭṭhiyāti evarūpāya sotāpattimaggaḍḍhiyā.

496. Dhammatāyāti sabhāvena. **Dhammatā esāti** sabhāvo esa. **Vuṭṭhānaṃ paññāyatīti** saṅghakammavasena vā desanāya vā vuṭṭhānaṃ dissati. Ariyasāvako hi āpattiṃ āpajjanto garukāpattīsu kuṭīkārasadisam, lahukāpattīsu sahaseyyādisadisam acittakāpattiṃyeva āpajjati, tampi asaṅcicca, no saṅcicca, āpannaṃ na paṭicchādeti. Tasmā **atha kho naṃ khippamevāti**ādīmāha. **Daharoti** taruṇo. **Kumāroti** na mahallako. **Mandoti** cakkhusotādīnaṃ mandatāya mando. **Uttānaseyyakoti** atidharatāya uttānaseyyako, dakkhiṇena vā vāmena vā passena sayitvaṃ na sakkotīti attho. **Āngāraṃ akkamitvāti** ito cito ca pasāritena hatthena vā pādena vā phusitvā. Evaṃ phusantānaṃ pana manussānaṃ na sīghaṃ hattho jhāyati, tathā hi ekacce hatthena āngāraṃ gahetvā parivattamānā dūrampi gacchanti. Daharassa pana hatthapādā sukhumālā hontī, so phuṭṭhamatteneva dayhamāno cirīti saddaṃ karonto khippaṃ paṭisaṃharati, tasmā idha daharova dassīto. Mahallako ca dayhantopi adhvāseti, ayaṃ pana adhvāsetuṃ na sakkoti. Tasmāpi daharova dassīto. **Desetīti** āpattiṃpaṭiggāhake sabhāgapuggale sati ekaṃ divasaṃ vā rattiṃ vā anadhivāsetvā rattiṃ caturaṅgepi tame sabhāgabhiikkhuno vasaṇaṭṭhānaṃ gantvā desetiyeva.

497. Uccāvacānīti uccānicāni. **Kiṃ karaṇīyānīti** kiṃ karomīti evaṃ vatvā kattabbakammāni. Tattha uccakammaṃ nāma cīvarassa karaṇaṃ rajanaṃ cetiye sudhākammaṃ uposathāgāracetiyaḥarabodhigharesu kattabbakammanti evamādi. Avacakammaṃ nāma pādadhovanamakhanādikhuddakakammaṃ, atha vā cetiye sudhākammādi uccakammaṃ nāma. Tattheva kasāvapacanaudakānayanakucchakaraṇa niyyāsabandhanādi avacakammaṃ nāma. **Ussukkaṃ āpanno hotīti** ussukkabhāvaṃ kattabbataṃ paṭipanno hoti. **Tibbāpekkho hotīti** bahalapatthano hoti. **Thambaṅca ālumpatīti** tiṅaṅca ālumpamānā khādati. **Vacchakaṅca apacinātīti** vacchakaṅca apaloketi. Taruṇavacchā hi gāvī araṇṇe ekato āgataṃ vacchakaṃ ekasmiṃ ṭhāne nipannaṃ pahāya dūraṃ na gacchati, vacchakassa āsannaṭṭhāne caramānā tiṅaṃ ālumpitvā gīvaṃ ukkhipitvā ekantaṃ vacchakameva ca viloketi, evameva sotāpanno uccāvacāni kiṃ karaṇīyāni karonto tanninno hoti, asithilapūraḥko tibbacchando bahalapatthano hutvāva karoti.

Tatridaṃ vatthu – mahācetiye kira sudhākamme kariyamāne eko ariyasāvako ekena hatthena sudhābhājanaṃ, ekena kucchaṃ gahetvā sudhākammaṃ karissāmīti cetiyaṅgaṇaṃ āruḷho. Eko kāyadaḷhibahulo bhikkhu gantvā therassa santike aṭṭhāsī. Thero aññasmiṃ sati papaṅco hotīti tasmā ṭhānā aññaṃ ṭhānaṃ gato. Sopi bhikkhu tattheva agamāsi. Thero puna aññaṃ ṭhānanti evaṃ katipayatṭhāne āgataṃ, – “sappurisa mahantaṃ cetiyaṅgaṇaṃ kiṃ aññasmiṃ ṭhāne okāsaṃ na labhathā”ti āha. Na itaro pakkāmīti.

498. Balatāya samannāgatoti balena samannāgato. **Aṭṭhiṃ katvāti** atthikabhāvaṃ katvā, atthiko hutvāti attho. **Manasikatvāti** manasmiṃ karitvā. **Sabbacetāsā samannāharitvāti** appamattakampi vikkhepaṃ akaronto sakalacittena samannāharitvā. **Ohitasototi** ṭhapitasoto. Ariyasāvakaḥ hi piyadhammassavanā hontī, dhammassavanaggaṃ gantvā niddāyamānā vā yena kenaci saddhiṃ sallapamānā vā vikkhittacittā vā na

nisīdanti, atha kho amatam paribhuñjantā viya atittāva honti dhammassavane, atha aruṇam uggaçchati. Tasmā evamāha.

500. Dhammatā susamanniṭṭhā hotīti sabhāvo suṭṭhu samannesito hoti. **Sotāpatti phalāsacchikiriyāyāti** karaṇavacanam, sotāpatti phalāsacchikataññānāti attho. **Evam sattaṅgasamannāgatoti** evam imehi sattaḥ mahāpaccavekkhaṇaññānēhi samannāgato. Ayam tava ācariyaṇam samānakathā. Lokuttaramaggo hi bahucittakkhaṇiko nāma natthi.

Vitaṇḍavādī pana ekacittakkhaṇiko nāma maggo natthi, “evam bhāveyya satta vassānī”ti hi vacanato sattapi vassāni maggabhāvanā honti. Kilesā pana lahu chijjantā sattaḥi ñāṇēhi chijjantīti vadati. So suttaṃ āharāti vattabbo, addhā aññaṃ suttaṃ apassanto, “idamassa paṭhamam ñāṇam adhigataṃ hoti, idamassa dutiyam ñāṇam...pe... idamassa sattamam ñāṇam adhigataṃ hotī”ti imameva āharitvā dassessati. Tato vattabbo kiṃ panidaṃ suttaṃ neyyattham nītatthanti. Tato vakkhati – “nītatthattham, yathāsuttaṃ tatheva attho”ti. So vattabbo – “dhammatā susamanniṭṭhā hoti sotāpatti phalāsacchikiriyāyāti ettha ko attho”ti? Addhā sotāpatti phalāsacchikiriyāyathoti vakkhati. Tato pucchitabbo, “maggasamaṅgī phalam sacchikaroti, phalāsamaṅgī”ti. Jānanto, “phalāsamaṅgī sacchikaroti”ti vakkhati. Tato vattabbo, – “evam sattaṅgasamannāgato kho, bhikkhave, ariyasāvako sotāpatti phalāsamannāgato hotīti idha maggaṃ abhāvetvā maṇḍūko viya uppativā ariyasāvako phalameva gaṇhissati. Mā suttaṃ me laddhanti yaṃ vā taṃ vā avaca. Pañham viṣajjenta nāma ācariyasantike vasitvā buddhavacanam uggaṇhitvā attharasam viditvā vattabam hotī”ti. “Imāni satta ñāṇāni ariyasāvakassa paccavekkhaṇaññānēva, lokuttaramaggo bahucittakkhaṇiko nāma natthi, ekacittakkhaṇikoyevā”ti saññāpetabbo. Sace saññānāti saññānātu. No ce saññānāti, “gaccha pātova vihāram pavisitvā yaḡum pivāhi”ti uyyojetabbo. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Kosambiyasuttavaṇṇanā niṭṭhitā.

9. Brahmanimantanikasuttavaṇṇanā

501. Evam me sutanti brahmanimantanikasuttaṃ. Tattha **pāpakaṃ diṭṭhigatanti** lāmakā sassatadiṭṭhi. **Idam niccanti** idam saha kāyena brahmaṭṭhānam aniccaṃ “nicca”nti vadati. **Dhuvādīni** tasseva vevacanāni. Tattha **dhuvanti** thiram. **Sassatanti** sadā vijjamānam. **Kevalanti** akhaṇḍam sakalam. **Acavanadhammanti** acavanasabhāvam. **Idaṇhi na jāyatīti** adīsu imasmim ṭhāne koci jāyanako vā jīyanako vā mīyanako vā cavanako vā upapajjanako vā natthīti sandhāya vadati. **Ita ca panaññanti** ita saha kāyakā brahmaṭṭhānā uttari aññaṃ nissaraṇam nāma natthīti evamassa thāmagatā sassatadiṭṭhi uppannā hoti. Evamvādī pana so upari tisso jhānabhūmiyo cattāro maggā cattāri phalāni nibbānanti sabbam paṭibāhati. **Avijjāgatoti** avijjāya gato samannāgato aññāñi andhībhūto. **Yatra hi nāmāti** yo nāma.

502. Atha kho, bhikkhave, māro pāpimāti māro katham bhagavantaṃ addasa? So kira attano bhavane nisīditvā kālena kālam sathhāram āvajjeti – “ajja samaṇo gotamo katarasmim gāme vā nigame vā vasatī”ti. Imasmim pana kāle āvajjanto, “ukkaṭṭham nissāya subhagavane viharatī”ti ñatvā, “kattha nu kho gato”ti olokeno brahmalokaṃ gacchantam disvā, “samaṇo gotamo brahmalokaṃ gacchati, yāva tattha dhammakatham kathetvā brahmagaṇam mama visayā nātikkametī, tava gantvā dhammadesanāyam vichandaṃ karissāmi”ti satthu padānupadiko gantvā brahmagaṇassa antare adissamānena kāyena aṭṭhāsī. So, “sathhāra bakabrahmā apasādito”ti ñatvā brahmuno upatthambho hutvā aṭṭhāsī. Tena vuttaṃ – “atha kho, bhikkhave, māro pāpimā”ti.

Brahmapārisajjam anvāvisitvāti ekassa brahmapārisajjassa sarīram pavisitvā. Mahābrahmānam pana brahmapurohitānam vā anvāvisitum na sakkoti. **Metamāsadoti** mā etaṃ apasādayittha. **Abhibhūti** abhibhavitvā ṭhito jeṭṭhako. **Anabhibhūtoti** aññēhi anabhibhūto. **Aññadatthūti** ekaṃsavacane nipāto. Dassanavasena **daso**, sabbam passatīti dīpeti. **Vasavattīti** sabbajānam vase vatteti. **Issaroti** loke issaro. **Kattā nimmātāti** lokassa kattā ca nimmātā ca, pathavihimavantasinerucakkavāḷamahāsamuddacandimasūriyā ca iminā nimmitāti dīpeti.

Seṭṭho sajitāti ayaṃ lokassa uttamo ca sajitā ca. “Tvam khattiyo nāma hohi, tvam brāhmaṇo nāma, vesso nāma, suddo nāma, gahaṭṭho nāma, pabbajito nāma, antamaso oṭṭho hohi, goṇo hohi”ti evaṃ sattānaṃ visajjētā ayanti dasseti. **Vasī pitā bhūtabhabyānanti** ayaṃ ciṅṇavasitāya vasī, ayaṃ pitā bhūtānañca bhabyānañcāti vadati. Tattha aṇḍajalābujā sattā antoṇḍakose ceva antovattimhi ca **bhabyā** nāma, bahi nikkhantakālo paṭṭhāya **bhūtā**. Saṃsedajā paṭhamacittakkaṇe bhabyā, dutiyato paṭṭhāya bhūtā. Opapātikā paṭhamairiyāpathe bhabyā, dutiyato paṭṭhāya bhūtāti veditabbā. Te sabbepe etassa puttāti saññāya, “pitā bhūtabhabyāna”nti āha.

Pathavīgarahakāti yathā tvam etarahi, “aniccā dukkhā anattā”ti pathaviṃ garahasi jigucchasi, evaṃ tepi pathavīgarahakā ahesuṃ, na kevalaṃ tvamyevatī dīpeti. **Āpagarahakāti**ādīsipi eseva nayo. **Hīne kāye paṭiṭṭhitāti** catūsu apāyesu nibbattā. **Pathavīpasamsakāti** yathā tvam garahasi, evaṃ agarahitvā, “niccā dhuvā sassatā acchejjā abhejjā akkhayā”ti evaṃ pathavīpasamsakā pathaviyā vaṇṇavādino ahesunti vadati. **Pathavābhinandinoti** taṇhādīṭṭhivasena pathaviyā abhinandino. Sesesupi eseva nayo. **Paṇīte kāye paṭiṭṭhitāti** brahmaloke nibbattā. **Taṃ tāhanti** tena kāraṇena taṃ ahaṃ. **Iñghāti** codanatthe nipāto. **Upātivattitthoti** atikkamittha. “Upātivattito”tipi pāṭho, ayamevattho. **Daṇḍena paṭippaṇāmeyyāti** catuhatthena muggaradaṇḍena pothetvā palāpeyya. **Narakapapātetī** sataporise mahāsobbhe. **Virādheyyāti** hatthena gahaṇayutte vā pādena paṭiṭṭhāyutte vā ṭhāne gahaṇapatiṭṭhānāni kātuṃ na sakkuṇeyya. **Nanu tvam bhikkhu passasīti** bhikkhu nanu tvam imaṃ brahmaparisam sannipatitaṃ obhāsamaṇaṃ virocamaṇaṃ jotayamaṇaṃ passasīti brahmuno ovāde ṭhitānaṃ iddhānubhāvaṃ dasseti. **Iti kho maṃ, bhikkhave, māro pāpimā brahmaparisam upanesīti**, bhikkhave, māro pāpimā nanu tvam bhikkhu passasi brahmaparisam yasena ca siriyā ca obhāsamaṇaṃ virocamaṇaṃ jotayamaṇaṃ, yadi tvampi mahābrahmuno vacanaṃ anatikkamitvā yadeva te brahmā vadati, taṃ kareyyāsī, tvampi evamevaṃ yasena ca siriyā ca viroceyyāsīti evaṃ vadanto maṃ brahmaparisam upanesi upasaṃhari. **Mā tvam maññitthoti** mā tvam maññi. **Māro tvamasi pāpimāti** pāpima tvam mahājanassa māraṇato **māro** nāma, pāpakaṃ lāmakam mahājanassa ayasaṃ karaṇato **pāpimā** nāmāti jānāmi.

503. Kasiṇaṃ āyunti sakalaṃ āyuṃ. Te kho evaṃ jāneyyunti te evaṃ mahantena tapokammaena samannāgatā, tvam pana purimadivase jāto, kiṃ jānissasi, yassa te ajjāpi mukhe khīragandho vāyatīti ghaṭṭento vadati. **Pathaviṃ ajjhossissasi** pathaviṃ ajjhosāya gilitvā pariniṭṭhapetvā taṇhāmānadiṭṭhīhi gaṇhissasi. **Opasāyiko me bhavissasīti** mayhaṃ samīpasayo bhavissasi, maṃ gacchantam anugacchissasi, ṭhitaṃ upatiṭṭhissasi, nisinnaṃ upanisīdissasi, nipannaṃ upanipajjissasīti attho. **Vatthusāyikoti** mama vatthusmiṃ sayanako. **Yathākāmakaraṇīyo bāhiteyyoti** mayā attano ruciyā yaṃ icchāmi, taṃ kattabbo, bāhitvā ca pana jajjharikāgumbatopi nīcataro lakaṇḍaṭakataro kātabbo bhavissasīti attho.

Iminā esa bhagavantaṃ upalāpeti vā apasādeti vā. **Upalāpeti** nāma sace kho tvam, bhikkhu, taṇhādīhi pathaviṃ ajjhossissasi, opasāyiko me bhavissasi, mayi gacchante gamissasi, tiṭṭhante ṭhassasi, nisinne nisīdissasi, nipanne nipajjissasi, ahaṃ taṃ sesajanaṃ paṭibāhitvā vissāsikaṃ abhantarikaṃ karissāmīti evaṃ tāva **upalāpeti** nāma. Sesapadehi pana **apasādeti** nāma. Ayañhettha adhippāyo – sace tvam pathaviṃ ajjhossissasi, vatthusāyiko me bhavissasi, mama gamaṇādīni āgametvā gamissasi vā ṭhassasi vā nisīdissasi vā nipajjissasi vā, mama vatthusmiṃ mayhaṃ ārakkhaṃ gaṇhissasi, ahaṃ pana taṃ yathākāmaṃ karissāmi bāhitvā ca jajjharikāgumbatopi lakaṇḍakataranti evaṃ apasādeti nāma. Ayaṃ pana brahmā mānanissito, tasmā idha apasādanāva adhippetā. **Āpādīsipi** eseva nayo.

Apica te ahaṃ brahmeti idāni bhagavā, “ayaṃ brahmā mānanissito ‘ahaṃ jānāmī’ti maññāti, attano yasena sammatto sarīraṃ phusitumpi samatthaṃ kiñci na passati, thokaṃ niggaḥetuṃ vaṭṭatī”ti cintetvā imaṃ desanaṃ ārabhi. Tattha **gatiñca pajānāmīti** nipphattiñca pajānāmi. **Jutiñcāti** ānubhāvañca pajānāmi. **Evaṃ mahesakkhoti** evaṃ mahāyaso mahāparivāro.

Yāvatā candimasūriyā pariharantīti yattake ṭhāne candimasūriyā vicaranti. **Disā bhanti virocanaṃ** disāsu virocamaṇā obhāsanti, disā vā tehi virocamaṇā obhāsanti. **Tāva saḥassadhā lokoti** tattakena pamāṇena saḥassadhā loko, iminā cakkavāḷena saddhiṃ cakkavāḷasaḥassanti attho. **Ettha te vattate vasoti** ettha cakkavāḷasaḥasse tuyhaṃ vaso vattati. **Paroparañca jānāsīti** ettha cakkavāḷasaḥasse paropare uccañce hīnappaṇīte satte jānāsī. **Attho rāgavirāginanti** na kevalaṃ, “ayaṃ iddho ayaṃ pakatīmanusso”ti paroparaṃ, “ayaṃ pana sarāgo ayaṃ vītarāgo”ti evaṃ rāgavirāginampi janaṃ jānāsī. **Itthaṃbhāvaññathābhāvanti itthaṃbhāvoti** idam cakkavāḷaṃ. **Aññathābhāvoti** ito sesaṃ ekūnasahassaṃ. **Sattānaṃ āgatiṃ gatinti** ettha

cakkavālasahassee paṭisandhivasena sattānaṃ āgatiṃ, cutivasena gatiṃ ca jānāsi. Tuyhaṃ pana atimahantohamasmīti saññā hoti, sahasibrahmā nāma tvaṃ, aññesaṃ pana tayā uttari dvisahassānaṃ tisahassānaṃ catusahassānaṃ pañcasahassānaṃ dasahassānaṃ satahassānañca brahmānaṃ pamāṇaṃ natthi, catuhattāya pilotikāya paṭappamāṇaṃ kātuṃ vāyamanto viya mahantosmīti saññaṃ karosīti niggaṇhāti.

504. Idhūpapannoti idha paṭhamajjhānabhūmiyaṃ upapanno. Tena taṃ tvaṃ na jānāsīti tena kāraṇena taṃ kāyaṃ tvaṃ na jānāsi. Neva te samasamoti jānitabbaṭṭhānaṃ patvāpi tayā samasamo na homi. Abhiññāyāti aññāya. Kuto nīceyyanti tayā nīcatarabhāvo pana mayhaṃ kuto.

Heṭṭhūpapattiko kiresa brahmā anuppanne buddhuppāde isipabbajjaṃ pabbajitvā kaṣiṇaparikkammaṃ katvā samāpattiyo nibbattetvā aparihīnājjhāno kālaṃ katvā catutthajjhānabhūmiyaṃ vehapphalabrahmaloke pañcakappasatikāṃ āyuṃ gahetvā nibbatti. Tattha yāvātāyukaṃ ṭhatvā heṭṭhūpapattikaṃ katvā tatiyajjhānaṃ paṇītaṃ bhāvetvā subhakiṇhabrahmaloke catusaṭṭhikappaṃ āyuṃ gahetvā nibbatti. Tattha dutiyajjhānaṃ bhāvetvā ābhassaresu aṭṭhakappaṃ āyuṃ gahetvā nibbatti. Tattha paṭhamajjhānaṃ bhāvetvā paṭhamajjhānabhūmiyaṃ kappāyuko hutvā nibbatti, so paṭhamakāle attanā katakammañca nibbattaṭṭhānañca aññāsi, kāle pana gacchante ubhayaṃ pamussitvā sassatadiṭṭhiṃ uppādesi. Tena naṃ bhagavā, “tena taṃ tvaṃ na jānāsi...pe... kuto nīceyya”nti āha.

Atha brahmā cintesi – “samaṇo gotamo mayhaṃ āyuñca nibbattaṭṭhānañca pubbekatakammañca jānāti, handa naṃ pubbe katakammaṃ pucchāmī”ti sathhāraṃ attano pubbekatakammaṃ pucchi. Sathhā kathesi.

Pubbe kiresa kulaghare nibbattitvā kāmesu ādīnaṃ divā, “jātiarābyādhimaraṇassa antaṃ karissāmī”ti nikkhamma isipabbajjaṃ pabbajitvā samāpattiyo nibbattetvā abhiññāpādakajjhānalābhī hutvā gaṅgātīre paṇṇasālaṃ kāretvā jhānaratiyā vītināmeti. Tadā ca kālena kālaṃ sathhavāhā pañcahi sakaṭasatehi marukantāraṃ paṭipajjanti. Marukantāre pana divā na sakkā gantuṃ, rattiṃ gamanaṃ hoti. Atha purimasakaṭassa aggayuge yuttabalibaddā gacchantā nivattitvā āgatamaggābhimukhāva ahesuṃ. Itarasakaṭāni tatheva nivattitvā aruṇe uggate nivattitabhāvaṃ jāniṃsu. Tesañca tadā kantāraṃ atikkamanadivaso ahoṣi. Sabbhaṃ dārudakaṃ parikkhīṇaṃ, tasmā, “natthi dāni amhākaṃ jīvita”nti cintetvā goṇe cakkesu bandhitvā manussā sakaṭapacchāyāyaṃ pavisitvā nipajjīṃsu. Tāpasopi kālasseva paṇṇasālato nikkhamitvā paṇṇasāladvāre nisinnō gaṅgaṃ olokayamāno addasa gaṅgaṃ mahatā udakoghena vuyhamānaṃ pavattitamañikkhandhaṃ viya āgacchantiṃ. Divā cintesi – “atthi nu kho imasmiṃ loke evarūpassa madhurodakassa alābhena kilissamānā sattā”ti. So evaṃ āvajjanto marukantāre taṃ sathhaṃ divā, “ime sattā mā nassantū”ti, “ito mahā udakakkhandho chijjitvā marukantāre sathhābhimukho gacchatū”ti abhiññācittena adhiṭṭhāsi. Sahacittuppādena mātikāruḷhaṃ viya udakaṃ tattha agamāsi. Manussā udakasaddena vuṭṭhāya udakaṃ divā hatthatuṭṭhā nhāyitvā pivitvā goṇepi pāyetvā sothhinā icchitaṭṭhānaṃ agamaṃsu. Sathhā taṃ brahmuno pubbakammaṃ dassento –

“Yaṃ tvaṃ apāyesi bahū manusse,
Pipāsīte ghammani samparete;
Taṃ te purāṇaṃ vatasīlavattaṃ,
Suttappabuddhova anussarāmī”ti. (jā. 1.7.71) –

Imaṃ gāthamāha.

Aparasmīṃ samaye tāpaso gaṅgātīre paṇṇasālaṃ māpetvā āraññakaṃ gāmaṃ nissāya vasati. Tena ca samayena corā taṃ gāmaṃ paharitvā hatthasāraṃ gahetvā gāvīyo ca karamare ca gahetvā gacchanti. Gāvopi sunakhāpi manussāpi mahāvīraṃ viravanti. Tāpaso taṃ saddaṃ sutvā “kiṃ nu kho eta”nti āvajjanto, “manussānaṃ bhayaṃ uppanna”nti ṇatvā, “mayi passante ime sattā mā nassantū”ti abhiññāpādakajjhānaṃ samāpajjitvā vuṭṭhāya abhiññācittena corānaṃ paṭipathe caturaṅginisenaṃ māpesi kammaṣajjaṃ āgacchantiṃ. Corā divā, “rājā”ti te maññamānā vilopaṃ chaḍḍetvā pakkamiṃsu. Tāpaso “yaṃ yassa santakaṃ, taṃ tasseva hotū”ti adhiṭṭhāsi, taṃ tatheva ahoṣi. Mahājano sothhibhāvaṃ pāpuṇi. Sathhā idampi tassa pubbakammaṃ dassento –

“Yaṃ eṇikūlasmiṃ janaṃ gahītaṃ,
Amocayī gayhaka nīyamānaṃ;
Taṃ te purāṇaṃ vatasīlavattaṃ,
Suttappabuddhova anussarāmi”ti. (jā. 1.7.72) –

Imaṃ gāthamāha. Ettha **eṇikūlasminti** gaṅgātīre.

Puna ekasmiṃ samaye upariṅgāṅvāsikaṃ kulaṃ heṭṭhāgaṅgāvāsikena kulena saddhiṃ mittasanthavaṃ katvā nāvāsaṅghāṭaṃ bandhitvā bahuṃ khādanīyabhojanīyañceva gandhamālādīni ca āropetvā gaṅgāsotena āgacchati. Manussā khādamānā bhuñjamānā naccantā gāyantā devavimānena gacchantā viya balavasomanassā ahesuṃ. Gaṅgeyyako nāgo disvā kupito, “ime mayi saññampi na karonti, idāni ne samuddameva pāpessāmi”ti mahantaṃ attabhāvaṃ māpetvā udakaṃ dvidhā bhinditvā uṭṭhāya phaṇaṃ katvā sussūkāraṃ karonto aṭṭhāsi. Mahājano disvā bhīto vissaramakāsi. Tāpaso paṇṇasālāya nisinnō sutvā, “ime gāyantā naccantā somanassajātā āgacchanti, idāni pana bhayaravaṃ raviṃsu, kiṃ nu kho”ti āvajjanto nāgarājaṃ disvā, “mayi passante ime sattā mā nassantū”ti abhiññāpādakajjhānaṃ samāpajjitvā attabhāvaṃ vijahitvā supaṇṇavaṇṇaṃ māpetvā nāgarājassa dassesi. Nāgarājā bhīto phaṇaṃ saṃharitvā udakaṃ pavitṭho. Mahājano sotthibhāvaṃ pāpuṇi. Sathā idampi tassa pubbakammaṃ dassento –

“Gaṅgāya sotasmiṃ gahītanāvaṃ,
Luddena nāgena manussakappā;
Amocayittha balasā pasayha,
Taṃ te purāṇaṃ vatasīlavattaṃ;
Suttappabuddhova anussarāmi”ti. (jā. 1.7.73) –

Imaṃ gāthamāha.

Aparasmiṃ samaye esa isipabbajjaṃ pabbajitvā **kesavo** nāma tāpaso ahoṣi. Tena samayena amhākaṃ bodhisatto **kappo** nāma māṇavo kesavassa baddhacaro antevāsiko hutvā ācariyassa kiṃkārapaṭissāvī manāpacārī buddhisampanno atthacaro ahoṣi. Kesavo taṃ vinā vattituṃ nāsakkhi, taṃ nissāyeva jīvikaṃ kappesi. Sathā idampi tassa pubbakammaṃ dassento –

“Kappo ca te baddhacaro ahoṣi,
Sambuddhimantaṃ vatiṇaṃ amaññi;
Taṃ te purāṇaṃ vatasīlavattaṃ,
Suttappabuddhova anussarāmi”ti. (jā. 1.7.74) –

Imaṃ gāthamāha.

Evaṃ brahmuno nānattabhāvesu katakammaṃ sathā pakāsesi. Sathari kathenteyeva brahmā sallakkhesi, dīpasahassee ujjalite rūpāni viya sabbakammānissa pākaṭāni ahesuṃ. So pasannacitto imaṃ gāthamāha –

“Addhā pajānāsi mametamāyumuṃ,
Aññampi jānāsi tathā hi buddho;
Tathā hi tāyaṃ jalitānubhāvo,
Obhāsayaṃ tiṭṭhati brahmaloka”nti. (jā. 1.7.75);

Athassa bhagavā uttari asamasamataṃ pakāsento **pathaviṃ kho ahaṃ brahmeti**ādīmāha. Tattha **pathaviyā pathavattena ananubhūtaṃ** pathaviyā pathavisabhāvena ananubhūtaṃ appattaṃ. Kiṃ pana tanti? Nibbānaṃ. Tañhi sabbasmā saṅkhatā nissaṭṭā pathavisabhāvena appattaṃ nāma. **Tadabhiññāyāti** taṃ nibbānaṃ jānitvā sacchikatvā. **Pathaviṃ nāpahosinti** pathaviṃ taṇhādīṭṭhimānagāhehi na gaṇhiṃ. **Āpādīsupi** eseve nayo. Vitthāro pana mūlapariyāye vuttanayeneva veditabbo.

Sace kho te, mārīsa, sabbassa sabbattenāti idameva brahmā attano vādītāya sabbanti akkharaṃ niddisitvā akkhare dosaṃ gaṇhanto āha. Sathā pana sakkāyaṃ sandhāya “sabba”nti vadati, brahmā

sabbasabbam sandhāya. Tvaṃ ‘‘sabba’’nti vadasi, ‘‘sabbassa sabbattena ananubhūta’’nti vadasi, yadi sabbam ananubhūtam natthi, athassa ananubhūtam atthi. **Mā heva te rittakameva ahoṣi tucchakameva ahoṣīti** tuyhaṃ vacanaṃ rittakaṃ mā hotu, tucchakaṃ mā hotūti satthāraṃ musāvādena niggaṇhāti.

Satthā pana etasmā brahmunā sataguṇena sahasaguṇena satasahassaguṇena vādītaro, tasmā ahaṃ sabbāṇca vakkhāmi, ananubhūtaṇca vakkhāmi, suṇāhi meti tassa vādamaddanattam kārāṇaṃ āharanto **viññāpanti**ādīmāha. Tattha **viññāpanti** vijānitabbaṃ. **Anidassananti** cakkhuvīññāssa āpātham anupagamanato anidassanaṃ nāma, padadvayenapī nibbānameva vuttaṃ. **Anantanti** tayidaṃ uppādavayaantarāhitattā anantaṃ nāma. Vuttampi hetam –

‘‘Antavantāni bhūtāni, asambhūtam anantakaṃ;
Bhūte antāni dissanti, bhūte antā pakāṣitā’’ti.

Sabbatopabhanti sabbaso pabhāsammaṃ. Nibbānato hi añño dhammo sapabhataro vā jotivantataro vā parisuddhataro vā paṇḍarataro vā natthi. Sabbato vā tathā pabhūtaṃ, na katthaci natthīti sabbatopabham. Puratthimadisādīsu hi asukadisāya nāma nibbānaṃ natthīti na vattabbaṃ. Atha vā **pabhanti** titthassa nāmaṃ, sabbato pabhamaṃ **sabbatopabham**. Nibbānassa kira yathā mahāsamuddassa yato yato otaritukāma hontī, taṃ tadeva tittham, atittham nāma natthi. Evamevaṃ aṭṭhatīṃsāya kammaṭṭhānesu yena yena mukhena nibbānaṃ otaritukāma hontī, taṃ tadeva tittham. Nibbānassa atittham nāma kammaṭṭhānaṃ natthi. Tena vuttaṃ **sabbatopabhanti**. Taṃ pathaviyā pathavattenāti taṃ nibbānaṃ pathaviyā pathavīsabhāvena tato paresaṃ āpādīnaṃ āpādisabhāvena ca ananubhūtaṃ. Iti yaṃ tumhādisānaṃ visayabhūtaṃ sabbatebhūmakadhammajātaṃ tassa sabbattena taṃ viññānaṃ anidassanaṃ anantaṃ sabbatopataṃ ananubhūtanti vādaṃ patitṭhapesi.

Tato brahmā gahitagaṇitaṃ satthārā vissajjāpito kiñci gahetabbaṃ adisvā laṭitakaṃ kātukāmo **handa carahi te, mārisa, antaradhāyāmīti** āha. Tattha **antaradhāyāmīti** adissamānakapāṭihāriyaṃ karomīti āha. **Sace visahasīti** yadi sakkosi mayhaṃ antaradhāyitum, antaradhāyasi, pāṭihāriyaṃ karohīti. **Nevasu me sakkoti antaradhāyituntī** mayhaṃ antaradhāyitum neva sakkoti. Kiṃ pana kātukāmo ahoṣīti? Mūlapaṭisandhiṃ gantukāmo ahoṣi. Brahmānaṃhi mūlapaṭisandhikaattabhāvo sukhumo, aññesaṃ anāpātho, abhisankhatakāyeneva tiṭṭhanti. Satthā tassa mūlapaṭisandhiṃ gantum na adāsi. Mūlapaṭisandhiṃ vā agantvāpi yena tamena attānaṃ antaradhāpetvā adissamānako bhavēyya, satthā taṃ tamaṃ vinodesi, tasmā antaradhāyitum nāsakkhi. So asakkonto vimāne nilīyati, kapparukkhe nilīyati, ukkuṭiko nisīdati. Brahmagaṇo keḷimakāsi – ‘‘esa kho bako brahmā vimāne nilīyati, kapparukkhe nilīyati, ukkuṭiko nisīdati, brahme tvaṃ antarāhitomhī’’ti saññaṃ uppādesi nāmāti. So brahmagaṇena uppaṇḍito maṅku ahoṣi.

Evaṃ vutte ahaṃ, bhikkhveti, bhikkhave, etena brahmunā, ‘‘handa carahi te, mārisa, antaradhāyāmī’’ti evaṃ vutte taṃ antaradhāyitum asakkontaṃ disvā ahaṃ etadavocaṃ. **Imaṃ gāthamabhāsinti** kasmā bhagavā gāthamabhāsīti? Samaṇassa gotamassa imasmim ṭhāne atthibhāvo vā natthibhāvo vā kathaṃ sakkā jānituntī evaṃ brahmagaṇassa vacanokāso mā hotūti antarāhitova gāthamabhāsi.

Tattha **bhavevāhaṃ bhayaṃ disvāti** ahaṃ bhava bhayaṃ disvāyeva. **Bhavaṇca vibhavesinanti** imaṇca kāmabhavāditividhampi sattabhavaṃ vibhavesinaṃ vibhavaṃ gavesamaṇaṃ pariyesamaṇampi punappunaṃ bhavēyyeva disvā. **Bhavaṃ nābhivadinti** taṇhādīṭṭhivasena kiñci bhavaṃ na abhivadim, na gavesinti attho. **Nandiṇca na upādiyinti** bhavataṇhaṃ na upagañchiṃ, na aggahesinti attho. Iti cattāri saccāni pakāsento satthā dhammaṃ desesi. Desanāpariyosāne desanānusārena vipassanāgabbhaṃ gāhāpetvā dasamattāni brahmasahassāni maggaḥāmatapānaṃ pivimsu.

Acchariyabbhutaṭṭajātāti acchariyajātā abbhutaṭṭajātā tuṭṭhijātā ca ahesuṃ. **Samūlaṃ bhavaṃ udabbahīti** bodhimaṇḍe attano tāya tāya desanāya aññesampi bahūnaṃ devamanussānaṃ samūlakaṃ bhavaṃ udabbahi, uddhari uppāṭesīti attho.

505. Tasmim pana samaye māro pāpimā kodhābhībhūto hutvā, ‘‘mayi vicaranteyeva samaṇena gotamena dhammakathaṃ kathetvā dasamattāni brahmasahassāni mama vasaṃ ativattitāni’’ti kodhābhībhūtatāya aññatarassa brahmapārisajjassa sarīre adhimucci, taṃ dassetuṃ **atha kho, bhikkhveti**ādīmāha. Tattha **sace**

tvam evam anubuddhoti sace tvam evam attanāva cattāri saccāni anubuddho. **Mā sāvake upanesīti** gihisāvake vā pabbajitasāvake vā taṃ dhammaṃ mā upanayasi. **Hīne kāye patitthitāti** catūsu apāyesu patitthitā. **Pañite kāye patitthitāti** brahmaloke patitthitā. Idam ke sandhāya vadati? Bāhirapabbajjam pabbajite tāpasaparibbājake. Anuppanne hi buddhuppāde kulaputtā tāpasapabbajjam pabbajitvā kassaci kiñci avicāretvā ekacarā hutvā samāpattiyō nibbattetvā brahmaloke uppajjimsu, te sandhāya evamāha. **Anakkhātam kusalañhi mārīsāti** pasesam anakkhātam anovanam dhammakathāya akathanam kusalam etam seyyo. **Mā param ovadāhīti** kālena manussalokam, kālena devalokam, kālena brahmalokam, kālena nāgalokam āhiṇḍanto mā vicari, ekasmiṃ ṭhāne nisinno jhānamaggaḥālasukhena vītināmeḥīti. **Anālapanatāyāti** anullapanatāya. **Brahmuno ca abhinimantanatāyāti** bakabrahmuno ca idañhi, mārisa, niccantiādinā nayena saha kāyakena brahmaṭṭhānena nimantanavacanena. **Tasmāti** tena kāraṇena. **Imassa veyyakaraṇassa brahmanimantanikaṃtveva** adhivacanam sañkhā samaññā paññatti jātā. Sesam sabbattha uttānatthamevāti.

Papañcasūdaniyā majjhimanikāyaṭṭhakathāya

Brahmanimantanikasuttavaṇṇanā niṭṭhitā.

10. Māratajjanīyasuttavaṇṇanā

506. Evam me sutanti māratajjanīyasuttam. Tattha **koṭṭhamanupaviṭṭhoti** kucchiṃ pavisitvā antānam anto anupaviṭṭho, pakkāsayaṭṭhāne nisinno. **Garugaro viyāti** garukagaruko viya thaddho pāsānapuñjasadiso. **Māsācitam maññeti** māsabhattam bhuttassa kucchi viya māsapūritapasibbako viya tintamāso viya cāti attho. **Vihāram pavisitvāti** sace āhāradosena esa garubhāvo, abbhokāse cañkamitum na sappāyanti cañkamā orohitvā pañṇasālam pavisitvā pakatipaññatte āsane nisīdi. **Paccattam yoniso manasākāsīti**, “kiṃ nu kho eta”nti āvajjamāno attanoyeva upāyena manasi akāsi. Sace pana thero attano sīlam āvajjetvā, “yam hiyyo vā pare vā parasuve vā paribhuttam avipakkamatthi, añño vā koci visabhāgado, sabbam jīratu phāsukam hoti”ti hatthena kucchiṃ parāmasissa, māro pāpimā vilīyitvā agamissa. Thero pana tathā akatvā yoniso manasi akāsi. **Mā tathāgatam vihesesīti** yathā hi puttesu vihesitesu mātāpitaro vihesitāva honti, saddhivihārikaantevāsikesu vihesitesu ācariyupajjhāyā vihesitāva, janapade vihesite rājā vihesitova hoti, evam tathāgatasāvake vihesite tathāgato vihesitova hoti. Tenāha – “mā tathāgatam vihesesī”ti.

Paccaggaḷe aṭṭhāsīti patiaggaḷeva aṭṭhāsī. **Aggaḷam** vuccati kavāṭam, mukhena uggantvā pañṇasālato nikkhamitvā bahipañṇasālāya kavāṭam nissāya aṭṭhāsīti attho.

507. Bhūtapubbāham pāpimāti kasmā idam desanam ārabhi? Thero kira cintesi – “ākāsaṭṭhakadevatānam tāva manussagandho yojanasate ṭhitānam ābādham karoti. Vuttañhetam – ‘yojanasatam kho rājāñña manussagandho deve ubbādhati’ti (dī. ni. 2.415). Ayam pana māro nāgariko paricokkho mahesakkho ānubhāvasampanno devarājā samāno mama kucchiyam pavisitvā antānam anto pakkāsayaokāse nisinno ativiya paduṭṭho bhavissati. Evarūpam nāma jeguccham paṭikūlam okāsam pavisitvā nisīditum sakkontassa kimaññam akaraṇīyam bhavissati, kiṃ aññam lajjissati, tvam mama ñātikoti pana vutte mudubhāvam anāpajjamāno nāma natthi, handassa ñātikotiṃ paṭivijjhītvā mudukeneva nam upāyena vissajjessāmī”ti cintetvā imam desanamārabhi.

So me tvam bhāgineyyo hosīti so tvam tasmim kāle mayham bhāgineyyo hosi. Idam pavenivasena vuttam. Devalokasmim pana mārassa pitu vamsō pitāmahassa vamsō rajjam karonto nāma natthi, puññavasena devaloke devarājā hutvā nibbato, yavatāyukam ṭhatvā cavati. Añño eko attanā katena kammena tasmim ṭhāne adhipati hutvā nibbattati. Iti ayam māropi tadā tato cavitvā puna kusalam katvā imasmim kāle tasmim adhipatiṭṭhāne nibbattoti veditabbo.

Vidhuroti vigatadhuro, aññehi saddhim asadisoti attho. **Appakasirenāti** appadukkhena. **Pasupālakāti** ajeḷakapālakā. **Pathāvinoti** maggapaṭipannā. **Kāye upacinitvāti** samantato citakam bandhitvā. **Aggim datvā pakkamimsūti** ettakena sarīram pariyādānam gamissatīti citakassa pamānam sallakkhetvā catūsu disāsu aggim datvā pakkamimsu. Citako padīpasikhā viya pajjali, therassa udakaleṇam pavisitvā nisinnakālo viya ahosi. **Cīvarāni papphotetvāti** samāpattito vuṭṭhāya vigatadhūme kiṃsukavaṇṇe aṅgāre maddamāno cīvarāni vidhunitvā. Sarīre panassa usumamattampi nāhosi, cīvaresu aṃsumattampi najjhāyi, samāpattiphalam

nāmetam.

508. Akkosathāti dasahi akkosavattūhi akkosatha. **Paribhāsathāti** vācāya paribhāsatha. **Rosethāti** ghaṭṭetha. **Vihesethāti** dukkhāpetha. Sabbametam vācāya ghaṭṭanasseva adhivacanam. **Yathā tam dūsī māroti** yathā etesam dūsī māro. **Labhetha otāranti** labhetha chiddam, kilesuppattiyā ārammaṇam paccayam labheyyāti attho. **Muṇḍakāti**ādisu muṇḍe muṇḍāti samaṇe ca samaṇāti vattum vaṭṭeyya, ime pana hīlentā muṇḍakā samaṇakāti āhaṃsu. **Ibbhāti** gahapatikā. **Kiṇhāti** kaṇhā, kālakāti attho. **Bandhupādāpaccāti** ettha **bandhūti** brahmā adhippeto. Tañhi brāhmaṇā pitāmahoti voharanti. Pādānaṃ apaccā **pādāpaccā**, brahmuno piṭṭhipādato jātāti adhippāyo. Tesam kira ayaṃ laddhi – “brāhmaṇā brahmuno mukhato nikkhantā, khattiyā urato, vessā nābhito, suddā jāṇuto, samaṇā piṭṭhipādato”ti.

Jhāyinosmā jhāyinosmāti jhāyino mayam jhāyino mayanti. **Madhurakajātāti** ālasiyajātā. **Jhāyantīti** cintayanti. **Pajjhāyantīti**ādīni upasaggavasena vaḍḍhitāni. **Mūsikaṃ maggayamānoti** sāyaṃ gocarattāya susirarukkhatto nikkhantaṃ rukkhasākhāya mūsikaṃ pariyesanto. So kira upasantūpasanto viya niccalova tiṭṭhati, sampattakāle mūsikaṃ sahasā gaṇhāti. **Kotthūti** siṅgālo, soṇotipi vadanti. **Sandhisamalasaṅkaṭireti** sandhimhi ca samale ca saṅkaṭire ca. Tattha **sandhi** nāma gharasandhi. **Samalo** nāma gūthaniddhamanapanāḷi. **Saṅkaṭiram** nāma saṅkārattāhānaṃ. **Vahacchinnoti** kantārato nikkhanto chinnavaho. **Sandhisamalasaṅkaṭireti** sandhimhi vā samale vā saṅkaṭire vā. Sopi hi baddhagatto viya niccalo jhāyati.

Nirayaṃ upapajjantīti sace māro manussānaṃ sarīre adhimuccitvā evaṃ kareyya, manussānaṃ akusalaṃ na bhaveyya, mārasseva bhaveyya. Sarīre pana anadhimuccitvā visabhāgavatthum vipphaṇṣārārammaṇam dasseti, tadā kira so bhikkhū khippaṃ gahetvā macche ajjhottharante viya, jālaṃ gahetvā macche gaṇhante viya, lepayatthiṃ oḍḍetvā sakuṇe bandhante viya, sunakhehi saddhiṃ araṇṇe migavaṃ carante viya, mātugāme gahetvā āpānabhūmiyaṃ nisinne viya, naccante viya, gāyante viya, bhikkhunīnaṃ rattiṭṭhānadivātthānesu visabhāgamanusse nisinne viya, ṭhite viya ca katvā dassesi. Manussā araṇṇagatāpi vanagatāpi vihāragatāpi vipphaṇṣārārammaṇam passitvā āgantvā aññesaṃ kathenti – “samaṇā evarūpaṃ assamaṇakaṃ ananucchavikaṃ karonti, etesaṃ dinne kuto kusalaṃ, mā etesaṃ kiñci adatthā”ti. Evaṃ te manussā diṭṭhadiṭṭhatthāne sīlavante akkosantā apuññaṃ pasavitvā apāyapūrakā ahesum. Tena vuttaṃ “nirayaṃ upapajjantī”ti.

509. Anvāviṭṭhāti āvaṭṭitā. **Pharitvā viharimsūti** na kevalaṃ pharitvā viharimsu. Kakusandhassa pana bhagavato ovāde ṭhatvā ime cattāro brahmavihāre nibbattetvā jhānapadaṭṭhānaṃ vipassanaṃ vaḍḍhetvā arahatte patiṭṭhahimsu.

510. Āgatiṃ vā gatiṃ vāti paṭisandhivasena āgamaṇaṭṭhānaṃ vā, cutivasena gamanaṭṭhānaṃ vā na jānāmi. **Siyā cittassa aññathattanti** somanassavasena aññathattaṃ bhaveyya. **Saggaṃ lokaṃ upapajjantīti** idhāpi purimanayeneva attho veditabbo. Yathā hi pubbe vipphaṇṣārakaraṃ ārammaṇam dasseti, evamidhāpi pasādakaraṃ. So kira tadā manussānaṃ dassanaṭṭhāne bhikkhū ākāse gacchante viya, ṭhite viya pallākenā nisinne viya, ākāse sūcikkammaṃ karonte viya, potthakaṃ vācente viya, ākāse cīvaraṃ pasāretvā kāyaṃ utum gaṇhāpente viya, navapabbajite ākāse carante viya, taruṇasāmaṇere ākāse ṭhatvā pupphāni ocinante viya katvā dassesi. Manussā araṇṇagatāpi vanagatāpi vihāragatāpi pabbajitānaṃ taṃ paṭipattiṃ disvā āgantvā aññesaṃ kathenti – “bhikkhūsu antamaso sāmaṇerāpi evaṃmahiddhiko mahānubhāvā, etesaṃ dīnaṃ mahapphalaṃ nāma hoti, etesaṃ detha sakkaroṭhā”ti. Tato manussā bhikkhusaṅghaṃ catūhi paccayehi sakkarontā bahuṃ puññaṃ katvā saggapathapūrakā ahesum. Tena vuttaṃ “saggaṃ lokaṃ upapajjantī”ti.

511. Etha tumhe, bhikkhave, asubhānupassino kāye viharathāti bhagavā sakalajambudīpaṃ āhiṇḍanto antamaso dvinnampi tiṇṇampi bhikkhūnaṃ vasanaṭṭhānaṃ gantvā –

“Asubhasaññāparicītena, bhikkhave, bhikkhuno cetasā bahulaṃ viharato methunadhammasamāpattiyā cittaṃ patilīyati patikuṭati pativattati na sampasāriyati, upekkhā vā pāṭikulyatā vā saṅṭhāti.

Āhāre pāṭikūlasaññāparicītena, bhikkhave, bhikkhuno cetasā bahulaṃ viharato rasataṇhāya cittaṃ patilīyati patikuṭati pativattati na sampasāriyati, upekkhā vā pāṭikulyatā vā saṅṭhāti.

Sabbaloke anabhiratisaññāparicitenā, bhikkhave, bhikkhuno cetasā bahulaṃ viharato lokacitresu cittaṃ patilīyati patikuṭṭati pativattati na sampasāriyati, upekkhā vā paṭikulyatā vā saṅṭhāti.

Aniccasaññāparicitenā, bhikkhave, bhikkhuno cetasā bahulaṃ viharato lābhasakkārasiloke cittaṃ patilīyati patikuṭṭati pativattati na sampasāriyati, upekkhā vā paṭikulyatā vā saṅṭhāti”ti (a. ni. 7.49) evaṃ ānisaṃsaṃ dassetvā –

Etha tumhe, bhikkhave, asubhānupassī kāye viharatha, āhāre paṭikūlasaññīno sabbaloke anabhiratisaññīno sabbasañkhāresu aniccānupassinoti. Imāni cattāri kammaṭṭhānāni kathesi. Tepi bhikkhū imesu catūsu kammaṭṭhānesu kammaṃ karontā vipassanaṃ vaḍḍhetvā sabbāsava khetvā arahatte patiṭṭhahimsu, imānipi cattāri kammaṭṭhānāni rāgasantāni dosamohasantāni rāgapatiṭṭhānāni dosamohapatiṭṭhānāni cāti.

512. Sakkharaṃ gahetvāti antomuṭṭhiyaṃ tiṭṭhanapamāṇaṃ pāsāṇaṃ gahetvā. Ayañhi brāhmaṇagahapatikehi bhikkhū akkosāpetvāpi, brāhmaṇagahapatikānaṃ vasena bhikkhusaṅghassa lābhasakkāraṃ uppādāpetvāpi, otāraṃ alabhanto idāni sahatthā upakkamitukāmo aññatarassa kumārassa sarīre adhimuccitvā evarūpaṃ pāsāṇaṃ aggahesi. Taṃ sandhāya vuttaṃ “sakkharaṃ gahetvā”ti.

Sīsaṃ vo bhindīti sīsaṃ bhindī, mahācammaṃ chijjivā maṃsaṃ dvedhā ahoṣi. Sakkharā panassa sīsakaṭāhaṃ abhinditvā aṭṭhiṃ āhacceva nivattā. **Nāgāpalokitaṃ apalokesīti** pahārasaddaṃ sutvā yathā nāma hatthināgo ito vā etto vā apaloketukāmo gīvaṃ aparivattetvā sakalasarīrenea nivattitvā apaloketi. Evaṃ sakalasarīrenea nivattitvā apalokesi. Yathā hi mahājanassa aṭṭhīni koṭiyā koṭiṃ āhacca ṭhitāni, paccekabuddhānaṃ aṅkusalaggāni, na evaṃ buddhānaṃ. Buddhānaṃ pana saṅkhalikāni viya ekābaddhāni hutvā ṭhitāni, tasmā pacchato apalokanakāle na sakkā hoti gīvaṃ parivattetuṃ. Yathā pana hatthināgo pacchābhāgaṃ apaloketukāmo sakalasarīrenea parivattati, evaṃ parivattitabbaṃ hoti. Tasmā bhagavā yantena parivattitā suvaṇṇapaṭimā viya sakalasarīrenea nivattitvā apalokesi, apaloketvā ṭhito pana, “na vāyaṃ dūsī māro mattamaññāsī”ti āha. Tassattho, ayaṃ dūsī māro pāpaṃ karonto neva pamāṇaṃ aññāsī, pamāṇātikantamakāsīti.

Sahāpalokanāyāti kakusandhassa bhagavato apalokaneneva saha taṅkhaṇaṇāneva. **Tamhā ca ṭhānā cavīti** tamhā ca devaṭṭhānā cuto, mahānirayaṃ upapannoti attho. Cavamāno hi na yattha katthaci ṭhito cavati, tasmā vasavattidevalokaṃ āgantvā cuto, “sahāpalokanāyā”ti ca vacanato na bhagavato apalokittā cutoti vedītabbo, cutikāladassanamattameva hetam. Uḷāre pana mahāsāvake viraddhattā kudāriyā pahaṭaṃ viyassa āyu tattheva chijjivā gatanti vedītabbaṃ. **Tayo nāmadheyyā hontīti** tīṇi nāmāni hontī. **Chaphassāyatanikoti** chasu phassāyatanesu pāṭiyekkāya vedanāya paccayo.

Saṅkusamāhatoti ayasūlehi samāhato. **Paccattavedaniyoti** sayameva vedanājanako. **Saṅkunā saṅku hadaye samāgaccheyyāti** ayasūlena saddhiṃ ayasūlaṃ hadayamajjhe samāgaccheyya. Tasmim kira niraye upapannānaṃ tigāvuto attabhāvo hoti, therassāpi tādiso ahoṣi. Athassa hi nirayapālā tālakhandhapamāṇāni ayasūlāni ādittāni sampajjalitāni sajotibhūtāni sayameva gahetvā punappunaṃ nivattamānā, – “iminā te ṭhānena cintetvā pāpaṃ kata”nti pūvadoṇiyaṃ pūvaṃ koṭṭento viya hadayamajjhaṃ koṭṭetvā, paṇṇāsa janā pādābhimukhā paṇṇāsa janā sīsābhimukhā koṭṭetvā gacchanti, evaṃ gacchantā pañcahi vassasatehi ubho ante patvā puna nivattamānā pañcahi vassasatehi hadayamajjhaṃ āgacchanti. Taṃ sandhāya evaṃ vuttaṃ.

Vuṭṭhānimanti vipākavuṭṭhānavedanaṃ. Sā kira mahāniraye vedanāto dukkhatarā hoti, yathā hi sinehapānasattāhato parihārasattāhaṃ dukkhataraṃ, evaṃ mahānirayadukkhatto ussade vipākavuṭṭhānavedanā dukkhatarāti vadanti. **Seyyathāpi macchassāti** purisaśiṣāñhi vaṭṭaṃ hoti, sūlena paharantassa pahāro ṭhānaṃ na labhati parigalati, macchāsīsaṃ āyataṃ puthulaṃ, pahāro ṭhānaṃ labhati, avirajjhivā kammakāraṇā sukarā hoti, tasmā evarūpaṃ sīsaṃ hoti.

513. Vidhuraṃ sāvakaṃ sajjāti vidhuraṃ sāvakaṃ ghaṭṭayitvā. **Paccattavedanāti** sayameva pāṭiyekavedanājanakā. **Īdiso nirayo āsīti** imasmim ṭhāne nirayo devadūtasuttēna dīpetabbo. **Kaṇha-dukkhaṃ nigacchassīti** kāḷaka-māra, dukkhaṃ vindissasi. **Majjhe sarassāti** mahāsamuddassa majjhe udakaṃ vatthuṃ katvā nibbattavimānāni kappāṭṭhitikāni hontī, tesam veḷuriyassa viya vaṇṇo hoti, pabbatamatthake jalitanaḷaggikkhandho viya ca nesam acciyo jotanti, pabhassarā pabhāsampannā hontī, tesu vimānesu

nīlabhedādivasena nānattavaṇṇā accharā naccanti. **Yo etamabhijānātīti** yo etaṃ vimānavatthum jānātīti attho. Evamettha vimānapetavatthukeneva attho veditabbo. **Pādaṅguṭṭhena kampayīti** idaṃ pāsādakampanasuttēna dīpetabbaṃ. **Yo vejayantam pāsādanti** idaṃ cūḷataṇhāsāṅkhayavimuttisuttēna dīpetabbaṃ. **Sakkaṃ so paripucchati** idampi teneva dīpetabbaṃ. **Sudhammāyābhito sabhanti** sudhammasabhāya samīpe, ayaṃ pana brahmaloke sudhammasabhāva, na tāvatimṣabhavane. Sudhammasabhāviraḥito hi devaloko nāma natthi.

Brahmaloke pabhassaranti brahmaloke mahāmogallānamahākassapādīhi sāvakehi saddhiṃ tassa tejjodhātum samāpajjitvā nisinnassa bhagavato obhāsaṃ. Ekasmiṇhi samaye bhagavā brahmaloke sudhammāya devasabhāya sannipatitvā, – “atthi nu kho koci samaṇo vā brāhmaṇo vā evaṃmahiddhiko. Yo idha āgantum sakkuṇeyyā”ti cintēntasseva brahmagaṇassa cittaṃmaññāya tattha gantvā brahmagaṇassa matthake nisinnō tejjodhātum samāpajjitvā mahāmogallānādīnaṃ āgamaṃ cintēsi. Tepi gantvā sathhāraṃ vanditvā tejjodhātum samāpajjitvā paccekaṃ disāsu nisīdiṃsu, sakalabrahmaloko ekobhāso ahosi. Sathhā catusaccappakāsaṇaṃ dhammaṃ desēsi, desanāpariyosāne anekāni brahmasahassāni maggaphalesu patitṭhahiṃsu. Taṃ sandhāyimā gāthā vuttā, so panāyamattho aññatarabrahmasuttēna dīpetabbo.

Vimokkhena aphassayīti jhānavimokkhena phusi. **Vananti** jambudīpaṃ. **Pubbavidehānanti** pubbavidehānaṅca dīpaṃ. **Ye ca bhūmisayā narāti bhūmisayā narā** nāma aparagoyānakā ca uttarakurukā ca. Tepi sabbe phusīti vuttaṃ hoti. Ayaṃ pana attho nandopanandadamanena dīpetabbo. Vatthu visuddhimagge iddhikathāya vitthāritaṃ. **Apuññaṃ pasavīti** apuññaṃ paṭilabhi. **Āsaṃ mā akāsi bhikkhūsūti** bhikkhū vihesemīti etaṃ āsaṃ mā akāsi. Sesam sabbattha uttānamevāti.

Papañcasūdaniyā majjhimanikāyaṭṭhakathāya

Māratajjanīyasuttavaṇṇanā niṭṭhitā.

Pañcamavaggavaṇṇanā niṭṭhitā.

Mūlapaṇṇāsaṭṭhakathā niṭṭhitā.